



New Testament

Peve Language

Peve - Bible - New Testament

Matthieu	3	
Marc	65	
Luc	104	
Jean	169	
Sin Daw Sini	218	
Rome	281	
1 Corinthe	309	
2 Corinthe	337	
Galatie	355	
Ephèse	365	
Philippes	374	
Colosses	381	
1 Thessalonique	387	
2 Thessalonique	393	
1 Timothée	396	
2 Timothée	404	
Tite	410	
Philémon	414	
Hébreux	416	
Jacques	436	
1 Pierre	443	
2 Pierre	450	
1 Jean	455	
2 Jean	462	
3 Jean	463	
Jude	464	
Kwawe	466	

Peve - Bible - New Testament

Matthieu

Matthieu 1

- ¹Semde sôwâ mœni Zezu Kris vra' wə zu tlor nday kuni ni na: Mum nə vay David mœni vay Abraham.
- ²Abraham vra' Isak, Isak vra' Yakub, Yakub vra' Yudas kə daw ya umu.
- ³Yudas vra' Fares kə Zara, (ya nday de kə Tamar). Fares vra' Esrom, Esrom vra' Aram.
- ⁴Aram vra' Aminadab, Aminadab vra' Nason, Nason vra' Salmoŋ.
- ⁵Salmoŋ vra' Boz, (ya um de kə Rahab). Bowaz vra' Obed, (ya um de kə Rut). Obed vra' Jese.
- ⁶Jese vra' jwə David. David vra' Salomoŋ, (ya um ke ma Uriya).
- ⁷Salomoŋ vra' Robowam, Robowam vra' Abiya, Abiya vra' Asaf.
- ⁸Asaf vra' Zozafat, Zozafat vra' Yoram, Yoram vra' Ozias.
- ⁹Ozias vra' Yotam, Yotam vra' Akaz, Akaz vra' Ezequias.
- ¹⁰Ezequias vra' Manase, Manase vra' Amon, Amon vra' Zozias.
- ¹¹Zozias vra' Zekoniyas kə daw ya um, kəri mœni sôwâ mœsin ra' sôwâ Israyel ta nya Babiloŋ kə ndaya.
- ¹²Kəki mœni sôwâ mœsin ra' sôwâ Israyel ta nya Babiloŋ kə nday, Zekoniyas vra' Salatiyel, Salatiyel vra' Zorobabel.
- ¹³Zorobabel vra' Abiyud, Abiyud vra' Eliyakim, Eliyakim vra' Azor.
- ¹⁴Azor vra' Sadok, Sadok vra' Akim, Akim vra' Eliyud.
- ¹⁵Eliyud vra' Eleyazar, Eleyazar vra' Matan, Matan vra' Yakub,
- ¹⁶Yakub vra' Zozef, nji Mari mœti vra' Zezu mə de kə Kris.
- ¹⁷Zu tlor nday kə buwa kə buwa daka Abraham hâ David gi guḅ wa fədi'i. Daka David hâ day ri mœni sôwâ mœsin ra' sôwâ Israyel ta nya Babiloŋ kə nday gi guḅ wa fədi' ta', ḅay daka ri mœni sôwâ mœsin ra' sôwâ Israyel ta nya Babiloŋ kə nday hâ day ri vra' Kris gi guḅ wa fədi' ta'a.
- ¹⁸Dan vra' Zezu Kris nə kə vari ndə ni na'a: Ya um, Mari, nja Zozef, ama cop ka handay cu cin nji mœto', ta dūm ur kə gbəgboŋ Simbed' mə Kəleŋe.

¹⁹Nja sɛ, Zozef, nɛ swɛ mɛ njɛɛ. Mum cu wa' i dan rum nɛ do mi. Zɛ rum, mum wa' kɛdan mum sɛ ar 'yɛɛ.

²⁰Kɛri mɛni mum wɛ dɪk dan rum dɪk ɓɔ, vay sin Bârî mɛ wafray mbɛ hay' rum kɛ mɛsini. Mum la' ne numu: «Zozef, vay David, a ne wɛlok dan tle Mari cin ndɛ ma wû mi, zɛ ta dũm ur kɛ Simbed mɛ Kɛɛɛɛ.

²¹Ta dɛ vra' vay mɛ nji. A ne semdɛ Zezu ne num, zɛ mum wɛ dɛ sid' sôwâ um du kwa bro' ndaya.”

²²Kwa rum daɲ' gi ndɛna' kɛdan nyen mbi dan mɛni Bârî in kɛ vun bɛ ka' dana:

²³«Way dɛ dũm ur, ɓay ta dɛ vra' vay mɛ nji. Sôwâ dɛ um dɛ kɛ Emanuyel.» Sem rum wa' dan ini: «If ray kɛta' kɛ mba».

²⁴Kɛri mɛni Zozef dla' sen, mum gi ce' ndɛ mɛni vay sin Bârî mɛ wafray in ne numu. Mum tle ma rum cini.

²⁵Ama mum cu bar kɛ sɛ mi, hâ ta vra' vay mɛ nji. Zozef ne semdɛ ne Zezu ne numu.

Matthieu 2

¹Zezu vra' so Betlehem wɛ nya Zude, kɛ ri mɛni Herodɛ suk jwɛ wɛ hana. Kɛki vra' um, sum kwawe mɛni we ciciw car ga' fɛta bɛka, mbɛ day so Jeruzalem.

²Handay ci vun: «Vay mɛni vra' ɓay wɛ dɛ suk jwɛ wa sôwâ Zuwif nɛ wɛ ka su? Namba we ciciw um car mbɛ ga' fɛta bɛka, ɓay namba mbɛ kɛdan namba um buru.”

³Kɛri mɛni jwɛ Herodɛ mun dan rum, vunduk par num juk kɛ sôwâ daɲ' mɛni gay' wɛ so Jeruzalem ta'a.

⁴Mum ɓawa sum rôwâ mɛ du sum po' fur kɛ sum pay zu dan dlay mɛ du sôwâ ɓay ci vun ndaya: «Kris dɛ vra' wɛ ka su?”

⁵Handay dam vun rumu: «Mum dɛ vra' wɛ so Betlehem wɛ nya Zude, zɛ bɛ ka' dan wâ'y'i:

⁶ɓay hɛɲ, so Betlehem wɛ nya Zude, hɛɲ cu kî wɛ du so mɛ mbri mɛ nya Zude mi. Zɛ jwɛ dɛ pâ mbɛ rawti riɲ, mum kɛ mɛni dɛ ji sôwâ man, Israyel.”

⁷Zɛ rum, Herodɛ dɛ sum kwawe 'yɛɲ ɓay ci vun ndaya: «Ciciw mbɛ dɛri kɛ ma su?”

⁸Mum faɲ sin nday ta so Betlehem kɛ in nday ne: «I dɛ ye, ɓay i keɓ vay nɛ kɛ ɓayrumu. Kɛri mɛni hi la' za' num si, i faɲ mbɛ ta' ri rum ne nan kɛdan na dɛ um bur kɛ tu rin ta'a.”

⁹Kɛki mɛni handay mun dan jwɛ, handay 'ya dle. Handay we ciciw mɛni handay ke we wɛ ga' fɛta bɛka. Ciciw rum wɛ ta kor nday, ama kɛri mɛni mum mbɛ day wɛ ri mɛni vay nɛ wɛ han, mum cara.

¹⁰Kɛri mɛni handay we ciciw nɛ, handay tuk kɛdam juku.

¹¹Handay cok ta rawti so, bay handay we vay nə kə ya um Mari, handay kuduk nya kor rum bay bur numu. Handay ulay' kwazi' nday, bay handay ne kwane ne numu: Njike mə bondo, kwa mə sî ndə urdi mə də kə «aṇsaṇ», kə mbir gu mə də kə «mir».

¹²Kəki rum, Ifray ta' kwa ne nday kə məsin kədan kuni faṇ də hay' Herodə za' mi. Zə rum, handay tle vari məsin ta nya ndaya.

¹³Kəki məni sum kwawe 'ya dle, vay sin Bârî mə wafray mbə hay' Zozef kə məsin bay la' ne numu: «A car, a tle vay kə ya um, bay a ne də nya Egip kə ndaya, a suk han hâ day ri məni na də wû ini: A gewa ye. Zə Herodə wə də keḃ vay nə kədan mum um ci.»

¹⁴Zozef car, tle vay kə ya um bay 'ya kə dukri rum ta nya Egip kə ndaya.

¹⁵Mum suk han hâ Herodə mara. Kwa rum gi ndəna' kədan nyen mbi dan məni Bârî in kə vun bə ka' dana: «Na də Vay man pā mbə nya Egip.»

¹⁶Kəri məni Herodə we i sum kwawe ru num, mum tle bak juku. Mum ne vari kədan ci daw njiwkwa daṇ' wə so Betlehem məni gi kim hoḃ ko məni cu day kim hoḃ mətə' ce' ndə məni mum mun dan rum kə vun sum kwawe wa dan ri məni ciciw mbə dəri.

¹⁷Kwa rum gi ndəna' kədan nyen mbi dan məni bə ka' dan mə də kə Jeremi ini:

¹⁸«Sôwâ mun wor wə so Rama, wor rum ci' kə ge wor bayrumu. Rakel wə ci' zə daw sə, bay ta cu gak ve kədan sôwâ sə red' vunduk ne mi, zə daw sə daṇ' mar si.»

¹⁹Kəri məni Herodə mar si, vay sin Bârî mə wafray mbə hay' Zozef wə nya Egip kə məsini.

²⁰Mum la' ne numu: «A car, a tle vay kə ya um, bay a faṇ də nya Israyel kə nday, zə sôwâ məni ke keḃ vay nə kədan ci kuni, mar si.»

²¹Zə rum, Zozef car, tle vay kə ya um bay faṇ ta nya Israyel kə ndaya.

²²Ama mum mun i Arkelawus suk jwə tan Herodə, ba um wə nya Zude. Zə rum mum ne wəlok kədan mum suk wə nya rumu. Ifray mbə ta' kwa ne num kə məsin, bay mum 'ya dle ta nya Galile.

²³Mum ta suk wə so mə də kə Nazaret. Kwa rum gi ndəna' kədan nyen mbi dan məni sum ka' dan ini: «Sôwâ də um də kə swə Nazaret.»

Matthieu 3

¹Kəri rum, Zaṇ-Baptistə mbə du igop nya Zude bay təṇ kə ka' dana.

²Mum ini: «I faṇ vunduk ri, zə jwə mə wafray nə mbə həre'e!»

³Zaṇ nə swə məni bə ka' dan mə də kə Esaya in dan wa rum kəri məni mum ini: «Wor swə wə ka' dan du igopo: I gila' vari zə Bârî, i gi vari rum sərəṇ ne numu!»

⁴Zaṇ ge mbraw mə ci kə sâ njoṇjjoṇ bay mum bok fir kə zew dike. Mum ti cumo' kə mur diṁ mə gopo.

⁵Ndəna', sôwâ so Jeruzalem kə nya Zude daŋ' bay nya mə həre' kə ze Zurdeŋ mbə kuni hay' rumu.

⁶Handay in dan kwa bro' nday, bay Zaŋ gi baptem ne nday wə ze Zurdeŋ.

⁷Kəri məni Zaŋ we sôwâ məsin wə du kul sôwâ Zuwif mə də kə Farisiyen kə sôwâ məsin wə du kul sôwâ Zuwif mə də kə Sadusiyeŋ juk mbə hay' rum kədan handay ve baptem, mum la' ne ndaya: «Hi zə zep kay'i! Sa nə ta' ne ni i hi gak sid' wə kor bak Ifray məni wə də mbə nə su?

⁸I gi kwa məni wə ta' i hi faŋ vunduk ri si,

⁹bay i dīk wə vunduk ri i Abraham nə ba mbri ramba mi. Zə na in mi ne: Ifray gak ra' gway' məni kuni bay nday gi faŋ daw Abraham!

¹⁰Bay bə tum gu tle ced' kədan mum tum gu kə ndi wə zu tlor rumu. Gu daŋ' məni cu vra' vra' mə bay mi, sôwâ də tum njay də ku.

¹¹Mə na, na gi baptem ne ni kə mbi kədan ta' i hi faŋ vunduk ri si, ama swə məni wə də mbə kəki rin, mum də gi baptem mi ne kə Simbed' mə Kəleŋ bay kə ku. Mum pâ nan kə mbra' si. Na cu nde i goḍ kədan na ulay' zew tərak um mi.

¹²Mum kə kwa sa' u wə ɓa rum kədan mum sa' rəfê də rəka bay ar u. Mum də ra' u njay də zəna um, ama mum də ye' rəfê rum kə ku məni cu mar i kpe mi.”

¹³Kəri rum, Zezu car wə nya Galile mbə wə ze Zurdeŋ. Mum mbə hay' Zaŋ kədan mum ve baptem ɓa rumu.

¹⁴Zaŋ cu mun mi, bay mum la' ne numu: «Na wə wa' kədan ha gi baptem man ne, bay ha faŋ mbə ve ɓa rin su?”

¹⁵Ama Zezu dām vun rumu: «A ve dan rum ndə na' kə mə mgbaŋ ni na. Zə kə vari mə ni nə namba də nyen mbi sin daŋ' məni Ifray wə wa'a.» Zə rum, Zaŋ ve dan rumu.

¹⁶Kəri məni Zezu fe baptem, mum pâ mbə mbi. Kəkor sar, wafray ar vun, bay mum we Simbed' Ifray dām mbə wa rum ce' ndə kuruku.

¹⁷Bay wor car mbə wafray ini: «Məni nə Vay man məni na ba. Na wə tuk kədam kə rumu.»

Matthieu 4

¹Ndəna', Simbed' mə Kəleŋ pla' Zezu ta du igop kədan Satan um ɓu wə hana.

²Zezu suk wə du igop kə saŋ kwati bəka gufədi' kə dukri gufədi', bay mê' ti numu.

³Satan mbə hay' rum bay la' ne numu: «Ha la' Vay Ifray si, a in ne kə gway' məni kuni faŋ kwati ri'i.”

⁴Zezu dām vun rumu: «Dan rum wây' wə du dərwa: Swə cu gak ke kə i zə kwati taw mi, ama zə dan daŋ' məni wə pâ mbə vun Ifraya.”

⁵Bay Satan faɲ tle num ta wə so mənɪ Ifray par cin nə kə rumu. Mum cin num ta wa so Ifray

⁶bay la' ne numu: «Ha la' Vay Ifray si, a sa' dam də nya kə tu ru ri', zə Dan rum wây' wə du ɖerwa: Ifray də in dan ne kə sum sin um mə wafray wa ru, bay handay də wû tle kə ba nday kədan ha də dle wa sem wa gway' mi.»

⁷Zezu ɖam vun rumu: «Derwa Ifray wə in kəreme: A kənji' Bârî, Ifray wû, mi.»

⁸Satan faɲ tle num ta wa igway' mə mbud' jərak kə rum bay mum ta' jwə nya ne num kə mbra' nday ɖaɲ'

⁹bay la' ne numu: «Ha la' kuduk nya kor rin kədan ha man bur si, na də wû ne kwa mə ni kuni ɖaɲ'ɲ.»

¹⁰Zezu faɲ ɖam vun rumu: «A 'ya hay' rin si, Satan! Zə Dan rum wây' wə du ɖerwa: A bur Bârî, Ifray wû, bay a gi zə rum ɖaw sara.»

¹¹Kəki rum, Satan 'ya ar numu. Daw sin Ifray mə wafray mbə hay' Zezu bay təɲ kə gi zə rumu.

¹²Kəri mənɪ Zezu mun i soje kaw Zaɲ ge ta so ɖaɲgay', mum 'ya ta nya Galile.

¹³Mum cu suk wə so Nazaret mi, ama mum 'ya ta suk so Kapernawum, so mənɪ suk wə vun ya mbi, wə nya Zabulon kə Neftali,

¹⁴mum gi ndəna' kədan nyen mbi dan mənɪ bə ka' dan mə ɖe kə Esaya ini:

¹⁵«Nya Zabulon kə nya Neftali, mənɪ wə ga' vari ya mbi dapa ga' məsin ze Zurdeɲ, nya Galile mə sôwâ mənɪ cu zə saɲ sôwâ Zuwif mi!

¹⁶Sôwâ mənɪ gay' wə ri mə ura' də weri mə bu mə mbri! Ri mə bu də car mbə ɖeri zə sôwâ mənɪ gay' wə nya njəbo mara!»

¹⁷Daka ri rum, Zezu təɲ kə ka' dana. Mum ini: «I faɲ vunduk ri, zə jwə mə wafray nə mbə hərə'e!»

¹⁸Kəri mənɪ Zezu wə ta vun ya mbi Galile, mum we daw ya mə ɖaw hoɓ wə lam mbi, Simoɲ (mə ɖe kə Piyer) kə njər rum Andre. Handay wə ɖã ziw də mbi.

¹⁹Zezu la' ne ndaya: «I mbə ta zə rin, bay na də mi gi faɲ sum keɓ sumra'a.»

²⁰Kəkor sar, handay ar ziw nday njay bay ta zə rumu.

²¹Mum ta ta kofo kî, bay mum we daw ya mə ɖaw hoɓ məsini, Zakə kə Zaɲ, daw Zebede. Handay gay' wə rawti da nday kə ba nday Zebede. Handay wə gila' ziw ndaya. Zezu ɖe ndaya.

²²Kəkor sar, handay ar da nday kə ba nday bay ta zə Zezu.

²³Zezu gaɲ wə nya Galile ɖaɲ'ɲ, mum ta' kwa wə rawti so mun dan Ifray sôwâ Zuwif wə nya rum ɖaɲ'ɲ. Mum ka' Dan mə Kəɖam mənɪ wə in dan wa dan vari mənɪ Ifray

wə də suk jwə wa sôwâ um, bay mum hərəŋ sôwâ mənɪ kə gaʔ kə sôwâ mənɪ kə rəʔo daŋ'ŋ.

²⁴Semɛ Zezu ci' ndap nya Siri daŋ', bay sôwâ ra' sôwâ mənɪ wə ta' ca kə gaʔ cem cem, kə sôwâ mənɪ wə ce boni, bay sôwâ mənɪ kə gam wa nday, kə sôwâ mənɪ kə gaʔ kwa mə tlətɛ, bay hurbu daŋ' mbə hay' Zezu kə ndaya, bay Zezu hərəŋ ndaya.

²⁵Raw sôwâ car mbə nya Galile, kə kawvun so mə mbri guʔ mə nya Grek, bay so Jeruzalem, kə nya Zude, bay nya mənɪ wə dapa ze Zurdeŋ mbə ta zə rumu.

Matthieu 5

¹Kəri mənɪ Zezu we raw sôwâ, mum ur ta wa igway' bay mum suk hana. Sum ta zə rum mbə hay' rumu.

²Bay mum təŋ kə ta' kwa nday ne kə vun rum kə ini:

³«Kəɗam zə sôwâ mənɪ we wə vunduk nday i handay sum ca kor Ifray, zə handay də ke kə Ifray wə ri suk um mənɪ mum wə də suk jwə wa sôwâ umu!

⁴Kəɗam zə sôwâ mənɪ wə ɗik dan, zə Ifray də ɓu vun ndaya!

⁵Kəɗam zə sôwâ mənɪ wə hom tu nday, zə handay də ti nya ce' ndə mənɪ Ifray kawvun kə nday wa rumu!

⁶Kəɗam zə sôwâ mənɪ kə mē' kədan handay gi kwa mə njeŋ mənɪ Ifray wə wa'a, zə Ifray də nday ne ndaka!

⁷Kəɗam zə sôwâ mənɪ wə we ca wa sôwâ məsin, zə Ifray də we ca wa ndaya!

⁸Kəɗam zə sôwâ mənɪ kə vunduk mə fel, zə handay də we Ifraya!

⁹Kəɗam zə sôwâ mənɪ wə gi sôwâ gay' heʔ mbok nji, zə Ifray də nday ɗe kə daw umu!

¹⁰Kəɗam zə sôwâ mənɪ wə ce boni zə handay wə gi kwa mə njeŋ mənɪ Ifray wə wa', zə handay də ke kə Ifray wə ri mənɪ mum wə də suk jwə wa sôwâ umu!

¹¹Sôwâ la' wə mi i, wə gi boni mi ne, bay wə hay dan wa ri, kə in dan mə bro' cem cem wa ri zə hi sum ta zə rin si, i tuk kəɗama!

¹²I kəɗam tu ri, bay i tuk kəɗam zə bal cik mə toŋ wə mi ji wafraya. Zə sôwâ məsin gi boni ne kə sum ka' dan mə vun kofo ndəna' ta'a."

¹³«Hi ce' ndə vu du sôwâ nya. Ama vu la' so' walak um si, swə gak gi ma kədan mum um gi faŋ walak kərem su? Vu rum cu kə sin za' mi. Say swə um njay də rəka bay sôwâ ta wa rumu.

¹⁴Hi ce' ndə ri mə ɓu du sôwâ nya. Swə cu gak pe' so mənɪ ɗam wə wa igway' mi.

¹⁵Swə ɗaw cu ge ku wə baŋgay kədan mum um cin də ɗəŋɗal mi. Zawa, mum um cin wa kwa cin baŋgay kədan ɗeri wa sôwâ daŋ' mənɪ wə rawti so rum rumu.

¹⁶Ndona' ta', ri mə bu mi nə dɛri kor sôwâ kɛdan handay we sin mə bay mɛni hi wə gi, bay kɛdan handay gi mbra' ne kə Ba mi mɛni wə wafraya.”

¹⁷«I dɪk dan i na mbə kɛdan na dɛnok dan dlay Moyizə ko dan ka' sum ka' dan mi. Na cu mbə kɛdan na nday dɛnok mi, ama kɛdan na nyen mbi dan ndaya.

¹⁸Na in mi ne, kəzini: Kəri wafray kə nya wə də ndo', dan mə kî mɛni wây' wə du dan dlay ko kwa mə kî mɛni sôwâ wây' wa dan rum cu də vrum də rəka mi, hâ day vun ndo' kwa daŋ'ŋ.

¹⁹Zə rum, swə mɛni cu mun vun dan dlay nə, ko dan mə kî wə du dan dlay mi, ama mum ta' ne kə sôwâ mɛsin kɛdan handay gi ndə na' ta', bə rum də ke swə mə uray wə ri mɛni Ifray wə də suk jwə wa sôwâ umu. Ama swə mɛni ta zə dan dlay, bay mum ta' ne kə sôwâ mɛsin kɛdan handay gi ndə na' ta', bə rum də ke swə mə kə toŋ wə ri mɛni Ifray wə də suk jwə wa sôwâ umu.

²⁰Na in mi ne: Hi la' cu gi kwa mə njeŋ mɛni Ifray wə wa' nə pâ sum pay zu dan dlay kə kul sôwâ Zuwif mə dɛ kə Farisiyen mi si, hi cu gak ze wə ri mɛni Ifray wə də suk jwə wa sôwâ um nə mi.”

²¹«Hi mun dan mɛni ke in ne kə ba mbri mi: I ci mar mi: Sa su daŋ' mɛni ci mar, bə bok dan də bok dan wa rumu.”

²²Ama mə na, na in mi ne: Sa su daŋ' mɛni tle bak kə vay ba um, bə bok dan də bok dan wa rumu. Swə mɛni in ne kə vay ba um: tumbudzu, sôwâ də kor sum rôwâ Fada mə Mbri kə rumu. Swə mɛni in ne kə vay ba um: "laya", bə rum nde i də ri ku si.

²³Ha la' mbə wə ri po' fur kor Ifray kə kwane si, bay ha la' dla' wa dan wə han i vay ba wû kə dan wa ru si,

²⁴a ar kwane rum wə ri po' fur rum, bay a də gila' dan rum kə vay ba wû copo. Kəki rum, a faŋ mbə ne kwane rum ne kə Ifraya.

²⁵«Ha la' kə dan kə swə bay mum wə də kor bə bok dan kə ru si, a ghar gila' dan wû kə rum kəri mɛni hi wə vari ɓo. La' cu mi si, mum ar nu də ɓa bə bok dan, bay bə bok dan nə də wû ar də ɓa soje, bay soje nə də wû ge də so daŋgay'i.

²⁶Na in wû ne, kəzini: Ha cu də pâ mbə han mi, hâ ha po' bal selay mə wa ru nə si cete!”

²⁷«Hi mun dan dlay ini: I gi nja mi.

²⁸Ama mə na, na in mi ne: Sa su daŋ' mɛni kar ma swə mɛsin bay sɛna' sɛ, bə rum gi nja kə sɛ wə vunduk rum si.

²⁹La' ndona' si, i ɓa fun ru la' wû bu kɛdan ha nde du kwa mə bro' si, a par num ge də rəka seŋ kə ru. Pram zə ru kɛdan ha vi' kwa tu ru daw, pâ mɛni sôwâ də ge tu ru daŋ' də ri ku.

³⁰«Ba fun ru la' wû bu kədan ha nde də du kwa mə bro' si, a hay num ge də rəka seŋ kə ru. Pram zə ru kədan ha vi' kwa tu ru daw, pā mənɪ ha də ri ku mə də hā kə tu ru daŋ'ŋ.»

³¹«Dan rum ke in ta'a: Swə mənɪ bur ma rum, bə rum gak wây' dərwa bur nji sə ne.

³²Ama mə na, na in mi ne: Sasu daŋ' mənɪ bur ma rum mətɪ cu gi ghəghay mi, bay ta la' cin nji məsin si, ka bə rum pla' sə gi nja. Bay swə mənɪ cin ma mətɪ nji sə bur sə, mum gi nja ta'a.»

³³«Hi mun dan mənɪ ke in ne kə ba mbri ramba ta'a: A bur dan sur vun wû mi, ama a nyen mbi dan mənɪ ha kawvun kə sur vun wa rum kor Bârî.

³⁴Ama mə na, na in mi ne: I sur vun day mi! I sur vun kə wafray mi, zə ri suk Ifray wə hana.

³⁵I sur vun kə nya mi, zə nya nə ri njay sem Ifraya. I sur vun kə so Jeruzalem mi, zə so rum so Jwə mə mbri.

³⁶A sur vun kə wa tu ru mi, zə ha cu gak gi sâ wa tu ru daw faŋ mə bu ko mə ura' mi.

³⁷I in "awo" ko "â â" sara. Dan daŋ' mənɪ ha in mə pā dan mənɪ nə car mbə hay' Satan.»

³⁸«Hi mun dan mənɪ ke ini: I wə po' i, bay se' wə po' se'e.

³⁹Ama mə na, na in mi ne: I sa' bal wa swə mənɪ wə gi kwa mə bro' hay' ri nə mi. Swə la' ge zə hum ba fun ru si, a faŋ mə ba gur cin ne num ta'a.

⁴⁰Swə la' tum sem ru kədan mum tle mbraw mə nyêw wû si, a ar num tle mbraw jewre wû ta'a.

⁴¹Swə la' gi nu kə dole kədan ha tle kwazi' ta kə ndi i kilometrə daw si, a tle kwazi' rum ta kə ndi kilometrə hoɓo.

⁴²Swə la' o kwa ba ru si, a ne numu. Swə la' o bal ba ru si, a vad'ne num mi.»

⁴³«Hi mun dan mənɪ ke ini: A bə jik wû, bay a sî bə sî wû.

⁴⁴Ama mə na, na in mi ne: I bə sum sî mi, bay i o Ifray zə sôwâ mənɪ wə gi boni mi ne,

⁴⁵kədan hi faŋ daw Ba mi mə wafraya. Zə mum wə ar fəta um dam zu mbə wa sôwâ mə bro' kə sôwâ mə bay hoɓ jaka. Mum wə ar buŋô se mbə wa sôwâ mə njeŋ kə sôwâ mə vur vur hoɓ jak ta'a.

⁴⁶Hi la' wə bə sôwâ mənɪ wə mi bə nə taw si, zə mi hi wə ji bal cik mə Ifray su? Sôwâ mənɪ bəwa grama wə gi ndəna' ta'a!

⁴⁷Hi la' kaw jeɓ daw ba mi taw si, ka hi wə gi kwa mə toŋ su? Sôwâ mə dan we Ifray wə gi ndəna' ta'a!

⁴⁸Zə rum, i ke njeŋ, ce' ndə mənɪ Ba mi mə wafray mum njeŋe.»

Matthieu 6

¹«Kəri mənı hi wə gi sin mə njeŋ, i gi sin rum kor sôwâ kədan handay gak kar ni taw mi. Hi la' gi ndəna' si, hi cu də fe bal cik wə ɓa Ba mi mə wafray mi.

²Kəri mənı ha wə ne kwa kə sum ca, a ka' dan rum ce' ndə sum vur vur wə gi mi. Handay wə ka' dan wa rum wə rawti so po' fur sôwâ zuwif sôwâ Zuwif ɓay wə vari ta'a. Handay wə gi ndəna' kədan fe mbra' ndi hay' sôwâ. Na in mi ne kəzini: Handay fe bal cik nday si.

³Ama mə ha, kəri mənı ha tle ɓa gur wû kədan ne kwa kə sum ca, a ne kə vari mənı ɓa fun ru nə gak we mi,

⁴kədan kwane rum nə ke 'yeŋe. Bay Ba wû mənı wə we kwa mənı ha gi 'yeŋ, mum də wû ne bal cik wû.”

⁵«Kəri mənı hi wə o kə Ifray, i gi ce' ndə sum vur vur mi. Handay wa' i handay car fray kədan handay in dan kə Ifray wə rawti so Ifray sôwâ Zuwif, ɓay wə hay' vari kədan sôwâ daŋ' nday kara. Na in mi ne, kəzini: Handay fe bal cik nday si.

⁶Ama mə ha, kəri mənı ha wə in dan kə Ifray, a ze də rawti so wû, a ta' vun vari, ɓay a in dan kə Ba wû wə ri pe', ɓay Ba wû mənı wə we kwa mənı ha wə gi 'yeŋ, mum də wû ne bal cik wû.

⁷Kəri mənı hi wə in dan kə Ifray, i in dan raw raw ce' ndə sôwâ mə dan we Ifray wə gi nə mi. Handay wə dık i handay la' ge dan raw si, Ifray də nday munu.

⁸I jənok zu nday mi, zə Ba mi we kwa mənı hi kə mē' rum cop ka hi cu in dan kə num mətə'o.”

⁹«I in dan kə Ifray kə vari mə ni na: Ba mba mə wafray, namba wə wa' i sôwâ daŋ' mbra' semde ru.

¹⁰Namba wə wa' i a mbə suk jwə wa mba. Namba wə wa' i a gi kwa mənı ha wə wa' wa nya, ce' ndə mənı ha wə gi wafraya.

¹¹A ne mba kwati i mē' mba mə tama.

¹²A vrum kwa mə bro' mba ce' ndə mənı namba wə vrum kwa bro' mənı sôwâ məsin wə gi hay' mba.

¹³Bay a də kə mba wə ri mənı kwa mə bro' gak mba ɓu han nə mi, ama a ɓar mba mbə ɓa Satan. [Zə ha kə mənı suk jwə, ha kə gbəgboŋ, ɓay ha kə mbra' hâ də hâ. Amen.»]

¹⁴«Hi la' wə vrum kwa mə bro' mənı sôwâ məsin wə gi hay' ri nə si, Ba mi mə wafray də vrum kwa mə bro' mi ta'a.

¹⁵Ama hi la' cu wə vrum kwa mə bro' mənı sôwâ məsin wə gi hay' ri nə mi si, Ba mi cu də vrum kwa mə bro' mi mə ta'a.”

¹⁶«Kəri mənı hi wə saŋ kwa, i gay' sototo ce' ndə sum vur vur wə gi mi. Handay wə gay' sototo kədan sôwâ daŋ' we i handay wə saŋ kwa. Na in mi ne, kəzini: Handay fe bal cik nday si.

¹⁷Ama mə ha, kəri mənı ha wə saŋ kwa, a mbi i ru, bay a wu' mur mə sî sî wa ru,

¹⁸kədan sôwâ gak we i ha wə saŋ kwa mi. Ba wû mənı wə ri pe', mum we taw, bay Ba wû mənı we kwa mənı ha wə gi 'yeŋ, mum də wû ne bal cik wû."

¹⁹«I bəwa ndak mi wa nya mənı nə mi. Zə wə ri rum ciŋgura' wə tum kwa, bay hura wə kəy vun so kədan handay ra' kwa wə hana.

²⁰Zawa, i bəwa ndak mi də wafraya. Wə ri rum kwa far kwa cu gak ti kwa wə han mi, bay hura cu gak kəy vun so kədan handay ra' kwa wə han mi.

²¹Zə ri mənı ha bəwa ndak wû wə han, vunduk ru wə ke han ta'a."

²²«I ru ce' ndə baŋgay mə tu ru. I ru la' bay si, tu ru daŋ' wə ke du ri mə bu.

²³Ama i ru la' kə gaḅ si, tu ru daŋ' wə ke du ri mə ura'a. Zə rum, ri mə bu tu ru la' faŋ ri mə ura' si, ura' rum də ke bayrumu!"

²⁴«Swə ḁaw cu gak gi sin zə sum rôwâ hoḅ mi. Mum də sî ḁaw bay mum də bə swə məsini. Mum də ta zə swə ḁaw bay mum də jed' swə məsini. Hi cu gak gi sin zə Ifray kə səlay hoḅ jak wə ri mə ḁaw mi."

²⁵«Zə rum, na in mi ne: I ḁik dan wa kwati kə kwace mənı hi kə mē' rum zə bəka nyî ri nə mi, ko zə mbraw mənı hi kə mē' rum zə tu ri nə mi. Bəka nyî ri kə mbra' pâ kwati si, bay tu ri kə mbra' pâ mbraw si. Cu ndəna' mə su?

²⁶I kar rugwa mənı wə dla' wafray ri'i. Handay cu jo' kwa, ko bəwa kwa wakaya mi. Handay cu bəwa kwa njay də zəna mi, ama Ba mi mə wafray wə nday uru. Hi cu kə mbra' bayrum pâ rugwa mə su?

²⁷Sa du ri gak ge bəka nyî um də han ḁaw kə dan ḁik um nə su?"

²⁸Zə mi hi wə ḁik dan zə mbraw ge tu ri su? I kar wəḁi kwa mənı wə wəḁi du gop ri'i. Handay cu cik kə gi sin ko ci zim mi.

²⁹Ama na in mi ne: Ko Salomonj kə ndak um daŋ' cu ge mbraw mə bay pâ wəḁi kwa mənı kuni ḁaw mi.

³⁰Ifray wə ge mbraw ne kə za mənı wə gop tam, bay siw sôwâ də ge ku rumu. La' ndəna' si, mum cu də ge mbraw mi ne nday pâ mə su? Hi sôwâ mə kə ô kî!

³¹Zə rum, i ḁik dan kə ini: Namba də ti mi su? Namba də ce mi su? Namba də ge mi wə tu mba su mi?

³²Sôwâ mənı cu we Mesi mi wə keḅ kwa mə ni kuni bəka daŋ'ŋ. Ama Ba mi mə wafray we kwa mənı hi kə mē' rum nə si.

³³I ḁik dan wa ri mənı Ifray wə də suk jwə wa ri kə gi kwa mə njeŋ mənı mum wə wa' nə cop, bay mum də mi ne kam kwa mənı kuni daŋ'ŋ.

³⁴I dɛk dan wa bɛka mɛ siw mi. Bɛka mɛ siw dɛ mi ne dan dɛk um bo. Cik mɛni wɛ mbɛ kɛ bɛka dɛw dɛw dɛɲ' ndɛ i bɛka rum si.

Matthieu 7

¹«I bok dan wa sɔwâ mɛsin mi, kɛdan Ifray bok dan wa ri mi.

²Zɛ Ifray dɛ bok dan wa ri ce' ndɛ mɛni hi wɛ bok dan wa sɔwâ mɛsini. Bay kwa kɛɲji' kwa mɛni hi wɛ kɛɲji' kwa ne kɛ sɔwâ mɛsin kɛ ndi, Ifray dɛ kɛɲji' mi ne kɛ ndi ta'a.

³Zɛ mi ha wɛ kar bubudɛ gu mɛni wɛ i vay ba wû bay ha cu gak we gu mɛ i ru mɛ su?

⁴Ha gak in ne kɛ vay ba wû: A ar nan tle bubudɛ gu mɛni wɛ i ru, kɛri mɛni ha kɛ gu wɛ i ru ma su?

⁵Ha swɛ mɛ vur vur, a par gu mɛni wɛ i ru cop, bay ndɛna', ha gak wɛri bay kɛdan ha tle bubudɛ gu mɛni wɛ i vay ba wû.”

⁶«I ne kwa mɛ Ifray ne kɛ dɛ mi. Hi la' gi ndɛna' si, handay dɛ faɲ mi ti. I njay ri mɛ cob kɛcik mɛ dɛ kɛ "perlɛ" wɛ kor ziɲ mi. Hi la' gi ndɛna' si, handay dɛ ta wa rum kɛ seme.”

⁷«I o, bay hi dɛ fe. I keɓ, bay hi dɛ za'a. I tu' vun vari, bay sɔwâ dɛ ar vun vari zɛ ri.

⁸Zɛ sa su dɛɲ' mɛni wɛ o, mum fe. Swɛ mɛni wɛ keɓ, bɛ rum za'a. Bay swɛ mɛni wɛ tu' vun vari, sɔwâ ar vun vari zɛ bɛ rumu.

⁹Swɛ dɛw du ri gak ne gway' ne kɛ vay um kɛri mɛni mum o kwati ba rum su?

¹⁰Ko mum gak ne wu' ne kɛ vay um kɛri mɛni mum o keve ba rum su?

¹¹Hi sɔwâ mɛ bro', hi we vari kɛdan hi ne kwa mɛ bay ne kɛ daw mi. Ba mi mɛ wafray dɛ ne kwa mɛ bay ne kɛ sɔwâ mɛni wɛ um o pâ kwa mɛni hi wɛ gi nɛ si!

¹²I gi kwa dɛɲ' zɛ sɔwâ mɛsin, ce' ndɛ mɛni hi wɛ wa' i handay gi zɛ ri. Dan dlay Moyizɛ kɛ dɛrwa sum ka' dan ne vari ndɛna'a.”

¹³«I ze vun vari mɛ kî! Zɛ vun vari mɛ bwi kɛ vari mɛ dan cik wɛ dɛ ri mɛni sɔwâ dɛ vi' wɛ han, bay sɔwâ juk wɛ ta hana.

¹⁴Ama vun vari mɛ kî kɛ vari mɛ kɛcik wɛ dɛ ri mɛni sɔwâ dɛ ke kɛ nyî mɛ dɛ hâ wɛ han, bay sɔwâ cep wɛ ta hana.”

¹⁵«I ji tu ri hay' sum ka' dan mɛ hay dana. Handay wɛ mbɛ hay' ri kɛ gi tu nday ce' ndɛ cime, ama wɛ vunduk nday handay dɛghaw' mɛ kaw kwa.

¹⁶Hi dɛ nday we kɛ sin ndaya. Swɛ cu be vra' viɲɛ wa ɲây' mi, ko cu be vra' tɛrum wa ɲây' usiya mɛta'a.

¹⁷Gu mɛ bay wɛ vra' vra' mɛ bay, ama gu mɛ bro' wɛ vra' vra' mɛ bro'o.

¹⁸Gu mə ɓay cu gak vra' vra' mə bro' mi, ɓay gu mə bro' cu gak vra' vra' mə ɓay mɔta'a.

¹⁹Gu ɗaŋ' mɔni cu vra' vra' mə ɓay mi, sôwâ də tum njay də ku.

²⁰Nɗɔna' ta', hi də we sum ka' dan mə hay dan kə sin ndaya.”

²¹«Sôwâ ɗaŋ' mɔni man ɗe: Bârî, Bârî, cu də ze wə ri mɔni Ifray wə də suk jwə wa sôwâ um nə mi, say sôwâ mɔni wə gi kwa mɔni Ba man mə wafray wə wa'a.

²²Kəri mɔni bəka rum də mbə, sôwâ juk də man ini: Bârî, Bârî, namba ka' dan mɔni car mbə hay' Ifray kə semɗe ru, namba 'way gam kə semɗe ru, namba gi yew kə semɗe ru!

²³Kəri rum, na də nday ini: Na cu we ni ɗaw mi. I 'ya hay' rin seŋ, hi sôwâ mɔni wə gi sin mə bro'o!”

²⁴«Nɗɔna' ta', sa su ɗaŋ' mɔni wə mun dan mɔni na wə in, ɓay wə gi dan rum, mum də ra' nji kə swə mə kə wa mɔni ɗam so um wa pra.

²⁵Bəŋô se, mbi mbə haɓ ta rəka, simbeɗ sa' wa so rum kə gbəgbəŋ, ama so rum cu bru mi, zə zu so rum tor wa pra.

²⁶Ama sa su ɗaŋ' mɔni wə mun dan mɔni na wə in, ɓay cu wə gi dan rum mi, mum də ra' nji kə swə mə dan wa mɔni ɗam so um wa nyetle.

²⁷Bəŋô se, mbi mbə haɓ ta rəka, simbeɗ sa' wa so rum kə gbəgbəŋ, ɓay so rum bru ta nya, ɗɛnok cete.”

²⁸Kəri mɔni Zezu ndo' vun kwata' um, vari kwata' um jin' wa ne kə raw sôwâ,

²⁹zə mum cu ta' kwa ce' ndə sum pay zu dan dlay wə ta' nə mi, ama mum wə ta' kwa nday ne kə gbəgbəŋo.

Matthieu 8

¹Zezu dam mbə wa igway', ɓay sôwâ raw dle tu si ta zə rumu.

²Kəri rum, mgbo' ɗaw mbə hay' rumu. Mum kuduk nya kor rum ɓay la' ne numu: «Bârî, ha la' bə si, ha gak man gi faŋ fele.”

³Zezu sa ɓa, ɗak num kə ndi, ɓay la'a: «Na bə si, a faŋ həraŋa!» Kəkor sar, gaɓ mgbo' 'ya mbə tu rum, ɓay mum faŋ həraŋa.

⁴Zezu faŋ la' ne numu: «A mun ri'i! A in dan rum ne kə swə ɗaw mi! Ama a də ta' tu ru ne kə bə po' fur, ɓay kəki rum, a də po' fur ce' ndə Moyizə ne vari rum kədan a ta' ne kə sôwâ ɗaŋ' i ha faŋ həraŋ si.”

⁵Kəri mɔni Zezu ze ta so Kapernawum, toŋ soje mə nya Romə mbə hay' rum ɓay o num kədan nə kaw ɓa rumu.

⁶Mum ini: «Bârî, bə sin man bar wə so. Mum hurbu wə nya, ɓay mum wə ce boni juku.”

⁷Zezu la' ne numu: «Na dɛ um cara.»

⁸Ama toŋ soje nɛ dɛm vun rumu: «Bârî, na cu nde i kɛdan ha ze so man mi. Ama a in dan dɛw sar, bay bɛ sin man dɛ cara.

⁹Na kɛ tu rin, na wɛ zɛ ba sôwâ mɛsin, bay na kɛ soje wɛ zɛ ba rin ta'a. Na in ne kɛ swɛ dɛw: A dɛ ye! Bay mum da. Na in ne kɛ swɛ mɛsin: A mbɛ ri'i! Bay mum mba. Bay na wɛ in ne kɛ bɛ sin mana: A gi kwa mɛ ni na! Bay mum wɛ gi kwa rumu.»

¹⁰Kɛri mɛni Zezu mun dan rum, dan rum jin' wa ne num, bay mum la' ne kɛ sôwâ mɛni wɛ ta zɛ rumu: «Na in mi ne, kɛzini: Na cu za' swɛ mɛ kɛ ô bayrum ce' ndɛ swɛ mɛ ni nɛ, wɛ du sôwâ Israyel dɛw mi.

¹¹Na in mi ne: Sôwâ juk wɛ dɛ car mbɛ ga' fɛta bɛka kɛ ga' fɛta riya bay dɛ gay' vun tablɛ kɛ Abraham, kɛ Isak bay Yakub wɛ ri mɛni Ifray wɛ dɛ suk jwɛ wa sôwâ umu.

¹²Ama sôwâ mɛni Ifray da' nday kɛzɛ kɛdan handay gay' wɛ jwɛ um, mum dɛ nday pik dɛ rɛka, wɛ ri mɛ ura'a. Handay dɛ ci' kɛ cwɛ se' wɛ hana.»

¹³Zezu faŋ la' ne kɛ toŋ soje na: «A dɛ so wû ye. Kwa rum dɛ gi hay' ru ce' ndɛ mɛni ha ve dan rumu.» Bay bɛ sin toŋ soje nɛ car kɛ ri rum sara.

¹⁴Zezu ta so Piyer. Mum ta za'inja Piyer bar wa la' kɛ gaɓ wa.

¹⁵Zezu dɛk ba sɛ, bay gaɓ wa so' sa. Ta car fray bay tɛŋ kɛ gi sin zɛ rumu.

¹⁶Kɛ bɛl, sôwâ ra' sôwâ juk mɛni kɛ gam wa nday mbɛ hay' Zezu kɛ ndaya. Zezu 'way gam kuni kɛ dan vun rum, bay mum car sôwâ mɛ kɛ gaɓ daŋ' ta'a.

¹⁷Mum gi ndɛna' kɛdan nyen mbi dan mɛni bɛ ka' dan mɛ dɛ kɛ Esaya ini: «Mum ra' rɛbo mba, bay mum zi' gaɓ mba ta'a.»

¹⁸Zezu we raw sôwâ mɛni rɛŋ wa rumu. Zɛ rum, mum ne vari ne kɛ sum ta zɛ rum kɛdan kuni dɛ dapa ya mbi ga' sini.

¹⁹Bɛ pay zu dan dlay mbɛ hay' rum bay la' ne numu: «Bɛ ta' kwa dɛw, na dɛ ta zɛ ru wɛ ri daŋ' mɛni ha wɛ dɛ hana.»

²⁰Zezu dɛm vun rumu: «Gewre kɛ zra nday, bay rugwa mɛ wafray kɛ so nday, ama Vay sumra' cu kɛ ri mɛni mum gak bar pemây wɛ han mi.»

²¹Swɛ mɛsin dɛw mɛ du sum ta zɛ rum la' ne numu: «Bârî, a ne vari ne nan kɛdan na dɛ mo' ba man cop ri'i.»

²²Zezu dɛm vun rumu: «A ta zɛ rin, bay a ar sum mar mo' mar ndaya.»

²³Zezu ur ta rawti da, bay sum ta zɛ rum 'ya kɛ rum ta'a.

²⁴Kɛkor sar, simbed' tɛŋ kɛ sa' kɛ gbɛgboŋ, bay jo mbi sɛta dɛ rawti da. Ama Zezu wɛ nde sene.

²⁵Sum ta zɛ rum mbɛ hay' rumu. Handay dla' num bay la' ne numu: «Bârî, a sid' mba ri'i! Namba dɛ vi'i.»

²⁶Zezu dam vun ndaya: «Zə mi hi wə ne wəlok su, hi sôwâ mə kə ô kî?» Mum faɲ car fray bay dlay simbed kə mbi kə gbəgbon, bay handay gay' 'yeɲe.

²⁷Kwa rum jin' wa ne kə sôwâ daɲ', bay handay ini: «Swə sa ni nə su? Ko simbed kə mbi daɲ' wə mun kuni vun rumu!»

²⁸Kəri mənɪ Zezu ta day dapa ya mbi ga' sin, wə nya sôwâ Gadara, sôwâ hoɓ wur mbə nyî igway' mənɪ sôwâ wə mo' mar han mbə ndewa kə rumu. Sum rum kə gam wa nday, bay handay kəcik bayrumu. Zə rum, sôwâ wə ne wəlok kə pâ wə vari rumu.

²⁹Handay do dana: «Vay Ifray, ha wə wa' mi hay' mba su? Ha mbə ti kədan ha ta' ca mba cop dan ri rum mbə su?»

³⁰Kul ziɲ mə mbri wə ti kwa həre' kə ri rumu.

³¹Gam kuni o Zezu: «Ha la' wa' mba 'way si, a sin mba də du kul ziɲ na.»

³²Zezu la' ne ndaya: «I də ye.» Handay wur mbə wa sôwâ mə hoɓ kuni bay cok ta wa ziɲ kuna. Kəkor sar, kul ziɲ daɲ' pik ne mbə wa igway' njay ta ya mbi bay tuɓ wə hana.

³³Daw ji ziɲ pik ne ta mbok so, bay handay pla' dan rum daɲ' kə kwa mənɪ gi wa sôwâ hoɓ mənɪ kə gam wa kuna.

³⁴Zə rum, sôwâ daɲ' mənɪ gay' wə so rum wur kədan handay də ndewa kə Zezu. Kəri mənɪ handay we num, handay o num kədan nə 'ya ar nya nday si.

Matthieu 9

¹Zezu ur ta rawti da, bay mum faɲ ur mbi gewa ta so umu.

²Sôwâ tle hurbu kə la' bar um daɲ' mbə hay' Zezu kə rumu. Kəri mənɪ Zezu we i handay ve i mum gak car bə rum, mum la' ne kə hurbu: «Vay man, a kaw vunduk ru ye! Kwa mə bro' wû vrum si.»

³Kəri rum, sum pay zu dan dlay dɪk wə vunduk ndaya: «Swə mənɪ nə wə ge dan mə bro' wa Ifraya!»

⁴Zezu we dan dɪk vunduk nday, bay mum ci vunɪ: «Zə mi hi kə dan dɪk mə bro' mə ni nə su?»

⁵Kədan in ne kə hurbu: Kwa mə bro' wû vrum si, ko ini: a car fray ta ye, mə ka kəcik han câ' su?

⁶Ama na wa' kədan i we Vay sumra' kə gbəgbon wa nya kədan mum vrum kwa mə bro'o.» Zə rum, mum la' ne kə hurbu: «A car ye, a tle la' bar gaɓ wû, bay a faɲ də so wû kə ndi ye!»

⁷Swə nə car bay 'ya vari so umu.

⁸Kəri mənɪ raw sôwâ we ndəna', wəlok gi nday, bay handay təɲ kə gi mbra' ne kə Ifray zə mum ne gbəgbon mə ndani ne kə sumra'a.

⁹Zezu pâ mbə ri rum 'ya. Kəri məni mum wə dle də kofo, mum we swə daw mə də kə Matiye suk wə so bawa grama. Mum la' ne numu: «A ta zə rini.» Matiye car bay ta zə rumu.

¹⁰Kəki rum, Zezu wə ti kwati wə so Matiye. Sum bawa grama kə sum gi kwa mə bro' juk gay' wə vun tablə kə rum wanji kə sum ta zə rumu.

¹¹Kəri məni kul sôwâ Zuwif mə də kə Farisiyen we ndəna', handay ci vun sum ta zə rumu: «Zə mi bə ta' kwa mi wə ti kwati kə sum bawa grama wanji kə sum gi kwa mə bro' su?»

¹²Zezu mun dan nday bay la'a: «Sôwâ mə kə tu heɓ cu kə mē' bə waza mi, say sum gaba.

¹³I də keɓ mun zu dan məni nə, məni Ifray ini: Na cu kə mē' kwa po' fur mi, ama we ca. Zə na cu mbə kədan na də sum gi kwa mə njeɲ mi, ama sum gi kwa mə bro'o.»

¹⁴Kəri rum, sum ta zə Zaɲ-Baptistə mbə hay' Zezu bay ci vun rumu: «Zə mi namba kə kul sôwâ Zuwif mə də kə Farisiyen wə saɲ kwa bay sum ta zə ru cu saɲ nday mi su?»

¹⁵Zezu dam vun ndaya: «Hi dik i sôwâ məni fe də wə ri dər wə gak gay' sototo kəri məni bə cin ma kəta' du nday su? Cu ndəna' mi! Ama ri məni bə cin ma də pâ mbə du nday nə də mbə kəta'a. Kəri rum, handay də saɲ kwa ɓo.

¹⁶Swə daw cu fur mbraw mə kəmbar kə vun zim mə mbrew mi, zə vun zim mə mbrew wə ɲgâr mbraw mə kəmbar, bay vun ɲgâr rum faɲ də kofo.

¹⁷Bay swə daw cu wu' sum mə də kə "viɲə" mə mbrew də rawti mbu sum mə kəmbar mi, zə mbu rum də mun, bay sum rum ne də rəka, bay mbu rum dənoko. Zawa, sôwâ wə wu' sum mə mbrew də mbu sum mə mbrew. Ndəna' handay hoɓ jak də ke baya.»

¹⁸Kəri məni Zezu wə in dan rum nday ne ɓo, swə daw mə du sum rôwâ Zuwif mbə daya. Mum kuduk nya kor Zezu bay la' ne numu: «Vay man mar mgbəɲ ni nə, ama a mbə cin ɓa ru wa sə, bay ta də car i.»

¹⁹Zezu kə sum ta zə rum car kuni bay ra' zə rumu kə ta.

²⁰Ma daw kəta' məti wə ta' ca kə gaɓ saɲa. Ta gi kim guɓ wa hoɓ kə gaɓ rumu. Ta mbə hay' Zezu ga' ki Zezu bay dək zu mbraw umu.

²¹Zə ta dik wə vunduk sa: «Na la' za' dək mbraw um taw si, na də cara.»

²²Zezu faɲ i we sə bay la'a: «Vay man, əɲ kaw vunduk riɲ ye! Zə həɲ ve nan, həɲ car si.» Kəkor sar, ma rə cara.

²³Zezu mbə day so bârî Zuwif na. Kəri məni mum we sum pe duɓ kəya' kə raw sôwâ məni wə ci',

²⁴mum la'a: «I wur ti si, zə vay rə cu mar mi, ama ta wə nde sene.» Handay mây numu.

²⁵Kəri məni handay 'way raw sôwâ wur rəka, Zezu ze ta rawti tak i. Mum kaw ɓa vay rə, ɓay ta car fraya.

²⁶Dan rum pla' wə nya rum daŋ'ŋ.

²⁷Zezu 'ya ar ri rum, ɓay kəri məni mum wə ta də ri məsin, dəŋâr hoɓ təŋ kə ta zə rumu. Handay do dana: «Vay David, a we ca wa mba!»

²⁸Kəri məni Zezu ze ta rawti so, dəŋâr kuni mbə hay' rum, ɓay mum ci vun ndaya: «Hi ve i na gak gi kwa mə ni nə su?» Handay dām vun rumu: «Awo, Bârî.»

²⁹Kəri rum, Zezu dāk i nday ɓay la'a: «Kwa rum də gi hay' ri ce' ndə məni hi ve dan rumu!»

³⁰Bay i nday faŋ weri. Zezu dlay nday kə gbəgbonjo: «I mun ri'i! I in dan rum ne kə swə dāw mi!»

³¹Ama handay 'ya pla' dan Zezu wə nya rum daŋ'ŋ.

³²Kəri məni handay wə 'ya, sôwâ mbə hay' Zezu kə swə məni cu gak ge dan mi, zə mum kə gam wa rumu.

³³Kəri məni Zezu 'way gam rum, swə nə təŋ kə ge dana. Kwa rum jin' wa ne kə raw sôwâ, ɓay handay ini: «Namba cu we kwa mə ndə ni nə wə nya Israyel dāw mi!»

³⁴Ama sôwâ Farisiyen ini: «Jwə gam kə məni ne gbəgbonj ne num kədan mum 'way gam mə ni kuna!»

³⁵Zezu gaŋ wə so mə rôwâ kə pəɗak nday daŋ'ŋ. Mum ta' kwa wə rawti so Ifray nday, mum ka' Dan mə Kədam məni wə in dan wa Jwə Ifray məni wə də mbə, ɓay mum car sôwâ məni kə gaɓ kə sôwâ məni kə rəbo daŋ'ŋ.

³⁶Kəri məni mum we raw sôwâ, mum ci' ca wa nday, zə handay cik, ɓay handay cu kə kwa məsin mi. Handay ce' ndə cime mə dan vay ji.

³⁷Zə rum, mum la' ne kə sum ta zə rumu: «Sin wakaya juk, ama sum sin rum wə cepe.

³⁸Zə rum, i o bə sine kədan nə sin sum sin məsin kədan handay ɓa wa kwa wakaya rumu.»

Matthieu 10

¹Zezu dē sum ta zə rum mə guɓ wa hoɓ ɓay ne gbəgbonj ne nday kədan handay 'way gam, ɓay kədan handay car sôwâ məni kə gaɓ kə sôwâ məni kə rəbo daŋ'ŋ.

²Semɗe sum sin mə guɓ wa hoɓ kuni ni na: Cop rum Simonj (mə dē kə Piyer) kə njər rum Andre, Zakə kə njər rum Zaŋ, handay daw Zebede.

³Filip kə Bartelemi, Tomas kə Matiye, bə ɓawa grama, Zakə mə vay Alfe kə Tade.

⁴Simonj, swə mə nyen peɗ kə sây' zə nya um kə Yudas Iskariyot məni ar Zezu ta ɓa sum sî umu.

- ⁵Zezu sin sôwâ mæ guɓ wa hoɓ kə dan dlay mæ ni kuna: «I də nya sôwâ mæni cu zə saŋ sôwâ Zuwif mi nə mi, ɓay i cok də so mæ nya Samari mi.
- ⁶Ama i də du sôwâ Israyel mæni vi' ce' ndə cime.
- ⁷Kəri mæni hi wə də, i ta' dan mæ ni na: Ri mæni Ifray wə də suk jwə wa ri nə həre'e!
- ⁸I car sum gaɓ, i car i sum mar, i gi mgbo' faŋ həraŋ, ɓay i 'way gama. Hi fe uray, i ne uray ta'a.
- ⁹I ra' səlay gew mæ bondo ko mæ ɓu, ko mæ tlew njay wə jiba mi mi.
- ¹⁰I ra' mbu zə vari rəkway mi. I ra' mbraw hoɓ wə ɓa mi, ko tərək, ko dliwi. Zə bə sin nde i fe kwati umu si.
- ¹¹Kəri mæni hi ta day wə so mæ mbri ko pəɗak rum, i keɓ swə mæni kə mē' mi ve, ɓay i gay' wə so um hā day ri 'ya mi.
- ¹²Kəri mæni hi cok də rawti so, i ini: Heɓ mæ ke kə ri.
- ¹³Sôwâ so rum la' ve ni si, kaw jeɓ mi mæ ne heɓ də ke kə ndaya. Ama handay la' cu ve ni mi si, i tle kaw jeɓ mi mæ ne heɓ nə faŋ kə ndi si.
- ¹⁴Sôwâ mæ rawti so ko sôwâ so mæ mbri la' cu ve ni, ko cu mun dan mi mi si, i 'ya ar ri rum ɓay tu' ɓərim sem ri.
- ¹⁵Na in mi ne, kəzini: Kə bəka dan ɓok, boni də ke ɓayrum wa sôwâ so rum pā boni mæni ke wa sôwâ mæ so Sodomə kə so Gomorə.”
- ¹⁶«I mun ri'i! Na mi sin ce' ndə cime wə du dəghawa. I ke kə gwet ce' ndə wu', ɓay i ke dan dan mæ bro' ce' ndə kuruku.
- ¹⁷I ji tu ri, zə sôwâ də mi ar də ɓa sum ɓok dan, ɓay handay də mi pe kə ləva wə rawti so Ifray ndaya.
- ¹⁸Handay də mi ra' də kor sum rôwâ nya kə sum jwə zə rin kədan hi gak in njeŋ dan wa rin kor nday, ɓay də kor sôwâ mæni cu zə saŋ sôwâ Zuwif mi.
- ¹⁹Kəri mæni handay də mi ar də ɓa sum ɓok dan, i ɗik dan wa dan mæni hi wə də in, ko kə vari dan mæni hi wə də in nə mi, zə hi də fe dan mæni hi wə də in kə ri rum ɓo.
- ²⁰Dan rum cu də car mbə hay' ri mi, ama Simbed' Ba mi mæni wə vunduk ri wə də in dan rumu.”
- ²¹Vay ya də ar njər rum də ɓa sôwâ kədan sôwâ um ci, ɓay ba daw də gi ndəna' kə daw nday ta'a. Daw də faŋ car wa sôwâ nday kədan handay nday ci.
- ²²Sôwâ ɗaŋ' də mi sî zə rini. Ama swə mæni car ŋgəɗiŋ' hā ndo' rum, bə rum də ke kə nyî mæ də hā.
- ²³Kəri mæni sôwâ də keɓ zu ri wə so ɗaw, i ne də so məsini. Na in mi ne, kəzini: Hi cu də gaŋ ndap so Israyel ɗaŋ' cop mbə Vay sumra' mi.
- ²⁴Bə wum kwa cu pā bə ta' kwa um mi. Bə sin cu pā bārî um mi.

²⁵Nde i kədan bə wum kwa faŋ ce' ndə bə ta' kwa um, bay kədan bə sin faŋ ce' ndə bārî umu. Sôwâ la' dē bə so kə Belzebul si, handay də ne semdē mə bro' ne kə sôwâ so um pā semdē rumu!

²⁶«Zə rum, i ne wəlok sumra' mi. Kwa daŋ' mənî pe', sôwâ də we, bay dan daŋ' mənî pe' 'yeŋ, sôwâ də munu.

²⁷Dan mənî na in ne ni wə ri mə ura', i faŋ də do dan rum wə ri mə bu. Dan mənî hi mun 'yeŋ, i do dan rum wa dap so.

²⁸I ne wəlok sôwâ mənî wə ci tu ri, ama cu gak ci nyî ri mi mi. Zawa, i ne wəlok Ifray mənî gak dənok tu ri kə nyî ri hoḃ jak wə ri ku.

²⁹Sôwâ cu coḃ daw i ra' ghər hoḃ kə səlay dāw mi su? Ama ko dāw du nday cu nde də nya dan Ba mi ne vari rum mi.

³⁰Mə hi, sâ wa ri in si dāw dāw daŋ'ŋ.

³¹Zə rum, i ne wəlok mi, zə hi kə mbra' pā daw i ra' ghər si!»

³²«Sa su daŋ' mənî də in kor sôwâ i mum mə na, na də in kor Ba man mə wafray i mum mə na ta'a.

³³Ama swə mənî də in kor sôwâ i mum cu we nan mi, na də in kor Ba man mə wafray i na cu we num mətā'a.»

³⁴«I dīk i na mbə kədan na ne heḃ ne kə sôwâ nya mi. Na cu mbə kədan na ne heḃ mi, ama na mbə kə masələma.

³⁵Na mbə kədan na gi vay mə nji bul nji kə ba um, vay mə ma bul nji kə ya sə, bay mok vay bul nji kəinja sa:

³⁶Sôwâ cava də sî bə so.»

³⁷«Swə mənî bə ba um ko ya um pā nan si, bə rum cu nde i ta zə rin mi. Swə mənî bə vay um mə nji ko vay um mə ma pā nan si, bə rum cu nde i ta zə rin mi.

³⁸Swə mənî cu tle gu gay' tu rum bay ta zə rin mi, bə rum cu nde i ta zə rin mi.

³⁹Swə mənî wə wa' kədan mum sid' tu rum, bə rum də mara. Ama swə mənî də fe mar zə rin, bə rum də ke kə nyî mə də hâ.»

⁴⁰«Swə mənî ve ni, bə rum ve nan ta', bay swə mənî ve nan, bə rum ve swə mənî sin nana.

⁴¹Swə mənî ve bə ka' dan zə i mum bə ka' dan Ifray, bə rum də fe bal cik mənî Ifray wə də ne kə bə ka' dana. Bay swə mənî ve swə mə njeŋ kor Ifray zə i mum njeŋ kor Ifray, bə rum də fe bal cik mənî Ifray wə də ne kə swə mə njeŋe.

⁴²Na in mi ne, kəzini: Swə mənî wə ne mbi mə səso' kî ne kə vay nyêw mə du sum ta zə rin zə i mum bə ta zə rin, bə rum də fe bal cik umu.»

Matthieu 11

- ¹Kəri mənı Zezu ndo' vun ta' kwa rum ne kə sum ta zə rum mə guɓ wa hoɓ, mum 'ya ar ri rum kədan mum ta' kwa kə ka' dan wə so cem cem mə nya rumu.
- ²Zaɲ-Baptistə, mənı wə so daɲgay', mun dan sin Kris. Zə rum, mum sin sôwâ məsin mə du sum ta zə rum hay' Zezu.
- ³Handay ci vun rumu: «Ha swə mənı wə də mbə nə su? Ko namba ji swə məsin su?»
- ⁴Zezu dām vun ndaya: «I də in dan kwa mənı hi we ɓay dan mənı hi mun daɲ' ne kə Zaɲ:
- ⁵Dəɲâr wə weri, lem wə ta, mgbo' wə faɲ kələɲ, ndum wə mun hum, mar wə car i, ɓay sôwâ wə ka' Dan mə Kədam ne kə sum ca.
- ⁶Kədam zə swə mənı cu də ar ô um ge mi!»
- ⁷Kəri mənı sum ta zə Zaɲ 'ya dle, Zezu təɲ kə in dan wa Zaɲ ne kə raw sôwâ: «Hi ta kar mi du gop su? Hom mənı simbed' wə nyen su? Cu mə su?
- ⁸La' cu mi si, hi ta kar mi su? Swə mənı ge mbraw mə kə mbra' su? Ama sôwâ mənı ge mbraw mə kə mbra', handay gay' wə so jwa.
- ⁹La' ndəna' si, hi ta kar mi su? Bə ka' dan su? Awo, na in mi ne, hi we swə mənı pā bə ka' dan nə si.
- ¹⁰Zə Zaɲ nə swə mənı 'Derwa Ifray wə in dan wa rumu: A kar ri'i, na sin vay sin man kofo ru kədan mum gila' vari wû ne.
- ¹¹Na in mi ne, kəzini: Wə du sôwâ mənı rawkwa wə vra' daɲ', swə mə pā Zaɲ-Baptistə kə mbra' cu mi. Ama swə mə kî wə du sôwâ mənı Ifray wə suk jwə wa nday pā Zaɲ kə mbra' si.»
- ¹²Daka ri mənı Zaɲ-Baptistə ka' dan hâ tam, sôwâ wə ɓar Jwə Ifray, ɓay sôwâ mə kə gbəgbəɲ gak ve ri rumu.
- ¹³Sum ka' dan daɲ' kə dan dlay Moyizə in dan wa ri mənı Ifray wə də suk jwə wa sôwâ hâ day ri Zaɲ.
- ¹⁴Bay hi la' wa' ve dan man si, Zaɲ nə mum Eliya mənı sum ka' dan ka' dan wa mbə rumu.
- ¹⁵Swə mənı kə hum, say bə rum nə munu!
- ¹⁶Na də kənji' sôwâ mə tam kə sa su? Handay ra' nji kə dawre' mənı gay' wə lumə ɓay wə do dan mbok nji:
- ¹⁷"Namba pe duɓ kəya', ama hi cu dla' mi! Namba dā nyem tum vun zra, ama hi cu ci' mi!"
- ¹⁸«Kəri mənı Zaɲ mbə, mum cu ti kwati ko ce sum mi, ɓay hi ini: mum kə gam wa rumu!

¹⁹Kəri mənı Vay sumra' mbə, mum ti kwati kə ce kwace, bay hi ini: I kar swə mə ni na! Mum nə bə ti mə mbri kə bə ce kwa mə mbri. Mum bāy sum bawə kwa kə sum gi kwa mə bro'o! Ama sôwâ gak we gwet Ifray zə sin mə njeŋ mənı mum wə gi."

²⁰Kəri rum, Zezu təŋ kə mgbor so cem cem mənı mum gi yew wə han, zə sôwâ mənı gay' wə so rum kuni cu faŋ vunduk nday mi. Mum ini:

²¹«Boni wa riŋ, so Korazin! Boni wa riŋ, so Betsayda! Zə yew mənı na gi kuni wə hay' ri la' gi kəzə wə so Tir kə so Sidoŋ si, ka ba' si sôwâ so rum ge mbraw zim bor, bay handay far but tu nday kədan handay ta' i handay faŋ vunduk ndaya si.

²²Zə rum, na in mi ne: Kə bəka dan bok, boni də ke wa ri bayrum, pā boni mənı ke wa so Tir kə so Sidoŋ nə si.

²³Bay həŋ, so Kapernawum, həŋ dik i Ifray də maŋ tle hā də wafray su? Cu mi! Mum də maŋ jar hā də ri mənı sum mar wə hana. Zə yew mənı na gi kuni wə hay' riŋ la' gi kəzə wə so Sodomə si, so rum də ke hā tama.

²⁴Zə rum, na in mi ne: Kə bəka dan bok, boni də ke wa riŋ bayrum, pā boni mənı də ke wa so Sodomə si."

²⁵Kəri rum, Zezu ini: «Bəba, Bârî mə wafray kə mə nya, na gi soko ne nu zə ha ta' kwa mənı ha pe' hay' sum gwet kə sum kwawe ne kə dawre'e.

²⁶Awo, Bəba, kwa rum gi ndəna', zə ha kə mənı wa'a."

²⁷Ba man ar kwa daŋ' wə ba rini. Swə daw cu we Vay mi, say Ba Vaya. Bay swə daw cu we Ba Vay mi, say Vay kə sôwâ mənı Vay nə wa' kədan mum um ta' nday ne.

²⁸«Hi sôwâ daŋ' mənı cik kə kwazi' mə kə mbra' wa ri, i mbə hay' rin, bay na də mi ne pemâya.

²⁹I tle gu jewre rin cin də jewre ri, bay i wum kwa hay' rin, zə na kədam, bay vunduk rin 'yeŋe. Bay hi də fe pemây zə tu ri.

³⁰Gu jewre mənı na də mi ne cu kəcik kədan hi tle mi, bay kwazi' mənı na də cin wa ri nə cu kə mbra' mi.»

Matthieu 12

¹Kəki rum kî, Zezu pā vari du sine kə fəta pemây sôwâ Zuwif. Mê' ti sum ta zə rum, bay handay təŋ kə kəy alkamari bay cwa.

²Kəri mənı kul sôwâ Zuwif mə də kə Farisiyen we ndəna', handay la' ne kə Zezu: «A kar ri'i! Sum ta zə ru wə gi kwa mənı dan dlay mba cu ne vari gi rum kə fəta pemây mi!"

³Zezu dam vun ndaya: «Hi cu in dan kwa mənı David gi kəri mənı mum kə sôwâ um kə mê' nə mə su?

⁴Mum ze ta rawti so Ifray, bay mum kə sôwâ um ti kuni duwa' mēni njay kor Ifraya. Ama dan dlay mba cu ne vari ne nday kədan handay ti duwa' rum mi, say sum po' fur tawa.

⁵Ko hi cu in dan mēni wây' wə du dēwa dan dlay Moyizə mēni in i kə fəta pemây sum po' fur mēni wə gi sin rawti so po' fur sôwâ Zuwif cu ta zə dan dlay fəta pemây mi, ama handay cu kə dan wa nday mi nə su?

⁶Ama na in mi ne: Kwa mə toŋ mēni pâ so po' fur sôwâ Zuwif kəta' wə tira!

⁷Hi la' mun zu dan mə du 'Derwa Ifray mə ni nə si: Na cu kə mē' kwa po' fur mi, say we ca. Hi cu gak ge dan mə bro' wa sôwâ mēni cu gi kwa mə bro' mi mi.

⁸Zə Vay sumra' nə Bârî fəta pemâya."

⁹Zezu 'ya ar ri rum, bay mum ze ta rawti so Ifray sôwâ Zuwif.

¹⁰Swə məsin kəta' wə han, ba rum mə mara. Sôwâ mēni gay' wə han wa' kədan handay tum sem Zezu wa kwa mēni mum wə gi. Zə rum, handay ci vun rumu: «Dan dlay mba ne vari ne mba kədan mə car gaḅ kə fəta pemây su?"

¹¹Zezu dām vun ndaya: «Swə dāw du ri la' kə cime dāw, bay cime rum nde ta zra kə fəta pemây si, bə rum cu də um tle mbə rəka mə su?

¹²'Bay sumra' kə mbra' pâ cime! La' ndəna' si, dan dlay mba ne vari gi kwa mə bay hay' swə kə fəta pemâya."

¹³Zə rum, Zezu la' ne kə swə na: «A tle ba ru.» Mum tle ba, bay ba rum faŋ bay ce' ndə mə ga' məsini.

¹⁴Kul sôwâ Zuwif mə dē kə Farisiyen 'ya ta bawa kədan handay keḅ vari ci Zezu.

¹⁵Kəri mēni Zezu mun dan rum, mum 'ya ar ri rum, bay sôwâ raw ta zə rumu. Mum car sum gaḅ daŋ'ŋ.

¹⁶Ama mum dlay nday kə gbəgboŋ kədan kuni in dan wa rum ne kə swə dāw mi.

¹⁷Mum gi ndəna' kədan nyen mbi dan mēni bə ka' dan mə dē kə Esaya ini:

¹⁸«Bə sin man mēni na par nə ni na. Na bə num, bay na tuk kədam kə rumu. Na də cin Simbed' man wa rum, bay mum də ka' dan wa dan bok man ne kə sôwâ nya məsini.

¹⁹Mum cu də dle vun kə swə dāw mi, bay mum cu də ka' dan mi. Sôwâ cu də mun wor um wə vari mbok so mi.

²⁰Mum cu də haḅ hom mə gəgan mi, bay mum cu də ci ku baŋgay mēni cu dēri njeŋ mi nə mi. Mum də gi ndəna' hā mum də gi njeŋ ke wə ri daŋ'ŋ.

²¹'Bay sôwâ nya məsin daŋ' də njay vunduk nday wa semdē rumu."

²²Kəri rum, sôwâ mbə hay' Zezu kə swə məsini. Mum kə gam, mum dəŋâr bay ndum ta'a. Zezu car swə nə, bay mum dle kə ge dan bay weri.

²³Kwa rum jin' wa ne kə raw sôwâ daŋ', bay handay ci vunu: «Mum cu Vay David mi su?»

²⁴Ama kəri məni kul sôwâ Zuwif mə də kə Farisiyen mun dan nday, handay ini: «Swə məni nə wə 'way gam wa sôwâ kə gbəgbəŋ Belzebul, jwə gam kuna!»

²⁵Ama Zezu we dan dīk ndaya. Zə rum, mum la' ne ndaya: «Nya daŋ' məni jwə nya rum car zi mbok nji, nya rum də dənoko. So daŋ' ko cava daŋ' məni sum rum car zi mbok nji cu gak suk mi.

²⁶Satan la' 'way Satan si, ka mum car wa kə tu rum, bay gbəgbəŋ um gak suk mə ma su?

²⁷Hi in i na wə 'way gam wa sôwâ kə gbəgbəŋ Belzebul ne gbəgbəŋ ne nan kədan na nday 'way, la' ndəna' si, sa nə ne gbəgbəŋ ne kə sum ta zə ri kədan handay 'way gam wa sôwâ su? Sum ta zə ri kə tu nday ta' i hi vi' vari si!»

²⁸Zawa, na wə 'way gam wa sôwâ kə Simbed Ifray məni wə ta' i ri məni Ifray wə də suk jwə wa ri nə mbə day hərə' kə ri si.

²⁹Swə cu gak ze rawti so bə gbəgbəŋ kədan mum kəy hura kwa so um mi, say ka mum kaw num bay baŋ num cop si. Bay kəri məni mum baŋ num, mum gak ra' kwa so um daŋ'ŋ.

³⁰Swə məni cu kə rin mi, bə rum sî nan, bay swə məni cu kaw ba rin kə keḅ sôwâ mi, bə rum wə nday 'waya.

³¹«Zə rum, na in mi ne, Ifray də vrum kwa mə bro' daŋ' məni sôwâ wə gi kə dan mə bro' daŋ' məni handay wə ge, ama Ifray cu də vrum dan mə bro' məni swə wə ge wa Simbed Ifray nə mi.

³²Ifray də vrum dan mə bro' məni swə wə ge wa Vay sumra', ama Ifray cu də vrum dan mə bro' məni swə wə ge wa Simbed um mə Kəleŋ nə mi, ko mgbaŋ ni nə, ko kə ri məni wə də mba.»

³³«Gu mə bay wə vra' vra' mə bay, bay gu mə bro' wə vra' vra' mə bro' ta'a. Zə sôwâ wə we gu zə vra' umu.

³⁴Hi zep kay'i! Hi gak in dan mə bay kəri məni hi bro' mə ma su? Zə vun wə ge dan məni vunduk nyen peḏ kə ndi.

³⁵Ndak mə bay wə pā mbə ba wə vunduk umu. pā mbə vunduk swə mə bro'o. Ndak mə bro' wə pā mbə vunduk swə mə bro'o.

³⁶Na in mi ne: Kə bəka dan bok, sôwâ də in zu dan mə uray daŋ' məni handay ini.

³⁷Zə Ifray də bok dan wa ru zə dan ge vun ru. Ha də ke njeŋ zə dan ge vun ru, ko ha də ke kə dan wa ru zə dan ge vun ru.»

³⁸Kəri rum, sôwâ məsin wə du sum pay zu dan dlay kə sôwâ məsin wə du kul sôwâ Zuwif mə də kə Farisiyen la' ne kə Zezu: «Bə ta' kwa, namba wa' i a gi yew ne mba kədan namba kara.»

³⁹Zezu dām vun nday kə dan mə ni na: «Sôwâ mə tam, məni bro' bay cu ne wəlok Ifray mi, handay ci vun yew, ama Ifray cu də gi yew nday ne mi, say yew məni mum gi kə bə ka' dan mə dē kə Zonas.

⁴⁰Zə ce' ndə Zonas gi bəka hinji' kə dukri hinji' wə rawti keve mə toŋ, ndəna' ta', Vay sumra' də gi bəka hinji' kə dukri hinji' wə zə nya.

⁴¹Kə bəka dan bok, sôwâ so Ninivə də car kor sôwâ mə tam, bay handay də tum sem nday, zə sôwâ mə so Ninivə faŋ vunduk nday kəri məni handay mun dan ka' Zonas. Bay kwa mə pâ Zonas kə toŋ kəta' wə tira!

⁴²Kə bəka dan bok, ma məti suk jwə wə nya mə ga' zu də car kor sôwâ mə tam, bay ta də bok dan wa nday, zə ta car mbə nya mə seŋ kədan ta mun dan Salomoŋ məni nyen ped' kə gwete. Bay kwa mə pâ Salomoŋ kə toŋ kəta' wə tira!”

⁴³«Kəri məni gam pâ mbə wa swə, mum də gaŋ wə du igop kədan mum keḅ ri pemây, ama mum cu za' mi.

⁴⁴Zə rum, mum in wə vunduk rumu: Na faŋ də so man məni na 'ya ara. Mum faŋ gewa mbə han, bay mum za' so rum uray, ba bay gila' baya.

⁴⁵Zə rum, mum 'ya ta dē gam məsin sedā' məni pâ num kə bro' si, bay handay mbə cok gay' wə so rumu. Ndəna', suk bə rum faŋ bro' pâ mə vun kofo nə si. Bay kwa rum də ke ndəna' zə sôwâ mə bro' mə tam ta'a.”

⁴⁶Kəri məni Zezu wə in dan ne kə raw sôwâ 60, ya um kə daw ya um mbə day kuna. Handay mbə gay' rəka, bay handay keḅ kədan handay ge dan kə rumu.

[⁴⁷Swə məsin la' ne kə Zezu: «A kar ri'i! Ya wû kə daw ya wû gay' kuni rəka, bay handay wa' ge dan kə ru.»]

⁴⁸Zezu dām vun rumu: «Sa nə ya man su? Sa kuni daw ya man su?”

⁴⁹Mum faŋ ta' ba ta wa sum ta zə rum, bay ini: «I kar ri'i! Ya man kə daw ya man kuni ni na!

⁵⁰Zə swə məni wə gi kwa məni Ba man mə wafray wə wa', bə rum nə njər rin, kə njar rin, bay ya mana.»

Matthieu 13

¹Kə fəta rum sar, Zezu pâ mbə so bay 'ya ta suk wə vun ya mbi.

²Sôwâ raw dle tu si ba mbə hay' rumu. Zə rum, mum ur ta rawti da, bay mum suk wə hana. Raw sôwâ gay' wə vun dapa.

³Mum ta' kwa juk ne nday kə dan mə gəgana. Mum in ne ndaya: «Bə ge zep kwa pâ kədan mum də ge zep kwa.

⁴Kəri məni mum wə ge zep kwa wə sine um, zep məsin rum njay ta vari, bay rugwa mbə da' ndaya.

- ⁵Zep məsin rum njay ta ri mə kə pra məni nya cu han bayrum mi. Zep rum ci ga'ri zə nya cu han bayrum mi.
- ⁶Kəri məni fəta mbə dük, kwa rum rawdā bay co' zə mum cu za' ri pe tlor mi.
- ⁷Zep məsin rum njay ta du n̄aya. D̄ây' rum jəŋ bay tak kwa rumu.
- ⁸Ama zep məsin rum njay ta nya mə bay, bay zewa: i rum məsin ke kis, məsin ke gu kanki', bay məsin ke gu hinji'i."
- ⁹Zezu faŋ ini: «Swə məni kə hum, say bə rum nə munu!"
- ¹⁰Kəki rum, sum ta zə Zezu mbə hay' rum bay ci vun rumu: «Zə mi ha nday in dan ne kə dan mə gəgan su?"
- ¹¹Mum dām vun ndaya: «Ifraŋ ne vari ne ni kədan i we kwa məni ke pe' ba' si wa dan vari məni Ifraŋ wə də suk jwə wa ri, ama Ifraŋ cu ne vari ne nday mi.
- ¹²Zə swə məni kə kwa, bə rum də fe məsin də han, bay mum də ke kə ndi juk, ama swə məni cu kə kwa mi, sôwâ də ve mə kî məni wə ba rum nə si.
- ¹³Zə rum, na wə ta' kwa nday ne kə dan mə gəgana: Zə handay wə kar ri, ama handay cu wə weri mi, bay handay wə pe hum, ama handay cu wə mun hum ko mun zu dan rumu mi.
- ¹⁴Ndəna', dan məni bə ka' dan mə də kə Esaya wây' nə nyen mbi wə zə ndaya. Mum ka'a: Hi də pe hum kə bayrum, ama hi cu də mun zu dan rum mi. Hi də kar ri kə bayrum, ama hi cu də weri mi.
- ¹⁵Zə vunduk sôwâ məni kuni cu d̄ik dan mi, handay nduḅ hum nday si, bay handay dəŋâr i nday ta'a. La' cu ndəna' mi si, i nday gak weri, hum nday gak mun dan, bay vunduk nday gak keḅ mun zu dan rum, bay handay gak də faŋ mbə hay' Ifraya. Bay mum də nday cara.
- ¹⁶Ama mə hi, i tuk kədam zə i ri wə weri, bay hum ri wə mun dana!
- ¹⁷Na in mi ne, kəzini: Sum ka' dan juk kə sôwâ mə njeŋ juk, handay wa' we kwa məni hi wə we, ama handay cu we mi, bay handay wa' mun dan məni hi wə mun, ama handay cu mun mi."
- ¹⁸«La' ndəna' si, i mun zu dan mə gəgan wa bə ge zep kwa nə ye!
- ¹⁹Sôwâ məni mun dan wa dan vari məni Ifraŋ wə də suk jwə wa sôwâ um, ama cu mun zu dan rum mi, handay ra' nji kə vari məni zep kwa njay wə hana. Satan mbə par dan Ifraŋ məni wə vunduk ndaya.
- ²⁰Ri mə kə pra məni nya cu han bayrum mi wə ta' sôwâ məsin məni mun dan Ifraya, kəri rum sar, handay ve dan rum kə tuk kədam,
- ²¹ama handay cu ar dan rum pe tlor wə vunduk nday mi, handay ta kə dan rum kî, ama kəri məni cik ko boni la' mbə wa nday zə dan Ifraŋ si, handay ar dan məni handay ve nə kəri rum sara.

- ²²Dây' wə ta' sôwâ məsin məni mun dan Ifray, handay ve dan rum, ama dīk dan kwa nya kə səna' ndak tak dan rum, bay dan rum cu par i mi.
- ²³Nya mə bay wə ta' sôwâ məsin məni mun dan Ifraya. Handay mun zu dan rum, bay handay dlər də kofo: məsin ke kis, məsin ke gu kanki', bay məsin ke gu hinji'i."
- ²⁴Zezu in dan mə gəgan məsin ne ndaya: «Vari məni Ifray wə də suk jwə wa sôwâ um nə ra' nji kə dan mə ni na: Swə dāw jo' zep kwa mə bay wə sine umu.
- ²⁵Kə dukri, kə ri məni sôwâ daŋ' nde sen si, bə sî swə nə mbə jo' mbele wə du u swə nə bay 'ya dle.
- ²⁶Kəri məni u mbud' bay zewa, mbele zewa ta'a.
- ²⁷Sum sin um mbə in ne numu: Bârî, ha jo' zep kwa mə bay wə sine wû, mbele mə ni nə car mbə ka su?
- ²⁸Mum dām vun ndaya: Bə sî rin kə məni gi kwa rumu. Sum sin um faŋ ci vun rumu: Ha wa' i mə də par mbele də rəka su?
- ²⁹Mum dām vun ndaya: Cu mi! Zə kəri məni hi wə par mbele, hi gak par u ta'a.
- ³⁰I ar nday mbud' hoḅ jak hâ day wakaya, bay kəri rum, na də in ne kə sum gi u: I tum mbele cop, bay i baŋ num kədan hi ge ku wa rumu. Kəki rum, i ra' u də zəna mana."
- ³¹Zezu in dan mə gəgan məsin ne ndaya: «Vari məni Ifray wə də suk jwə wa sôwâ um nə ra' nji kə i mafo' məni swə tle jo' du sine umu.
- ³²I rum kî pâ i zep kwa məsin daŋ', ama kəri məni mum ci, mum wə jeŋ toŋ pâ gu məni ci kuni daŋ'ŋ: Mum wə faŋ ya gu mə toŋ, bay rugwa mə fray wə mbə dām so nday wa ba sa."
- ³³Zezu in dan mə gəgan məsin ne ndaya: «Vari məni Ifray wə də suk jwə wa sôwâ um nə ra' nji kə dlum məni ma tle tlum fut məni ta kənji' kə kwa kənji' kwa hinji' hâ fut rum daŋ' hulumu."
- ³⁴Zezu in dan rum daŋ' ne kə raw sôwâ kə vari dan mə gəgana. Mum cu ge dan nday ne dan dan mə gəgan mi,
- ³⁵mum gi ndəna' kədan nyen mbi dan məni bə ka' dan ini: «Na də ge dan nday ne kə vari dan mə gəgana. Na də ta' kwa məni pe' daka təŋ zu nya nday ne."
- ³⁶Kəri rum, Zezu 'ya ar raw sôwâ bay ze ta rawti so. Sum ta zə rum mbə hay' rum bay la' ne numu: «A pay zu dan mə gəgan wa mbele du sine nə ne mba ri'i!"
- ³⁷Zezu dām vun ndaya: «Swə məni jo' zep kwa mə bay wə ta' Vay sumra'a.
- ³⁸Sine wə ta' nya. Zep kwa mə bay wə ta' sôwâ məni Ifray suk jwə wa ndaya. Mbele wə ta' sôwâ məni Satan suk jwə wa ndaya.
- ³⁹Bə sî məni jo' mbele wə ta' Satan. Wakaya wə ta' ndo' nya. Bay sum gi u wə ta' sum sin Ifray mə wafraya.

⁴⁰Ce' ndə sôwâ tum mbele njay ta ku bay ye' ku, kwa rum də gi ndəna' kə ndo' nya ta'a.

⁴¹Vay sumra' də sin sum sin um mə wafray, handay də da' sôwâ daŋ' mənɪ wə ɓu sôwâ məsin njay du kwa mə bro' kə sôwâ mənɪ wə gi sin mə bro' wə ri mənɪ Ifray wə suk jwə wa sôwâ um kuni pik də rəka,

⁴²bay handay də nday njay də ri ku, handay də ci' bay cwə se' wə hana.

⁴³Ama kəri rum, sôwâ mə njeŋ də wəɗi ce' ndə fəta wə ri mənɪ Ba nday wə də suk jwə wa ndaya. Swə mənɪ kə hum, say bə rum nə munu!"

⁴⁴«Vari mənɪ Ifray wə də suk jwə wa sôwâ um nə ra' nji kə doknay mənɪ pe' wə sine. Swə ɗaw mbə za' doknay rum, bay mum faŋ tle pe'e. Mum tuk kəɗam dle tu si, hā mum gi coɓ kwa daŋ' mənɪ mum kə ndi, bay mum faŋ coɓ sine rumu.»

⁴⁵«Kərem, vari mənɪ Ifray wə də suk jwə wa sôwâ um nə ra' nji kə bə gaŋ gi par mənɪ wə keɓ ri mə bay mə ɗe kə "perlə".

⁴⁶Kəri mənɪ mum ta za' ri ɗaw mənɪ coɓ rum kəcik bayrum, mum gi coɓ kwa daŋ' mənɪ mum kə ndi, bay mum coɓ ri rumu.»

⁴⁷«Vari mənɪ Ifray wə də suk jwə wa sôwâ um nə ra' nji kə ziw mənɪ swə wə ɗā də mbi, bay ziw rum ra' keve cem ceme.

⁴⁸Kəri mənɪ keve nyen ziw rum, sum lam mbi dlam ziw rum də vun dapa. Handay faŋ gay' kədan handay da' keve. Handay cok keve mə bay də kukuk, bay handay pik keve mə bro' də rəka.

⁴⁹Kwa rum də gi ndəna' kə ndo' nya ta'a: Daw sin Ifray mə wafray də mbə ɓul du sôwâ mə bro' kə sôwâ mə njeŋ,

⁵⁰kədan handay nday njay də ku, handay də ci' bay cwə se' wə hana.»

⁵¹Zezu ci vun ndaya: «Hi mun zu dan mə ni kuni daŋ' si su?» Handay ɗam vun rumu: «Awo.»

⁵²Zə rum, mum la' ne ndaya: «Ndəna' bə pay zu dan dlay daŋ' mənɪ faŋ bə ta zə Ifray wə ri mənɪ mum wə suk jwə wa sôwâ um, bə rum ra' nji kə bə so mənɪ wur kə ndak mə mbrew bay ndak mə kəmbar mbə so umu.»

⁵³Kəri mənɪ Zezu ndo' vun in dan mə gəgan mənɪ kuni si, mum 'ya ar ri rum,

⁵⁴bay mum 'ya ta so mənɪ mum jeŋ wə hana. Mum təŋ kə ta' kwa ne kə sôwâ wə rawti so Ifray sôwâ Zuwif, bay dan rum jin' wa ne kə sôwâ daŋ' mənɪ gay' wə hana. Handay ini: «Mum za' gwet mə ni nə wə ka su? Sa nə ne num gbəgbon gi yew mə ndəna' nə su?

⁵⁵Mum cu vay bə gay' gu nə mə su? Mari cu ya um mə su? Zakə, Zozef, Simon kə Zudə cu njər rum kuni mə su?

⁵⁶Bay njar rum kuni daɲ' cu ni du mba mə su? La' ndəna' si, mum za' gbəgbon mə ni nə wə ka su?"

⁵⁷Bay dan rum tak nday dan um ve. Zə rum, Zezu la' ne ndaya: «Bə ka' dan gak za' mbra' wə ri daɲ', say wə so vra' um kə sôwâ umu.»

⁵⁸Zezu cu gak gi yew wə han bayrum mi, zə handay cu ve num mi.

Matthieu 14

¹Kəri rum, Herodə, toɲ nya Galile, mun dan Zezu,

²mum la' ne kə sum sin umu: «Mum nə Zaɲ-Baptistə! Mum faɲ car i! Zə rum, mum kə gbəgbon kədan mum gi yewe.»

³Zə Herodə sin soje ta kaw Zaɲ. Handay baɲ num bay ge ta so daɲgay'i. Herodə gi ndəna' zə Herodiya, mok njər rum Filip,

⁴zə Zaɲ in ne kə Herodə: «Ha cu kə vari tle Herodiya cin mi.»

⁵Herodə wa' kədan mum ci Zaɲ, ama mum ne wəlok sôwâ Zuwif zə handay daɲ' kar Zaɲ ce' ndə bə ka' dana.

⁶Kə bəka cer vra' Herodə, vay Herodiya mə ma dla' kor sôwâ mənɪ Herodə də ndaya bay la' sə kədam tu ne kə Herodə dle tu si.

⁷Ndəna' mum sur vun i mum də sə ne kwa daɲ' mənɪ ta də ci vun rumu.

⁸Wa dan in vun ya sə, vay rə la' ne kə Herodə: «A ne nan wa Zaɲ-Baptistə wə ti wə tasawa!"

⁹Dan rum par vunduk ne kə jwə, ama zə dan sur vun mənɪ mum sur kor sôwâ mənɪ mum də, mum ne vari ne kə soje kədan kuni gi kwa mənɪ ta wa'a.

¹⁰Zə rum, mum sin soje ta hay wa Zaɲ-Baptistə wə so daɲgay'i.

¹¹Soje mbə kə wa rum wə tasaw bay ne kə vay rə, bay ta ta ne kə ya sa.

¹²Sum ta zə Zaɲ-Baptistə mbə tle mar um bay ta mo', bay kəki rum, handay 'ya ta in dan kwa mənɪ gi nə ne kə Zezu.

¹³Kəri mənɪ Zezu mun dan rum, mum 'ya kə da ar ri rum kədan mum də rəka wə ri mə cukud' kə daw rumu. Ama raw sôwâ mun dan rum, handay wur mbə so bay ji zu um kə sem ta vun dapa.

¹⁴Kəri mənɪ Zezu pâ mbə rawti da, mum we raw sôwâ, mum ci' ca wa nday, bay mum təɲ kə car gaɓ ndaya.

¹⁵Kə bel, sum ta zə Zezu mbə hay' rum bay ini: «Fəta so' si, bay ri mə ni nə rəka wə ri mə cukudu. A ar vari ne kə raw sôwâ də mbok so kədan kuni də coɓ kwati kə tu ndaya.»

¹⁶Zezu dām vun ndaya: «Cu bay kədan handay 'ya mi, hi kə tu ri, i ne kwati ne nday ti!»

¹⁷Ama handay la' ne numu: «Namba cu kə kwa məsin mi, say vun tləpe' fun vatl kə keve hoḅ sara.»

¹⁸Zezu la' ne ndaya: «I ra' nday mbə ti kə ndi.»

¹⁹Mum faṅ ne vari ne kə raw sôwâ kədan kuni gay' də wa za. Mum faṅ ra' vun tləpe' fun mə vatl kə keve mə hoḅ kuna. Mum tle i ta wafray bay gi soko ne kə Ifraya. Mum jak vun tləpe' fun rum bay ne kə sum ta zə rum, bay handay bul ne kə raw sôwâ.

²⁰Handay daṅ' ti ndak nday, bay sum ta zə rum ra' kam kwati məni gwa' nə nyen dɛṅɔl guḅ wa hoḅo!

²¹Sôwâ məni ti kwati rum raw njiwkwa i mbu vatl cu in rawkwa kə dawre' mi.

²²Kəki rum sar, Zezu dlay sum ta zə rum kədan kuni ur də rawti da bay 'ya cop rum də dapa ga' sin kəri məni mum ar vari ne kə raw sôwâ kədan kuni 'ya.

²³Kəki məni mum ar vari ne kə sôwâ, mum ur ta wa igway' kə dāw rum kədan mum in dan kə Ifray wə hana. Kəri məni fəta no' si, mum suk wə han kə dāw rumu.

²⁴Da wə du mbi seṅ kə vun dapa, jo mbi wə səta də rawti da zə simbed' sa' də wa nday bay kəfit ndaya.

²⁵Kə vun bəka, Zezu 'ya də hay' sum ta zə rum kə ta wa mbi.

²⁶Ama kəri məni sum ta zə rum we num wə ta wa mbi, wəlok gi nday juk, bay handay ini: «Usiya mbi na!» Bay handay tɛṅ kə do dan kə wəloko.

²⁷Ama kəkor sar, Zezu la' ne ndaya: «I kaw vunduk ri! Na na, I ne wəlok mi!»

²⁸Zə rum, Piyer la' ne numu: «Bârî, ha la' kəzin' si, a ne vari ne nan kədan na ta wa mbi də hay' ru.»

²⁹Zezu dām vun rumu: «A mbə ye!» Piyer pâ mbə rawti da bay tɛṅ kə ta wa mbi kədan mum də hay' Zezu.

³⁰Ama kəri məni mum we simbed' wə sa' kə gbəgbon, mum ne wəlok, bay mum tɛṅ kə tuḅ də mbi. Kəri rum, mum ka' dana: «Bârî, a sid' nana!»

³¹Kəkor sar, Zezu sa ḅa, kaw num, bay la' ne numu: «Ha swə mə kə ô kî, zə mi ha way dan su?»

³²Handay ur ta rawti da hoḅ jak, bay simbed' ndo' vun sa'a.

³³Zə rum, sum ta zə rum məni wə rawti da kuduk kor rum bay ini: «Ha Vay Ifray kəzini!»

³⁴Kəri məni handay ur mbi si, handay ta day nya Genezaret.

³⁵Sôwâ mə ri rum we i Zezu na, bay handay pla' dan mbə um wə nya rum daṅ', bay sôwâ ra' sum gaḅ daṅ' mbə hay' Zezu kə ndaya.

³⁶Handay o num kədan nə ar nday dāk zu mbraw um tawa. 'Bay sôwâ daŋ' mənɪ dāk zu mbraw um, gaɓ nday cara.

Matthieu 15

¹Kul sôwâ Zuwif mə də kə Farisiyen kə sum pay zu dan dlay car kuni wə so Jeruzalem mbə za' Zezu bay ci vun rumu:

²«Zə mi sum ta zə ru cu ta zə vun fur ba mbri ramba mi su? Zə handay cu kol ɓa cop ti kwati mi.»

³Zezu dām vun ndaya: «Bay mə hi, zə mi hi ar dan dlay Ifray kədan hi ta zə vun fur mi su?

⁴Zə Ifray ini: A mbâ ba wû kə ya wû, bay swə mənɪ ge dan mə bro' wa ba um ko wa ya um, bə rum də fe mara.

⁵Ama mə hi, hi wə ta' i swə la' la' ne kə ba um ko kə ya umu: Kwa man mənɪ na gak kawɓa ri kə ndi, na ne kwa rum kə Ifray si,

⁶bə rum cu kə vari mbâ ba um za' mi. Kə vari mə ni nə hi wə dənok dan Ifray kədan hi ta zə vun fur mi.

⁷Hi sum vur vuru! Bə ka' dan mə də kə Esaya ka' dan njeŋ wa ri kəri mənɪ mum wây' dan mənɪ na:

⁸Sôwâ mənɪ kuni wə man mbâ kə dīke vun, ama vunduk nday seŋ kə rini.

⁹Handay man bur kə vun uray, zə handay wə ta' dan dīk sumra' ce' ndə mənɪ dan rum car mbə hay' Ifraya.»

¹⁰Kəki rum, Zezu də raw sôwâ bay la' ne ndaya: «I pe hum, bay i mun zu dan mənɪ na:

¹¹Kwa mənɪ wə ze vun swə cu dənok bə rum mi, zawa, kwa mənɪ wə pâ mbə vun rum wə um dənoko.»

¹²Zə rum, sum ta zə Zezu mbə hay' rum bay ci vun rumu: «Ha we mənɪ kul sôwâ Zuwif mə də kə Farisiyen cu tuk kədam kə dan ge wû mi nə si su?»

¹³Mum dām vun ndaya: «Gu mənɪ wə ci tu rum mənɪ Ba man mə wafray cu jo' mi də para.

¹⁴I ar ndaya: Handay dəŋâr mənɪ wə ta' vari ne kə dəŋâra! 'Bay dəŋâr la' wə ta' vari ne kə dəŋâr məsin si, handay də njay də zra hoɓ jaka.»

¹⁵Piyer la' ne numu: «A pay zu dan mə gəgan rum nə ne mba.»

¹⁶Zezu dām vun ndaya: «Hi ta', hi dan wa su?

¹⁷Hi cu mun i kwa daŋ' mənɪ wə ze vun swə wə də rawti bə rum, bay faŋ pâ mbə tu rum də rəka nə mə su?

- ¹⁸Ama kwa mēni wə pā mbə vun wə car mbə vunduk, bay kwa rum kə mēni wə dənok swa.
- ¹⁹Zə dan dīk mē bro' wə pā mbə vunduk swə nə um pla' ci mar, gi nja, gi ghəghay, kəy hura, hay dan, kə ge dan mē bro' wa sôwâ mēsini.
- ²⁰Kwa mē ni kuni wə dənok swa! Ama ti kwati dan kol ba ce' ndə mēni vun fur wə ta', kwa rum cu dənok swə mi."
- ²¹Kəki rum, Zezu 'ya ar ri rum bay ta wə nya mē hərə' kə so Tir kə so Sidoŋ.
- ²²Ma mē nya Kana mēti suk wə nya rum mbə hay' Zezu bay ka' dana: «Bârî, Vay David, a we ca wa rini! Vay man kə gam wa sə, bay ta wə ce boni juku!"
- ²³Ama Zezu cu dām vun sə mi. Sum ta zə rum mbə hay' rum bay o numu: «A 'way sə si, zə ta wə ji zu mba kə ka' dana."
- ²⁴Zezu dām vun ndaya: «Ifraŋ cu sin nan hay' sôwâ mēsin mi, say hay' sôwâ Israyel mēni vi' ce' ndə cime."
- ²⁵Ama ma rə mbə kuduk nya kor rum bay la' ne numu: «Bârî, a jin nan ri'i!"
- ²⁶Zezu dām vun sa: «Cu bay kədan tle kwati daw sumra' bay ne kə daw də mi."
- ²⁷Ta dām vun rumu: «Kəzin' Bârî, ama daw də wə ti bubud kwati mēni wə njay zə tablə bə ur ndaya."
- ²⁸Zə rum, Zezu dām vun sa: «Mə jwə, həŋ ve nan njeŋe! Kwa rum də gi hay' riŋ ce' ndə mēni həŋ wə wa'a.» Bay vay sə car kəri rum sara.
- ²⁹Zezu 'ya ar ri rum bay ta wə vun ya mbi Galile. Mum ur ta wa igway' bay suk hana.
- ³⁰Sôwâ raw dle tu si mbə hay' rumu. Handay ra' lem, dəŋâr, rəbo, ndum, kə gaḅ mēsin cem cem juku. Handay njay nday kor rum bay mum car ndaya.
- ³¹Kəri mēni handay we ndum wə dan, rəbo faŋ bay, lem wə ta, bay dəŋâr wə weri, kwa rum jin' wa ne nday, bay handay təŋ kə gi mbra' ne kə Ifraŋ sôwâ Israyel.
- ³²Zezu dē sum ta zə rum bay la' ne ndaya: «Na ci' ca wa raw sôwâ mēni kuni, zə handay gi bəka hinji' kə rin bay kwati ndo' wə ba nday si. Na cu bə nday ar vari ne 'ya kə mē' mi. Na la' gi ndəna' si, handay də par tətâ wə vari."
- ³³Sum ta zə rum ci vun rumu: «Namba gak za' kwati ka wə du gop mēni nə kədan namba ne kə raw sôwâ mē ni kuni su?"
- ³⁴Zezu ci vun ndaya: «Hi kə vun tləpe' fun ma dak su?» Handay dām vun rumu: «Namba kə ndi sedâ', bay daw keve han cep ta'a."
- ³⁵Zə rum, Zezu ne vari ne kə raw sôwâ kədan kuni gay' də nya,
- ³⁶mum faŋ ra' vun tləpe' fun mē sedâ' kə daw keve kuni, bay gi soko ne kə Ifraŋ, mum jak bay ne kə sum ta zə rum kədan handay bul ne kə raw sôwâ.

³⁷Handay dan' ti ndaka nday, sum ta zə Zezu ra' kam kwati mənɪ gwa' nə nyen dɛŋɔl sedɑ'a.

³⁸Sôwâ mənɪ ti kwati rum raw njiwkwa i mbu fədi', cu in rawkwa kə dawre' mi.

³⁹Kəki mənɪ Zezu ar vari ne kə raw sôwâ, mum ur ta rawti da bay 'ya ta nya Magadan.

Matthieu 16

¹Kul sôwâ Zuwif mə də kə Farisiyen ke kul sôwâ Zuwif mə də kə Sadusiye mɓə kuni hay' Zezu. Handay wa' kədan handay um kaw kə dan ge vunɔ. Zə rum, handay ci vun rum kədan nə gi yew mənɪ gak ta' i gbəgbonj um car mɓə wafraya.

²Ama Zezu dām vun ndaya: «Kəri mənɪ fəta no' wa si, bay wafray mbal ke, hi wə ini: Siw, ri də ke baya!

³Bay kə bəka ced, kəri mənɪ wafray mbal, bay dləmbur ra' rududu, hi wə ini: Tam buŋô wa' se! Hi we bul mbok kwata' kwa mə wafray, ama hi cu gak bul mbok kwa ta' kwa mə bəka mə tam mi!

⁴Sôwâ mə tam mənɪ bro' bay cu ne wəlok Ifray mi, handay ci vun yew, ama Ifray cu də gi yew nday ne mi, say yew mənɪ mum gi kə Zonas.» Kəki rum, mum ar nday bay 'ya dle.

⁵Kəri mənɪ sum ta zə Zezu dle ta dapa ya mbi ga' sin, handay dūmwa dan tle kwati.

⁶Kəri rum, Zezu la' ne ndaya: «I mun ri'i! I ji tu ri wə du dlum kul sôwâ Zuwif mə də kə Farisiyen kə kul sôwâ Zuwif mə də kə Sadusiye!»

⁷Sum ta zə rum tɛŋ kə dik dan wə vunduk nday, bay handay in kuni mbok nji: «Mum wə in ndəna' zə namba cu ra' kwati ba mɓə ndi mi.»

⁸Zezu we dan dik vunduk nday, bay mum ci vun ndaya: «Zə mi hi wə in dan mbok nji i hi cu mɓə kə kwati mi su? Hi sôwâ mə kə ô kî!

⁹Hi cu wə mun zə dan mi bo su? Hi cu wə dla' wa dan vun tləpe' fun mə vatɪ mənɪ na bul ne kə njiwkwa raw nday i mbu vatɪ kə raw dɛŋɔl mənɪ hi ra' kam rum kə ndi nə si su?

¹⁰Bay hi dūmwa dan vun tləpe' fun mə sedɑ' mənɪ na bul ne kə njiwkwa raw nday i mbu fədi' kə raw dɛŋɔl mənɪ hi ra' tan rum kə ndi nə si su?

¹¹Gi ma hi cu mun zu dan mənɪ i na cu in dan ne ni wa kwati nə mi su? I ji tu ri wə du dlum kul sôwâ Zuwif mə də kə Farisiyen kə kul sôwâ Zuwif mə də kə Sadusiye.»

¹²Kəri rum, sum ta zə rum mun zu dan mənɪ i mum cu nday in i kuni ji tu nday wa dlum mi, ama wə du kwata' kul sôwâ Zuwif mə də kə Farisiyen kə kul sôwâ Zuwif mə də kə Sadusiye.

¹³Zezu ta wə nya mə həre' kə so Sezare mə Filip. Mum ci vun sum ta zə rumu: «Sôwâ wə in ma wa Vay sumra' su?»

¹⁴Handay dām vun rumu: «Sôwâ mēsin wə in i ha Zaŋ-Baptistə, sôwâ mēsin wə in i ha Eliya, ɓay sôwâ mēsin kərem wə in i ha Jeremi ko bə ka' dan mēsin.»

¹⁵Zezu ci vun ndaya: «Ama mə hi, hi wə in mi i na nə sa su?»

¹⁶Simon Piyer dām vun rumu: «Ha nə Kris, Vay Ifray mə kə i na!»

¹⁷Zə rum, Zezu la' ne numu: «Kədam zə ru, Simon, vay Zaŋ, zə sumra' cu kə mēni ta' dan mə kəzin' mēni nə ne nu mi, ama Ba man mə wafraya.

¹⁸Bay mə na, na in wū ne: Semde ru Piyer, mēni wa' dan ini: Igway'i, ɓay wa pra rum, na cin Eklisiya man wə hana. Ko mar cu gak suk gbəgboŋ wa nday mi.

¹⁹Na də wū ne kwa ar vun vari ri mēni Ifray wə də suk jwə wa sôwâ umu, kwa daŋ' mēni ha wə tak wa nya, də tak wafray ta', ɓay kwa daŋ' mēni ha ar vari rum wa nya, vari rum də ar wafray ta'a.»

²⁰Kəki rum, Zezu dlay sum ta zə rum kə gbəgboŋ kədan kuni in i mum nə Kris na, ne kə swə daw mi.

²¹Daka kəri rum, Zezu təŋ kə in dan ne kə sum ta zə rum təlaka: «Say na də so Jeruzalem, ɓay na də ce boni juk wə ɓa sum rôwâ mə du sôwâ Zuwif kə sum rôwâ mə du sum po' fur, ɓay sum pay zu dan dlaya. Handay də man ci, ɓay kəki bəka hinji', Ifray də man par mbə mara.»

²²Zə rum, Piyer kay' num ta rəka kə rum, ɓay təŋ kə um dlaya. Mum la' ne numu: «Bârî, Ifray nə tak kwa rumu! Na cu wa' i kwa rum nə mbə wa ru mi!»

²³Ama Zezu faŋ i, ɓay la' ne kə Piyer: «A 'ya ki rin si, Satan! Ha wə keɓ kədan ha man gi nde du kwa mə bro', zə ha cu wə dik dan ce' ndə Ifray mi, ama ce' ndə sumra'a.»

²⁴Zezu faŋ la' ne kə sum ta zə rumu: «Swə la' wa' kədan mum ta zə rin si, say bə rum ar dik dan tu rum, nə tle gu gay' tu rum, ɓay ta zə rini.

²⁵Zə swə mēni wə wa' kədan mum sid' tu rum, bə rum də mar, ama swə mēni də fe mar zə rin, bə rum də ke kə nyî mə də hâ.

²⁶Swə la' za' kwa nya daŋ', ama bə rum cu kə nyî mə də hâ mi si, kwa rum gak ke kə sin zə rum si su? Swə də po' ma dak kədan mum ke kə nyî mə də hâ su?

²⁷Zə Vay sumra' də mbə kə sum sin Ifray mə wafray du mbra' Ba um, ɓay kəri rum, mum də po' swə daw daw daŋ' ce' ndə sin gi umu.

²⁸Na in mi ne kəzin', sôwâ mēsin wə du sôwâ mə ni kuni cu də mar cop, dan we Vay sumra' kəri mēni mum wə də mbə suk jwə wa nday nə mi.»

Matthieu 17

¹Kəki rum bəka kanki', Zezu tle Piyer, kə Zakə, ɓay njer rum Zaŋ ɓay ur ta wa i igway' mēni mbud' kə daw ndaya.

- ²Mum faɲwa tu rum kor ndaya: Vuk rum tɔŋ kə wəɖi ce' ndə fəta, bay mbraw um faɲ mə bu kep kepe.
- ³Kəki rum, sum ta zə rum mə hinji' we Moyizə kə Eliya wə ge dan kə Zezu.
- ⁴Zə rum, Piye la' ne kə Zezu: «Bârî, bay kədan namba ke tira, ha la' wa' si, na də kaw jew hinji'i: Daw zə ru, daw zə Moyizə, bay daw zə Eliya.»
- ⁵Kəri məni mum wə in dan in ɓo, dləmbur mə wəɖi mbə kəmbo' nday, bay wor car mbə du dləmbur ini: «Mə ni nə Vay man məni na ba, na tuk kədam kə rumu. I mun vun rumu!»
- ⁶Kəri məni sum ta zə rum mun wor rum, wəlok gi nday juk, bay handay kuduk ta nya bay cin vuk ta nya.
- ⁷Zezu mbə hay' nday, ɗak nday bay la' ne ndaya: «I car fray ye! I ne wəlok mi!»
- ⁸Zə rum, handay ra' i nday də fray, ama handay cu we swə daw mi, say Zezu.
- ⁹Kəri məni handay wə dam wa i igway' mbə nya, Zezu dlay nday kə gbəgboŋo: «I in dan kwa məni hi we nə ne kə swə daw mi, hâ bəka məni Ifray də par Vay sumra' mbə mara.»
- ¹⁰Sum ta zə Zezu faɲ ci vun rumu: «Zə mi sum pay zu dan dlay wə in i say Eliya də mbə cop su?»
- ¹¹Mum dam vun ndaya: «Kəzin', Eliya də mbə cop kədan mum gila' kwa ɗaŋ'ŋ.
- ¹²Ama na in mi ne, Eliya mbə si, bay sôwâ cu we i mum na mi, ama handay gi kwa məni handay wa' wə tu rumu. Ndəna' ta' Vay sumra' kə tu rum də ce boni wə ɓa ndaya.»
- ¹³Kəri rum, sum ta zə rum mun i mum wə in dan wa Zaŋ-Baptistə nday ne.
- ¹⁴Kəri məni handay mbə day wə ri məni raw sôwâ wə han, swə daw mbə hay' Zezu. Mum kuduk nya kor rumu:
- ¹⁵Bay swə nə la' ne numu: «Bârî, a we ca wa vay man ri'i: Mum kə gam wa rum, bay mum wə ce boni juk zə gam nə um pla' də ku bay də mbi sem rawa.
- ¹⁶Na mbə kə rum hay' sum ta zə ru, ama handay cu gak car num mi.»
- ¹⁷Zezu dam dan kə ini: «Hi na, hi sôwâ mə kə ô kî, bay sôwâ mə bro'o! Na də suk kə ri hâ day ka su? Na də red'vunduk rin wa ri hâ day ka su? I mbə nan kə vay nə tira.»
- ¹⁸Zezu dlay gam nə kə gbəgboŋ, bay gam nə pâ mbə wa vay nə, bay mum car kə ri rum sara.
- ¹⁹Zə rum, sum ta zə Zezu mbə hay' rum 'yeŋ bay ci vun rumu: «Zə mi namba cu gak 'way gam rum mi su?»

²⁰Zezu dām vun ndaya: «Zə ô mi wə kî. Na in mi ne, kəzin', hi la' ve Ifray ko kî ce' ndə i mafo' si, hi gak la' ne kə i igway' mə tira: Əŋ 'ya mbə ti də kəna, bay ta də 'ya. Kwa mə pā wa ri cu də ke mi.

[²¹Ama kədan 'way gam mə nda nay' nə, say kə o Ifray kə saŋ kwa tawa.]”

²²Fəta məsin, sum ta zə Zezu daŋ' bəwa nji wə nya Galile, Zezu la' ne ndaya: «Sôwâ də ar Vay sumra' də ba sôwâ məsin,

²³handay də um ci, ama kəki bəka hinji', Ifray də um par mbə mara.» Sum ta zə rum dīk dan juku.

²⁴Kəri məni Zezu kə sum ta zə rum mbə day kuni so Kapernawum, sum bəwa grama so po' fur sôwâ Zuwif mbə hay' Piyer bay ci vun rumu: «Bə ta' kwa mi cu po' grama so po' fur sôwâ Zuwif mi su?”

²⁵Piyer dām vun ndaya: «Awo, mum pəpə'o.» Kəri məni Piyer ze ta rawti so, Zezu ci vun rum kə dan copo: «Simon, ha dīk ma su? Sa kuni wə po' "duwanə" kə po' grama ne kə jwə nya su? Daw nya nday su? Ko sôwâ rəkway su?”

²⁶Piyer dām vun rumu: "Sôwâ rəkwaya." Zezu dām vun rumu: «La' ndəna' si, daw nya cu po' mi.

²⁷Ama kədan namba dənok vunduk sôwâ məni kuni mi si, a də vun mbi, a də ge kəlek də mbi, bay a tle keve məni ha də kawvun kofo, a ar vun rum bay ha də za' səlay han dawa. Səlay rum də nde i po' grama mə na kə mə ha. A tle səlay rum, bay a də po' grama wa mba kə ndi.»

Matthieu 18

¹Kəri rum, sum ta zə Zezu mbə hay' rum bay ci vun rumu: «Sa nə də suk toŋ wə ri məni Ifray wə də suk jwə wa sôwâ um nə su?”

²Zezu də vay nyêw bay cin um kor nday,

³bay la' ne ndaya: «Na in mi ne, kəzin', hi la' cu faŋwa kwa gi mi kədan hi faŋ ce' ndə dawre' mi si, hi cu də ze wə ri məni Ifray də suk jwə wa sôwâ um nə mi.

⁴Swə mə toŋ wə ri məni Ifray wə də suk jwə wa sôwâ um nə kə swə məni wə hom tu rum bay wə faŋ ce' ndə vay nyêw məni na.

⁵Bay swə məni ve vay nyêw ce' ndə vay məni nə zə semdə rin, bə rum ve nana.”

⁶«Swə məni bu vay nyêw daw du daw məni ve nan kuni nde du kwa mə bro', pram sôwâ jew gway' vəna jewre bə rum bay tle num ge də ya mbi.

⁷Kəcik zə sôwâ nya, zə kwa məni wə bu sôwâ njay du kwa mə bro' kəta' wə hana! Swə cu gak tak kwa rum mi, ama kəcik zə swə məni mbə kə kwa bu rumu!

⁸Ba ru ko sem ru la' wû bu kədan ha nde du kwa mə bro' si, a hay nday ye, bay a pik nday də rəka seŋ kə ru! Pram zə ru kədan ha də ke kə nyî mə də hā so Ifray kə rəbo ko

kə lem pâ mənɪ ha də ke kə ɓa mə hoɓ, kə sem mə hoɓ ɓay də ze ri ku mənɪ cu mar i mi kə ndi nə si.

⁹Bay i ru la' wû ɓu kədan ha nde du kwa mə bro' si, a par ye, ɓay a dā də rəka seŋ kə ru, pram zə ru kədan ha də ke kə nyî mə də hâ kə i mə dāw pâ mənɪ ha də ke kə i mə hoɓ ɓay də ze ri ku kə ndi nə si.”

¹⁰«I kaw wa ri kədan i jed' vay nyêw dāw du daw mə ni kuni mi, zə na in mi ne, sum sin Ifray mə wafray mənɪ wə nday ji wə car kor Ba man mə wafray bəka daŋ'ŋ.

[¹¹Zə Vay sumra' mbə kədan mum siɗ sôwâ mənɪ vi'i.]

¹²Hi dîk ma su? Swə la' kə cime kis si, ɓay dāw du nday vi', bə rum cu də ar cime mə gu cefadew wa cefadew məsin wa dɔl kədan mum 'ya də keɓ cime mənɪ vi' nə mi su?

¹³Na in mi ne: Mum la' za' cime rum si, mum də tuk kədam juk wa rum pâ mə gu cefadew wa cefadew mənɪ cu vi' mi kuna.

¹⁴Ndəna' ta', Ba mi mə wafray cu bə i vay dāw du daw mənɪ kuni nə vi' mi.”

¹⁵«Vay ba wû la' gi kwa mə bro' hay' ru si, a də hay' rum, ɓay a ta' kwa mə bro' um ne numu. Ama a də hay' rum kə dāw ru. Mum la' mun vun ru si, ka ha siɗ vay ba wû.

¹⁶Ama mum la' cu mun vun ru mi si, a dē sôwâ məsin dāw ko hoɓ kə ru kərem kədan dan tum sem rum daŋ' nə də car kə vun sum we njeŋ dan rum hoɓ ko hinji' ce' ndə mənɪ Derwa Ifray ini.

¹⁷Ama mum la' cu mun vun nday mi si, a in dan rum ne kə kul sôwâ mənɪ ve Kris mə ri rum, ɓay mum la' cu mun vun nday mi si, a kar num ce' ndə swə mə dan we Kris ko ce' ndə bə ɓawa kwa.”

¹⁸Na in mi ne, kəzini: Kwa daŋ' mənɪ hi jew dan rum wa nya, də jew wafray ta', ɓay kwa daŋ' mənɪ hi ulay' wa nya, də ulay' wafray ta'a.

¹⁹«Na in mi ne ta', sôwâ hoɓ du ri wa nya la' kawvun kədan handay o kwa mi su daŋ' wə du o Ifray nday, mum də nday ne kwa rumu.

²⁰Zə wə ri mənɪ sôwâ hoɓ ko hinji' wə ɓawa kə semdē rin, na kəta' wə du ndaya.”

²¹Kəri rum, Piye mbə hay' Zezu ɓay ci vun rumu: «Bârî, vay ba man la' wə gi kwa mə bro' hay' rin si, na də vrum kwa mə bro' um sem ma dak su? Sem sedâ' su?”

²²Zezu dām vun rumu: «Cu sem sedâ' taw mi, ama hâ day sem gusedâ' vun nyem sedâ'a.”

²³Zə rum, vari mənɪ Ifray wə də suk jwə wa sôwâ um nə ra' nji kə dan jwə məsin mənɪ wa' kədan mum kar bal selay um mənɪ wə ɓa sum sin umu.

²⁴Kəri mənɪ mum təŋ kə kar bal selay rum, sôwâ mbə hay' rum kə swə mənɪ ti bal um selay mbu guɓ rawa.

²⁵Swə nə cu kə kwa məsin kədan mum po' bal rum kə ndi mi, zə rum, bârî um ne vari ne kə sôwâ kədan kuni coḅ num ce' ndə bek, ḡay coḅ ma rum kə daw um ḡay kwa ḡaṇ' mənî mum kə ndi kədan po' bal rumu.

²⁶Bə sin nə kuduk nya kor bârî um ḡay o numu: A red' vunduk ru wa rin ri', na də wû po' cete!

²⁷Bârî nə ci' ca wa bə sin rum, mum vrum dan bal um ḡay ar num 'ya.

²⁸«Bə sin nə pâ ḡay ta ndewa kə bây sin um mənî ti bal um səlay kis, mum kaw jewre rum ḡay təṇ kə um kô'o. Mum la' ne numu: A po' bal mana!

²⁹Bây sin um nə kuduk nya kor rum ḡay o numu: A red' vunduk ru wa rin ri', na də wû po'o!

³⁰Ama mum cu mun mi, zawa, mum ge num ta so ḡaṇgay' hâ ka mum po' bal rum si.

³¹Kəri mənî sum sin məsin we kwa mənî gi ndəna', handay ḡik dan dle tu si, ḡay handay ta in dan rum ḡaṇ' ne kə bârî ndaya.

³²Zə rum, bârî nə ḡe bə sin nə ḡay la' ne numu: Ha bə sin mə bro', na vrum dan bal wû cet, zə ha o nan kədan na gi ndəna'a.

³³Ha ta', kəzə ha we ca wa bây sin wû ce' ndə mənî na we ca wa ru.

³⁴Bârî nə tle bak juk, ḡay mum sin bə sin nə ta so ḡaṇgay' kədan mum ce boni han hâ ka mum po' bal um nə si cete.”

³⁵Bay Zezu ndo' vun dan rum kə ini: «Ba man mə wafray də gi ndəna' hay' swə ḡaw ḡaw ḡaṇ' du ri, ha la' cu vrum kwa mə bro' mənî vay ba wû wə gi hay' ru kə vunduk ru ḡaṇ' mi si na.»

Matthieu 19

¹Kəri mənî Zezu ndo' vun dan ta' mənî kuni si, mum 'ya ar nya Galile ḡay ta wə nya Zude mənî wə ḡapa ga' sin ze Zurdeṇ.

²Sôwâ raw dle tu si wə ta zə rum, ḡay mum car gaḅ ndaya.

³Sôwâ məsin mə du kul sôwâ Zuwif mə ḡe kə Farisiyen mbə hay' rum kədan handay um kaw kə dan ge vun. Handay ci vun rumu: «Dan dlay mba ne vari ne kə səmanji kədan nə bur ma rum zə dan cem cem si su?”

⁴Zezu ḡam vun ndaya: «Hi cu in dan mənî wây' nə mi su? Kə təṇ zu kwa Bə gi kwa gi səmanji kə ma,

⁵ḡay mum ini: Zə rum səmanji də ar ba um kə ya um ḡay tləḡa nji kə ma rum, ḡay handay hoḅ jak də faṇ tu ḡawa.

⁶Ndəna' handay cu hoḅ za' mi, ama tu ḡawa. Swə cu kə vari kədan mum bur kwa mənî Ifray tləḡa nji si nə mi!”

⁷Kul sôwâ Zuwif mæ dë kə Farisiyen ci vun rumu: «La' ndəna' si, zə mi Moyizə ne vari ne kə səmanji kədan nə wây' dərwa bur nji nday ne kə ma rum bay 'way sə kə ndi su?»

⁸Zezu dām vun ndaya: «Moyizə ne vari bur rawkwa mi ne ni zə wa ri bokrok, ama kə tən zu kwa dan rum cu ndəna' mi.

⁹Na in mi ne: Səmanji la' bur ma rum mæti cu gi nja mi, bay mum faŋ cin ma mæsin si, ka bə rum gi nja.»

¹⁰Sum ta zə Zezu la' ne numu: «Dan rum la' ndəna' mbok səmanji kə ma rum si, pram dan cin nji.»

¹¹Zezu dām vun ndaya: «Sôwâ daŋ' cu gak ve dan mæni nə mi, say sôwâ mæni Ifray ne gbəgboŋ rum ne ndaya.

¹²Vari cem cem mæni wə tak njiwkwa dan cin ma kəta'a. Sôwâ mæsin jəraw daka vra' nday, sôwâ mæsin faŋ jəraw kə ba sumra', bay sôwâ mæsin kərem cu cin ma mi zə handay ar tu nday kədan Ifray suk jwə wa ndaya. Swə mæni gak ve dan ta' mæni nə, nə ve ye!»

¹³Sôwâ ra' dawre' mbə hay' Zezu kə nday kədan mum njay ba rum wa nday bay in dan kə Ifray zə ndaya. Ama sum ta zə rum dlay nday kə gbəgboŋo.

¹⁴Zə rum, Zezu la' ne ndaya: «I ar dawre' mbə hay' rin, i tak nday mi, zə Ifray wə wa' kədan mum suk jwə wa sôwâ mæni ra' nji kə ndaya.»

¹⁵Mum faŋ njay ba rum wa nday, bay kəki rum, mum 'ya ar ri rumu.

¹⁶Swə mæsin mbə hay' Zezu bay ci vun rumu: «Bə ta' kwa, na də gi kwa mæ bay mi kədan na fe nyî mæ də hâ su?»

¹⁷Zezu dām vun rumu: «Zə mi ha ci vun rin wa kwa mæ bay su? Swə mæ bay daw kəta'a. Ha la' wa' kədan ha fe nyî mæ də hâ si, a ta zə dan dlaya.»

¹⁸Swə nə ci vun rumu: «Dan dlay mæ ka su?» Zezu dām vun rumu: «A ci mar mi, a gi nja mi, a kəy hura mi, a hay dan wa swə mæsin mi.

¹⁹A mbâ ba wû kə ya wû, a bə jik wû ce' ndə mæni ha bə tu ru.»

²⁰Vay jid' nə la' ne numu: «Na ta zə dan dlay mæni kuni daŋ' si. Gwa' mæ ka kədan na gi kərem su?»

²¹Zezu dām vun rumu: «Ha la' wa' kədan ha ke swə mæ njeŋ si, a də gi coḅ kwa wû daŋ' də rəka, bay a də bul səlay rum ne kə sum ca, ndəna' ha də ke kə ndak wafray ḅo. Kəki rum, a mbə bay a ta zə rini.»

²²Ama kəri mæni vay jid' nə mun dan rum, mum 'ya dle kə dan dîk zə mum ndak juku.

²³Zə rum, Zezu la' ne kə sum ta zə rumu: «Na in mi ne, kəzin', kəcik bayrum kədan bə ndak ze wə ri mæni Ifray wə də suk jwə wa sôwâ umu.

²⁴Bay na wə in dan mənɪ nə mi ne kərem, kəcik kədan njoŋnjoŋ pā zra batal, ama kəcik zə bə ndak kədan ze Jwə Ifray pā num si.”

²⁵Kəri mənɪ sum ta zə Zezu mun dan rum, dan rum jin' wa ne nday juk, bay handay ini: «La' ndəna' si, sa nə gak ke kə nyî mə də hā su?”

²⁶Zezu kar nday bay la' ne ndaya: «Sumra' cu gak gi kwa rum mi, ama Ifray gak gi kwa daŋ'ŋ.”

²⁷Zə rum, Piyer la' ne numu: «A kar ri'i! Namba ar kwa daŋ' bay namba wə ta zə ru. Namba də fe mi su?”

²⁸Zezu la' ne ndaya: «Na in mi ne, kəzini: Kəri mənɪ Vay sumra' də suk wa kwasuk um mə kə mbra' wə nya mə mbrew, hi sôwâ mə guɓ wa hoɓ mənɪ ta zə rin, hi də gay' wa kwasuk jwə ta' kədan hi ɓok dan wa zə saŋ Israyel mə guɓ wa hoɓo.

²⁹Bay sôwâ daŋ' mənɪ ar so nday, njər nday, njar nday, ba nday, ya nday, daw nday, kə sine nday zə rin, handay də fe kwa rum də han kis vun nyem kis, bay handay də fe nyî mə də hā.

³⁰Ama sôwâ juk mənɪ vun kofo tam, handay də faŋ sôwâ mə kəki, bay sôwâ juk mənɪ sôwâ mə kəki tam, handay də faŋ sôwâ mə vun kofo.»

Matthieu 20

¹Vari mənɪ Ifray wə də suk jwə wa sôwâ um nə ra' nji kə bə sine mənɪ pā kə bəka ced' kədan mum ra' sum sin zə gi sin sine gu umu.

²Mum kawvun kədan mum nday po' səlay dāw zə bəka rum, bay mum sin nday kədan handay gi sin wə sine gu umu.

³Mum faŋ pā kərem kə fəta bəka, bay mum we sôwâ məsin mənɪ gay' wə lumu uray dan sin,

⁴bay mum la' ne ndaya: «Hi ta', i də gi sin wə sine gu man, bay na də mi po' kə vari rumu.”

⁵Bay handay ta hana. Bə sine pā kərem kə fəta du wa, bay kə fəta riya mum gi ndəna' ta'a.

⁶Ndo' vun rum, kəri mənɪ fəta hərə' kə no' wa, mum pā bay za' sôwâ məsin mənɪ gay' wə lumu 'wa' ɓo, mum ci vun ndaya: «Zə mi hi wə gay' ti uray bəka daŋ' dan gi sin su?”

⁷Handay dām vun rumu: «Zə swə dāw cu ra' mba wa sin mi.» Mum la' ne ndaya: «Hi ta', i də gi sin wə sine gu mana.”

⁸Kəri mənɪ fəta no' wa si, bə sine gu la' ne kə toŋ sin umu: «A dē sum sin, bay a po' bal cik nday, a təŋ kə sôwâ mənɪ na ra' nday kəki, bay a ndo' vun rum kə sôwâ mənɪ na ra' nday copo.”

⁹Sôwâ mənɪ təŋ sin kəri mənɪ fəta hərə' kə no' wa mbə, bay sasu fe səlay dāw dāwa.

¹⁰Kəri məni sôwâ məni təŋ sin kə bəka ced mbə, handay dīk i handay də fe pâ mə handay si, ama mum ne nday səlay dāw dāw ta'a.

¹¹Kəri məni handay fe səlay rum, handay ra' bak kə bə sine:

¹²Bay handay la' ne numu: Sôwâ məni təŋ sin kəki, handay gi sin ler dāw, bay ha po' nday vun nji kə namba, sôwâ məni cik kə sin i fəta bəka hâ riya!

¹³Ama bə sine dām vun swə dāw du ndaya: «Bây man, na cu gi vur vur kə ru mi, ha kawvun kə rin kədan ha gi sin zə səlay dāw bəka dāw, cu ndəna' mi su?

¹⁴A ve bal cik wû, bay a 'ya kə ndi. Na wa' ne kə swə məni na tle num kəki nə vun nji kə ru.

¹⁵Na cu kə vari kədan na gi kwa məni na wə wa' kə səlay man mi su? Ko ha gi sây' zə na gi kwa mə bay su?"

¹⁶Zezu ndo' vun dan ge umu: «Ndəna' ta' sôwâ mə kəki də faŋ sôwâ mə vun kofo, bay sôwâ mə vun kofo də faŋ sôwâ mə kəki."»

¹⁷Kəri məni Zezu wə də so Jeruzalem, mum ra' sum ta zə rum mə guḅ wa hoḅ kə hay' cem kəri məni handay wə vari, bay mum la' ne ndaya:

¹⁸«I kar ri', namba ni wə də so Jeruzalem, sôwâ də ar Vay sumra' də ba sum rôwâ mə du sum po' fur kə sum pay zu dan dlay, handay də bok dan mar wa rum,

¹⁹bay handay də um ar də ba sôwâ məni cu zə saŋ sôwâ Zuwif mi, handay də um ru, də um pe kə ləva, bay də um gay' də wa gu, bay kəki rum bəka hinji', mum də car mbə mara."»

²⁰Kəri rum, ya daw Zebede mbə hay' Zezu kə daw sa, ta kuduk nya kor rum kədan ta o kwa hay' rumu.

²¹Zezu ci vun sa: «Həŋ wa' mi su?» Ta dām vun rumu: «A kawvun kə rin kədan kəri məni ha wə də suk jwə wa sôwâ wû, daw man mə hoḅ məni kuni də gay' hay' ru, dāw ba fun ru bay məsin ba gur ru."»

²²Zezu dām vun ndaya: «Hi cu we kwa məni hi wə o nə mi. Hi gak ce timbi boni məni na wə də ce nə si su?» Handay dām vun rumu: «Namba gaka."»

²³Zezu la' ne ndaya: «Kəzin', hi də ce timbi boni məni na wə də ce, ama na cu kə vari kədan na mi ne ri suk mə ba fun ko mə ba gur mi. Ba man kə məni də ne ri məni mum gila' rum ne kə sôwâ məni mum da' nday kədan handay gay' hana."»

²⁴Kəri məni sum ta zə rum məsin mə guḅ mun dan rum, handay ra' bak wa daw ya mə hoḅ kuna.

²⁵Zə rum, Zezu dē nday daŋ' bay la' ne ndaya: «Hi we si: Sum jwə sôwâ nya məsin wə suk kə gbəgboŋ wa sôwâ nday, bay sum rôwâ wə ta' gbəgboŋ nday ne kə sôwâ.

²⁶Ama kwa rum cu gak də ke ndəna' wə du ri mi. Zawa, swə dāw la' wa' kədan mum ke bə kawḅa kul sôwâ Kris si, say bə rum faŋ bə gi sin mi.

- ²⁷Bay swə dāw la' wa' kədan mum ke bə dle kofo mə du ri si, say bə rum faŋ bek mi.
- ²⁸Ndəna' ta', Vay sumra' cu mbə kədan sôwâ gi zə rum mi, ama mum mbə kədan mum gi zə sôwâ bay ne tu rum ndə kwa po' fur kədan tumwa sôwâ juku.”
- ²⁹Kəri mənɪ handay wə wur mbə so Jeriko, raw sôwâ ta zə Zezu.
- ³⁰Dəŋâr hoɓ mənɪ gay' hay' vari mun i Zezu wə pâ, zə rum handay təŋ kə do dana: «Bârî, Vay David, a we ca wa mba!”
- ³¹Raw sôwâ dlay nday kə gbəgbonj kədan kuni seŋ vun si, ama handay faŋ do dan kə gbəgbonj pâ mə vun kofo: «Bârî, Vay David, a we ca wa mba!”
- ³²Zezu faŋ ca, mum dɛ nday bay ci vun ndaya: «Hi wa' i a gi mi zə ri su?”
- ³³Handay dām vun rumu: «Bârî, namba wa' i a ar i ne mba.”
- ³⁴Zezu ci' ca wa nday bay dāk i ndaya. Kəkor sar, handay dle kə weri, bay handay ta zə rumu.

Matthieu 21

- ¹Kəri mənɪ handay ta hərə' kə so Jeruzalem, handay day so Betfage, mənɪ wə wa i igway' mənɪ gu olivə wə han juku. Zezu sin sôwâ hoɓ du sum ta zə rum ta kofo.
- ²Mum la' ne ndaya: «I də so mə nay' kor ri. Kəri mənɪ hi də day wə han, hi də za' ya kor kə vay sə jew wə hana. I ulay' nday mbə ne nan kə ndi.
- ³Swə la' ci vun ri si, i dām vun rumu: Bârî wə wa' rumu. Bay bə rum də nday ar mi ne kəri rum sara.”
- ⁴Kwa rum gi ndəna' kədan nyen mbi dan mənɪ bə ka' dan ini:
- ⁵I in ne kə so Siyon: Əŋ kar ri'i! Jwə maŋ wə mbə hay' riŋi! Mum swə mə 'yeŋ, bay mum ur wa vay ya kor rumu.
- ⁶Zə rum, sum ta zə Zezu 'ya dle bay gi kwa mənɪ mum in ne ndaya.
- ⁷Handay mbə kə ya kor kə vay sa. Handay dluɓ mbraw nday ta ki nday, bay Zezu ur suk hana.
- ⁸Sôwâ raw dle tu si dluɓ mbraw nday vari. Sôwâ məsin tum tlap gu bay dluɓ wə vari ta'a.
- ⁹Raw sôwâ mənɪ wə ta kor Zezu kə sôwâ mənɪ wə ta zə rum do dan kuna: «Mbra' hay' Vay David! Ifray nə kuswa' swə mənɪ mbə kə semdɛ Bârî! Mbra' hay' Ifray mə wafraya!”
- ¹⁰Kəri mənɪ Zezu ze ta so Jeruzalem, sôwâ so rum daŋ' wur kə do dana. Handay ci vun: «Sa nə swə mənɪ nə su?”
- ¹¹Raw sôwâ dām vun ndaya: «Mum nə bə ka' dan mə dɛ kə Zezu mənɪ car mbə so Nazaret nya Galile.”

¹²Zezu ze ta rawti so po' fur sôwâ Zuwif, bay mum 'way sôwâ mœni wə gi coɓ kwa kə sôwâ mœni wə coɓ kwa wə rawti so rumu. Mum faɲ i tablə sôwâ mœ gi sam sɛlay kə kwasuk sôwâ mœni wə coɓ kuruku.

¹³Mum faɲ la' ne ndaya: «Dan rum wây'i: So man də də kə so mœni sôwâ daɲ' gak in dan kə Ifray wə hana. Ama mœ hi, hi faɲ gi so rum ce' ndə ri pe' hura na'a!»

¹⁴Dəɲâr kə lem mbə kuni hay' Zezu wə rawti so Ifray, bay mum car ndaya.

¹⁵Sum rôwâ mœ du sum po' fur kə sum pay zu dan dlay ra' kuni bak kəri mœni handay we yew mœni Zezu gi bay mun dan mœni dawre' wə do wə rawti so rumu: «Mbra' hay' Vay David!»

¹⁶Zə rum, handay ci vun Zezu: «Ha mun dan mœni handay wə in nə si su?» Zezu dām vun ndaya: «Awo, hi cu in dan mœni nə dāw mi su? Ha kə mœni gi dawre' kə dāw mœ vun pa' kədan handay wû buru.»

¹⁷Mum faɲ 'ya ar nday bay pâ mbə so rumu. Mum ta so Betani bay bar wə hana.

¹⁸Siw rum kə bəka, kəri mœni Zezu faɲ də so Jeruzalem, mē' ti numu.

¹⁹Mum we gu tərūm wə hay' vari, bay mum fur ta zə rum, ama mum cu za' vra' sə ko dāw mi, say tlapa. Zə rum, mum la' ne kə gu tərūm ra: «Həɲ cu də vra' kpe za' mi!» Kəkor sar, gu tərūm rə co'o.

²⁰Sum ta zə rum we kwa rum, bay kwa rum jin' wa ne ndaya. Handay ci vun Zezu: «Gi ma gu tərūm rə co' kəkor sar su?»

²¹Zezu dām vun ndaya: «Na in mi ne, kəzin', hi la' ve Ifray njeɲ si, bay hi la' cu way dan rum mi si, hi cu gak gi kwa mœni na gi kə gu tərūm rə taw mi, ama hi gak la' ne kə i igway' mœ tira: Əɲ 'ya mbə ti, bay dam də ya mbi, bay kwa rum də gi.

²²Hi la' ve dan rum si, hi də fe kwa daɲ' mœni hi də ci vun rum kəri mœni hi wə in dan kə Ifraya.»

²³Zezu ze ta rawti so po' fur sôwâ Zuwif bay təɲ kə ta' kwa wə hana. Kəri rum, sum rôwâ mœ du sum po' fur kə sum rôwâ mœ du sôwâ Zuwif mbə kuni hay' rum bay ci vun rumu: «Kə gbəgbəɲ sa ha wə gi kwa mœni kuni su? Sa nə ne gbəgbəɲ rum ne nu su?»

²⁴Zezu dām vun ndaya: «Na də ci vun ri kə dan dāw, hi la' dām vun rin si, na də mi ta' swə mœni ne gbəgbəɲ ne nan kədan na gi kwa mœni kuna.

²⁵Sa nə sin Zaɲ gi baptem su? Ifray su? Ko sumra' su?» Ama handay təɲ kə dle vun mbok nday, bay handay ini: «Namba la' dām i Ifray sin um si, mum də ci vun mba: Zə mi hi cu ve num mi su?

²⁶Ama namba la' dām i sumra' sin um si, namba ne wəlok raw sôwâ zə handay daɲ' we i Zaɲ nə ke bə ka' dana.»

²⁷Zə rum, handay dām vun Zezu: «Namba cu we mi.» 'Bay Zezu la' ne ndaya: «La' ndəna' si, na ta', na cu də mi ta' swə mənɪ ne gbəgbəŋ ne nan kədan na gi kwa mənɪ kuni mətə'a.»

²⁸Zezu ci vun ndaya: «Hi dɪk ma wa dan mənɪ nə su? Swə məsin kəta' kə daw hobo. Mum ta hay' vay mə mbri bay la' ne numu: "Vay man, a də gi sin wə sine gu tama.»

²⁹Vay nə dām vun rumu: Na cu də mi, ama kəki rum mum faŋ samwa dan dɪk um, bay mum 'ya ta sine gu.

³⁰Bəba faŋ ta hay' vay mə nyêw bay la' ne num ndəna' ta'a. Vay nə dām vun rumu: Awo, bəba, na də ta, ama mum cu ta han mi.

³¹Wə du daw mə hoɓ mənɪ kuni, sa nə gi bə ba um su?» Handay dām vun rumu: «Vay mə mbri na.» Zezu la' ne ndaya: «Na in mi ne, kəzin', sum bəwa kwa kə sum ghəghay də ze kuni wə ri mənɪ Ifray wə də suk jwə wa sôwâ um cop ri.

³²Zə Zaŋ mbə hay' ri, bay mum ta' vari mə njeŋ ne ni, ama hi cu ve num mi, ama sum bəwa kwa kə sum gi ghəghay ve numu. 'Bay ko kəki mənɪ hi we ndəna', hi cu faŋ vunduk ri bay ve num mi.»

³³«I mun dan mə gəgan məsini: Swə məsin pe gu wə sine umu. Mum dluɓ vun rum, mum dla' zra kədan mum 'yem vra' gu wə han, bay mum dla dap kədan sôwâ mənɪ ji sine gu rum gak gay' wə hana. Kəki rum, bə sine ar sine gu rum wə ba sum ji sine gu, bay mum 'ya rəkwaya.

³⁴Kəri mənɪ wakaya rum mbə day, mum sin sum sin um wə hay' sum ji sine gu kədan handay ve vun kwa wakaya um wə ba ndaya.

³⁵Ama sum ji sine gu kaw sum sin um kuni, handay pum swə daw, ci məsin, bay ge bāy hinji' nday kə gway'i.

³⁶Zə rum, bə sine gu sin sum sin məsin raw pā mə vun kofo, ama sum ji sine gu gi nday ndəna' ta'a.

³⁷Ndo' vun rum mum sin vay um hay' nday kə ini: Handay də mbâ vay mana.

³⁸Ama kəri mənɪ sum ji sine gu we vay nə, handay in kuni mbok nji: Swə mənɪ də ti so nə wə mba. Mə də ci num ye, bay sine gu rum də faŋ mə namba.

³⁹Zə rum, handay kaw num du sine gu ge ta rəka bay ci numu.»

⁴⁰Zezu ci vun ndaya: «Kəri mənɪ bə sine gu də mbə, mum də gi mi kə sum ji sine mənɪ kuni su?»

⁴¹Handay dām vun rumu: «Mum də ci sôwâ mə bro' mənɪ kuni dan we ca, bay mum də ar sine "viŋə" um də ba sum sin məsin mənɪ də um ne vun kwa wakaya mə mum kəri wakaya.»

⁴²Zezu faŋ la' ne ndaya: «Hi cu in dan mənɪ wə du 'Derwa Ifray daw mi su? Gway' mənɪ sum dām so ar ge ta rəka, gway' rum faŋ gway' mə kə sin toŋ wə dleŋ so. Bârî gi kwa rum ndəna', bay bay zə mba kədan namba we kwa rumu!»

⁴³Zezu faɲ ini: «Zə rum, na in mi ne: Ifray də ar suk jwə mə wa ri, kədan mum suk jwə wa sôwâ nya məsin mənɪ wə gi kwa mə njeɲe.

[⁴⁴Swə mənɪ də nde wa gway' rum, bə rum də kəy tu rum, ɓay gway' nə la' nde wa swə si, gway' rum də um haɓ njum' njum'mu.]]”

⁴⁵Sum rôwâ mə du sum po' fur kə kul sôwâ Zuwif mə ɗe kə Farisiyen mun kuni dan mə gəgan Zezu, ɓay handay mun i mum ge dan wa ndaya.

⁴⁶Zə rum, handay keɓ vari kədan handay um kaw, ama handay ne wəlok raw sôwâ mənɪ we Zezu ce' ndə bə ka' dana.

Matthieu 22

¹Zezu in dan mə gəgan kərem kədan mum ta' kwa ne kə sôwâ mənɪ mun dan umu. Mum la' ne ndaya:

²«Vari mənɪ Ifray wə də suk jwə wa sôwâ um nə ra' nji kə dan mənɪ na: Jwə məsin təɲ kə keɓ kwa zə vay um wə də gi cer cin ma.

³Mum sin sum sin um kədan handay ɗe sôwâ mbə ti kwati wə ri dər rum, ama handay cu mun mbə mi.

⁴Mum faɲ sin sum sin məsin kə dan mə ni na: I in ne kə sôwâ mənɪ na ɗe ndaya: "I kar ri'i! Na gila' kwati rum si. Na fol ba naw man kuni kə daw naw man mə i ili. Kwa ɗaɲ' gila' si. I mbə ti kwati dər rum ye!”

⁵Ama sôwâ mənɪ mum ɗe nday cu tle fur dan rum mi, ɓay handay 'ya ta vun sin ndaya. Swə ɗaw ta sine um, swə məsin 'ya vari gaɲ par,

⁶ɓay sôwâ məsin kaw sum sin kuni, handay rik nday ɓay ci ndaya.

⁷Jwə nə tle bak, ɓay mum sin soje um kuni, ta ci sôwâ mənɪ ci sum sin um kuni ɓay ge ku wa so ndaya.”

⁸Mum faɲ la' ne kə sum sin umu: "Kwati dər gila' si, ama sôwâ mənɪ na ɗe nday cu nde i mbə mi.

⁹Zə rum, i də wə vari mə mbri, ɓay i ɗe sôwâ ɗaɲ' mənɪ hi za' wə han kədan handay mbə ti kwati dər rumu.”

¹⁰Sum sin 'ya ta wə vari cem cem, ɓay handay ɓawa sôwâ ɗaɲ' mənɪ handay za' wə han, sôwâ mə bro' kə sôwâ mə ɓay ta', ɓay rawti so dər nyen kə sôwâ.

¹¹«Jwə nə ze ta rawti so kədan mum kar sôwâ mənɪ mum ɗe nday, ɓay mum we swə ɗaw han du nday mənɪ cu ge mbraw dər mi.

¹²Mum la' ne numu: "Bây man, gi ma kədan ha ze mbə ti dan mbraw dər su?" Ama swə nə cu ɗam dan mi.

¹³Kəri rum, jwə nə la' ne kə sum sin umu: "I ɓaɲ sem rum kə ɓa rum, ɓay i ge num də rəka wə ri mə ura'a: Mum də ci' kə cwə se' wə hana.”

¹⁴Kəzin' sôwâ mə də rum juk, ama sôwâ mə da' rum wə cepe.”

¹⁵Ndəna' kul sôwâ Zuwif mə də kə Farisiyen ta gila' dan kədan handay kaw Zezu kə dan ge vunu.

¹⁶Handay faɲ sin sôwâ məsin mə du sum ta zə nday kə sôwâ məsin mə du kul sôwâ Zuwif mə də kə Herodiyen kədan handay in ne kə Zezu: «Bə ta' kwa, namba we si, ha wə in tu dan, bay ha wə ta' vari Ifray njeɲ ne kə sôwâ daɲ', dan ne wəlok i sumra', zə ha cu gi sôwâ cem cem mi.

¹⁷A in dan dɪk wû ne mba ri'i: Dan dlay mba ne vari ne mba kədan namba po' grama hay' jwə mə mbri mə nya Romə si su? Ko po' mi su?”

¹⁸Ama Zezu we dan dɪk mə bro' nday, zə rum, mum ci vun ndaya: «Hi sum vur vur, zə mi hi wə keɓ kədan hi man kaw kə dan ge vun su?

¹⁹I ta' səlay məni hi wə po' grama kə ndi nə ne nan ri'i.» Handay ne səlay rum ne numu.

²⁰Zezu ci vun ndaya: «Nyî tu kə semdə sa wây' han məni nə su?”

²¹Handay dam vun rumu: «Nyî tu jwə mə mbri mə nya Romə na.» Zə rum, Zezu la' ne ndaya: «La' ndəna' si, i ne kwa jwə mə mbri mə nya Romə ne num, bay i ne kwa Ifray ne num ta'a.”

²²Kəri məni handay mun dan rum, dan rum jin' wa ne ndaya. Handay ar num bay 'ya dle.

²³Kə fəta rum, sôwâ məsin mə du kul sôwâ Zuwif mə də kə Sadusiye mbə hay' Zezu. (Handay sôwâ məni wə in i Ifray cu də ra' sôwâ mbə mar kpe mi). Handay ci vun rumu:

²⁴«Bə ta' kwa, Moyizə ini: Swə la' mar dan ar daw si, say njər rum nə tle rənda mok njər rum cin kədan mum vra' daw kə sə tan njər rum məni mara.

²⁵Ba' si, daw mə njiwkwa sedā' kəta' wə du mba. Handay daw ya mə daw, mə mbri cin ma bay mum mar, zə mum cu ar daw mi, mum ar rənda rum ne kə njər rumu.

²⁶Kwa rum gi ndəna' kə buwa hoɓ rum bay buwa hinji' rum ta', hā handay sedā' daɲ'ɲ.

²⁷Kəki nday daɲ', ma rə mar ta'a.

²⁸Fəta məni sôwâ də pâ mbə mar, ma rə də ke ma sa du daw mə sedā' kuni su? Zə handay daɲ' cin sa!”

²⁹Zezu dam vun ndaya: «Hi wə vi' tu ri, zə hi cu we Derwa Ifray ko gbəgbəɲ Ifray mi.

³⁰Zə kəri məni sôwâ wə də pâ mbə mar, njiwkwa kə rawkwa cu də cin nji mi, ama handay də ke ce' ndə sum sin Ifray mə wafraja.

³¹Ama wa dan sum mar məni də pâ mbə mar, hi cu in dan məni Ifray in nə mi su? Mum ini:

³²Na Ifray Abraham, kə Ifray Isak, ɓay Ifray Yakub. Ifray nə Ifray sôwâ mə kə nyî mə də hâ, mum cu Ifray sum mar mi.”

³³Kwata' um jin' wa ne kə raw sôwâ mənɪ mun dan rumu.

³⁴Kəri mənɪ kul sôwâ Zuwif mə də kə Farisiyen mun i Zezu ge mbi vun kul sôwâ Zuwif mə də kə Sadusiyeɲ, handay ɓa nji.

³⁵Swə ɗaw du nday wa' kədan mum kaw Zezu kə dan ge vun, mum nə bə pay zu dan dlaya. Mum ci vun rumu:

³⁶«Bə ta' kwa, dan dlay mə mbri mənɪ pā nday ɗaŋ' nə kə mə ka su?»

³⁷Zezu ɗam vun rumu: «A bə Bârî, Ifray wû, kə vunduk ru ɗaŋ', kə nyî ru ɗaŋ', ɓay kə gwet wû ɗaŋ'ɲ.

³⁸Mum nə dan dlay mə mbri ɓay kə mbra' ta'a.

³⁹Bây hoɓ dan dlay mə mbri mənɪ ra' nji nə ni na: A bə jik wû ce' ndə mənɪ ha wə bə tu ru.

⁴⁰Dan dlay Moyizə ɗaŋ' kə dan ka' sum ka' dan ɗaŋ' car wa dan dlay mə hoɓ mə ni kuna.”

⁴¹Kəri mənɪ kul sôwâ Zuwif mə də kə Farisiyen ɓa nji, Zezu ci vun ndaya:

⁴²«Hi ɗik dan mi wa Kris su? Mum nə vay rawti sa su?» Handay ɗam vun rumu: «Mum vay rawti David.”

⁴³Zezu ci vun ndaya: «La' ndəna' si, gi ma Simbed' Ifray ta' ne kə David kədan mum um də kə Bârî su? Zə David ini:

⁴⁴Bârî in ne kə Bârî mana: A suk ɓa fun rin, hâ na də njay sum sî wû zə sem ru.

⁴⁵David la' də num kə Bârî si, gi ma kədan mum faŋ vay rawti David su?»

⁴⁶Swə ɗaw du nday cu gak ɗam vun rum mi, ɓay daka fəta rum, swə ɗaw cu gak ci vun dan vun rum mi.

Matthieu 23

¹Kəri rum, Zezu la' ne kə raw sôwâ kə sum ta zə rum kuna:

²«Sum pay zu dan dlay kə kul sôwâ Zuwif mə də kə Farisiyen wə tle ri kə pay zu dan dlay Moyizə ne kə sôwâ.

³Zə rum, i mun vun nday, ɓay i gi kwa ɗaŋ' mənɪ handay wə mi in ne. Ama i jənok kwa gi nday mi, zə handay cu gi kwa mənɪ handay wə ta' nə mi.

⁴Handay wə ɓaŋ kwazi' mə kə mbra' mənɪ cu gak tle mi ɓay cin də bəke ɓa sôwâ, ama handay cu bə kaw ɓa nday kə tle kwazi' rum, ko ɗak kə vay ɓa nday mi.

⁵Handay gi wə gi sin nday ɗaŋ' kədan sôwâ nday kara. Handay wə ri ləlay rôwâ rôwâ ge jewre kə jew so ɓa, ɓay handay wə du' uluk zu mbraw nday jəraka.

⁶Handay wə keɓ ri suk mə kofo wə ri gi cer ɓay wə keɓ ri suk mə vun kofo wə rawti so Ifray sôwâ Zuwif.

⁷Handay wa' i sôwâ kaw jeɓ nday wə ri ɓawa sôwâ, ɓay handay wa' i sôwâ de nday kə Bə ta' kwa.

⁸Ama mə hi, i ar sôwâ de ni kə Bə ta' kwa mi, zə hi daŋ', hi daw bəba, ɓay hi kə Bə ta' kwa daw sara.

⁹I de swə daw wa nya kə "Bəba" mi, zə hi kə Bəba daw sara. Mum wə wafraya.

¹⁰I ar sôwâ de ni kə "Bârî" mi ta', zə hi kə Bârî daw sar, mum nə Kris.

¹¹Swə mə kə mbra' mə du ri, nə faŋ bə gi sin mi.

¹²Swə mənɪ wə mbra' tu rum, bə rum də nde, ɓay swə mənɪ wə hom tu rum, bə rum də fe mbra'a."

¹³«Boni wa ri, sum pay zu dan dlay kə kul sôwâ Zuwif mə de kə Farisiyen, hi sum vur vur, hi wə ta' vun vari ri mənɪ Ifray wə də suk jwə wa sôwâ um wə kor sôwâ məsini! Hi kə tu ri, hi cu wə mun ze ri rum mi, ɓay hi cu wə ar sôwâ mənɪ kə mē' ze də ri rum ze mi.

[¹⁴Boni wa ri, sum pay zu dan dlay kə kul sôwâ Zuwif mə de kə Farisiyen, hi sum vur vuru! Hi ti kwa daŋ' mənɪ wə ɓa rənda, ɓay kəri rum hi in dan kə Ifray hâ hâ kədan kədam tu sôwâ. Zə rum hi də fe dan ɓok mə toŋo!]

¹⁵Boni wa ri, sum pay zu dan dlay kə kul sôwâ Zuwif mə de kə Farisiyen, hi sum vur vuru! Hi wə gaŋ wa nya kə wa mbi daŋ' kədan hi keɓ swə daw mənɪ wə də ve dan mi, ɓay kəri mənɪ hi də um za', hi um gi faŋ swə mə də ri ku hâ mi pâ sem hobo.

¹⁶Boni wa ri, hi dəŋâr mənɪ wə ta' vari ne kə sôwâ! Hi wə ini: "Swə la' sur vun kə so po' fur sôwâ Zuwif si, dan ge cu wa bə rum mi, ama mum la' sur vun kə jiki mə bondo mə so rum, dan ge kəta' wa bə rumu."

¹⁷Hi lay ɓay hi dəŋâra! Mi nə kə mbra' pâ nji su? Jiki mə bondo su? Ko so po' fur mənɪ gi jiki mə bondo rum faŋ ɓay su?

¹⁸Hi wə in ta'a: Swə la' sur vun kə kwa cu kwa po' fur si, dan ge cu wa bə rum mi, ama mum la' sur vun kə kwa po' fur mənɪ wa kwa cu kwa po' fur si, dan ge kəta' wa bə rumu.

¹⁹Hi dəŋâra! Mi nə kə mbra' pâ nji su? Kwa po' fur su? Ko kwa cu kwa po' fur mənɪ wə gi kwa po' fur rum faŋ ɓay su?

²⁰Zə rum, swə mənɪ sur vun kə kwa cu kwa po' fur, ka bə rum sur vun kə kwa cu kwa po' fur rum kə kwa daŋ' mənɪ njay wə hana.

²¹Swə mənɪ sur vun kə so po' fur sôwâ Zuwif, ka bə rum sur vun kə so po' fur rum kə Ifray mənɪ suk wə hana.

²²Swə mənɪ sur vun kə wafray, ka bə rum sur vun kə kwasuk Ifray kə Ifray mənɪ suk wə wa kwasuk rumu.

²³Boni wa ri, sum pay zu dan dlay kə sôwâ Farisiyen, hi sum vur vur, hi wə ne guḅ kwa kura ce' ndə za say, kə tlap red, bay dleḅ ne kə Ifray, ama hi wə jed kwa mə kə mbra' mənɪ wə du dan dlay ce' ndə gi kwa mə bay, kə we ca, bay gi njeṅ, i gi kwa mənɪ kuni zaw, i kaw dan rum kə zel' mi.

²⁴Hi dəṅâr mənɪ wə ta' vari ne kə sôwâ! Hi wə zor kwace kədan hi tak gwâ', ama hi wə sa' njoṅnjoṅo!

²⁵Boni wa ri, sum pay zu dan dlay kə kul sôwâ Zuwif mə də kə Farisiyen, hi sum vur vur, hi wə kol ga' ki timbi kə tasaw, ama rawti nday nyen ped' kə kwa hura mi kə kwa səna' mi mə bro'o.

²⁶Swə Farisiyen mə dəṅâra! A kol rawti timbi cop, bay ndəna' ga' ki rum də ke kəleṅ ta'a.

²⁷Boni wa ri, sum pay zu dan dlay kə kul sôwâ Zuwif mə də kə Farisiyen, hi sum vur vur, hi ce' ndə 'wəy mənɪ sôwâ gila' rum, bay kolko' kə bəho'o. Ga' rəka rum we bay, ama rawti rum nyen ped' kə so mar kə kwa mə cicimi.

²⁸Ndəna' kə ri ta'a: Sôwâ məsin wə kar ga' rəka mi ce' ndə njeṅ, ama vunduk ri nyen ped' kə vur vur bay sin mə bro'o."

²⁹«Boni wa ri, sum pay zu dan dlay kə kul sôwâ Zuwif mə də kə Farisiyen, hi sum vur vur, hi wə dām kwa mə bay wa 'wəy sum ka' dan, bay hi wə kolko' 'wəy sôwâ mə njeṅ kə bəho'o.

³⁰Bay hi ini: Namba la' kəzə kə ri mə ba mbri ramba si, namba cu kawvun kə nday kədan namba ci sum ka' dan mi.

³¹Ndəna', hi we kə tu ri i hi daw rawti sôwâ mənɪ ci sum ka' dana.

³²La' ndəna' si, i də kofo kə sin mənɪ ba mbri rami təṅ zu rum nə ye!

³³Hi wu', zep kay', hi gak sid' tu ri wə du boni ri ku mə ma su?

³⁴Zə rum, i mun, na də sin sum ka' dan kə sum gwet bay sum pay zu mi ne. Hi də ci sôwâ məsin, hi də gay' sôwâ məsin də wa gu, bay hi də pe sôwâ məsin kərem kə ləva wə rawti so Ifray sôwâ Zuwif mi, bay hi də keḅ zu nday so kə so.

³⁵Zə rum, dan mə wa sôwâ mənɪ ci sôwâ mə njeṅ daka ri mənɪ swə daw ci Abel, swə mə njeṅ, hā day ri mənɪ hi ci Zakariya, vay Baraki, mbok du jew Ifray kə kwa cu kwa po' fur, dan rum faṅ də wa ri.

³⁶Na in mi ne, kəzin', dan mənɪ wa sum ci sôwâ mənɪ kuni daṅ' faṅ də wa sôwâ mə tama!"

³⁷«Jeruzalem, Jeruzalem, həṅ kə mənɪ ci sum ka' dan bay ge sôwâ məsin mənɪ Ifray sin hay' riṅ kə gway'i. Sem ma dak na wə keḅ kədan na bəwa sôwâ maṅ mbə hay' rin ce' ndə ya sinyek wə bəwa daw sə zə lam tlaw sə su? Ama hi cu bə mi!

³⁸La' ndəna' si, so mi də faŋ vri.

³⁹Na in mi ne: Daka mgbəŋ ni nə hi cu də man we za' mi, hâ day ri mənɪ hi də ini: Ifray nə kuswa' swə mənɪ mbə kə semdɛ Bârî!»

Matthieu 24

¹Zezu pâ mbə rawti so Ifray, bay kəri mənɪ mum wə ta, sum ta zə rum mbə hay' rum kədan handay um ta' vari dām so Ifray sôwâ zuwif rumu.

²Zə rum, Zezu la' ne ndaya: «Hi we kwa mənɪ kuni daŋ' si su? Na in mi ne, kəzin', ko gway' dāw cu də suk wa gway' məsɪn mi. Handay daŋ' də bru.»

³Zezu suk wa igway' mənɪ gu olivə wə han juku. Sum ta zə rum mbə hay' rum 'yey bay ci vun rumu: «A in ne mba ri'i! Kwa rum də gi kə ma su? Kwa mə ta' kwa mi wə də ta' ri mbə wû kə ndo' nya nə su?»

⁴Zezu dām vun ndaya: «I ji tu ri kədan swə dāw nə vi' ni mi.

⁵Zə sôwâ juk wə də mbə kə semdɛ rin, bay handay də ini: "Na nə Kris na!" Bay handay də vi' sôwâ juku.

⁶Hi də mun ci' zi mə həre', bay hi də mun dan zi mə seŋe. I ne wəlok mi, zə kwa rum də mbə gi, ama ndo' nya cu mətə'o.

⁷Sôwâ nya məsɪn də car zi wa sôwâ məsɪn, bay jwə məsɪn də car zi wa jwə məsini. Mê' də nde, bay nya də nyen wə ri cem ceme.

⁸Kwa rum daŋ' də ke ce' ndə təŋ zə boni mənɪ ma wə tuk kə vra'a.»

⁹Kəri rum, sôwâ də mi ar də ba sôwâ məsɪn kədan handay də gi boni mi ne bay də mi ci. Sôwâ nya məsɪn də mi sî zə rini.

¹⁰Kəri rum, sôwâ juk mənɪ ta zə rin də njay də du kwa mə bro', handay də ar nji wə ba sum sî nday, bay handay də sî nji mbok nji.

¹¹Sum ka' dan mə hay dan juk də mbə, bay handay də vi' sôwâ juku.

¹²Sin mə bro' də dlər bayrum hâ bə sôwâ juk də so'o.

¹³Ama swə mənɪ car ŋgəɗiŋ' hâ ndo' rum, bə rum də ke kə nyî mə də hâ.

¹⁴Sôwâ də ka' Dan mə Kəɗām mənɪ wə in dan wa dan vari mənɪ Ifray wə də suk jwə wa sôwâ um nə wa nya daŋ' kədan handay in njeŋ dan rum ne kə sôwâ nya məsɪn daŋ'ŋ. Kəki rum, nya də ndo'o.

¹⁵«Hi də we kwa mə bro' mənɪ wə dənok kwa mənɪ bə ka' dan mə dɛ kə Daniyel in dan wa rum nə cin wə ri mə Ifraya. (Swə mənɪ wə in dan rum, nə munu!)

¹⁶Kəri rum, sôwâ mənɪ də ke wə nya Zude, kuni ne ur də wa igway'i.

¹⁷Swə mənɪ də ke wa so lari um, bə rum nə dam ze də rawti so um kədan nə ra' kwa han mi.

- ¹⁸Bay swə mənɪ də ke wə sine, bə rum nə gewa mbə so um kədan nə ra' mbraw um mi.
- ¹⁹Də ke kəcik kə bəka rum wa rawkwa mənɪ kə ur, ɓay wa rawkwa mənɪ kə daw vun pa'a!
- ²⁰I o Ifray kədan kwa rum nə mbə wa ri kə ri simbed' ko kə fəta pemây mi!
- ²¹Zə kəri rum, boni də ke ɓayrum pā boni daŋ' mənɪ sôwâ wə ce daka təŋ zu nya hâ tam, ɓay boni mə ndani na' cu də mbə kərem za' mi.”
- ²²Ifray la' cu par raw bəka rum ta rəka mi si, swə ɗaw cu gak də sid' mi. Ama mum par raw bəka rum ta rəka zə sôwâ mənɪ mum da' ndaya.
- ²³«Kəri rum, swə la' in ne ni i i kar ri'i: "Kris wə tira! Ko mum wə kəna!" I ve dan rum mi.
- ²⁴Zə kris mə hay dan kə sum ka' dan mə hay dan də mba. Handay də gi kwa mə ta' kwa kə yew kədan handay vi' sôwâ mənɪ Ifray da' nday, handay la' gak si.
- ²⁵I mun ri', na ta' kwa rum ne ni copo.”
- ²⁶«Zə rum, swə la' in ne ni i i kar ri'i: "Mum wə du gop", i də han mi. Ko bə rum la' in ne ni i i kar ri'i: "Mum pe' wə tira", i ve dan rum mi.
- ²⁷Ce' ndə wədi buŋô wədi wafray daka ga' fəta bəka hâ fəta riya, mbə Vay sumra' də ke ndəna' ta'a.
- ²⁸Ri mənɪ mar kwa wə han, bok də ɓa wə han ta'a.”
- ²⁹«Kəki bəka boni mənɪ kuni, fəta də faŋ ura', cer cu də ɗəri mi, ciciw də njay mbə nya, ɓay gbəgbonj mə wafray də nyene.
- ³⁰Kəri rum, kwa mə ta' mbə Vay sumra' də car mbə wafray, zə rum, zə saŋ daŋ' wa nya də do ci', ɓay handay də we Vay sumra' mbə du dləmbur wafray kə gbəgbonj juk ɓay kə mbra' ta'a.
- ³¹Daw sin Ifray mə wafray də pe duɓ mə mbri, ɓay Ifray də sin sum sin um məsin kədan kuni də ɓawa sôwâ mənɪ Ifray da' nday wə jijəŋ nya fədi' daka vun nya hâ ndo' rumu.”
- ³²«I wum dan kwata' mənɪ gu tərɪm wə ta'a: Kəri mənɪ ɓa gu tərɪm təŋ kə kap ɓay tlap rum təŋ kə lo', hi we i vun ndor mbə hərə' si.
- ³³Ndəna' ta', kəri mənɪ hi də we kwa mənɪ kuni daŋ', i we i bəka mbə rum hərə', mum car wə vun vari.
- ³⁴Na in mi ne, kəzin', sôwâ mənɪ kə i tam, cu də mar daŋ' dan kwa rum daŋ' mbə gi mi.
- ³⁵Wafray kə nya də ndo', ama dan man cu də ndo' kpe mi.”

³⁶«Ama swə dāw cu we bəka mbə rum ko ri mbə rum mi. Ko sum sin Ifray mə wafray, ko Vay Ifray cu we mi, say Bəba dāw sar we.

³⁷Kwa mənɪ gi kə ri Nowe wə də gi ndəna' kə ri mbə Vay sumra' ta'a.

³⁸Zə kəri mənɪ mbi mə mbri cu mbə mətə', sôwâ wə ti kwati kə ce kwace. Handay wə cin nji bay wə ne daw rawkwa nday kə nji, hâ fəta mənɪ Nowe ze ta rawti da mə tɔŋ,

³⁹bay handay cu we dan rum mi hâ mbi mə mbri mbə ra' nday daŋ'ŋ. Kwa rum də gi ndəna' kə ri mbə Vay sumra' ta'a.

⁴⁰Kəri rum, njiwkwa hoɓ də ke wə sine: Ifray də tle dāw bay ar məsɪn,

⁴¹rawkwa hoɓ də hutu u wə vəna mə dāwa. Ifray də tle dāw bay ar məsini.

⁴²Zə rum, i ji kə bayrum, zə hi cu we bəka mənɪ Bârî mi də mbə nə mi.

⁴³I mun zu dan mənɪ nə kə bayrumu: Bə so la' we ri mənɪ hura wə də mbə so um kə ndi kə dukri si, mum də suk ji bay cu də ar hura ze so um mi.

⁴⁴Zə rum, hi ta', i ji kə bayrum, zə Vay sumra' wə də mbə kə ri mənɪ hi cu dɪk dan rum mi.”

⁴⁵Sa nə bə sin mə njeŋ bay kə gwet su? Mum nə swə mənɪ bârî um ne vari kar zu sum sin məsɪn so um ne num kədan mum nday ne kwati kə ri rumu.

⁴⁶Kədam zə bə sin mənɪ bârî um də um za' wə gi sin kəri mənɪ mum gewa mbə so umu!

⁴⁷Na in mi ne, kəzin', Bârî nə də ar kwa daŋ' də ɓa bə sin na.

⁴⁸Ama bə sin la' bro' si, mum wə dɪk wə vunduk rumu: "Bârî man cu də mbə ga'ri mi.”

⁴⁹Bay mum də tɔŋ kə pum sum sin mənɪ wə gi sin kə rum, bay mum də ti kwati kə ce kwace wanji kə sôwâ mə gal kə sum,

⁵⁰Bârî um də gewa mbə kə bəka mənɪ bə sin nə cu um ji mi, ko kəri mənɪ mum cu we mbə um mi.

⁵¹Bârî nə də um ci, bay um gi ce boni wanji kə sum vur vuru. Wə ri rum, mum də ci' bay cwə se'e.

Matthieu 25

¹«Kəri rum, vari mənɪ Ifray wə də suk jwə wa sôwâ um nə ra' nji kə way mə guɓ mənɪ ra' baŋgay nday bay wur kədan handay də ndewa kə nja.

²Vatl du nday lay, bay vatl du nday kə gwete.

³Mə lay kuni ra' baŋgay nday, ama handay cu ra' mur məsɪn wə ɓa nday mi.

⁴Ama mə kə gwet kuni ra' mur kə gula kə baŋgay ndaya.

- ⁵Nja nə cu mbə ga'ri mi, zə rum, way mə guḅ kuni daŋ' təŋ kə kaw sen, ḃay handay nde sene.
- ⁶Kə du dukri, handay mun wor mənɪ ka' dana: "Nja nə ni na! I car ndewa kə rum ye!"
- ⁷Kəri rum, way mə guḅ kuni dla' sen ḃay təŋ kə gila' baŋgay ndaya.
- ⁸Mə lay kuni la' ne kə mə kə gwet kuna: "I ne mur mi ne mba kî ri', zə baŋgay mba wə mara."
- ⁹Mə kə gwet kuni ḃam vun ndaya: "Â â, zə mur rum cu gak nde zə mba kə ri daŋ' mi! Pram i də hay' sum gi coḃ kwa, ḃay i də coḃ mur wə hana."
- ¹⁰Mə lay kuni 'ya dle vari coḃ mur, ama kəri rum, nja nə mbə day, ḃay mə vatl mənɪ gila' tu gay' wə han, cok ta so dər kə rum, ḃay bə so ta' vun vari.
- ¹¹Kəki rum, way mə kəḃi kuni mbə day ḃay do dana: "Bârî, Bârî, a ar vun vari ne mba!"
- ¹²Ama nja nə ḃam vun ndaya: "Na in mi ne, kəzin', na cu we ri mənɪ hi car mbə han nə mi.""
- ¹³Zezu faŋ ini: «La' ndəna' si, i ji, zə hi cu we bəka ko ri rum mi."
- ¹⁴«Kwa rum də ke ce' ndə swə mənɪ wə də 'ya gaŋa. Mum ḃe sum sin um ḃay ar kwa so um ḃa ndaya.
- ¹⁵Mum ne nday ḃaw ḃaw daŋ' ce' ndə gbəgboŋ ndaya. Mum ne səlay mbu vatl ne kə swə ḃaw, mum ne mbu hoḃ ne kə swə məsin, ḃay mum ne mbu ḃaw ne kə swə məsini. Kəki rum, mum 'ya dle vari gaŋa.
- ¹⁶Bə sin mənɪ fe mbu vatl 'ya dle kəkor sar ta gi par kə səlay rum, ḃay mum fe mbu məsin vatl ta han wa rumu.
- ¹⁷Bə sin mənɪ fe mbu hoḃ gi ndəna' ta', ḃay mum fe mbu məsin hoḃ ta han wa rumu.
- ¹⁸Ama bə sin mənɪ fe mbu ḃaw 'ya ta dla zra wə nya, ḃay mum no' səlay bârî um ta hana.
- ¹⁹Gi kim kəki rum raw, bârî sum sin kuni gewa mbə, ḃay mum təŋ kə in səlay um kə ndaya.
- ²⁰Bə sin mənɪ fe mbu vatl nə mbə hay' rum, ḃay mum ne num mbu məsin vatl mənɪ mum fe ta wa rum, mum ini: "Bârî, ha ne nan mbu vatla. A kar na ni fe səlay mbu vatl məsin ta han wa rumu!"
- ²¹Bârî um la' ne numu: "Baya! Ha bə sin mə ḃay ḃay njeŋ, ha gi njeŋ kə kwa mə kî. Zə rum, na də ar kwa mə mbri də ḃa ru. A mbə tuk kəḃam kə rini."
- ²²Kəki rum, bə sin mənɪ fe səlay mbu hoḃ nə mbə hay' rum ḃay ini: "Bârî, ha ne nan mbu hoḃo. A kar na ni fe mbu məsin hoḃ ta han wa rumu!"

- ²³Bârî um la' ne numu: "Bay, ha bə sin mə bay bay njeŋe. Ha gi njeŋ kə kwa mə kî. Zə rum, na də ar kwa mə mbri də ɓa ru. A mbə tuk kədam kə rini."
- ²⁴Ndo' rum, bə sin mənɪ fe sɔlay mbu daw nə mbə hay' rum bay ini: "Bârî, na we si: Ha nə swə mə cik tu. Ha wə tum kwa wə ri mənɪ ha cu jo' kwa han mi, bay ha wə ɓawa kwa wakaya wə ri mənɪ ha cu ge zep rum han mi.
- ²⁵Na ne wəlok ru, zə rum, na ta mo' sɔlay wû ta nya. A kar kwa wû nə ni na!"
- ²⁶Bârî um dam vun rumu: "Ha bə sin mə bro' bay ndala! Ha we i na wə tum kwa wə ri mənɪ na cu jo' kwa han mi, bay na wə ɓawa kwa wakaya wə ri mənɪ na cu ge zep rum han mi si su?
- ²⁷La' ndəna' si, kəzə a cin sɔlay man wə so mənɪ sôwâ wə cin sɔlay han, bay kəri gewa man, na mbə za' kəzə sɔlay man kə mbi rum dan'ŋ.
- ²⁸Zə rum, i ve mbu daw mə ɓa rum nə bay i ne kə swə mənɪ kə sɔlay mbu guɓ na.
- ²⁹Zə swə mənɪ kə kwa, bə rum də fe məsin də han, bay mum də ke kə kwa juk, ama swə mənɪ cu kə kwa mi, sôwâ də ve mə kî wə ɓa rum nə si.
- ³⁰Ama mə bə sin mə ndal mənɪ nə, i ge num də rəka wə ri mə ura'a. Wə ri rum mum də ci' bay cwə se'e."
- ³¹«Kəri mənɪ Vay sumra' də mbə ce' ndə jwə kə sum sin Ifray mə wafray dan', mum də suk wa kwasuk um mə kə mbra'a.
- ³²Sôwâ nya məsin dan' də ɓawa kor rum, bay mum də bul du nday ce' ndə ji kwa wə bul du cime kə huɓê.
- ³³Mum də njay cime wə ga' ɓa fun rum bay huɓê wə ga' ɓa gur rumu.
- ³⁴Kəri rum, jwə də la' ne kə sôwâ mənɪ wə də ke ga' ɓa fun rumu: "I mbə ye, hi sôwâ mənɪ Ba man kuswa' ni, bay i cok ri mənɪ Ba man gila' rum zə ri daka təŋ zu nya."
- ³⁵Zə kəri mənɪ na kə mē', hi ne kwati ne nana. Kəri mənɪ na kə mē' mbi, hi ne mbi ne nana. Kəri mənɪ na du ri ce' ndə rəkway, hi ve nan so mi.
- ³⁶Kəri mənɪ na kə tu uray, hi ge mbraw ne nana. Kəri mənɪ na kə gaɓ, hi tle fur rini. Kəri mənɪ na wə so dan'gay', hi ta kar nan wə hana.
- ³⁷Kəri rum, sôwâ mə njeŋ kuni ci vun rumu: "Bârî, kə ma namba we nu kə mē', bay namba ne kwati ne nu su? Kə ma namba we nu kə mē' mbi, bay namba ne mbi ne nu su?
- ³⁸Kə ma namba we nu ce' ndə rəkway du mba, bay namba ve nu so mba ko kə tu uray bay ge mbraw ne wû su?
- ³⁹Kə ma namba we nu kə gaɓ ko wə so dan'gay', bay namba ta kar nu wə han su?"
- ⁴⁰Jwə nə də dam vun ndaya: "Na in mi ne, kəzin', kəri dan' mənɪ hi gi kwa daw du kwa mənɪ kuni wə hay' vay nyêw daw du daw ba man mənɪ kuni, ka hi gi kwa rum hay' rini!"

⁴¹Kəki rum, jwə nə də la' ne kə sôwâ mənî wə də ke ɓa gur rumu: "I 'ya hay' rin si seŋ, hi sôwâ mənî Ifray ge nê' ri! I də du ku mə dan mar i kpe mənî Ifray gila' rum zə Satan kə sum sin umu.

⁴²Zə kəri mənî na kə mē', hi cu ne kwati ne nan mi. Kəri mənî na kə mē' mbi, hi cu ne mbi ne nan mi.

⁴³Kəri mənî na du ri ce' ndə rəkway, hi cu ve nan so mi mi. Kəri mənî na kə tu uray, hi cu ge mbraw ne nan mi. Kəri mənî na kə gaɓ ɓay wə so daŋgay', hi cu tle fur rin mi."

⁴⁴Kəri rum, handay də ci vun rumu: "Bârî, kə ma namba we nu kə mē', ko kə mē' mbi, ko ce' ndə rəkway du mba, ko kə tu uray, ko kə gaɓ, ko wə so daŋgay', ɓay namba cu kawɓa ru mi nə su?"

⁴⁵Jwə nə də dām vun ndaya: "Na in mi ne, kəzin', kəri daŋ' mənî hi vad' gi kwa dāw du kwa mənî kuni wə hay' vay nyêw dāw du dāw mə ni kuni, ka hi vad' gi kwa rum hay' rin ta'a."

⁴⁶Bay handay də ta du ku mə dan mar i, ama sôwâ mə njeŋ wə də ke kə nyî mə də hâ.»

Matthieu 26

¹Kəri mənî Zezu ndo' vun ge dan rum daŋ' si, mum la' ne kə sum ta zə rumu:

²«Hi we si: Bəka gwa' hoɓ kədan cer Zuwif mə dē kə Pakə nə gi. Sôwâ də ar Vay sumra' də ɓa sôwâ məsin kədan handay um gay' də wa gu."

³Kəri rum, sum rôwâ mə du sum po' fur kə sum rôwâ mə du sôwâ Zuwif ɓa kuni wa wə rawti so toŋ po' fur mə dē kə Kayif.

⁴Handay kawvun wanji dāw kədan handay kaw Zezu hura hura ɓay də um ci.

⁵Handay ini: «Namba cu gak um kaw wə du cer mi. Namba la' gi ndəna' si, sôwâ də car dana."

⁶Kəri mənî Zezu wə so Betani, wə rawti so swə mənî ke mgbo' mə dē kə Simon,

⁷ma məsin mbə hay' rum kə urdi mənî coɓ rum kəcik kə gula albatrə pedē. Ta wu' urdi rum ta wa Zezu kəri mənî mum suk wə vun tablə.

⁸Kəri mənî sum ta zə rum we ndəna', handay ra' bak ɓay ini: «Zə mi ta dənok urdi mə ni nə su?

⁹Swə gak gi coɓ urdi rum fe səlay raw, ɓay ne səlay rum ne kə sum ca!"

¹⁰Zezu mun dan in nday, ɓay mum ci vun ndaya: «Zə mi hi wə cik ma rə su? Kwa mənî ta gi wə hay' rin nə ɓaya.

¹¹Zə hi də ke kə sum ca hay' ri bəka daŋ', ama mə na, hi cu də ke kə rin hay' ri bəka daŋ' mi.

- ¹²Ta wu' urdi wə tu rin kədan ta gila' tu rin kə ndi kədan man mo'o.
- ¹³Na in mi ne, kəzini: Wə ri daŋ' məni sôwâ wə də ka' Dan mə Kədam wa nya daŋ', handay də in dan kwa məni ma rə gi, kə dik dan kwa gi sa.”
- ¹⁴Kəri rum, swə daw mə du sum ta zə Zezu mə guɓ wa hoɓ mə də kə Yudas Iskariyot, 'ya ta za' sum rôwâ mə du sum po' fur,
- ¹⁵bay ci vun ndaya: «Na la' ar Zezu də ba ri si, hi man də ne mi su?» Handay in səlay guhinji' ra' ne numu.
- ¹⁶Daka kə ri rum, Yudas tɛŋ kə keɓ vari kədan mum ar Zezu də ba ndaya.
- ¹⁷Kə bəka daw cer məni sôwâ Zuwif məni gi kə duwa' mə gi dan dlum, sum ta zə Zezu mbə hay' rum bay ci vun rumu: «Ha wa' i mə də gi kwati cer Pakə nə ka wû ne su?”
- ¹⁸Zezu dam vun ndaya: «I də hay' swə daw wə mbok so, bay i la' ne numu: "Bə ta' kwa ini: Ri man mbə day si. Na də gi cer Pakə kə sum ta zə rin so wû.”“
- ¹⁹Sum ta zə Zezu gi kwa məni mum in dan rum ne nday, bay handay gila' kwati cer Pakə rumu.
- ²⁰Kə bel, Zezu suk wə vun tablə kə sum ta zə rum mə guɓ wa hoɓo.
- ²¹Kəri məni handay wə ti kwa, Zezu ini: «Na in mi ne, kəzin', swə daw du ri wə də man ar də ba sôwâ.”
- ²²Sum ta zə rum dik dan juk, bay handay tɛŋ kə ci vun rum daw daw daŋ'ŋ: «Na su, Bârî?”
- ²³Zezu dam vun ndaya: «Swə məni wə no' ba rawti timbi mə daw kə rin, mum nə swə məni wə də man ar də ba sôwâ.
- ²⁴Vay sumra' wə də mar ce' ndə məni Derwa Ifray in dan wa rum, ama kəcik wa swə məni wə də um ar də ba sôwâ! Pram dan vra' bə rumu!”
- ²⁵Yudas, swə məni wə də um ar də ba sôwâ, ci vun rumu: «Na su, Bə ta' kwa?» Zezu dam vun rumu: «Ha kə məni ini.”
- ²⁶Kəri məni handay wə ti kwati, Zezu tle vun tləpe' fun bay gi soko ne kə Ifraya. Mum faŋ jak bay ne kə sum ta zə rumu. Mum la' ne ndaya: «I tle bay i ti ye, məni nə tu rini.”
- ²⁷Kəki rum, mum tle mbi vra' gu mə də kə «viŋə» kə timbi bay gi soko ne kə Ifray, bay mum faŋ ne nday kə ini: «Hi daŋ' i ce ye,
- ²⁸zə məni nə vəswə rin, vəswə məni jeŋ dan kawvunu. Vəswə rum ne zə sôwâ juk kədan vrum kwa mə bro'o.
- ²⁹Na in mi ne: Daka mgbaŋ ni nə, na cu də ce sum vra' gu viŋə rum za' mi, hâ na də ce mə mbrew kə ri, wə ri məni Ba man wə də suk jwə wa sôwâ umu.”

- ³⁰Handay faɲ dâ nyem bur Ifray, bay kəki rum handay 'ya ta wa igway' məni gu olive wə han juku.
- ³¹Kəri rum, Zezu la' ne kə sum ta zə rumu: «Kə dukri mə ni nə, hi daɲ' də man ar, zə Dan rum wây' wə du dərwa: Na də ci ji cime, bay kul cime rum də pla' wa ri daɲ'ɲ.
- ³²Ama kəri məni Ifray də man par mbə mar, na də dle də nya Galile cop ri.”
- ³³Piyer la' ne numu: «Ko sôwâ məsin daɲ' la' ar nu si, mə na, na cu də wû ar kpe mi.”
- ³⁴Zezu dam vun rumu: «Na in wû ne, kəzini: Kə dukri məni nə, cop gulok cu də ge el mi, ha də riway sem hinji' i ha cu we nan mi.”
- ³⁵Piyer la' ne numu: «Ko na la' də mar kə ru, na cu də in i na cu we nu mi kpe mi.» Bay sum ta zə rum məsin daɲ' in ndəna' ta'a.
- ³⁶Kəri rum, Zezu kə sum ta zə rum ta day kuni wə ri mə dē kə Getsemane, bay mum la' ne ndaya: «I gay' wə tira kəri məni na wə də kəna kədan na in dan kə Ifraya.”
- ³⁷Mum tle Piyer kə daw Zebede mə hoɓ 'ya kə rumu. Vunduk təɲ kə um par, bay mum təɲ kə dɪk dana.
- ³⁸Zə rum, mum la' ne ndaya: «Dan dɪk vunduk rin də man ci. I gay' wə tira, bay i ji kə rini.”
- ³⁹Mum ta ta kofo kî. Mum kuduk nya bay cin vuk ta nya, bay in dan kə Ifraya: «Ba man, vari la' kəta' si, a tle timbi boni məni na wə də ce nə də rəka. Pâ daɲ' rum a gi ce' ndə məni na wə wa' mi, ama a gi ce' ndə məni ha wə wa'a.”
- ⁴⁰Mum faɲ gewa mbə hay' sum ta zə rum mə hinji', bay mum za' nday wə nde sene. Mum ci vun Piyer: «Hi cu gak ji kə rin ko ler daw mi su?
- ⁴¹I ji, bay i in dan kə Ifray kədan Satan nə bu ni njay də du kwa mə bro' mi. Vunduk swə wə wa' gi kwa mə bay kəta', ama tu rum tətâ.”
- ⁴²Mum faɲ ta ta kofo kî sem hoɓ rum bay in dan kə Ifraya: «Ba man, ha la' gak tle timbi boni məni na wə də ce nə də rəka, cop dan na ce si, a gi ce' ndə məni ha wə wa'a.”
- ⁴³Mum faɲ gewa mbə hay' sum ta zə rum kərem, bay mum za' nday wə nde sen, zə sen mbra' i nday tikiɓi.
- ⁴⁴Zezu 'ya ar nday kərem bay in dan kə Ifray sem hinji' kə in dan mə dawa.
- ⁴⁵Mum faɲ mbə hay' sum ta zə rum bay ci vun ndaya: «Hi nde sen, bay hi pemây bo su? I kar ri'i: Ri məni sôwâ də ar Vay sumra' də ba sum gi kwa mə bro' nə mbə si.
- ⁴⁶I car, mə də ye! I kar ri'i: Swə məni wə də man ar də ba sôwâ nə ni na!”
- ⁴⁷Kəri məni Zezu wə in dan in bo, Yudas swə daw mə du sôwâ mə guɓ wa hoɓ nə mbə day kə sôwâ raw dle tu si məni ra' masəlam kə dliw ba ndaya. Sum rōwâ mə du sum po' fur kə sum rōwâ mə du sôwâ Zuwif sin kuni raw sôwâ rumu.

⁴⁸Yudas, swə mənɪ wə də ar Zezu də ɓa sôwâ, ta' vari kwa mənɪ mum wə də gi tu Zezu nə ne kə raw sôwâ: «Swə mənɪ na wə də kaw ɓay də soɓ kə vun, mum nə swə mənɪ hi wə wa' na, i kaw numu!»

⁴⁹Kəkor sar, Yudas ta ta hay' Zezu ɓay la' ne numu: «Soko ye, Bə ta' kwa.» Mum faɲ soɓ num kə vun.

⁵⁰Zezu la' ne numu: «Bây man, a gi kwa mənɪ ha mbə kədan ha gi nə ye.» Kəri rum, sôwâ kuni car mbə njay wa Zezu ɓay kaw numu.

⁵¹Swə daw mənɪ kə Zezu par masəlam um ɓay tum hum bə sin toɲ po' fur kə ndi.

⁵²Zə rum, Zezu la' ne numu: «A faɲ no' masəlam wû də zəba rum, zə sôwâ daɲ' mənɪ par masəlam də mar kə masəlam ta'a.

⁵³Ha cu we i na gak dɛ Ba man kədan mum kawɓa rin kə ri daɲ', ɓay kəkor sar, mum də man sin kul sum sin Ifray mə wafraɲ guɓ wa hoɓ mi su?

⁵⁴Ama na la' gi ndəna' si, dan mənɪ Derwa Ifray in nə də nyen mbi mə ma su? Zə Derwa Ifray rum in i kwa rum də gi ndəna'a.»

⁵⁵Kəki rum, Zezu ci vun raw sôwâ: «Hi mbə kə masəlam kə dliw kədan hi man kaw ce' ndə mənɪ hi wə kaw bə bargu kwa su? Bəka daɲ' na wə suk rawti so po' fur sôwâ Zuwif, ɓay na ta' kwa wə han, ɓay hi cu kaw nan mi.

⁵⁶Ama kwa rum daɲ' gi ndəna' kədan nyen mbi dan mənɪ sum ka' dan wây' wə du Derwa Ifraya.» Kəri rum, sum ta zə rum daɲ' ar num ɓay pik ne.

⁵⁷Sôwâ mənɪ kaw Zezu, mbə kə rum so toɲ po' fur mə dɛ kə Kayif. Sum pay zu dan dlay kə sum rôwâ mə du sôwâ Zuwif ɓa kuni wə hana.

⁵⁸Piyer wə ta kəki Zezu seɲ, hâ ta day cava so toɲ po' fur na. Mum ze ta rawti cava ɓay suk kə soje mə ji vun so kədan mum kar ndo' dan rumu.

⁵⁹Sum rôwâ mə du sum po' fur kə sum rôwâ Fada mə Mbri daɲ' keɓ kuni sôwâ mənɪ gak hay dan wa Zezu kədan handay um ci,

⁶⁰ama handay cu za' nday mi, ko sôwâ juk mbə kə hay dan cem cem wa rumu. Kə ndo' vun rum, sôwâ hoɓ mbə kor nday

⁶¹ɓay ini: «Swə mənɪ nə ini: "Na gak bru so po' fur Ifray ɓay du bəka hinji' na də dam məsin ndo'o."»

⁶²Toɲ po' fur nə car fraɲ ɓay ci vun Zezu: «Ha cu dam dan mi su? Sôwâ mənɪ kuni wə in dan ma wa ru su?»

⁶³Ama Zezu suk pofɔ. Zə rum, toɲ po' fur nə la' ne numu: «Na wə ci vun ru kə semdɛ Ifray mə kə i, a in ne mba: Ha Kris, Vay Ifray su?»

⁶⁴Zezu dam vun rumu: «Ha kə mənɪ in, ama na in mi ne, daka mgbaɲ ni nə hi də we Vay sumra' suk wə ɓa fun Ifray mə kə gbəgbəɲo. Bay hi də um we gewa mbə du dləmbur wafraɲ ta'a.»

⁶⁵Zə rum, toŋ po' fur nə ŋgâr mbraw tu rum bay ini: «Mum wə ge dan mə bro' wa Ifraya! Namba cu kə mē' sôwâ mə we njeŋ dan rum məsin za' mi! Hi mun si, mum ge dan mə bro' wa Ifraya.

⁶⁶Hi dîk ma wa rum su?» Handay dām vun rumu: «Dan nə kaw num si, nde i um ci.»

⁶⁷Kəki rum, handay tup mē' ta ne num vuk, bay handay hom ba pum num kə ndi. Sôwâ məsin du nday ge num zə hum

⁶⁸bay ini: «Kris, a ta' ne mba ye: Sa nə pum nu su?»

⁶⁹Kəri rum Piyer suk wə cava. I sin toŋ po' fur mbə hay' rum bay la' ne numu: «Ha ta', ha ke kə Zezu mə nya Galile!»

⁷⁰Ama mum riway dan rum kor sôwâ daŋ' kə ini: «Na cu mun zu dan mēni həŋ wə in nə mi.»

⁷¹Mum faŋ 'ya wə cava, ta vun gama. I sin məsin we num bay in ne kə sôwâ mēni gay' wə hana: «Swə mə nay' nə ke kə Zezu mə so Nazaret!»

⁷²Piyer riway dan rum kərem kə ini: «Na sur vun na cu we swə nə mi.»

⁷³Kəki rum kî, sôwâ mēni wə han mbə hay' rum bay la' ne Piyer: «Kəzin', ha wə du nday zə dan ge vun ru wə ta' ri mēni ha car mbə hana!»

⁷⁴Kəri rum, Piyer dle kə sur vun kəreme. Mum ini: «Ifraŋ nə ci nan, na la' hay dan si na! Na in mi ne kəzin' kor Ifraya: na cu we swə nə mi!» Kəri rum, gulok ge ele.

⁷⁵Bay Piyer dla' wa dan mēni Zezu ke in ne numu: «Cop gulok cu ge el mi, ha də in sem hinji' i ha cu we nan mi.» Mum pâ də rəka kə ci' gbərik gbəriki.

Matthieu 27

¹Kə bəka ced, sum rôwâ mə du sum po' fur kə sum rôwâ mə du sôwâ Zuwiŋ' daŋ' kawvun kuni dāw kədan handay ci Zezu.

²Handay baŋ num bay ar num wə ba Pilatə, toŋ nya rumu.

³Kəri mēni Yudas, swə mēni ar Zezu ta ba sôwâ, we i sôwâ bok dan mar wa Zezu si, mum dē mava, bay mum faŋ ra' səlay mə guhinji' nə ta kor sum rôwâ mə du sum po' fur kə sum rôwâ mə du sôwâ Zuwiŋ' kə ndi.

⁴Mum la' ne ndaya: «Na gi kwa mə bro' kəri mēni na ar swə mēni cu gi kwa mə bro' ta ba ri kədan hi um ci!» Ama handay dām vun rumu: «Tap mba ma su? Dan wû na!»

⁵Yudas ar səlay rum pik rawti so po' fur sôwâ Zuwiŋ' bay pâ dle. Mum faŋ 'ya ta ge zewe.

⁶Sum rôwâ mə du sum po' fur ra' səlay rum bay ini: «Dan dlay mba cu ne vari ne mba kədan namba tlum səlay rum kə səlay so po' fur mi, zə səlay rum səlay vəswə na.»

⁷Kəki mēni handay kawvun dāw wa dan rum, handay ra' səlay bay cob sine wə ba bə ri dənay kə ndi kədan handay mo' rəkway wə hana.

- ⁸Zə rum, handay dē sine rum kə «sine vəswə» hâ tama.
- ⁹Kwa rum gi ndəna' kədan nyen mbi dan mənɪ bə ka' dan mə dē kə Jeremi ini: «Handay ra' səlay mə gu hinji', səlay mənɪ sôwâ Israyel kawvun dāw wa rum kədan handay um cob kə ndi.
- ¹⁰Bay handay cob sine wə ɓa bə ri dənay kə ndi, ce' ndə mənɪ Bârî in ne nana.”
- ¹¹Zezu car kor toŋ nya rumu. Toŋ nya nə ci vun rumu: «Ha jwə sôwâ Zuwif su?» Zezu dām vun rumu: «Ha kə mənɪ ini.”
- ¹²Kəki rum, kəri mənɪ sum rôwâ mə du sum po' fur kə sum rôwâ mə du sôwâ Zuwif tum kuni sem rum, mum cu dām dan məsin mi.
- ¹³Zə rum, Pilatə ci vun rumu: «Ha cu mun mənɪ handay tum sem ru kə dan cem cem nə mi su?”
- ¹⁴Ama Zezu cu dām dan məsin vun rum ko dāw mi. Kwa rum jin' wa ne kə toŋ nya rum kə bayrumu.
- ¹⁵Kə cer Pakə daŋ', toŋ nya rum fɪ kə ar daŋgay' mənɪ raw sôwâ ci vun rum kə ndi dāw nday ne.
- ¹⁶Kəri rum, daŋgay' mə bro' bayrum kəta' mə dē kə Zezu Barabas.
- ¹⁷Zə rum, Pilatə ci vun raw sôwâ mənɪ ɓawa wə hana: «Hi wa' i a ar sa ne ni su? Zezu Barabas ko Zezu mə dē kə Kris su?”
- ¹⁸Zə mum we si, handay ar Zezu wə ɓa rum zə handay kə sây' kə rumu.
- ¹⁹Kəri mənɪ Pilatə suk wə ri ɓok dan, ma rum sin dan mənɪ nə hay' rumu: «A gi kwa məsin kə swə mə njeŋ mənɪ nə mi, zə kə dukri mə tam, məsin cik nan juk wa rumu.”
- ²⁰Sum rôwâ mə du sum po' fur kə sum rôwâ mə du sôwâ Zuwif ɓu kuni zu raw sôwâ kədan handay ci vun Pilatə kədan nə ar Barabas nday ne bay nə ci Zezu.
- ²¹Toŋ nə ci vun nday kəreme: «Wə du sôwâ mə hoɓ mənɪ kuni, hi wa' i a ar sa ne ni su?» Handay dām vun rumu: «Barabas!”
- ²²Pilatə ci vun ndaya: «La' ndəna' si, na gi mi kə Zezu mə dē kə Kris nə su?» Handay daŋ' dām vun rumu: «Gay' num də wa gu!”
- ²³Pilatə ci vun ndaya: «Mum gi kwa mə bro' mi su?» Ama handay təŋ kə do dan kə gbəgboŋo: «Gay' num də wa gu!”
- ²⁴Kəri mənɪ Pilatə we i mum cu gak gi kwa məsin mi, bay dan do wə də kofo, mum tle mbi bay kol ɓa rum kə ndi kor raw sôwâ bay ini: «Dan mə bro' ci swə mə njeŋ mənɪ nə cu ke wa rin mi. Dan mi na!”
- ²⁵Raw sôwâ daŋ' dām vun rumu: «Namba wa' i dan mə bro' ci swə mənɪ nə faŋ mbə wa mba kə daw mba!”

- ²⁶Zə rum, Pilatə ar Barabas ne ndaya. Kəki məni handay pe Zezu kə ləva, mum ar num ta ɓa soje kədan handay um gay' də wa gu.
- ²⁷Soje Pilatə kuni mbə kə Zezu wə rawti so tɔŋ nya rum, ɓay kul soje daŋ' ɓa reŋ wa rumu.
- ²⁸Handay kərut mbraw um, ɓay ge mbraw mə mbri mə tlew ne numu.
- ²⁹Handay faŋ ci pəlay wa kə ŋây' ɓay no' ta ne num wa. Handay ne num dliw ta ɓa fun rumu. Handay faŋ təŋ kə kuduk nya kor rum kə um ru kə ini: «Soko ye, jwə sôwâ Zuwif!»
- ³⁰Handay tup mē' ta wa rum, ɓay handay tle dliw ɓay pum wa ne num kə ndi.
- ³¹Kəri məni handay ndo' vun um ru si, handay kərut mbraw nə mbə tu rum, ɓay handay faŋ ge mbraw mə mum ne numu. Kəki rum, handay pā dle kə rum kədan handay də um gay' də wa gu.
- ³²Kəri məni soje kuni wur mbə so, handay ndewa kə swə nya Siren mə də kə Simoŋ. Handay kaw num kə bak tle gu gay' Zezu.
- ³³Handay mbə day ri mə də kə Golgata, məni wa' dan ini: «Ri so wa».
- ³⁴Wə han handay ne mbi vra' gu mə də kə «viŋə» məni tlum kə ɗer ne kə Zezu. Kəki məni Zezu tuk mbi rum, mum cu bə ce rum mi.
- ³⁵Handay gay' num ta wa gu, ɓay handay ɓul mbraw um mbok nday kə parwa.
- ³⁶Kəki rum, handay gay' wə han kədan handay um ji.
- ³⁷Handay wây' dan mə bro' məni handay ɓok wa rum mə ni na: «Swə məni nə Zezu jwə sôwâ Zuwif» wa kwa wây' kwa, ɓay handay gay' kwa rum wə wa rum fraya.
- ³⁸Handay gay' sum bargu kwa hoɓ wa gu hay' rum, ɗaw ɓa fun, ɓay məsin ɓa guru.
- ³⁹Sôwâ məni wə pā han tumwa ɓay wə ge dan mə bro' wa rum,
- ⁴⁰ɓay handay la' ne numu: «Ha swə məni wa' kədan ha bru so Ifray sôwâ Zuwif ɓay ɗam məsin du bəka hinji', a sid' tu ru ye! Ha la' Vay Ifray si, a dam mbə wa gu nə ye!»
- ⁴¹Ndəna', sum rôwâ mə du sum po' fur kə sum pay zu dan dlay ɓay sum rôwâ mə du sôwâ Zuwif ru kuni Zezu ta'a. Handay ini:
- ⁴²«Mum sid' sôwâ məsin si, ama mum cu gak sid' tu rum mi! Mum nə jwə sôwâ Israyel su? La' ndəna' si, nə dam mbə wa gu mgbəŋ ni nə, ɓay namba də um ve.
- ⁴³Mum cin vunduk rum wa Ifray, ɓay mum ini: "Na Vay Ifraya." La' ndəna' si, mə kar Ifray la' wa' də um sid' mgbəŋ ni si na!"
- ⁴⁴Sum bargu kwa məni handay gay' nday hay' Zezu i num ndəna' ta'a.
- ⁴⁵Kə fəta du wa, ri mə ura' mbə kəmbo' nya daŋ' hā fəta riya.

- ⁴⁶Kə fəta riya, Zezu ka' dan kə gbəgboŋo: «Eli, Eli, lema sabaktani?» Məni wa' dan ini: «Ifray man, Ifray man, zə mi ha ar nan su?»
- ⁴⁷Sôwâ məsin du sôwâ məni gay' wə han mun dan rum bay ini: «Mum wə də Eliya!»
- ⁴⁸Kəkor sar, swə dāw du nday ne ta tle kwa mə ra' nji kə soso, bay no' ta wə mbi kwa cumoko. Mum jew ta vun dliw bay sa ne kə Zezu kədan mum sobo.
- ⁴⁹Ama sôwâ məsin ini: «A ji ri'i! Namba də kar ke məsin Eliya də mbə um sid' su na.»
- ⁵⁰Zezu ka' dan kə gbəgboŋ kərem, bay mum mara.
- ⁵¹Kəri rum, zim məni hay tak i so po' fur sôwâ Zuwif ŋgâr du hoḅ daka fray hâ nya, nya nyen bay pra kuni bolo.
- ⁵²Zəra mar kuni ar vun, bay sôwâ um mə kələŋ kuni car mbə mara.
- ⁵³Handay wur mbə zra mar, bay kəki məni Ifray par Zezu mbə mar, handay cok ta so Jeruzalem, bay sôwâ juk we nday wə hana.
- ⁵⁴Toŋ soje mə nya Romə kə soje um məni wə ji Zezu we kuni nyen nya kə kwa daŋ' məni gi. Zə rum, wəlok gi nday juk, bay handay ini: «Mum Vay Ifray kəzini!»
- ⁵⁵Raw rawkwa məni gay' kə hay' ca' wə kar ri də han, handay ke ta zə Zezu daka nya Galile kə gi sin zə rumu.
- ⁵⁶Wə du nday, Mari mə so Magdala kə Mari mə ya Zakə kə Zozef bay ya daw Zebede.
- ⁵⁷Kə bel, bə ndak mə so Arimate mə də kə Zozef mbə daya. Mum swə ta zə Zezu ta'a.
- ⁵⁸Mum 'ya ta so Pilatə bay o mar Zezu ba rumu. Zə rum, Pilatə ne vari ne kə soje kədan kuni ne mar Zezu ne kə Zozef.
- ⁵⁹Zozef tle mar rum, ku' kə zim siliki mə mbrew,
- ⁶⁰bay no' mar num ta zra um məni mum dla wə pra kə mbrew. Mum faŋ buru gway' mə toŋ ta' vun zra rum kə ndi, bay 'ya dle.
- ⁶¹Mari mə so Magdala kə Mari məsin gay' kuni wə han njay i ta vun zra rumu.
- ⁶²Siw rum, wa' dan in fəta pemây sôwâ Zuwif, sum rôwâ mə du sum po' fur kə kul sôwâ Zuwif mə də kə Farisiyen ta kuni so Pilatə
- ⁶³bay ini: «Bârî, namba dla' wa dan məni bə hay dan nə in kəri məni mum ke kə i 60. Mum ini: "Kəki bəka hinji', na də pâ mbə mara.»
- ⁶⁴Zə rum, a ne vari ne kə sôwâ kədan kuni ji vun zra mar hâ bəka hinji' kədan sum ta zə Zezu mbə tle hura mar rum bay faŋ in ne kə sôwâ: "Mum pâ mbə mar si mi." Hay dan mə kəki də ke kə bro' pâ mə vun kofo.”
- ⁶⁵Pilatə la' ne ndaya: «Soje kuni ni na. I də ye, bay i də ji vun zra mar ce' ndə məni hi gaka.”

⁶⁶Zə rum, handay 'ya dle. Handay ta ta' vun zra mar ngəđin' kə gway'i. Handay faŋ njay soje han kədan handay ji ri rumu.

Matthieu 28

¹Kəki fəta pemây sôwâ Zuwif, dimaŋsə kə bəka ced, Mari mə so Magdala kə Mari məsin mbə kuni kədan handay kar vun zra mara.

²Kəkor sar, nya nyen kə gbəgboŋo: Vay sin Bârî mə wafray car wafray dam mbə nya, mum buru gway' rum ta kə hay' bay suk wa rumu.

³Tu rum wədi ce' ndə wədi buŋô, bay mbraw tu rum mə bu ce' ndə fut mbrawa.

⁴Kwa rum gi wəlok ne kə soje mə ji ri juk, hâ tu nday təŋ kə nyen, bay handay faŋ ce' ndə mara.

⁵Vay sin Bârî mə wafray nə la' ne kə rawkwa kuna: «Mə hi, i ne wəlok mi. Na we si hi wə keḅ Zezu, swə mənî handay ke gay' num wa gu.

⁶Mum cu ti za' mi, mum car mbə mar si ce' ndə mənî mum ini. I mbə ye. I kar ri mənî mum ke bar han nə ye.

⁷I də ga'ri in ne kə sum ta zə rumu: "Mum car mbə mar si, bay mgbəŋ ni nə mum dle də nya Galile cop kə ri. Hi də um we wə hana." Dan mənî na wa' dan mi in ne na."

⁸Zə rum, rawkwa kuni 'ya mbə vun zra mar kə dəma. Wəlok gi nday juk, bay handay tuk kədam juk ta'a. Handay ne kədan handay də in dan rum ne kə sum ta zə Zezu.

⁹Kəkor sar, Zezu mbə ndewa kə nday bay ini: «Soko mi ye!» Handay ta ta hay' rum bay handay kaw sem rum bay bur numu.

¹⁰Kəki rum Zezu la' ne ndaya: «I ne wəlok mi. I də in ne kə daw ba man kuni də nya Galile: Handay də man we wə hana."

¹¹Kəri mənî rawkwa kuni wə vari ḅo, soje məsin wə du soje mənî wə ji vun zra mar gewa mbə so bay in dan kwa daŋ' mənî gi nə ne kə sum rōwâ mə du sum po' furu.

¹²Sum rōwâ mə du sum po' fur ba kə sum rōwâ mə du sôwâ Zuwif. Kəki mənî handay kawvun daw, handay ne səlay bayrum ne kə soje kuni,

¹³bay la' ne ndaya: «I də in i sum ta zə Zezu mbə kə dukri bay tle hura mar rum kəri mənî namba wə nde sene.

¹⁴Bay təŋ nya rum la' mun dan rum si, namba də ge dan mə njeŋ rum, bay dan mə kəcik rum cu də ke wa ri mi."

¹⁵Soje kuni ve səlay rum bay gi kwa rum ce' ndə mənî sum rōwâ kuni in ne ndaya. Ndəna', dan rum pla' wə du sôwâ Zuwif hâ tama.

¹⁶Sum ta zə Zezu mə guḅ wa daw 'ya ta nya Galile, wə wa igway' mənî Zezu ke ta' ne ndaya.

¹⁷Kəri məni handay we num, handay bur num, ama sôwâ məsin du nday way dan rumu.

¹⁸Zezu mbə hay' nday bay la' ne ndaya: «If ray ar gbəgbon mə wafray kə mə nya daŋ' ne nana.

¹⁹Zə rum, i də hay' sôwâ nya məsin daŋ', bay i gi nday faŋ sum ta zə rini. I gi baptem ne nday kə semdə Bəba, kə semdə Vay, bay kə semdə Simbed mə Kəleŋ,

²⁰bay i ta' kwa daŋ' məni na ta' ne ni nə ne nday kədan handay ta zə rumu. Bay i we: Na də ke kə ri bəka daŋ' hâ ndo' nya.»

Marc

Marc 1

- ¹Dan mə Kədam məni in dan wa Zezu Kris, Vay Ifray, nə tən ndəni na'a:
- ²Ce' ndə məni bə ka' dan mə də kə Esaya wây' wə du dərwa umu: «A kar ri'i! Na sin vay sin man kofo ru kədan mum gila' vari zə ru.
- ³Wor wə ka' dan du igopo: I gila' vari zə Bârî. I gi vari rum sərən ne numu!"
- ⁴Ndəna', Zaŋ-Baptistə mbə du igop, mum wə ka' dan ne kə sôwâ: «I faŋ vunduk ri, bay i ve baptem kədan Ifray də vrum kwa mə bro' mi."
- ⁵Sôwâ məni gay' wə nya Zude kə sôwâ so Jeruzalem daŋ' mbə kuni hay' rumu. Handay in dan kwa mə bro' nday, bay Zaŋ gi baptem ne nday wə ze Zurdeŋ.
- ⁶Zaŋ ge mbraw mə mbri mə ci kə sâ njoŋnjoŋ bay mum bok fir kə zew dîke, mum ti cumo' kə mur dîmi.
- ⁷Wə du dan ka' um, mum ini: «Swə məni wə də mbə kəki rin pâ nan kə mbra' si, na cu nde i goḍ kədan na ulay' zew tərak um mi.
- ⁸Na gi baptem ne ni kə mbi, ama mum də gi baptem mi ne kə Simbed mə Kəleŋe."
- ⁹Kəri rum, Zezu car mbə so Nazaret, wə nya Galile, bay Zaŋ gi baptem ne num wə ze Zurdeŋ.
- ¹⁰Kəri məni Zezu pâ mbə wə mbi, kəri rum sar, mum we wafray ar vun bay Simbed Ifray dam mbə wa rum ce' ndə kuruku.
- ¹¹Bay mum mun wor car mbə wafray ini: «Ha Vay man məni na bə, na tuk kədam kə ru."
- ¹²Kəkor sar, Simbed mə Kəleŋ pla' num ta du gopo.
- ¹³Mum suk du gop bəka gufədi', bay Satan mbə bu num wə hana. Zezu suk du tlew gop, bay sum sin Ifray mə wafray mbə gi sin zə rumu.
- ¹⁴Kəki məni soje kaw Zaŋ ge ta so daŋgay', Zezu 'ya ta nya Galile kə ka' Dan mə Kədam məni car mbə hay' Ifraya.
- ¹⁵Mum ini: «Ri rum mbə si, ri məni Ifray wə də suk jwə wa ri nə hərə'e! I faŋ vunduk ri bay i ve Dan mə Kədam!"
- ¹⁶Kəri məni Zezu wə ta vun ya mbi Galile, mum we Simon kə njər rum Andre. Handay wə dā ziw də mbi, zə handay sum lam mbi.
- ¹⁷Zezu la' ne ndaya: «I mbə ta zə rin, bay na də mi gi faŋ sum keḍ sumra'a."
- ¹⁸Kəkor sar, handay ar ziw nday njay bay ta zə Zezu.
- ¹⁹Mum ta ta kofo kî, bay mum we Zakə, vay Zebede, kə njər rum Zaŋ. Handay gay' wə rawti da nday, bay handay wə gila' ziw ndaya.

- ²⁰Kəkor sar, Zezu dē ndaya. Handay ar ba nday, Zebede, wə rawti da kə sum sin um bay ta zə Zezu.
- ²¹Zezu kə sum ta zə rum ta day kuni so Kapernawum. Kəri mənɪ fəta pemây sôwâ Zuwif mbə day, Zezu ze ta rawti so Ifray sôwâ Zuwif bay tən̄ kə ta' kwa wə hana.
- ²²Vari kwata' um jin' wa ne kə sôwâ mənɪ mun dan rum, zə mum cu ta' kwa ce' ndə mənɪ sum pay zu dan dlay wə ta' kwa nə mi, ama mum wə ta' kwa nday ne kə gbəgboŋo.
- ²³Kəri rum, swə məsin kə gam wa rum mbə wə rawti so Ifray sôwâ Zuwif. Mum ka' dana:
- ²⁴«Ha wa' mi hay' mba su, Zezu mə so Nazaret? Ha mbə kədan ha mba 'way su? Na we nu si: Ha Vay Sin mə Kələŋ mənɪ Ifray sini!»
- ²⁵Zezu dlay gam nə kə gbəgboŋo: «A seŋ vun bay a pā mbə wa swə nə si!»
- ²⁶Gam tle swə nə kə gbəgboŋ bay pā mbə wa rum kə ka' dana.
- ²⁷Kwa rum jin' wa ne kə sôwâ daŋ' mənɪ gay' wə han, bay handay tən̄ kə ci vun nji mbok nji: «Kwa mi mə ni nə su? Mə ni nə vari kwata' mə mbrew na! Mum wə dlay gam kə gbəgboŋ, bay handay wə mun vun rumu!»
- ²⁸Zə rum, semdē Zezu ci' ndap nya Galile daŋ' ga'ri.
- ²⁹Kəri rum, handay wur mbə rawti so Ifray sôwâ Zuwif, bay Zezu kə Zakə bay Zaŋ 'ya kuni ta so Simoŋ kə Andre.
- ³⁰Inja Simoŋ bar wə la' kə gaḅ wa. Kəri mənɪ Zezu mbə day, handay in dan gaḅ sə ne numu.
- ³¹Mun 'ya dle ta hay' sa. Mum kaw sə bay tle sə car fraya. Gaḅ wa nə so' sə bay ta tən̄ kə gi sin zə ndaya.
- ³²Kə ḃel, kəki fəta no' wa si, sôwâ ra' sum gaḅ kə sôwâ mənɪ kə gam wa nday mbə hay' Zezu kə ndaya.
- ³³Sôwâ so rum daŋ' mbə ḃawa vun vari so mənɪ Zezu wə hana.
- ³⁴Mum car sôwâ juk mənɪ wə ta' ca kə gaḅ cem cem, bay mum 'way gam juk wa sôwâ ta'a. Ama mum cu ne vari ne kə gam kədan kuni ge dan mi, zə handay we num si.
- ³⁵Kə vun bəka, ka ri ura' ḃo, Zezu car pā mbə so rumu. Mum 'ya ta rəka wə ri mə cukud' kədan mum in dan kə Ifray wə hana.
- ³⁶Simoŋ kə sôwâ mənɪ wə hay' rum 'ya kuni kə keḃ tan umu.
- ³⁷Kəri mənɪ handay za' num, handay la' ne numu: «Sôwâ daŋ' wə wû keḃe.»
- ³⁸Ama Zezu ḃam vun ndaya: «Mə də so məsin kədan a də ka' dan wə han ta', zə na mbə zə rumu.»

³⁹Ndëna', mum ta gaŋ wə nya Galile daŋ'ŋ. Mum ka' dan wə rawti so Ifray sôwâ Zuwif, bay mum 'way gam wa sôwâ ta'a.

⁴⁰Mgbo' daw mbə hay' Zezu. Mum kuduk nya kor rum bay o num kə ini: «Ha la' bə si, ha gak man gi faŋ fele.»

⁴¹Zezu we ca wa rumu. Mum sa ba, dak num kə ndi bay la' ne numu: «Na bə si, a faŋ hərəŋ ye!»

⁴²Kəkor sar, mgbo' 'ya mbə tu rum, bay mum faŋ hərəŋa.

⁴³Zezu dlay num kə gbəgbəŋ bay ar vari ne num kəkor sara.

⁴⁴Zezu la' ne numu: «A mun ri'i! A in dan rum ne kə swə daw mi. Ama a də ta' tu ru ne kə bə po' fur, bay kəki rum, a də po' fur ce' ndə mənɪ Moyizə ne vari rum, kədan a ta' ne kə sôwâ daŋ' i ha faŋ fel si.»

⁴⁵Ama swə nə 'ya dle kə pla' dan rum ne kə sôwâ daŋ' mənɪ ndewa kə rumu. Zə dan rum, Zezu cu gak ta' tu rum wə mbok so za' mi, ama mum suk rəka wə ri mə cukud, bay sôwâ car wə ri cem cem mbə hay' rumu.

Marc 2

¹Bəka gi kəki rum cep, Zezu faŋ ta so Kapernawum kərem, bay sôwâ mun i mum wə rawti so.

²Sôwâ raw dle tu si mbə bəwa wə han ko ri cin sem cu wə vun vari rum mi. Zezu ta' dan ne nday wə hana.

³kəri rum, sôwâ məsin mbə hay' Zezu kə hurbu. Sôwâ fədi' du nday tle numu.

⁴Ama handay cu gak za' vari kədan handay um cin də kor Zezu mi, zə raw sôwâ mənɪ wə hana. Zə rum, handay ur pay wa so wə ri mənɪ Zezu wə han jəŋ jəŋ. Wə ri mənɪ handay pay, handay no' hurbu nə han kə la' bar um daŋ'ŋ.

⁵Kəri mənɪ Zezu we i handay ve num, mum la' ne kə hurbu: «Vay man, kwa mə bro' wû vrum si.»

⁶Wə du sôwâ mənɪ gay' wə han, sum pay zu dan dlay kəta'a. Handay dik wə vunduk ndaya:

⁷«Zə mi swə mənɪ nə in dan ndə ni na' su? Mum wə i Ifraya! Sa nə gak vrum kwa mə bro' su? Say Ifray daw mba'a!»

⁸Kəkor sar, Zezu we dan dik vunduk nday, bay mum ci vun ndaya: «Zə mi hi wə dik dan ndə ni na' wə vunduk ri su?

⁹Kədan in ne kə hurbu: Kwa mə bro' wû vrum si, ko ini: A car fray, tle la' bar wû, bay ta ye, mə ka kəcik han câ' su?

¹⁰Ama na wa' kədan i we njeŋ Vay sumra' kə gbəgbəŋ wa nya kədan mum vrum kwa mə bro'o.» Zə rum, Zezu faŋ la' ne kə hurbu:

- ¹¹«Na in wû ne: A car ye, a tle la' bar gaḅ wû, ḅay a dē so wû kē ndi ye!»
- ¹²Kəkor sar, mum car, ḅay tle la' bar um pā rēka kē ndi i sôwâ daṇ'ṇ. Kwa rum jin' wa ne kē sôwâ daṇ' mēni gay' wə han, ḅay handay təṇ kē gi mbra' ne kē Ifray kē ini: «Namba cu we kwa mē ndē ni za' mi!»
- ¹³Zezu faṇ ta vun ya mbi Galile kəreme. Raw sôwâ mbə hay' rum, ḅay mum dle kē ta' kwa nday ne.
- ¹⁴Kəri mēni mum wə dle dē kofo, mum we Levi, vay Alfe, suk wə so ḅawa grama. Zezu la' ne numu: «A ta zə rini.» Levi car ḅay ta zə rumu.
- ¹⁵Kəki rum, Zezu suk wə ti kwati so Levi. Sum ḅawa kwa kē sum gi kwa mē bro' gay' kuni han wə ti kwati wanji kē Zezu kē sum ta zə rum, zə sôwâ juk wə ta zə rumu.
- ¹⁶Sum pay zu dan dlay mēni wə du kul sôwâ Zuwif mē dē kē Farisiyen we Zezu wə ti kwati kē sum ḅawa kwa wanji kē sum gi kwa mē bro', ḅay handay ci vun sum ta zə rumu: «Zə mi mum wə ti kwati kē sum ḅawa kwa wanji kē sum gi kwa mē bro' su?»
- ¹⁷Zezu mun dan nday ḅay la' ne ndaya: «Sôwâ mē kē tu heḅ cu mē' bə waza mi, say sum gaḅa. Na cu mbə kədan na dē sôwâ mēni wə gi kwa mē ḅay mi, ama sôwâ mēni wə gi kwa mē bro'o.»
- ¹⁸Fəta mēsin, sum ta zə Zaṇ-Baptistə kē kul sôwâ Zuwif mē dē kē Farisiyen wə saṇ kuni kwa. Sôwâ mēsin mbə ci vun Zezu: «Zə mi sum ta zə Zaṇ-Baptistə kē sum ta zə kul sôwâ Zuwif mē dē kē Farisiyen wə saṇ kuni kwa, ama sum ta zə ru cu wə saṇ nday mi su?»
- ¹⁹Zezu ḅam vun ndaya: «Hi ḁik ma su? Bāy bə cin ma dē gak saṇ kuni kwa kəri mēni bə cin ma rum wə kəta' du nday su? Cu ndə na' mi! Handay dē ti kwati kəri mēni bə cin ma nə kē ndaya.
- ²⁰Ama bəka mēni bə cin ma wə dē pā mbə du nday nə dē mbə kəta'a. Kə bəka rum, handay dē saṇ kwa ḅo.»
- ²¹«Swə ḁaw cu tle zim mē mbrew fur dē vun zim mē kəmbar mi. Swə la' gi ndəna' si, zim mē mbrew dē ṇḡar mē kəmbar, ḅay vun ṇḡar rum faṇ dē kofo.
- ²²Bay swə ḁaw cu wu' sum mē mbrew dē rawti mbu sum mē kəmbar mi. Swə la' wu' wə han si, sum rum dē mun mbu rum si, ḅay sum rum dē ne dē rēka ḅay ḁənokə. Ama a wu' sum mē mbrew dē mbu sum mē mbrewē!»
- ²³Kə fəta pemây sôwâ Zuwif, Zezu pā vari du sine. Kəri mēni handay wə ta, sum ta zə rum təṇ kē kəy alkamari mēni wə hay' vari.
- ²⁴Zə rum, kul sôwâ Zuwif mē dē kē Farisiyen ci vun Zezu: «A kar ri'i! Zə mi sum ta zə ru wə gi kwa mēni dan dlay mba cu ne vari gi rum kē fəta pemây mi nə su?»
- ²⁵Zezu ḅam vun ndaya: «Hi cu in dan kwa mēni David gi kəri mēni mum cu kē kwati mi, ḅay mē' ti num kē sum ta zə rum nə mē su?»

²⁶David ze ta rawti so Ifray bay ti duwa' mēni njay kor Ifraya. Kwa rum gi kəri mēni Abiyatar suk toŋ sum po' furu. Dan dlay mba ne vari ne kə sum po' fur taw kədan kuni ti duwa' rum, ama David ti, bay mum ne kə sôwâ um ti ta'a."

²⁷Zezu faŋ la' ne ndaya: «Fəta pemây gi zə sumra', sumra' cu gi zə fəta pemây mi.

²⁸Ndəna', Vay sumra' nə Bârî fəta pemây ta'a.»

Marc 3

¹Kəki rum, Zezu faŋ ze ta rawti so Ifray sôwâ Zuwif kəreme. Swə mēsin kəta' wə han, ba rum mə mara.

²Sôwâ mēni gay' wə han njay i wa Zezu kədan handay kar ke mēsin mum də car swə nə kə fəta pemây su na, zə handay wə wa' kədan handay tum sem rum wa kwa mēni mum wə gi.

³Zezu la' ne kə swə mə mar ba mar na: «A car ca kor sôwâ daŋ'ŋ."

⁴Zezu faŋ ci vun ndaya: «Dan dlay mba ne vari ne mba kədan mə gi kwa mə bay kə fəta pemây su? Ko gi kwa mə bro' su? Kədan sid' swə su? Ko ci bə rum su?» Ama handay gay' baw' bawa.

⁵Zezu tle i kar sôwâ mēni gay' reŋ wa rum kə ndi deraŋ deraŋ kə bak, ama kə ri rum mum suk batətə wa vunduk mə bro' ndaya. Mum faŋ la' ne kə swə na: «A tle ba ru.» Mum tle ba, bay ba rum faŋ baya.

⁶Kul sôwâ Zuwif mə də kə Farisiyen wur mbə rawti so Ifray sôwâ Zuwif kəri kədan handay kawvun kə kul sôwâ Zuwif mə də kə Herodiyen kədan handay ci Zezu.

⁷Zezu kə sum ta zə rum 'ya kuni ta vun ya mbi Galile, bay raw sôwâ wə ji zu rumu. Handay car mbə nya Galile, kə nya Zude,

⁸kə so Jeruzalem nya Idume, nya mə dapa ga' sin ze Zurdeŋ, bay nya pəḏak so Tir kə so Sidoŋ daŋ'ŋ. Raw sôwâ rum mbə hay' Zezu zə handay mun dan kwa mēni mum wə gi.

⁹Zə sôwâ raw dle tu si, Zezu la' ne kə sum ta zə rum kədan kuni keḃ vay da mə nyêw kədan raw sôwâ mēni kuni də haḃ num mi.

¹⁰Zə mum car gaḃ sôwâ juk, sôwâ mēni kə gaḃ daŋ' wə dēma mbə hay' rum kədan handay um ḏaka.

¹¹Bay kəri mēni gam kuni we num, handay kuduk nya kor rum kə do dana: «Ha Vay Ifraya!"

¹²Ama Zezu dlay nday kə gbəgbəŋ kədan kuni in dan rum ne kə swə ḏaw mi.

¹³Kəki rum, Zezu ur ta wa igway'i. Mum də sôwâ mēni vunduk rum wə wa', bay handay mbə hay' rumu.

- ¹⁴Mum da' sôwâ guɓ wa hoɓ du nday ɓay ɗe nday kə sum ta zə rum, ɓay la' ne ndaya: «Na da' ni kədan hi ke kə rini. Na də mi sin kədan hi ka' dan
- ¹⁵ɓay na də mi ne gbəgbon kədan hi 'way gama.”
- ¹⁶Semɗe sôwâ mə guɓ wa hoɓ məni mum da' kuni ni na: Simon (Zezu cin sem rum ɗe kə Piyer),
- ¹⁷Zakə vay Zebede, kə njər rum Zan (Zezu cin sem nday ɗe kə Bowanerges məni wa' dan ini: «Daw dləmbur buɗô»),
- ¹⁸Andre, Filip, Bartelemi, Matiye, Tomas, Zakə mə vay Alfe, Tade, Simon, swə mə nyen ped' kə sây' zə nya um,
- ¹⁹ɓay Yudas Iskariyot, swə məni ar Zezu ta ɓa sum sî umu.
- ²⁰Kəki rum, Zezu faɗ ta so kəreme. Sôwâ raw dle tu si ɓa mbə hay' rum kərem, hâ Zezu kə sum ta zə rum cu gak za' kuni ri kədan handay ti kwati mi.
- ²¹Kəri məni bray um mun dan rum, handay 'ya kədan handay də um kaw, zə sôwâ wə ini: «Wa rum jijini!”
- ²²Sum pay zu dan dlay məni car mbə so Jeruzalem wə ini: «Jwə gam mə ɗe kə Belzebul suk wa rumu! Jwə gam nə kə məni ne gbəgbon ne num kədan mum 'way gama.”
- ²³Zə rum, Zezu ɗe nday ɓay in ne nday kə vari dan mə gəgana: «Satan gak 'way tu rum ma su?
- ²⁴Jwə nya mə ɗaw la' car zi mbok nji si, nya rum cu gak suk mi.
- ²⁵Ko sôwâ cava mə ɗaw la' car zi mbok nji si, cava rum cu gak suk mi.
- ²⁶Ndəna' ta' Satan la' car dan wa tu rum si, gbəgbon um də ɓul, ɓay mum cu də gak ke mi, dan um də ndo'o.
- ²⁷Swə ɗaw cu gak ze rawti so bə gbəgbon kədan mum kəy hura kwa so um mi, say ka mum kaw num ɓay ɓan num cop si, ɓay mum gak ra' so um ɓo.
- ²⁸Na in mi ne, kəzini: Ifray də vrum kwa mə bro' ɗan' məni sôwâ wə gi kə kwa i ɗan' məni handay i.
- ²⁹Ama Ifray cu də vrum dan mə bro' məni swə wə ge wa Simbed' um mə Kəleɗ nə mi, zə dan mə bro' rum də ke kə rum də hâ.”
- ³⁰Zezu in ndəna' zə handay ini: «Mum kə gam wa rumu.”
- ³¹Kəri rum, ya Zezu kə daw ya um mbə day kuna. Handay mbə gay' rəka ɓay sin swə məsin kədan mum um ɗe.
- ³²Raw sôwâ gay' reɗ wa rum, ɓay handay la' ne numu: «A kar ri'i! Ya wû kə daw ya wû gay' kuni rəka, ɓay handay wə ci vun ru.”
- ³³Zezu ɗam vun ndaya: «Sa nə ya man kə daw ya man kuni su?”

³⁴Zezu faŋ tle i kar sôwâ mœni gay' reŋ wa rum kœ ndi dœraŋ dœraŋ bay ini: «I kar ri'i! Ya man kœ daw ya man kuni ni na.

³⁵Swœ mœni wœ gi kwa mœni Ifray wœ wa', bœ rum nœ nœr rin, kœ nœr rin, bay ya mana.»

Marc 4

¹Zezu dle kœ ta' kwa vun ya mbi Galile kœreme. Sôwâ raw dle tu si ba mbœ hay' rumu. Zœ rum, mum ur ta rawti da, bay mum suk wœ hana. Mum jik ta du mbi kî kœ ndi, ar raw sôwâ vun dapa.

²Mum ta' kwa ne nday juk kœ dan mœ gœgana. Wœ du kwata' um, mum in ne ndaya:

³«I mun ri'i. Bœ ge zep kwa pâ kœdan mum dœ ge zep kwa.

⁴Kœri mœni mum wœ ge zep kwa wœ sine um, zep mœsin rum nœy ta vari, bay rugwa mbœ da' ndaya.

⁵Zep mœsin rum nœy ta ri mœ kœ pra mœni nya cu han bayrum mi. Zep rum ci ga'ri, zœ nya cu han bayrum mi.

⁶Ama kœri mœni fœta mbœ ðuk, kwa rum rawdœ bay co', zœ mum cu za' ri pe tlor mi.

⁷Zep mœsin rum nœy ta du nœya. Ðœy' rum jœŋ bay tak kwa rum, bay kwa rum cu zewa mi.

⁸Ama zep mœsin rum nœy ta nya mœ bay, zep rum ci, mbud, bay zewa: I rum mœsin ke gu hinji', mœsin ke gu kanki', bay mœsin ke kisi.”

⁹Zezu faŋ ini: «Swœ mœni kœ hum mun dan kœta', say bœ rum nœ munu!”

¹⁰Kœki mœni raw sôwâ 'ya bay Zezu suk ðœw rum, kam sôwâ mœsin mœni gwa' kœ sum ta zœ Zezu mœ gub wa hoœ mbœ kuni ci vun Zezu wa dan mœ gœgana.

¹¹Mum ðœm vun ndaya: «Ifray ne vari ne ni kœdan i we kwa mœni ke pe' ba' si wa dan vari mœni Ifray wœ dœ suk jwœ wa ri, ama wœ hay' sôwâ mœsin, kwa ðœŋ' wœ ke hay' nday kœ dan mœ gœgan,

¹²zœ kœdan ko handay la' wœ kar ri, ama handay cu we mi, handay gak pe hum kœ bayrum, ama handay cu mun zu dan rum mi. Zœ handay la' we kwa rum si, handay dœ faŋ mbœ hay' Ifray, bay mum dœ vrum kwa mœ bro' ndaya.”

¹³Kœki rum, Zezu ci vun ndaya: «Hi la' cu mun zu dan mœ gœgan mœni nœ mi si, hi gak mun zu dan mœ gœgan mœsin ma su?

¹⁴Bœ ge zep kwa wœ ta' swœ mœni wœ ka' dan Ifraya.

¹⁵Sôwâ mœni ce' ndœ hay' vari mœni dan jo' wœ han, nœ wœ ta' sôwâ mœ kœri mœni handay mun dan rum, Satan mbœ par dan Ifray mœni wœ vunduk ndaya.

¹⁶Ri mœ kœ pra mœni nya cu han nœŋ mi wœ ta' sôwâ mœsin mœni mun dan Ifraya. Kœri mœni handay mun dan rum, kœri rum sar, handay ve dan rum kœ tuk kœðœm,

¹⁷ama handay cu ar dan rum pe tlor wə vunduk nday mi, handay ta kə dan rum kî, bay kəri mənɪ cik ko boni la' mbə wa nday zə dan Ifray si, handay wə ar dan mənɪ handay ve na.

¹⁸Ŋây' wə ta' sôwâ mäsɪn mənɪ mun dan Ifray, handay mun dan rum,

¹⁹ama dɪk dan kwa nya, səna' ndak, kə səna' kwa mäsɪn wə cok vunduk nday bay tak dan rum, bay dan rum cu par i mi.

²⁰Nya mə bay wə ta' sôwâ mäsɪn mənɪ mun dan Ifraya. Handay ve dan rum, vra' bay dlər də kofo: Mäsɪn ke guhinji', mäsɪn ke gūkanki', bay mäsɪn ke kisi.”

²¹Zezu faŋ ci vun ndaya: «Swə ge ku wə baŋgay kədan mum um cin də dɛŋɔl ko zə aŋgaw su? Cu mi! Mum um cin wa kwa cin baŋgay.

²²Kwa daŋ' mənɪ pe' wə də pā rəka takram, bay dan daŋ' mənɪ pe' 'yeŋ wə ri mə ura' wə də do wə ri mə bu.

²³Swə la' kə hum mun dan kəta' si, say bə rum nə munu!”

²⁴Zezu faŋ la' ne ndaya: «I kaw wa ri du dan mənɪ hi wə munu! Zə kwa kənji' kwa mənɪ hi wə kənji' kwa kə ndi, Ifray də kənji' mi ne kə ndi ta', bay mum də mi beda də hana.

²⁵Zə swə mənɪ kə kwa, bə rum də fe mäsɪn də han, ama swə mənɪ cu kə kwa mi, sôwâ də ve mə kî mənɪ wə ba rum nə si.”

²⁶Zezu faŋ la' ne ndaya: «Vari mənɪ Ifray wə də suk jwə wa sôwâ um nə ra' nji kə swə mənɪ ge zep kwa wə sine umu.

²⁷Ko mum la' wə nde sen, bay mum wə dla' sen, dukri kə bəka daŋ', zep kwa wə ci bay wə mbudɔ, ama mum cu we vari mbudɔrum mə ma su mi.

²⁸Nya wə gi kwa kə tu rumu: Cop rum za wə ci, kəki rum, alkamari wə ci bay ndo' rum, mum wə ne i.

²⁹Kəri mənɪ i rum la' jeŋ si, bə sine təŋ kə tum u rum, zə wakaya rum mbə si.”

³⁰Zezu faŋ ci vun ndaya: «Namba də kənji' vari mənɪ Ifray wə də suk jwə wa sôwâ um nə kə mi su? Namba də ge dan mə gəgan mi wa rum kədan namba kənji' kə ndi su?

³¹Vari rum ra' nji kə i mafo'o: I rum kî pā i zep kwa mäsɪn mənɪ wə wa nya daŋ',

³²ama kəri mənɪ swə la' ge i rum si, mum wə ci bay jeŋ toŋ pā gu mäsɪn daŋ'ŋ. Gu rum wə ge ba toŋ bay rugwa mə wafray wə gak mbə dam so nday wə njəbo ba sa.”

³³Zezu ka' dan kə vari dan mə gəgan ndə ni na' juk ne kə sôwâ kə vari mənɪ handay gak munu.

³⁴Mum cu ge dan ne nday dan dan mə gəgan mi, ama kəri mənɪ Zezu daw rum kə sum ta zə rum, mum pay zu dan rum daŋ' ne ndaya.

³⁵Fəta rum kə bel, Zezu la' ne kə sum ta zə rumu: «Mə də dapa ya mbi ga' daya.”

³⁶Handay 'ya ar raw sôwâ, sum ta zə Zezu ur ta rawti da mənɪ Zezu suk wə han bay 'ya kə rum, bay da məsin kuni kəta' wə hana.

³⁷Kəkor sar, simbed' tən kə sa' kə gbəgbonɔ, bay jo mbi sɔta də rawti da hā mbi nyen da.

³⁸Kəri rum, Zezu bar wə nde sen cew da. Mum cin wa rum wə kwa ja' wa. Sum ta zə rum dla' num bay la' ne numu: «Bə ta' kwa, namba də mara! Ha cu tle fur mba mi su?»

³⁹Zezu car fray bay dlay simbed' kə gbəgbonɔ: «A seɲ vun sa'a!» Mum faɲ la' ne kə ya mbi: «Əɲ suk 'yeɲe!» Simbed' seɲ vun sa', bay mbi suk 'yeɲe.

⁴⁰Zezu faɲ ci vun sum ta zə rumu: «Zə mi hi wə ne wəlok su? Hi cu ve nan mi su?»

⁴¹Ama kwa rum gi wəlok ne nday juk, bay handay tən kə in dan kə nji mbok nji: «Swə sa ni nə su? Ko simbed' kə mbi wə mun vun rumu!»

Marc 5

¹Kəki rum, handay ta day dapa ga' sin ya mbi Galile, wə nya sôwâ Geraseniyen.

²Zezu dam mbə rawti da, bay kəkor sar, swə mə kə gam wa rum pâ mbə nyir gway' mənɪ sôwâ wə mo' mar hana. Mum mbə ndewa kə Zezu.

³Mum suk wə nyir gway' mə ri mo' mar, bay ko swə daw cu gak um baɲ mi, ko kə cururu.

⁴Zə kəri dan' mənɪ sôwâ wə gay' sem rum kə lay bay baɲ ba rum kə cururu, mum hay cururu bay kəy laya. Ko swə daw cu gak um lim mi.

⁵Dukri kə fəta dan', mum wə gaɲ nyir gway' kə wa gway'i. Mum wə ka' dan kə jutl tu rum kə gway'i.

⁶Kəri mənɪ Zezu seɲ bo, swə mə kə gam wa rum nə we num bay mum ne ta hay' rum bay kuduk nya kor rumu.

⁷Mum ka' dan kə gbəgbonɔ: «Zezu, Vay Ifray mə wafray, ha wa' mi hay' rin su? Na o nu, kə semde Ifray, a ta' ca rin mi!»

⁸Mum in ndəna' zə Zezu la' ne numu: «Gam, a pâ mbə wa swə nə si!»

⁹Zezu faɲ ci vun rumu: «Wû de ma su?» Mum dam vun rumu: «Man de kə Kul Raw, zə namba rawa!»

¹⁰Bay mum wə o Zezu kə ci' kədan nə 'way gam kuni də rəka nya rum mi.

¹¹Kul ziɲ mə mbri wə ti kwa həre' wə sem gway' rumu.

¹²Gam kuni o Zezu kə ini: «A sin mba də du ziɲ kədan namba də cok wa ndaya.»

¹³Zezu ne vari ne nday, bay gam kuni wur mbə wa swə nə bay cok ta wa ziɲ kuna. Raw kul ziɲ i mbu hoɓ, pik ne mbə wa igway' njay ta ya mbi bay tuɓ wə hana.

- ¹⁴Daw ji zinj pik ne ta pla' dan rum wə mbok so kə pəɖak rum ɗaŋ'ŋ. Sôwâ wur kədan handay kar kwa mənɪ gi na.
- ¹⁵Kəri mənɪ handay mbə hay' Zezu, handay we swə mənɪ ke kə kul gam wa rum nə suk wə hana. Mum ge mbraw ɓay wa rum mbə si. Kwa rum gi wəlok ne nday juku.
- ¹⁶Sôwâ mənɪ we kwa mənɪ gi wa swə mənɪ ke kə kul gam wa rum kə mənɪ gi wa zinj kuni in dan rum ɗaŋ' ne kə sôwâ məsini.
- ¹⁷Zə rum, handay təŋ kə o Zezu kədan nə ar nya ndaya.
- ¹⁸Kəri mənɪ Zezu ur ta rawti da, swə mənɪ ke kə kul gam wa rum nə o Zezu kədan nə ar vari ne num kədan nə 'ya kə rumu.
- ¹⁹Zezu cu ne vari ne num mi, ama mum la' ne numu: «A faŋ də so wû, du sôwâ wû, ɓay a in zə kwa mənɪ Bârî gi zə ru kə vari mənɪ mum we ca wa ru nə ne ndaya.”
- ²⁰Swə nə 'ya ta wə nya mənɪ so mə mbri guɓ wə han, ɓay mum dle kə pla' dan kwa mənɪ Zezu gi zə rumu. ʼBay dan rum jin' wa ne kə sôwâ ɗaŋ' mənɪ mun dan rumu.
- ²¹Zezu faŋ ta dapa ya mbi ga' sin kə da kəreme. Kəri mənɪ mum wə vun ya mbi, raw sôwâ ɓa mbə hay' rumu.
- ²²Kəri rum, swə mə də kə Jayrus mbə daya. Mum nə toŋ ji so Ifray sôwâ Zuwif. Kəri mənɪ mum we Zezu, mum kuduk nya kor rum
- ²³ɓay o num kə ini: «Vay man wə mara. A mbə njay ɓa ru wa sə kədan ta car i!”
- ²⁴Zezu 'ya kə rum, ɓay raw sôwâ ta zə rumu. Handay reɖ nji hâ um pla'a.
- ²⁵Wə du nday, ma məsin kəta' kə gaɓ saŋa. Ta gi kim guɓ wa hoɓ kə gaɓ rumu.
- ²⁶Ta ce boni juk ɓa sum waza, ɓay ta ɗənok doknay mə ɓa sə ndo' cete. Ama kə ndi nə ɗaŋ' ta cu fe heɓ hay' swə məsin mi, zawa gaɓ rum də kofo kofo.
- ²⁷Ta mun dan Zezu, ɓay ta mbə wâ' du raw sôwâ mənɪ kəki Zezu 'yeŋ 'yeŋ hâ ta ɗak mbraw umu.
- ²⁸Zə ta ɗik wə vunduk sa: «Ko na la' za' ɗak mbraw um taw si, na də cara.”
- ²⁹Kəkor sar, gaɓ saŋ sə ndo', ɓay ta tuk wə tu sə i gaɓ sə nə car si.
- ³⁰Kəri rum sar, Zezu tuk i gbəgboŋ pā mbə tu rumu. Mum faŋ i du raw sôwâ ɓay ci vun ndaya: «Sa nə ɗak mbraw man su?”
- ³¹Sum ta zə rum ɗam vun rumu: «Ha we si, raw sôwâ wə wû reɖ, zə mi ha ci vun i sa nə ɗak nan su nə su?”
- ³²Ama Zezu tle i kar sôwâ mənɪ gay' reŋ wa rum kə ndi ɗeraŋ ɗeraŋ kədan mum we bə gi kwa rumu.
- ³³Ma rə we kwa mənɪ gi wə tu sa, ɓay ta mbə hay' Zezu kə ne wəlok ɓay tu nyen nyene. Ta kuduk nya kor rum ɓay in njeŋ dan rum ɗaŋ' ne numu.

³⁴Zezu la' ne sa: «Vay man, zə həŋ ve nan, həŋ car si, əŋ də heɓ ye, gaɓ maŋ car ndo' si kə wa sara.»

³⁵Kəri məni Zezu wə in dan də in ɓo, sum sin car mbə so Jayrus bə ji vun So mun dan Ifray sôwâ zuwif bay ini: «Vay wû rə mar si. Zə mi ha wə cik Bə ta' kwa kərem su?»

³⁶Zezu cu cin wa wa dan ge nday mi, ama mum la' ne kə Jayrus: «A ne wəlok mi, a ve Ifray sara.»

³⁷Zezu cu ne vari ne kə swə dāw kədan bə rum də kə rum mi, say Piyer kə Zakə bay njər rum Zaŋ.

³⁸Kəri məni handay ta day so Jayrus, Zezu we sôwâ məni wə do dan han, bay mum mun ci' kə do wor ndaya.

³⁹Mum ze ta rawti so bay la' ne ndaya: «Zə mi hi wə do dan kə ci' su? Vay rə cu mar mi, ta wə nde sene.»

⁴⁰Handay təŋ kə um mâya. Zə rum, Zezu 'way nday wur rəka, bay mum dɛ ba vay kə ya vay bay sum ta zə rum mə hinji' məni ta kə rumu. Handay cok ta tak i məsin məni vay rə wə hana.

⁴¹Mum kaw ɓa sə bay la' ne sa: «Talita kumi», məni wa' dan in kə vun mba: «Vay ma, na in ne naŋ, əŋ car ye!»

⁴²Kəkor sar, vay rə car bay dle kə ta. (Ta kə kim guɓ wa hoɓo.) Kwa rum jin' wa juk ne kə sôwâ məni we kwa rumu.

⁴³Ama Zezu dlay nday kə gbəgbəŋ kədan kuni in dan kwa rum ne kə swə dāw mi. Mum faŋ la' ne ndaya: «I ne kwati ne sə ti ye.»

Marc 6

¹Zezu 'ya mbə han bay dle ta so məni mum jəŋ wə han bay sum ta zə rum 'ya kə rumu.

²Kəri məni fəta pemây sôwâ Zuwif mbə day, Zezu təŋ kə ta' kwa ne kə sôwâ wə rawti so Ifray sôwâ Zuwif. Dan rum jin' wa ne kə raw sôwâ məni gay' wə han, bay handay ci vun: «Mum za' kwa məni kuni daŋ' wə ka su? Sa ne num gwet mə ni nə su? Mum gi yew məni kuni kə gbəgbəŋ ɓa sa su?

³Mum cu bə gay' gu nə mi su? Mum cu vay Mari mi su? Zakə, Zoze, Yudas kə Simoŋ cu njər um kuni mi su? 'Bay njar rum cu ni kuni du mba mi su?» Dan rum tak nday dan um ve.

⁴Zə rum, Zezu la' ne ndaya: «Bə ka' dan gak fe mbâ wə ri daŋ' say wə so vra' um, du bray um, bay cava umu.»

⁵Mum cu gak gi yew han dāw mi, say mum njay ɓa wa sum gaɓ cep, bay car ndaya.

⁶Handay cu ve num mi, bay kwa rum jin' wa ne numu. Kəki rum, Zezu gaŋ ta' kwa wə pəɗak so rum daŋ'ŋ.

- ⁷Kəri rum, mum dē sum ta zə rum mə guḅ wa hoḅ ḅay təṅ kə nday sin hoḅ hobo. Mum ne gbəḅḅoṅ ne nday kədan handay 'way gam,
- ⁸ḅay mum ne dan dlay məni kuni ne ndaya: «I ra' kwa məsin wə ḅa ri zə vari rəkway mi, ko kwati, ko mbu, ko səlay wə jiba mi mi. Say i ra' dliw sara.
- ⁹I no' tərak, ama i ra' mbraw hoḅ wə ḅa mi.”
- ¹⁰Mum faṅ la' ne ndaya: «kəri məni swə la' ve ni wə so um si, i gay' wə so rum hā day ri 'ya mi.
- ¹¹Hi la' ta day wə so məsin məni sum so rum cu ve ni mi si, ko la' cu mun dan mi mi si, i 'ya ar ri rum kə tu' ḅərim sem ri. Kwa rum də ke kwa mə ta' kwa zə ndaya!”
- ¹²Zə rum, sum ta zə Zezu 'ya ḅay ka' dan ne kə sôwâ kədan kuni faṅ vunduk ndaya.
- ¹³Handay 'way gam juk wa sôwâ, ḅay handay tum mur wa sum gaḅ juk ḅay car ndaya.
- ¹⁴Kəri rum, Jwə Herodə mun dan Zezu, zə semdē Zezu ci ndap wə ri daṅ'ṅ. Sôwâ məsin wə ini: «Zaṅ-Baptistə car i si! Zə rum, mum kə gbəḅḅoṅ kədan mum gi yewe.”
- ¹⁵Sôwâ məsin wə ini: «Mum nə Eliya na.» Sôwâ məsin kərem wə ini: «Mum nə ḅə ka' dan ce' ndə sum ka' dan mə vun kofo.”
- ¹⁶Ama kəri məni Herodə mun məni wə ge wa Zezu, mum ini: «Mum nə Zaṅ-Baptistə na! Na hay wa rum, ama mum nə faṅ car i!”
- ¹⁷Zə Herodə kə tu rum sin soje ta kaw Zaṅ, baṅ num, ḅay ge ta so daṅgay'i. Herodə gi ndəna' zə mum tle Herodiya, mok njər rum Filip, cini.
- ¹⁸Zə Zaṅ in ne kə Herodə: «Ha cu kə vari tle mok njər ru cin mi.”
- ¹⁹Zə rum, Herodiya kaw cukur Zaṅ wə vunduk sə, ḅay ta keḅ mar umu. Ama ta cu za' vari rum mi.
- ²⁰Herodə ô Zaṅ zə mum we si: Zaṅ nə swə mə njeṅ ḅay dan dan mə bro'o. Zə rum, mum wə um rigini. Kəri daṅ' məni mum wə mun dan Zaṅ, vunduk rum njay juk, ama kə ndi daṅ' mum wə tuk kəḅām kə mun dan rumu.
- ²¹Fəta məsin, Herodiya za' vari kədan ta gi kwa məni vunduk sə wə wa' kəri məni Herodə wə gi cer vra' um, ḅay mum dē sôwâ rôwâ um, kə sum rôwâ soje, ḅay sôwâ rôwâ mə nya Galile kədan handay gi cer kə rumu.
- ²²Vay Herodiya mə ma ze ta rawti so ḅay dla' kor ndaya. Dla' sə kəḅām tu Herodə kə sôwâ məni gay' wə hana. Zə rum, jwə Herodə in ne kə vay ra: «Ōṅ ci vun kwa məni həṅ kə mē' rum, ḅay na də maṅ ne.”
- ²³Mun sur vun ne sa: «Kwa məni həṅ ci vun rin, na də maṅ ne, ko reta jwə mana!”
- ²⁴Vay rə pâ ta ci vun ya sa: «Na də ci vun mi su?» Ya ḅām vun sa: «Ōṅ də ci vun wa Zaṅ-Baptistə.”

²⁵Vay rə faŋ kə dɔma ta hay' jwə bay in ne numu: «Na wa' i a ne nan wa Zaŋ-Baptistə rawti tasaw mgbəŋ ni na!»

²⁶Dan rum par vunduk ne kə jwə juk, ama zə dan sur vun um, kə sôwâ mənɪ mum dɛ nday, mum cu gak faŋwa dan rum za' mi.

²⁷Kəkor sar, jwə nə dɛ soje mənɪ wə um ji bay ne vari ne num kədan nə də hay wa Zaŋ-Baptistə mbə kə ndi. Soje nə 'ya ta so daŋgay' bay hay wa Zaŋ-Baptistə.

²⁸Mum faŋ tle wa Zaŋ-Baptistə cin rawti tasaw bay mbə ne kə vay rə, bay ta ta ne kə ya sa.

²⁹Kəri mənɪ sum ta zə Zaŋ-Baptistə mun dan rum, handay mbə tle mar um bay ta mo'o.

³⁰Daw sin gewa mbə hay' Zezu bay in dan kwa mənɪ handay gi kə kwa mənɪ handay ta' kuni daŋ' ne numu.

³¹Zezu la' ne ndaya: «Mə də rəka wə ri mə cukud' kədan mə pemây wə han kî ri'i». Sôwâ raw dle tu si wə mbə, faŋ 'ya, mbə, faŋ 'ya, bay Zezu kə sum ta zə rum cu za' kuni ri kədan ti kwati mi.

³²Ndəna', handay ur ta rawti da bay dle ta rəka wə ri mə cukud' kə daw ndaya.

³³Ama sôwâ juk we nday wə ta kə da, bay handay we i Zezu nə kə sum ta zə rum kuna. Zə rum, sôwâ wur mbə du so cem cem wə pəɖak nya rum daŋ' bay ne kə sem hâ ta day ri mənɪ Zezu kə sum ta zə rum wə də kuni han nə, cop kə ndaya.

³⁴Kəri mənɪ Zezu pâ mbə rawti da, mum we raw sôwâ, bay mum we ca wa nday, zə handay ce' ndə cime mə dan vay ji. Zə rum, mum tɛŋ kə ta' kwa nday ne juku.

³⁵Zə fəta so' si, sum ta zə Zezu mbə hay' rum bay la' ne numu: «Ri mənɪ nə rəka, ri mə cukud', bay fəta so' si.

³⁶A ar vari ne kə sôwâ də mbok so kə pəɖak rum kədan kuni coɓ kwati.»

³⁷Zezu dām vun ndaya: «Hi kə tu ri, i ne kwati ne nday ti!» Ama handay ci vun rumu: «Ha wa' i mə də coɓ kwati kə səlay kis hoɓ kədan mə ne nday ti su?»

³⁸Zezu dām vun ndaya: «Hi kə vun tləpe' fun ma dak su? I də kar ri'i.» Handay ta kar, bay faŋ in ne numu: «Namba kə vun tləpe' fun vatl kə keve hoɓo.»

³⁹Kəki rum, Zezu ne vari ne kə sum ta zə rum kədan kuni gila' sôwâ gay' kə kul cem cem wa za mə mbênê.

⁴⁰Handay nja' kə jərak cem cem, wə ri məsin kis, bay wə ri məsin guvatla.

⁴¹Kəki rum, Zezu ra' vun tləpe' fun mə vatl kə keve mə hoɓ kuna. Mum tle i ta fray, bay gi soko ne kə Ifraya. Mum jak vun tləpe' fun kuni ne kə sum ta zə rum kədan handay bul ne kə sôwâ. Mum faŋ bul keve mə hoɓ kuni ne nday han daŋ'ŋ.

⁴²Handay daŋ' ti bay ndaka.

⁴³Sum ta zə rum ra' kan vun tləpe' fun kə tan keve mənɪ gwa' nə nyen dɛŋɔl guɓ wa hoɓo.

⁴⁴Wə du sôwâ mənɪ ti vun tləpe' fun rum, raw njiwkwa i mbu vatla.

⁴⁵Kəki rum sar, Zezu ne vari ne kə sum ta zə rum kədan kuni ur də rawti da ɓay 'ya cop rum də dapa ga' sin, wə ga' so Betsayda. Kəri rum, Zezu ar vari ne kə raw sôwâ kədan kuni 'ya.

⁴⁶Kəki mənɪ Zezu ɓul nji kə nday, mum ur ta wa igway' kədan mum in dan kə Ifray wə hana.

⁴⁷Kəri mənɪ fəta no' wa, da wə du mbi, ɓay Zezu wə vun dapa kə daw rumu.

⁴⁸Mun we sum ta zə rum wə cik kə cinik da, zə simbed' wə sa' də wa ndaya. Zə rum, kə vun bəka, mum 'ya də hay' nday kə ta wa mbi, ɓay mum gi ce' ndə mənɪ mum wə pā tu ndaya.

⁴⁹Ama kəri mənɪ handay we num wə ta wa mbi, handay dɪk i usiya mbi, ɓay handay tɔŋ kə do dana.

⁵⁰Handay daŋ' we num ɓay wəlok gi nday juku. Ama kəkor sar, Zezu la' ne ndaya: «I kaw vunduk ri, na na, i ne wəlok mi!»

⁵¹Mum faŋ ur ta rawti da hay' nday, ɓay simbed' ndo' vun sa'a. Kwa rum jin' wa ne kə sum ta zə rum ɓayrum,

⁵²zə handay cu mun zu yew mənɪ Zezu gi kə vun tləpe' fun nə mi. Zə handay dan wa.

⁵³Kəri mənɪ handay ur mbi si, handay ta day nya Genezaret, ɓay handay jew da nday wə vun dapa.

⁵⁴Kəri mənɪ handay wur mbə rawti da, kəkor sar, sôwâ we i Zezu na.

⁵⁵Zə rum, handay pik ne wə nya rum daŋ' kədan handay ra' sum gaɓ mənɪ wə wa la', ɓay mbə wə ri mənɪ handay mun i Zezu wə han kə ndaya.

⁵⁶Wə ri daŋ' mənɪ Zezu wə də han, so mə dɛrɛ', kə so mə rôwâ, ko so mə rəka, sôwâ wə mbə kə sum gaɓ ɓay nday njay wə ri ɓawa sôwâ. Handay o Zezu kədan nə ar nday dɛk zu mbraw umu. 'Bay sôwâ daŋ' mənɪ dɛk mbraw um, gaɓ nday cara.

Marc 7

¹Kul sôwâ Zuwif mə dɛ kə Farisiyen kə sôwâ məsin mə du sum pay zu dan dlay car kuni wə so Jeruzalem ɓa mbə hay' Zezu.

²Handay we sôwâ məsin mə du sum ta zə Zezu wə ti kwati kə ɓa day, dan kol ce' ndə mənɪ vun fur nday ta' ne ndaya.

³Kul sôwâ Farisiyen kə sôwâ Zuwif daŋ' cu ti kuni kwati dan kol ɓa ce' ndə mənɪ vun fur nday wə ta' nə mi, zə handay daŋ' wə ta zə vun fur ba mbri randay,

⁴Bay kəri mənı handay la' gewa lumo si, handay cu ti kwati mətə', say handay mbi tu copo. Handay kaw dan vun fur məsin cem cem juk, ce' ndə dan kol timbi, kə dənay, bay tasawa.

⁵Zə rum, kul Farisiyen kə sum pay zu dan dlay ci kuni vun Zezu: «Zə mi sum ta zə ru cu ta zə vun fur bambi ramba mi, ama handay wə ti kwati kə ɓa day su?»

⁶Zezu ɗam vun ndaya: «Hi sum vur vuru! Bə ka' dan mə ɗe kə Esaya ka' dan mə njeŋ wa ri kəri mənı mum wây' wə du ɗerwa umu: Sôwâ mənı kuni wə man mbâ kə ɗike vun, ama vunduk nday seŋ kə rini.

⁷Handay man bur kə vun uray, zə handay wə ta' dan ɗik sumra'a.

⁸Hi wə ar dan dlay Ifray njaŋ kə hay', bay hi wə faŋ ta zə vun fur mə sumra'a."

⁹Zezu faŋ la' ne ndaya: «Hi we yel vaɗ dan dlay Ifray si njeŋ kədan hi faŋ ta zə vun fur mi!

¹⁰Zə Moyizə ini: "A mbâ ba wû kə ya wû", bay kəreme: "Swə mənı ge nê' ba um ko wa ya um, bə rum ɗe fe mara.""

¹¹Ama mə hi, hi wə ini: "Swə la' la' ne kə ba um ko kə ya umu: «Kwa man mənı na gak kawɓa ri kə ndi, kwa rum nə Korbaŋ, (mənı wa' dan ini: "na ne zə Ifray si"),

¹²hi cu ar vari ne kə bə rum kədan nə kaw ɓa ba um ko ya um za' mi.

¹³Kə vari mənı nə hi wə ɗənok dan Ifray kə vun fur mi mənı hi wə ta' ne kə sôwâ məsini. Bay hi wə gi kwa məsin juk ra' nji kə mə ndani na'a."

¹⁴Kəki rum, Zezu ɗe raw sôwâ kərem bay la' ne ndaya: «Hi ɗaŋ', i mun dan man, bay i mun zu dan mə ni na:

¹⁵Kwa ɗaŋ' mənı car mbə rəka mbə ze vun swə cu gak ɗənok bə rum mi. Ama kwa mənı wə pâ mbə vunduk swə, kwa rum gak ɗənok bə rumu.

[¹⁶Swə la' kə hum mun dan kəta' si, say bə rum nə munu!]"

¹⁷Kəri mənı Zezu ɓul nji kə raw sôwâ, mum ze ta rawti so, sum ta zə rum ci vun rum wa dan mə gəgan rumu.

¹⁸Zezu ɗam vun ndaya: «Hi ta', hi dan wa su? Hi cu mun i kwa ɗaŋ' mənı car mbə rəka mbə ze vun swə cu gak ɗənok bə rum mi nə mi su?

¹⁹Zə kwa rum cu ze ɗe vunduk rum mi, ama wə ze ɗe rawti bə rum, bay kəki rum kwa rum pâ ɗe rəka.» (Kə dan mə ni nə, Zezu ta' i kwati ɗaŋ' bay kədan ti).

²⁰Mum faŋ la' ne ndaya: «Kwa mənı wə pâ mbə vunduk, kwa rum gak ɗənok bə rumu.

²¹Zə kwa mənı car mbə wə rawti swə, pâ mbə vunduk rum, mum nə ɗik dan mə bro', gi kwa mə kə zur, kəy hura, ci mar,

²²gi nja, sɛna' kwa, gi bɛ', gi vur vur, gi kwa mɛ dan vari, gi sɛy', ge dan mɛ bro' wa sɔwɛ, mbra' tu, kɛ gi kwa mɛ laya.

²³Kwa mɛ bro' mɛ ndani kuni daŋ' wɛ wur mbɛ rawti swɛ bay wɛ dɛnok bɛ rumu."

²⁴Kɛki rum, Zezu 'ya mbɛ han ta nya mɛni so Tir. Mum ze ta rawti so bay mum cu wa' i swɛ daw we i mum wɛ so rum mi, ama kɛ ndi nɛ daŋ' mum cu gak pe' tu rum mi.

²⁵Kɛri rum, ma mɛsin mun dan Zezu, bay kɛkor sar, ta mbɛ kuduk nya kor rum, zɛ vay sɛ mɛ ma kɛ gam wa sa.

²⁶Ma rɛ zɛ saŋ sɔwɛ Grek, ta vra' wɛ Fenisi, nya Siri. Ta o Zezu kɛdan nɛ mbɛ 'way gam wa vay sa.

²⁷Ama Zezu dam vun sa: «Ʋɛ ar daw sumra' ti ndak nday cop ri', zɛ cu bay kɛdan tle kwati daw sumra' ne kɛ daw dɛ mi."

²⁸Ta dam vun rumu: «Kɛzin' Bɛrɛ, ama daw dɛ gak ti bubud'kwati mɛni daw sumra' ar njay zɛ tablɛ."

²⁹Zɛ rum, Zezu dam vun sa: «Zɛ dan dam maŋ, ɛɛ dɛ ye, gam pɛ mbɛ wa vay maŋ rɛ si."

³⁰Ta faŋ ta so sɛ, bay za' vay sɛ bar wa la'a. Gam nɛ pɛ mbɛ wa sɛ si.

³¹Kɛki rum kɛrem, Zezu 'ya mbɛ nya mɛni so Tir wɛ han, ta pɛ so Sidoŋ, kɛ nya mɛni so mɛ mbri guɓ wɛ han, bay mum gaŋ ta day vun ya mbi Galile.

³²Sɔwɛ mɛsin mbɛ hay' Zezu kɛ ndum mɛni cu gak ge dan njeŋ mi, bay handay o num kɛdan nɛ cin ba wa rumu.

³³Zezu faŋ kay' num ta rɛka kɛ rum kɛ daw rum, seŋ kɛ raw sɔwɛ. Mum cok daw ba ta zra hum ndum na. Mum tup mɛ' bay dak se'le ndum kɛ vay ba rumu.

³⁴Zezu faŋ tle i ta fray, tlaw, bay la' ne kɛ ndumu: «Efata», mɛni wa' dan ini: «A mun hum ye!"

³⁵Kɛkor sar, hum ndum nɛ ar, se'le rum gbol', bay mum dle kɛ ge dan kɛ vari rumu.

³⁶Zezu dlay nday kɛ gbɛgboŋ kɛdan kuni in dan rum ne kɛ swɛ daw mi. Ama kɛ ndi nɛ daŋ', handay pla' dan rum kporo.

³⁷Kwa rum jin' wa ne nday juk, bay handay ini: «Kwa mɛni mum gi daŋ', baya! Mum ar hum ndum, bay mum gbol' se'le sɔwɛ mɛni cu dan mɛta'a!»

Marc 8

¹Kɛri rum, raw sɔwɛ ba mbɛ hay' Zezu kɛreme. kɛri mɛni kwati ndo' wɛ ba nday si, mum dɛ sum ta zɛ rum bay la' ne ndaya:

²«Na wɛ we ca wa raw sɔwɛ mɛni kuni, zɛ handay gi bɛka hinji' kɛ rin bay kwati ndo' wɛ ba nday si.

³Na la' ar nday 'ya vari so nday kə mē' si, handay də par tətā wə vari, zə sôwâ mēsin du nday car mbə seŋe.”

⁴Sum ta zə rum dām vun rumu: «Wə igop mēni nə namba gak za' kwati ka kədan namba ndak sôwâ mēni kuni kə ndi su?”

⁵Zezu dām vun ndaya: «Hi kə vun tləpe' fun ma dak su?» Handay dām vun rumu: «Namba kə ndi sedā'a.”

⁶Zezu faŋ ne vari ne kə raw sôwâ kədan kuni gay' də nya. Kəki rum, Zezu ra' vun tləpe' fun mə sedā' kuni, gi soko ne kə Ifray bay kəki rum mum jak bay ne kə sum ta zə rum kədan handay bul ne kə raw sôwâ.

⁷Handay kə daw keve han cep ta'a. Zezu gi soko ne kə Ifray wa daw keve kuni bay ne vari ne kə sum ta zə rum kədan kuni bul ne kə sôwâ ta'a.

⁸Handay daŋ' ti ndaka. Sum ta zə Zezu ra' tan kwati mēni gwa' nə nyen dēŋâl sedā'a.

⁹Sôwâ mēni ti kwati rum raw nday i mbu fədi'i. Kəki rum, Zezu ar vari ne nday kədan kuni 'ya.

¹⁰Kəri rum sar, Zezu ur ta rawti da kə sum ta zə rum, bay handay 'ya ta nya Dalmanuta.

¹¹Kul sôwâ Zuwif mə dē kə Farisiyen mbə day bay təŋ kə way dan kə Zezu. Handay wa' kədan handay um kaw kə dan ge vun. Zə rum, handay ci vun rum kədan nə gi yew mēni gak ta' i gbəgboŋ um car mbə hay' Ifray mə wafraŋ ne ndaya.

¹²Zezu ndəma' bay dām vun ndaya: «Zə mi sôwâ mə tam wə ci vun yew su? Na in mi ne, kəzin', na cu də gi yew ne kə sôwâ mə tam mēni kuni mi!”

¹³Kəki rum, mum bul nji kə nday, ur ta rawti da, bay 'ya ta vun ya mbi ga' sini.

¹⁴Sum ta zə rum dūmwa dan tle kwati, bay handay kə vun tləpe' fun dāw ba nday wə rawti da sara.

¹⁵Zezu har ndaya: «I mun ri'i! I ji tu ri wə du dlum kul sôwâ Farisiyen kə Herodə kuna.”

¹⁶Sum ta zə rum dīk wə vunduk nday, bay handay in dan kə nji mbok nji: «Mum in ndəna' zə namba cu mbə kə kwati mi.”

¹⁷Zezu we dan dīk vunduk nday, bay mum ci vun ndaya: «Zə mi hi wə dīk dan wə vunduk ri i namba cu mbə kə kwati mi nə su? Hi cu we mi bo su? Hi cu mun zu dan rum mi bo su? Hi dan wa su?

¹⁸Hi kə i kəta', hi cu we kwa mi su? Hi kə hum kəta', hi cu mun zu dan mi su? I dla' wa,

¹⁹dan ri mēni na jak vun tləpe' fun mə vatl ndak raw sôwâ i mbu vatl kuni si su? Hi ra' kam kwati rum nyen dēŋâl ma dak su?» Handay dām vun rumu: «Dēŋâl guḅ wa hobo.”

²⁰Zezu ci vun nday kəreme: «Bay kəri məni na jak vun tləpe' fun sedā' ndak raw sôwâ i mbu fəđi', hi ra' kam kwati rum nyen dɛŋâl ma dak su?» Handay dām vun rumu: «Dɛŋâl sedā'a.»

²¹Zezu faɲ ci vun ndaya: «Hi cu mun zu dan rum mi ɓo su?»

²²Zezu kə sum ta zə rum ta day kuni wə so Betsayda. Sôwâ məsin mbə hay' Zezu kə dɛŋâr, ɓay handay o num kədan nə njay ɓa wa rumu.

²³Zezu kaw ɓa dɛŋâr ɓay kay' num pâ mbə so ta rəka kə rumu. Kəki rum, mum cin mē' ta i dɛŋâr ɓay njay ɓa ta hana. Mum faɲ ci vun rumu: «Ha gak we kwa su?»

²⁴Dɛŋâr tle i kar ri ɓay ini: «Na wə we sôwâ, ama na wə nday we ce' ndə gu məni wə ta.»

²⁵Zezu faɲ njay ɓa ta wə i rum kərem, kəki rum, dɛŋâr pe i kar ri kpê', i rum ar ɓay mum we kwa daɲ' ɓaya.

²⁶Kəki rum, Zezu ar vari ne num kədan nə də so um ɓay la' ne numu: «A faɲ də mbok so mi.»

²⁷Kəki rum, Zezu kə sum ta zə rum 'ya kuni ta pəđak so Sezare mə Filip. Kəri məni handay wə vari ɓo, Zezu ci vun ndaya: «Sôwâ wə in i na nə sa su?»

²⁸Handay dām vun rumu: «Sôwâ məsin wə in i ha Zaɲ-Baptistə, sôwâ məsin wə in i ha Eliya, ɓay sôwâ məsin kərem wə in i ha bə ka' dan wə du sum ka' dana.»

²⁹Zezu ci vun ndaya: «Ama hi, hi wə in mi i na sa su?» Piyer dām vun rumu: «Ha nə Kris na.»

³⁰Zezu faɲ dlay nday kə gbəgbəŋ kədan kuni in dan rum ne kə swə dāw mi!

³¹Kəki rum, Zezu tɛɲ kə ta' kwa ne kə sum ta zə rum kə ini: «Say Vay sumra' nə ce boni juk, sum rôwâ mə du sôwâ Zuwif, kə sum rôwâ mə du sum po' fur, ɓay sum pay zu dan dlay kuni də um vadā. Handay də um ci, ɓay kəki rum bəka hinji', mum də car mbə mara.»

³²Mum in dan rum ne nday təlaka. Zə dan rum, Piyer kay' num ta rəka kə rum ɓay tɛɲ kə um dlaya.

³³Ama Zezu faɲ i, kar sum ta zə rum, ɓay dlay Piyer kə gbəgbəŋo: «A 'ya ki rin si, Satan! Zə dan dīk wû cu wə du dan dīk Ifray mi, ama wə du dan dīk sumra'a.»

³⁴Kəki rum, Zezu dē raw sôwâ kə sum ta zə rum kuni ɓay la' ne ndaya: «Swə la' wa' ta zə rin si, say bə rum ar dīk dan tu rum, tle gu gay' tu rum, ɓay ta zə rini.

³⁵Zə swə məni wə wa' kədan mum sid' tu rum, bə rum də mar, ama swə məni də fe mar zə rin ko zə Dan mə Kədam, bə rum də sid' tu rum ta'a.

³⁶Swə la' za' kwa nya daɲ', ama bə rum cu kə nyî mə də hâ mi si, kwa rum gak gi mi zə rum su?

³⁷Swə də po' ma dak kədan mum fe nyî um su?

³⁸Swə la' wə gi zur wa rin ko wa dan man wə du sôwâ mə tam mənɪ cu ve dan Ifray mi, ɓay wə gi kwa mə bro' si, Vay sumra' də gi zur wa bə rum kəri mum də mbə wə du mbra' Ba um kə sum sin um mə kələŋe.»

Marc 9

¹Zezu faŋ la' ne ndaya: «Na in mi ne kəzin', sôwâ məsin wə du sôwâ mənɪ kuni cu də mar cop, dan we ri mənɪ Ifray wə də suk jwə kə gbəgbəŋ wa nday nə mi.»

²Kəki rum bəka kanki', Zezu tle Piyer, kə Zakə ɓay Zaŋ ɓay ur ta wa igway' mənɪ mbud' dəw' dəw' kə daw ndaya. Mum faŋwa tu rum kor ndaya.

³Mbraw um təŋ kə wədi ɓay faŋ mə bu kep kepe. Swə daw wa nya cu gak kol mbraw par mə bu ndəna' mi.

⁴Kəki rum, sum ta zə rum mə hinji' we Eliya kə Moyizə wə ge dan kə Zezu.

⁵Zə rum, Piyer la' ne kə Zezu: «Bə ta' kwa, ɓay kədan namba ke tira! Namba də kaw jew hinji': daw zə ru, daw zə Moyizə, ɓay daw zə Eliya.»

⁶Piyer cu we i mum in dan ma su wa kwa rum mi, zə kwa rum gi wəlok ne nday juku.

⁷Dləmbur mbə kəmbo' nday, ɓay wor car mbə du dləmbur ini: «Mənɪ nə Vay man mənɪ na ba. I mun vun rumu!»

⁸Kəri rum sar, sum ta zə Zezu kar ri hay' nday, ama handay cu we swə daw mi, say Zezu daw rum kə ndaya.

⁹Kəri mənɪ handay wə dam wa igway' mbə nya, Zezu dlay nday kə gbəgbəŋo: «I in dan kwa mənɪ hi we nə ne kə swə daw mi, hā bəka mənɪ Vay sumra' də car mbə mara.»

¹⁰Handay kaw dan rum wə vunduk nday, ama handay ci vun kuni mbok nji: «Zezu wa' in ma kəri mənɪ mum in i Ifray də par Vay sumra' mbə mar nə su?»

¹¹Handay faŋ ci vun rumu: «Zə mi sum pay zu dan dlay wə in i say Eliya də mbə cop su?»

¹²Mum dam vun ndaya: «Kəzin', Eliya də mbə cop kədan mum gila' kwa daŋ'ŋ. Ama zə mi Derwa Ifray wə in i Vay sumra' də ce boni juk, ɓay sôwâ də um jed'su?

¹³Ama na in mi ne: Eliya mbə si, ɓay sôwâ gi kwa daŋ' mənɪ handay wa' wə tu rum, ce' ndə mənɪ Derwa Ifray in wa rumu.»

¹⁴Kəri mənɪ handay mbə day hay' sum ta zə rum məsin, handay we raw sôwâ ɓa reŋ wa nday, ɓay sum pay zu dan dlay wə dan kə ndaya.

¹⁵Kəkor sar, sôwâ məsin du nday we Zezu, ɓay dan rum dam nyî ndaya. Handay pik ne ta hay' Zezu kədan handay kaw jeb rumu.

¹⁶Zezu ci vun sum ta zə rumu: «Hi wə way dan wa dan mi kə nday su?»

- ¹⁷Swə dāw du raw sôwâ dām vun rumu: «Bə ta' kwa, na mbə nu kə vay man, zə mum kə gam wa rumu. Gam nə wə um tak dan ge dana.
- ¹⁸Kəri daŋ' mənɪ gam wə um tle, mum um ge də nya. Vay nə wə ci kukup vun, cwə se', bay tu rum co' satəraka. Na ci vun sum ta zə ru kədan handay 'way gam rum, ama handay cu gak 'way num mi.”
- ¹⁹Zezu la' ne ndaya: «Hi sum dan ô! Na də suk kə ri hâ day ka su? Na də red' vunduk rin wa ri hâ day ka su? I mbə nan kə vay na.”
- ²⁰Handay mbə num kə vay na. Kəri mənɪ gam nə we Zezu, mum tle vay nə kə gbəgbonɔ, bay vay nə nde ta nya. Mum ge farga' kə ci kukup vun.
- ²¹Zezu ci vun ba vay na: «Kwa rum tən um gi kə ma su?» Ba vay nə dām vun rumu: «Tən num kə nyêwe.
- ²²Bay sem raw gam wə um pla' də ku bay də mbi kədan mum um ci. Ama ha la' gak gi kwa məsɪn zə rum si, a we ca wa mba, bay a kawɓa mba!”
- ²³Zezu dām vun rumu: «Ha gak si su? Kwa daŋ' gak gi zə swə mənɪ ve nan si.”
- ²⁴Kəkor sar, ba vay nə ka' dana: «Na ve nu si! A kawɓa rin kədan na də kofo wə du dan mənɪ na ve na!”
- ²⁵Zezu we raw sôwâ wə ne mbə hay' ndaya. Zə rum, mum dlay gam nə kə gbəgbonɔ: «Ha gam mənɪ wə tak vay nə dan ge dan kə mun dan, na dlay nu: A pâ mbə wa vay nə bay a faŋ dok ze wa rum za' mi!”
- ²⁶Gam nə ka' dan, mum tle vay nə kə gbəgbonɔ, bay pâ mbə wa rumu. Vay nə faŋ ce' ndə mar, hâ sôwâ juk mənɪ wə han ini: «Mum mar si.”
- ²⁷Ama Zezu tle ɓa rum kaw num car fray, bay vay nə ca kə sem rumu.
- ²⁸Zezu kə sum ta zə rum cok kuni ta rawti so. Kəri mənɪ handay kə rum dāw nday, handay ci vun rumu: «Zə mi namba cu gak 'way gam rum mi su?”
- ²⁹Zezu dām vun ndaya: «Kədan swə gak 'way gam mə nda nay' na, say kə o Ifraya.”
- ³⁰Handay 'ya mbə han, ta pâ nya Galile bay Zezu cu wa' i swə dāw we ri mənɪ mum wə də han nə mi.
- ³¹Zə mum wə ta' kwa ne kə sum ta zə rum bay wə du kwata' um, mum ini: «Sôwâ də ar Vay sumra' də ɓa sôwâ məsini. Handay də um ci, bay kəki rum bəka hinji', mum də car mbə mara.”
- ³²Ama sum ta zə rum cu mun zu dan rum mi, bay handay wə ne wəlok dan ci vun rumu.
- ³³Handay ta day so Kapernawum. Kəri mənɪ handay cok ta rawti so, Zezu ci vun ndaya: «Hi ci vun kuni mbok nji wa dan mi wə vari su?”
- ³⁴Ama handay gay' ɓaw' ɓaw', zə wə vari handay ci vun nji mbok nji: «Sa nə suk ton mə du mba su?”

³⁵Zezu faɲ suk ta nya. Mum dɛ sum ta zə rum mə guɓ wa hoɓ ɓay la' ne ndaya: «Swə la' wa' kədan mum suk toɲ si, say bə rum faɲ vay nyêw du sôwâ daɲ' ɓay nə faɲ swə mə kəki wə du sum sin daɲ'ɲ.»

³⁶Kəki rum, Zezu kawɓa vay nyêw ɓay mbə kor nday kə rumu. Mum tle vay nə kaw mbə vunduk rum ɓay la' ne ndaya:

³⁷«Swə mənɪ ve vay nyêw ce' ndə vay mənɪ nə zə rin, bə rum ve nana. ʔay swə mənɪ ve nan, bə rum cu ve nan taw mi, ama mum ve swə mənɪ sin nan nə ta'a.»

³⁸Zaɲ in ne kə Zezu: «Bə ta' kwa, namba we swə məsin wə 'way gam kə semdɛ ru, ɓay namba tak num, zə mum cu du mba mi.»

³⁹Zezu ɗam vun ndaya: «I tak num mi, zə swə mənɪ gi yew kə semdɛ rin cu gak faɲ ge dan mə bro' wa rin ga'ri mi.

⁴⁰Zə swə mənɪ cu ge dan bro' wa mba mi nə kə mba.

⁴¹ʔay swə mənɪ ne ni mbi ce zə hi sôwâ Kris, na in mi ne, kəzin', bə rum də fe bal cik umu.»

⁴²«Swə mənɪ ɓu vay nyêw ɗaw du daw mənɪ ve nan mənɪ kuni nde də du kwa mə bro', pram zə bə rum sôwâ jew gway' vəna wə jewre rum ɓay tle num ge də ya mbi.

⁴³ʔa ru la' wû ɓu kədan ha nde du kwa mə bro' si, a hay ye. Pram zə ru kədan ha də ke kə nyî mə də hâ so Ifray kə rəbo pâ mənɪ ha də ke kə ɓa mə hoɓ ɓay də ze ri ku mənɪ cu mar i mi kə ndi nə si.

[⁴⁴Wə ri rum, ɲgun mənɪ wə ti tu han cu mar mi, ɓay ku rum cu mar i kpe mi.]

⁴⁵Sem ru la' wû ɓu kədan ha nde du kwa mə bro' si, a hay ye! Pram zə ru kədan ha də ke kə nyî mə də hâ so Ifray kə lem pâ mənɪ ha də ke kə sem mə hoɓ ɓay də ze ri ku kə ndi nə si.

[⁴⁶Wə ri rum, ɲgun mənɪ wə ti tu han cu mar mi, ɓay ku rum cu mar i kpe mi.]

⁴⁷I ru la' wû ɓu kədan ha nde du kwa mə bro' si, a par ye! Pram zə ru kədan ha də ze wə Jwə Ifray kə i mə ɗaw pâ mənɪ ha də ke kə i mə hoɓ ɓay də ze ri ku kə ndi nə si.

⁴⁸Wə ri rum, ɲgun mənɪ wə ti tu cu mar mi, ɓay ku rum cu mar i kpe mi.»

⁴⁹«Zə ku də ge wa sôwâ daɲ' ce' ndə vu wə ge wa mbara.

⁵⁰Vu nə kwa mə ɓay na, ama vu la' so' walak um si, hi gak gi ma kədan hi um gi faɲ walak kərem su? I ke kə vu wə vunduk ri, ɓay i gay' heɓ kə nji mbok nji.»

Marc 10

¹Zezu 'ya mbə han, ta nya Zude, ɓay ur ze Zurdeɲ ta dapa ga' sini. Raw sôwâ ɓa mbə hay' rum kərem, ɓay mum dle kə ta' kwa nday ne, ce' ndə mənɪ mum wə gi ɓa'a.

- ²Sôwâ mäsın mə du kul sôwâ Zuwif mə də kə Farisiyen mbə hay' rum kədan handay um kaw kə dan ge vunu. Zə rum, handay ci vun rumu: «Dan dlay mba ne vari ne kə səmanji kədan nə bur ma rum si su?»
- ³Zezu dām vun ndaya: «Moyizə wây' dan dlay ma wa dan rum su?»
- ⁴Handay dām vun rumu: «Moyizə ne vari ne kə səmanji kədan nə wây' dərwa bur nji nday ne kə ma rum bay 'way sə kə ndi.»
- ⁵Zezu faɲ in ne ndaya: «Moyizə wây' dan dlay rum ne ni zə wa ri bökroko.
- ⁶Ama kəri məni Ifray təɲ kə gi kwa, mum gi səmanji kə ma.
- ⁷Zə rum, səmanji də ar ba um kə ya um bay də tləba nji kə ma rum,
- ⁸bay handay hoɓ jak də faɲ tu dāwa. Ndəna' handay cu hoɓ za' mi, ama tu dāwa.
- ⁹Swə cu kə vari kədan mum bur kwa məni Ifray tləba ta nji si nə mi.»
- ¹⁰Kəri məni handay wə rawti so, sum ta zə Zezu ci vun rum wa dan rum kəreme.
- ¹¹Mum dām vun ndaya: «Swə la' bur ma rum bay faɲ tle ma mäsın cin si, ka bə rum gi nja wə hay' ma rum mə vun kofo ra.
- ¹²Ndəna' ta', ma la' bul nji kə nji sə bay faɲ cin nji mäsın si, ka i rum gi nja ta'a.»
- ¹³Sôwâ ra' dawre' mbə hay' Zezu kə nday kədan mum nday dāk, ama sum ta zə rum tak ndaya.
- ¹⁴Kəri məni Zezu we ndəna', mum tle bak bay la' ne kə sum ta zə rumu: «I ar dawre' mbə hay' rini. I tak nday mi, zə Ifray wə wa' kədan mum suk jwə wa sôwâ məni ra' nji kə ndaya.
- ¹⁵Na in mi ne kəzin', swə məni cu ve i Ifray suk jwə wa rum ce' ndə məni vay nyêw wə man ve mi si, bə rum cu də ze wə ri məni Ifray wə də suk jwə wa sôwâ um nə mi.»
- ¹⁶Kəki rum, Zezu ra' dawre' kaw mbə vunduk rumu. Mum faɲ njay ba rum wa nday dāw dāw daɲ' bay kuswa' ndaya.
- ¹⁷Kəri məni Zezu car tle vari, swə dāw mbə hay' rum bay mum kuduk nya kor rum bay ci vun rumu: «Bə ta' kwa mə bay, na də gi ma kədan na fe nyî mə də hâ su?»
- ¹⁸Zezu dām vun rumu: «Zə mi ha də nan kə swə mə bay su? Swə mə bay cu dāw mi, say Ifray tawa!
- ¹⁹Ha we dan dlay si: A ci mar mi, a gi nja mi, a kəy hura mi, a hay dan wa swə mäsın mi, a ti kwa ba sôwâ mäsın kə vur vur mi, a mbâ ba wû kə ya wû.»
- ²⁰Swə nə dām vun rumu: «Bə ta' kwa, na ta zə dan dlay məni kuni daɲ' daka nyêw mana.»
- ²¹Zezu kar num bay tuk kədam kə rum, bay mum faɲ la' ne numu: «Kwa dāw gwa' nu, a də coɓ kwa wû daɲ' də rəka, bay a də bul səlay rum ne kə sum ca. Ndəna' ha də ke kə ndak wafray, bay a mbə ta zə rini.»

- ²²Ama kəri mənı swə nə mun dan rum, vunduk par num bay mum 'ya dle kə dan dık, zə mum kə ndak juku.
- ²³Zezu tle i kar sum ta zə rum mənı gay' reŋ wa rum kə ndi deraŋ deraŋ bay la' ne ndaya: «Kəcik bayrum kədan sum ndak ze wə jwə Ifraya.»
- ²⁴Dan rum jin' wa ne kə sum ta zə rumu. Ama Zezu faŋ in ne ndaya: «Daw man, kəcik bayrum kədan bə ndak ze wə ri mənı Ifray wə də suk jwə wa sôwâ umu.
- ²⁵Kəcik kədan njoŋnjoŋ pâ zra batal, ama kədan bə ndak ze wə jwə Ifray kəcik pâ mum si!”
- ²⁶Dan rum jin' wa ne kə sum ta zə rum bayrum kəreme. Zə rum, handay dle kə ci vun kuni mbok nji: «La' ndəna' si, sa nə gak ke kə nyî mə də hâ su?”
- ²⁷Zezu kar nday bay la' ne ndaya: «Sumra' cu gak gi kwa rum mi, ama Ifray gak gi kwa rum, zə Ifray gak gi kwa daŋ'ŋ.»
- ²⁸Zə rum, Piyer təŋ kə um in ne: «A kar ri'i! Namba ar kwa daŋ', bay namba wə ta zə ru.”
- ²⁹Zezu dām vun rumu: «Na in mi ne kəzin', swə la' ar so um, daw ya um mə njiwkwa, daw ya um mə rawkwa, ya um, ba um, daw um, kə sine um kuni zə rin bay zə Dan mə Kədam si,
- ³⁰ka bə rum də fe so, daw ya mə njiwkwa, daw ya mə rawkwa, ya, daw, kə sine də han daŋ' kis kis pâ mə du bəka mə tama. Mum də ce boni ta'a. Ama wə du bəka mənı wə də mbə, mum də fe nyî mə də hâ.
- ³¹Ama sôwâ juk mənı vun kofo tam, handay də faŋ sôwâ mə kəki, bay sôwâ juk mənı kəki tam, handay də faŋ sôwâ mə vun kofo.”
- ³²Handay wə vari mə də so Jeruzalem, bay Zezu dle kor sum ta zə rumu. Dan Zezu jin' wa ne nday, bay dan rum gi wəlok ne kə sôwâ məsin mənı wə ta zə nday ta'a. Zezu ra' sum ta zə rum mə guḁ wa hoḁ mbə hay' rum kərem, bay mum təŋ kə nday in dan kwa mənı wə də mbə wa rumu.
- ³³Mum la' ne ndaya: «I kar ri'i! Namba wə də so Jeruzalem, sôwâ də ar Vay sumra' də ba sum rôwâ mə du sum po' fur kə sum pay zu dlay kuni wə hana. Handay də bok dan mar wa rum bay də um ar də ba sôwâ mənı cu zə saŋ sôwâ Zuwiŋ mi.
- ³⁴Handay də um ru, də tup mē' wa rum, də um pe kə ləva, bay də um ci, ama kəki rum bəka hinji', mum də car mbə mara.”
- ³⁵Kəki rum, Zakə kə Zaŋ, daw Zebede, mbə hay' Zezu bay la' ne numu: «Bə ta' kwa, namba wa' i a gi kwa mənı namba kə mē' rum hay' ru ne mba.”
- ³⁶Zezu dām vun ndaya: «Hi wa' i a gi mi ne ni su?”
- ³⁷Handay dām vun rumu: «Kəri mənı ha wə də suk jwə wa mba kə mbra' wû, a ne mba vari kədan mə gay' hay' ru, swə dāw ba fun ru, bay məsin ba gur ru.”

³⁸Zezu dām vun ndaya: «Hi cu we kwa mēni hi wə o nə mi. Hi gak ce timbi boni mēni na wə də ce nə si su? Hi gak ve baptem mēni na wə də ve nə si su?»

³⁹Handay dām vun rumu: «Namba gaka.» Zezu faɲ la' ne ndaya: «Kəzini! Hi də ce boni mēni na wə də ce, ɓay hi də ve baptem mēni na wə də ve.

⁴⁰Ama na cu kə vari kədan na mi ne ri suk mə ɓa fun ko ɓa gur rin mi. Ifray kə mēni wə də ne ri mēni mum gila' rum zə sôwâ mēni mum da' nday kədan handay gay' hana.»

⁴¹Kəri mēni sum ta zə rum mēsin mə guɓ mun dan rum, handay təɲ kə ra' bak wa Zakə kə Zaɲ.

⁴²Zə rum, Zezu dē nday daɲ' ɓay la' ne ndaya: «Hi we si, sum rôwâ mēni sôwâ njay nday ce' ndə sum jwə wa sôwâ, handay gay' wa sôwâ kə gbəgbəɲ, ɓay handay ti kwa ɓa sôwâ kə gbəgbəɲ ndaya.

⁴³Ama kwa rum cu gak də ke ndəna' du ri mi. Zawa, swə dāw la' wa' kədan mum suk bârî mə du ri si, say bə rum faɲ bə gi sin zə ri.

⁴⁴Bay swə dāw la' wa' kədan mum suk təɲ mə du ri si, say bə rum faɲ bek sôwâ daɲ'ɲ.

⁴⁵Zə Vay sumra' kə tu rum cu mbə kədan sôwâ gi sin zə rum mi, ama mum mbə kədan mum gi zə sôwâ ɓay ne tu rum kədan mum tumwa sôwâ juku.»

⁴⁶Handay ta day so Jeriko. Kəri mēni Zezu pā mbə so rum kə sum ta zə rum kə raw sôwâ kuni, dəɲâr mə dē kə Bartime suk hay' vari wə o kwa, mum nə vay Time.

⁴⁷Kəri mēni mum mun i Zezu mə so Nazaret na, mum təɲ kə ka' dana: «Zezu, vay David, a we ca wa rini!»

⁴⁸Sôwâ juk dlay num kə gbəgbəɲ kədan nə seɲ vun, ama mum faɲ ka' dan kə gbəgbəɲ pā mə vun kofo: «Vay David, a we ca wa rini!»

⁴⁹Zezu faɲ ca ɓay ini: «I dē numu.» Handay dē dəɲâr ɓay la' ne numu: «A kaw vunduk ru, a car ye, mum wû dē.»

⁵⁰Zə rum, dəɲâr nə ar mbraw pik, dam ca fray, ɓay ne ta hay' Zezu.

⁵¹Zezu ci vun rumu: «Ha wa' i a gi mi zə ru su?» Dəɲâr dām vun rumu: «"Rabuni" wa' dan ini: "Bə ta' kwa", na wa' i a gi nan weri kəreme!»

⁵²Zezu la' ne numu: «A də ye, zə ô wû sid' nu si!» Kəkor sar, mum dle kə weri ɓay təɲ kə ta zə Zezu wə vari.

Marc 11

¹Kəri mēni handay ta həre' kə so Jeruzalem, wə ga' so Betfage kə so Betani, handay mbə day sem igway' mēni gu olivə wə han juku. Zezu sin sôwâ hoɓ du sum ta zə rum ta kofo nday

²Bay mum la' ne ndaya: «I dɛ so mɛ nay' kor ri. Kɛri mɛni hi dɛ day han, hi dɛ za' vay kor mɛni sɔwɛ cu ur wa rum dɛw mɛto', jɛw wɛ hana. I ulay' num mbɛ kɛ ndi.

³Swɛ la' ci vun ri: "Zɛ mi hi gi ndɛna' su?" I dɛm vun rumu: "Bɛrɛ wɛ wa' rumu. Bay bɛ rum dɛ um ar mi ne kɛ ri rum sara."«

⁴Zɛ rum, handay 'ya dle ta za' vay kor nɛ rɛka, jɛw hay' vari hɛrɛ' kɛ vun vari so, bay handay ulay' numu.

⁵Sɔwɛ mɛsin wɛ du sɔwɛ mɛni gay' wɛ han ci vun ndaya: «Hi gi mi su? Hi wɛ ulay' vay kor nɛ dɛ ka kɛ ndi su?"

⁶Handay dɛm vun nday cɛ' ndɛ mɛni Zɛzu in ne nday, bay sɔwɛ kuni ar nday 'ya kɛ ndi.

⁷Handay mbɛ hay' Zɛzu kɛ vay kor na. Handay dluɓ mbraw nday ta ki vay kor, bay Zɛzu ur suk hana.

⁸Sɔwɛ juk dluɓ mbraw nday wɛ vari, bay sɔwɛ mɛsin tum tlap wɛ sine dluɓ wɛ vari.

⁹Sɔwɛ mɛni wɛ ta kor Zɛzu kɛ sɔwɛ mɛni wɛ ta zɛ rum do dan kɛ ini: «Mbɛra' hay' ru, Ifraya! Ifray nɛ kuswa' swɛ mɛni mbɛ kɛ semdɛ Bɛrɛ!

¹⁰Ifray nɛ kuswa' ri mɛni mum wɛ dɛ suk jwɛ wa sɔwɛ um cɛ' ndɛ mɛni ba mbi mba David ke suk jwɛ wa ba mbri ramba! "Hozana" wa' dan ini: "Mbɛra' hay' Ifray" mɛ wafɛra!"

¹¹Zɛzu ta so Jeruzalem, mum faɲ ze ta rawti so po' fur sɔwɛ Zuɛwif bay kar kwa dɛɲ' mɛni wɛ hana. Ama zɛ fɛta wa' no', mum 'ya vari so Betani kɛ sum ta zɛ rum mɛ guɓ wa hobo.

¹²Siw rum, kɛri mɛni handay 'ya ar so Betani, mɛ' ti Zɛzu.

¹³Mum we gu tɛrum ta rɛka kɛ tlap kɔm' kɔmu. Mum fur kɛdan mum kar ke mɛsin mum gak za' vra' rum han si su na. Ama kɛri mɛni mum ta day hay' gu rɛ, mum za' tlap rum taw, zɛ ri vra' tɛrum rɛ cu mbɛ mɛto'o.

¹⁴Zɛ rum, Zɛzu in ne kɛ gu tɛrum ra: «Swɛ dɛw cu dɛ ti vra' riɲ za' mi!» Bay sum ta zɛ rum mun dan rumu.

¹⁵Kɛri mɛni handay ta day so Jeruzalem, Zɛzu ze ta rawti so po' fur sɔwɛ Zuɛwif. Mum tɛɲ kɛ 'way sɔwɛ mɛni wɛ gi cɔɓ kwa kɛ sɔwɛ mɛni wɛ cɔɓ kwa han dɛɲ'ɲ. Mum faɲ i tablɛ sɔwɛ mɛ sam sɛlay kɛ kwasuk sɔwɛ mɛni gi cɔɓ kuruk,

¹⁶Bay mum cu ar swɛ dɛw tle kwa mbɛ rawti so po' fur sɔwɛ Zuɛwif kɛ ndi mi.

¹⁷Kɛki rum, Zɛzu ta' kwa ne nday kɛ ini: «Dan rum wɛy' wɛ du dɛrwa: So man dɛ dɛ kɛ so mɛni sɔwɛ dɛɲ' gak in dan kɛ Ifray wɛ hana. Ama hi, hi faɲ gi so rum cɛ' ndɛ ri pɛ' hura na'a!"

¹⁸Sum rôwâ mə du sum po' fur kə sum pay zu dan dlay mun kuni dan rum, ɓay handay keɓ vari kədan handay ci Zezu. Handay ne wəlok rum, zə kwata' um jin' wa ne kə raw sôwâ daŋ' mənɪ mun kwata' umu.

¹⁹Kəri mənɪ fəta so' si, Zezu kə sum ta zə rum wur kuni mbə so rumu.

²⁰Siw rum kə vun bəka, kəri mənɪ sum ta zə Zezu wə pā vari rum, handay we gu tərɪm rə co' si kə tlor sə cete.

²¹Piyer dla' wa kwa mənɪ ke gi ɓay la' ne kə Zezu: «Bə ta' kwa, a kar ri'i! Gu tərɪm mətɪ ha ge nê' sə, ta co' si!»

²²Zezu faŋ la' ne kə sum ta zə rumu: «I ve Ifraya.

²³Na in mi ne kəzin', swə la' in ne kə igway' mə tira: Əŋ 'ya mbə ti ɓay dam də ya mbi, ɓay bə rum la' cu way dan rum wə vunduk rum mi ɓay mum la' ve i dan mənɪ mum in wə də gi ndəna' si, kwa rum də gi ce' ndə mənɪ mum ini.

²⁴Zə rum, na in mi ne: Kəri daŋ' mənɪ hi wə o Ifray wa kwa, i ve i hi fe kwa rum si, ɓay hi də fe kwa rumu.

²⁵Bay kəri mənɪ hi la' car kədan hi in dan kə Ifray, ɓay hi la' kə dan dɪk mə bro' wa swə məsin si, i vrum kwa mə bro' mənɪ swə nə gi wə hay' ri, kədan Ba mi mə wafray nə vrum kwa mə bro' mi ta'a.

[²⁶Ama hi la' cu vrum kwa mə bro' sôwâ məsin mi si, Ba mi mə wafray cu də vrum kwa mə bro' mi mə ta'a.]»

²⁷Handay faŋ ta so Jeruzalem kəreme. Kəri mənɪ Zezu wə gaŋ rawti so po' fur sôwâ Zuwif, sum rôwâ mə du sum po' fur, kə sum pay zu dan dlay, ɓay sum rôwâ mə du sôwâ Zuwif mbə kuni hay' rumu.

²⁸Handay ci vun rumu: «Kə gbəgbəŋ sa ha wə gi kwa mənɪ kuni su? Sa nə ne gbəgbəŋ ne nu kədan ha gi kwa mənɪ kuni su?»

²⁹Zezu dām vun ndaya: «Na də ci vun ri kə dan dāwa. Hi la' dām vun rin si, na də mi ta' swə mənɪ ne gbəgbəŋ ne nan kədan na gi kwa mənɪ kuna.

³⁰Sa nə sin Zaŋ gi baptem su? Ifray su? Ko sumra' su? I dām vun rin ri'i.»

³¹Ama handay təŋ kə dle vun mbok nday, ɓay handay ini: «Namba la' dām i Ifray sin um si, mum də ci vun mba: Zə mi hi cu ve num mi su?

³²Ama namba də dām i sumra' su?» (Handay ne wəlok sôwâ, zə sôwâ daŋ' dɪk i Zaŋ nə ke bə ka' dan mə kəzini.)

³³Zə rum, handay dām vun Zezu: «Namba cu we mi.» Bay Zezu la' ne ndaya: «La' ndəna' si, na ta', na cu də mi ta' swə mənɪ ne gbəgbəŋ ne nan kədan na gi kwa mənɪ kuni mətə'a.»

Marc 12

- ¹Kəki rum, Zezu tən kə in dan kə dan mə gəgan nday ne: «Swə məsin pe gu viŋə sine umu. Mum dluḅ vun rum, mum dla zra kədan mum 'yem vra' gu wə han, bay mum dla dap kədan sôwâ mənî ji sine viŋə rum gak gay' wə hana. Kəki rum, mum ar sine gu rum wə ɓa sum ji sine bay 'ya rəkwaya.
- ²Kəri mənî wakaya rum mbə day, bə sine viŋə nə sin bə sin um wə hay' sum ji sine kədan mum ve vun kwa wakaya um wə ɓa ndaya.
- ³Ama sum ji sine viŋə kaw bə sin nə, pum bay 'way num ge kə ɓa uraya.
- ⁴Bə sine nə faŋ sin bə sin um məsini. Sum ji sine pum wa ne num bay i numu.
- ⁵Bə sine nə faŋ sin bə sin um məsin kəreme. Sum ji sine ci numu. Handay gi ndəna' kə sum sin um məsin kuni juk ta'a. Handay pum məsin, bay handay ci məsini.
- ⁶Gwa' vay vra' um daw kərem mənî mum bə wə hay' rumu. Ndo' vun rum, mum sin vay nə hay' ndaya. Mum dik wə vunduk rumu: Handay də mbâ vay mana.
- ⁷Ama sum ji sine in kuni mbok nji: "Swə mənî də ti so nə wə mba. Mə ci num si, bay sine rum də faŋ mə namba!"
- ⁸Handay kaw num, ci bay tle mar rum wə du sine dā ta rəka."
- ⁹Zezu ci vun ndaya: «Bə sine də gi mi su? Mum də mbə bay də ci sum ji sine viŋə rum, bay də ar sine nə də ɓa sôwâ məsini.
- ¹⁰Hi cu in ri Derwa Ifray mənî nə mi su? Gway' mənî sum dam so ar ge ta rəka, gway' rum faŋ gway' mə kə sin toŋo.
- ¹¹Bârî gi kwa rum ndəna', bay bay zə mba kədan namba we kwa rumu."
- ¹²Sôwâ rôwâ mə du sôwâ Zuwif keḅ vari kədan handay kaw Zezu, zə handay we si: mum in dan mə gəgan rum wa ndaya. Ama zə handay ne wəlok raw sôwâ, handay ar num bay 'ya dle.
- ¹³Handay sin sôwâ məsin mə du kul sôwâ Zuwif mə də kə Farisiyen kə sôwâ məsin mə du kul sôwâ Zuwif mə də kə Herodiyen hay' Zezu kədan handay um kaw kə dan ge vun.
- ¹⁴Handay mbə la' ne numu: «Bə ta' kwa, namba we si: Ha wə in tu dan, bay ha cu ne wəlok i sumra' mi. Ha cu gi sôwâ cem cem mi, ama ha wə ta' vari Ifray njeŋ ne kə sôwâ daŋ'ŋ. A in ne mba ri'i: Dan dlay mba ne vari ne mba kədan namba po' grama hay' jwə mə mbri mə nya Romə su? Namba də po' ko po' mi su?"
- ¹⁵Ama Zezu we dan dik mə vur vur nday, bay mum ci vun ndaya: «Zə mi hi wə keḅ kədan hi man kaw kə dan ge vun su? I mbə nan kə səlay na kar ri'i."
- ¹⁶Handay mbə num kə ndi daw, bay Zezu ci vun ndaya: «Nyî tu sa kə semde sa wây' han mənî nə su?» Handay dam vun rumu: «Nyî tu jwə mə mbri mə nya Romə na."
- ¹⁷Zezu faŋ la' ne ndaya: «La' ndəna' si, i ne kwa jwə mə mbri mə nya Romə ne num, bay i ne kwa Ifray ne num ta'a.» Bay dan dam rum jin' wa ne ndaya.

- ¹⁸Sôwâ mēsin mē du kul sôwâ Zuwif mē dē kē Sadusiyeŋ mbē hay' Zezu. (Handay sôwâ mēni wē in i Ifray cu dē ra' sôwâ mbē mar kpe mi.) Handay la' ne numu:
- ¹⁹«Bē ta' kwa, Moyizē wāy' dan dlay mēni nē ne mba: Swē la' kē njēr rum mē mbri, bay mar ar ma dan daw si, swē nē tle rēnda mok njēr rum cin kēdan mum vra' kē sē tan njēr rum mēni mara.
- ²⁰Ba' si daw njiwkwa kēta' sedā'a. Handay daw ya mē dāwa. Mē mbri cin ma bay mar cu ar daw mi.
- ²¹Buwa wa hoḥ rum tle rēnda mok njēr rum cin, ama mum mar cu ar daw mēta'a. Ndēna' kē buwa hinji' rum ta'a.
- ²²Handay sedā' daŋ' cin rēnda rē bay mar cu ar daw mi. Kēki nday daŋ' ma rē mar ta'a.
- ²³Fēta mēni sôwâ dē pā mbē mar, ma rē dē ke ma sa du nday su? Zē handay sedā' daŋ' cin sa.”
- ²⁴Zezu dām vun ndaya: «Hi wē vi' tu ri! Hi wē zē rum si su? Zē hi cu wē Dērwa Ifray kē gbēgboŋ Ifray mi.
- ²⁵Zē kē ri mēni sôwâ wē dē pā mbē mar, njiwkwa kē rawkwa cu dē cin nji mi, ama handay dē ke ce' ndē sum sin Ifray mē wafraja.
- ²⁶Ama wa dan sum mar mēni dē pā mbē mar, hi cu in wē du dērwa Moyizē, wē ri mēni mum wāy' dan wa ku mēni ye' ŋāy' nē mi su? Mum wāy' wē hana: "Na Ifray Abraham, kē Ifray Isak, bay Ifray Yakub.”
- ²⁷Ifray nē cu Ifray sum mar mi, ama mum Ifray sôwâ mē kē i. Hi vi' vari si cete!”
- ²⁸Swē dāw mē du sum pay zu dan dlay mun dan way ndaya. Mum wē Zezu dām dan vun kul sôwâ Zuwif mē dē kē Sadusiyeŋ baya. Zē rum, mum jik mbē hay' Zezu bay ci vun rumu: «Dan dlay mē mbri mēni pā nday daŋ' nē kē mē ka su?”
- ²⁹Zezu dām vun rumu: «Dan dlay mē mbri mēni pā nday daŋ' nē ni na: I mun ri' sôwâ Israyel! Bârî, Ifray mba, mum nē Bârî dāw sara.
- ³⁰I bē Bârî Ifray mi kē vunduk ri daŋ' kē nyî ri daŋ', kē gwet mi daŋ', bay kē gbēgboŋ mi daŋ'ŋ.
- ³¹Bây hoḥ dan dlay mē mbri rum nē ni na: A bē jik wû ce' ndē mēni ha wē bē tu ru. Dan dlay mē pā mē hoḥ mēni kuni cu za' mi.”
- ³²Bē pay zu dan dlay nē faŋ la' ne kē Zezu: «Bay juk Bē ta' kwa! Dan mēni ha in nē kēzini. Ifray nē dāw sar, bay ifray mēsin cu mi, say mum dāw sara.
- ³³Bay say swē bē Ifray kē vunduk rum daŋ', kē gwet um daŋ', bay kē gbēgboŋ um daŋ', bay bē jik um ce' ndē mēni mum wē bē tu rumu. Kēdan ta zē dan dlay mē hoḥ mēni kuni pā mēni namba fol kwa po' fur mē ye' ku ye' kor Ifray kē ndi, ko ne kwane cem cem ne kē Ifray si.”

³⁴Zezu we mum dām dan vun rum kə gwet, bay mum la' ne numu: «Ha cu seŋ kəri məni Ifray gak suk jwə wa ru nə mi.» Kəki rum, sôwâ daŋ' ne wəlok dan ci vun dan vun rumu.

³⁵Kəri məni Zezu wə ta' kwa ne kə sôwâ wə rawti so po' fur sôwâ Zuwif, mum ci vun ndaya: «Zə mi sum pay zu dan dlay gak in i Kris nə vay rawti David su?

³⁶Zə Simbed' mə Kələŋ pla' David kədan ini: Bârî in ne kə Bârî mana: A suk ɓa fun rin, hâ na də njay sum sî wû zə sem ru.

³⁷David kə tu rum dē num kə Bârî, bay gi ma kədan Kris nə faŋ vay rawti David su?» Raw sôwâ məni ɓa wə han mun dan Zezu kə tuk kəɗama.

³⁸Wə du kwata' um, Zezu har ndaya: «I ji tu ri hay' sum pay zu dan dlay məni wə tuk kəɗam kə gaŋ kə mbraw mə mbri bay wa' i sôwâ kaw jeb nday wə ri ɓawa sôwâ.

³⁹Handay keɓ ri suk mə vun kofo wə rawti so Ifray sôwâ Zuwif bay keɓ ri suk mə bay wə ri gi cere.

⁴⁰Handay ti kwa daŋ' məni wə ɓa rənda, bay handay in dan kə Ifray hâ hâ kədan sôwâ nday kar, handay də fe dan ɓok mə toŋ wa ndaya!"

⁴¹Kəki rum, Zezu faŋ suk kor sunduku njay səlay han, bay mum kar raw sôwâ məni wə njay səlay də hana. Sum ndak juk wə njay səlay də han juku.

⁴²Kəki nday, rənda mə kə ca mbə day, bay ta njay suŋku hoɓ wə hana.

⁴³Zezu faŋ dē sum ta zə rum bay la' ne ndaya: «Na in mi ne kəzin', rənda mə kə ca rə njay kwa ta han pâ sôwâ məsin daŋ'ŋ.

⁴⁴Zə sôwâ məsin daŋ' njay səlay məni wə ɓa nday dan sin, ama ta, du ca sə, ta njay kwa daŋ' məni wə ɓa sa. Ta ne kwa daŋ' məni ta kə ndi zə ur tu sə nə cete.»

Marc 13

¹Kəri məni Zezu pâ mbə rawti so po' fur sôwâ Zuwif, swə ɗaw du sum ta zə rum la' ne numu: «Bə ta' kwa, a kar ri'i! Gway' məni handay dām so kə ndi kuni bay, bay so rum toŋo!"

²Zezu dām vun rumu: «Ha we so mə toŋ məni kuni si su? So məni kuni daŋ' də bru, bay ko gway' ɗaw cu də suk wa gway' məsin mi."

³Zezu suk wa igway' məni gu olivə wə han juku. Mum cin i kə so po' fur sôwâ Zuwif, Piyer, kə Zakə, bay Zaŋ kə Andre gay' kuni kə rum ɗaw nday bay handay ci vun rumu:

⁴«A in ne mba ri'i. Kwa rum də gi kə ma su? Kwa mə ta' kwa mi wə də ta' ndo' kwa rum daŋ' nə su?"

⁵Zezu faŋ təŋ kə nday in ne: «I ji tu ri kədan swə ɗaw nə vi' ni mi.

⁶Sôwâ juk wə də mbə kə semde rin, bay handay də ini: "Na nə Kris na", bay handay də vi' sôwâ juku.

⁷Kəri mənɪ hi də mun ci' zi mə həre', bay hi də mun dan zi mə seŋ, i ne wəlok mi, zə kwa rum də mbə gi, ama ndo' nya cu mətə'o.

⁸Sôwâ nya məsin də car zi wa sôwâ məsin, bay jwə məsin də car zi wa jwə məsini. Nya də nyen wə ri cem cem, bay mē' də nde. Kwa rum də ke ce' ndə təŋ zə boni mənɪ ma wə tuk kə vra'a.

⁹Ama hi, i ji tu ri, zə sôwâ məsin də mi ra' də kor sum bok dan kə ndi. Handay də mi pe kə ləva wə rawti so Ifray sôwâ Zuwif. Hi də ca kor sum rôwâ nya kə kor sum jwə zə rin kədan hi in njeŋ dan wa rin kor ndaya.

¹⁰Say cop rum sôwâ də ka' Dan mə Kədam ne kə zə saŋ daŋ'ŋ.

¹¹Bay kəri mənɪ handay də mi ra' kədan handay də kor sum bok dan kə ri, i dɪk dan wa dan mənɪ hi wə də in nə cop mi, ama i də in dan mənɪ Simbed mə Kələŋ wə də mi ne kə ri rum, zə hi cu kə mənɪ wə də in dan rum mi, ama Simbed mə Kələŋ na.

¹²Sôwâ də ar daw ya nday də ba sôwâ kədan sôwâ nday ci, ba daw də gi ndəna' kə daw nday ta', daw də faŋ car wa sôwâ nday kədan handay nday ci.

¹³Sôwâ daŋ' də mi sɪ zə rin, ama swə mənɪ car ŋgədiŋ' hā ndo' rum, bə rum də ke kə nyɪ mə də hā."

¹⁴«Hi də we "swə mə bro' mənɪ wə dənok kwa" ke wə ri mənɪ cu kəri ke han nə mi (say swə mənɪ in dan rum, nə munu!) Kəri rum, sôwâ mənɪ də ke wə nya Zude kuni ne ur də wa igway'i.

¹⁵Swə mənɪ də ke wa so lari um, bə rum nə dam ze də rawti so um kədan nə ra' kwa han mi.

¹⁶Bay swə mənɪ də ke wə sine, bə rum nə gewa mbə so um kədan nə ra' mbraw um mi.

¹⁷Də ke kəcik kə bəka rum wa rawkwa mənɪ kə ur, bay wa rawkwa mənɪ kə daw vun pa'a.

¹⁸I o Ifray kədan kwa rum nə mbə kə ri simbed mi.

¹⁹Zə boni mə du bəka rum də ke bayrum pâ boni daŋ' mənɪ sôwâ wə ce daka kəri mənɪ Ifray təŋ gi kwa hā tam, bay boni mə ndə ni na' cu də mbə kərem za' mi.

²⁰Bârɪ la' cu par raw bəka rum ta rəka mi si, swə dāw cu gak də sid' mi, ama mum par raw bəka rum ta rəka zə sôwâ mənɪ mum da' nday kədan handay ke kə rumu."

²¹Swə la' in ne ni: "I kar ri'i! Kris wə tira! Ko in ne ni: I kar ri'i! Mum wə kəna!" I ve dan rum mi.

²²Zə kris mə hay dan kə sum ka' dan mə hay dan də mba. Handay də gi kwa mə ta' kwa kə yew kədan handay vi' sôwâ mənɪ Ifray da' nday, handay la' gak gi si.

- ²³Zə rum, i kaw wa ri, zə na ta' kwa rum daŋ' ne ni copo.
- ²⁴«Ama du bəka rum, kəki boni rum, fəta də faŋ ura', bay cer cu də dəri mi.
- ²⁵Ciciw də njay mbə nya bay gbəgboŋ mə wafray də nyene.
- ²⁶Kəri rum, sôwâ də we Vay sumra' mbə du dləmbur kə gbəgboŋ juk bay kə mbra' ta'a.
- ²⁷Ndəna', mum də sin sum sin Ifray mə wafray wə jijeŋ nya fədi' daŋ' kədan handay bəwa sôwâ mənɪ Ifray da' nday vun ndo' nya hâ vun ndo' nya ga' sini.”
- ²⁸«I wum dan kwata' mənɪ na ta' ne ni kə gu tərumbu. Kəri mənɪ ɓa gu rum təŋ kə kap bay tlap rum təŋ kə lo', hi wə we i vun ndor mbə hərə' si.
- ²⁹Ndəna' ta', kəri mənɪ hi də we kwa mənɪ kuni də mbə gi, i we i mbə rum wə hərə', mum car wə vun vari.
- ³⁰Na in mi ne kəzin', sôwâ mənɪ kə i tam, cu də mar daŋ' dan kwa rum daŋ' mbə gi mi.
- ³¹Wafray kə nya də ndo', ama dan man cu də ndo' kpe mi.”
- ³²«Ama swə ɗaw cu we bəka mbə rum ko ri mbə rum mi. Ko sum sin Ifray mə wafray, ko Vay Ifray cu we mi, say Bəba ɗaw sar we.
- ³³I kaw wa ri, i nde sen mi, zə hi cu we ri mənɪ mum də mbə ndi nə də ke kə ma su mi.
- ³⁴Kwa rum də ke ce' ndə swə mənɪ 'ya rəkwaya: Mum 'ya ar so um, mum ar sin so um wə ɓa sum sin um, swə ɗaw ɗaw daŋ' kə vun sin um, bay mum in ne kə bə ji vun so kədan nə ji kə bayrumu!
- ³⁵Hi ta', i ji kə bayrum, zə hi cu we ri mənɪ bə so də gewa mbə nə mi. Ke məsin mum də mbə kə ɓel, ko kə du dukri, ko kə vun bəka, ko kə bəka su na.
- ³⁶Mum la' gewa mbə bok si, ka nə mbə za' ni wa sen mi.
- ³⁷Dan mənɪ na wə in mi ne, na wə in ne kə sôwâ daŋ'ŋ: I ji kə bayrumu!»

Marc 14

- ¹Bəka gwa' hoɓ kədan cer sôwâ Zuwif mə ɗe kə Pakə kə cer mənɪ sôwâ Zuwif wə gi kə duwa' mə gi dan dlum. Sum rôwâ mə du sum po' fur kə sum pay zu dan dlay keɓ kuni vari kədan handay kaw Zezu hura hura bay um ci.
- ²Zə handay ini: «Namba cu gak um kaw wə du cer mi, namba la' gi ndəna' si, sôwâ də car dana.”
- ³Zezu ke wə so Betani, wə rawti so mgbo' mə ɗe kə Simoŋ. Kəri mənɪ mum suk wə han ti kwati, ma məsin mbə ze ta wa rum kə urdi mə bay mənɪ coɓ rum kəcik mənɪ gi kə wədi kwa mə ɗe kə «nar» kə gula albatrə peɗe. Ta gbol' vun gula bay wu' urdi rum ta wa Zezu.

⁴Sôwâ mäsın du sôwâ mēni gay' wə han ra' bak bay in kuni mbok nji: «Zə mi ta dənok urdi mēni nə su?

⁵Swə gak gi coḅ urdi rum fe səlay pā kis hinji' bay ne səlay rum ne kə sum ca.» Bay handay sed' sə juku.

⁶Ama Zezu la' ne ndaya: «I ar sə 'yeṇ, zə mi hi wə sə sed' su? Ta gi sin mə bay wə zə rini.

⁷Zə hi də ke kə sum ca hay' ri bəka daṇ' bay hi gak gi kwa mə bay tu nday kə ri daṇ' mēni hi wə wa'a. Ama mə na, hi cu də ke kə rin hay' ri bəka daṇ' mi.

⁸Ta gi kwa mēni ta gaka. Na cu mar mətə', ama ta wu' urdi wa rin kədan ta gila' tu rin kə ndi kədan man mo'o.

⁹Na in mi ne kəzin', wə ri daṇ' mēni sôwâ wə də ka' Dan mə Kədam wa nya daṇ', handay də in dan kwa mēni ma rə gi, zə dīk dan kwa gi sa.”

¹⁰Kəri rum, Yudas Iskariyot, mum nə daw du sum ta zə Zezu mə guḅ wa hoḅ, 'ya ta in ne kə sum rôwâ mə du sum po' fur i mum wa' ar Zezu də ba ndaya.

¹¹Handay tuk kədam kə mun dan rum, bay handay kawvun kə rum kədan handay um ne səlaya. Bay Yudas təṇ kə keḅ vari kədan mum ar Zezu də ba ndaya.

¹²Kə cer mēni sôwâ Zuwif wə gi kə duwa' mə gi dan dlum, kə bəka daw rum, bəka mēni sôwâ wə fol daw cime kədan handay gi kwati cer Pakə kə ndi, sum ta zə Zezu ci vun rumu: «Ha wa' i mə də gi kwati cer Pakə wû ne wə ka su?”

¹³Zezu faṇ sin sôwâ hoḅ du sum ta zə rum, bay mum la' ne ndaya: «I də mbok so, bay hi də ndewa kə swə daw mēni cin mbi wa kə dənaya. I ji zu rum,

¹⁴bay wə ri mēni mum də ze də han, i in ne kə bə so rumu: "Bə ta' kwa wə ci vun: Tak i mēni na də gi cer Pakə kə sum ta zə rin han nə ka su?”

¹⁵Bay mum də ta' tak i so mə fray mə təṇ rum mi ne. Tak i rum gila' kə kwa mə bay han daṇ'ṇ. I də gi kwati zə mba wə hana.”

¹⁶Sum ta zə rum 'ya dle, ta day mbok so, bay handay za' kwa daṇ' han ce' ndə mēni Zezu in ne ndaya. Bay handay gi kwati cer Pakə wə hana.

¹⁷Kə bel, Zezu mbə day kə sum ta zə rum mə guḅ wa hobo.

¹⁸Kəri mēni handay gay' wə ti kwati vun tablə, Zezu ini: «Na in mi ne kəzin', swə daw du ri mēni wə ti kwati kə rin də man ar də ba sôwâ.”

¹⁹Handay daṇ' təṇ kə dīk dan, bay handay dle kə ci vun rum daw daw daṇ'ṇ: «Na su? Na su?”

²⁰Zezu dam vun ndaya: «Swə daw du ri, sôwâ mə guḅ wa hoḅ, swə mēni wə no' ba rawti timbi mə daw kə rini.

²¹Vay sumra' wə də mar ce' ndə mēni Derwa Ifray wə in dan wa rum, ama kəcik wa swə mēni də ar Vay sumra' də ba sôwâ! Pram dan vra' bə rumu!”

- ²²Kəri mənı handay wə ti kwati, Zezu tle vun tləpə' fun bay gi soko ne kə Ifraya. Mum fañ jak bay ne kə sum ta zə rumu. Mum la' ne ndaya: «I ve ye, mənı nə tu rin na.»
- ²³Kəki rum, mum tle mbi vra' gu mə də kə «viñə» kə timbi bay gi soko ne kə Ifraya. Mum fañ ne nday, bay handay dañ' ce.
- ²⁴Zezu la' ne ndaya: «Mənı nə vəswə rin, vəswə mənı jeñ dan kawvun, vəswə rum ne zə sôwâ juku.
- ²⁵Na in mi ne kəzin', na cu də ce sum viñə nə za' mi, hâ na də ce mə mbrew rum wə jwə Ifraya.»
- ²⁶Handay fañ dâ nyem mə bur Ifray, bay kəki rum, handay 'ya ta wa igway' mənı gu olivə wə han juku.
- ²⁷Zezu la' ne kə sum ta zə rumu: «Hi dañ' də man ar, zə Dan rum wây' wə du dərwa: Na də ci ji cime, bay cime rum də pla' wa ri dañ'ŋ.
- ²⁸Ama kəki mənı Ifray də man par mbə mar, na də dle də nya Galile cop ri.»
- ²⁹Piyer la' ne numu: «Ko sôwâ məsin dañ' la' ar nu lañ, mə na, na cu də wû ar kpe mi.»
- ³⁰Zezu dām vun rumu: «Na in wû ne kəzin', kə dukri mə tam, cop gulok cu də ge el sem hoḃ mi, ha də in sem hinji' i ha cu we nan mi.»
- ³¹Ama Piyer dām dan rum kə gbəgbəŋo: «Ko na la' də mar kə ru, na cu də in i na cu we nu mi kpe mi!» Bay sum ta zə Zezu məsin dañ' in ndəna' ta'a.
- ³²Kəki rum, handay ta day wə ri mə də kə Getsemane, bay Zezu la' ne kə sum ta zə rumu: «I gay' wə tira, na də in dan kə Ifraya.»
- ³³Mum fañ tle Piyer, kə Zakə, bay Zañ, bay handay 'ya kə rumu. Vunduk təñ kə um par, bay mum dık dana.
- ³⁴Zə rum, mum la' ne ndaya: «Dan dık vunduk rin wə də man ci! I gay' tira, bay i ji.»
- ³⁵Mum ta ta kofo kî, mum kuduk nya bay in dan kə Ifray kə ini: «Vari rum la' kəta' si, a tle ri boni mənı wa rin də rəka.»
- ³⁶Mum fañ ini: «Aba, Bəba, ha gak gi kwa dañ'ŋ. A tle boni mənı na wə də ce nə də rəka! Pâ dañ' rum a gi ce' ndə mənı na wə wa' nə mi, ama a gi ce' ndə mənı ha wə wa'a!»
- ³⁷Mum fañ gewa mbə hay' sum ta zə rum mə hinji' kuni, bay mum za' nday wə nde sene. Mum ci vun Piyer: «Simon, ha wə nde sen su? Ha cu gak ji ko ler dāw mi su?
- ³⁸I ji, bay i o Ifray kədan Satan nə bu ni njay də du kwa mə bro' mi. Vunduk swə wə wa' gi kwa mə bay kəta', ama tu rum tətâ.»
- ³⁹Mum fañ ta ta kofo kî kərem bay mum in dan kə Ifray kə dan mə dāwa.

⁴⁰Mum faɲ gewa mbə hay' sum ta zə rum ɓay za' nday wə nde sen kərem, zə sen mbra' i nday tikiɓi. Handay cu we ɗam dan rum za' mi.

⁴¹Kəri mənɪ mum faɲ gewa mbə hay' nday sem hinji' rum, mum ci vun ndaya: «Hi nde sen, ɓay hi pemây ɓo su? Mə na, ri man ndo' si. I kar ri'i! Ri mənɪ sôwâ də ar Vay sumra' də ɓa sum kwa mə bro' nə mbə si.

⁴²I car ye! I kar ri'i! Swə mənɪ wə də man ar də ɓa sôwâ nə ni na!”

⁴³Kəri mənɪ Zezu wə in dan in ɓo, Yudas mbə daya. Mum nə ɗaw du sum ta zə Zezu mə guɓ wa hoɓ, sum rôwâ mə du sum po' fur kə sum pay zu dan dlay, ɓay sum rôwâ mə du sôwâ Zuwif sin kuni raw sôwâ kə rumu. Handay ra' masəlam kə dliw ɓa ndaya.

⁴⁴Yudas, swə mənɪ wə də ar Zezu də ɓa sôwâ, ta' vari kwa mənɪ mum wə də gi tu Zezu nə ne kə raw sôwâ. «Swə mənɪ na wə də kaw də vunduk ɓay də soɓ kə vun, mum nə swə mənɪ hi wə wa' na. I kaw num, ɓay i ji num kə ɓay rumu!”

⁴⁵Kəri mənɪ Yudas mbə day, kəkor sar mum ta ta hay' Zezu ɓay la' ne numu: «Bə ta' kwa!» Mum faɲ soɓ num kə vunu.

⁴⁶Zə rum, sôwâ kuni car njay wa Zezu ɓay kaw numu.

⁴⁷Ama swə ɗaw du sôwâ mənɪ gay' wə han par masəlam um ɓay tum hum bə sin toɲ po' fur kə ndi.

⁴⁸Zezu ci vun ndaya: «Hi wur mbə kə masəlam kə dliw kədan hi man kaw ce' ndə mənɪ hi wə kaw hura su?

⁴⁹Bəka ɗaɲ' na ke kə ri, ɓay na ta' kwa ne kə sôwâ wə rawti so po' fur sôwâ Zuwif, ɓay hi cu kaw nan mi. Ama kwa rum gi ndəna' kədan nyen mbi dan mənɪ Ɗerwa Ifray ini.”

⁵⁰Kəki rum, sum ta zə Zezu ɗaɲ' ar num ɓay pik ne.

⁵¹Vay jid ɗaw wə ta zə Zezu Kris. Mum kəlew' kudo tu rumu. Sôwâ kaw num,

⁵²ama mum pâ ɓa nday ne kə tu uray, ar kudo wə ɓa ndaya.

⁵³Handay mbə so toɲ po' fur kə Zezu. Sum rôwâ mə du sum po' fur, kə sum rôwâ mə du sôwâ Zuwif, ɓay sum pay zu dan dlay ɗaɲ' ɓa kuni wə hana.

⁵⁴Piyer wə ta kəki Zezu seɲ, ɓay mum ze ta cava so toɲ po' furu. Mum suk han wə dɛ ku kə sum ji vun so.

⁵⁵Sum rôwâ mə du sum po' fur kə sum rôwâ Fada mə Mbri ɗaɲ' keɓ kuni sôwâ mənɪ gak hay dan wa Zezu kədan handay um ci, ama handay cu za' nday mi.

⁵⁶Sôwâ juk mbə kə hay dan cem cem wa Zezu, ama dan in nday cu wanji mi.

⁵⁷Sôwâ məsin car mbə kə hay dan məsin wa rumu.

⁵⁸Handay ini: «Namba mun i mum ini: "Na də bru so po' fur sôwâ Zuwif mənɪ sôwâ ɗam, ɓay du bəka hinji' na də ɗam məsin mənɪ cu də ɗam kə ɓa sumra' mi.”“

⁵⁹Ama ko wa dan mēni nē dan in nday cu wanji mi.

⁶⁰Toŋ po' fur car ca kor sôwâ daŋ' bay ci vun Zezu: «Ha cu dām dan mi su? Sôwâ mēni kuni wē in dan ma wa ru su?»

⁶¹Ama Zezu suk pof, mum cu dām dan mi. Toŋ po' fur nē faŋ ci vun rum kēreme: «Ha Kris, Vay Ifray mēni namba wē um mbra' nē su?»

⁶²Zezu dām vun rumu: «Na nē zēre, bay hi dē we Vay sumra' suk wē ba fun Ifray mē kē gbēgboŋ, hi dē um we gewa mbē du dlēmbur wafray ta'a.»

⁶³Zē rum, toŋ po' fur nē ŋgār mbraw tu rum bay ini: «Namba cu kē mē' sôwâ mē we njeŋ dan rum mēsin za' mi!

⁶⁴Hi mun mum ge dan mē bro' wa Ifraya. Hi dīk ma wa rum su?» Handay daŋ' dām vun rumu: «Dan nē kaw num si, mē ci numu!»

⁶⁵Sôwâ mēsin du nday tēŋ kē tup mē' dē wa Zezu. Handay ku' i rum, bay handay hom ba pum num kē ndi. Handay faŋ la' ne numu: «A ta' swē mēni pum nu na.» Kēki rum, sum ji vun so tle num, bay handay pum num kē ba ta'a.

⁶⁶Kēri mēni Piyer wē nya du cava bo, i sin dāw du sum sin toŋ po' fur mbē daya.

⁶⁷Ta we Piyer suk wē dē ku, ta kar num kpē' bay la' ne numu: «Ha ta', ha kē kē Zezu mē so Nazaret.»

⁶⁸Ama mum riway dan rum kē ini: «Na cu we mi. Na cu wē mun zu dan mēni hēŋ wē in nē mi.» Piyer faŋ 'ya wē cava, ta ze zēba mē rēka wē vun gam, kēri rum sar, gulok ge ele.

⁶⁹Ama i sin rē we num bay dle kē in ne kē sôwâ mēni gay' wē hana: «Swē mē nay' nē wē du sôwâ kuni ta'a!»

⁷⁰Piyer riway dan rum kēreme. Kēki rum kī, sôwâ mēni gay' wē han la' ne numu: «Kēzin', ha wē du sôwâ kuni, zē ha swē nya Galile ta'a.»

⁷¹Zē rum, Piyer tēŋ kē sur vun: «Ifraŋ nē ci nan, na la' hay dan si na. Na in mi ne kēzin' kor Ifraya: Na cu we swē mēni hi wē in dan wa rum nē mi!»

⁷²Kēri rum sar, gulok ge el sem hoḅ rum, bay Piyer dla' wa dan mēni Zezu kē in ne numu: «Gulok cu dē ge el sem hoḅ mi, ha dē in sem hinji' i ha cu we nan mi.» Bay mum pâ ga'ri dle kē ci'i.

Marc 15

¹Kē bēka ced', sum rôwâ mē du sum po' fur ba nji kē sum rôwâ mē du sôwâ Zuwif, kē sum pay zu dan dlay, bay sum rôwâ Fada mē Mbri daŋ' kēdan handay kar kwa mēni handay dē gi kē Zezu. Handay baŋ Zezu bay ta ar num ne kē toŋ nya Zude mē dē kē Pilatē.

²Pilatē ci vun Zezu: «Ha nē jwē sôwâ Zuwif su?» Zezu dām vun rumu: «Ha kē mēni wē ini.»

- ³Sum rôwâ mə du sum po' fur mbə tum sem Zezu kə dan cem ceme.
- ⁴Pilatə ci vun rum kəreme: «Ha cu dām dan mi su? Ha cu mun mēni handay wə tum sem ru kə dan cem cem nə mi su?»
- ⁵Ama Zezu cu dām dan vun Pilatə za' mi. Dan rum jin' wa ne kə Pilatə.
- ⁶Kə cer Pakə daŋ', Pilatə wə ar daŋgay' mēni sôwâ ci vun rum kə ndi dāw nday ne.
- ⁷Kəri rum, swə mə də kə Barabas wə so daŋgay' kə sôwâ mēni wə car dan, zə handay ci swə mēsin kəri mēni handay wə car dana.
- ⁸Raw sôwâ ba mbə so Pilatə, bay handay təŋ kə um la' ne i nə gi kwa mēni mum wə gi ba' kə cer nə zə ndaya.
- ⁹Pilatə dām ci vun ndaya: «Hi wa' i a ar jwə sôwâ Zuwif ne ni su?»
- ¹⁰Zə mum we si njeŋ sum rôwâ mə du sum po' fur ar Zezu ta ba rum zə handay kə sây' kə rumu.
- ¹¹Ama sum rôwâ mə du sum po' fur bu zu raw sôwâ kədan handay ci vun Pilatə kədan mum ar Barabas nday ne zawa.
- ¹²Pilatə ci vun raw sôwâ kəreme: «Hi wa' i a gi mi kə swə mēni hi um də kə jwə sôwâ Zuwif nə su?»
- ¹³Handay faŋ dām vun rum kə do dana: «Gay' num də wa gu!»
- ¹⁴Pilatə faŋ ci vun nday kəreme: «Mum gi kwa mə bro' mi su?» Ama handay do dan kə gbəgboŋ pâ mə vun kofo: «Gay' num də wa gu gay'i!»
- ¹⁵Pilatə wa' gi kwa mə kədam tu raw sôwâ, bay mum ar Barabas ne nday, bay kəki mēni handay pe Zezu kə ləva, mum ar num ta ba soje kədan handay um gay' də wa gu.
- ¹⁶Soje kuni mbə kə Zezu du cava təŋ nya Zude, bay handay faŋ də kam kul soje mə raw daŋ'ŋ.
- ¹⁷Handay ge mbraw mə mbri mə tlew ne numu. Handay ci pəlay wa kə n̄ây' bay no' ta ne num wa.
- ¹⁸Handay faŋ təŋ kə kaw jeḃ rum kə ini: «Heḃ ke kə ru, jwə sôwâ Zuwif!»
- ¹⁹Handay pum wa ne num kə dliw, bay handay tup mē' ta wa rum, bay handay faŋ kuduk nya kə vun cingit kor rum kədan handay um buru.
- ²⁰Kəri mēni handay ndo' vun um ru si, handay kərut mbraw mə tlew nə mbə tu rum bay faŋ ge mbraw mə mum ne numu. Kəki rum, handay pâ ta rəka kə rum kədan handay um gay' də wa gu gay'i.
- ²¹Swə nya Siren mə də kə Simon car sine mbə pâ wə han, mum nə ba Alezaŋdrə kə Rufus. Soje kuni kaw num kə bak tle gu gay' Zezu.
- ²²Handay 'ya kə Zezu ta wə ri mə də kə Golgata, mēni wa' dan in kə vun mba: «Ri so wa».

²³Handay ne num mbi vra' gu mə də kə «viŋə» məni tɬum kə mbir gu mə də kə «mirə», ama Zezu cu ve mi.

²⁴Kəki rum, handay gay' num ta wa gu, handay faŋ ɬul mbraw um mbok nday kə pum parwa kədan handay kar sa də fe mbraw mə ka kə ndi su na.

²⁵Handay gay' num ta wa gu kə fəta bəka.

²⁶Handay wây' dan mə bro' məni handay bok wa rum mə ni na: «Jwə sôwâ Zuwif» wa kwa wây' kwa.

²⁷Handay gay' hura hoɓ wa gu hay' rum, daw ɓa fun, ɓay məsin ɓa guru.

[²⁸Kwa məni nə mbə gi kədan nyen mbi dan məni Derwa Ifray ini: «Handay in num wə du sum gi kwa mə bro'o.»]

²⁹Sôwâ məni wə pā han tumwa ɓay um i kə ini: «Ahâ! Ha swə məni in i ha də bru so po' fur sôwâ Zuwif ɓay dam məsin du bəka hinji',

³⁰a sid' tu ru kə dam mbə wa gu nə ye!”

³¹Ndəna' ta' sum rôwâ mə du sum po' fur kə sum pay zu dan dlay ru kuni Zezu, ɓay in dan kə nji mbok nji: «Mum sid' sôwâ məsin si, ama mum cu gak sid' tu rum mi.

³²Namba la' we Kris, jwə sôwâ Israyel, dam mbə wa gu mgbaŋ ni nə si, namba də um ve!» Hura hoɓ məni sôwâ gay' nday hay' Zezu i num ta'a.

³³Kə fəta du wa, ri mə ura' mbə kəmbo' nya daŋ' hâ fəta riya.

³⁴Kə fəta riya, Zezu ka' dan kə gbəgboŋo: «Eloy, Eloy, lema sabaktani?» Məni wa' dan ini: «Ifraŋ man, Ifraŋ man, zə mi ha ar nan su?”

³⁵Sôwâ məsin du sôwâ məni gay' wə han mun dan rum ɓay ini: «I mun ri'i! Mum wə də Eliya.”

³⁶Swə daw du nday ne ta tle kwa məni ra' nji kə soso ɓay no' ta wə mbi kwa cumok, mum jew ta vun dliw ɓay sa ne kə Zezu kədan mum soɓo. Swə nə ini: «I ar 'yeŋ ri', namba də kar ke məsin Eliya də mbə kədan mum um tle mbə wa gu nə su na.”

³⁷Ama Zezu ka' dan kə gbəgboŋ, ɓay mum mara.

³⁸Zim məni hay tak i so po' fur sôwâ Zuwif ŋgâr du hoɓ daka fraŋ hâ nya.

³⁹Toŋ kul soje mə nya Romə məni car kor Zezu we num mar ndəna', ɓay mum ini: «Swə məni nə Vay Ifraŋ kəzini!”

⁴⁰Rawkwa məni gay' kə hay' ca' wə kar ri də han ɓay wə du nday: Mari mə so Magdala, kə Salome, ɓay Mari mə ya Zakə mə nyêw kə Zoze.

⁴¹Handay ke ta zə Zezu kə gi sin zə rum kə ri məni mum ke wə nya Galile. Rawkwa məsin juk məni mbə kə rum wə so Jeruzalem gay' wə han ta'a.

⁴²Riya gi si ɓay fəta rum, fəta gila' tu zə fəta pemây sôwâ Zuwif məni wə də mbə siw rumu.

⁴³Zozef mə so Arimate mbə day, mum nə swə mə kə mbra' mə du sum rôwâ Fada mə Mbri, bay mum swə mənî wə ji ri mənî Ifray wə də suk jwə wa sôwâ um ta'a. Mum jeŋ vunduk ŋgədiŋ' bay ta so Pilatə kədan mum o mar Zezu ba rumu.

⁴⁴Ama kəri mənî Pilatə mun i Zezu mar si, dan rum jin' wa ne numu. Mum faŋ də toŋ kul soje bay ci vun rum i Zezu mar suk si su?

⁴⁵Kəki mənî toŋ kul soje nə dām vun rum, Pilatə ne vari kə Zozef kədan nə tle mar Zezu.

⁴⁶Zozef faŋ coḃ zim siliki mə bu bay mum ulay' mar Zezu mbə wa gu, ku' kə zim na. Mum no' num ta zra mənî handay dla wə pra bay kəki rum mum buru gway' mə toŋ ta' vun zra rum kə ndi.

⁴⁷Mari mə so Magdala kə Mari mə ya Zoze kar ri mənî handay no' num hana.

Marc 16

¹Kəri mənî fəta pemây sôwâ Zuwif pâ si, Mari mə so Magdala, kə Salome bay Mari mə ya Zakə coḃ kuni urdi kədan handay wu' wa mar Zezu.

²Fəta pemây, kə bəka ced, handay wə də ri mənî handay no' mar Zezu wə hana.

³Kəri mənî handay wə vari ɓo, handay ci vun mbok nji: «Sa nə də buru gway' mə vun zra mar mba ne də rəka su?»

⁴Ama kəri mənî handay tle i kar ri, handay we gway' mə toŋ nə buru ta kə hay'i.

⁵Zə rum, handay cok ta rawti zra mar, bay handay za' vay jid' mənî ge mbraw mə bu suk han ga' ba funu. Kwa rum gi wəlok ne nday juku.

⁶Ama mum la' ne ndaya: «I ne wəlok mi. Hi wə keḃ Zezu mə so Nazaret, mənî handay ke gay' num wa gu gay'i: Mum cu ti za' mi. Ifray par num mbə mar si. I kar ri', ri mənî handay ke no' num han nə ni na.

⁷I də ye, bay i də in ne kə sum ta zə rum məsin bay kə Piyer: "Mum dle də nya Galile cop ri. Hi də um we wə han, ce' ndə mənî mum ke in ne ni."«

⁸Kəri mənî handay mun dan in Zezu, tu nday par nyen kə ne wəlok, handay wur mbə zra rum, pik ne dle seŋe. Zə handay ne wəlok juk, handay cu in dan rum ne kə swə dāw mi.

[⁹Fəta pemây kə bəka ced, Ifray par Zezu mbə mara. Kəki rum, mum ta' tu rum ne kə Mari mə so Magdala copo. Ta ma mətî Zezu ke 'way gam sedā' wa sə ra.]

¹⁰Ta 'ya ta in dan rum ne kə sôwâ mənî ke kə Zezu, mənî gay' wə dik dan kə ci'i.

¹¹Ama kəri mənî handay mun i ta in i Zezu kəta' kə i, bay i ta we num si, handay cu ve dan sə mi.

¹²Kəki rum, Zezu ta' tu rum kə vari məsin ne kə sum ta zə rum mə hoḃ wə vari mə də so mə rəka.

¹³Handay faɲ gewa mbə in dan rum ne kə sum ta zə rum məsin, ama handay cu ve dan nday mətə'a.

¹⁴Ndo' vun rum, Zezu ta' tu rum ne kə sum ta zə rum mə guɓ wa dāw, kəri məni handay wə ti kwati. Mum mgbor nday zə handay ve num kî, zə wa nday bokrok, bay zə handay cu ve dan sôwâ məsin məni in i handay we num kəta' kə i si nə mi.

¹⁵Bay mum faɲ la' ne ndaya: «I də wə nya daɲ', i də ka' Dan mə Kədam ne kə sôwâ daɲ'ɲ.

¹⁶Swə məni də ve dan rum bay də ve baptem, mum də fe sid, ama swə məni la' cu ve dan rum mi si, dan bok də ke wa bə rumu.

¹⁷Na də ne gbəgboɲ ne kə sôwâ məni ve dan man kədan handay gi yew məni kuna: Kə semde rin, handay də 'way gam, bay handay də dan vun mə mbrew,

¹⁸ko handay la' ra' wu' kə ba, ko handay la' ce kwa mar tu, kwa rum cu də gi kwa məsin tu nday mi. Handay də njay ba wa sum gaɓ, bay sum gaɓ də cara.”

¹⁹Kəki məni Bârî Zezu in dan ne nday ndəna', Ifray tle num ta wafray, bay mum ta suk ba fun Ifraya.

²⁰Sum ta zə rum dle kə ka' Dan mə Kədam wə nya daɲ'ɲ: Bârî gi sin kə nday bay jeɲ dan ka' nday kə yew cem cem məni handay wə gi.

Luc

Luc 1

- ¹Sôwâ juk tuk wây' dan kwa mēni gi wə du mba.
- ²Handay wây' dan kwa mēni namba mun wə hay' sôwâ mēni we kwa rum kə i nday daka tən̄ zu rumu. Ifray da' nday kədan handay faŋ sum sin umu.
- ³Bay mgbaŋ ni nə, na ta', na keɓ zu dan rum njeŋ daka tən̄ zu rum, bay na kar bay kədan na wû wây' dan rum ne kə vari, Teyofil, swə mə baya.
- ⁴Na gi ndəna' kədan ha gak we njeŋ dan kwa mēni sôwâ mēsin ta' ne nu na.
- ⁵Kəri mēni Herodə suk jwə nya Zude, bə po' fur mēsin kəta' dē kə Zakariya, mum wə du kul sum po' fur mə Abiya. Ma rum dē kə Elizabet, ta zu tlor bə po' fur mə dē kə Aron.
- ⁶Handay hoɓ jak njeŋ kor Ifray, bay handay wə mun vun dan dlay Bârî daŋ' kə ta zə rum njeŋ ta'a.
- ⁷Ama handay cu kə vay mi, zə Elizabet ca lər si, bay handay hoɓ jak kəsa' si.
- ⁸Fəta mēsin, Zakariya wə po' fur kor Ifray, zə ri sin mə kul mə mum mbə day si.
- ⁹Ce' ndə mēni vun fur sum po' fur wə gi, handay par num kə vari parwa kədan mum ze də rawti so po' fur Bârî bay ge ku kwa mə sî ndə urdi wə hana.
- ¹⁰Kəri mēni mum wə ge ku kwa mə sî ndə urdi, sôwâ Ifray daŋ' gay' rəka wə in dan kə Ifraya.
- ¹¹Kəri rum, vay sin Bârî mə wafray mbə hay' Zakariya. Mum mbə car ga' ba fun ri po' fur mēni handay wə ge ku kwa mə sî ndə urdi.
- ¹²Kəri mēni Zakariya we num, vunduk par num, bay wəlok gi num juku.
- ¹³Ama vay sin Ifray mə wafray nə la' ne numu: «A ne wəlok mi, Zakariya, zə Ifray mun kwa o wû si. Ma ru, Elizabet də vra' vay mə nji wû ne bay a də dē num kə Zaŋ.
- ¹⁴Ha də tuk kədam juk, bay sôwâ juk də tuk kədam kə vra' umu.
- ¹⁵Zə mum də ke swə mə tən̄ kor Bârî. Mum cu də ce sum viŋə ko kwace mēsin mēni wə gi tu gi mi. Mum də nyen kə Simbed mə Kəleŋ daka rawti ya umu.
- ¹⁶Mum də gi sôwâ Israyel juk faŋ mbə hay' Bârî Ifray ndaya.
- ¹⁷Mum kə tu rum də ta kofo Ifray kə Simbed kə gbəgboŋ wanji daw kə bə ka' dan mə dē kə Eliya. Mum də cin heɓ mbok ba daw kə daw ndaya. Mum də gi sôwâ mə faŋ sôwâ mēni wə gi wa bokrok dik dan ce' ndə sôwâ mə njeŋ wə diki. Mum də gila' vunduk sôwâ zə mbə Bârî.”
- ¹⁸Ama Zakariya ci vun vay sin Ifray mə wafray na: «Na də we i dan mēni nə dan mə kəzin' ma su? Na kəsa' si, bay ma rin gi kim raw si ta'a.”

- ¹⁹Bay vay sin Ifray mə wafray nə dām vun rumu: «Na Gabriyel. Na wə car kor Ifray kə gi sin umu. Mum sin nan kədan na ge dan kə ru bay wū ne dan mə kədam mənə na.
- ²⁰Ama zə ha cu ve dan man mənə wə də gi kəzin' kəri rum nə mi, ha də faŋ ndum, bay ha cu gak də ge dan mi, hā bəka kwa mənə na in ne nu də gi.”
- ²¹Kəri rum, sôwâ mənə gay' rəka wə in dan kə Ifray wə ji Zakariya, bay handay təŋ kə dīk dana: «Zə mi mum suk hā wə rawti so po' fur su?”
- ²²Ama kəri mənə mum pā mbə rəka, mum cu gak ge dan kə nday mi, bay handay dīk i mum we kwa wə rawti so po' furu. Mum in dan ne nday kə ba, zə mum cu gak dan mi.
- ²³Kəri mənə sin um ndo' si, mum 'ya vari so umu.
- ²⁴Kəki rum kî, ma rum, Elizabet, dūm ur, bay ta pe' dan rum hā cer vatla. Ta ini:
- ²⁵«Bârî gi kwa mənə nə zə rini. Mum gi ndəna' kəri mənə mum tle i kar nan kədan mum man ulay' mbə du dan mə zur man mənə wə kor sôwâ.”
- ²⁶Du cer kanki' rum, Ifray sin vay sin um mə wafray mə də kə Gabriyel wə so Nazaret nya Galile,
- ²⁷hay' way mə də kə Mari. Ta nja swə mə də kə Zozef, vay rawti David.
- ²⁸Vay sin Ifray mə wafray nə ze ta hay' sə bay la' ne sa: «Na kaw jeḅ riŋ, həŋ mətī Ifray ne naŋ bay umu. Bârî kəta' kə riŋi.”
- ²⁹Kwa rum jin' wa ne kə Mari, bay ta ci vun wə vunduk sa: «Dan kaw jeḅ mənə nə wa' ta' mi su?”
- ³⁰Vay sin Ifray mə wafray nə la' ne sa: «Əŋ ne wəlok mi, Mari, zə Ifray gi bay um hay' riŋi.
- ³¹Həŋ də dūm ur bay də vra' vay mə nji, bay əŋ də də num kə Zezu.
- ³²Mum də ke toŋ, bay sôwâ də um də kə Vay Swə mə Wafraya. Bârî Ifray də um ne jwə ba mbri um David,
- ³³bay mum də suk jwə wa sôwâ Israyel də hā, jwə um cu də ndo' vun kpe mi.”
- ³⁴Mari la' ne kə vay sin Ifray mə wafray na: «Kwa rum gak də gi ndəna' ma su zə na cu we səmanji ta' mi?”
- ³⁵Vay sin Ifray mə wafray nə dām vun sa: «Simbed' mə Kələŋ də mbə wa riŋ, bay gbəgboŋ Swə mə Wafray də maŋ kəmbo' ce' ndə njəḅo. Zə rum, sôwâ də də vay mənə həŋ wə də vra' nə də ke Kələŋ, bay handay də um də kə Vay Ifraya.
- ³⁶Ibray maŋ, Elizabet, mətī gi kim raw si, ta dūm ur vay mə nji. Sôwâ wə in i ta cu gak vra' vay za' mi, ama mgbaŋ ni nə ta kə ur cer kanki'i.
- ³⁷Zə Ifray gak gi kwa daŋ'ŋ.”
- ³⁸Zə rum Mari ini: «Na nə bek Bârî na. Na wa' i kwa rum mbə gi wa rin ce' ndə mənə ha ini.» Bay vay sin Ifray mə wafray nə 'ya ar sa.

- ³⁹Kəki rum kî, Mari 'ya tle vari mə də so məni wə du gway' nya Zude kə dəma.
- ⁴⁰Ta ze ta so Zakariya bay kaw jeḅ Elizabet.
- ⁴¹Kəri məni Elizabet mun wor kaw jeḅ Mari, vay məni wə rawti sə nyen tu, bay Simbedmə Kələḅ dam mbə wa sa.
- ⁴²Elizabet tle wor ta fray ini: «Ifray kuswa' naḅ pā rawkwa daḅ', bay kuswa' um suk wa vay məni həḅ wə də vra'a!
- ⁴³Na nə sa, kədan ya Bârî mbə so man nə su?
- ⁴⁴Əḅ kar ri'i! Kəri məni na mun wor kaw jeḅ maḅ, vay məni wə rawti rin nyen tu kə tuk kəḁama!
- ⁴⁵Dan rum kəḁam hay' riḅ, zə həḅ ve dan məni Bârî in ne naḅ wə də gi ndə na'a!"
- ⁴⁶Mari faḅ ini: «Vunduk rin wə mbâ Bârî,
- ⁴⁷bay jeke tu rin tuk kəḁam zə Ifray, Bə Sid' mana.
- ⁴⁸Zə mum we ca məni i bek um wə ta' na. Daka mgbaḅ ni nə sôwâ daḅ' wə də man dē kə ma mə tuk kəḁam,
- ⁴⁹zə Ifray mə kə gbəgbəḅ daḅ' nə gi kwa mə toḅ hay' rini: Semdē rum kələḅe.
- ⁵⁰Mum we ca wa sôwâ məni wə ne wəlok um daka zə bâḅ buwa kə buwa də hâ.
- ⁵¹Mum gi sin mə toḅ kə gbəgbəḅ ba rum, bay mum pla' wa sôwâ məni wə mbra' tu wə vunduk nday ta rəka.
- ⁵²Mum pla' sum jwə wa kwasuk nday njay ta nya, bay mum faḅ mbra' sum ca.
- ⁵³Mum ndak sôwâ məni kə mē' kə kwa mə bay, bay mum 'way sum ndak pik kə ba uraya.
- ⁵⁴Mum mbə jin sôwâ Israyel, sum sin umu. Mum dîk dan we ca um
- ⁵⁵hay' Abraham kə daw rawti rum də hâ nə mi. Mum gi ndəna' zə mum kawvun wa rum kə ba mbri ramba."
- ⁵⁶Mari suk kə Elizabet gi kwa mə cer hinji', bay ta faḅ ta so sa.
- ⁵⁷Ri vra' Elizabet mbə day, bay ta vra' vay mə nji.
- ⁵⁸Jik Elizabet kə bray sə mun kuni i Bârî ta' we ca um mə mbri hay' sə, bay handay tuk kəḁam kə sa.
- ⁵⁹Kəri məni vay nə gi bəka coho', handay mbə kədan handay tagura rumu. Handay wa' kədan handay cin sem rum dē kə sem ba um, Zakariya.
- ⁶⁰Ama ya um ḁam vun ndaya: «Cu ndəna' mi, namba dē num kə Zaḅ."
- ⁶¹Handay faḅ la' ne sa: «Ama swə ḁaw du bray maḅ mə kə semdē məni nə cu mi."

- ⁶²Handay faŋ ci vun ba vay kə ɓa kədan handay we mum wa' kədan mum ɗe sem vay nə ma su?
- ⁶³Zakariya o kwa wây' kwa, ɓay mum wây'i: «Sem rum ɗe kə Zaŋ.» Kwa rum jin' wa ne nday ɗaŋ'ŋ.
- ⁶⁴Kəkor sar, Zakariya təŋ kə dan kəreme. Mum tle wor ta fray kə bur Ifraya.
- ⁶⁵Zə rum, wəlok gi jik um ɗaŋ' juk, ɓay sôwâ pla' dan kwa rum wə so mə du gway' nya Zude ɗaŋ'ŋ.
- ⁶⁶Sôwâ ɗaŋ' mənɪ mun dan rum təŋ kə ɗik dan wə vunduk nday, ɓay handay ci vunɪ: «Vay mənɪ nə wə ɗə ke mə ma su?» Zə gbəgbəŋ Bârî kəta' kə rumu.
- ⁶⁷Simbeɗ mə Kələŋ dam mbə wa Zakariya, ba vay nə, ɓay mum təŋ kə ka' dan kə ini:
- ⁶⁸«Mə ɗə bur Bârî, Ifray sôwâ Israyel, zə mum mbə du sôwâ um ɓay tumwa ndaya.
- ⁶⁹Mum ne Bə Sid' mə gbəgbəŋ ne mba. Mum nə vay rawti jwə David, bə sin umu.
- ⁷⁰Mum ka' dan wa rum ɓa' si kə vun sum ka' dan mə kələŋ umu.
- ⁷¹Mum kawvun i mum ɗə mba ulay' ɓa sôwâ mənɪ wə zi kə mba, ɓay du gbəgbəŋ sôwâ mənɪ wə mba sî.
- ⁷²Mum ta' we ca um wa bambi ramba, ɓay mum dla' wa dan kawvun um mə kələŋe.
- ⁷³Zə Ifray sur vun ne kə bambi ramba, Abraham,
- ⁷⁴kədan mum mba ulay' du gbəgbəŋ sôwâ mənɪ wə mba sî, ɓay mba ne vari kədan namba gi sin zə rum dan wəloko.
- ⁷⁵Kədan namba ke kələŋ ɓay njeŋ kor rum bəka ɗaŋ' mənɪ namba ɗə ke kə i wa nya.
- ⁷⁶Bay ha, vay man, sôwâ ɗə wû ɗe kə bə ka' dan Ifray mə wafraya. Zə ha ɗə ta kofo Bârî kədan ha gila' vari um,
- ⁷⁷ɓay kədan ha ta' ne kə sôwâ um i Ifray ɗə nday sid' kə vrum kwa mə bro' ndaya.
- ⁷⁸Zə vunduk Ifray mba nyen peɗ' kə we ca. Mum ɗə gi ri mə ɓu daka wafray ɗeri mbə wa mba ce' ndə mənɪ fəta wə dam zu,
- ⁷⁹kədan ri mə ɓu rum ɗeri wa sôwâ mənɪ gay' wə ri mə ura' ɓay wə zə njəbo mara, kədan mum ɗə ta' vari mə ɗə ri heɓ mba ne.”
- ⁸⁰Vay nə mbud', ɓay vunduk um jeŋ kə ɗik dan mə ɓay ta'a. Mum suk wə gop hâ day bəka mənɪ mum ta' tu rum kor sôwâ Israyel.

Luc 2

- ¹Kəri rum, jwə mə mbri mə nya Romə mə ɗe kə Ogustə ne dan dlay mənɪ na: «Say sôwâ nya Romə ɗaŋ' wây' semɗe nday ɗə wə ɗerwa.”
- ²Mum nə dan wây' tu mə vun kofo mənɪ gi kəri mənɪ Kiriniyus suk toŋ wa nya Siri.

- ³Sôwâ daŋ' ta wây' semdê nday, sasu daŋ' wə ri vra' umu.
- ⁴Zozef car mbə so Nazaret nya Galile kədan mum də so mə dē kə Betlehem nya Zude, wə ri mēni jwə David vra' wə han, zə mum vay rawti David na.
- ⁵Mum ta han kədan mum wây' semdê rum kə nja um Mari mēni ne ur si.
- ⁶Kəri mēni handay wə han ɓo, ri vra' sə mbə daya.
- ⁷Ta vra' vay mə nji vun kofo, ta ku' num kə zim ɓay ge num wə ri njay vok nda', zə ri bar cu zə nday wə so dam rəkway mi.
- ⁸Wə nya rum daw ji cime kəta' gay' rəka wə ji kul cime nday kə dukri.
- ⁹Vay sin Bârî mə wafray dam mbə hay' nday ɓay mbra' Bârî dēri mbə wa ndaya. Kwa rum gi wəlok ne nday juku.
- ¹⁰Ama vay sin Ifray mə wafray nə la' ne ndaya: «I ne wəlok mi, zə na mbə ni kə dan mə kədam mēni də gi sôwâ daŋ' tuk kəɗama.
- ¹¹Kə dukri mə tam nə, Bə Sid' vra' zə ri wə so David. Mum nə Kris, Bârî na.
- ¹²Bay kwa mēni wə də ta' kwa rum mi ne nə ni na: Hi də za' vay gule ku' kə zim ɓay ge wə ri kwa njay vok nda'a."»
- ¹³Kəkor sar, sum sin Ifray mə wafray raw car mbə wafray mbə ɓa nji kə vay sin Ifray mə wafray na. Handay təŋ kə bur Ifray kə ini:
- ¹⁴«Mbraz' hay' Ifray mə wafray, ɓay heɓ du sôwâ mēni mum wə bə wa nya!"»
- ¹⁵Kəri mēni sum sin Ifray mə wafray kuni 'ya faŋ ta wafray, daw ji cime in dan kə nji mbok nji: «Mə də so Betlehem kədan mə də kar kwa mēni gi wə han, kwa mēni Bârî ta' ne mba."»
- ¹⁶Handay 'ya kə dēma ta han, ɓay handay ta za' Mari kə Zozef ɓay vay gule mēni ge wə ri kwa njay vok nda'a.
- ¹⁷Kəri mēni handay we vay nə, handay təŋ kə pla' dan mēni vay sin Ifray in ne nday wa vay nə ne kə sôwâ.
- ¹⁸Dan rum jin' wa ne kə sôwâ daŋ' mēni mun dan mēni daw ji cime in ne ndaya.
- ¹⁹Ama Mari kaw dan rum daŋ' wə wa sə, kə dīk dan wa rum wə vunduk sa.
- ²⁰Kəki rum, daw ji cime faŋ 'ya, handay təŋ kə gi mbra' ne kə Ifray ɓay um bur zə dan kwa daŋ' mēni handay mun ɓay we, zə kwa rum daŋ' gi ce' ndə mēni vay sin Ifray nə in ne ndaya.
- ²¹Kəki bəka coho' gi, kəri mēni handay tagura vay nə, handay cin sem rum dē kə Zezu. Mum nə sem mēni vay sin Ifray mə wafray ta' ne kə ya um cop ka ta cu ɓabo dūm ur mət'o.
- ²²Kəri mēni bəka no' sem mbi mēni Moyizə ne dan dlay wa rum mbə day, Zozef kə Mari mbə kə vay nday wə so Jeruzalem kədan handay ta' ne kə Bârî,

- ²³zə dan dlay Bârî wə ini: Daw njiwkwa daŋ' mənî vra' vun kofo də ke mə Bârî.
- ²⁴Handay wə po' fur kə kuruk mə so hoɓ ko daw kuruk mə gop hoɓ ce' ndə mənî dan dlay Bârî ini.
- ²⁵Swə məsin kəta' wə so Jeruzalem də kə Simeyɔŋ. Mum swə mə njeŋe. Mum wə ô Ifray, bay wə ji swə mənî wə də mbə kədan mum sid' sôwâ Israyel. Simbed' kələŋ kəta' kə Simeyɔŋ.
- ²⁶Mum ta' ne num kə Simbed' mə Kələŋ i mum cu də mar cop dan we Kris mənî Bârî də sin nə mi.
- ²⁷Simbed' Ifray ta' num kədan mum də so po' fur sôwâ Zuwif. Kəri mənî ba Zezu kə ya um mbə kə vay nday kədan handay də gi kə rum ce' ndə mənî dan dlay in,
- ²⁸Simeyɔŋ tle num wə ba bay gi soko ne kə Ifray kə ini:
- ²⁹«Bârî, dan ge wû nə gi si, bay mgbaŋ ni nə ha gak ar bə sin wû də heɓe.
- ³⁰Zə i rin we sid' wû si,
- ³¹sid' mənî ha gi wə kor sôwâ daŋ'ŋ.
- ³²Mum nə ri mə bu mənî wə də ta' vari wû ne kə sôwâ mənî cu zə saŋ sôwâ Zuwif mi, bay də ne mbra' ne kə sôwâ wû, Israyel.”
- ³³Dan mənî Simeyɔŋ in wa vay nə jin' wa ne kə ba Zezu kə ya umu.
- ³⁴Simeyɔŋ kuswa' nday bay la' ne kə Mari, ya Zezu: «Ōŋ kar, Ifray par vay mənî nə kədan sôwâ Israyel juk də vi' bay sôwâ Israyel məsin də sidî. Mum də ke ce' ndə kwata' Ifray mənî sôwâ də vad'
- ³⁵bay ndəna' dan dîk vunduk sôwâ juk də wur də rəka. Bay dan dîk də kap vunduk riŋ ce' ndə ciwi.”
- ³⁶I ka' dan kəta' wə han sə də kə Hana, vay swə mə də kə Fanuyel mənî wə du bray Aser. Ta kətok si. Kəri mənî ta ke way, ta cin nji bay suk kə rum kim sedâ' sar,
- ³⁷kəki mar nji sə, ta suk rənda hâ kim sə day gucoho' wa fədi'i. Ta cu ar so po' fur sôwâ Zuwif kpe mi. Ta wə gi sin zə Ifray wə han fəta kə dukri daŋ'ŋ. Ta wə saŋ kwa bay in dan kə Ifray ta'a.
- ³⁸Kəri rum, ta mbə day hay' nday bay təŋ kə gi soko ne kə Ifraya. Bay ta təŋ kə in dan wa vay nə ne kə sôwâ daŋ' mənî wə ji i Ifray də tumwa sôwâ so Jeruzalem.
- ³⁹Kəri mənî ba Zezu kə ya um gi kwa mənî dan dlay Bârî in nə ndo' si, handay faŋ ta wə so Nazaret nya Galile kə vay ndaya.
- ⁴⁰Vay nə mbud' bay vunduk um jeŋ kə dîk dan mə bay ta'a. Mum kə gwet, bay kuswa' Ifray kəta' kə rumu.
- ⁴¹Kə kim daŋ', ba Zezu kə ya um wə də so Jeruzalem kədan handay gi cer sôwâ Zuwif mə də kə Pakə wə hana.

- ⁴²Kəri mənı Zezu gi kim guḅ wa hoḅ, handay ta gi cer ce' ndə mənı handay wə gi ɓa'a.
- ⁴³Kəri mənı cer gi ndo' si, handay faŋ 'ya vari so nday, ama vay nday, Zezu, gwa' suk wə so Jeruzalem. Ba um kə ya um cu we dan rum mi.
- ⁴⁴Handay dık i Zezu kəta' wə du sôwâ mənı wə ta vari kə ndaya. Zə rum, handay ta hâ gi bəka dāwa. Handay faŋ təŋ kə um keḅ du bray nday kə bāy ndaya.
- ⁴⁵Ama handay cu za' num mi, zə rum, handay faŋ ta so Jeruzalem kədan handay um keḅ wə hana.
- ⁴⁶Kə bəka hinji' rum, handay za' num wə rawti so po' fur sôwâ Zuwif, mum suk wə du sum ta' kwa Zuwif. Mum wə mun dan ta' nday ɓay wə ci vun nday ta'a.
- ⁴⁷Gwet um kə dan dām um jin' wa ne kə sôwâ daŋ' mənı mun dan umu.
- ⁴⁸Kəri mənı ba um kə ya um we ndəna', kwa rum jin' wa ne nday ɓay ya um la' ne numu: «Vay man, zə mi ha gi mba ndəna' su? Ba wû kə na, namba ke dık dan juk kə wû keḅe.»
- ⁴⁹Mum dām vun ndaya: «Zə mi hi man keḅ su? Hi cu we i say a suk rawti so Ba man nə mi su?»
- ⁵⁰Ama handay cu mun zu dan mənı mum wə nday in ne nə mi.
- ⁵¹Zezu faŋ ta so Nazaret kə ndaya. Mum mun vun ndaya. Ya um kaw dan kwa mənı gi kuni daŋ' wə vunduk sa.
- ⁵²Bay Zezu wə mbud' kə tu ɓay wə jeŋ də kofo kə gwet, ɓay mum wə gi kwa mənı kədam tu Ifray kə sumra'a.

Luc 3

- ¹Kəri mənı jwə mə mbri mə nya Romə mə də kə Tiber suk jwə day kim guḅ wa vatl, kəri rum, Poŋsə Pilatə suk toŋ wa nya Zude, Herodə suk jwə wa nya Galile, njər rum Filip suk jwə wa nya Iture kə nya Trakonitə, ɓay Lizanias suk jwə wa nya Abilen.
- ²Bay Hana kə Kayif, handay sum rôwâ mə du sum po' furu. Kəri rum, dan Ifray mbə wə vunduk Zaŋ, vay Zakariya, wə du gopo.
- ³Zaŋ təŋ kə gaŋ nya daŋ' mənı wə hay' ze Zurdeŋ, mum ka' dan ne kə sôwâ: «I faŋ vunduk ri, ɓay i ve baptem kədan Ifray də vrum kwa mə bro' mi.»
- ⁴Ce' ndə mənı bə ka' dan mə də kə Esaya wây' wə du dərwa umu: Wor swə wə ka' dan du igopo: I gila' vari zə Bârî. I gi vari rum sərəŋ ne numu!
- ⁵Ze daŋ' də njike. Igway' kə dɔl daŋ' də tum faŋ vun nji. Vari mə gəgan də car sərəŋe. Vari mə gəlik gəlik də faŋ fetete.
- ⁶Bay sumra' daŋ' də we sid' Ifraya.
- ⁷Raw sôwâ mbə hay' Zaŋ kədan mum gi baptem nday ne. Mum la' ne ndaya: «Hi zə zep kay', sa ta' ne ni i hi gak sid' wə kor bak Ifray mənı wə də mbə nə su?»

⁸I gi kwa mēni wə ta' i hi faŋ vunduk ri si ɓay i təŋ kə dɪk wə vunduk ri i Abraham nə ba mbri ramba mi. Zə na in mi ne, Ifray gak ra' gway' mēni kuni, ɓay nday gi faŋ daw Abraham!

⁹Ced' cin hère' kədan tum gu wə zu tlor rumu. Gu daŋ' mēni cu vra' vra' mə ɓay mi, sôwâ də tum njay də ku."

¹⁰Raw sôwâ faŋ ci vun Zaŋ: «La' ndəna' si, namba də gi ma su?"

¹¹Mum dām vun ndaya: «Swə mēni kə mbraw hoɓ, say nə par dāw ne kə swə mēni cu kə ndi mi, ɓay swə mēni kə kwati, say nə gi ndəna' ta'a."

¹²Sum ɓawa kwa mbə hay' Zaŋ kədan mum gi baptem nday ne ɓay handay ci vun rumu: «Bə ta' kwa, namba də gi ma su?"

¹³Mum dām vun ndaya: «I ɓawa selay ɓa sôwâ pâ mēni dan dlay ne vari rum nə mi."

¹⁴Soje kuni ci vun rum ta'a: «Bay mə namba, namba də gi ma su?» Mum dām vun ndaya: «I ɓar selay ɓa swə dāw kə gbəgboŋ ko kə hay dan mi, ama i tuk kədam kə selay mēni hi wə fe zə bal cik mi nə sara."

¹⁵Sôwâ wə ji kə mē' wə vunduk nday, ɓay handay daŋ' wə dɪk wə vunduk nday i ke məsin Zaŋ nə Kris su na.

¹⁶Zə rum, Zaŋ la' ne ndaya: «Na wə gi baptem mi ne kə mbi, ama swə məsin mēni pâ nan kə mbra' si, wə də mba. Na cu nde i goɓ kədan na ulay' zew tərak um mi. Mum də gi baptem mi ne kə Simbed' mə Kələŋ ɓay ku.

¹⁷Mum kə kwa sa' u wə ɓa rum kədan mum sa' rəfê də rəka ar u ɓay mum də ra' u njay də zəna, ama mum də ye' rəfê rum kə ku mēni cu mar i kpe mi."

¹⁸Kəri mēni Zaŋ ka' Dan mə Kədam, mum ta' kwa məsin cem cem juk ne kə sôwâ.

¹⁹Ama mum dan jwə Herodə zə mum tle Herodiya, mok njər rum, cin, ɓay zə mum gi kwa mə bro' məsin cem cem juk ta'a.

²⁰Zə dan rum, Herodə faŋ gi kwa mə bro' məsini: Mum kaw Zaŋ ge ta so daŋgay'i.

²¹Kəki mēni sôwâ daŋ' fe baptem si, Zezu fe baptem ta'a. Kəri mēni mum wə in dan kə Ifray, wafray ar vun,

²²ɓay Simbed' mə Kələŋ dam mbə wa rum kə tu ce' ndə kuruk, ɓay wor car mbə wafray ini: «Ha Vay man mēni na ba. Na tuk kədam kə ru."

²³Kəri mēni Zezu təŋ gi sin um, mum kə kim gu hinji'i. Sôwâ daŋ' kar i mum vay Zozef, mēni vay Heli,

²⁴mēni vay Matat, mēni vay Levi, mēni vay Melki, mēni vay Zanay, mēni vay Zozef,

²⁵mēni vay Matatiyas, mēni vay Amos, mēni vay Nahum, mēni vay Esli, mēni vay Nagay,

- ²⁶məni vay Maat, məni vay Matatiyas, məni vay Semeyin, məni vay Zozek, məni vay Zoda,
- ²⁷məni vay Zohanan, məni vay Resa, məni vay Zorobabel, məni vay Salatiyel, məni vay Neri,
- ²⁸məni vay Melki, məni vay Addi, məni vay Kozam, məni vay Elmadam, məni vay Er,
- ²⁹məni vay Zezu, məni vay Eliyezer, məni vay Zorim, məni vay Matat, məni vay Levi,
- ³⁰məni vay Simeyon, məni vay Yuda, məni vay Zozef, məni vay Zonam, məni vay Eliyakim,
- ³¹məni vay Meleya, məni vay Mena, məni vay Matata, məni vay Natan, məni vay David,
- ³²məni vay Jese, məni vay Obed, məni vay Bowaz, məni vay Sala, məni vay Nason,
- ³³məni vay Aminadab, məni vay Admin, məni vay Arni, məni vay Esrom, məni vay Fares, məni vay Yuda,
- ³⁴məni vay Yakub, məni vay Isak, məni vay Abraham, məni vay Tara, məni vay Nakor,
- ³⁵məni vay Seruk, məni vay Rago, məni vay Falek, məni vay Eber, məni vay Sala,
- ³⁶məni vay Kaynam, məni vay Arfasad, məni vay Sem, məni vay Nowe, məni vay Lamek,
- ³⁷məni vay Matusala, məni vay Enok, məni vay Zared, məni vay Malelel, məni vay Kaynam,
- ³⁸məni vay Enos, məni vay Set, məni vay Adam, məni vay Ifraya.

Luc 4

- ¹Kəri məni Zezu car mbə ze Zurdeŋ, Simbed mə Kələŋ nyen vunduk rum ɓay pla' num ta igopo.
- ²Du bəka gufədi' Satan ɓu num wə hana. Wə du bəka rum Zezu cu ti kwati mi. Kəri məni bəka rum ndo' si, mē' ti numu.
- ³Satan la' ne numu: «Ha la' Vay Ifray si, a in ne kə gway' mə tirə tə faŋ kwati ri'i.»
- ⁴Zezu dām vun rumu: «Dan rum wāy' wə du dərwa: Swə cu gak ke kə i zə kwati taw mi.»
- ⁵Satan tle num ta wa igway' mə jərak kə rumu. Wə ri rum sar, Satan ta' jwə nya daŋ' ne num

⁶Bay Satan la' ne numu: «Na dā ne gbəgbonj kə mbra' jwə mənī kuni daŋ' wū ne. Kwa rum daŋ' na fe, bay na gak ne kwa rum ne kə swə mənī na wa'a.

⁷Ha la' kuduk nya kor rin kədan ha man bur si, kwa rum daŋ' dā ke mē ha.”

⁸Zezu dām vun rumu: «Dan rum wāy' wə du dərwa: A bur Bârî, Ifray wū, bay a gi zə rum dāw sara.”

⁹Kəki rum, Satan tle Zezu ta so Jeruzalem kə rumu. Mum cin num ta wa so po' fur sôwâ Zuwif bay la' ne numu: «Ha la' Vay Ifray si, a sa' dam mbə nya ti ri',

¹⁰zə Dan rum wāy' wə du dərwa: Ifray dā in dan ne kə sum sin um mē wafray kədan handay wū ji,

¹¹bay mum wə in ta'a: Handay dā wū tle kə ba nday kədan ha dā dle wa sem wa gway' mi.”

¹²Zezu dām vun rumu: Dan rum wāy' wə du dərwa: «A kənji' Bârî, Ifray wū, mi.”

¹³Kəki mənī Satan ndo' vun bu Zezu kə vari cem cem si, mum 'ya ar num hā kədan mum faŋ gewa fəta məsini.

¹⁴Zezu faŋ ta nya Galile kəreme. Gbəgbonj Simbed' mē Kələŋ nyen vunduk rumu. Sôwâ təŋ kə pla' dan Zezu wə nya rum daŋ'ŋ.

¹⁵Mum ta' kwa wə rawti so Ifray sôwâ Zuwif, bay sôwâ daŋ' gi mbra' ne numu.

¹⁶Zezu ta day so Nazaret, ri mənī mum jeŋ wə hana. Kə fəta pemây sôwâ Zuwif, mum ze ta rawti so Ifray sôwâ Zuwif ce' ndə mənī mum wə gi ba'a. Mum car ca fray kədan mum in Dərwa Ifray,

¹⁷bay swə məsin ne num dərwa bə ka' dan Esaya, mum bur dərwa rum bay za' ri mənī wāy'i:

¹⁸«Simbed' Bârî kəta' wa rin, zə mum par nan kədan na ka' Dan mē Kədam ne kə sum ca. Mum sin nan kədan na ta' dan ulay' ne kə bek, bay dan ar i ne kə dənġara. Kədan na ulay' sôwâ mənī wə ce boni,

¹⁹bay kədan na ka' dan wa kim mənī Bârî wə dā ta' bay um ne kə sôwâ.”

²⁰Zezu faŋ dəlak dərwa ta nji. Mum ne kə bə sin mənī wə gi sin rawti so Ifray sôwâ Zuwif, bay mum faŋ suk ta nya. Sôwâ daŋ' mənī gay' wə rawti so rum ra' i njay ta wa rumu.

²¹Mum təŋ kə in dan nday ne: «Tam, kəri mənī hi mun dan mənī na in wə du dərwa, dan rum gi si.”

²²Sôwâ daŋ' wə ge dan mē bay wa Zezu. Dan mē kədam mənī mum wə ka' nə jin' wa ne nday, bay handay ci vunū: «Mum cu vay Zozef mi su?”

²³Zezu la' ne ndaya: «Kəzin' hi dā in zə vun mbri mənī nə man ne: "Bə waza, a car tu ru ye." Hi dā in man ne ta'a: "Kwa daŋ' mənī namba mun i ha gi wə so Kapernawum, a gi kwa rum wə nya vra' wū bra ye.”“

- ²⁴Mum faŋ in kəreme: «Na in mi ne kəzini: Bə ka' dan cu gak fe mbâ wə nya vra' um mi.
- ²⁵Na in mi ne kəzin', kəri bə ka' dan mə də kə Eliya, rənda kəta' juk wə nya Israyel. Kəri rum, buŋô cu se mi du kim hinji' kə cer kanki', bay mē' mə mbri nde wə wa nya daŋ'ŋ.
- ²⁶Ama Ifray cu sin Eliya wə hay' nday daw mi, ama mum sin num hay' ma rənda məti suk wə so Sarepta, nya Sidoŋ tawa.
- ²⁷Bay kəri bə ka' dan mə də kə Elize, mgbo' kəta' juk wə nya Israyel, ama swə daw du nday cu fe car mi, say Naaman məni suk wə nya Siri tawa.”
- ²⁸Kəri məni sôwâ məni gay' wə rawti so Ifray sôwâ Zuwif mun dan rum ndəna', handay daŋ' ra' baka.
- ²⁹Handay car bay dlam num pâ mbok so nday ta rəka kə rumu. Handay ta kə rum wa dɔl məni handay dam so nday wə han, kədan handay um pla' də nya.
- ³⁰Ama mum pâ wə du nday 'ya dle.
- ³¹Zezu ta so Kapernawum, nya Galile. Kə fəta pemây sôwâ Zuwif, mum ta' kwa ne kə sôwâ məni wə hana.
- ³²Vari kwata' um jin' wa ne nday, zə mum wə ta' kwa ce' ndə swə mə kə gbəgbonjo.
- ³³Swə məsin kəta' wə rawti so Ifray sôwâ Zuwif. Mum nə kə gam wa rumu. Mum təŋ kə ka' dan kə gbəgbonjo:
- ³⁴«Ak ka ka! Ha wa' mi hay' mba su, Zezu mə so Nazaret? Ha mbə kədan ha mba 'way su? Na we nu si: Ha Vay Sin mə Kəleŋ məni Ifray sini!”
- ³⁵Zezu dlay gam nə kə gbəgbonjo: «A seŋ vun bay a pâ mbə wa swə nə si!» Gam nə tle swə nə ge ta nya kor sôwâ daŋ' bay pâ mbə wa rum dan um dənoko.
- ³⁶Kwa rum jin' wa ne kə sôwâ daŋ' məni gay' wə han, bay handay təŋ kə ci vun nji mbok nji: «Dan mi məni nə su! Swə məni nə dlay gam kə gbəgbonj, bay handay wur mbə wa sôwâ.”
- ³⁷Sôwâ pla' dan Zezu wa nya rum daŋ'ŋ.
- ³⁸Zezu pâ mbə rawti so Ifray sôwâ Zuwif bay ta so Simoŋ. Inja Simoŋ kə gaɓ wa, bay handay o Zezu kədan mum sə cara.
- ³⁹Mum goɓ ta wa sə bay dlay gaɓ wa kə gbəgbonj bay gaɓ wa nə so' sa. Kəkor sar, ta car fray bay təŋ kə gi sin zə ndaya.
- ⁴⁰Kə bel, kəki fəta nɔ' wa si, sôwâ ra' sum gaɓ məni wə ta' ca kə gaɓ cem cem mbə hay' Zezu kə ndaya. Mum njay ba wa nday daw daw daŋ' bay car ndaya.
- ⁴¹Gam wur mbə wa sôwâ juk ta', bay handay do dana: «Ha Vay Ifraya!» Ama Zezu dlay nday kə gbəgbonj bay tak nday dan ge dan, zə handay we si: mum nə Kris na.

⁴²Kə bəka ced, Zezu pâ mbə so bay 'ya ta rəka wə ri mə cukudū. Raw sôwâ tən̄ kə keb tan umu. Kəri mən̄i handay za' num, handay cu wa' i mum 'ya ar nday mi.

⁴³Ama Zezu la' ne ndaya: «Say a də ka' Dan mə Kədam mən̄i wə in dan wa jwə Ifray wə ri mən̄sin ta', zə Ifray sin nan kədan na gi ndəna'a.»

⁴⁴Bay mum ka' dan wə rawti so Ifray sôwâ Zuwif mə nya Zude.

Luc 5

¹Fəta mən̄sin, Zezu ta car vun ya mbi Genezaret, bay raw sôwâ dəma mbə red̄ n̄ji hay' rum kədan handay mun dan Ifray.

²Mum we da hoḅ jew wə vun dapa. Sum lam mbi wur mbə rawti da ta rəka wə kol ziw ndaya.

³Zezu ur ta rawti da mən̄sin dāw, bay mum nə mə Simoṇ na. Zezu o num kədan nə jik da vun dapa də du mbi kî, bay Zezu suk ta rawti da bay tən̄ kə ta' kwa ne kə raw sôwâ.

⁴Kəri mən̄i mum ta' kwa ndo' si, mum la' ne kə Simoṇ: «A jik da də du ya mbi, bay ha kə sôwâ mən̄i kə ru, i pik ziw mi kədan i lam mbi.»

⁵Simoṇ dām vun rumu: «Bârî, namba bar dukri ci' kə lam mbi, bay namba cu fe kwa mən̄sin mi! Ama zə ha in ndəna', na də dā ziw rumu.»

⁶Kəri mən̄i handay pik ziw rum, handay ra' keve dle tu si, hâ ziw nday tən̄ kə ṅgâra.

⁷Zə rum, handay dē sum lam mbi mən̄i kə nday wə da mən̄sin kə ba kədan handay mbə kawḅa ndaya. Handay mbə bay ra' keve nyen rawti da hoḅ jak hâ da rum tən̄ kə tuḅ mbi.

⁸Kəri mən̄i Simoṇ Piyer we ndəna', mum kuduk nya kə vun cingit kor Zezu bay la' ne numu: «Bârî, a ar nan ye, zə na swə mə bro'o.»

⁹Kəri mən̄i Simoṇ kə sôwâ mən̄i kə rum we raw keve mən̄i handay ra', kwa rum jin' wa ne nday juku.

¹⁰Kwa rum jin' wa ne kə Zakə kə Zaṇ, daw Zebede, mən̄i ta zə n̄ji kə Simoṇ ta'a. Ama Zezu la' ne kə Simoṇ: «A ne wəlok mi, daka tam ha də faṇ bə keb sumra'a.»

¹¹Handay faṇ dlam da nday ta vun dapa. Handay ar kwa dan' bay ta zə Zezu.

¹²Kəri mən̄i Zezu ta so mən̄sin, mgbo' dāw mbə hay' rumu. Kəri mən̄i mum we Zezu, mum kuduk nya kor rum bay o num ini: «Bârî, ha la' bə si, ha gak man gi faṇ fele.»

¹³Zezu sa ḅa, dāk num kə ndi bay la' ne numu: «Na bə si, a faṇ fel ye», kəkor sar mgbo' 'ya mbə tu rumu.

¹⁴Zezu dlay num kə gbəgbəṇo: «A in dan rum ne kə swə dāw mi, ama a də ta' tu ru ne kə bə po' fur, bay kəki rum, a də po' fur ce' ndə mən̄i Moyizə ne vari rum, kədan a ta' ne kə sôwâ dan' i ha faṇ fel si.»

- ¹⁵Ko kə ndi nə daŋ', dan Zezu pla' ta kofo kofo, bay raw sôwâ ba mbə hay' rum kədan handay mun dan vun rum, bay kədan mum car gaɓ nday ta'a.
- ¹⁶Ama mum pâ du nday ta rəka wə ri mə cukud' kədan mum in dan kə Ifray wə hana.
- ¹⁷Fəta məsin, kəri məni Zezu wə ta' kwa, kul sôwâ Zuwif mə də kə Farisiyen kə sum pay zu dan dlay gay' kuni wə hay' rumu. Handay car mbə so cem cem daŋ' nya Galile kə nya Zude bay so Jeruzalem ta'a. Gbəgboŋ Bârî kəta' kə Zezu kədan mum car gaɓa.
- ¹⁸Sôwâ məsin mbə kə hurbu. Handay tle num wa la' bar um bay handay keɓ vari kədan handay um cin də so kor Zezu.
- ¹⁹Ama handay cu za' vari kədan handay um cin də so mi, zə raw sôwâ məni wə hana. Zə rum, handay ur ta wa so, handay pay ri ar zra rum bay no' hurbu nə kə la' bar um daŋ' ta du sôwâ kor Zezu.
- ²⁰Kəri məni Zezu we i handay ve num, mum la' ne kə hurbu: «Bây man, kwa mə bro' wû vrum si.»
- ²¹Sum pay zu dan dlay kə kul sôwâ Zuwif mə də kə Farisiyen təŋ kə dîk dan kuni wə vunduk ndaya: «Sa nə swə məni wə ge dan mə bro' wa Ifray nə su? Sa nə gak vrum kwa mə bro' su? Say Ifray dāw mba'a!»
- ²²Ama, Zezu we dan dîk vunduk nday, bay mum ci vun ndaya: «Zə mi hi dîk dan ndə ni na' wə vunduk ri su?
- ²³Kədan in ne kə hurbu: "Kwa mə bro' wû vrum si", ko ini: "A car fray ta ye", mə ka kəcik han câ' su?
- ²⁴Ama na wa' kədan i we njeŋ Vay sumra' kə gbəgboŋ wa nya kədan mum vrum kwa mə bro'o. Zə rum, Zezu faŋ la' ne kə hurbu: "Na in wû ne: A car ye, a tle la' bar gaɓ wû, bay a də so kə ndi ye!"
- ²⁵Kəkor sar, mum car ca kor nday daŋ', mum tle la' bar məni mum ke bar wə han bay 'ya vari so um kə gi mbra' ne kə Ifraya.
- ²⁶Kwa rum jin' wa ne kə sôwâ daŋ' məni gay' wə hana. Wəlok gi nday juk, bay handay təŋ kə gi mbra' ne kə Ifray kə ini: «Tam namba we kwa mə yewe.»
- ²⁷Kəki rum, Zezu pâ mbə rawti so ta rəka. Mum we bə ɓawa grama mə də kə Levi, suk wə so ɓawa grama. Zezu la' ne numu: «A ta zə rini.»
- ²⁸Levi car, ar kwa daŋ', bay ta zə rumu.
- ²⁹Kəki rum, Levi gi cer mə mbri wə so um ne kə Zezu. Sum ɓawa kwa raw kə sôwâ məsin gay' kuni vun tablə kə ndaya.
- ³⁰Sum pay zu dan dlay mə du kul sôwâ Zuwif mə də kə Farisiyen kə kul sôwâ Zuwif mə də kə Farisiyen məsin mgburum kuni dan wa sum ta zə Zezu bay ci vun ndaya: «Zə mi hi wə ti kwati kə ce kwace kə sum ɓawa kwa wanji kə sum gi kwa mə bro' su?»
- ³¹Zezu dām vun ndaya: «Sôwâ mə kə tu heɓ cu bə bə waza mi, say sum gaɓa.

³²Na cu mbə kədan na də sôwâ mənî wə gi kwa mə ɓay mi, ama sôwâ mənî wə gi kwa mə bro' kədan handay faŋ vunduk ndaya.”

³³Sôwâ məsin in ne kə Zezu: «Sum ta zə Zaŋ wə saŋ kwa juk ɓay wə in dan kə Ifraya. Sum ta zə kul sôwâ Zuwif mə də kə Farisiyen wə gi ndəna' ta', ama sum ta zə ru wə ti kwati kə ce kwace.”

³⁴Zezu ɗam vun ndaya: «Hi ɗik ma su? Bâŋ bə cin ma də gak saŋ kuni kwa kəri mənî bə cin ma rum kəta' wə du nday su? Cu ndəna' mi!

³⁵Ama bəka mənî bə cin ma wə də pâ mbə du nday nə də mbə kəta'. Kə bəka rum, handay də saŋ kwa ɓo.”

³⁶Zezu in dan mə gəgan mənî nə ne nday ta'a: «Swə ɗaw cu ngâr vun zim mbraw mə mbrew kədan mum fur mbraw mə kəmar kə ndi mi. Swə la' gi ndəna' si, ka mum ɗənok mbraw mə mbrew nə si, ɓay vun zim mə mbrew cu də tap nji kə mbraw mə kəmar mi.

³⁷Bay swə ɗaw cu də wu' sum mə mbrew də rawti mbu sum mə kəmar mi. Swə la' wu' wə han si, sum rum də mun mbu rum si, ɓay sum rum ne də rəka ɓay mbu rum ɗənok.

³⁸Ama a wu' sum mə mbrew də mbu sum mə mbrew.

³⁹Bay swə ɗaw la' ce sum mə kəmar si, bə rum cu bə kədan mum ce sum mə mbrew za' mi. Mum ini: "Mə kəmar ɓay pâ si."»

Luc 6

¹Kə fəta pemây sôwâ Zuwif, Zezu pâ vari du sine. Sum ta zə rum kəy alkamari, kulum kə ɓa ɓay cwa.

²Sôwâ məsin mə du kul sôwâ Zuwif mə də kə Farisiyen ci vun ndaya: «Zə mi hi wə gi kwa mənî dan dlay mba cu ne vari gi rum mi kə fəta pemây nə su?”

³Zezu ɗam vun ndaya: «Hi cu in dan kwa mənî David gi kəri mənî mum kə sum ta zə rum kə mē' nə mi su?

⁴Mum ze ta rawti so Ifray ɓay ra' duwa' mənî njay kor Ifray, mum ti ɓay ne kə sôwâ um ti ta'a: Ama dan dlay mba cu ne vari ne kə sôwâ məsin kədan kuni ti duwa' rum mi, say sum po' fur tawa.”

⁵Zezu faŋ la' ne nday kəreme: «Vay sumra' nə Bârî fəta pemâya.”

⁶Kə fəta pemây sôwâ Zuwif məsin, Zezu ze ta rawti so Ifray sôwâ Zuwif ɓay təŋ kə ta' kwa wə hana. Swə məsin kəta' wə han, ɓa fun rum mə mara.

⁷Sum pay zu dan dlay kə kul sôwâ Zuwif mə də kə Farisiyen njay kuni i ta wa Zezu kədan handay kar ke məsin mum də car swə nə kə fəta pemây su na, zə handay wa' kədan handay tum sem rum wa kwa mənî mum wə gi.

⁸Ama Zezu we dan dîk nday, bay mum la' ne kə swə mə mar ba mar na: «A car ca kor sôwâ daŋ'ŋ.» Swə nə car kor ndaya.

⁹Kəki rum, Zezu ci vun ndaya: «Na wə ci vun ri, dan dlay mba ne vari ne mba kədan mə gi kwa mə bay kə fəta pemây su? Ko gi kwa mə bro' su? Kədan sid' swə su? Ko ci bə rum su?»

¹⁰Zezu tle i kar sôwâ mənî gay' reŋ wa rum kə ndi dəraŋ dəraŋ, mum faŋ la' ne kə swə na: «A tle ba ru.» Mum tle ba, bay ba rum faŋ baya.

¹¹Ama sôwâ məsin ra' bak juk, bay handay təŋ kə ge dan kə nji mbok nji wa kwa mənî handay də gi kə Zezu.

¹²Kəri rum, Zezu ur ta wa igway' kədan mum in dan kə Ifray wə han, mum bar dukri ci' kə in dan kə Ifraya.

¹³Kəri mənî bəka ra' si, mum də sum ta zə rum, bay mum da' sôwâ guḅ wa hoḅ du nday mənî mum də nday kə sum sini.

¹⁴Semdə nday ni na: Simon, Zezu cin sem rum də kə Piyer ta', kə njər rum Andre, Zakə, Zaŋ, Filip, Bartelemi,

¹⁵Matiye, Tomas, Zakə mə vay Alfe, Simon mə də kə Zelot,

¹⁶Yudas mə vay Zakə, kə Yudas Iskariyot, swə mənî faŋ bə cukur Zezu.

¹⁷Zezu dam mbə wa igway' kə nday, handay mbə gay' zə nya wə ri mə pəḁak pəḁak kə sum ta zə rum rawa. Raw sôwâ məsin kəta' wə han, handay car mbə nya Zude daŋ', kə so Jeruzalem, bay so Tir kə Sidon mənî wə hay' ya mbi.

¹⁸Handay mbə kədan handay mun kwata' um, bay kədan mum car gaḅ nday ta'a. Mum 'way gam wa sôwâ juk ta'a.

¹⁹Raw sôwâ daŋ' keḅ kədan handay um ḁak, zə gbəgboŋ wə pâ mbə tu rum car gaḅ nday daŋ'ŋ.

²⁰Zezu tle i kar sum ta zə rum kə ndi bay la' ne ndaya: «Kəḁam zə ri, hi sum ca, zə hi də ke kə Ifray wə ri mənî mum wə də suk jwə wa sôwâ umu!

²¹Kəḁam zə ri, hi sôwâ mənî kə mē' mgbaŋ ni na, zə hi də sa' rawti. Kəḁam zə ri, hi sôwâ mənî wə ci' mgbaŋ ni na, zə hi də mîya.

²²Kəḁam zə ri kəri mənî sôwâ wə mi sî, wə mi vad', wə mi i, bay wə mi jed' ce' ndə sôwâ mə bro' zə Vay sumra'a!

²³Kəḁam zə ri kəri mənî kwa rum də gi wa ri, bay i dam də fray kə tuk kəḁam, zə bal cik mə mbri wə mi ji wafraya. Zə ba mbri randay gi ndəna' kə sum ka' dan ta'a.

²⁴Ama boni wa ri, hi sum ndak, zə hi fe kəḁam mə hi si!

²⁵Boni wa ri, hi sôwâ mənî sa' rawti mgbaŋ ni na, zə hi də ke kə mē'ê! Boni wa ri, hi sôwâ mənî wə mîy mgbaŋ ni na, zə hi də ke kə dîk dan kə ci'i!

- ²⁶Boni wa ri kəri mēni sôwâ daŋ' wə ge dan mə ɓay wa ri, zə ba mbri randay ge dan ndəna' wa sum ka' dan mə hay dan ta'a."
- ²⁷«Ama na in mi ne, hi sôwâ mēni wə mun dan ge mana: I bə sum sî mi, i gi kwa mə ɓay hay' sôwâ mēni wə mi sî,
- ²⁸i kuswa' sôwâ mēni wə ge nê' ri, i in dan kə Ifray zə sôwâ mēni wə mi riki.
- ²⁹Swə la' ge zə hum ne nu ɗaw si, a faŋ ga' məsin cin ne num ta'a. Swə la' ra' mbraw jewre wû si, a ar num ra' mə nyêw rum ta'a.
- ³⁰Swə la' o kwa ɓa ru si, a ne num, ɓay swə la' tle kwa wû si, a ci vun rum za' mi.
- ³¹I gi kwa daŋ' zə sôwâ məsin, ce' ndə hi wə wa' i handay gi zə ri.
- ³²Hi la' wə bə sôwâ mēni wə mi bə taw si, zə mi hi wə ji soko wa rum su? Zə sum gi kwa mə bro' wə bə sôwâ mēni wə nday bə ta'a.
- ³³Hi la' wə gi kwa mə ɓay wə hay' sôwâ mēni wə gi kwa mə ɓay wə hay' ri taw si, zə mi hi wə ji soko wa rum su? Zə sum gi kwa bro' wə gi ndəna' ta'a.
- ³⁴Bay hi la' wə ne bal kwa ne kə sôwâ mēni hi wə ɗik i handay də po' bal rum taw si, zə mi hi wə ji soko wa rum su? Sum gi kwa mə bro' wə ne bal kwa ne kə sôwâ mə bro' məsin kədan handay də fe bal rum kəreme.
- ³⁵Zawa, i bə sum sî mi, i gi kwa mə ɓay hay' nday, ɓay i ne bal kwa ne nday dan ɗik dan i handay də po' bal rumu. Hi də fe bal cik mə mbri, ɓay hi də faŋ daw Ifray mə wafray, zə mum wə gi ɓay hay' sôwâ mēni cu gi soko mi kə sôwâ mə bro' ta'a.
- ³⁶I we ca wa sôwâ ce' ndə Ba mi wə we ca wa sôwâ."
- ³⁷«I ɓok dan wa sôwâ məsin mi, ɓay Ifray cu də ɓok dan wa ri mi, i kaw sôwâ məsin kə dan mi, ɓay Ifray cu də mi kaw kə dan mi, i vrum kwa mə bro' mēni sôwâ məsin wə gi hay' ri, ɓay Ifray də vrum kwa mə bro' mēni hi wə gi nə ta'a.
- ³⁸I ne kwa ne kə sôwâ məsin, ɓay Ifray də mi ne kwa ta' a. Mum də nyen kwa də kwa kənji' kwa ɓay də red' də han jəkul kul hâ njay də nya, ɓay mum də njay də jiba mi. Kwa kənji' kwa mēni hi wə kənji' kwa ne kə sôwâ məsin kə ndi, Ifray də kənji' mi ne kə ndi ta'a."
- ³⁹Zezu faŋ in dan mə gəgan ne ndaya: «Dəŋâr gak kaw səja dəŋâr məsin ta kə ndi si su? Mum la' gi ndəna' si, handay hoɓ jak də njay də zra.
- ⁴⁰Bə wum kwa cu pâ bə ta' kwa um kə mbra' mi, ama bə wum kwa daŋ' mēni la' wum kwa ndo' si, mum də ke ce' ndə bə ta' kwa umu.
- ⁴¹Zə mi ha kar bubud' gu mēni wə i vay ba wû, ama ha cu gak we gu mə i ru mi su?
- ⁴²Ha, swə mēni cu gak we gu mēni wə i ru mi, ha gi ma kədan ha in ne kə vay ba wû: "Vay ba man, a ar nan tle bubud' gu mēni wə i ru su?" Ha bə vur vur, a par gu mēni wə i ru cop, ɓay ndəna' ha gak weri ɓay kədan ha tle bubud' gu mēni wə i vay ba wû ɓo."

⁴³«Gu mə ɓay cu gak vra' vra' gu mə bro' mi, ɓay gu mə bro' cu gak vra' vra' gu mə ɓay mɔta'a.

⁴⁴Swə gak we gu ɗaŋ' kə vra' ndaya: Swə cu ɓe vra' tərɔm wa ŋāy' mi, ɓay swə cu ɓe vra' viŋə wa ŋāy' mə bu mɔta'a.

⁴⁵Ndak mə ɓay wə pā mbə vunduk swə mə ɓay, ɓay ndak mə bro' wə pā mbə vunduk swə mə bro' ta'a. Zə vun swə wə ge dan mənɪ nyen wə vunduk rumu.»

⁴⁶«Zə mi hi wə man dɛ kə Bârî, Bârî, ɓay hi cu gi kwa mənɪ na in ne ni nə mi su?

⁴⁷Sa su ɗaŋ' mənɪ mbə hay' rin, wə mun dan man, ɓay wə gi kwa mənɪ na in ne num, na dɛ mi ta' mum ra' nji kə sa su.

⁴⁸Mum ra' nji kə swə mənɪ tɔŋ ɗam so: Mum dla zra rum hâ day pra, ɓay mum tor zu rum wə hana. Kəri mənɪ mbi mbə haɓ ta rɛka ɓay pla' ndap zə so rum, mbi rum cu gak nyen zə so rum hel' mi, zə so rum ɗam ɓaya.»

⁴⁹«Ama swə mənɪ wə mun dan man, ɓay cu gi kwa mənɪ na in ne num nə mi, bə rum ra' nji kə swə mənɪ ɗam so um wa nya dan dla zu rumu. Kəri mənɪ mbi mbə pla' ndap zə so rum, kəkor sar, so rum nde ta nya ɗɛnok cete.»

Luc 7

¹Kəri mənɪ Zezu in dan rum ɗaŋ' ne kə sôwâ ndo' si, mum dle ta so Kapernawum.

²Toŋ soje mə nya Romə kɛta' wə han, mum kə bə sin mənɪ mum um bə juk, bə sin nə kə gaɓ ɓayrum, mum hɛrɛ' kə mara.

³Kəri mənɪ toŋ soje nə mun dan Zezu, mum sin sôwâ mɛsin mə du sum rôwâ Zuwif ta hay' rum kɛdan handay um o mbə car bə sin umu.

⁴Handay mbə day hay' Zezu ɓay tɔŋ kə um o kə ini: «Bay kɛdan a gi kwa mənɪ mum wə wa' nə ri',

⁵mum wə bə sôwâ mba dle tu si, ɓay mum ɗam so Ifray sôwâ Zuwif ne mba ta'a.»

⁶Zə rum, Zezu 'ya dle kə nday, ɓay kəri mənɪ mum mbə hɛrɛ' kə so toŋ soje na, toŋ soje nə sin bây um kuni kɛdan handay um in ne: «Bârî a cik tu ru za' mi, zə na cu nde i kɛdan ha ze so man mi.

⁷Zə rum, na kar tu rin na cu nde i kɛdan na dɛ kor ru kə tu rin mi. Ama a in dan ɗaw sar, ɓay bə sin man dɛ cara.

⁸Na kə tu rin, na wə zə ɓa sôwâ mɛsin, ɓay na kə soje zə ɓa rin ta', na wə in ne kə swə ɗawa: "A dɛ ye" ɓay mum wə da. Na in ne kə swə mɛsini: "A mba" ɓay mum wə mba. Bay na wə in ne kə bə sin mana: "A gi kwa mənɪ na" ɓay mum wə gi kwa rumu.»

⁹Kəri mənɪ Zezu mun dan rum, dan rum jin' wa ne numu. Mum faŋ i, ɓay la' ne kə raw sôwâ mənɪ wə ta zə rumu: «Na in mi ne, na cu za' swə mənɪ ve nan ce' ndə swə mənɪ nə ɗaw mi, ko du sôwâ Israyel cu mɔta'a!»

- ¹⁰Kəri mənı sum sin kuni faŋ gewa mbə so toŋ soje na, handay za' bə sin nə car si.
- ¹¹Kəki rum, Zezu 'ya ta wə so mə də kə Nayin. Sum ta zə rum kə raw sôwâ ta kuni kə rumu.
- ¹²Kəri mənı handay ta day vun vari so rum, handay ndewa kə sôwâ tle mar də vun zra kə ndi. Mar nə vay mə nji dāw ɓa ya um mənı ta rənda, ɓay sôwâ so rum juk kəta' kə sa.
- ¹³Kəri mənı Bârî we sə, mum we ca wa sə, ɓay la' ne sa: «Əŋ ci' za' mi.»
- ¹⁴Mum faŋ ta ta dāk kwa tle mar, ɓay sum tle mar nə faŋ ca ɓay Zezu ini: «Vay jid, na in wû ne, a car ye.»
- ¹⁵Mar nə car suk kə zu, ɓay təŋ ge dana. Zezu faŋ ar num ne kə ya umu.
- ¹⁶Wəlok gi sôwâ mə wə han daŋ', ɓay handay gi mbra' ne kə Ifray ini: «Bə ka' dan mə mbri mbə wə du mba ɓay Ifray mbə kaw ɓa sôwâ umu!»
- ¹⁷Dan Zezu pla' ndap wə nya Zude kə pəɗək rum daŋ'ŋ.
- ¹⁸Sum ta zə Zaŋ in dan rum daŋ' ne numu. Zaŋ də sôwâ hoɓ mə du nday,
- ¹⁹ɓay sin nday ta hay' Bârî kədan handay ci vun rumu: «Ha nə swə mənı namba wə ji nə su, ko namba də ji swə məsin su?»
- ²⁰Kəri mənı handay mbə hay' Zezu, handay la' ne numu: «Zaŋ-Baptistə sin mba kədan namba ci vun ru: "Ha nə swə mənı namba wə ji nə su", ko namba də ji swə məsin su?»
- ²¹Kəri rum Zezu wə car gaɓ sôwâ juk, ɓay car sôwâ mə kə rəbo ta', mum 'way gam wa sôwâ, ɓay ar i ne kə dəŋâr juk ta'a.
- ²²Kəki rum, Zezu dām vun sum sin Zaŋ: «I də in dan kwa mənı hi we, ɓay dan mənı hi mun daŋ' ne kə Zaŋ: Dəŋâr wə weri, lem wə ta, mgbo' wə faŋ kələŋ, ndum wə mun hum, mar wə car i, ɓay Dan mə Kədam wə ka' ne kə sum ca.
- ²³Swə mənı cu ar dan man ge mi, bə rum də tuk kəɗama!»
- ²⁴Kəri mənı sum sin Zaŋ 'ya si, Zezu təŋ kə in dan wa Zaŋ ne kə raw sôwâ: «Hi ta kar mi du igop nə su? Hom mənı simbeɗ wə nyen su?
- ²⁵La' cu mi si, hi ta kar mi han su? Swə mənı ge mbraw mə kə mbra' su? Ama sôwâ mənı ge mbraw mə kə mbra' ɓay gay' du tuk kədam, handay gay' wə so jwa.
- ²⁶La' cu mi si, hi ta kar mi wə han su? Bə ka' dan su? Awo, na in mi ne, hi we swə mənı pā bə ka' dan nə si.
- ²⁷Zə Zaŋ nə swə mənı 'Derwa Ifray wə in dan wa rumu: "A kar ri', na wə sin vay sin man kofo ru kədan mum gila' vari zə ru."«
- ²⁸Zezu faŋ ini: «Na in mi ne, wə du sôwâ mənı rawkwa wə vra' daŋ', swə mə pā Zaŋ kə mbra' cu mi. Ama swə mə kî wə du sôwâ mənı Ifray wə suk jwə wa nday nə pā Zaŋ kə mbra' si.»

- ²⁹Kəri mənı sum bawə kwa kə sôwâ mäsın daŋ' mun dan um, handay we i vari Ifray nə njeŋ, bay Zaŋ gi baptem ne ndaya.
- ³⁰Ama kul sôwâ Zuwif mə də kə Farisiyen kə sum pay zu dan dlay vad'kuni vari mənı Ifray gila' rum zə nday, bay handay vad' baptem wə ba Zaŋ.
- ³¹Zezu faŋ ci vun ndaya: Na də kənji' sôwâ mə tam kə sa su? Handay ra' nji kə sa su?
- ³²Handay ra' nji kə dawre' mənı gay' wə lumə bay ka' dan kə nji mbok nji: "Namba pe duḡ kəya', ama hi cu dla' mi, namba dâ nyem tum vun zra, ama hi cu ci' mi"
- ³³«Kəri mənı Zaŋ-Baptistə mbə, mum cu ti kwati mi, ko ce sum mətə'a, bay hi ini: "Mum kə gam wa rumu"
- ³⁴Bay kəri mənı Vay sumra' mbə, mum ti kwati bay ce kwace, bay hi ini: "I kar swə mə ni na! Mum nə bə ti mbri kə bə ce kwa mə mbri, mum nə bāy sum bawə grama kə sum gi kwa mə bro'o."
- ³⁵Ama sôwâ daŋ' mənı ve Gwet Ifray, handay we i dan rum nə njeŋe."
- ³⁶Swə dāw mə du kul sôwâ Zuwif mə də kə Farisiyen nə də Zezu kədan mum mbə ti kwati kə rumu. Zezu 'ya ta so um bay suk wə vun tablə kədan mum ti kwati.
- ³⁷I gi kwa mə bro' kətə' wə so rumu. Kəri mənı ta mun i Zezu suk wə vun tablə rawti so swə Farisiyen nə, ta tle urdi kə gula albatrə ped' mbə kə ndi
- ³⁸bay ta ca kəki Zezu hay' sem rum, ta təŋ kə ci', bay zim i sə ne ta sem Zezu, ta faŋ kutu sem rum kə sâ wa sa. Ta soḡ sem rum bay wu' urdi nə ta sem rumu.
- ³⁹Kəri mənı swə Farisiyen mənı də Zezu nə we ndəna', mum dık dan wə vunduk rumu: «Swə mənı nə la' bə ka' dan kəzin' si, mum gak we ma mətı dık num rə, bay mum gak we i ta i gi kwa mə bro'o."
- ⁴⁰Zezu la' ne numu: «Siməŋ, na kə dan kədan na in wû ne.» Siməŋ dām vun rumu: «A in ye, Bə ta' kwa."
- ⁴¹Zezu in ne numu: «Sôwâ hoḡ ti bal swə məsini: Swə dāw ti bal səlay kis vatl, bay swə mäsın ti guvatla.
- ⁴²Handay cu kə kwa mäsın kədan handay po' bal rum kə ndi mi, bay bə rum vrum bal mə wa nday hoḡ jaka. Wə du sôwâ mə hoḡ mənı kuni, sa nə wə də um bə han câ' su?"
- ⁴³Siməŋ dām vun rumu: «Na wə dık i swə mənı mum vrum bal mə toŋ wa rumu.» Zezu la' ne numu: «Ha dām njeŋe."
- ⁴⁴Kəki rum, Zezu faŋ i ta hay' ma rə, bay la' ne kə Siməŋ: «Ha we ma mətı rə si su? Kəri mənı na ze rawti so wû, ha cu ne nan mbi kədan na kol sem kə ndi mi, ama ta kol sem rin kə zim i sə, bay kutu sem rin kə sâ wa sa.
- ⁴⁵Ha cu ve nan kə man soḡ kə vun mi, ama ta cu ar soḡ sem rin mi, daka kəri mənı na ze ta rawti so.
- ⁴⁶Ha cu wu' mur wa rin mi, ama ta wu' urdi ta sem rini.

⁴⁷Zə rum, na in wû ne: Ma rə ta' bə sə hay' rin juku: Bə sə nə ta' i Ifray vrum kwa mə bro' sə mənɪ ke ɓayrum nə si. Ama swə mənɪ Ifray vrum kwa mə bro' um mə kî, mum ta' bə um kî ta'a."

⁴⁸Zezu faɲ la' ne kə ma ra: «Kwa mə bro' maɲ vrum si."

⁴⁹Sôwâ mənɪ gay' wə vun tablə kə rum təɲ kə dɪk dan wə vunduk ndaya: «Sa nə swə mənɪ nə wə gak vrum kwa mə bro' nə su?"

⁵⁰Ama Zezu la' ne kə ma ra: «Zə həɲ ve nan, həɲ sɪd'si, əɲ də heɓ ye.»

Luc 8

¹Kəki rum, Zezu ta gaɲ so mə rôwâ kə so mə dɛrɛ' daɲ'ɲ. Wə ri gaɲ um, mum ka' Dan mə Kədam mənɪ wə in dan wa dan vari mənɪ Ifray wə də suk jwə wa sôwâ umu. Sum ta zə rum mə guɓ wa hoɓ ta kə rum,

²ɓay rawkwa mənɪ mum 'way gam wa nday kə car gaɓ nday ta kuni kə rum ta'a. Semɗɛ nday ni na: Mari mə so Magdala, mətɪ Zezu 'way gam sedâ' wa sə,

³Zanə, ma Suza, i sin Herodə, Suzana kə rawkwa məsin juk mənɪ wə ne kwa mə ɓa nday kədan handay kawɓa Zezu kə sum ta zə rum kə ndi.

⁴Sôwâ juk car mbə so cem cem ɓa mbə hay' Zezu. Kəri rum, mum in dan mə gəgan mənɪ nə ne ndaya:

⁵«Bə ge zep kwa pâ kədan mum də ge zep kwa. Kəri mənɪ mum wə də ge zep kwa wə sine um, zep məsin rum njay ta vari. Sôwâ ta wa rum kə sem, ɓay rugwa da' nday ti.

⁶Zep məsin rum njay ta ri mə kə pra. Kəri mənɪ zep rum ci, handay co' zə handay cu za' ri mə səso' mi.

⁷Zep məsin rum njay ta du ɲây'i. Dây' rum ci vun nji kə zep rum, ɓay handay tak kwa rum dan jeɲɛ.

⁸Ama zep məsin rum njay ta nya mə ɓaya. Zep rum ci ɓay zewa, wa rum dāw dāw daɲ' ke i kis kisi.» Zezu faɲ ini: «Swə mənɪ kə hum mun dan kəta', say bə rum nə munu!"

⁹Sum ta zə Zezu ci vun rum wa dan mə gəgan rumu.

¹⁰Mum dam vun ndaya: «Ifray ne vari ne ni kədan i we kwa mənɪ ke pe' ɓa' si wa dan jwə Ifray, ama wə hay' sôwâ məsin kwa rum wə ta' nday ne kə dan mə gəgan, zə kədan: Handay gak kar ri, ama handay cu we mi, handay gak pe hum, ama handay cu mun zu dan rum mi."

¹¹«Zu dan mə gəgan rum ni na: Zep kwa wə ta' dan Ifraya.

¹²Vari wə ta' sôwâ məsin mənɪ mun dan Ifray, handay mun dan rum, ama kəki rum, Satan mbə par dan Ifray mənɪ wə vunduk nday ɓay tak nday dan ve dan rum ɓay dan ke kə nyî mə də hâ mi.

¹³Ri mə pra wə ta' sôwâ məsin mənî mun dan Ifray, handay ve dan rum kə tuk kədam, ama handay cu ar dan rum pe tlor wə vunduk nday mi: Handay ta kə dan rum kî, ama kəri mənî cik la' mbə wa nday si, handay ar dan mənî handay ve na.

¹⁴Zep mənî njay də du n̄ây' wə ta' sôwâ məsin mənî mun dan Ifray, ama dîk dan ndak, kə tuk kədam mə wa nya tak dan rum, bay dan rum cu par i mi.

¹⁵Nya mə bay wə ta' sôwâ məsin mənî mun dan Ifray, handay kaw dan rum wə vunduk mə bay bay n̄eɲ, bay handay car n̄gəɲ' hâ dlər də kofo.”

¹⁶«Swə daw cu də ge ku wə baɲgay kədan mum um cin də d̄əɲâl ko zə aɲgaw mi. Zawa, mum um cin wa kwa cin baɲgay kədan sôwâ mənî cok rawti so um we ri mə bu rumu.

¹⁷Kwa daɲ' mənî pe' wə də pâ rəka takram, bay dan daɲ' mənî 'yeɲ wə ri mə ura' wə də pâ wə ri mə bu.

¹⁸I kaw wa ri du dan mənî hi wə munu. Zə swə mənî kə kwa, mum də fe məsin də han, ama swə mənî cu kə kwa mi, sôwâ də ve mə kî mənî wə ba rum nə si.”

¹⁹Ya Zezu kə daw ya um mbə kuni kədan handay um kar, ama handay cu gak mbə hay' rum mi, zə raw sôwâ mənî wə hana.

²⁰Handay la' ne numu: «Ya wû kə daw ya wû gay' kuni rəka, bay handay wa' wû kara.”

²¹Ama Zezu dām vun ndaya: «Sôwâ mənî wə mun dan Ifray kə ta zə rum, handay nə ya man kə daw ya mana.”

²²Fəta məsin, Zezu ur ta rawti da kə sum ta zə rum bay mum la' ne ndaya: «Mə də dapa ya mbi ga' sini.» Bay handay 'ya dle.

²³Kəri mənî handay wə ta də kə da, Zezu wə nde sene. Kəkor sar simbed' təɲ kə sa' kə gbəɲɲoɲ wa ya mbi. Mbi səta də rawti da, bay handay hərə' kə tuɓ mbi.

²⁴Zə rum, sum ta zə Zezu ta hay' rum bay dla' num kə um in ne: «Bârî, Bârî, namba də mara!» Zezu car fray bay dlay simbed' kə mbi kə gbəɲɲoɲ: Bay handay gay' 'yeɲe.

²⁵Zezu faɲ ci vun sum ta zə rumu: «Ô mi nə ka su?» Ama wəlok gi nday juk, bay kwa rum jin' wa ne nday bay handay in dan kə n̄ji mbok n̄ji: «Swə mənî nə sa kədan mum dlay simbed' kə mbi kə gbəɲɲoɲ, bay handay mun vun rum su?”

²⁶Handay ta day wə nya sôwâ Geraseniyen mənî suk cin i kə so Galile, dapa ya mbi ga' sini.

²⁷Kəri mənî Zezu dam rawti da ta nya, swə so rum mbə ndewa kə rumu. Swə nə kə gam wa rumu. Kim juk si mum cu ge mbraw mi. Mum cu suk wə so mi, ama mum bar wə nyir gway' mənî sôwâ wə mo' mar hana.

²⁸Kəri mənî mum we Zezu, mum ka' dana. Mum nde ta nya kor Zezu bay ka' dan kə gbəɲɲoɲ: «Zezu, Vay Ifray mə Wafray, ha wa' mi hay' rin su? Na o nu, a ta' ca rin mi!”

- ²⁹Mum in ndəna' zə Zezu dlay num kə gbəgboŋ kədan nə pā mbə wa swə na. Wə ri cem cem juk gam nə um tle. Sôwâ wə gay' sem rum kə lay bay baŋ ba rum kə cururu kədan handay um ji, ama mum kəy lay bay hay cururu, bay gam nə um pla' də gopo.
- ³⁰Zezu ci vun rumu: «Wû də ma su?» Mum dām vun rumu: «Man də kə Kul Rawa.» Mum in ndəna', zə gam məni cok wə wa rum kuni rawa.
- ³¹Bay gam kuni o Zezu kədan nə 'way nday cok də zra mə ciringriŋ mi.
- ³²Kul ziŋ mə mbri wə ti kwa həre' kə sem igway' rumu. Gam kuni o Zezu kədan nə ne vari ne nday bay handay də cok wa ziŋ kuna. Zezu ne vari ne ndaya.
- ³³Zə rum, gam kuni wur mbə wa swə nə bay cok ta wa ziŋ kuna. Kul ziŋ daŋ' pik ne mbə wa igway' njay ta ya mbi bay tuḅ wə hana.
- ³⁴Kəri məni daw ji ziŋ we kwa məni gi ndəna', handay pik ne ta pla' dan rum wə mbok so kə pəḏak rum daŋ'ŋ.
- ³⁵Sôwâ wur kədan handay kar kwa məni gi na. Kəri məni handay mbə hay' Zezu, handay we swə məni ke kə kul gam wa rum nə suk hay' sem Zezu, mum ge mbraw, bay wa rum mbə si. Kwa rum gi wəlok ne nday juku.
- ³⁶Sôwâ məni we kwa rum in vari dan məni Zezu 'way kul gam wa swə nə ne kə sôwâ məsini.
- ³⁷Zə rum, sôwâ daŋ' məni gay' wə nya sôwâ Geraseniyen o Zezu kədan nə 'ya ar nya nday, zə wəlok gi nday juku. Zezu faŋ ur ta rawti da kədan mum 'ya.
- ³⁸Swə məni ke kə kul gam wa rum nə o Zezu kədan nə ar vari ne num kədan nə 'ya kə rumu. Ama Zezu 'way num kə ini:
- ³⁹«A faŋ də so wû, bay a də in dan kwa daŋ' məni Ifray gi zə ru ne kə sôwâ.» Swə nə 'ya dle bay pla' dan kwa məni Zezu gi zə rum nə daŋ' ne kə sôwâ so rumu.
- ⁴⁰Kəri məni Zezu faŋ ta dapa ya mbi ga' sin kərem, raw sôwâ ve num, zə handay wə um ji.
- ⁴¹Kəri rum, swə daw mə də kə Jayrus mbə daya. Mum nə toŋ ji so Ifray sôwâ Zuwif. Mum kuduk nya kor Zezu bay o num kədan nə mbə so um,
- ⁴²zə mum kə vay mə ma daw məti kə kim guḅ wa hoḅ, bay ta həre' kə mara. Kəri məni Zezu wə də han, raw sôwâ red'nji wa rum hâ um pla'a.
- ⁴³Wə du nday ma məsin kəta' kə gaḅ saŋa. Ta gi kim guḅ wa hoḅ kə gaḅ rumu. Ta dənok doknay mə ba sə ndo' cet ne kə sum waza, ama swə daw du nday cu gak car gaḅ sə mi.
- ⁴⁴Ta ta mbə kəki Zezu bay ḏak zu mbraw um, kəkor sar gaḅ saŋ sə ndo'o.
- ⁴⁵Zezu ci vun: «Sa nə ḏak nan su?» Sôwâ daŋ' riway, bay Piyer la' ne numu: «Bârî, raw sôwâ reŋ wa ru bay red'nji hâ wû pla'a.»
- ⁴⁶Ama Zezu la'a: «Swə ḏak nan si, zə na tuk i gbəgboŋ pā mbə tu rini!»

⁴⁷Ma rə we i dan sə cu gak pe' za' mi, zə rum ta mbə hay' Zezu kə nyen ndeḅ ndeḅe. Ta kuduk nya kor rum, ḅay ta in kor sôwâ mənî wə han daŋ' vari dan mənî ta ḁak num kə vari mənî gaḅ sə nə car kəri rum sar nə daŋ'ŋ.

⁴⁸Zezu la' ne sa: «Vay man, zə həŋ ve nan, zə ô maŋ, həŋ car si. Ɔŋ də heḅ ye.»

⁴⁹Kəri mənî Zezu wə in dan də in ḅo, vay sin car mbə so Jayrus ḅay in ne numu: «Vay wû rə mar si. A cik Bə ta' kwa za' mi.»

⁵⁰Ama kəri mənî Zezu mun dan rum, mum la' ne kə Jayrus: «A ne wəlok mi, a ve Ifray sar, ḅay ta də cara.»

⁵¹Kəri mənî handay ta day so Jayrus, Zezu cu ne vari ne kə swə ḁaw kədan bə rum ze də rawti so kə rum mi, say Piyer, Zaŋ, Zakə kə ba vay kə ya vay ra.

⁵²Sôwâ daŋ' wə ci' kə way' ḅa zə vay məti mar ra. Ama Zezu la'a: «I ci' mi, zə vay rə cu mar mi, ta wə nde sene.»

⁵³Handay təŋ kə um mây, zə handay we i ta mar si.

⁵⁴Ama Zezu kaw ḅa sə ḅay ḁe sə kə gbəgboŋo: «Vay, əŋ car ye.»

⁵⁵Nyî sə faŋ mbə, ḅay kəkor sar, ta car fraya. Zezu faŋ ne vari ne nday kədan kuni ne kwati ne sə ti.

⁵⁶Kwa rum jin' wa ne kə ba vay kə ya vay, ama Zezu dlay nday kə gbəgboŋ kədan kuni in dan kwa rum ne kə swə ḁaw mi.

Luc 9

¹Zezu ḅawa sum ta zə rum mə guḅ wa hoḅ ḅay ne gbəgboŋ ne nday kədan handay 'way gam kə car sum gaḅa.

²Kəki rum, mum sin nday kədan handay ka' Dan mə Kəḁam mənî wə in dan wa dan vari mənî Ifray wə də suk jwə wa sôwâ um, ḅay kədan handay car sum gaḅ ta'a.

³Mum la' ne ndaya: «I ra' kwa məsin wə ḅa ri zə vari rəkway mi, ko dliw, ko mbu, ko kwati, ko səlay mi. 'Bay swə nə ra' mbraw hoḅ wə ḅa rum mi.

⁴Wə so daŋ' mənî sum rum də mi ve, i gay' wə so rum hâ day ri 'ya mi.

⁵Wə so daŋ' mənî sum rum cu də mi ve mi, i 'ya ar ri rum kə tu' ḅərim sem ri. Kwa rum də ke kwa ta' kwa zə ndaya!»

⁶Sum ta zə rum 'ya dle, handay ta gaŋ so rum daŋ' kə ka' Dan mə Kəḁam kə car sum gaḅ mənî wə han daŋ'ŋ.

⁷Kəri mənî toŋ nya rum, Herodə mun dan kwa daŋ' mənî gi, ḅay mum cu we i mum ḁik ma su mi, Zə sôwâ məsin wə in i Zaŋ-Baptistə car i si,

⁸Sôwâ məsin wə in i Eliya faŋ pâ si, Sôwâ məsin kərem wə in i Bə ka' dan mə du sum ka' dan mə vun kofo faŋ car i si.

⁹Herodē ini: «Na hay wa Zaŋ si, ama swə mənɪ na wə mun dan kwa gi rum nə swə sa su?» Bay mum keɓ vari kədan mum kar Zezu.

¹⁰Kəri mənɪ sum sin gewa mbə hay' Zezu, handay in dan kwa mənɪ handay gi daŋ' ne numu. Zezu ra' nday kə rum, bay 'ya kuni ta so mə də kə Betsayda daw ndaya.

¹¹Ama kəri mənɪ raw sôwâ mun dan rum, handay 'ya ji zə rumu. Zezu ve nday bay mum in dan wa dan vari mənɪ Ifray wə də suk jwə wa sôwâ um ne nday, bay mum car gaɓ sôwâ mənɪ kə gaɓa.

¹²Kə riya, sum ta zə Zezu mə guɓ wa hoɓ mbə hay' rum bay la' ne numu: «A ar vari ne kə raw sôwâ də mbok so kə pəɗak rum kədan kuni keɓ kwati kə ri bar, zə namba rəka wə ri mə cukudū.»

¹³Ama Zezu la' ne ndaya: «Hi kə tu ri, i ne kwati ne nday ti.» Handay dam vun rumu: «Namba cu kə kwa məsin mi, say vun tləpe' fun vatɪ kə keve hoɓ sara. Ha wa' i mə də coɓ kwati zə sôwâ mənɪ kuni daŋ' su?»

¹⁴Wə ri rum, raw njiwkwa i mbu vatla. Zezu la' ne kə sum ta zə rumu: «I gila' sôwâ gay' kə kul bay kul rum daŋ' ke kə sôwâ day day guvatɪ gu vatla.»

¹⁵Sum ta zə rum mun vun rum, bay handay la' ne kə sôwâ daŋ' i kuni gay' də nya.

¹⁶Zezu ra' vun tləpe' fun mə vatɪ kə keve mə hoɓ kuni, mum tle i ta fray bay gi soko ne kə Ifray wa kwati rum, mum jak kwati rum bay ne kə sum ta zə rum kədan handay bul ne kə raw sôwâ.

¹⁷Handay daŋ' ti bay ndak ndaya. Kəki rum, sum ta zə rum ra' kam kwati mənɪ gwa' nə nyen dɛŋâl guɓ wa hoɓo.

¹⁸Fəta məsin, Zezu wə in dan kə Ifray kə daw rumu. Sum ta zə rum mbə hay' rum, bay mum ci vun ndaya: «Raw sôwâ wə in i na nə sa su?»

¹⁹Handay dam vun rumu: «Sôwâ məsin wə in i ha Zaŋ-Baptistə, sôwâ məsin wə in i ha Eliya, bay sôwâ məsin kərem wə in i ha bə ka' dan wə du sum ka' dan mə vun kofo mənɪ faŋ car i.»

²⁰Zezu ci vun ndaya: «Bay mə hi, hi wə in mi i na sa su?» Piyer dam vun rumu: «Ha nə Kris mə Ifray na.»

²¹Zezu faŋ dlay nday kə gbəgbonj kədan kuni in dan rum ne kə swə daw mi.

²²Mum faŋ in kəreme: «Say Vay sumra' nə ce boni juk, sum rôwâ mə du sôwâ Zuwif, kə sum rôwâ mə du sum po' fur, bay sum pay zu dan dlay də um vadɪ, handay də um ci, bay kəki rum bəka hinji', mum də car mbə mara.»

²³Kəki rum, Zezu la' ne kə sôwâ daŋ'ŋ: «Swə la' wa' kədan mum ta zə rin si, say bə rum ar dɪk dan tu rum, nə tle gu gay' tu rum bəka daŋ', bay nə ta zə rini.

²⁴Zə swə mənɪ wə wa' kədan mum siɗ tu rum, bə rum də mara, ama swə mənɪ də fe mar zə rin, bə rum də ke kə nyî mə də hâ.

- ²⁵Swə la' za' kwa nya daŋ', ama bə rum cu kə nyî mə də hâ mi ko mum la' dənok tu rum si, kwa rum gak gi mi zə rum su?
- ²⁶Swə la' wə gi zur wa rin ko wa dan man si, Vay sumra' də gi zur wa bə rum kəri mənî mum də mbə wə du mbra' um, wanji kə mbra' Ba umu bay wə du mbra' sum sin um mə kəleŋe.
- ²⁷Na in mi ne, kəzin', sôwâ məsin wə du sôwâ mənî kuni cu də mar cop dan we ri mənî Ifray wə də suk jwə wa nday nə mi.”
- ²⁸Bəka gi ce' ndə mə coho' kəki dan rum, bay Zezu tle Piyer, kə Zaŋ bay Zakə bay ur ta wa igway' kə nday kədan mum in dan kə Ifray wə hana.
- ²⁹Kəri mənî mum wə in dan kə Ifray, vuk rum faŋwa, bay mbraw um faŋ məbu kep kep bay təŋ kə wədi pəlak pəlak ce' ndə wədi bəŋô.
- ³⁰Kəkor sar, sôwâ hoŋ wə ge dan kə rumu. Sôwâ rum Moyizə kə Eliya
- ³¹mənî mbə kə mbra' mə wafraya. Handay wə ge dan kə Zezu wa vari mənî mum wə də ndo' sin um kə mar um wə so Jeruzalem.
- ³²Piyer kə sôwâ mənî kə rum njay sene. Kəri mənî handay dla' sen, handay we mbra' Zezu kə sôwâ mə hoŋ mənî gay' kə rumu.
- ³³Kəri mənî sôwâ mə hoŋ kuni 'ya ar Zezu, Piyer la' ne numu: «Bârî, bay kədan namba ke ti ra, namba də kaw jew hinji': Daw zə ru, daw zə Moyizə, bay daw zə Eliya.» Piyer cu we zu dan mənî mum wə in nə mi.
- ³⁴Kəri mənî mum wə in dan də in ɓo, dləmbur mbə kəmbo' nday, bay kwa rum gi wəlok ne nday juku.
- ³⁵Wor car mbə du dləmbur ini: «Mə ni nə Vay man mənî na par, i mun vun rumu!”
- ³⁶Kəri mənî wor rum in dan ndo', handay cu we swə daw mi, say Zezu kə daw rumu. Sum ta zə Zezu njay dan rum wə vunduk nday 'yeŋ, bay kə ri rum handay cu in dan kwa mənî handay we nə ne kə swə daw mi.
- ³⁷Siw rum, handay dam mbə wa igway' bay raw sôwâ mbə ndewa kə Zezu.
- ³⁸Swə daw du raw sôwâ ka' dana: «Bə ta' kwa, na o nu, a mbə kar vay man ri', zə mum nə vay mə daw ɓa rin sara.
- ³⁹Bay gam la' tle num si, mum wə ka' dan, bay mum wə nyen vay nə kə gbəgboŋ hâ vay nə ci kukup vunū. Mum wə um rik, bay mum cu pâ mbə wa rum ga'ri mi.
- ⁴⁰Na o sum ta zə ru kədan kuni 'way gam rum, ama handay cu gak 'way gam rum mi.”
- ⁴¹Zezu dama: «Hi na, hi sôwâ mənî cu ve nan mi, bay wə gi kwa mə bro', na də suk kə ri hâ day ka su? Na də red vunduk rin wa ri hâ day ka su? A mbə ti kə vay wû na!”
- ⁴²Kəri mənî vay nə wə mbə ɓo, gam nə tle num ge ta nya bay nyen num kə gbəgboŋo. Ama Zezu dlay gam nə kə gbəgboŋ, bay 'way num pâ mbə wa vay nə bay mum faŋ ar num ne kə ba umu.

⁴³Gbəgboŋ Ifray jin' wa ne kə sôwâ mənî wə han daŋ'ŋ. Kəri mənî kwa mənî Zezu gi nə jin' wa ne kə sôwâ ɓo, Zezu la' ne kə sum ta zə rumu:

⁴⁴«I mun dan mənî na wə də in mi ne nə kə bayrumu: Sôwâ də ar Vay sumra' də ɓa sôwâ məsini.»

⁴⁵Ama sum ta zə rum cu mun zu dan rum mi, zu dan rum pəpe' kədan handay gak mun mi. Bay handay wə ne wəlok dan ci vun rum wa dan rumu.

⁴⁶Sum ta zə Zezu təŋ kə ge dan kuni mbok nji kədan handay we sa nə du nday də suk təŋ su na.

⁴⁷Zezu we dan dīk vunduk nday, zə rum mum tle vay mə nyêw mbə car hay' rum,

⁴⁸bay la' ne ndaya: «Swə mənî ve vay nyêw mənî nə zə rin, bə rum ve nana. Bay swə mənî ve nan, bə rum ve swə mənî sin nan nə ta'a. Zə swə mənî kî mə du ri daŋ', mum nə swə mə toŋo.»

⁴⁹Zaŋ dām dan ini: «Bârî, namba we swə məsin wə 'way gam kə semde ru, bay namba tak num, zə mun cu du mba mi.»

⁵⁰Ama Zezu dām vun rumu: «I tak num mi, zə swə mənî cu kə dan mə bro' wa ri mi, ka bə rum kə ri.»

⁵¹Kəri mənî bəka mənî Ifray wə də tle Zezu də wafray mbə həre', Zezu wa' kədan mum də so Jeruzalem.

⁵²Mum sin sum sin ta kofo rumu. Handay 'ya dle ta cok so məsin dāw wə nya Samari kədan handay gila' ri zə rumu.

⁵³Ama sôwâ so rum cu bə um ve wə han mi, zə mum wa' də so Jeruzalem.

⁵⁴Kəri mənî sum ta zə rum, Zakə kə Zaŋ we ndəna', handay ci vun rumu: «Bârî, ha wa' i mə de ku mə wafray nde mbə wa nday bay ye' nday su?»

⁵⁵Zezu faŋ i kar nday bay dlay nday kə gbəgboŋo.

⁵⁶Bay handay 'ya ta so məsini.

⁵⁷Kəri mənî handay wə vari ɓo, swə dāw la' ne kə Zezu: «Na də ta zə ru wə ri daŋ' mənî ha wə də hana.»

⁵⁸Zezu la' ne numu: «Gewre kə zra nday bay rugwa mə wafray kə so nday, ama Vay sumra' cu kə ri mənî mum gak bar pemây wə han mi.»

⁵⁹Mum la' ne kə swə məsini: «A ta zə rini.» Ama swə nə ini: «Bârî, a ne vari ne nan kədan a də mo' ba man cop ri'i.»

⁶⁰Zezu la' ne numu: «A ar sum mar mo' mar nday, ama ha, a də ka' dan wa dan vari mənî Ifray wə də suk jwə wa sôwâ umu.»

⁶¹Swə məsin ini: «Bârî, na də ta zə ru, ama a ne vari ne nan kədan a də in dāw suk heb ye ne kə sôwâ so man cop ri'i.»

⁶²Zezu la' ne numu: «Swə mənɪ la' tle kava təŋ kura, ɓay mum faŋ i kar ri də kəki si, Ifray cu gak suk jwə wa bə rum mi.»

Luc 10

¹Kəki rum, Bârî da' sôwâ məsin guseda' wa hoɓ ɓay sin nday hoɓ hoɓ ta kofo rum wə so daŋ' mənɪ mum wa' kədan mum də han kə tu rumu.

²Mum la' ne ndaya: «Sin wakaya juk, ama sum sin rum wə cepe. Zə rum, i o bə sine kədan nə sin sum sin məsin kədan handay ɓawa kwa wakaya rumu.

³I də ye! Na mi sin ce' ndə daw cime wə du dəghawa.

⁴I ra' mbu səlay ɓa, ko mbu njay kwa, ko tərak mi, ɓay i ca kaw jeb swə dāw wə vari mi.

⁵Kəri mənɪ hi wə cok də rawti so, i in copo: "Heɓ nə ke wa so mənɪ na."

⁶Swə mənɪ la' həre' kə ve heɓ la' kəta' wə so rum si, kaw jeb mi mə ne heɓ də ke kə rumu. Swə mənɪ la' cu həre' kədan ve heɓ, la' cu han mi si, kaw jeb mi mə ne heɓ nə də faŋ kə ri.

⁷I gay' wə so rum, i ti kwati kə ce kwace mənɪ handay də mi ne wə han, zə bə sin kə vari kədan mum ve bal cik umu. I pā gaŋ də so sôwâ məsin mi.

⁸Kəri mənɪ hi wə cok də so məsin, ɓay sôwâ so rum də mi ve, i ti kwati mənɪ handay də mi ne.

⁹I car sum gaɓ mə so rum, ɓay i in ne ndaya: "Ri mənɪ Ifray wə də suk jwə wa ri nə həre' si."

¹⁰Ama kəri mənɪ hi wə cok də so məsin, ɓay sôwâ so rum cu də mi ve mi, i wur mbə rawti so də vari ɓay i ini:

¹¹"Namba tu' ɓərim so mi mənɪ wə sem mba ta wa ri, ama kə ndi nə daŋ', i we njeŋe: ri mənɪ Ifray wə də suk jwə wa ri nə həre' si.""

¹²«Na in mi ne: kə bəka dan ɓok boni də ke ɓayrum wa so rum pā boni mənɪ wə də ke wa so Sodomə.»

¹³«Boni wa riŋ, so Korazin! Boni wa riŋ, so Betsayda! Zə yew mənɪ na gi kuni wə hay' ri la' gi kəzə wə so Tir kə so Sidoŋ si, ka ɓa' si, sôwâ so rum gay' ta nya, handay ge mbraw zim bor, ɓay handay far but tu nday kədan handay ta' i handay faŋ vunduk ndaya.

¹⁴Zə rum, kə bəka dan ɓok, boni də ke wa riŋ ɓayrum pā boni mənɪ wə də ke wa so Tir kə so Sidoŋ.

¹⁵Bay həŋ, so Kapernawum, həŋ dɪk i Ifray də maŋ tle hā də wafray su? Cu mi! Mum də maŋ jar hā də ri mənɪ sum mar wə hana."

¹⁶Zezu la' ne kə sum ta zə rum kəreme: «Swə mənɪ wə mun dan mi, ka bə rum wə mun dan man ta'a. Swə mənɪ wə mi vad, ka bə rum wə vad nan ta', bay swə mənɪ wə man vad, ka bə rum wə vad swə mənɪ sin nan nə ta'a.»

¹⁷Sum ta zə Zezu mə guseda' wa hoɓ kuni gewa mbə hay' rum kə tuk kədam bay la' ne numu: «Bârî, kə ri mənɪ namba dlay gam kə semde ru, handay mun vun mba.»

¹⁸Zezu dam vun ndaya: «Na we Satan car wafray nde ta nya ce' ndə wədi buŋô.

¹⁹I mun ri'i! Na ne gbəgbon ne ni kədan hi ta wa wu' kə jidwa bay kədan hi tak gbəgbon sum sî mi. Kwa cu mi gi daw mi.

²⁰Ama i tuk kədam i gam mun vun ri mi, zawa i tuk kədam zə semde ri wây' wə du derwa wafraya.»

²¹Kəri rum, Simbed mə Kəleŋ nyen vunduk Zezu kə kədam, bay mum ini: «Bəba, Bârî wafray kə nya, na gi soko ne nu, zə ha ta' kwa mənɪ ke pe' hay' sum gwet kə sum kwawe, ne kə dawre'e. Awo, Bəba, kwa rum gi ndəna' zə ha wa' ndəna'a.»

²²«Ba man ar kwa daŋ' wə ɓa rin, swə daw cu we Vay mi, say Ba Vay, bay swə daw cu we Ba Vay mi, say Vay kə sôwâ mənɪ Vay nə wa' kədan mum um ta' nday ne.»

²³Kəki rum, Zezu faŋ i kar sum ta zə rum bay la' ne ndaya: «Kədam zə i mənɪ we kwa mənɪ hi wə we!

²⁴Zə na wə mi in ne, sum ka' dan juk kə sum jwə juk wa' kədan handay we kwa mənɪ hi wə we, ama handay cu za' we mi, handay wa' mun dan mənɪ hi wə mun, ama handay cu za' mun mi.»

²⁵Swə daw mə du sum pay zu dan dlay mbə hay' Zezu kədan mum um kaw kə dan ge vun, bay mum ci vun rumu: «Bə ta' kwa, na də gi ma kədan na fe nyî mə də hâ su?»

²⁶Zezu ci vun rumu: «Dan dlay mba wə in ma su? Kəri mənɪ ha in dan dlay rum ha mun ma han su?»

²⁷Swə nə dam vun rumu: «A bə Bârî, Ifray wû kə vunduk ru daŋ', kə nyî ru daŋ', kə gbəgbon wû daŋ', bay kə gwet wû daŋ', bay a bə jik wû ce' ndə mənɪ ha bə tu ru.»

²⁸Zezu faŋ la' ne numu: «Ha dam baya. A də gi ndəna', bay ha də ke kə nyî mə də hâ.»

²⁹Ama bə pay zu dan dlay nə wə wa' kədan mum ke njeŋ i sôwâ. Zə rum, mum ci vun Zezu: «Sa nə jik man su?»

³⁰Zezu dam vun rumu: «Swə məsin car mbə so Jeruzalem wə də so Jeriko, kəri rum, sum bargu kwa kaw num, handay kərut mbraw um, pum num bay 'ya ar num han ce' ndə mara.

³¹Bə po' fur mbə pâ wə vari rumu. Kəri mənɪ mum we swə nə, mum fur kə hay' ar numu.

³²Ndəna' ta', swə məsin mbə pâ wə vari rum ta'a. Swə nə zə saŋ Levi, mum ta day hay swə nə, mum kar num bay fur kə hay' ar numu.

³³Ama swə nya Samari məni wə də rəkway tle vari rum ta', mum ta day hay' swə na: Kəri məni mum we num, mum we ca wa rumu.

³⁴Mum ta hay' rum, mum wu' mur kə sum ta mbir rum, bay mum jew mbir rumu. Kəki rum, mum tle num cin wa kor bay ta so dam rəkway kə rumu. Mum kar gaḅ um wə hana.

³⁵Siw rum, mum ra' səlay hoḅ ne kə bə ji so dam rəkway bay la' ne numu: "A kar gaḅ swə nə, bay kəri məni na də faṅ gewa mbə tira, na də wû po' kwa məni ha dənok wə zə rumu."

³⁶Zezu ci vun bə pay zu dan dlay na: Wə du sôwâ mə hinji' məni kuni, ha dîk i sa nə jik swə məni sum bargu kwa gi num nə su?"

³⁷Bə pay zu dan dlay nə dām vun rumu: «Swə məni we ca wa rumu.» Zezu dām vun rumu: «A də ye bay a də gi ndəna' ta'a."

³⁸Kəri məni Zezu kə sum ta zə rum wə vari, handay ta day so məsini. Wə so rum, ma məsin də kə Marta ve num wə so sa.

³⁹Njar sə kəta' də kə Mari, ta suk hay' sem Bârî kə mun dan ta' umu.

⁴⁰Kəri rum, Marta wə cik kə sin cem cem juk wə so. Ta mbə hay' Zezu bay la' ne numu: «Bârî, ha cu tle fur dan məni njar rin ar nan wə cik kə sin cem cem juk daw rin nə mi su? A in ne sə tə kawḅa rin ri'i!"

⁴¹Bârî dām vun sa: «Marta, Marta, həṅ wə cik tu riṅ kə dîk dan zə kwa cem cem juku.

⁴²Ama kwa mə bay daw kəta'a. Mari par kwa mə bay, bay swə cu gak tle kwa rum wə ḅa sə kpe mi.»

Luc 11

¹Fəta məsin, Zezu wə in dan kə Ifray wə ri məsini. Kəri məni mum ndo' in dan kə Ifray si, swə daw wə du sum ta zə rum la' ne numu: «Bârî, a ta' vari in dan kə Ifray ne mba ce' ndə məni Zaṅ ta' ne ke sum ta zə rumu."

²Zezu la' ne ndaya: «Kəri məni hi wə in dan kə Ifray, i ini: Bəba, namba wa' i sôwâ daṅ' mbra' semḁe ru. Namba wa' i a mbə suk jwə wa mba.

³A ne mba kwati i mē' mba bəka daṅ'ṅ.

⁴A vrum kwa mə bro' mba, zə namba kə tu mba wə vrum kwa mə bro' məni sôwâ məsin wə gi hay' mba. 'Bay a də kə mba wə ri məni kwa mə bro' gak mba ḅu han nə mi."

⁵Zezu faṅ in ne ndaya: «I dîk ri'i: Swə daw du ri ta so bây um kə du dukri kədan mum o kwa ḅa rumu: "Bây man, a ne nan vun tləpe' fun hinji' ri',

⁶bây man məsin daw car ri gaṅ mbə so man bay na cu kə kwa məsin kədan na um ne mi."

- ⁷Bay i dik ta'a: Swə mə rawti so nə dām vun bāy umu: "A cik nan mi! Na ta' vun vari si. Na kə daw man daŋ' namba bar ri bar si. Na cu gak car kədan na wû ne fun za' mi,"
- ⁸na in mi ne: Ko mum la' cu də car kədan mum um ne fun zə mum bāy um mi, mum də car um ne kwa mənɪ mum wə wa' zə mum wə um ciki."
- ⁹«Bay na, na in mi ne: i o, bay hi də fe, i keɓ bay hi də za', i tu' vun vari, bay sôwâ də ar vun vari zə ri.
- ¹⁰Zə sa su daŋ' mənɪ wə o, mum də fe, swə mənɪ wə keɓ, bə rum də za', bay swə mənɪ wə tu' vun vari, sôwâ də ar vun vari zə bə rumu.
- ¹¹Ba vay mə ka du ri də ne wu' ne kə vay um kəri mənɪ mum o keve ba rum su?
- ¹²Ko mum də ne jidwa ne kə vay um kəri mənɪ mum o se' sinyek ba rum su?
- ¹³Hi sôwâ mə bro', hi we vari kədan hi ne kwa mə bay ne kə daw mi Ba man mə wafray də ne Simbed mə Kələŋ um ne kə sôwâ mənɪ wə um o pâ kwa mənɪ hi wə gi nə si."
- ¹⁴Zezu 'way gam mənɪ tak swə dan ge dana. Kəri mənɪ gam nə pâ mbə wa swə nə, mum təŋ kə ge dan, bay kwa rum jin' wa ne kə raw sôwâ mənɪ gay' wə hana.
- ¹⁵Ama sôwâ məsin wə du nday ini: «Jwə gam mə də kə Belzebul kə mənɪ ne gbəgboŋ ne num kədan mum 'way gama."
- ¹⁶Sôwâ məsin wə du nday wa' kədan handay um kaw kə dan ge vun. Zə rum, handay ci vun rum kədan nə gi yew mənɪ gak ta' i gbəgboŋ um car mbə hay' Ifray mə wafray ne ndaya.
- ¹⁷Ama Zezu we dan dik vunduk nday, bay mum la' ne ndaya: «Nya daŋ' mənɪ sum nya rum car zi mbok nji, nya rum də dənok, bay so rum də njay də wa so məsini.
- ¹⁸Ndəna' ta', Satan la' car dan wa tu rum si, gbəgboŋ um gak də kofo mə ma su? Hi wə in i na wə 'way gam zə Belzebul ne gbəgboŋ ne nana.
- ¹⁹Na la' wə 'way gam kə gbəgboŋ Belzebul si, kə gbəgboŋ mə sa sum ta zə ri wə 'way gam nə su? Kwa gi sum ta zə ri kə ta nday wə ta' i hi vi' vari si.
- ²⁰Ama na la' wə 'way gam kə gbəgboŋ Ifray si, kwa rum wə ta' i jwə Ifray nə mbə day hay' ri si.
- ²¹Kəri mənɪ bə gbəgboŋ wə ji so um kə kwa zi um, doknay um gak gay' hebe.
- ²²Ama swə mənɪ kə gbəgboŋ pâ num si la' mbə so um si, mum um kaw kulum, swə nə kəy hura kwa zi mənɪ mum cin vunduk rum wa rum, bay mum bul doknay mənɪ mum kəy hura rum ba rum daŋ' ne kə sôwâ məsini.
- ²³Swə mənɪ cu kə rin mi, ka bə rum sî nan, bay swə mənɪ cu kawba rin kə keɓ sôwâ mi, ka bə rum wə nday 'waya."

- ²⁴«Kəri məni gam pā mbə wa swə, mum də gaŋ wə ri məni mbi cu han mi kədan mum keḃ ri pemāya. Mum la' cu za' ri rum mi si, mum ini: "Na faŋ də so man məni na 'ya ara."»
- ²⁵Mum faŋ gewa mbə han, bay mum za' so rum ba bay gila' bay.
- ²⁶Zə rum, mum 'ya ta də gam məsin sēḏa' məni pā num kə bro' si, bay handay mbə cok gay' wə so rumu. Ndəna' suk bə rum faŋ bro' pā mə vun kofo nə si."
- ²⁷Kəki məni Zezu in ndəna', ma məsin wə du raw sōwā in ne numu: «Kəḏam zə ma mēti vra' nu bay ne pa' ne nu!"»
- ²⁸Ama Zezu ḏama: «Zawa, kəḏam zə sōwā məni wə mun dan Ifray bay wə ta zə dan rumu!"»
- ²⁹Kəri məni raw sōwā ba reŋ wa Zezu, mum təŋ kə in dan nday ne: «Sōwā mə tam, handay bro'o. Handay wə ci vun yew, ama Ifray cu də gi yew nday ne mi, say yew məni mum gi kə Zonas.
- ³⁰Zə ce' ndə məni Ifray gi yew kə Zonas zə sōwā so Ninivə, ndəna' ta' Ifray wə də gi yew kə Vay sumra' zə sōwā mə tama.
- ³¹Kə bəka dan bok, ma mēti suk jwə wə nya mə ga' zu də car kor sōwā mə tam kədan ta də tum sem nday, zə ta car mbə nya mə seŋ kədan ta mun dan Salomon məni nyen peḏ kə gwete. Bay kwa məni pā Salomon kə toŋ kəta' wə ti ra.
- ³²Bay kə bəka dan bok, sōwā so Ninivə də car kor sōwā mə tam kədan handay də tum sem ndaya. Zə handay faŋ vunduk nday kəri məni handay mun dan ka' Zonas. Bay kwa məni pā Zonas kə toŋ kəta' wə ti ra."
- ³³«Swə ḏaw cu də ge ku wə baŋgay kədan mum um pe' ko cin də ḏəŋāl mi, zawa, mum um cin wa kwa cin baŋgay kədan sōwā məni cok rawti so rum weri mə bu rumu.
- ³⁴I ru ce' ndə baŋgay mə tu ru. I ru la' bay si, tu ru ḏaŋ' wə ke du ri mə bu. Ama i ru la' kə gaḃ si, tu ru ḏaŋ' wə ke du ri mə ura'a.
- ³⁵La' ndəna' si, a kaw wa ru kədan ri mə bu məni wə tu ru nə faŋ ri mə ura' mi.
- ³⁶Tu ru ḏaŋ' la' wə du ri mə bu si bay kwa tu ru məsin ḏaw la' cu wə du ri mə ura' mi si, tu ru ḏaŋ' də ke du ri mə bu, ce' ndə baŋgay məni wəḏi kə ḏeri mə bu wū ne."
- ³⁷Kəri məni Zezu in dan ndo' si, swə ḏaw mə du kul sōwā Zuwif mə ḏe kə Farisiyen ḏe num kədan mum də ti kwati kə rumu. Zezu ze so um bay suk wə vun tablə.
- ³⁸Swə Farisiyen nə we Zezu cu kol ba rum cop ti kwati mi, bay kwa rum jin' wa ne numu.
- ³⁹Zə rum, Bârî in ne numu: «Ndəna', hi kul sōwā Zuwif mə ḏe kə Farisiyen, hi wə kol ga' ki timbi kə tasaw, ama vunduk ri nyen peḏ kə mē' kəy hura kə dan mə bro'o.
- ⁴⁰Hi laya! Ifray məni gi ga' ki kwa, mum cu kə məni gi ga' rawti kwa ta' mi su?

⁴¹I ne kwa mēni wə rawti timbi kə tasaw mi ne kə sum ca, ɓay kwa ɗaŋ' də ke kələŋ zə ri."

⁴²«Boni wa ri, kul sôwâ Zuwif mə dē kə Farisiyen, zə hi wə ne guɓ kwa kura ce' ndə za say mə wə hay' vari, tlap red kə kwa kura cem cem juk ne kə Ifray, ama hi jed' njeŋ kə bə Ifraya. I gi kwa mēni kuni, dan jed' kwa mēsin rumu.

⁴³Boni wa ri, kul sôwâ Zuwif mə dē kə Farisiyen, zə hi wə keɓ ri suk mə vun kofo wə rawti so Ifray sôwâ Zuwif, ɓay hi wa' i sôwâ kaw jeɓ ri wə ri ɓawa sôwâ.

⁴⁴Boni wa ri, kul sôwâ Zuwif mə dē kə Farisiyen, zə hi ce' ndə 'wəy mēni sôwâ cu we mi ɓay sôwâ wə ta wa rum dan nday we."

⁴⁵Swə ɗaw mə du sum pay zu dan dlay la' ne numu: «Bə ta' kwa, kəri mēni ha in dan ndəna', ha wə mba i."

⁴⁶Zezu ɗama: «Boni wa ri ta', sum pay zu dan dlay, zə hi wə cin kwazi' mə kə mbra' də wa sôwâ, ama hi cu kawɓa nday kə tle kwazi' rum, ko ɗak kə vayɓa ri mi.

⁴⁷Boni wa ri, zə hi wə ɗam kwa mə ɓay wa 'wəy sum ka' dan mēni ba mbri rami ci ndaya.

⁴⁸Ndəna', hi wə ta' i hi kawvun ɗaw kə sin mēni ba mbri rami ke gi. Zə handay ci sum ka' dan, ɓay hi wə ɗam kwa mə ɓay wa 'wəy ndaya.

⁴⁹Zə rum, wə du gwet Ifray, mum ini: "Na də sin sum ka' dan kə sum sin nday ne. Handay də ci sôwâ mēsin du nday, ɓay handay də keɓ zə sôwâ mēsin."

⁵⁰Zə rum, dan mə wa sôwâ mēni ci sum ka' dan ɗaŋ' daka təŋ zu nya faŋ də wa sôwâ mə tam,

⁵¹daka ri mēni swə ɗaw ci Abel hâ day ri mēni sôwâ mēsin ci Zakariya mēni sôwâ ci num mbok du kwa cu kwa po' fur kə jew Ifray, faŋ də wa sôwâ mə tama."

⁵²«Boni wa ri, sum pay zu dan dlaya! Zə hi tle kwa ar vun so kwawe wə ɓa ri: Hi kə tu ri, hi cu ze mi, ɓay hi wə tak sôwâ mēsin mēni wə wa' ze də hana."

⁵³Kəri mēni Zezu 'ya ar ri rum, sum pay zu dan dlay kə kul sôwâ Zuwif mə dē kə Farisiyen təŋ ra' kuni bak kə rum, ɓay handay təŋ kə ci vun rum kə dan cem cem juku.

⁵⁴Handay wa' kədan handay um kaw kə dan ge vun ke mēsin mum də in dan mə bro' su na.

Luc 12

¹Kəri rum, sôwâ raw dle tu si ɓa mbə hay' Zezu hâ handay wə haɓ sem nji. Zezu la' ne kə sum ta zə rum copo: «I ji tu ri wə du dlum kul sôwâ Zuwif mə dē kə Farisiyen, ce' ndə mēni ini: Dan vur vur ndaya.

²Kwa ɗaŋ' mēni pe' sôwâ də we, ɓay dan ɗaŋ' mēni 'yeŋ, sôwâ də munu.

³Zə rum, dan daŋ' mənɪ hi in wə ri mə ura', sôwâ də mun dan rum wə ri mə bu, bay dan daŋ' mənɪ hi in ne kə nji wə rawti so kə vun rəkway, dan rum də do wa dapa."

⁴Bây man kwa, na in mi ne: I ne wəlok sôwâ mənɪ gak ci tu ri mi, ama kəki rum, handay cu gak gi kwa məsin za' mi mi.

⁵Na də mi ta' swə mənɪ hi gak ne wəlok rumu: I ne wəlok Ifray mənɪ mum ci swə, bay kəki rum, mum kə gbəgbəŋ kədan mum ge bə rum də ri ku. Awo, na in mi ne, mum nə swə mənɪ hi gak ne wəlok rumu.

⁶Sôwâ cu coḅ daw i ra' ghər vatl kə səlay hoḅ mi su? Ama Ifray cu dūmwa nday, ko daw mi.

⁷Ko sâ wa ri Ifray in si daw daw daŋ'ŋ. Zə rum, I ne wəlok mi zə hi kə mbra' pâ daw i ra' ghər si.

⁸Na in mi ne: Sa su daŋ' mənɪ wə in kor sôwâ i mum mə na, Vay sumra' də in kor sum sin Ifray mə wafray i bə rum mə mum ta'a.

⁹Ama swə mənɪ wə in kor sôwâ i mum cu we nan mi, Vay sumra' də in kor sum sin Ifray mə wafray i mum cu we bə rum mətə'a.

¹⁰Ifray də vrum dan mə bro' mənɪ swə wə ge wa Vay sumra', ama Ifray cu də vrum dan mə bro' mənɪ swə wə ge wa Simbeḏum mə Kələŋ nə mi.

¹¹«Kəri mənɪ sôwâ də mi ra' də rawti so Ifray sôwâ Zuwif, ko kor sum rôwâ nya, ko kor sum jwə kədan handay bok dan wa ri, i ḏik dan wa dan mənɪ hi wə də in kədan hi də siḏ tu ri kə ndi nə mi.

¹²Zə Simbeḏum mə Kələŋ wə də ta' dan rum mi ne kəri rumu."

¹³Swə daw wə du raw sôwâ la' ne kə Zezu: «Bə ta' kwa, a in ne kə njər rin kədan nə bul bayḏa mənɪ ba mba ar ne mba nə kə rini."

¹⁴Zezu ḏam vun rumu: «Bây man, sa nə cin nan bə bok dan ko bə gura kədan na bul bayḏa du ri su?"

¹⁵Kəki rum, Zezu la' ne kə sôwâ mənɪ wə han daŋ'ŋ: «I mun ri'i! I kaw wa ri du səna' ndaka. Zə ko swə la' ndak juk si, ndak um cu gak um gi suk kə nyî mə də hâ mi."

¹⁶Mum faŋ in dan mə gəgan mənɪ nə ne ndaya: «Bə ndak kəta', sine um gi kwa kura ne num juku.

¹⁷Mum ḏik dan wə vunduk rumu: "Na cu kə ri juk kədan na də njay kwa wakaya man wə han mi." Na də gi ma su?

¹⁸Mum faŋ ini: "Na də gi ndə ni na: Na də haḅ zəna man kuni si, bay na də ḏam zəna mə rôwâ rum, bay na də njay vra' viŋə man daŋ' də han kə kwa mə bay man məsin daŋ' ta'a.

¹⁹Kəki rum, na də in ne kə tu rini: "Ha, ha bə kəcew, ha kə kwa juk mənɪ nja' bay gak gi kim kə ru rawa. A pemây ye, a ti ye, a ce ye, bay a tuk kəḏam ye."

²⁰Ama Ifray la' ne numu: "Ha lay, kə dukri mə tam ha də mara. La' ndəna' si, sa nə də suk kə kwa məni ha ɓa zə tu ru ɗaŋ' nə su?"

²¹Zezu faŋ in kəreme: «Ndəna' ta' kə bə ndak məni wə ɓawa ndak zə tu rum, ama bə rum bə ca kor Ifraya.»

²²Kəki rum, Zezu in ne kə sum ta zə rumu: «Zə rum, na in mi ne: I ɗik dan wa kwati məni hi kə mē' rum zə bəka nyî ri nə mi, ko wa mbraw məni hi kə mē' rum zə tu ri nə mi.

²³Zə bəka nyî ri kə mbra' pâ kwati si, ɓay tu ri kə mbra' pâ mbraw si.

²⁴I kar rugwa fun tayta ri'i: Handay cu jo' kwa ko ɓawa kwa wakaya mi, handay cu kə so njay kwa ko zəna mi. Ama Ifray wə nday uru. ʼBay hi kə mbra' pâ rugwa si.

²⁵Sa du ri gak ge bəka um də han kî kə dan ɗik um nə su?

²⁶Hi la' cu gak gi kwa mə kî mi si, zə mi hi wə ɗik dan wa kwa məni kuni su?

²⁷I kar wəɗi kwa məni wə mbud' du za ri'i: Handay cu gi sin ko ci zim mi, ama na in mi ne: Ko Salomoŋ kə ndak um ɗaŋ' cu ge mbraw mə ɓay pâ wəɗi kwa məni kuni ɗaw mi.

²⁸Ifray wə ge mbraw ne kə za məni wə gop tam, ɓay siw sôwâ də ge ku rum, la' ndəna' si, mum cu də ge mbraw mi ne nday pâ mi su? Hi sôwâ məni ve nan kî!

²⁹Zə rum, i ɗik dan kə keɓ kwati kə kwace bəka ɗaŋ' mi, i cik tu ri mi.

³⁰Sôwâ nya məni cu we Kris mi wə keɓ kwa məni kuni bəka ɗaŋ', ama Ba mi we kwa məni hi kə mē' rum nə si.

³¹Zawa, i ɗik dan wa ri məni Ifray wə də suk jwə wa ri nə cop, ɓay Ifray də mi ne kam kwa məni kuna.”

³²«I ne wəlok mi, kul mə kî məni wə mun vun, zə Ba mi wə mi ne vari kədan hi suk wə jwə umu.

³³I coɓ kwa mə ɓa ri də rəka, ɓay i ne səlay rum ne kə sum ca. I keɓ mbu səlay məni cu gak ɗənok mi. I ɓawa ndak mi də wafraŋ, ri məni ndak rum cu ndo' kpe mi. Wə ri rum hura cu gak cok də han kpe mi, ɓay kwa far kwa cu gak ti ndak rum kpe mətə'a.

³⁴Zə wə ri məni hi ɓawa ndak mi wə han, vunduk ri wə han ta'a.”

³⁵«I ɓaŋ tu ri, ɓay i ge ku də ɓaŋgay mi.

³⁶I ke ce' ndə sum sin məni wə ji bârî nday məni car mbə ri cer dər gewa mbə so umu. Handay wə ji kədan handay də ar vun vari um ne kəri məni mum də mbə ɓay tu' vun vari rumu.

³⁷Kəɗam zə sum sin məni bârî nday za' nday wə um ji kəri məni mum mbə daya. Na in mi ne kəzin', mum də ɓaŋ tu rum, mum də nday gi gay' vun tablə kədan handay ti kwati, ɓay mum də car kədan gi zə ndaya.

- ³⁸Mum la' gewa mbə bây hoḅ ko bây hinji' rum kə du dukri ko kəri mə ka su daŋ' si, mum nday za' handay wə um ji, kəḏam ze ndaya!”
- ³⁹«I mun ri'i: Bə so la' weri məni hura wə mbə kədan mum ze so um si, mum cu də um ar ze də so um mi.
- ⁴⁰Bay hi ta', i ke həre', zə Vay sumra' wə də mbə kəri məni hi cu ḏik mi.”
- ⁴¹Piyer ini: «Bârî, ha in dan mə gəgan rum zə mba taw su, ko zə sôwâ daŋ' su?”
- ⁴²Bârî ḏama: Sa nə bə sin mə njeŋ kə gwet nə su? Mum nə swə məni bârî um də ne gbəgboŋ wa sum sin um kədan mum ne kwati nday ne kəri kwati rumu.
- ⁴³Kəḏam zə bə sin məni bârî um də um za' wə gi sin kəri məni mum gewa mbə so umu!
- ⁴⁴Na in mi ne kəzin', Bârî nə də ar kwa um daŋ' də ɓa bə sin na.
- ⁴⁵Ama bə sin la' ḏik wə vunduk rumu: "Bârî man cu də mbə ga'ri mi" ɓay mum təŋ kə pum sum sin mə njiwkwa kə mə rawkwa məsin, ɓay mum təŋ kə ti kwati kə ce kwace hâ mum faŋ gal kə ndi si,
- ⁴⁶ɓay bârî um də gewa mbə kə bəka məni bə sin nə cu um ji mi, ko kəri məni mum cu we mbə um mi, bârî nə də um ci, ɓay mum də ce boni wanji kə sum vur vuru.
- ⁴⁷«Bə sin məni we kwa məni bârî um wə wa', ama mum cu tle fur gi kwa rum mi, mum də fe pe juku.
- ⁴⁸Ama bə sin məni cu we kwa məni bârî um wə wa' nə mi, ɓay mum gi kwa məni kəri fe pe, mum də fe pe kî. Swə məni swə ne kwa juk ne num, swə nə də ci vun kwa juk ɓa rum ta'a. Swə məni swə ar kwa juk wə ɓa rum, swə nə də ci vun kwa məni pâ kwa mə ɓa rumu.”
- ⁴⁹«Na mbə kədan na ge ku wə nya, ɓay na wə wa' i ku rum nə ye'e!
- ⁵⁰Baptem kəta' məni na wə də ve, ɓay na wə du dan ḏik hâ ka kwa rum gi ndo' si!
- ⁵¹Hi ḏik i na mbə kədan na ne heḅ wa nya su? Cu mi, na in mi ne, ama bul nji na.
- ⁵²Daka mgbaŋ ni nə, sôwâ vatl wə cava mə ḏaw, də bul nji: Sôwâ hinji' də car wa kə sôwâ hoḅ, ɓay sôwâ hoḅ də car wa kə sôwâ hinji'i.
- ⁵³Ba vay də car wa kə vay um, ɓay vay də car wa kə ba um, ya vay də car wa kə vay sə, ɓay vay də car kə wa kə ya sə,inja də car wa kə mok vay sə, ɓay mok vay də car wa kəinja sa.”
- ⁵⁴Zezu faŋ in ne kə raw sôwâ kəreme: «Kəri məni hi we dləmbur car ga' fəta riya, hi in ga'ri: "buŋô wa' də se", ndəna' buŋô wə se.
- ⁵⁵Bay kəri məni hi we simbed' car mbə ga' zu wə sa', hi ini: "Ri wə də ḏuk ɓayrum", ɓay ri wə ḏuku.

⁵⁶Hi sum vur vur, hi gak we bul mbok kwa ta' kwa mə nya kə kwa ta' kwa mə wafray, zə mi hi cu gak we kwa ta' kwa mə bəka mə tam nə mi su?"

⁵⁷«Zə mi hi kə tu ri cu gak kənji' kwa mə njeŋ kədan hi gi mi su?

⁵⁸Swə la' tum sem ru bay mum də kor bə bok dan kə ru si, a keɓ vari gila' dan wû kə rum kə ri mənɪ hi wə vari ɓo, la' cu mi si, mum də wû ar də ɓa bə bok dan, bay bə bok dan nə də wû ar də ɓa soje, bay soje nə də wû ge də so daŋgay'i.

⁵⁹Na in wû ne: Ha cu də pâ mbə han mi hâ ha po' bal mənɪ wə wa ru nə si cete!»

Luc 13

¹Kəri rum, sôwâ məsin mbə hay' Zezu. Handay in dan mənɪ i Pilatə ci sôwâ mə nya Galile kəri mənɪ handay wə po' fur kor Ifray nə ne numu.

²Zezu dām vun ndaya: «Hi dīk i sôwâ mə nya Galile mənɪ kuni fe mar zə handay gi kwa mə bro' pâ sôwâ məsin daŋ' mə nya rum su?

³Cu mi, na in mi ne, ama hi la' cu faŋ vunduk ri mi si, hi daŋ' də mar ce' ndə handaya.

⁴Bay ɓa' si, sôwâ guɓ wa coho' fe mar kəri mənɪ so mə dām mbud' kədan ji ri mənɪ wə so Silowe nde kaw nday, hi dīk i handay fe mar zə handay gi kwa mə bro' pâ sôwâ məsin daŋ' mənɪ suk wə so Jeruzalem su?

⁵Cu mi, na in mi ne, ama hi la' cu faŋ vunduk ri mi si, hi daŋ' də mar ce' ndə handaya."

⁶Kəki rum, Zezu in dan mə gəgan mənɪ nə ne ndaya: «Swə məsin pe gu tərɪm wə sine gu umu. Mum ta han kədan mum keɓ vra' rum, ama mum cu za' mi.

⁷Zə rum, mum la' ne kə bə ji sine: "A kar ri', wə du kim hinji' na wə keɓ vra' rum, ama na cu za' mi. A tum si. A ar sə kədan tə tle gbəgboŋ nya uray mi."

⁸Ama bə ji sine nə dām vun rumu: "Bârî, a ar sə suk kim daw kərem, na də dla zra gan zu sə, bay na də njay soɗ'kwa wə hana.

⁹Ndəna', ke məsin ta də vra' siwti su na. La' cu mi si, a də tum ɓo ye."«

¹⁰Kə fəta pemây sôwâ Zuwif, Zezu wə ta' kwa wə rawti so Ifray sôwâ Zuwif.

¹¹Ma məsin kəta' wə han kə gaɓ dəduŋ mənɪ simbed' bro' sə gi. Ta gi kim guɓ wa coho' kə gaɓ rum, bay ta cu gak car dat mi.

¹²Kəri mənɪ Zezu we ma rə, mum dɛ sə bay la' ne sa: «Mə jwə, gaɓ maŋ ndo' si!"

¹³Mum njay ɓa rum ta wa sə, bay kəkor sar, ta car dat bay təŋ kə gi mbra' ne kə Ifraya.

¹⁴Ama təŋ ji so Ifray sôwâ Zuwif tle bak zə Zezu car ma rə kə fəta pemây sôwâ Zuwif, zə rum, mum in ne kə raw sôwâ mənɪ gay' wə hana: «Bəka kanki' kəta' mənɪ hi gak gi sin kə ndi. I mbə keɓ car gaɓ mi du bəka rum, ama i mbə kə fəta pemây sôwâ Zuwif mi."

- ¹⁵Bârî dām vun rumu: «Hi sum vur vur, hi cu ulay' naw mi ko kor mi kēdan hi dē nday jew wa vok ko ne mbi nday ne ce kē fēta pemây sôwâ Zuwif mi su?
- ¹⁶Bay ma mē ti ra, ta vay rawti Abraham, mēti Satan jew sē gi kim guḍ wa coho', na cu gak sē ulay' kē fēta pemây sôwâ Zuwif mi su?»
- ¹⁷Dan dām Zezu gi zur kē sum sî um daŋ', bay raw sôwâ mēni gay' wē han tuk kēdam zē sin mē bay daŋ' mēni mum gi.
- ¹⁸Zezu ini: «Jwē Ifray nē ra' nji kē mi su? Na gak kēnji' vari rum kē mi su?
- ¹⁹Vari rum ra' nji kē i mafo' mēni swē tle bay jo' du sine umu. I rum ci bay jēŋ faŋ ya gu mē toŋ, bay rugwa mē wafray mbē dām so nday wē ba sa.»
- ²⁰Zezu faŋ in kēreme: «Na gak kēnji' vari mēni Ifray wē dē suk jwē wa sôwâ um kē mi su?
- ²¹Vari rum ra' nji kē dlum mēni ma tle bay tlum fut mē kē kwa kēnji' kwa hinji' hā fut rum daŋ' hulumu.»
- ²²Kēri mēni Zezu wē dē so Jeruzalem, mum pā wē so mē rōwā kē so mē dēre', bay mum wē ta' kwa wē hana.
- ²³Swē mēsin ci vun rumu: «Bârî, sôwâ cep mba' dē ke kē nyî mē dē hā su?» Zezu dām vun ndaya:
- ²⁴«I gi tu ri kē gbēgboŋ kēdan i ze vun vari mē kî, zē na in mi ne: Sôwâ juk dē kēb kēdan handay cok dē han, ama handay cu gak mi.»
- ²⁵«Kēri mēni bē so wē dē car ta' vun vari, hi dē za' tu ri wē rēka, hi dē tu' vun vari bay dē dē: "Bârî, a ar vun vari ne mba", mum dē dām vun ri: "Na cu we ri mēni car mbē han nē mi",
- ²⁶hi dē tēŋ kē um la' ne: "Namba ti kwati bay ce kwace kē ru, ha ta' kwa ne mba wē vari so mba ta'a.»
- ²⁷Mum dē mi in kēreme: "Na cu we ri mēni car mbē han nē mi. I 'ya hay' rin sēŋ, hi sôwâ mēni wē gi kwa mē bro'o!"
- ²⁸Wē han hi dē ci' bay cwē se' kēri mēni hi we Abraham, Isak, Yakub kē sum ka' dan daŋ' wē ri mēni Ifray suk jwē wa nday, ama hi dē za' tu ri rēka.
- ²⁹Sôwâ dē car ga' fēta bēka kē ga' fēta riya, bay ga' wa kē ga' zu, bay handay dē gay' vun tablē wē ri mēni Ifray wē dē suk jwē wa ndaya.
- ³⁰«Wē ri rum, sôwâ mēni vun kofo tam, handay dē faŋ sôwâ mē kēki, bay sôwâ mēni sôwâ mē kēki tam, handay dē faŋ sôwâ mē vun kofo.»
- ³¹Kēri rum, sôwâ mēsin mē du kul sôwâ Zuwif mē dē kē Farisiyen mbē hay' Zezu bay la' ne numu: «A 'ya ti dē ri mēsin, zē Herodē wē wa' kēdan mum wû ci.»
- ³²Zezu dām vun ndaya: «I dē in ne kē gewre mē nay' na: Tam kē siw na wē 'way gam bay wē car gaḍ, bay wē du bēka hinji' rum na dē ndo' sin mana.

³³Ama say na dɛ kofo kɛ vari man tam, siw kɛ sɛday', zɛ cu bay kɛdan bɛ ka' dan fe mar rɛka so Jeruzalem mi."

³⁴«Jeruzalem, Jeruzalem, hɛɲ kɛ mɛni ci sum ka' dan bay gɛ sɔwâ mɛsin mɛni Ifray sin nday wɛ hay' riɲ kɛ gway', sem ma dak na wɛ keɓ kɛdan na bawɛ sɔwâ maɲ mbɛ hay' rin ce' ndɛ ya sinyek wɛ bawɛ daw sɛ zɛ lam tlaw sɛ su? Ama hi cu bɛ mi.

³⁵I kar ri'i! Ifray dɛ ar so mi. Na in mi ne, hi cu dɛ man we za' mi, hâ day ri mɛni hi dɛ in: Ifray nɛ kuswa' swɛ mɛni mbɛ kɛ semdɛ Bârî!»

Luc 14

¹Kɛ fɛta pemây sɔwâ Zuwif, Zezu ta so bârî mɛ du kul sɔwâ Zuwif mɛ dɛ kɛ Farisiyen kɛdan mum ti kwati wɛ hana. Sɔwâ mɛni gay' wɛ han wɛ kar Zezu kɛ bayrumu.

²Swɛ mɛsin mbɛ kor Zezu, mum kɛ gaɓ tu mɛ fufu'u.

³Zezu ci vun sum pay zu dan dlay kɛ kul sɔwâ Zuwif mɛ dɛ kɛ Farisiyen: «Dan dlay mba ne vari ne mba kɛdan namba car gaɓ kɛ fɛta pemây sɔwâ Zuwif su? Ko cu mi su?"

⁴Ama handay cu bɛ dɛm dan vun rum mi. Zezu faɲ tle bɛ gaɓ nɛ, car num, bay ar vari ne numu.

⁵Kɛki rum, Zezu ci vun ndaya: «Swɛ dɛw du ri la' kɛ vay ko naw mɛni nde ta zra mbi si, bɛ rum cu dɛ um tle ga'ri, ko fɛta pemây sɔwâ Zuwif mi su?"

⁶Handay cu gak dɛm dan vun rum mi.

⁷Zezu kar vari mɛni sɔwâ mɛni fe dɛ wɛ keɓ ri suk mɛ bay, zɛ rum, mum in dan mɛ gɛgan mɛni nɛ ne ndaya:

⁸«Kɛri mɛni swɛ mɛsin wû dɛ kɛdan ha ti kwati wɛ ri dɛr, a dɛ keɓ ri suk mɛ bay mi, zɛ ke mɛsin swɛ mɛ toɲ mɛni pâ nu si fe dɛ han ta',

⁹bay swɛ mɛni dɛ ni hoɓ jak nɛ mbɛ hay' ru bay tɛɲ kɛ ini: "A ar ri suk mɛ ni nɛ ne numu". La' ndɛna' si, ha car kɛ zur wa, bay ha dɛ suk wɛ ri suk mɛ kɛki sɔwâ daɲ'ɲ.

¹⁰Zawa, kɛri mɛni ha fe dɛ, a dɛ suk wɛ ri suk mɛ kɛki, hâ swɛ mɛni dɛ nu nɛ mbɛ hay' ru bay ini: "Bây man, a car mbɛ suk ti kofo." Ndɛna' kwa rum dɛ ke kɛ mbra' zɛ ru kor sɔwâ daɲ' mɛni dɛ gay' vun tablɛ kɛ ru.

¹¹Zɛ sa su daɲ' mɛni wɛ mbra' tu rum, bɛ rum dɛ nde, bay swɛ mɛni wɛ hom tu rum, bɛ rum dɛ fe mbra'a."

¹²Kɛki rum, Zezu la' ne kɛ swɛ mɛni dɛ num na: «Kɛri mɛni ha wɛ gi kwati kɛdan ha ne kɛ sɔwâ, a dɛ bâɲ wû, ko daw ya wû, ko bray wû ko jik wû mɛ ndak mi, zɛ fɛta mɛsin handay gak wû dɛ kɛ kwati ta'a. La' ndɛna' si, ka handay faɲ kwa rum wû ne zɛ kwa mɛni ha ne ndaya.

¹³Ama kɛri mɛni ha wɛ gi cer, a dɛ sum ca, rɛɓo, lem kɛ dɛɲâra.

¹⁴Ha də tuk kədam, zə handay cu gak wû faɲ ne mi. Ifray də faɲ kwa rum wû ne kəri mənɪ mum də ra' sôwâ mənɪ gi kwa mə ɓay mbə mara.”

¹⁵Kəri mənɪ swə ɗaw wə du sôwâ mənɪ gay' wə vun tablə mun dan rum, mum la' ne kə Zezu: «Kədam zə swə mənɪ wə də ti kwati wə ri mənɪ Ifray wə də suk jwə wa sôwâ umu!”

¹⁶Zezu in ne numu: «Swə məsin wə də gi cer mə mbri, ɓay mum ɗe sôwâ juku.

¹⁷Kəri mənɪ ri cer rum mbə si, mum sin bə sin um kədan mum nday ɗe: "I mbə ye, zə kwa ɗaɲ' gila' si.”

¹⁸Ama handay ɗaɲ' təɲ kə gi vur vuru. Swə mə vun kofo la' ne kə bə sini: "Na coɓ sine, ɓay na də kar rum, na o nu a ar vari ne nana.”

¹⁹Swə məsin la' ne numu: "Na coɓ naw kura i jew wa nday vatɪ, ɓay na də tuk kura kə ndaya. Na o nu, a ar vari ne nana.

²⁰Bay swə məsin kərem la' ne numu: "Na cin ma kə mbrew, zə rum, na cu gak də mi.”

²¹Bə sin nə faɲ ta hay' bârɪ um ɓay in zu dan rum ne numu. Bə so nə tle bak ɓay la' ne kə bə sin umu: "A ɗəma ga'ri də ri ɓawa sôwâ kə vari mbok so, ɓay a ɗe sum ca, rəbo, ɗəɲâr, kə lem mbə kə ndaya.”

²²Kəki rum kɪ, bə sin nə mbə ini: "Bârɪ, na gi kwa mənɪ ha in ne nan nə si, ama ri suk gwa' kəta' ɓo.”

²³Bârɪ nə faɲ la' ne kə bə sin umu: "A də vari kukura kə vari mə du za, ɓay a də ra' sôwâ wə han mbə kə nday kədan so man nyen kə sumra'a.

²⁴Na in mi ne, swə ɗaw wə du sôwâ mənɪ na ɗe nday cu də ti kwati man kpe mi!”“

²⁵Sôwâ raw dle tu si wə ta vari kə Zezu. Mum faɲ i, ɓay la' ne ndaya:

²⁶«Swə mənɪ mbə hay' rin cu gak ke bə ta zə rin mi, say nə bə nan pâ ba um, ya um, ma rum, daw um, daw ya um mə njiwkwa, daw ya um mə rawkwa, ɓay tu rumu.

²⁷Swə mənɪ cu tle gu gay' tu rum ɓay ta zə rin mi, bə rum cu gak ke bə ta zə rin mi.

²⁸Swə ɗaw du ri la' wa' kədan mum ɗam so mə mbud'kədan ji ri si, bə rum də suk nya cop, ɓay mum keɓ kədan mum we so rum də ti səlay ma ɗak su na. Mum gi ndəna' kədan mum kar səlay la' kəta' wə ɓa rum kədan mum gak ndo' sin rum si su na.

²⁹La' cu mi, mum la' tor zu so rum, ama mum cu gak gi sin rum ndo' mi si, sôwâ ɗaɲ' mənɪ we kwa rum wə də um mâya.

³⁰Handay də ini: "Swə mə ni nə təɲ kə ɗam so, ama mum cu gak ndo' sin rum mi!”“

³¹«Ndəna' ta', jwə məsin la' wa' kədan mum də zi kə jwə məsin si, mum də suk nya cop kədan mum ɗik dan mum kə sôwâ raw nday i mbu guɓ la' gak ndewa kə jwə məsin mənɪ wə mbə wa rum kə sôwâ raw nday i mbu guhoɓ si su na.

³²Mum la' cu gak gi mi si, mum sin sum sin hay' jwə məsin, kəri məni mum seŋ bo, kədan mum ci vun vari suk heḅ kə rumu.”

³³Zezu faŋ in kəreme: «Ndəna' ta', swə ḏaw du ri cu gak ke bə ta zə rin mi, say bə rum nə ar kwa ḏaŋ' məni wə ba rum də rəka.”

³⁴«Vu nə kwa mə ḏay na, ama vu la' so' walak um si, swə gak gi ma kədan mum um gi faŋ walak kərem su?

³⁵Vu rum cu ḏay zə nya ko zə cim ri za' mi, swə də ra' soḏ'um njay də rəka. Swə məni kə hum mun dan kəta', say bə rum nə munu.»

Luc 15

¹Sum ḃawa grama kə sum gi kwa mə bro' mbə kuni hay' Zezu kədan handay mun dan umu.

²Kul sôwâ zuwif mə ḏe kə Farisiyen kə sum pay zu dan dlay mgbərum kuni dan mbok nji. Handay ini: «Swə məni nə wə ve sum gi kwa mə bro' ḏay mum wə ti kwati kə ndaya.”

³Zə rum, Zezu in dan mə gəgan məni nə ne ndaya:

⁴«Swə ḏaw du ri la' kə cime kis si, ḏay ḏaw du nday vi', bə rum cu də ar cime mə gu cefadew wa cefadew məsin wə gop, ḏay 'ya kədan mum də keḅ cime məni vi' hâ mum um za' mi su?

⁵Bay kəri məni mum za' num, mum wə tuk kəḏam juk, mum wə tle cime nə cin bəke ḃa rum,

⁶ḏay mum la' faŋ də so um si, mum ḏe bây um kə jik um ḏay mum la' nday ne: "I tuk kəḏam kə rin, zə na za' cime man məni ke vi' nə si!”

⁷Ndəna' ta', na in mi ne, sôwâ mə so Ifray mə wafray wə də tuk kəḏam kəri məni bə gi kwa mə bro' ḏaw faŋ vunduk rum pâ sôwâ mə njeŋ gucefadew' wa cefadew' məni cu kə mē' faŋ vunduk nday mi nə si.”

⁸«Ko ma məsin la' kə səlay guḅ si, ḏay ḏaw du nday vi', ta cu də ge ku wə baŋgay, ḃa rawti so sə, ḏay keḅ ri 'yeŋ 'yeŋ hâ ta za' səlay rum mi su?

⁹Bay kə ri məni ta za' səlay rum, ta ḏe bây sə kə jik sə ḏay la' ne ndaya: "I tuk kəḏam kə rin, zə na za' səlay man məni ke vi' nə si!”

¹⁰Ndəna' ta', na in mi ne, sum sin Ifray mə wafray wə də tuk kəḏam kəri məni bə gi kwa mə bro' ḏaw faŋ vunduk rumu.”

¹¹Zezu faŋ in kəreme: «Swə məsin kəta' kə daw mə njiwkwa hoḃo.

¹²Vay mə nyêw la' ne numu: "Bəba, a ḃul bayḏa kwa məni ha wə də man ne nə, ne nan ye." Zə rum, ba um ḃul bayḏa kwa rum ne nday hoḃ jaka.

- ¹³Kəki rum bəka cep, vay mə nyêw nə ra' vun kwa mə mum coḅ, ḅay 'ya kə səlay rum ta nya mə seṅ rum, wə han, mum dənok səlay kə gi sin kwa mə bro'o.
- ¹⁴Kəri mənɪ mum dənok səlay rum ndo' si, mē' mə mbri faṅ nde wə nya rum, ḅay mē' təṅ kə um ti.
- ¹⁵Zə rum, mum 'ya ta gi sin kə swə məsin wə nya rum, ḅay swə nə sin num ta rəka kədan mum ji ziṅ wə hana.
- ¹⁶Mē' kədan mum ti vra' gu mənɪ ziṅ wə ti wə um ti, ama swə dāw cu um ne mi.
- ¹⁷Zə rum, mum təṅ kə dɪk dan wə vunduk rumu: "Sum sin ba man daṅ' kə kwati juk pā wa nday, ḅay na, na wə mar mē' tira!
- ¹⁸Na də car 'ya faṅ də so ba man, ḅay na də in um ne: Bəba, na gi kwa mə bro' hay' Ifray ḅay hay' ru ta'a.
- ¹⁹Na cu nde i kədan ha man dē kə vay wū mi. A gi nan ce' ndə bə sin wū."
- ²⁰Bay mum car 'ya kədan mum faṅ də so umu.» Kəri mənɪ mum seṅ kə so ḅo, ba um we num ta, ḅay mum we ca wa rumu: Mum ne ta ndewa kə rum, mum kaw num mbə vunduk ḅay soḅ num kə vunu.
- ²¹Vay nə la' ne numu: "Bəba, na gi kwa mə bro' hay' Ifray mə wafray ḅay hay' ru ta'a. Na cu nde i kədan ha man dē kə vay wū mi."
- ²²Ama ba um in ne kə sum sin umu: "I dēma ga'ri keḅ mbraw mə ḅay pā daṅ' rum, ḅay i ge ne numu. I no' tēga' də ne num vay ḅa, ḅay i no' tərak də ne num seme.
- ²³I keḅ vay naw mənɪ namba ur, ḅay i fol num, ḅay mə də gi cer,
- ²⁴zə vay man mənɪ nə ke ce' ndə mar, ama mgbaṅ ni nə mum faṅ car i si, mum ke vi', ama mgbaṅ ni nə na za' num si." Bay handay təṅ kə gi cere.
- ²⁵Kəri rum, vay mə mbri swə nə ke wə sine. Kəri mənɪ mum gewa mbə hərə' kə so, mum mun ci' kwa ru kə dla'a.
- ²⁶Mum dē swə dāw wə du sum sin ḅay ci vun rumu: "Mi wə gi nə su?"
- ²⁷Bə sin nə dām vun rumu: "Njər ru gewa si, ḅay ba wū fol vay naw mənɪ namba ur nə, zə vay um gewa mbə za' num heḅe."
- ²⁸Vay mə mbri tle bak, ḅay mum cu mun ze də so mi. Ba um pā ḅay o num kədan mum də ze so.
- ²⁹Ama vay nə dām vun ba umu: «"A kar ri', na gi sin kə ru kim raw, ḅay na cu vad' dan dlay wū ko dāw kpe mi. Ama ha cu ne ko vay huḅē dāw ne nan kədan na tuk kədam kə bāy man kuni kpe mi!
- ³⁰Ama kəri mənɪ vay wū mənɪ ta dənok kwa wū kə rawkwa mə gi nja nə gewa mbə, ha fol vay naw mənɪ namba ur nə ne numu!"

³¹Ba um la' ne numu: "Vay man, ha kəta' kə rin bəka daŋ', bay kwa daŋ' mənɪ na kə ndi mə ha ta'a.

³²Ama namba wə gi cer bay tuk kədam zə njer ru mənɪ nə ke ce' ndə mar, ama mgbaŋ ni nə mum faŋ car i, mum ke vi' ama mgbaŋ ni nə na za' num si!"»

Luc 16

¹Zezu in ne kə sum ta zə rumu: «Bə ndak məsin kəta' mənɪ kə bə ji səlaya. Sôwâ məsin mbə in ne num i bə ji səlay um wə dənok səlay umu.

²Bârî nə dɛ bə ji səlay um bay ci vun rumu: "Na wə mun dan mi wa ru su? A in kwa mənɪ na ar wə ba ru nə daŋ' ne nan, zə ha cu də ke bə ji səlay man za' mi."

³Bə ji səlay nə dɪk dan wə vunduk rumu: "Bârî man wə də man 'way wa sin mana. Na də gi ma su? Na cu kə gbəgboŋ kədan na kura mi, bay kədan o kwa, zur wə də man gi.

⁴Ahâ! Na we kwa mənɪ na wə də gi nə si, ndəna' kəri mənɪ bârî man də man 'way wa sin, sôwâ məsin də man ve so ndaya."

⁵Mum faŋ dɛ sôwâ daŋ' mənɪ ra' bal ba bârî um bay mum ci vun swə mə vun kofo: "Ha kə bal bârî man wa ru ma dak su?"

⁶Mum dam vun rumu: "Na ra' mur olivə kə gula kis dawa." Bə ji səlay nə la' ne numu: "A tle dɛrwa wû, bay a wây' ga'ri də han guvatla."

⁷Mum faŋ ci vun swə məsini: "Mə ha ma dak su?" Mum dam vun rumu: "Na ra' u kə mbu kor kis dawa." Bə ji səlay nə la' ne numu: "A tle dɛrwa wû, bay a wây' gucho'o."

⁸Bârî nə sâ' bə ji səlay um mə bro' mənɪ dənok səlay um nə, zə mum gi kwa kə gwete. Zə sôwâ nya mənɪ nə wə gi kwa kə gwet du nday pâ sôwâ mə ri mə bu si."

⁹Zezu faŋ in kəreme: «Bay na in mi ne: I gi bây kə ndak mə wa nya mə bu kwa, zə kəri mənɪ ndak rum ndo', handay də mi ve wə so mə də hâ.

¹⁰Swə mənɪ wə gi njeŋ kə kwa mə kî, bə rum də gi njeŋ kə kwa mə toŋ ta'a. Swə mənɪ wə gi vur vur kə kwa mə kî, bə rum də gi vur vur kə kwa mə toŋ ta'a.

¹¹Ndəna' ta', hi la' cu gi njeŋ kə vari mənɪ hi wə gi sin kə ndak mə wa nya mənɪ nə mi si, sa gak də ar ndak mə kəzin' wə ba ri su?

¹²Bay hi la' cu gi njeŋ kə kwa mə bay sôwâ məsin mi si, sa də ne kwa mə hi mi ne su?"

¹³«Bə sin daw cu gak gi sin zə sum rôwâ hoɓ mi: Mum də sî swə daw bay mum də bə swə məsin, mum də gi njeŋ hay' swə daw, bay mum də jed swə məsini. Hi cu gak gi sin zə Ifray bay səlay hoɓ jak wə ri mə daw mi."

¹⁴Kul sôwâ Zuwif mə dɛ kə Farisiyen mun dan daŋ' mənɪ Zezu in, bay handay mây num, zə handay wə bə səlay juku.

- ¹⁵ Zezu la' ne ndaya: «Hi sôwâ mœni wə gi tu ri njeŋ kor sôwâ, ama Ifray we vunduk ri si: Zə kwa mœni sôwâ wə kar kə mbra' i nday, Ifray wə kar kwa rum bro'o.»
- ¹⁶ «Dan dlay Moyizə kə dan mœni sum ka' dan wây' kuni suk hâ mbə day ri Zaŋ-Baptistə. Daka kəri rum, sôwâ ka' Dan mə Kədam mœni wə in dan wa dan jwə Ifray, bay swə daw daw daŋ' wə keɓ kədan mum ze wə han kə gbəgboŋo.»
- ¹⁷ Ama kədan dan mə kî wə du dan dlay də ndo' kəcik pā mœni wafray kə nya də ndo'o.
- ¹⁸ «Sasu daŋ' mœni bur ma rum, bay faŋ cin ma mœsin, bə rum gi nja. Bay swə mœni cin ma mœti nji sə bur sə, bə rum gi nja ta'a.»
- ¹⁹ «Fəta mœsin, bə ndak kəta' mœni mum wə ge mbraw siliki mə tlew mœni coɓ rum kəcik, bay bəka daŋ' mum wə ti kwati mə kədama.
- ²⁰ Bə ca kəta', um dē kə Lazar, tu rum daŋ' kə mbir bay mum bar wə vun vari so bə ndak na.
- ²¹ Mē' kədan mum ur tu rum kə bubud' kwati mœni njay də nya zə tablə bə ndak wə um ti. Bay da wə mbə təna' mbir rumu.
- ²² Bə ca nə mar, bay sum sin Ifray mə wafray tle num ta hay' Abraham wafraya. Bə ndak mar ta', bay sôwâ mo' numu.
- ²³ Bə ndak ce boni juk wə ri gay' sum mar wə han, mum tle i bay we Abraham ta seŋ kə Lazar hay' rumu.
- ²⁴ Zə rum, mum ka' dana: "Bəba Abraham, a we ca wa rin, bay a sin Lazar kədan mum də jol mbi kə wa vayɓa rum bay mbə cin də ne nan wə se'le rin, zə na wə ce boni juk wə du ku mœni na.
- ²⁵ Ama Abraham la'a: "Vay man, a dīk dan kwa mə bay juk mœni ha ke fe kəri mœni ha ke kə i wa nya nə ri, ama kəri rum, Lazar ke ce boni juku. Kə mə mgbaŋ ni nə mum wə tuk kədam wə ti ra, ama ha, ha wə ce boni.
- ²⁶ Pā daŋ' rum, zra mə ciriŋriŋ kəta' wə mbok mba kə ri, ndəna' sôwâ mœni wə wa' car wə ti kədan də hay' ri kəna cu gak mi, bay sôwâ cu gak car wə hay' ri kədan mbə wə hay' mba mœta'a.»
- ²⁷ Bə ndak la'a: "La' ndəna' si, bəba, na o nu kədan a sin Lazar də so ba man,
- ²⁸ zə na kə njər vatl wə hana. A ar vari ne num kədan nə də dlay nday kədan handay mbə ti wə ri boni mœni nə ta' mi.»
- ²⁹ Abraham dāma: "Daw ya wû kə Moyizə kə sum ka' dan kuni kəta' kədan handay nday dlay, say kuni mun vun ndaya.»
- ³⁰ Bə ndak dāma: "Bəba Abraham, dan rum cu gak nde mi. Ama swə la' car i bay faŋ ta hay' nday si, handay də faŋ vunduk ndaya.»

³¹Ama Abraham la' ne numu: "Handay la' cu mun dan Moyizə kə sum ka' dan kuni mi si, ko swə la' car i bay faɲ ta hay' nday si, handay cu də mun mi."»

Luc 17

¹Zezu la' ne kə sum ta zə rumu: «Kwa mənɪ wə bu sôwâ kədan handay gi kwa mə bro' wə də mbə kəta' ndə gbê', ama kəcik zə swə mənɪ mbə kə kwa bu rumu.

²Pram zə bə rum, sôwâ jew gway' vəna wə jewre rum bay tle num ge də ya mbi, pā mənɪ mum la' wə bu vay dāw du dawre' mənɪ kuni nde də du kwa mə bro' si.

³I kaw wa ri. Vay ba wû la' gi kwa mə bro' si, a dlay num kə gbəgboŋo. Mum la' faɲ vunduk rum si, a vrum kwa mə bro' umu.

⁴Mum la' gi kwa mə bro' hay' ru sem sedā' wə du bəka dāw, bay kəri rum dāw dāw daɲ' mum la' faɲ mbə hay' ru wû in ne: "Na gi dan we rum si, a rom nan ye", a vrum kwa mə bro' rumu."

⁵Daw sin la' ne kə Bârî: «A gi mba də kofo wə du dan mənɪ namba ve na."

⁶Bârî dām vun ndaya: «Hi la' ve dan man, ko kî ce' ndə i mafo' si, hi gak in ne kə gu mətɪ ra: "Əɲ par tu riɲ kə tlor riɲ daɲ', bay əɲ də pe tu riɲ də ya mbi", bay ta də mun vun ri."

⁷I dɪk ri'i: «Swə dāw du ri kə bə sin mənɪ wə kura ko wə ji kwa um ne, kəri mənɪ mum we num car sine gewa mbə so, mum də um ini: "A mbə ga'ri suk vun tablə ti kwati su?"

⁸Cu mi, zawa mum də um in ne: "A gi kwati ne nan, a faɲ ge mbraw mə gi sin hay' vənabar kədan ha gi sin zə rin kəri mənɪ na wə ti kwati bay wə ce kwace. Kəki rum, ha gak də ti bay ce."

⁹Mum də gi soko ne kə bə sin um zə mum gi sin mənɪ mum in ne num nə su? Cu mi!

¹⁰Ndəna' kə hi ta', kəri mənɪ hi gi kwa daɲ' mənɪ na in ne ni, i ini: "Namba sum sin uray, namba cu gi sin məsin mi, say vun sin mənɪ namba wə gi nə tawa."

¹¹Kəri mənɪ Zezu tle vari wə də so Jeruzalem, mum pā mbok nya Samari kə nya Galile.

¹²Kəri mənɪ mum wə ze də so məsin, mgbo' guɓ mbə ndewa kə rumu. Handay gay' seɲ kə rum

¹³bay handay təɲ kə do dana: «Zezu, Bârî, a we ca wa mba!"

¹⁴Zezu we nday bay la' ne ndaya: «I də ta' tu ri ne kə sum po' furu.» Kəri mənɪ handay wə vari bo, mgbo' 'ya mbə tu ndaya.

¹⁵Kəri mənɪ swə dāw du nday we i mum car si, mum faɲ mbə hay' Zezu kə tle wor də fray gi mbra' ne kə Ifraya.

¹⁶Mum kuduk cin vuk nya kor Zezu bay gi soko ne num, mum swə nya Samari na.

- ¹⁷Zezu faɲ ci vun: «Na cu car sôwâ guɓ mi su? Mə cefadew kuni gwa' ka su?
- ¹⁸Swə dāw cu dīk dan faɲ mbə gi soko ne kə Ifray mi, say swə rəkway mənɪ nə taw su?»
- ¹⁹Zezu faɲ la' ne numu: «A car a də ye. Zə ha ve nan, ha car si.»
- ²⁰Kul sôwâ Zuwif mə də kə Farisiyen ci vun Zezu: «Ri mənɪ Ifray wə də suk jwə wa sôwâ um də mbə kə ma su?» Mum dām vun ndaya: «Ri mənɪ Ifray wə də suk jwə wa sôwâ um cu də mbə kə vari mənɪ sôwâ gak we kə i mi.
- ²¹Sôwâ cu də ini: "I kar ri'i: "Mum wə tira" ko "mum wə kəna mi". Zə, i we, Ifray wə suk jwə wə du ri.”
- ²²Mum faɲ in ne kə sum ta zə rumu: «Ri rum də mbə kəta', kəri rum, mē' kədan hi we bəka dāw wə du bəka Vay sumra' wə də mi ti, ama hi cu də we bəka rum mi.”
- ²³Sôwâ də mi in ne: "I kar kəna! Ko i kar tira." Ama i də ri rum mi, i ne zə nday mi.
- ²⁴Ce' ndə wədi buɲô wədi daka wafray ga' məsin hâ də ga' məsin, Vay sumra' wə də gi ndəna' kə bəka rum ta'a.
- ²⁵Ama say mum də ce boni juk cop, bay sôwâ mə tam də um vadā.
- ²⁶«Kwa mənɪ gi kəri Nowe, wə də gi ndəna' kə bəka Vay sumra' ta'a.
- ²⁷Sôwâ wə ti kwati bay wə ce kwace. Handay wə cin nji bay wə ne daw nday kə nji, hâ fəta mənɪ Nowe ze ta rawti da mə toɲo. Kəri rum, mbi mbə haɓ ta rəka bay ci nday daɲ'ɲ.
- ²⁸Bəka rum də ke ce' ndə ri Lot. Sôwâ wə ti kwati bay wə ce kwace, handay wə coɓ kwa bay wə gi coɓ kwa, handay wə jo' kwa bay wə dām so.
- ²⁹Ama fəta mənɪ Lot 'ya ar so Sodomə, ku bay kwa mənɪ sî bro' mə də kə "sufra" car mbə wafray se mbə nya bay ci nday daɲ'ɲ.
- ³⁰Kwa rum də gi ndəna' kə bəka mənɪ Vay sumra' də mbə ta'a.”
- ³¹«Kə bəka rum, swə mənɪ də ke wa so lari um, bə rum nə dam ze də rawti so um kədan nə ra' kwa han mi. Ndəna' ta' swə mənɪ də ke wə sine, bə rum nə gewa mbə so um mi.
- ³²I dla' wa dan ma Lot mi.
- ³³Swə mənɪ wə keɓ kədan mum sid' tu rum, bə rum də mar, ama swə mənɪ də fe mar, bə rum də sid' tu rumu.
- ³⁴Na in mi ne, kə dukri rum, sôwâ hoɓ də bar wa kwabar mə dāwa: Ifray də tle swə dāw, bay ar məsini.
- ³⁵Rawkwa hoɓ də hutu fut wə vəna mə dāwa: Ifray də tle ma dāw bay ar məsini.
- [³⁶Njiwkwa hoɓ də ke sine. Daw sin Ifray də tle swə dāw, bay ar məsini.]”

³⁷Sum ta zə Zezu ci vun rumu: «Bârî, kwa rum də gi ka su?» Mum dām vun ndaya: «Wə ri mēni mar kwa wə han, bok də ɓa wə han ta'a.»

Luc 18

¹Zezu in dan mə gəgan mēni nə ne kə sum ta zə rum kədan mum ta' nday ne i handay in dan kə Ifray bəka daŋ' dan tuk ciki.

²Mum ini: «Wə so məsin, bə bok dan kəta' wə han, mum cu ne wəlok Ifray mi, ɓay mum cu kaw zur sôwâ mēta'a.

³Rənda kəta' wə so rum ta', ta mbə hay' bə bok dan nə bəka daŋ' ɓay um in ne: "A gila' dan mbok rin kə bə sî man ri'i."

⁴Dan rum bar hâ hâ zə bə bok dan nə cu mun mi. Kəki rum, mum faŋ dîk dan wə vunduk rumu: "Kəzin', na cu ne wəlok Ifray ko na cu kaw zur sôwâ mi,

⁵ama zə rənda mēti wə man cik, na wə də gila' dan sə, na la' cu gi ndəna' mi si, ta də mbə man cik hâ gbəgboŋ man də ndo'o."

⁶Bârî faŋ in kəreme: «I mun dan mēni bə bok dan mə bro' nə ini.

⁷Ifray cu də gi njeŋ hay' sôwâ mēni mum da', mēni wə ci' kor rum fəta kə dukri daŋ' mi su? Mum cu də gi njeŋ zə nday ga'ri mi su?

⁸Na in mi ne: Mum də gi njeŋ hay' nday ga'ri. Ama kəri mēni Vay sumra' də mbə, mum də za' swə dāw mēni ve num wa nya si su?"

⁹Zezu in dan mə gəgan mēni nə zə sôwâ məsin mēni wə kar tu nday njeŋ kor Ifray ɓay wə jed sôwâ məsini:

¹⁰«Sôwâ hoɓ cok ta rawti so po' fur sôwâ Zuwif kədan handay in dan kə Ifraya. Swə dāw du nday car mbə du kul sôwâ Zuwif mə də kə Farisiyen, ɓay məsin bə ɓawa kwa.

¹¹Swə Farisiyen nə car ta ca kofo kə dāw rum, ɓay mum in dan kə Ifray ndə ni na: "Ifray, na gi soko ne nu zə na cu ce' ndə sôwâ məsin mēni wə kəy hura, wə gi kwa mə bro', ɓay wə gi nja kuni, ko ce' ndə bə ɓawa kwa mēni nə mi.

¹²Na wə saŋ kwa bəka hoɓ du bəka sedâ', na wə ne guɓ kwa mēni na wə fe nə daŋ' wû ne.

¹³Bə ɓawa grama nə car ta ca kəki seŋ, mum cu bə tle i də fray mi, ama mum hom ɓa wə vunduk ɓay ini: "Ifray, a we ca wa rin, zə na swə mə bro'o."

¹⁴Zezu faŋ in kəreme: Na in mi ne: kəri mēni swə nə wə də so um, Ifray in num njeŋ, ama mum cu in swə Farisiyen nə ndəna' mi. Zə sa su daŋ' mēni wə mbra' tu rum, bə rum də nde, ɓay swə mēni wə hom tu rum, bə rum də fe mbra'a."

¹⁵Sôwâ ra' daw gule mbə hay' Zezu kə nday kədan mum nday dāka. Sum ta zə rum we ndəna', ɓay handay tak ndaya.

- ¹⁶Ama Zezu la' sôwâ ra' dawre' mbə hay' rum bay ini: «I ar dawre' mbə hay' rini. I tak nday mi, zə Ifray wə wa' kədan mum suk jwə wa sôwâ mənɪ ra' nji kə ndaya.
- ¹⁷Na in mi ne kəzin', swə mənɪ cu ve i Ifray suk jwə wa rum ce' ndə vay nyêw wə man ve mi si, bə rum cu də ze wə ri mənɪ Ifray wə də suk jwə wa sôwâ um nə mi.”
- ¹⁸Bârî sôwâ Zuwif məsin ci vun Zezu: «Bə ta' kwa mə bay, na də gi ma kədan na fe nyî mə də hâ su?”
- ¹⁹Zezu dām vun rumu: «Zə mi ha man dē kə swə mə bay su? Swə mə bay cu dāw mi, say Ifray tawa!
- ²⁰Ha we dan dlay si: A gi nja mi, a ci mar mi, a kəy hura mi, a hay dan wa swə məsin mi, a mbā ba wû kə ya wû.”
- ²¹Swə nə dām vun rumu: «Na ta zə dan dlay mənɪ kuni daŋ' daka nyêw mana.”
- ²²Kəri mənɪ Zezu mun dan rum, mum la' ne numu: «Kwa dāw gwa' nu: A də coḅ kwa wû daŋ' də rəka, bay a bul səlay rum ne kə sum ca. Ndəna' ha də ke kə ndak wafray ḅo, bay a mbə ta zə rini.”
- ²³Ama kəri mənɪ swə nə mun dan rum, vunduk par num zə mum kə ndak juku.
- ²⁴Zezu we vunduk par num, bay mum ini: «Kə cik bayrum kədan bə ndak ze wə ri mənɪ Ifray wə də suk jwə wa sôwâ umu!
- ²⁵Kə cik kədan njoŋnjoŋ pā zra batal, ama kədan bə ndak ze wə ri mənɪ Ifray wə də suk jwə wa sôwâ um kəcik pā mum si!”
- ²⁶Sôwâ mənɪ mun dan rum, handay ini: «La' ndəna' si, sa nə gak ke kə nyî mə də hâ su?”
- ²⁷Zezu dāma: «Kwa mənɪ kəcik wə hay' sumra', Ifray gak gi.”
- ²⁸Piyer faŋ in ne numu: «A kar ri', namba ar kwa daŋ' kədan namba ta zə ru.”
- ²⁹Zezu la' ne ndaya: «Na in mi ne kəzin' swə la' ar so um, ma rum, daw ya um, sôwâ um, daw um zə jwə Ifray si,
- ³⁰ka bə rum də fe kwa mə pā mənɪ kuni juk wə du bəka mə tam, bay mum də fe nyî mə də hâ wə du bəka mənɪ wə də mba.”
- ³¹Zezu ra' sum ta zə rum mə guḅ wa hoḅ mbə hay' rum, bay mum la' ne ndaya «I kar ri', namba ni wə də so Jeruzalem bay wə han, dan mənɪ sum ka' dan wāy' wa Vay sumra' daŋ' wə də gi.
- ³²Sôwâ də um ar də ba sôwâ mənɪ cu zə saŋ sôwâ Zuwif mi. Handay də um ru, də um i, bay də tup mē' də wa rumu.
- ³³Handay də um pe kə ləva, bay də um ci, ama kəki rum bəka hinji' Ifray də um par mbə mara.”

³⁴Ama sum ta zə rum cu mun zu dan rum mi. Zə dan rum pəpe' wə hay' nday, bay handay cu mun zu dan mənɪ Zezu in nə mi.

³⁵Kəri mənɪ Zezu mbə həre' kə so Jeriko, dəŋâr suk hay' vari wə o kwa.

³⁶Mum mun raw sôwâ mənɪ wə pâ, bay mum ci vun i mi nə su?

³⁷Sôwâ dām vun rumu: «Zezu mə so Nazaret wə pâ.»

³⁸Zə rum, mum ka' dana: «Zezu, Vay David, a we ca wa rini!»

³⁹Sôwâ mənɪ wə ta kor rum dlay num kə gbəgbonj kədan nə seŋ vun rumu. Ama mum ka' dan kə gbəgbonj pâ mə vun kofo: «Vay David, a we ca wa rini!»

⁴⁰Zezu faŋ ca bay ne vari ne kə sôwâ kədan kuni dē num mbə kə rumu. Kəri mənɪ dəŋâr mbə hay' Zezu, Zezu ci vun rumu:

⁴¹«Ha wa' i a gi mi zə ru su?» Dəŋâr dām vun rumu: «Bârî, na wa' i a gi nan weri kəreme.»

⁴²Zezu la' ne numu: «A weri ye. Zə ha ve nan, i ru ar si.»

⁴³Kəkor sar, mum dle kə weri, bay mum təŋ kə ta zə Zezu bay gi mbra' ne kə Ifraya. Raw sôwâ daŋ' we kwa rum, bay handay təŋ kə bur Ifray ta'a.

Luc 19

¹Zezu ze ta so Jeriko, bay wə ta vari so rumu.

²Swə məsin kəta' wə so rum dē kə Zake. Mum nə toŋ sum bəwa grama, bay mum bə ndaka.

³Mum wə keɓ kədan mum kar Zezu nə sa su na, ama zə mum gbek, mum cu gak we num mi, zə raw sôwâ mənɪ wə hana.

⁴Zə rum, mum ne ta kofo bay ta ur gu tərūm kədan mum kar Zezu mənɪ wə də pâ hana.

⁵Kəri mənɪ Zezu mbə day ri rum, mum tle i ta fray bay la' ne kə Zake: «Zake, a dēma dam mbə nya zə na wa' də dam so wû tama.»

⁶Zake dēma dam mbə nya ga'ri bay ve Zezu kə tuk kədama.

⁷Sôwâ daŋ' mənɪ we kwa rum, mgbərum dan kə ini: «Swə nə wə də dam so swə mə bro'o!»

⁸Zake jik ta kor Bârî bay la' ne numu: «Bârî, a mun ri', na də ne reta kwa mə bay man ne kə sum ca, bay na la' tle səlay swə məsin kə vari vur vur si, na də ge dēwâ rum um ne vun nyem fədi'i.»

⁹Zezu la' ne numu: «Sîd ze rawti so mēti rə tam, zə ha vay rawti Abraham ta'a.

¹⁰Zə Vay sumra' mbə kədan mum keɓ bay sîd sôwâ mənɪ vi'i.»

- ¹¹Kəri mənı sôwâ wə mun dan Zezu, mum in dan mə gəgan ne nday zə mum həre' kə so Jeruzalem, bay handay dik wə vunduk nday i ri mənı Ifray wə də suk jwə wa sôwâ um nə mbə day həre'e.
- ¹²Zə rum, mum ini: «Yerma məsin 'ya ta nya məsin seŋ kədan mum fe jwə wa tu rum, bay mum faŋ gewa mba.
- ¹³Cop 'ya um, mum də sum sin um guḍ bay mum ne nday daw daw daŋ' səlay kisi. Mum faŋ la' ne ndaya: "I gi par kə səlay mənı nə hâ na gewa mba."
- ¹⁴Ama sôwâ mənı mum suk jwə wa nday sî num, bay handay sin sum sin hay' rum, bay handay in ne numu: "Namba cu wa' i a suk jwə wa mba mi."
- ¹⁵Kəki mənı mum fe jwə wa tu rum si, mum faŋ gewa mbə nya um, mum faŋ də sum sin um mənı mum ke ne nday səlay kədan mum kar kwa mənı handay fe kə par ndaya.
- ¹⁶Bə sin mə vun kofo mbə kor rum bay la' ne numu: "Bârî, na fe səlay mbu ta han wa səlay mənı ha ne nana."
- ¹⁷Jwə nə la' ne numu: "Baya, ha bə sin mə bay, ha gi njeŋ wa kwa mə kî, zə rum, na də wû cin toŋ wa so mə rôwâ gubu."
- ¹⁸Buwa hoḍ rum mbə kor rum bay la' ne numu: "Bârî, na fe səlay kis vatl ta han wa səlay mənı ha ne nana."
- ¹⁹Jwə nə la' ne numu: "Mə ha, na də wû cin toŋ wa so mə rôwâ vatla."
- ²⁰Buwa hinji' rum mbə kor rum bay la' ne numu: "Bârî, səlay wû ni na, na ku' num kə zim bay na keḅ ri pe' rumu."
- ²¹Na ne wəlok ru, zə ha swə mə cik tu: "Ha wə tle kwa mənı ha cu cin mi, bay ha wə bəwa kwa wakaya mənı ha cu jo' mi."
- ²²Jwə nə la' ne numu: "Ha bə sin mə bro', na də bok dan wa ru kə dan vun ru, ha we i na swə mə cik tu, ha we i na tle kwa mənı na cu cin mi, bay i na bəwa kwa wakaya mənı na cu jo' mi.
- ²³La' ndəna' si, zə mi ha cu cin səlay man wə so mənı sôwâ cin səlay wə han mi su? Ha la' gi kəzə ndəna' si, na gak fe mbi rum də han kəri mənı na gewa mba."
- ²⁴Mum faŋ la' ne kə sôwâ mənı wə hana: "I tle səlay mənı wə ba rum, bay i ne kə swə mənı kə səlay mbu."
- ²⁵Handay la' ne numu: "Bârî, mum kə səlay mbu daw wə ba rumu!"
- ²⁶Mum dam vun ndaya: "Na in mi ne, swə mənı kə kwa, mum də fe məsin də han, ama swə mənı cu kə kwa mi, sôwâ də ve mə kî mənı wə ba rum nə si.
- ²⁷Ama mə sôwâ mənı sî nan, mənı cu bə i na suk jwə wa nday mi, i mbə ti kə nday, bay i ci nday kor rini."
- ²⁸Kəki mənı Zezu in dan ndəna', mum 'ya ta kofo nday kədan mum də so Jeruzalem.

- ²⁹Kəri mənı mum ta həre' kə so Betfage kə so Betani, həre' kə sem igway' mə də kə «ya gway' gu olivə», mum sin sum ta zə rum hoɓ ta kofo.
- ³⁰Mum la' ne ndaya: «I də so mə nay' kor ri. Kəri mənı hi də day han, hi də za' vay kor mənı sôwâ cu ur wa rum daw mətə', jew wə hana. I ulay' num mbə kə ndi.
- ³¹Swə la' ci vun ri: "Zə mi hi ulay' vay kor nə su?" I dam vun rumu: "Bârî wə wa' rumu."“
- ³²Daw sin 'ya dle ta za' kwa daŋ' ce' ndə mənı Zezu in ne ndaya.
- ³³Kəri mənı handay ulay' vay kor nə, sum kor ci vun ndaya: «Zə mi hi wə ulay' vay kor nə su?”
- ³⁴Handay dam vun ndaya: «Bârî wə wa' rumu.”
- ³⁵Handay faŋ mbə hay' Zezu kə vay kor nə bay handay dluɓ mbraw nday ta ki vay kor, bay handay tle Zezu cin wə hana.
- ³⁶Kəri mənı handay wə ta ta, sôwâ dluɓ mbraw nday wə vari.
- ³⁷Kəri mənı handay mbə həre' kə so Jeruzalem, kə vari mənı car mbə sem igway' mənı gu olivə wə han juk, raw sum ta zə rum tuk kədam, bay handay ra' wor nday ta fray təŋ kə bur Ifray zə yew daŋ' mənı handay we.
- ³⁸Handay ini: «Ifray nə kuswa' jwə mənı mbə kə semde Bârî! Heɓ wə wafray, bay mbra' hay' Ifraya!”
- ³⁹Sôwâ məsin wə du kul sôwâ Zuwif mə də kə Farisiyen mənı wə du raw sôwâ la' ne kə Zezu: «Bə ta' kwa, a dlay sum ta zə ru kədan kuni seŋ vun ndaya.”
- ⁴⁰Zezu dam vun ndaya: «Na in mi ne: Handay la' seŋ vun nday si, gway' də do dana!”
- ⁴¹Kəri mənı Zezu mbə həre' kə so Jeruzalem, bay mum we so rum, mum ci' wa so rumu.
- ⁴²Mum ini: «Na wa' kəzə, həŋ we, ko tam, kwa mənı də maŋ ne hebe! Ama mgbaŋ ni nə, kwa rum pəpe' wə i riŋ, bay həŋ cu gak we kwa rum mi!
- ⁴³Zə bəka rum wə də mbə wa riŋi. Kəri rum, sum sî riŋ də mbə dam la' tu ruɓ gan wa riŋ, handay də reŋ wa riŋ, bay handay də car mbə wa riŋ ri cem cem daŋ'ŋ.
- ⁴⁴Handay də maŋ dənok, həŋ kə sôwâ mənı gay' wə rawti riŋ daŋ'ŋ. Handay cu də ar gway' daw suk wa gway' məsin mi, zə həŋ cu we ri mənı Ifray mbə kawba riŋ kə ndi nə mi.”
- ⁴⁵Zezu ze ta rawti so po' fur sôwâ Zuwif, bay mum təŋ kə 'way sum gi par mənı wə hana.
- ⁴⁶Mum in ne ndaya: «Dan rum wây' wə du dərwa: So man də də kə so mənı sôwâ gak in dan kə Ifray wə hana. Ama mə hi, hi faŋ gi so rum ce' ndə ri pe hura na'a!”

⁴⁷Zezu wə ta' kwa wə rawti so po' fur sôwâ Zuwif bəka daŋ'ŋ. Sum rôwâ mə du sum po' fur, kə sum pay zu dlay ɓay sôwâ rôwâ mə du sôwâ Zuwif wə keɓ kuni vari kədan handay ci Zezu.

⁴⁸Ama handay cu gak za' vari rum mi, zə sôwâ daŋ' wə pe hum dan um kə ɓayrumu.

Luc 20

¹Fəta məsin, Zezu wə ta' kwa ne kə sôwâ wə rawti so po' fur sôwâ Zuwif ɓay mum wə ka' Dan mə Kədam wə han ta'a. Kəri rum, sum rôwâ mə du sum po' fur, kə sum pay zu dlay, ɓay sum rôwâ mə du sôwâ Zuwif mbə kuni hay' Zezu.

²Handay ci vun rumu: «A in ne mba ri'i: Kə gbəgbon sa ha wə gi kwa mənɪ kuni su? Sa nə ne gbəgbon ne nu kədan ha gi kwa mənɪ kuni su?»

³Zezu dam vun ndaya: «Na də ci vun ri kə dan daw ta'a. I in ne nan ri'i:

⁴Sa nə sin Zaŋ gi baptem su? Ifray su? Ko sumra' su?»

⁵Ama handay tɛŋ kə dle vun mbok nday, ɓay handay ini: «Namba la' dam i Ifray sin um si, mum də ci vun mba: "Zə mi hi cu ve num mi su?"

⁶Ama namba la' dam i sumra' sin um si, sôwâ daŋ' də mba ge kə gway' kədan handay mba ci, zə handay we i Zaŋ nə bə ka' dana.»

⁷Zə rum, handay dam vun rumu: «Namba cu we swə mənɪ sin Zaŋ gi baptem nə mi.»

⁸Bay Zezu la' ne ndaya: «La' ndəna' si, na ta', na cu də mi ta' swə mənɪ ne gbəgbon ne nan kədan na gi kwa mənɪ kuni mətə'a.»

⁹Kəki rum, Zezu tɛŋ kə in dan kə dan mə gəgan mənɪ nə ne kə sôwâ: «Swə məsin pe gu wə sine viŋə umu. Mum ar sine rum wə ɓa sum ji sine gu ɓay 'ya rəkway kədan mum də gi bəka raw wə hana.

¹⁰Kəri mənɪ wakaya rum mbə day, bə sine nə sin bə sin um wə hay' sum ji sine kədan mum ve vun kwa wakaya um wə ɓa ndaya. Ama sum ji sine pum bə sin nə ɓay 'way num ge kə ɓa uraya.

¹¹Bə sine nə faŋ sin bə sin məsin, ama sum ji sine pum num ta'a. Handay faŋ i num ɓay 'way num ge kə ɓa uraya.

¹²Bə sine nə faŋ sin bə sin buwa hinji' rumu. Sum ji sine pum num ɓay 'way num ta rəka ta'a.

¹³Bə sine nə faŋ ini: "Na də gi ma su? Na də sin vay man mənɪ na ba. Ke məsin handay də um mbə su na.»

¹⁴Ama kəri mənɪ sum ji sine we num, handay dik dan wə vunduk nday, ɓay handay ini: "Swə mənɪ də ti so nə wə mba. Mə ci num si, kədan sine rum faŋ mə namba.»

¹⁵Bay handay tle num du sine ge ta rəka ɓay ci numu.» Zezu ci vun ndaya: «Bə sine də gi mi kə nday su?

- ¹⁶Mum də mbə bay də ci sum ji sine. Mum faɲ də ar sine viɲə nə də ba sôwâ mäsini.» Kəri məni sôwâ mun dan rum, handay ini: «Ifraɲ nə tak si!»
- ¹⁷Ama Zezu kar nday bay ini: «Dan məni wây' wə 'Derwa Ifraɲ nə wa' in ma su? Gway' məni sum dām so ar ge ta rəka, gway' rum faɲ gway' mə kə sin toɲo!»
- ¹⁸Sa su daɲ' məni də nde wa gway' rum, bə rum də kəy tu rum, bay gway' nə la' ndewa swə si, gway' rum də um haɓ njum' njum'mu.»
- ¹⁹Sum pay zu dan dlay kə sum rôwâ mə du sum po' fur keɓ kədan handay kaw Zezu kəri rum, zə handay we si: Mum in dan mə gəgan rum wa nday, ama handay ne wəlok sôwâ.
- ²⁰Handay faɲ kar zu Zezu kə bayrum, bay handay sin sum cukur ta hay' rumu. Handay gi tu nday ce' ndə sôwâ mə njeɲ kədan handay kaw Zezu kə dan ge vunu. Handay wə keɓ vari kədan handay də um ar də ba toɲ məni suk kə gbəgboɲ wa nya rumu.
- ²¹Handay ci vun rumu: «Bə ta' kwa, namba we si, ha wə dan bay ha wə ta' kwa mə njeɲe. Ha cu gi sôwâ cem cem mi, ama ha wə ta' vari Ifraɲ njeɲ ne kə sôwâ daɲ'ɲ.
- ²²A in ne mba ri'i: Dan dlay mba ne vari ne mba kədan namba po' grama hay' jwə mə mbri mə nya Romə su? Ko po' mi su?»
- ²³Ama Zezu we dan dīk bro' nday, bay mum la' ne ndaya:
- ²⁴«I ta' səlay dāw ne nan ri'i. Nyî tu sa kə semdē sa wây' han məni nə su?» Handay dām vun rumu: «Nyî tu jwə mə mbri mə nya Romə na.»
- ²⁵Zə rum, Zezu la' ne ndaya: «La' ndəna' si, i ne kwa jwə mə mbri mə nya Romə ne num, bay i ne kwa Ifraɲ ne num ta'a.»
- ²⁶Handay cu za' dan məni handay gak um kaw kə ndi kor sôwâ mi, zawa dan dām um jin' wa ne nday, bay handay gay' 'yeɲ 'yeɲe.
- ²⁷Sôwâ məsin mə du kul sôwâ Zuwiɲ mə dē kə Sadusiyeɲ mbə hay' Zezu. (Handay sôwâ məni cu ve dan car mara.) Handay la' ne numu:
- ²⁸«Bə ta' kwa, Moyizə wây' dan dlay məni nə ne mba: Swə la' kə njər rum mə mbri, bay mar ar ma dan vay si, swə nə tle rənda mok njər rum cin kədan mum vra' kə sə tan njər rum məni mara.
- ²⁹Ba' si daw mə njiwkwa kəta' sedā', handay njər kə nji. Mə mbri cin ma bay mar cu ar vay mi.
- ³⁰Buwa wa hoɓ rum tle rənda mok njər rum cini.
- ³¹Ndəna' kə buwa hinji' rum ta'a: Handay sedā' daɲ' cin rənda rə bay mar cu ar daw mi.
- ³²Kəki nday daɲ', ma rə mar ta'a.
- ³³Fəta məni sôwâ də pâ mbə mar, ma rə də ke ma sa du nday su? Zə handay sedā' daɲ' cin sa!»

- ³⁴Zezu dam vun ndaya. «Sôwâ wa nya mœni nœ wœ cin nji.
- ³⁵Ama njiwkwa kœ rawkwa mœni Ifray kar nday njeŋ, mœni mum nday ra' mbœ mar kœdan handay dœ ke kœ nyî mœ dœ hâ wa nya mœni wœ dœ mbœ, handay cu cin nji mi.
- ³⁶Handay ce' ndœ sum sin Ifray mœ wafraya. Handay daw Ifray, handay cu gak mar za' mi zœ mum ra' nday mbœ mar si.
- ³⁷Moyizœ ta' tœlak i Ifray dœ ra' sôwâ mbœ mar, wœ ri mœni mum wây' dan wa ku mœni ye' nyây', mum dœ Bârî: Ifray Abraham, kœ Ifray Isak, bay Ifray Yakub.
- ³⁸Ifray nœ Ifray sôwâ mœ kœ nyî mœ dœ hâ, mum cu Ifray sum mar mi, zœ handay daŋ' kœ nyî mœ dœ hâ kœ rumu.”
- ³⁹Sôwâ mœsin mœ du sum pay zu dan dlay la' ne numu: «Bœ ta' kwa, ha dam baya!”
- ⁴⁰Zœ rum, handay ne wœlok dan ci vun rum kœreme.
- ⁴¹Zezu ci vun ndaya: «Swœ gak in ma i Kris nœ vay rawti David su?
- ⁴²Zœ David kœ tu rum in wœ dœrwa Nyeme: Bârî in ne kœ Bârî mana: A suk ba fun rin,
- ⁴³hâ na dœ gi sum sî wû ce' ndœ ri njay sem ru.
- ⁴⁴David dœ num kœ Bârî, bay gi ma kœdan Kris nœ faŋ vay rawti David su?”
- ⁴⁵Kœri mœni raw sôwâ wœ mun dan Zezu, mum la' ne kœ sum ta zœ rumu:
- ⁴⁶«I ji tu ri hay' sum pay zu dan dlay mœni wœ tuk kœdam kœ gaŋ kœ mbraw mœ mbri bay wœ wa' i sôwâ kaw jœb nday wœ ri bœwa sôwâ, handay wœ kœb ri suk mœ vun kofo wœ rawti so Ifray sôwâ Zuwif, bay wœ kœb ri suk mœ bay wœ ri gi cere.
- ⁴⁷Handay wœ ti kwa daŋ' mœni wœ ba rœnda, bay handay wœ in dan kœ Ifray hâ hâ kœdan sôwâ nday kar, handay dœ fe dan bok mœ toŋ wa ndaya.»

Luc 21

- ¹Zezu tle i kar sum ndak mœni wœ njay sœlay dœ rawti sunduku njay sœlay wœ han wœ rawti so po' fur sôwâ Zuwif.
- ²Mun we rœnda mœ kœ ca mœti njay suŋku hoœ wœ han ta'a.
- ³Zœ rum, mum ini: «Na in mi ne kœzin', rœnda mœ kœ ca rœ njay kwa ta han pâ sôwâ mœsin daŋ'ŋ.
- ⁴Zœ sôwâ mœsin daŋ' njay sœlay mœni wœ ba nday mœ dan sin, ama ta, du ca sœ ta njay kwa mœni ta kœ ndi zœ ur tu sœ nœ cete.”
- ⁵Sôwâ mœsin in dan wa so po' fur sôwâ Zuwif, handay in i so rum bay dle tu si, kœ gway' bay kwane mœni sôwâ sur vun wa rum bay ne zœ sin Ifray, zœ rum, Zezu ini:
- ⁶«Bœka rum dœ mbœ kœta', kœ bœka rum, gway' dœw mœni hi we cu dœ suk wa gway' mœsin mi: Handay daŋ' dœ bru.”

- ⁷Handay ci vun rumu: «Bə ta' kwa, kwa rum də gi kə ma su? Kwa mə ta' kwa mi wə də ta' ndo' kwa rum daŋ' nə su?»
- ⁸Zezu ini: «I ji tu ri kədan swə dāw nə vi' ni mi, zə sôwâ juk wə də mbə kə semdē rin, bay handay də ini: "Na nə Kris na" bay də in ta'a: "Ri rum mbə si". Ama i ta zə nday mi.
- ⁹Kəri mənɪ hi də mun ci' zi bay cik cem cem, i ne wəlok mi. Zə kwa rum də mbə gi cop, ama ndo' nya cu də ke həre' mətə'o.»
- ¹⁰Mum faŋ in kəreme: «Sôwâ nya məsin də car zi wa sôwâ məsin, bay jwə məsin də car zi wa jwə məsini.
- ¹¹Nya də nyen kə gbəgbon, bay wə ri cem cem mē' də nde bay gaɓ mə je sôwâ də mbə, kwa mə gi wəlok bayrum kə kwa mə ta' kwa mə rôwâ də gi wafraya.»
- ¹²«Ama cop kwa rum wə də gi, sôwâ də mi kaw bay də gi boni mi ne. Handay də mi ar kədan sôwâ də bok dan wa ri wə rawti so Ifray sôwâ Zuwif, bay handay də mi cok də so daŋgay'i. Handay də kor sum jwə kə sum rôwâ kə ri zə semdē rini.
- ¹³Kwa rum də mi ne vari kədan hi in njeŋ dan wa rini.
- ¹⁴I kaw dan mənɪ nə wə vunduk ri: I dɪk dan mənɪ hi wə də in kədan hi də sɪd' tu ri kə ndi nə cop mi.
- ¹⁵Zə na kə tu rin, na də mi ne dan rum bay gwet mənɪ swə dāw wə du sum sî ri cu gak car kor dan mi ko way dan mi mi.
- ¹⁶Ba mi, ya mi, njər mi, bray mi kə bāy mi də mi ar də ba sôwâ məsin, handay də ci sôwâ juk du ri.
- ¹⁷Sôwâ daŋ' də mi sî zə rini.
- ¹⁸Ama ko sâ wa ri dāw cu də vi' mi.
- ¹⁹I gay' ŋgəɗiŋ', ndəna' hi də ke kə i.»
- ²⁰«Kəri mənɪ hi də we sum zi reŋ wa so Jeruzalem, kəri rum, hi də we i so rum həre' kə bru.
- ²¹Kəri rum, sôwâ mənɪ də ke wə nya Zude kuni ne ur də wa igway'i. Sôwâ mənɪ də ke wə so Jeruzalem kuni də wuru. Bay sôwâ mənɪ də ke wə sine kuni gewa mbə so za' mi.
- ²²Zə bəka rum də ke bəka boni kədan kwa rum də ndo' vun dan daŋ' mənɪ Dan rum wāy' wə du dərwa.
- ²³Də ke kəcik kə bəka rum wa rawkwa mənɪ kə ur bay wa rawkwa mənɪ kə daw vun pa', zə boni juk də ke wa nya rum bay bak Ifray də ke wa sôwâ rum ta'a.
- ²⁴Sum sî sôwâ so Jeruzalem də ci sôwâ məsin du nday kə masəlam bay də ra' sôwâ məsin ce' ndə bek wə nya cem cem daŋ'ŋ. Bay sôwâ mənɪ cu zə saŋ sôwâ Zuwif mi də ta wa so Jeruzalem kə sem nday hā ka ri nday ndo' si.»

²⁵«Kwa mə ta' kwa də gi wa fəta, kə wa cer, bay wa ciciw, bay wa nya, sôwâ daŋ' də dɪk dan kə ne wəlok ya mbi məti wə tlər bay jo mbi məni wə səta.

²⁶Wəlok kə dɪk dan wa kwa məni də gi wa nya nə də ci sôwâ, zə gbəgbon mə wafray də nyene.

²⁷Kəri rum, sôwâ də we Vay sumra' də mbə du dləmbur kə gbəgbon juk bay kə mbra' ta'a.

²⁸Kəri məni kwa rum də tən kə gi, i car fray bay i ra' wa ri fray, zə sɪd' mi mbə həre' si.”

²⁹Kəki rum, Zezu in dan mə gəgan məni nə ne ndaya: «I kar gu tərūm kə gu məsin daŋ'ŋ:

³⁰Kəri məni hi we tlap nday tən kə lo', hi we i vun ndor mbə həre' si.

³¹Ndəna' ta', kəri məni hi də we kwa rum də mbə, i we i ri məni Ifray wə də suk jwə wa ri nə mbə həre' si.

³²Na in mi ne kəzin', sôwâ məni kə i tam cu də mar daŋ' dan kwa rum daŋ' mbə gi mi.

³³Wafray kə nya də ndo', ama dan man cu də ndo' kpe mi.”

³⁴«I kaw wa ri, i ar vunduk ri njay wa dan kwati ko kwace ko wa dan dɪk kwa nya mi. Hi la' gi ndəna' si, bəka rum də mi day ɓok,

³⁵zə bəka rum də ge wa sôwâ nya daŋ' ce' ndə ziwi.

³⁶I nde sen mi, i o Ifray kəri daŋ', kədan hi fe gbəgbon wur mbə du kwa daŋ' məni wə də mbə, bay kədan hi də car kor Vay sumra'a.”

³⁷Kə bəka, Zezu wə ta' kwa wə rawti so po' fur sôwâ Zuwif, ama kə riya, mum 'ya də wa igway' mə də kə «ya gway' olivə» kədan mum də bar dukri hana.

³⁸Sôwâ daŋ' mbə wə rawti so po' fur sôwâ Zuwif kə bəka ced' kədan handay mun kwata' umu.

Luc 22

¹Cer məni sôwâ Zuwif wə gi kə duwa' mə gi dan dlum, mə də kə Pakə mbə həre'e.

²Sum rôwâ mə du sum po' fur kə sum pay zu dan dlay keɓ kuni vari kədan handay ci Zezu, zə handay wə ne wəlok sôwâ.

³Kəri rum, Satan ze vunduk Yudas mə də kə Iskariyot, mum nə daw du sum ta zə Zezu mə guɓ wa hobo.

⁴Yudas 'ya ta gila' dan kə sum rôwâ mə du sum po' fur kə sum rôwâ mə du sum ji so po' fur sôwâ zuwif wa dan vari məni mum gak ar Zezu də ɓa ndaya.

⁵Handay tuk kəɗam bay handay kawvun kə rum kədan handay um ne səlaya.

- ⁶Yudas ve dan nday bay tɔŋ kə keɓ vari kədan mum ar Zezu də ɓa nday hura hura, dan sôwâ we.
- ⁷Kəri mənɪ cer sôwâ Zuwif mə gi kə duwa' mə dan dlum nə mbə həre', bəka mənɪ sôwâ wə fol daw cime kədan handay gi kwati cer Pakə.
- ⁸Zə rum, Zezu sin Piyer kə Zaŋ, bay mum la' ne ndaya: «I də gi kwati cer Pakə zə mba.»
- ⁹Handay ci vun rumu: «Ha wə wa' i mə də gi ka su?»
- ¹⁰Mum dām vun ndaya: «I mum ri', kəri mənɪ hi də cok də so, hi də ndewa kə swə dāw mənɪ tle dənay mbi. I ji zu rum hâ də so mənɪ mum də ze də han,
- ¹¹bay i in ne kə bə so rumu: "Bə ta' kwa wə ci vun ru: Tak i mənɪ na də gi cer Pakə kə sum ta zə rin han nə ka su?"
- ¹²Bay mum də ta' tak i so mə fray mə tɔŋ mi ne, tak i rum kə kwa mə bay han daŋ'ŋ. I də gi kwati zə mba wə hana.»
- ¹³Handay 'ya bay ta za' kwa daŋ' han ce' ndə mənɪ Zezu in ne nday bay handay gi kwati cer Pakə wə hana.
- ¹⁴Kəri mənɪ ri rum mbə si, Zezu suk vun tablə kə sum sin umu.
- ¹⁵Mum la' ne ndaya: «Mê' kədan na gi cer Pakə mənɪ nə kəri cop ce boni man wə man ti juku!
- ¹⁶Zə na in mi ne, na cu də ti kwati rum za' mi, hâ ka Jwə Ifray nə nyen mbi si.»
- ¹⁷Zezu faŋ tle timbi ce kwa, gi soko ne kə Ifray, bay la' ne ndaya: «I ve timbi ce kwa mənɪ nə bay i bul mbi rum mbok ri.
- ¹⁸Zə na in mi ne: Daka mgbaŋ ni nə na cu də ce sum viŋə za' mi, hâ ka ri Jwə Ifray nə mbə si.»
- ¹⁹Kəki rum, mum tle vun tləpe' fun bay gi soko ne kə Ifraya. Mum faŋ jak, ne nday, bay la' ne ndaya: «Mə ni nə tu rini: Na ne zə ri. I gi ndəna' kədan i dɪk dan mana.»
- ²⁰Ndəna' ta', kəki kwati, mum tle timbi ce kwa, ne nday, bay la' ne ndaya: «Timbi ce kwa mənɪ nə dan kawvun mə mbrew, Ifray jeŋ zu dan rum kə vəswə rin mənɪ ne zə ri.»
- ²¹«Ama i kar ri'i: Swə mənɪ wə də man ar də ɓa sôwâ nə ni wə vun tablə kə rin na!
- ²²Kəzin' Vay sumra' wə də mar ce' ndə mənɪ Ifray wa', ama kəcik wa swə mənɪ də um ar də ɓa sôwâ!»
- ²³Handay tɔŋ ci vun kuni mbok nji: «Sa du mba gak gi kwa rum nə su?»
- ²⁴Sum ta zə Zezu tɔŋ kə way dan mbok nji kədan handay we sa du nday də ke ce' ndə swə mə tɔŋ su na.

²⁵Zezu ini: «Jwə sôwâ mənî cu zə saŋ sôwâ Zuwif mi suk kə gbəgbonɔ wa nday, bay jwə rum wə gi kədan sôwâ nday dɛ kə "sôwâ mə baya".

²⁶Ama kwa rum cu də gi ndəna' du ri mi. Zawa, swə mənî suk toŋ mə du ri, say bə rum nə ke ce' ndə vay nyêw, bay swə mənî suk wa ri, say bə rum nə ke ce' ndə bə gi sini.

²⁷Zə sa nə swə mə toŋ su? Swə mənî suk wə vun tablə ko swə mənî wə gi sin zə rum su? Swə mənî suk wə vun tablə, cu nə mi su? Ama mə na, na wə du ri ce' ndə bə gi sini."

²⁸«Hi kə rin bəka daŋ' du boni mana.

²⁹Bay ce' ndə mənî Ba man ne gbəgbonɔ ne nan kədan na suk jwə, ndəna' ta', na də ne gbəgbonɔ mi ne kədan hi suk jwa.

³⁰Hi də ti kwati bay ce kwace wə vun tablə wə ri mənî na suk jwə wə han, bay hi də gay' wa kwasuk jwə kədan hi bok dan wa zə saŋ sôwâ Israyel mə guɓ wa hoɓo."

³¹«Simonɔ, Simonɔ, A mun ri', Satan o vari kədan mum mi pəkad' ce' ndə sôwâ wə pəkad' u kədan handay bul mbok u viŋə kə rəfê.

³²Ama na o Ifray zə ru kədan ha ar dan mənî ha ve nə mi, bay kəri mənî ha də faŋ mbə hay' rin, a də jeŋ vunduk daw ba wû."

³³Piyer la' ne numu: «Bârî, na hərə' kədan na də so daŋgay' kə ru ko də mar kə ru ta'a."

³⁴Zezu dām vun rumu: «Piyer, na in wû ne: Cop gulok cu də ge el tam mi, ha də in sem hinji' i ha cu we nan mi."

³⁵Kəki rum, Zezu la' ne ndaya: «Kəri mənî na sin ni dan mbu səlay, dan mbu njay kwa, ko dan tərak, hi gwa' dan fe kwa si su?» Handay dām vun rumu: «Cu mi».

³⁶Bay mum la' ne ndaya: «Ama mgbaŋ ni nə, swə mənî kə mbu səlay, nə tle ye. Ndəna' ta' kə swə mənî kə mbu njay kwa. Bay swə mənî cu kə masəlam mi, bə rum nə gi coɓ mbraw um kədan mum coɓ masəlam kə ndi.

³⁷Zə na in mi ne, dərwa Ifray mənî wə ini: Handay in num wə du sôwâ mənî gi kwa mə bro', də ndo' vun wa rini. Zə dan mənî wây' wə wa rin nə təŋ kə gi si."

³⁸Sum ta zə rum la' ne numu: «Bârî, masəlam ni hoɓ na.» Mum dām vun ndaya: «Nde si."

³⁹Zezu pâ mbə han bay ta wa igway' mənî gu olivə wə han juk ce' ndə mənî mum wə gi ba', bay sum ta zə rum ji zu rumu.

⁴⁰Kəri mənî mum mbə day ri rum, mum la' ne ndaya: «I o Ifray kədan Satan nə bu ni njay də du kwa mə bro' mi."

⁴¹Zezu faŋ bul nji kə nday seŋ ca, kəri swə gak dâ gway' day ri rumu. Mum kuduk nya kə vun cingit bay in dan kə Ifraya.

⁴²Mum ini: «Bəba, ha la' bə si, a tle timbi boni mənɪ na də ce nə də rəka. Pâ daŋ' rum, a gi ce' ndə mənɪ na wə wa' nə mi, ama a gi ce ndə mənɪ ha wə wa'a.»

[⁴³Kəri rum, vay sin Ifray mə wafray car wafray mbə hay' rum kədan mum um jeŋ vunduk ne.

⁴⁴Dan dɪk mbə wa Zezu juk bay mum in dan kə Ifray kə gbəgbəŋ pâ mə vun kofo. Sumbur tu rum ne ta nya ce' ndə vəswa.]

⁴⁵Kəri mənɪ mum ndo' in dan kə Ifray si, mum car fray bay faŋ mbə hay' sum ta zə rum, mum za' nday wə nde sen zə dan dɪk ndaya.

⁴⁶Mum la' ne ndaya: «Zə mi hi wə nde sen su? I car fray bay i o Ifray kədan Satan nə bu ni njay də du kwa mə bro' mi.»

⁴⁷Kəri mənɪ Zezu wə in dan bo, raw sôwâ mbə daya. Yudas dle kor nday, mum nə dāw du sum ta zə Zezu mə guɓ wa hobo. Mum ta ta hay' Zezu kədan mum um kaw bay soɓ kə vun.

⁴⁸Ama Zezu ci vun: «Yudas, ha wə də ar Vay sumra' də ba sôwâ kə um soɓ kə vun su?»

⁴⁹Kəri mənɪ sum ta zə Zezu we kwa mənɪ wə də mbə wa Zezu, handay ci vun rumu: «Bârî, ha wa' i mə tum nday kə masəlam su?»

⁵⁰Bay swə dāw du nday tum hum ba fun bə sin toŋ po' furu.

⁵¹Ama Zezu la' ne ndaya: «I ar si, nde si!» Mum dāk hum swə nə bay hum rum tləba.

⁵²Zezu faŋ ci vun sum rôwâ mə du sum po' fur, kə sum rôwâ mə du sum ji so po' fur sôwâ Zuwif, bay sum rôwâ mə du sôwâ Zuwif mənɪ mbə kuni kədan handay um kawa: «Hi mbə kə masəlam kə dliw kədan hi man kaw ce' ndə mənɪ hi wə kaw hura su?

⁵³Bəka daŋ' na ke kə ri wə rawti so po' fur sôwâ Zuwif, bay hi cu kaw nan mi. Ama ri mənɪ nə mə hi bay mə gbəgbəŋ ri mə ura'a.»

⁵⁴Handay kaw Zezu bay ta kə rum wə so toŋ po' furu. Piyer wə ta kəki nday seŋe.

⁵⁵Handay nyen ku wə du cava bay Piyer suk wə du sôwâ mənɪ gay' wə dē ku.

⁵⁶I sin dāw we num suk wə dē ku, ta kar num kpê' bay ini: «Swə mənɪ nə kə rum ta'a!»

⁵⁷Ama Piyer riway wa dan rum kə in ne kə ma ra: «Na cu we num mi!»

⁵⁸Kəki rum kî, swə məsin we num bay ini: «Ha ta', ha wə du ndaya.» Ama Piyer dām vun swə na: «Cu mi, na cu du nday mi.»

⁵⁹Kəki rum ler dāw gi, swə məsin in kə gbəgbəŋo: «Kəzin' swə mənɪ nə ke kə rum, zə mum swə nya Galile.»

⁶⁰Ama Piyer dām vun rumu: «Na cu we zu dan mēni ha wə in nə mi.» Kəri rum sar, kəri mēni mum wə in dan in ɓo, gulok ge ele.

⁶¹Bârî faŋ i ɓay kar Piyer kpê'ê. Zə rum, Piyer dla' wa dan mēni Bârî ke in ne numu: «Cop gulok cu də ge el tam mi, ha də in sem hinji' i ha cu we nan mi.»

⁶²Piyer pâ kə ci' gbərik gbərik də rəka.

⁶³Sôwâ mēni wə ji Zezu, ru num ɓay pum numu.

⁶⁴Handay ku' i rum, ɓay la' ne numu: «A ta' ne mba ye bə ka' dana! Sa nə pum nu su?»

⁶⁵Bay handay ge dan kə dan i kwa kə vari cem cem juk ne numu.

⁶⁶Kəri mēni bəka ra' si, sum rôwâ mə du sôwâ Zuwif, kə sum rôwâ mə du sum po' fur, ɓay sum pay zu dan dlay ɓa kuni ɓay handay ta kə Zezu kor sum rôwâ Fada mə Mbri,

⁶⁷ɓay handay ci vun rumu: «Ha Kris su? A in ne mba ri'i!» Mum dām vun ndaya: «Na la' in ne ni si, hi cu ve dan man mi.

⁶⁸Bay na la' ci vun ri si, hi cu dām vun rin mi.

⁶⁹Ama daka mgbaŋ ni nə, Vay sumra' də suk ɓa fun Ifray mə kə gbəgbəŋo.»

⁷⁰Zə rum, handay daŋ' ini: «La' ndəna' si, ha Vay Ifray su?» Mum dām vun ndaya: «Hi in njeŋe: Na na.»

⁷¹Zə rum, handay ini: «Namba cu kə mē' sôwâ mə we njeŋ dan məsin rum za' mi, namba mun dan mēni mum in nə kə tu mba si!»

Luc 23

¹Raw sôwâ mēni ɓa wə han daŋ' car fray ɓay handay ta kə Zezu kor Pilatə.

²Wə han, handay təŋ kə tum sem rum kə ini: «Namba za' swə mēni nə wə vi' sôwâ mba: Mum wə nday in ne i kuni po' grama ne kə jwə mə mbri mə nya Romə mi, ɓay mum wə dē tu rum kə Kris, jwa.»

³Pilatə ci vun rumu: «Ha jwə sôwâ Zuwif su?» Zezu dām vun rumu: «Ha kə mēni ini.»

⁴Zə rum, Pilatə la' ne kə sum rôwâ mə du sum po' fur kə raw sôwâ daŋ'ŋ: «Na cu za' dan mə bro' wa swə mēni nə mi.»

⁵Ama handay do dan ɓayrum pâ mə vun kofo kə ini: «Wə du kwata' um, mum wə ɓu zu sôwâ mə nya daŋ' kədan handay car dana. Mum təŋ wə nya Galile hâ Zude, ɓay mgbaŋ ni nə mum mbə day tira.»

⁶Kəri mēni Pilatə mun ndəna', mum ci vun i swə nə swə nya Galile su?

⁷Kəri mēni mum mun i Zezu car mbə nya mēni Herodə suk təŋ wə han, mum sin Zezu ta ne num, zə mum wə so Jeruzalem kəri rum ta'a.

⁸Kəri mənı Herodə we Zezu, mum tuk kəđam juk, zə mum mun dan um si, bay mum kə mē' ndewa kə rum daka ɓa' si, mum wa' kədan mum kar yew mənı Zezu wə gi.

⁹Mum ci vun Zezu kə dan cem cem juk, ama Zezu cu đam vun rum mi.

¹⁰Sum rōwâ mə du sum po' fur bay sum pay zu dan dlay gay' kuni wə han, bay handay tum sem Zezu kə dan mə bro' bayrumu.

¹¹Herodə kə soje um ru kuni Zezu bay handay jed' numu. Handay ge mbraw mə bay ne num bay faɲ sin num ta ne kə Pilatə kəreme.

¹²Kə fəta rum, Herodə kə Pilatə faɲ bāy nji, zə ɓa' si handay ke sî nji si.

¹³Pilatə ɓawa sum rōwâ mə du sum po' fur, kə sum rōwâ mə du sōwâ Zuwif bay sōwâ mənı gay' wə han,

¹⁴bay mum la' ne ndaya: «Hi mbə nan kə swə mənı nə bay hi in ne nan i mum wə vi' sōwâ. Ama na ci vun rum wə kor ri bay na cu za' dan mə bro' mənı hi tum sem rum wa rum nə mi.

¹⁵Herodə cu za' dan wa rum mətə', zə mum faɲ sin num ne mba. Ndəna', swə mənı nə cu gi kwa mə bro' mənı nde i um ci mi.

¹⁶Zə rum na də um pe kə ləva bay na də um ara.»

[¹⁷Kə cer Pakə daɲ', Herodə wə ar daɲgay' đaw nday ne.]

¹⁸Ama handay təɲ kə do dan vun nji daɲ'ɲ: «A ci swə nə si bay a ar Barabas ne mba!”

¹⁹(Soje kaw Barabas ge ta so daɲgay' zə mum wə du sōwâ mənı car dan mbok so kə ɓar nya, bay zə mum ci swə ta'a.)

²⁰Zə Pilatə wa' ar Zezu, mum faɲ in ne kə raw sōwâ kəreme.

²¹Ama handay do dan kə ini: «Gay' num də wa gu! Gay' num də wa gu”

²²Pilatə ci vun nday sem hinji' rumu: «Mum gi kwa mə bro' mi su? Na cu za' dan mə bro' wa rum i um ci mi. Zə rum, na də um pe kə ləva bay na də um ara.”

²³Ama handay do dan bayrum kəreme: «Gay' num də wa gu!» Bay dan do nday pā gbəgbon Pilatə.

²⁴Pilatə ve dan rum ce' ndə mənı handay wa'a.

²⁵Mum ar swə mənı handay wa' nə ne nday, mum nə swə mənı soje ge ta so daɲgay' zə mum car dan mbok so kə ɓar nya, bay zə mum ci swə ta'a. Bay mum ar Zezu ta ne nday ɓa kədan handay gi kwa mənı handay wə wa'a.

²⁶Kəri mənı soje kuni wə də kə Zezu, handay ndewa kə swə nya Siren mə də kə Simon, mum car sine mbə so. Handay kaw num bay tle gu gay' Zezu cin ta ne num jewre kədan mum ta kə ndi kəki Zezu.

²⁷Raw sōwâ juk ji zu rum, wə du nday rawkwa kəta' mənı wə ci' kə way' ɓa zə rumu.

- ²⁸Zezu faɲ i ɓay la' ne ndaya: «Rawkwa mə so Jeruzalem, i ci' wa rin mi, zawa, i ci' wa tu ri kə daw mi!
- ²⁹Zə bəka wə də mbə ɓay kə bəka rum, sôwâ də ini: "Kədam wa rawkwa mə ca lər, məni cu vra' daw daw mi, ɓay daw cu ce pa' vunduk nday daw mi."
- ³⁰Kəri rum, sôwâ də la' ne kə igway'i: "I bru mbə wa mba", ɓay handay də la' ne kə dolo: "I kəmbo' mba"
- ³¹Zə sôwâ la' gi ndəna' kə gu mə mbênê si, handay də ke ma kə gu mə cucu' su?"
- ³²Handay wə də kə sôwâ məsin hoɓ kədan handay də nday ci kə Zezu. Handay sum gi kwa mə bro'o.
- ³³Kəri məni handay ta day ri mə dē kə «So wa», handay gay' Zezu ta wa gu, ɓay handay gay' sum gi kwa bro' mə hoɓ kuni ta wa gu ta' daw ɓa fun, ɓay məsin ɓa guru.
- ³⁴Zezu ini: «Bəba, a vrum kwa mə bro' nday, zə handay cu we kwa məni handay wə gi nə mi.» Handay ɓul mbraw um mbok nday kə parwa.
- ³⁵Sôwâ gay' han wə kar kwa rumu. Ama sum rôwâ sôwâ Zuwif ru num kə ini: «Mum sid' sôwâ məsin si, namba wa' i nə sid' tu rum, mum la' Kris məni Ifray par num nə si!"
- ³⁶Soje kuni ru num ta'a: Handay ta də hay' rum ɓay ne mbi kwa cumok ne numu.
- ³⁷Handay ini: «Ha la' jwə sôwâ Zuwif si, a sid' tu ru ye."
- ³⁸Wə wa gu gay' um fray handay wây'i: «Swə məni nə jwə sôwâ Zuwif na."
- ³⁹Swə daw du sum gi kwa bro' mə hoɓ məni handay gay' ta wa gu kə Zezu nə i num kə ini: «Ha cu Kris mi su? A sid' tu ru kə mba daɲ' ye!"
- ⁴⁰Ama bāy hoɓ um dlay num kə ini: «Ha cu ne wəlok Ifray mi su, ha wə du dan ɓok mə daw kə rum ta' na?
- ⁴¹Mə namba, dan ɓok rum njeɲ, zə namba fe bal sin mə bro' mba. Ama mum cu gi kwa mə bro' daw mi."
- ⁴²Mum faɲ la' ne kə Zezu: «Zezu, a dūmwa rin kəri məni ha wə də suk jwə nə mi."
- ⁴³Zezu dam vun rumu: «Na in wû ne kəzin', tam ha də ke kə rin wə Paradis."
- ⁴⁴Kə fəta du wa, fəta no' ɓay ri mə ura' mbə kəmbo' nya daɲ' hâ fəta riya.
- ⁴⁵Kəri məni fəta no' wa, zim məni hay tak i so po' fur sôwâ Zuwif ɲgār du hoɓo.
- ⁴⁶Zezu ka' dan kə gbəgbonɲ ɓay ini: «Bəba, na ar nyî rin ɓa ru.» Kəki məni mum in dan rum, mum mara.
- ⁴⁷Toɲ kul soje mə nya Romə we kwa rum gi ndəna'a. Mum gi mbra' ne kə Ifray kə ini: «Kəzin' swə məni nə swə mə njeɲe."
- ⁴⁸Raw sôwâ daɲ' məni gay' wə han we kwa məni gi. Zə rum, handay faɲ ta so kə tu' ɓa kə dan diki.

⁴⁹Sôwâ mœni fî kə Zezu daŋ' kə rawkwa mœni ji zu rum daka nya Galile gay' kuni seŋ ca' kədan handay kar kwa mœni gi.

⁵⁰Swə məsin kəta' um dē kə Zozef, mum swə Fada mə Mbri. Mum swə mə bay bay njeŋe:

⁵¹Mum cu kawvun kə nday wa dan bay sin mœni handay kawvun kədan handay gi nə mi. Mum swə Arimate, so sôwâ zuwif. Mum wə ji Jwə Ifray nə ta'a.

⁵²Mum 'ya ta so Pilatə bay o mar Zezu ba rumu.

⁵³Kəki rum, mum ulay' mar Zezu mbə wa gu, mum ku' kə zim siliki mə bu bay no' num ta zra mœni handay dla wə pra, ri mœni handay cu no' mar han daw mi.

⁵⁴Fəta rum, fəta gila' tu bay fəta pemây sôwâ Zuwif mbə hərə'e.

⁵⁵Rawkwa mœni ji zu Zezu daka nya Galile ta kə Zozef. Handay we zra kəri mœni handay cin mar Zezu wə hana.

⁵⁶Handay faŋ ta so nday bay handay gila' mur kə urdi kədan handay wu' wa mar Zezu. Kə fəta pemây sôwâ Zuwif, handay pemây ce' ndə mœni dan dlay ta'a.

Luc 24

¹Dimanşə, kə bəka ced, rawkwa 'ya ta vun zra kə mur bay urdi mœni handay gila' rumu.

²Handay ta za' gway' mə ta' vun zra buru ta kə hay'i.

³Handay cok ta han, ama handay cu za' tu Bârî Zezu han mi.

⁴Handay cu we i handay dîk ma su mi, kəri rum, njiwkwa hoḅ ge mbraw mə wədi wədi mbə car hay' ndaya.

⁵Wəlok gi nday juk bay handay no' wa ta nya. Zə rum, njiwkwa kuni la' ne ndaya: «Zə mi hi wə keḅ swə mə kə i wə du sum mar su?

⁶Mum cu ti mi, ama mum car mbə mar si. I dla' wa dan mœni mum in ne ni kəri mœni mum ke wə nya Galile ḅo na,

⁷mum ini: "Say sôwâ də ar Vay sumra' də ba sôwâ mœni wə gi kwa mə bro', handay də um gay' də wa gu bay mum də car mbə mar kə bəka hinji' rumu."“

⁸Handay dla' wa dan Zezu.

⁹Handay 'ya ar vun zra bay ta in dan rum daŋ' ne kə sum ta zə Zezu mə guḅ wa daw kə sôwâ məsin daŋ'ŋ.

¹⁰Rawkwa mœni in dan rum ne kə sum sin kuni ni na: Mari mə so Magdala kə Zanə bay Mari mə ya Zakə kə rawkwa məsin mœni kə ndaya.

¹¹Ama sum sin kar dan mœni handay wə in nə dan mə uray, bay handay cu ve dan rum mi.

- ¹²Kəri rum, Piyer car ne ta vun zra. Mum goɓ kar ri ta han bay mum cu we kwa məsin mi, say zim mə galbat məni handay ku' mar kə ndi dɛlak cin wə hana taw, bay mum faɲ ta so um zə kwa rum jin' wa ne num juku.
- ¹³Kə bəka rum, sôwâ hoɓ du nday wə də so mə dɛ kə Emayus. So rum seɲ kə so Jeruzalem i kilometrə guɓ wa dāwa.
- ¹⁴Handay wə ge dan wa kwa daɲ' məni ke gi.
- ¹⁵Kəri məni handay wə ge dan kə way dan mbok nday, Zezu kə tu rum mbə hay' nday bay tle vari kə ndaya.
- ¹⁶Handay we num, ama kwa məsin tak nday dan we i mum na.
- ¹⁷Zezu ci vun ndaya: «Hi wə ge dan kə nji mbok nji wa dan mi kəri məni hi wə ta vari su?» Handay faɲ ca sototo.
- ¹⁸Swə dāw du nday, um dɛ kə Kleyopas, ci vun rumu: «Ha dāw wə du sôwâ so Jeruzalem məni cu we kwa məni gi du bəka məni kuni mi su?»
- ¹⁹Mum ci vun ndaya: «Kwa mi kuni gi su?» Handay dām vun rumu: «Kwa məni gi wa Zezu mə so Nazaret. Mum nə ke bə ka' dana. Mum kə gbəgboɲ du sin gi kə du dan ge kor Ifray kə sôwâ daɲ'ɲ:
- ²⁰Sum rôwâ mə du sum po' fur mba kə sum rôwâ mba ar num kuni kədan sum ɓok dan ɓok dan mar wa rum, bay handay gay' num ta wa gu.
- ²¹Namba ve bay dɪk i mum nə swə məni wə də tumwa sôwâ Israyel. Ama kə ndi nə daɲ', kwa rum gi bəka hinji' tama.
- ²²Kərem, rawkwa məsin wə du mba mbə jin' wa mba kə dan ndaya. Handay ta vun zra kə bəka ced,
- ²³ama handay cu za' mar um mi, handay faɲ gewa mbə in ne mba i handay we sum sin Ifray mbə hay' nday bay la' ne nday i mum kəta' kə i.
- ²⁴Sôwâ məsin wə du mba 'ya ta vun zra ta', bay handay ta za' kwa rum ce' ndə məni rawkwa kuni ini. Ama mum, handay cu we num mi.”
- ²⁵Zezu faɲ la' ne ndaya: «Hi sôwâ mə dan wa! Hi sôwâ məni herere kə ve dan daɲ' məni sum ka' dan ka'a!
- ²⁶Kris cu də ce boni rum, bay faɲ ze ri mbra' um mi su?»
- ²⁷Kəki rum, mum pay zu dan məni Derwa Ifray wə in wa rum daɲ' ne ndaya. Mum təɲ kə dɛrwa Moyizə hā day dɛrwa sum ka' dan daɲ'ɲ.
- ²⁸Kəri məni handay mbə day hərə' kə so məni handay wə də han, Zezu gi ce' ndə məni mum wa' də kofo.
- ²⁹Ama handay tak num kə ini: «A suk kə mba, fəta so' si, bay ri wa' dli ye.» Zə rum, mum ze ta so kədan mum suk kə ndaya.

- ³⁰Mum suk vun tablə kə nday, mum tle vun tləpe' fun bay gi soko ne kə Ifray, mum faŋ jak vun tləpe' fun rum bay ne ndaya.
- ³¹Kəri rum, i nday ar bay handay we num, ama mum faŋ tuḅ i nday 'yeŋe.
- ³²Handay in kə nji mbok nji: «Kəri mənɪ mum ge dan kə mba bay pay zu dan Ɖerwa Ifray ne mba wə vari, dan rum cu car kəḁam wə vunduk mba mi su?»
- ³³Handay car kəkor sar bay faŋ ta so Jeruzalem. Handay ta za' sum ta zə Zezu mə guḅ wa ḁaw ɓa wə han kə sôwâ mənɪ kə nday,
- ³⁴mənɪ wə ini: «Kəzin' Bârî car mbə mar si, Simoŋ we numu!»
- ³⁵Bay sôwâ mə hoḅ kuni in zu dan kwa mənɪ ke gi wə vari kə vari mənɪ handay we Zezu kəri mənɪ mum jak vun tləpe' fun ne ndaya.
- ³⁶Kəri mənɪ handay wə in dan də in ɓo, Zezu kə tu rum mbə car du nday bay la' ne ndaya: «Heḅ ke kə ri.»
- ³⁷Vunduk par nday bay handay ne wəlok juk, zə handay ḁik i handay we usiya.
- ³⁸Ama Zezu la' ne ndaya: «Zə mi hi wə ne wəlok su? Zə mi hi kə way dan wə vunduk ri su?»
- ³⁹I kar ɓa rin kə sem rini: Na na. I ḁak nan bay i kar nan, zə usiya cu ke kə tlew kə so mi, ama hi we na kə ndi.»
- ⁴⁰Mum in ndəna' kə ta' ɓa rum kə sem rum ḁaŋ' ne ndaya.
- ⁴¹Handay cu gak ve dan rum ga'ri sar mi, zə vunduk nday tuk kəḁam juk bay dan rum jin' wa ne ndaya. Zə rum, Zezu ci vun ndaya: «Hi kə kwati ti kəta' su?»
- ⁴²Handay pok keve mə həhaw ne numu.
- ⁴³Mum tle keve nə bay ti i ndaya.
- ⁴⁴Mum faŋ la' ne ndaya: «Dan mənɪ na in ne ni kəri mənɪ na ke kə ri ɓo nə ni na: Kwa ḁaŋ' mənɪ wây' wə wa rin wə du ɗerwa dan dlay Moyizə kə du ɗerwa sum ka' dan bay du ɗerwa nyem ḁaŋ' wə gi ye!»
- ⁴⁵Mum faŋ ar dan ḁik wa nday kədan handay mun zu Ɖerwa Ifraya.
- ⁴⁶Bay mum la' ne ndaya: «Dan mənɪ wây' nə ni na: Kris də ce boni, bay kə bəka hinji' rum, mum də car mbə mara.
- ⁴⁷Bay sôwâ də ka' dan kə semḁe rum wə nya ḁaŋ', wə təŋ so Jeruzalem kədan handay ḁe sôwâ faŋ vunduk nday bay Ifray vrum kwa mə bro' ndaya.
- ⁴⁸Hi sum we njeŋ dan rumu.
- ⁴⁹Bay na də sin kwane mənɪ Ba man kawvun kə ri wa rum mi ne. Ama say i gay' wə so Jeruzalem hâ gbəgboŋ mə wafray nə dam mbə wa ri.»

⁵⁰Kəki rum, Zezu wur mbə so kə nday ta ga' so Betani, wə han, mum ra' ɓa rum gun wa nday ɓay kuswa' ndaya.

⁵¹Kəri məni mum wə nday kuswa' ɓo, mum ɓul nji kə nday, ɓay Ifray tle num ta wafraya.

⁵²Mə handay, handay kuduk ta nya kor um, bur num ɓay faɗ ta so Jeruzalem kə tuk kəɗam juku.

⁵³Handay wə də so po' fur sôwâ Zuwif bəka daɗ' kə bur Ifraya.

Jean

Jean 1

- ¹Kə tən̄ zu kwa, Dan kəta', bay Dan nə kəta' kə Ifray bay Dan nə Ifray na.
- ²Dan nə kəta' kə Ifray daka tən̄ zu kwa.
- ³Ifray gi kwa daŋ' kə rum, kwa mən̄i gi dan rum cu dāw mi.
- ⁴Nyî wə du Dan, bay nyî rum nə ri mə bu sôwâ daŋ'ŋ.
- ⁵Ri mə bu nə d̄eri du ri mə ura', bay ri mə ura' cu gak we num mi.
- ⁶Ifray swə dāw mə d̄e kə Zaŋ.
- ⁷Mum mbə ce' ndə bə in njeŋ dan wa ri mə bu nə, mum mbə kədan sôwâ daŋ' mun dan um bay ve.
- ⁸Mum cu ri mə bu kə tu rum mi, mum mbə kədan mum in njeŋ dan wa ri mə bu na.
- ⁹Dan rum nə ri mə bu mə kəzin', mən̄i mbə wa nya bay wə d̄eri wa sôwâ daŋ'ŋ.
- ¹⁰Dan nə kəta' wə du sôwâ nya, Ifray gi sôwâ nya zə rum, ama kə ndi nə daŋ' sôwâ nya cu we num mi.
- ¹¹Mum mbə wə nya um, ama sôwâ nya um cu ve num mi.
- ¹²Ama sôwâ mən̄i ve num daŋ', mum ne gbəgboŋ ne nday kədan handay faŋ daw Ifraya.
- ¹³Handay cu faŋ daw Ifray kə vari vra', ce' ndə mən̄i swə wə vra' vay wa nya mi. Ifray kə mən̄i ne nday nyî.
- ¹⁴Dan nə faŋ sumra' bay suk wə du mba, vunduk rum nyen ped' kə bay kə dan mə kəzin', bay namba we mbra' um, mbra' mən̄i Vay mə dāw fe wə ba Ba.
- ¹⁵Zaŋ in njeŋ dan wa rum, mum ka'a: «Mum nə swə mən̄i na in dan wa rum kəri mən̄i na ini: Mum wə d̄ə mbə kəki rin, ama mum kə mbra' pâ nan si, zə mum kəta' cop kəri mən̄i na cu vra' m̄eto'o.»
- ¹⁶Wə du ndak um, namba daŋ' fe kuswa' vun nyeme.
- ¹⁷Ifray ne dan dlay ne mba kə ba Moyizə, ama bay kə dan mə kəzin' mbə kə Zezu Kris.
- ¹⁸Swə mə we Ifray cu mi. Ama Vay mə dāw mən̄i mum nə Ifray mən̄i suk wə hay' Ba um, mum kə mən̄i ta' Ifray ne mba.
- ¹⁹Njeŋ dan mən̄i Zaŋ kəri mən̄i sôwâ Zuwif mə so Jeruzalem sin sôwâ m̄əsin mə du sum po' fur kə sôwâ m̄əsin mə du sôwâ zə saŋ Levi kədan kuni ci vun Zaŋ: «Ha nə sa su?»
- ²⁰Zaŋ cu pe' dan rum mi, ama mum in dan rum t̄əlak kor nday daŋ'ŋ: «Na cu Kris mi.»

- ²¹Handay fañ ci vun rumu: «La' cu mi, ha nə sa su? Ha Eliya su?» Zañ dām vun ndaya: «Â â, na cu Eliya mi.» Handay fañ ci vun rumu: «Ha Bə Ka' Dan su?» Mum dām vun ndaya: «Â â».
- ²²Zə rum, handay ci vun rumu: «La' cu mi, ha nə sa su? A dām ci vun mba kədan namba də in dan rum ne kə sôwâ mənî sin mba! Ha in dan mi wa tu ru su?»
- ²³Zañ dām vun ndaya: «Na nə wor swə dāw mənî wə ka' dan du igopo: "I gila' vari sərəŋ ne kə Bârî", ce' ndə mənî bə ka' dan mə də kə Esaya ini.”
- ²⁴Wə du sum sin mənî sôwâ sin nday ta hay' Zañ, sôwâ məsin mə du sôwâ Zuwif mə də kə Farisiyen kəta' wə hana.
- ²⁵Handay ci vun Zañ: «Ha la' cu Kris, ko Eliya, ko bə ka' dan mi si, zə mi ha wə gi baptem ne kə sôwâ su?»
- ²⁶Zañ dām vun ndaya: «Mə na, na wə gi baptem mi ne kə mbi. Ama wə du ri, swə məsin kəta' mənî hi cu we mi.
- ²⁷Mum wə də mbə kəki rin, ama na cu nde i kədan na ulay' zew tərak um mi.”
- ²⁸Kwa rum dañ' gi wə so Betani, mənî wə dapa ga' sin ze Zurdeŋ, ri mənî Zañ gi baptem ne kə sôwâ wə hana.
- ²⁹Siw rum, Zañ we Zezu wə mbə hay' rum, bay mum ini: «I kar ri', Vay Cime Ifray mənî wə ra' kwa mə bro' sôwâ nya nə nay' na!
- ³⁰Mum nə swə mənî na in dan wa rum kəri mənî na ini: "Swə məsin wə də mbə kəki rin, ama mum kə mbra' pâ nan si, zə mum kəta' cop kəri mənî na cu vra' mətə'o.”
- ³¹Mum nə sa su, na cu we mi, ama na mbə gi baptem ne kə sôwâ kə mbi kədan na um ta' ne kə sôwâ Israyel.”
- ³²Zañ fañ in kəreme: «Na we Simbed Ifray car mbə wafray ce' ndə kuruk, mbə suk wa rumu.
- ³³Na cu we i mum nə mətə', ama Ifray mənî sin nan wə gi baptem ne kə sôwâ kə mbi in ne nana: "Ha də we Simbed man car mbə wafray dam mbə wa swə, mum nə swə mənî wə də gi baptem ne kə sôwâ kə Simbed mə Kəleŋe.”
- ³⁴Na we kwa rum, bay na wə in i mum nə Vay Ifraya.”
- ³⁵Səday' rum, Zañ fañ mbə wə ri rum kərem kə sôwâ hoḅ mə du sum ta zə rumu.
- ³⁶Kəri mənî mum we Zezu wə pâ, mum ini: «I kar ri', vay cime Ifray nə nay' na.”
- ³⁷Sum ta zə Zañ mə hoḅ kuni mun dan mənî Zañ in, bay handay 'ya ta zə Zezu.
- ³⁸Zezu fañ i, mum we nday wə ta zə rum, bay mum ci vun ndaya: «Hi wə keḅ mi su?» Handay dām vun rumu: «Ha suk wə ka su Rabi, mənî wa' dan in i bə ta' kwa?»
- ³⁹Mum dām vun ndaya: «I mbə ye, bay hi də we.» Zə rum, handay 'ya ta, bay handay weri mənî mum suk wə han, bay handay suk riya kə rumu. (Kwa rum gi kə fəta riya.)

⁴⁰Swə dāw du sôwâ mē hōb mēni mun dan Zaṅ bay 'ya ta zə Zezu, mum nə Andre, njər Simoṅ Piyer.

⁴¹Cop rum, Andre ta za' njər rum Simoṅ bay la' ne numu: «Namba za' Mesi nə si.» (Dan rum wa' ini: «Kris.»)

⁴²Mum faṅ ta cin Simoṅ hay' Zezu. Zezu kar num bay ini: «Ha Simoṅ, vay Zaṅ, ama semdē ru dē faṅwa dē kə Kefas.» (Semdē rum wa' ini: «pra.»)

⁴³Seday' mē day' rum, Zezu wa' kədan mum dē nya Galile. Mum ndewa kə Filip bay la' ne numu: «A ta zə rini.»

⁴⁴Filip nə swə so Betsayda, so mēni Andre kə Piyer gay' wə hana.

⁴⁵Kəki rum, Filip ta za' Nataniyel bay la' ne numu: «Namba za' swə mēni Moyizə in dan wa rum wə du dērwa dan dlay, bay sum ka' dan in dan wa rum ta' nə si: Mum nə Zezu, vay Zozef mē so Nazaret.»

⁴⁶Nataniyel ci vun rumu: «Kwa mē bay gak car mbə so Nazaret si su?» Filip dām vun rumu: «A mbə, bay a kar ye.»

⁴⁷Kəri mēni Zezu we Nataniyel wə mbə hay' rum, mum in wa rumu: «I kar ri'i, swə Israyel mē kəzin' nə ni na, vur vur cu hay' rum mi.»

⁴⁸Nataniyel ci vun rumu: «Ha we nan kə vari mi su?» Zezu dām vun rumu: «Na we nu kəri mēni ha suk wə zə gu tərūm, cop kəri mēni Filip cu dē nu mətō'o.»

⁴⁹Zə rum, Nataniyel la' ne numu: «Bə ta' kwa, ha nə Vay Ifray, ha nə jwə sôwâ Israyel!»

⁵⁰Zezu dām vun rumu: «Ha ve nan zə na in i na we nu kəri mēni ha suk wə zə gu tərūm su? Ha dē we kwa mē mbri mē pâ kwa mēni na!»

⁵¹Bay mum in kəreme: «Na in mi ne kəzin', hi dē we wafray ar vun, bay sum sin Ifray mē wafray wə ur dē wafray bay wə dam mbə wa Vay sumra'a!»

Jean 2

¹Kə bəka hinji' rum, sôwâ wə tle dər wə so Kana nya Galile bay ya Zezu kəta' wə hana.

²Sôwâ dē Zezu kə sum ta zə rum wə ri tle dər rum ta'a.

³Kəri mēni sum «viṅə» ndo' ba nday si, ya Zezu la' ne numu: «sum viṅə ndo' ba nday si.»

⁴Ama Zezu dām vun sa: «Mə jwə, dan mi nə ba mba wa dan mēni nə su? Ri man cu mbə mətō'o.»

⁵Kəri rum, ya Zezu la' ne kə sum sini: «I gi kwa daṅ' mēni mum dē in mi ne.»

⁶Wə ri rum, je' gway' kanki' məni sôwâ her njay wə hana. Sôwâ Zuwif njay nday wə han kədan handay kol tu kə ndi ce' ndə vun fur ndaya. Je' daw rum gak tle litrə mbi ce' ndə gu coho' ko kis kə gu hobo.

⁷Zezu la' ne kə sum sini: «I il mbi nyen je' məni kuna.» Handay il mbi nyen vun nday pede.

⁸Zezu faɲ la' ne ndaya: «Mgbaɲ ni ne, i il mbi rum kî, bay i də ne kə toɲ dərə.» Handay il ta ne numu.

⁹Toɲ nə tuk mbi məni faɲ sum viɲə, mum cu we ke sum nə car mbə ka su mi, (ama sum sin məni il mbi rum we si). Zə rum, mum də bə cin ma

¹⁰Bay la' ne numu: «Sôwâ daɲ' wə ne sum mə bay ne kə sôwâ məni handay də nday cop, bay kəki məni handay gal kə ndi si, handay nday ne mə dan kədam rum bo. Ama mə ha, ha pe' sum mə bay hâ mgbəɲ ni na!”

¹¹Ndəna', Zezu gi yew mə vun kofo wə so Kana nya Galile. Mum ta' mbra' um ndəna' bay sum ta zə rum ve numu.

¹²Kəki rum, mum 'ya ta so Kapernawum kə ya um, kə daw ya um, bay kə sum ta zə rumu. Handay cu bar wə han bəka raw mi.

¹³Cer sôwâ Zuwif mə də kə Pakə nə həre', zə rum Zezu ta so Jeruzalem.

¹⁴Wə rawti so po' fur sôwâ Zuwif, mum za' sôwâ məni wə gi coɓ naw, kə cime, bay kuruk, ndəna' ta' kə sum gi sam səlay gay' wə vun tablə ndaya.

¹⁵Zə rum, mum cidî ləva kə zew bay 'way nday daɲ' wur ta rəka so po' fur rum kə cime kə naw nday ta'a. Mum ra' səlay sum gi sam səlay pik ta nya bay faɲ i tablə ndaya.

¹⁶Mum la' ne kə sum gi coɓ kuruku: «I ra' kwa mi daɲ' ti si, i gi so Ba man ce' ndə so gi coɓ kwa mi!”

¹⁷Sum ta zə rum dla' wa dan məni wây' wə du Derwa Ifraya: Ifray, sây' də suk wə so wû nyen vunduk rin pede.

¹⁸Zə rum, sôwâ Zuwif ci vun rumu: «Ha gak gi yew mi kədan ha ta' mba ne i ha kə vari gi kwa rum ndəna' su?”

¹⁹Zezu dam vun ndaya: «I bru so po' fur sôwâ Zuwif məni nə, bay na də faɲ dam mə mbrew du bəka hinji'i.”

²⁰Sôwâ Zuwif la' ne numu: «Sôwâ gi kim gufədi' wa kanki' kə dam so po' fur məni nə, bay mə ha, ha də faɲ dam so rum du bəka hinji' su?”

²¹Ama so po' fur məni Zezu wə in dan wa rum nə wə ta' tu rumu.

²²Kəri məni Zezu car mbə mar, sum ta zə Zezu dla' wa dan məni mum in ne nday, bay handay ve dan məni wây' wə du Derwa Ifray bay dan məni Zezu in ne ndaya.

²³Kəri mənı Zezu wə so Jeruzalem kəri cer sôwâ Zuwif mə də kə Pakə, sôwâ juk ve num kəri mənı handay we yew cem cem mənı mum gi.

²⁴Ama Zezu cu cin vunduk rum wa nday mi, zə mum we si nday daŋ'ŋ.

²⁵Mum cu kə mē' kədan swə məsin ta' dan vunduk sôwâ ne num mi: Zə mum kə tu rum we kwa mənı wə vunduk ndaya.

Jean 3

¹Swə dāw kəta' wə du kul sôwâ Zuwif mə də kə Farisiyen um də kə Nikodem. Mum nə dāw wə du sum rôwâ Fada mə Mbri.

²Mum mbə hay' Zezu kə dukri bay la' ne numu: «Bə ta' kwa, namba we si, Ifray sin nu kədan ha ta' kwa mba ne, zə swə dāw cu gak gi yew mənı ha wə gi nə mi, say ka Ifray kəta' kə bə rumu.»

³Zezu dām vun rumu: «Na in wû ne kəzin', swə dāw cu gak we ri Jwə Ifray nə mi, say ka bə rum vra' kə mbrewē.»

⁴Nikodem ci vun rumu: «Swə mənı jeŋ tu si gi ma kədan mum faŋ vra' kə mbrew su? Kəzin' mum cu gak faŋ ze də rawti ya um bay vra' kərem za' mi!»

⁵Zezu dām vun rumu: «Na in wû ne kəzin', swə dāw cu gak ze wə ri mənı Ifray wə də suk jwə wa sôwâ um nə mi, say ka bə rum vra' kə mbi bay Simbed' Ifraya.

⁶Swə mənı vra' kə ba um mə wa nya, bə rum swə mə nya, ama swə mənı vra' kə Simbed' mə Kəleŋ, bə rum swə mə Ifraya.

⁷A ar dan mənı na in ne nu nə jin' wa ne nu kəri mənı na in ne nu: "Say hi vra' kə mbrewē" mi.

⁸Simbed' wə sa' də ri mənı mum wə wa'a. Ha mun tlər rum, ama ha cu we mum car mbə ka su ko də ka su mi. Ndəna' ta' kə sa su daŋ' mənı vra' kə Simbed' mə Kəleŋe.»

⁹Nikodem faŋ ci vun rumu: «Kwa rum gak gi ndəna' kə vari mi su?»

¹⁰Zezu dām vun rumu: «Ha bə ta' kwa mə mbri wə du sôwâ Israyel, bay ha cu we kwa rum mi su?

¹¹Na in wû ne kəzin', namba wə ge dan wa kwa mənı namba mun, bay namba wə in dan wa kwa mənı namba we, ama hi cu bə ve njeŋ dan mənı namba wə in nə mi.

¹²Hi cu ve dan man kəri mənı na in dan wa kwa mə nya ne ni mi, gi ma kədan hi ve dan man kəri mənı na wə in dan wa kwa mə wafray mi ne nə su?

¹³Swə dāw cu ur ta wafray dāw mi, say Vay sumra' mənı car mbə wafray dam mbə nya.

¹⁴Ce' ndə mənı Moyizə tle wu' mənı sôwâ ri num kə njike mə tlew rew ta wa gu wə du gop, ndəna' ta', sôwâ də rew Vay sumra' də wa gu

¹⁵kədan sa su daŋ' mənı ve num, bə rum də ke kə nyî mə də hâ.

- ¹⁶Ifray bə sôwâ nya dle tu si, zə rum mum ne Vay um mə dāw kədan sa su daŋ' mənɪ ve num cu vi' mi, ama bə rum də ke kə nyî mə də hâ.
- ¹⁷Ifray cu sin Vay um mbə wə du sôwâ nya kədan mum bok dan wa sôwâ nya mi, ama kədan sôwâ nya fe sid' zə rumu.
- ¹⁸Swə mənɪ ve Vay, dan bok cu wa bə rum mi, ama swə mənɪ cu ve Vay nə mi, dan bok wa bə rum si zə mum cu ve Vay Ifray mə dāw nə mi.
- ¹⁹Dan bok rum nə ni na: Ri mə bu mbə wə du sôwâ nya, ama sôwâ nya wə bə ri mə ura' pā ri mə bu si zə handay wə gi kwa mə bro'o.
- ²⁰Sa su daŋ' mənɪ wə gi kwa mə bro' wə sî ri mə bu, bay mum cu mbə wə ri mə bu mi, zə mum wə ne wəlok i ri mə bu nə wə ta' kwa mə bro' umu.
- ²¹Ama swə mənɪ wə gi kwa mə njeŋ mbə wə ri mə bu kədan ri mə bu nə ta' sin mə njeŋ mənɪ mum wə gi wə du ta um kə Ifraya.”
- ²²Kəki rum, Zezu kə sum ta zə rum 'ya ta nya Zude. Mum bar han kə nday bəka cep, bay mum gi baptem ne kə sôwâ.
- ²³Zaŋ wə gi baptem ne kə sôwâ ta' wə ze Aynon həre' kə so Salim, ri mənɪ mbi wə han juku. Sôwâ mbə hay' rum, bay mum gi baptem nday ne.
- ²⁴Kəri rum, sôwâ cu kaw Zaŋ ge ta so daŋgay' mətə'o.
- ²⁵Kəri rum, sôwâ məsin wə du sum ta zə Zaŋ təŋ kə way dan kə swə Zuwif wa dan kol tu kə vari vun fur ndaya.
- ²⁶Handay 'ya ta hay' Zaŋ bay la' ne numu: «Bə ta' kwa, ha dla' wa dan swə mənɪ ke kə ru wə dapa ga' sin ze Zurdeŋ, swə mənɪ ha in njeŋ dan wa rum ne mba nə si su? A kar ri', mgbaŋ ni nə, mum wə gi baptem, bay sôwâ daŋ' wə də hay' rumu.”
- ²⁷Zaŋ dām vun ndaya: «Swə dāw cu gak fe kwa mi, say ka Ifray mə wafray ne kwa rum ne numu.
- ²⁸Hi kə tu ri, hi gak in njeŋ dan wa dan mənɪ na ke ini: "Na cu Kris mi, ama Ifray sin nan ta kofo rumu.”
- ²⁹Bə cin ma kə mənɪ cin ma rum, ama bāy bə cin ma wə car hay' rum bay mun dan umu. Bay mum tuk kədam juk kə mun wor bə cin ma na. Ndəna' ta', na wə tuk kədam bay mgbaŋ ni nə kədam man nyen si.
- ³⁰Mə mum, say mum jeŋ də kofo kə mbra', ama mə na, say na faŋ də kəki.”
- ³¹«Swə mənɪ car mbə wafray, mum nə wa kwa daŋ'ŋ. Swə mənɪ wə wa nya, mum nə swə nya, bay mum wə in dan wa kwa nya. Swə mənɪ car mbə wafray, mum nə wa kwa daŋ'ŋ.
- ³²Mum in dan wa kwa mənɪ mum we bay mun, ama swə dāw cu ve njeŋ dan um mi.
- ³³Swə mənɪ ve njeŋ dan um, bə rum wə we i Ifray in dan mə kəzini.

³⁴Swə mənɪ Ifray sin, bə rum wə in dan Ifray, zə Ifray wə nyen vunduk rum kə Simbed'umu.

³⁵Ba Vay wə bə Vay, bay mum ne gbəgboŋ ne num wa kwa daŋ'ŋ.

³⁶Swə mənɪ ve Vay, bə rum kə nyî mə də hâ. Swə mənɪ cu mun vun Vay nə mi, bə rum cu də we nyî mə də hâ mi, ama bak Ifray suk wa rumu.»

Jean 4

¹Kul sôwâ Zuwif mə də kə Farisiyen mun i Zezu wə gi baptem ne kə sôwâ bay wə fe sôwâ mənɪ wə ta zə rum pâ Zaŋ si.

²(Njeŋ rum si, Zezu cu gi baptem ne kə swə dāw kə tu rum mi, ama sum ta zə rum kə mənɪ wə gi baptem ne kə sôwâ.)

³Kəri mənɪ Zezu mun dan rum, mum 'ya ar nya Zude bay faŋ ta nya Galile.

⁴Kədan mum də han, say mum pâ wə nya Samari.

⁵Mum mbə day hərə' kə so Sikar wə nya Samari, so rum hərə' kə sine mənɪ Yakub ne kə vay um Zozef,

⁶zra mbi Yakub kəta' wə hana. Zezu cik wə vari gaŋ bay mum suk wə vun zra mbi rumu. Ri rum ce' ndə fəta du wa.

⁷Ma nya Samari mbə kədan ta il mbi, bay Zezu la' ne sa: «Ōŋ ne nan mbi, a ce ri'i.»

⁸(Sum ta zə rum ke ta mbok so kədan handay coḅ kwati.)

⁹Ma nya Samari rə la' ne kə Zezu: «Ha swə Zuwif, bay na ma nya Samari, gi ma ha o mbi ce ba rin su!» (Zə sôwâ Zuwif cu ba nji kə sôwâ nya Samari mi.)

¹⁰Zezu dām vun sa: «Həŋ la' we kwane mənɪ Ifray wə ne nə si, bay həŋ la' we swə mənɪ ini: "Ōŋ ne nan mbi ce", həŋ kə mənɪ də o mbi ba rum bay mum də maŋ ne mbi mənɪ wə ne nyî mə də hâ.»

¹¹Ma rə la' ne numu: «Bârî, ha cu kə kwa il mbi mi, bay zra mbi nə ciriŋriŋi. Ha də za' mbi mənɪ wə ne nyî mə də hâ nə ka su?

¹²Ba mbri mba Yakub ne zra mbi rum ne mba, mum kə tu rum ce mbi rum, daw um kə doknay um kuni ce mbi rum ta'a. Ha dîk i ha kə mbra' pâ Yakub su?»

¹³Zezu dām vun sa: «Sa su daŋ' mənɪ ce mbi mənɪ nə, mē' mbi də ci bə rum kəreme.

¹⁴Ama swə mənɪ wə də ce mbi mənɪ na wə də um ne, mē' mbi cu də ci bə rum kpe mi, zawa mbi mənɪ na wə də um ne, zra mbi rum də faŋ mbi mənɪ wə kim də hâ wə vunduk rum, bay wə um ne nyî mə də hâ.»

¹⁵Ma rə la' ne numu: «Bârî, a ne nan mbi rum kədan mē' mbi nə ci nan za' mi, bay kədan na faŋ mbə il mbi ti za' mēta'a.»

¹⁶Zezu la' ne sa: «Ōŋ də də nji maŋ bay mbə ti kə rumu.»

- ¹⁷Ma rə dām vun rumu: «Na cu kə nji mi.» Zezu dām vun sa: «Həŋ dām njeŋ kə ri mənɪ həŋ in i həŋ cu kə nji mi.
- ¹⁸Zə həŋ ke kə nji cem cem vatɪ, ɓay swə mənɪ həŋ suk kə rum mgbəŋ ni nə, mum cu nji maŋ mi. Həŋ in tu dan ne nana.”
- ¹⁹Zə rum, ma rə la' ne numu: «Bârî, na we si, ha nə bə ka' dana.
- ²⁰Ba mbri ramba ke wə bur Ifray wa igway' mətɪ rə, ama mə hi sôwâ Zuwif, hi wə in i ri mənɪ sôwâ gak bur Ifray han nə wə so Jeruzalem.”
- ²¹Zezu dām vun sa: «Mə jwə, əŋ ve dan mənɪ na: Ri wə də mbə kəta', ɓay kəri rum hi cu də bur Ba man wa igway' mətɪ, ko wə so Jeruzalem mi.
- ²²Hi sôwâ nya Samari, hi cu we swə mənɪ hi wə bur nə mi. Namba sôwâ Zuwif, namba we swə mənɪ namba wə bur nə si, zə sɪd' car mbə hay' sôwâ Zuwif.
- ²³Ama ri wə də mbə, ɓay ri nə mbə si, kəri rum, sôwâ mənɪ wə bur Ifray kə gbəgbəŋ Simbed' mə Kələŋ ɓay kə njeŋ, zə Ba man wə wa' sôwâ mənɪ wə um bur kə vari rumu.
- ²⁴Ifray nə Simbed' na, ɓay say kə gbəgbəŋ Simbed' um, sôwâ gak um bur njeŋe.”
- ²⁵Ma rə la' ne numu: «Na we si, Mesi, dan rum wa' ini: Kris wə də mbə, ɓay kəri mənɪ mum də mbə, mum də pay zu dan daŋ' mba ne.”
- ²⁶Zezu dām vun sa: «Na, swə mənɪ wə dan kə riŋ, na nə mum na.”
- ²⁷Kəri rum, sum ta zə Zezu gewa mba. Kəri mənɪ handay we Zezu wə ge dan kə ma, kwa rum jin' wa ne ndaya. Ama swə dāw du nday cu ci vun ma ra: «Həŋ wa' mi hay' rum su?» Ko cu ci vun Zezu: «Zə mi ha wə ge dan kə sə su mi?”
- ²⁸Ma rə ar dənay sə cin ta nya, ɓay ta faŋ ta mbok so, ta in ne kə sôwâ:
- ²⁹«I mbə kar swə mənɪ in dan kwa daŋ' mənɪ na gi. Ke məsin mum Kris nə su?”
- ³⁰Zə rum, handay wur mbə mbok so ɓay ta hay' Zezu.
- ³¹Kəri rum, sum ta zə Zezu o num kədan nə ti kwati. Handay la' ne numu: «Bə ta' kwa, a ti kwati kî ri'i!”
- ³²Ama mum dām vun ndaya: «Na kəta' kə kwati mənɪ hi cu we mi.”
- ³³Zə rum, sum ta zə rum ci vun mbok nji: «Swə məsin mbə ne num kwati su?”
- ³⁴Zezu la' ne ndaya: «Kwati man nə kə mənɪ na wə gi kwa mənɪ swə mənɪ sin nan wə wa', ɓay ndo' sin mənɪ mum ne nan kədan na gi.
- ³⁵Mə hi, hi wə ini: "Cer gwa' fədi' ɓay wakaya də mba. Ama mə na, na in mi ne: I kar sine kə ɓayrum ri'i. U co' si wa' tum ye!
- ³⁶Bə tum rum wə fe bal cik um, ɓay mum wə ɓawa u zə nyî mə də hâ. Ndəna', bə jo' rum kə bə tum rum, handay də tuk kədam vun nji.
- ³⁷Zə dan mə ni nə kəzini: "Swə dāw jo' kwa ɓay swə məsin tum mə tum rumu.”

³⁸Na sin ni kədan hi gi kwa wakaya wə sine məni hi cu gi sin wə han mi. Sôwâ məsin gi sin wə han, bay hi ti bal cik ndaya.”

³⁹Sôwâ nya Samari juk mə so rum ve Zezu zə dan məni ma rə in ne ndaya: «Mum in dan kwa daŋ' məni na gi.”

⁴⁰Kəri məni sôwâ nya Samari mbə hay' rum, handay o num kədan nə suk kə ndaya. Bay Zezu bar wə han bəka hofo.

⁴¹Sôwâ məsin juk ve num zə dan məni mum in kə tu rumu.

⁴²Handay la' ne kə ma ra: «Mgbaŋ ni nə, namba cu ve num zə dan məni həŋ in nə taw mi, ama zə namba mun dan in um kə tu mba: Bay namba we si mum nə Bə Sid' sôwâ nya kəzini.”

⁴³Kəki bəka hofo rum, Zezu 'ya mbə han bay ta nya Galile.

⁴⁴Zə Zezu ke in kə tu rum i bə ka' dan cu fe mbā wə nya um mi.

⁴⁵Kəri məni mum ta day nya Galile, sôwâ nya rum ve num baya: Zə handay ta', handay ke wə so Jeruzalem wə ri cer sôwâ Zuwif mə də kə Pakə, bay handay we kwa daŋ' məni mum gi wə ri cer rumu.

⁴⁶Kəri rum Zezu faŋ ta so Kana nya Galile wə so məni mum gi mbi faŋ sum mə də «viŋə». Toŋ swə sərawsi kəta' wə han, mum kə vay mə nji wə so Kapernawum kə gaḃa.

⁴⁷Kəri məni mum mun i Zezu car nya Zude mbə nya Galile, mum ta hay' rum bay o num kədan nə mbə so Kapernawum bay car vay um məni həre' kə mara.

⁴⁸Zezu la' ne numu: «Hi cu gak man ve kpe mi, say ka hi we yew cem cem kə kwa cem cem mə jin' wa sôwâ si!”

⁴⁹Toŋ swə sərawsi nə dām vun rumu: «Bârî, a mbə so man, cop dan vay man mara!”

⁵⁰Zezu la' ne numu: «A də so wû ye, vay wû də cara!» Swə nə ve dan məni Zezu in ne num, bay mum 'ya dle.

⁵¹Kəri məni mum wə vari də so um ḃo, sum sin um mbə ndewa kə rum bay la' ne numu: «Vay wû nə car si!”

⁵²Mum ci vun ndaya: «Vay nə car kə ler mi su?» Handay dām vun rumu: «Wa so' num kum, ka fəta lay kî.”

⁵³Kəri rum, ba vay nə dla' wa i ri rum nə ri mə daw kəri məni Zezu la' ne numu: «Vay wû də cara.» Zə rum, mum kə cava um daŋ' ve Zezu.

⁵⁴Mum nə hofo yew məni Zezu gi kəri məni mum car nya Zude faŋ ta nya Galile.

Jean 5

¹Kəki rum, Zezu 'ya ta so Jeruzalem kədan mum gi cer vun fur sôwâ Zuwif.

²Wə Jeruzalem, hère' kə vun gam so mənì sôwâ wə dē kə «Vun Gam Cime», bara kəta' wə hana. Sôwâ kaw dan̄ki vatl gan wa bara rum kə ndi. Sôwâ wə dē bara rum kə vun Hebre: Betzata.

³Wə zə dan̄ki kuni, sum gaḅ juk bar wə hana: dən̄âr, kə lem, ḅay hurbu. [Handay wə ji nyen mbi rumu.

⁴Zə kəri məsin, vay sin Bârî mə wafray dam mbə nyen mbi bara na. Bə gaḅ mənì dam ta mbi vun kofo kəki mənì vay sin nə nyen mbi rum, gaḅ um car, ko gaḅ mi su dan̄'ŋ.]

⁵Bə gaḅ məsin kəta' wə han, mum gi kim guhinji' wa coho' kə gaḅ rumu.

⁶Kəri mənì Zezu we num bar wə han ḅay we i mum gi kim juk kə gaḅ rum, mum ci vun rumu: «Ha wa' i gaḅ wû nə car su?»

⁷Bə gaḅ nə ḁam vun rumu: «Bârî, na cu kə swə məsin kədan mum man tle cin də bara nə kəri mənì vay sin wə nyen mbi nə mi. Kəri mənì na wə keḅ kədan na dam də du mbi, swə məsin dam də han cop kə rini.»

⁸Zezu la' ne numu: «A car ye, a tle la' bar gaḅ wû ḅay a ta ye.»

⁹Kəkor sar, gaḅ swə nə cara. Mum tle la' bar um, ḅay mum tən̄ kə ta. Kwa rum gi kə fəta pemây sôwâ Zuwif.

¹⁰Zə rum, sôwâ Zuwif la' ne kə swə mənì gaḅ um car na: «Tam bəka pemây, ḅay dan dlay mba cu ne vari ne nu kədan ha tle la' bar wû ta kə ndi mi.»

¹¹Mum ḁam vun ndaya: «Swə mənì car nan nə la' ne nana: "A tle la' bar wû, ḅay a ta ye."»

¹²Handay faṅ ci vun rumu: «Sa nə swə mənì la' ne nu: "A tle la' bar wû, ḅay a ta ye nə su?"»

¹³Ama swə mənì gaḅ um car nə cu we swə mənì car num nə mi, zə Zezu pâ 'ya dle 'yeṅ mbə du raw sôwâ mənì wə ri rumu.

¹⁴Kəki rum, Zezu ndewa kə rum wə so po' fur sôwâ Zuwif, ḅay mum la' ne numu: «A mun ri'i: Mgbaṅ ni nə ha car gaḅ si, a gi kwa mə bro' za' mi, kədan kwa mə bro' mə pâ mənì nə mbə wa ru za' mi.»

¹⁵Swə nə car ḅay ta in ne kə sôwâ Zuwif i Zezu kə mənì car numu.

¹⁶Zə rum, sôwâ Zuwif tən̄ kə keḅ zu Zezu, zə mum gi kwa rum kə fəta pemây ndaya.

¹⁷Ama Zezu ḁam vun ndaya: «Ba man wə gi sin bəka dan̄', ḅay na wə gi sin ta'a.»

¹⁸Zə dan rum, sôwâ Zuwif dle kə keḅ zu Zezu kə gbəgboṅ kədan handay um ci, cu zə i mum cuwol dan dlay kə gi sin kə fəta pemây nday taw mi, ama zə mum in i Ifray nə Ba um, ḅay ndəna', mum wə gi tu rum vun nji ḁaw kə Ifraya.

¹⁹Zə rum, Zezu ḁam vun ndaya: «Na in mi ne kəzin', Vay cu gak gi kwa kə tu rum mi. Mum wə gi kwa mənì mum we Ba um wə gi nə tawa. Kwa dan̄' mənì Ba Vay wə gi, ndəna' ta' Vay wə.

- ²⁰Zə Ba Vay wə bə Vay ɓay mum wə ta' kwa ɗaŋ' mənɪ mum wə gi kə tu rum ne kə Vaya. Mum də ta' sin cem cem mə pā mənɪ nə um ne, ɓay sin um də jin' wa mi ne.
- ²¹Zə ce' ndə mənɪ Ba Vay wə ra' sôwâ mbə mar, ndəna' ta', Vay wə ne nyî ne kə sôwâ mənɪ mum wə wa' nday ne.
- ²²Bay Ba Vay cu wə ɓok dan wa swə ɗaw kə tu rum mi, ama mum ne gbəgbəŋ ɓok dan ɗaŋ' ne kə Vay,
- ²³kədan sôwâ ɗaŋ' mbâ Vay ce' ndə mənɪ handay wə mbâ Ba Vay. Swə mənɪ cu mbâ Vay mi, bə rum cu mbâ Ba Vay mənɪ sin num nə mətə'a."
- ²⁴Na in mi ne kəzin', swə mənɪ mun dan man ɓay ve swə mənɪ sin nan, bə rum kə nyî mə də hâ. Dan ɓok cu də ke wa bə rum mi, mum car ɓay mum kə nyî mə də hâ.
- ²⁵Na in mi ne kəzin', ri wə də mbə, ɓay ri rum mbə si. Kəri rum, sôwâ mənɪ mar də mun wor Vay Ifray, ɓay sôwâ mənɪ mun wor rum, handay də ke kə nyî mə də hâ.
- ²⁶Zə ce' ndə mənɪ Ba Vay kə gbəgbəŋ kədan mum ne nyî ne kə sôwâ, ndəna' ta', mum ne gbəgbəŋ rum ne kə Vay kədan mum ne nyî rum ne kə sôwâ.
- ²⁷Bay mum ne vari ɓok dan ne kə Vay zə mum Vay sumra'a.
- ²⁸I ar dan man jin' wa ne ni mi, zə ri wə də mbə ɓay kəri rum, sôwâ ɗaŋ' mənɪ mar də mun wor um,
- ²⁹ɓay handay də wur mbə zra nday kədan ke kə nyî mə də hâ. Sôwâ mənɪ ke gi kwa mə bro' də wur zra nday, ɓay Ifray də ɓok dan wa ndaya.
- ³⁰«Na cu gak gi kwa ɗaw kə tu rin mi: Na wə ɓok dan ce' ndə mənɪ Ifray wə man in ne ɓay dan ɓok man nə njeŋ, zə na cu wə keɓ kədan na gi kwa mənɪ na wə wa' nə mi, ama na wə gi kwa mənɪ swə mənɪ sin nan wə wa'a.
- ³¹Na la' in njeŋ dan wa tu rin kə tu rin si, dan mənɪ na wə in nə cu gak gi sin ce' ndə kwata' mə kəzin' mi.
- ³²Ama swə məsin kəta' mənɪ wə in njeŋ dan wa rin, ɓay na we si: dan mənɪ mum wə in wa rin nə kəzini.
- ³³Hi sin sum sin hay' Zaŋ ɓay njeŋ dan mənɪ mum in nə kəzini.
- ³⁴Na cu kə mē' njeŋ dan swə ɗaw mi, ama na in dan rum ndəna' kədan hi gak fe sidi.
- ³⁵Zaŋ ke ce' ndə baŋgay mənɪ swə ge ku wə han ɓay wə ɗəri. Ama hi tuk kəɗam kə ri mə ɓu rum zə ri kî.
- ³⁶Ama mə na, na kə njeŋ dan wa rin kə mbra' pā mənɪ Zaŋ in wa rini: Mum nə sin cem cem mənɪ Ba man ne nan kədan na gi. Sin kuni kə mənɪ in njeŋ dan wa rin, ɓay handay ta' i Ba man sin nana.
- ³⁷Bay Ba man mənɪ sin nan wə in njeŋ dan wa rin ta'a. Hi cu mun wor rum kpe mi, ɓay hi cu we vuk rum kpe mətə'a.

- ³⁸Hi cu kaw dan um wə vunduk ri mi, zə hi cu ve swə mənɪ mum sin nə mi.
- ³⁹Hi wə keɓ mun zu 'Derwa Ifray zə hi wə dɪk i hi gak za' nyî mə də hâ wə du rumu. Derwa rum kə mənɪ in dan wa rini.
- ⁴⁰Kə ndi nə daŋ', hi cu bə mbə hay' rin kədan hi fe nyî mə də hâ mi.
- ⁴¹Na cu wə keɓ mbra' mənɪ car mbə hay' sôwâ mi.
- ⁴²Ama na we si, hi cu bə Ifray wə vunduk ri mi.
- ⁴³Na mbə kə semɗe Ba man, ama hi cu bə man ve mi. Ama swə məsin la' mbə kə wa tu rum si, hi də um ve.
- ⁴⁴Hi wə tuk kədam kə ve mbra' mbok nji, ama hi cu keɓ mbra' mənɪ car mbə hay' Ifray nə daw mi. La' ndəna' si, gi ma hi gak man ve su?
- ⁴⁵Ama i dɪk i na də tum sem ri wə kor Ba man mi: Moyizə, swə mənɪ hi cin vunduk ri wə wa rum, mum kə mənɪ tum sem ri.
- ⁴⁶Hi la' ve Moyizə kəzə kəzin' si, hi man ve ta', zə mum wây' dan wa rini.
- ⁴⁷Ama zə hi cu ve dan mənɪ mum wây' wa rin nə mi, gi ma hi gak ve dan man su?»

Jean 6

- ¹Kəki rum, Zezu 'ya ta dapa ya mbi Galile ga' sini. Sôwâ wə də ya mbi rum kə ya mbi Tiberiyadə ta'a.
- ²Raw sôwâ wə ji zu rum, zə handay we yew cem cem mənɪ mum gi kə sum gaɓ mənɪ mum cara.
- ³Zezu ur ta wa igway', ɓay mum suk wə han kə sum ta zə rumu.
- ⁴Cer sôwâ Zuwif mə də kə Pakə nə hère'e.
- ⁵Zezu tle i ɓay we raw sôwâ wə mbə hay' rumu. Zə rum, mum ci vun Filip: «Namba də coɓ kwati wə ka kədan namba ne kə sôwâ mənɪ kuni daŋ' ti su?»
- ⁶Mum in ndəna' kədan mum mun dan mənɪ Filip wə də dama. Zə mum we kwa mənɪ mum wə də gi nə si.
- ⁷Filip dam vun rumu: «Ko namba la' kə səlay kis hoɓ, namba cu gak coɓ kwati kədan ndap swə daw daw daŋ' du nday fe kî kî mi.»
- ⁸Andre, njər Simon Piyer, mum daw du sum ta zə Zezu, la' ne kə Zezu:
- ⁹«Vay jid' kəta' ti kə vun tləpe' fun vatl kə keve hoɓo. Ama kwa rum gak gi mi zə raw sôwâ mənɪ kuni su?»
- ¹⁰Zezu la' ne ndaya: «I gi sôwâ daŋ' gay' də nya.» Za juk wə ri rumu. Zə rum, handay gay' ta nya. Raw njiwkwa i mbu vatla.

- ¹¹Zezu ra' vun tløpe' fun bay gi soko ne kə Ifray, kəki rum, mum bul ne kə sôwâ mənɪ gay' wə hana. Mum gi ndəna' kə keve ta'a. Sa su daŋ' fe i mē' umu.
- ¹²Kəri mənɪ handay daŋ' ti ndak, Zezu la' ne kə sum ta zə rumu: «I ra' kam kwati mənɪ gwa' kədan kwati rum nə dənok mi.»
- ¹³Handay ra' kam kwati mənɪ gwa' kəki mənɪ sôwâ ke ti vun tløpe' fun mə vatɪ, nyen dənɔl guɓ wa hoɓ kə ndi.
- ¹⁴Sôwâ we yew mənɪ Zezu gi, bay handay ini: «Kəzin', swə mənɪ nə Bə Ka' Dan mənɪ wə də mbə wə du sôwâ nya!»
- ¹⁵Ama Zezu we si, handay həre' kə um kaw kə gbəgbonɔ cin jwə nday, zə rum, mum 'ya ta wa igway' kə daw rum kəreme.
- ¹⁶Kə bel, sum ta zə Zezu car wa igway' rə dam ta vun ya mbi.
- ¹⁷Handay ur ta rawti da bay cin wa kə so Kapernawum vun dapa mbi ga' sini. Ri dli si, ama Zezu cu mbə hay' nday mətə'o.
- ¹⁸Kəri rum, simbed' tən kə sa' kə gbəgbonɔ, bay mbi tən kə sətə.
- ¹⁹Kəri mənɪ handay cinik da seŋ rum i kilometrə vatɪ ko kanki', handay we Zezu wə mbə hay' nday həre' bay mum wə ta wa mbi kə seme. Wəlok gi nday juku.
- ²⁰Ama Zezu la' ne ndaya: «I ne wəlok mi. Na na!»
- ²¹Kəri rum, handay wa' kədan handay um tle də rawti da, bay kəkor sar da ta day nya wə ri mənɪ handay wə də hana.
- ²²Siw rum, raw sôwâ mənɪ ke gwa' dapa ya mbi ga' sin we i da daw sar gwa' wə han, bay handay kə we rum, Zezu cu ur ta rawti da kə sum ta zə rum mi, ama sum ta zə rum 'ya kə daw ndaya.
- ²³Kəri rum, da məsin kuni car so Tiberiyadə mbə day həre' kə ri mənɪ handay ke ti kwati mənɪ Bârɪ gi soko ne kə Ifray wa kwati rumu.
- ²⁴Kəri mənɪ raw sôwâ cu we Zezu kə sum ta zə rum wə han mi, handay ur ta rawti da kuni bay 'ya ta so Kapernawum kədan um kebe.
- ²⁵Kəri mənɪ handay ta za' Zezu wə dapa ya mbi ga' sin, handay ci vun rumu: «Bə ta' kwa, ha mbə ti kə ma su?»
- ²⁶Zezu dam vun ndaya: «Na in mi ne kəzin', hi cu wə man keɓ zə hi we yew cem cem mənɪ na gi nə mi, ama zə hi ke ti kwati bay rawti ri sa'a.
- ²⁷I gi sin zə kwati mənɪ wə ndo' nə mi, ama i gi sin zə kwati mənɪ wə ne nyî mə də hâ, kwati mənɪ Vay sumra' də mi ne kwati rum zə Ifray, Ba man, cin lamba wa rumu.»
- ²⁸Zə rum, handay ci vun rumu: «Namba də gi ma kədan namba gi sin mənɪ Ifray wə wa' nə su?»

- ²⁹Zezu dām vun ndaya: «Sin mēni Ifray wə wa' kədan hi gi nə kə mēni hi wə ve swə mēni mum sini.»
- ³⁰Handay ci vun rumu: «Ha də gi yew mi kədan namba we, bay namba wû ve su? Ha də gi sin mi su?
- ³¹Ba mbri ramba ti "manə" wə du igop ce' ndə mēni Dan rum wây' wə du dərwa: Mum ne kwati mēni car mbə wafray ne nday ti.»
- ³²Zezu dām vun ndaya: «Na in mi ne kəzin', Moyizə cu kə mēni ne kwati mēni car mbə wafray ne ni nə mi, ama Ba man kə mēni wə mi ne kwati mə kəzin' mēni car mbə wafraya.
- ³³Zə kwati mēni Ifray wə ne, mum nə swə mēni car mbə wafray mbə nya bay ne nyî mə də hâ ne kə sôwâ nya.»
- ³⁴Handay la' ne numu: «Bârî, a ne kwati rum ne mba bəka daŋ'ŋ.»
- ³⁵Zezu la' ne ndaya: «Na nə kwati mēni wə ne nyî mə də hâ. Swə mēni mbə hay' rin, mē' cu də ti bə rum kpe mi, bay swə mēni ve nan, mē' mbi cu də ci bə rum kpe mətə'a.
- ³⁶Ama na in ne ni: Hi we nan si, ama hi cu ve nan mi.
- ³⁷Sôwâ daŋ' mēni Ba man ne nday ne nan, handay də mbə hay' rin, bay na cu də 'way swə dāw mēni mbə hay' rin nə kpe mi.
- ³⁸Zə na cu car wafray dam mbə nya kədan na gi kwa mēni na wə wa' mi, ama kədan na gi kwa mēni swə mēni sin nan nə wə wa'a.
- ³⁹Kwa mēni swə mēni sin nan wə wa' nə ni na: Mum cu wa' i a vi' swə dāw wə du sôwâ mēni mum ne nday ne nan nə mi, ama mum wə wa' i a ra' nday daŋ' mbə mar kə bəka ndo' nya.
- ⁴⁰Zə kwa mēni Ba man wə wa' nə ni na: Mum wə wa' i sa su daŋ' mēni we Vay bay ve num, handay də ke kə nyî mə də hâ, bay na də nday ra' mbə mar kə bəka ndo' nya.»
- ⁴¹Sôwâ Zuwif ra' bak kə Zezu zə mum ini: «Na nə kwati mēni car wafray dam mbə nya.»
- ⁴²Handay ini: «Mum cu Zezu, vay Zozef mi su? Namba we ba um kə ya umu. Gi ma tam, mum gak in i mum car wafray dam mbə nya su?»
- ⁴³Zezu dām vun ndaya: «I ar mgbrum dan mbok ri si!
- ⁴⁴Swə dāw cu gak mbə hay' rin mi, say ka Ba man mēni sin nan nə gi num mba. Bay na də par bə rum mbə mar kə bəka ndo' nya.
- ⁴⁵Sum ka' dan wây' dan mēni na: Ifray də ta' kwa ne kə sôwâ daŋ'ŋ. Sa su daŋ' mēni mun dan Ba man bay ve kwata' um, bə rum wə mbə hay' rini.
- ⁴⁶Dan rum cu ta' i swə dāw we Ba man nə mi, say swə mēni car mbə hay' Ifray dāw sar kə mēni we Ba mana.

- ⁴⁷Na in mi ne, kəzin', swə mənɪ ve nan, bə rum kə nyî mə də hâ.
- ⁴⁸Na nə kwati mənɪ wə ne nyî mə də hâ.
- ⁴⁹Ba mbri rami ti manə wə du igop, ɓay handay mara.
- ⁵⁰Ama swə la' ti kwati mənɪ car wafray dam mbə nya si, bə rum cu də mar mi.”
- ⁵¹«Na nə kwati mənɪ wə ne nyî mə də hâ mənɪ car wafray dam mbə nya. Swə la' ti kwati rum si, bə rum də ke kə nyî mə də hâ. Kwati mənɪ na də ne, mum nə tlew tu rin mənɪ na ne kədan sôwâ nya də ke kə nyî mə də hâ.”
- ⁵²Sôwâ Zuwif təŋ kə way dan kuni mbok nji wa dan rum, handay ci vun nji mbok nji: «Swə mənɪ nə gak ne tlew tu rum mba ne ti ma su?”
- ⁵³Zezu la' ne ndaya: «Na in mi ne kəzin', hi la' cu ti tlew tu Vay sumra' mi si, ɓay hi la' cu ce vəswə tu rum mi si, hi cu də ke kə nyî mə də hâ mi.
- ⁵⁴Swə mənɪ ti tlew tu rin ɓay ce vəswə tu rin, bə rum kə nyî mə də hâ, ɓay na də um par mbə mar kə bəka ndo' nya.
- ⁵⁵Zə tlew tu rin nə kwati mə kəzin' ɓay vəswə tu rin nə kwace mə kəzin' ta'a.
- ⁵⁶Swə mənɪ ti tlew tu rin ɓay ce vəswə tu rin, bə rum wə ke kə rin ɓay na wə ke kə rumu.
- ⁵⁷Ba man mənɪ sin nan, mum kə i, ɓay na kə i zə rum, ndəna' ta', swə mənɪ ti tlew tu rin də ke kə nyî mə də hâ zə rini.
- ⁵⁸Kwati mənɪ car wafray dam mbə nya nə ni na: Mum nə cu ce' ndə kwati mənɪ ba mbri rami ti ɓay mar mi. Swə mənɪ ti kwati rum də ke kə nyî mə də hâ.”
- ⁵⁹Zezu in dan rum kəri mənɪ mum ta' kwa wə rawti so Ifray sôwâ Zuwif wə so Kapernawum.
- ⁶⁰Kəki mənɪ sôwâ mənɪ wə ta zə Zezu mun dan um, sôwâ juk du nday ini: «Kwata' rum kə ciki! Sa gak ve su?”
- ⁶¹Zezu we si, sôwâ mənɪ wə ta zə rum wə mgbrum dan wa kwata' rum, zə rum, mum la' ne ndaya: «Kwata' rum wə mi cik su?
- ⁶²Hi la' we Vay sumra' ur də ri mənɪ mum ke han cop nə si, hi də gi ma su?
- ⁶³Simbed' kə mənɪ wə ne nyî. Tlew tu sumra' cu gak gi kwa məsin mi. Dan mənɪ na in ne ni, handay kə mənɪ wə mi ne Simbed' kə nyî.
- ⁶⁴Ama sôwâ məsin du ri cu ve dan man mi.» (Zə daka təŋ zu rum, Zezu we sôwâ mənɪ cu də um ve mi, kə swə mənɪ wə də um ar də ɓa sôwâ.)
- ⁶⁵Mum faŋ ini: «Zə rum, na in mi ne: Swə ɗaw cu gak mbə hay' rin mi, say ka Ba Vay kə mənɪ ne vari ne numu.”
- ⁶⁶Daka kəri rum, sôwâ juk wə du sôwâ mənɪ wə ta zə Zezu par tu nday faŋ kəki ɓay cu ta zə rum za' mi.

⁶⁷Zə rum, Zezu ci vun sum ta zə rum mə guḅ wa hobo: «Hi ta', hi wa' kədan hi par tu ri su?»

⁶⁸Simon Piyer dām vun rumu: «Bârî, namba də hay' sa su? Ha kə dan mənî wə ne nyî mə də hâ.

⁶⁹Mgbaŋ ni nə namba ve nu, ḃay namba we si: Ha nə Swə mə kəleŋ mənî car mbə hay' Ifraya.»

⁷⁰Zezu dām vun ndaya: «Na da' ni guḅ wa hoḃ daŋ', cu ndəna' mi su? Ama Satan suk wə vunduk swə ḃaw du ri!»

⁷¹Mum in dan wa Yudas, vay Simon Iskariyot. Zə Yudas ko mum la' ḃaw wə du sum ta zə Zezu mə guḅ wa hoḃ, mum kə mənî wə də um ar də ḃa sôwâ.

Jean 7

¹Kəki rum, Zezu gaŋ wə nya Galile. Mum cu bə gaŋ wə nya Zude mi, zə sôwâ Zuwif wə keḃ kədan handay um ci.

²Cer sôwâ Zuwif mə ḃe kə Cer Jew nə həre'e.

³Zə rum, daw ya Zezu la' ne numu: «A car ti, ḃay a də nya Zude kədan sôwâ mənî wə ta zə ru wə han gak we sin cem cem mənî ha wə gi kuni ta'a.

⁴Swə ḃaw la' wa' kədan sôwâ um we si, bə rum cu pe' sin mənî mum wə gi nə mi. Ha wə gi sin mə toŋ, a də gi sin rum təlak kədan sôwâ nya daŋ' wû we.»

⁵(Daw ya Zezu kə tu nday cu ve num mi.)

⁶Zezu la' ne ndaya: «Ri mə ḃay zə rin cu mbə mətô'o. Mə hi, ri daŋ', ri mə ḃay zə ri.

⁷Sôwâ nya cu gak mi sî mi, ama handay man sî, zə na wə in i sin cem cem mənî handay wə gi kuni bro'o.

⁸Mə hi, i də gi cer rum ye. Mə na, na cu də gi cer rum mi, zə ri mə ḃay cu mbə zə rin mətô'o.»

⁹Kəki dan rum, mum faŋ suk wə nya Galile.

¹⁰Daw ya Zezu 'ya ta ri cere. Kəki rum, Zezu 'ya ta han ta'a. Ama mum ta hura hura.

¹¹Sôwâ Zuwif wə um keḃ wə ri cer rum, ḃay handay ci vun: «Mum wə ka su?»

¹²Sôwâ ge dan juk wa rum kə vun rəkway wə du raw sôwâ mənî wə hana. Sôwâ məsin ini: «Mum nə swə mə ḃaya.» Sôwâ məsin ini: «Â â, mum wə vi' sôwâ.»

¹³Ama swə ḃaw cu in dan təlak wa rum mi, zə handay wə ne wəlok sôwâ Zuwif.

¹⁴Kəri mənî reta bəka gi cer pâ si, Zezu ze ta rawti so po' fur sôwâ Zuwif ḃay təŋ kə ta' kwa ne kə sôwâ mənî wə hana.

¹⁵Kwata' um jin' wa ne kə sôwâ Zuwif ḃay handay ini: «Gi ma swə mənî nə we kwa ndəna' su? Mum cu gi lekol mi.»

- ¹⁶Zezu dām vun ndaya: «Kwata' mēni na wə ta' ne kə sôwâ cu car mbə hay' rin mi, ama kwata' rum car mbə hay' swə mēni sin nana.
- ¹⁷Swə mēni ar tu rum kə gi kwa mēni Ifray wə wa', bə rum də we i kwata' man car mbə hay' Ifray, ko na wə in dan mə wa tu rini.
- ¹⁸Swə mēni wə in dan mə wa tu rum, bə rum wə keḅ mbra' zə tu rumu. Ama swə mēni wə gi sin zə mbra' swə mēni sin num, bə rum wə in tu dan, ḃay dan mə vur vur cu hay' bə rum mi.
- ¹⁹Moyizə ne dan dlay ne ni, cu ndəna' mi su? Ama swə ḃaw du ri cu ta zə dan dlay rum mi: Zə mi hi wə keḅ kədan hi man ci su?”
- ²⁰Raw sôwâ dām vun rumu: «Ha kə gam wa ru! Sa wə keḅ kədan mum wû ci su?”
- ²¹Zezu dām vun ndaya: «Na gi sin ḃaw ḃay sin rum jin' wa ne ni dan'ḡ.
- ²²Moyizə ne vari ne ni kədan hi tagura daw mi mə njiwkwa njeḡ rum si, Moyizə cu kə mēni təḡ zə gi kwa rum mi, ama bambi rami. Zə rum, hi ve kədan hi tagura swə ko kə fəta pemây sôwâ Zuwif.
- ²³Hi la' gak tagura vay mə nji kə fəta pemây sôwâ Zuwif kədan hi ḃənok dan dlay Moyizə mi si, zə mi hi ra' bak kə rin zə na car gaḃ swə ḃaw kə fəta pemây sôwâ Zuwif su?
- ²⁴I ar ḃok dan wa kwa mēni hi wə we kə i nə si. I ḃok dan kə vari rum njeḡ!”
- ²⁵Sôwâ məsin wə du sôwâ mēni gay' wə so Jeruzalem ini: «Swə mēni handay wə keḅ kədan handay um ci nə cu ni nə mi su?
- ²⁶I kar ri'i: Mum wə in dan wə du sôwâ təlak, ḃay handay cu in dan məsin ne num mi. Sum rôwâ mba we si kəzin' i mum Kris nə su?
- ²⁷Ama kəri mēni Kris wə də mbə, swə ḃaw cu də we ri mēni mum car mbə han nə mi, ama namba weri mēni swə nə car mbə han nə si.”
- ²⁸Kəri mēni Zezu wə ta' kwa ne kə sôwâ wə rawti so po' fur sôwâ Zuwif, mum tle wor ta fray ḃay ini: «Kəzin', hi we nan si, ḃay hi we ri mēni na car mbə han nə si! Ama na cu mbə kə wa tu rin mi, ama swə mēni sin nan, mum swə mə njeḡ, hi cu we num mi.
- ²⁹Ama mə na, na we num si, zə na car mbə hay' rum, ḃay mum kə mēni sin nana.”
- ³⁰Zə rum, handay keḅ kədan handay um kaw, ama swə ḃaw cu ḃak num mi, zə ri um cu mbə mətə'o.
- ³¹Ama sôwâ juk wə du raw sôwâ mēni wə han ve num ḃay handay ini: «Kəri mēni Kris wə də mbə, mum də gi yew cem cem pâ mēni swə mēni nə wə gi nə su?”
- ³²Kul sôwâ Zuwif mə ḃe kə Farisiyen mun dan mēni sôwâ wə ge dan kə vun rəkway du raw sôwâ wa Zezu: Zə rum, sum rôwâ mə du sum po' fur kə kul sôwâ Zuwif mə ḃe kə Farisiyen sin kuni sum ji vun so po' fur sôwâ Zuwif kədan handay kaw Zezu.

- ³³Zezu ini: «Bəka mənɪ na wə suk kə ri nə gwa' kî ɓo, kəki rum na də faŋ də hay' swə mənɪ sin nana.
- ³⁴Hi də man keɓ, ama hi cu də man za' mi, zə hi cu gak də ri mənɪ na wə də ke han nə mi.”
- ³⁵Sôwâ Zuwif ci vun nji mbok nji: «Mum də ka kədan namba cu gak um za' mi nə su? Mum də hay' sôwâ Zuwif mənɪ pla' wə du sôwâ Grek, ɓay ta' kwa ne kə sôwâ Grek su?
- ³⁶Mum ini: "Hi də man keɓ, ama hi cu də man za' mi, zə hi cu gak də ri mənɪ na wə də ke han nə mi. Dan rum wa' dan in ma su?"“
- ³⁷Fəta ndo' vun cer, mum nə bəka mə mbri. Kə bəka rum, Zezu car kor raw sôwâ. Mum tle wor ta fray ɓay ini: «Mê' mbi la' ci swə si, say bə rum mbə hay' rin, ɓay nə ce.
- ³⁸Swə mənɪ ve nan, zew mbi mənɪ wə ne nyî mə də hâ kuni də ne mbə vunduk rum, ce' ndə mənɪ dan rum wây' wə du 'Derwa.”
- ³⁹Zezu in dan rum wa Simbed Ifray mənɪ mum wə də sin wa sôwâ mənɪ ve num, kəri rum, Ifray cu sin Simbed um mətə', zə mum cu ne mbra' ne kə Zezu mətə'o.
- ⁴⁰Kəki mənɪ raw sôwâ mun dan Zezu, sôwâ juk du nday ini: «Kəzin', swə mənɪ nə Bə Ka' Dana!”
- ⁴¹Sôwâ məsin ini: «Mum nə Kris!» Ama sôwâ məsin kərem ini: «Gi ma Kris car mbə nya Galile su?
- ⁴²'Derwa Ifray wə in i Kris də ke vay rawti David, ɓay mum də vra' wə so Betlehem, so mənɪ David ke suk wə hana.”
- ⁴³Zə rum, raw sôwâ bul nji wa dan Zezu.
- ⁴⁴Sôwâ məsin wə du nday wa' kədan handay um kaw, ama swə məsin daw cu dak num mi.
- ⁴⁵Kəri mənɪ sum ji vun so po' fur faŋ ta hay' sum rôwâ mə du sum po' fur kə kul sôwâ Zuwif mə də kə Farisiyen, handay ci vun ndaya: «Zə mi hi cu mbə kə rum mi su?”
- ⁴⁶Sum ji vun so po' fur dam vun ndaya: «Swə mənɪ ge dan ce' ndə swə nə cu daw mi!”
- ⁴⁷Kul sôwâ Zuwif mə də kə Farisiyen ci vun ndaya: «Hi ta', hi ar num vi' ni si su?
- ⁴⁸Hi we swə daw wə du sum rôwâ mba ko swə daw wə du kul sôwâ Zuwif mə də kə Farisiyen mənɪ ve num kəta' su?
- ⁴⁹Ama raw sôwâ kuni cu we dan dlay Moyizə mi, ɓay vun nê' wə wa ndaya.”
- ⁵⁰Nikodem, daw wə du kul sôwâ Zuwif mə də kə Farisiyen, kəta' wə han, mum nə swə mənɪ ke ta hay' Zezu ɓa', mum la' ne ndaya:

⁵¹«Dan dlay mba cu ne vari ne mba kədan namba bok dan wa swə cop dan namba mun dan vun rum bay we kwa mənɪ mum gi nə mi.»

⁵²Handay dām vun rumu: «Ha ta', ha swə nya Galile su? A keɓ wə du Derwa Ifray bay ha də we i bə ka' dan cu car mbə nya Galile, ko dāw mi.»

⁵³Bay sasu daŋ' faŋ tle vari so umu.

Jean 8

¹Kəki rum, swə dāw dāw daŋ' 'ya ta so um, ama Zezu ur ta wa igway' mənɪ gu olive wə han juku.

²Siw rum kə bəka ced', mum faŋ ta ze rawti so po' fur sôwâ Zuwif, bay raw sôwâ daŋ' mbə hay' rumu. Mum suk bay təŋ kə ta' kwa nday ne.

³Kəri rum, sum pay zu dan dlay kə kul sôwâ Zuwif mə də kə Farisiyen mbə kuni hay' rum kə ma mətɪ handay kaw kə nja, handay cin sə kor sôwâ daŋ',

⁴bay handay la' ne kə Zezu: «Bə ta' kwa, namba kaw ma mətɪ rə wə ri gi nja.

⁵Wə du dan dlay Moyizə, mum ne vari ne mba kədan namba ci rawkwa mə ndani kuni kə ge kə gway'i. Bay mə ha, ha in ma wa rum su?»

⁶Handay in ndəna' zə handay wə wa' kədan handay um kaw kə dan ge vun, bay tum sem rum kə ndi. Ama Zezu goɓ bay təŋ kə wây' kwa wa nya kə vayba rumu.

⁷Handay wə də kofo kə ci vun Zezu. Zə rum, mum par wa fray bay la' ne ndaya: «Say swə mə du ri mənɪ cu gi kwa mə bro' dāw mi nə car ge sə kə gway' copo.»

⁸Mum faŋ goɓ kərem bay dle kə wây' kwa wa nya.

⁹Kəri mənɪ handay mun dan rum, handay wur dle dāw dāw, kəsa' wur copo. Zezu gwa' hoɓ kə ma mətɪ car wə kor rum ra.

¹⁰Zezu faŋ par wa fray bay la' ne kə ma ra: «Ma jwə, handay wə ka su? Swə dāw cu kaw naŋ kə dan mi su?»

¹¹Ta dām vun rumu: «Cu dāw mi, Bârî.» Zezu la' ne sa: «Na ta', na cu maŋ kaw kə dan mi. Əŋ də ye, ama daka mgbaŋ ni əŋ gi kwa mə bro' za' mi.»

¹²Zezu in dan ne kə raw sôwâ kəreme: «Na nə ri mə bu zə sôwâ nya. Swə mənɪ wə ta zə rin bə rum də ke kə ri mə bu mənɪ wə ne nyî mə də hâ, bay mum cu də ta wə ri mə ura' kpe mi.»

¹³Kul sôwâ Zuwif mə də kə Farisiyen la' ne numu: «Mgbaŋ ni nə, ha wə in njeŋ dan wa tu ru kə tu ru! Dan mənɪ ha wə in cu kə sin mi!»

¹⁴Zezu dām vun ndaya: «Ko na la' wə in njeŋ dan wa tu rin kə tu rin, dan mənɪ na wə in nə kəzin', zə na we ri mənɪ na car mbə han, kə ri mənɪ na wə də han nə si. Ama mə hi, hi cu we ri mənɪ na car mbə han, ko ri mənɪ na wə də han nə mi.

¹⁵Hi wə bok dan kə vari mənɪ sôwâ wə boko. Mə na, na cu bok dan wa swə dāw mi.

¹⁶Bay na la' bok dan kəzə si, dan bok man də ke njeŋ, zə na cu bok dan kə daw rin mi, ama Ba man mənɪ sin nan nə, mum kə rini.

¹⁷Dan mənɪ nə wây' wə du dan dlay mi: Kəri mənɪ sôwâ hoɓ in njeŋ dan mə daw, dan rum njeŋe.

¹⁸Na wə in njeŋ dan wa rin kə tu rin, bay Ba man mənɪ sin nan wə in njeŋ dan wa rin ta'a."

¹⁹Handay ci vun rumu: «Ba wû wə ka su?» Zezu dām vun ndaya: «Hi cu we nan ko Ba man mi. Hi la' we nan kəzə si, hi we Ba man ta'a."

²⁰Zezu in dan rum kəri mənɪ mum wə ta' kwa ne kə sôwâ wə rawti so po' fur sôwâ Zuwif hay' kwa mənɪ sôwâ wə njay selay hana. Swə daw cu kaw num mi, zə ri um cu mbə mto'o.

²¹Zezu la' ne nday kəreme: «Na wə də 'ya, bay hi də man keɓ, ama hi də mar wə du kwa mə bro' mi. Hi cu gak də ri mənɪ na wə də han nə mi."

²²Sôwâ Zuwif ci vun nji mbok nji: «Mum wə də ci tu rum su? Zə mum ini: "Hi cu gak də ri mənɪ na wə də han nə mi su?"

²³Zezu dām vun ndaya: «Mə hi, hi car mbə nya, ama mə na, na car mbə wafraya. Mə hi, hi mə nya, ama mə na, na cu mə nya mi.

²⁴Zə rum, na in ne ni i hi də mar wə du kwa mə bro' mi. Zə hi la' cu ve i na nə swə mənɪ Na Nə mi si, hi də mar wə du kwa mə bro' mi."

²⁵Handay ci vun rumu: «Ha sa su?» Zezu dām vun ndaya: «Ce' ndə mənɪ na in ne ni daka təŋ zu rumu.

²⁶Na kə dan juk kədan na in bay bok wa ri. Ama swə mənɪ sin nan, mum wə in dan mə kəzin', bay na wə ka' dan mənɪ na mun wə hay' rum nə taw ne kə sôwâ nya."

²⁷Handay cu mun i mum in dan wa Ba um nday ne nə mi.

²⁸Zə rum Zezu la' ne ndaya: «Kəri mənɪ hi tle Vay sumra' rew ta fray, hi də we i na nə swə mənɪ Na na. Bay hi də we i na cu gi kwa kə wa tu rin mi. Na wə ta' kwa mənɪ Ba man ne nan nə tawa.

²⁹Swə mənɪ sin nan nə, mum kə rini. Mum cu ar nan kə daw rin mi, zə bəka dan' na wə gi kwa mə kədam tu rumu."

³⁰Kəri mənɪ Zezu in dan ndəna', sôwâ juk ve numu.

³¹Kəri rum Zezu la' ne kə sôwâ Zuwif mənɪ ve numu: «Hi la' ta zə kwata' man njeŋ si, hi də ke sum ta zə rin kəzin',

³²hi də we dan mə kəzin' bay dan mə kəzin' nə də mi gi fe wa tu ri."

³³Handay dām vun rumu: «Namba daw rawti Abraham, bay namba cu ke bek swə daw kpe mi! Gi ma ha in ne mba: Hi də fe wa tu ri su?"

- ³⁴Zezu dām vun ndaya: «Na in mi ne kəzin', sa su daŋ' mənɪ wə gi kwa mə bro', bə rum nə bek kwa mə bro'.
- ³⁵Bek cu ke ce' ndə vay vra' cava də hâ mi, zə vay vra' wə ke cava də hâ.
- ³⁶Vay la' mi gi fe wa tu ri si, hi də fe wa tu mə kəzini.
- ³⁷Na we si, hi daw rawti Abraham, ama hi wə keɓ kədan hi man ci, zə hi cu ve kwata' man mi.
- ³⁸Na wə in dan wa kwa mənɪ Ba man ta' ne nan, ama mə hi, hi wə gi kwa mənɪ ba mi in ne ni.”
- ³⁹Handay dām vun rumu: «Ba mba nə Abraham.» Zezu la' ne ndaya: «Hi la' daw Abraham kəzin' si, hi wə gi sin mənɪ mum gi.
- ⁴⁰Ama mgbaŋ ni nə, ko na in dan mə kəzin' mənɪ Ifray ne nan ne ni, hi wə keɓ kədan hi man ci. Abraham cu gi ndəna' mi!
- ⁴¹Hi wə gi sin mə dāw kə sin mənɪ ba mi gi.» Handay dām vun rumu: «Namba cu daw woŋ mi! Ba mba dāw sar, mum nə Ifraya!”
- ⁴²Zezu la' ne ndaya: «Ifray la' Ba mi kəzin' si, hi man bə, zə na car mbə hay Ifray, ɓay mgbaŋ ni nə, na kəta' ti. Na cu mbə kə wa tu rin mi, ama Ifray kə mənɪ sin nana.
- ⁴³Zə mi hi cu mun dan mənɪ na wə mi in ne nə mi su? Zə wa ri cu gak ve dan man mi.
- ⁴⁴Ba mi nə Satan, ɓay hi kə mē' gi sin mənɪ ba mi wə wa'a. Daka təŋ zə kwa, mum bə ci mara. Mum cu car wa dan mə kəzin' kpe mi, zə dan mə kəzin' cu wə vunduk rum mi. Kəri mənɪ mum wə hay dan, mum in dan ce' ndə kpak tu rum, zə mum bə hay dan, ɓay hay dan daŋ' car zu mbə hay' rumu.
- ⁴⁵Ama mə na, na wə in dan mə kəzin' ɓay zə rum hi cu gak ve nan mi.
- ⁴⁶Sa du ri gak ta' kwa mə bro' mənɪ na gi nə su? Na la' wə in dan mə kəzin' si, zə mi hi cu ve nan mi su?
- ⁴⁷Swə mə Ifray wə mun dan Ifraya. Ama hi cu mə Ifray mi, ɓay zə rum, hi cu mun dan um mi.”
- ⁴⁸Sôwâ Zuwif ci vun Zezu: «Namba cu in njeŋ kəri mənɪ namba in i ha swə nya Samari ɓay ha kə gam wa ru nə mi su?”
- ⁴⁹Zezu dām vun ndaya: «Na cu kə gam wa rin mi. Na wə mbâ Ba man, ama hi wə man jedè.
- ⁵⁰Na cu keɓ mbra' zə tu rin mi: Swə məsin wə keɓ man ne, ɓay mum kə mənɪ wə də ɓok dan wa rumu.
- ⁵¹Na in mi ne, kəzini: Swə mənɪ wə ta zə dan man, bə rum cu də mar kpe mi.”

⁵²Sôwâ Zuwif la' ne numu: «Mgbaŋ ni ne, namba we si, kəzini: ha kə gam wa ru! Abraham mar si, sum ka' dan mar si, ɓay ha, ha ini: Swə mənɪ wə ta zə rin, bə rum cu mar kpe mi.

⁵³Ba mba Abraham nə mar si, ha ɗik i ha kə mbra' pā num si su? Sum ka' dan mar si ta'a. Ha wə kənji' tu ru kə sa su?»

⁵⁴Zezu ɗam vun ndaya: «Na la' wə mbra' tu rin kə tu rin si, mbra' man də ke uraya. Swə mənɪ wə də gi mbra' man ne nə Ba mana. Mum nə swə mənɪ hi in wa rum i mum nə Ifray mba.

⁵⁵Ama hi cu we num mi, ama mə na, na we num si. Na la' in i na cu we num mi si, na də ke bə hay dan ce' ndə hi. Ama na we num si, ɓay na ta zə dan umu.

⁵⁶Ba mi Abraham tuk kəɗam kə ɗik i mum də we bəka mana: Mum we bəka rum, ɓay mum tuk kəɗama.»

⁵⁷Sôwâ Zuwif ci vun rumu: «Ha cu gi kim guvatl mətə', ɓay ha in i ha we Abraham su?»

⁵⁸Zezu ɗam vun ndaya: «Na in mi ne kəzin', cop kəri mənɪ Abraham cu vra' mətə', na kəta'a.»

⁵⁹Kəri rum, handay ra' gway' kədan handay um ge kə ndi, ama Zezu tuɓ 'yeŋ ɓay pā mbə rawti so po' fur sôwâ Zuwif ta rəka.

Jean 9

¹Kəri mənɪ Zezu wə pā, mum we swə ɗaw mənɪ vra' kə dɛŋâra.

²Sum ta zə rum ci vun rumu: «Bə ta' kwa, zə mi swə mənɪ nə vra' kə dɛŋâr su? Zə kwa mə bro' mə kəca um su? Ko mə sôwâ um su?»

³Zezu ɗam vun ndaya: «Mum cu dɛŋâr zə kwa mə bro' mə kəca um ko mə sôwâ um mi. Ama mum dɛŋâr kədan sôwâ gak we sin mənɪ Ifray wə də gi wa rumu.

⁴Zə fəta kəta' ɓo, say mə gi sin swə mənɪ sin nana: Dukri mbə hərə', ɓay wə du rum, swə ɗaw cu gak gi sin mi.

⁵Kəri mənɪ na kəta' wa nya, na ri mə ɓu zə sôwâ nya.»

⁶Kəki mənɪ Zezu in dan rum, mum tup mē' ta nya ɓay ray nya kî kə ndi. Mum ma' i dɛŋâr kə ndi,

⁷ɓay la' ne numu: «A də kol i ru wə bara mə ɗe kə Silowe.» Semɗe rum wa' dan ini: «Bə sini». Dɛŋâr nə 'ya ta han, mum kol i rum, ɓay kəri mənɪ mum faŋ gewa, mum tɛŋ kə weri.

⁸Jik um kuni kə sôwâ mənɪ we num wə o kwa ɓa', ci kuni vun: «Swə mənɪ nə, swə mənɪ ke suk wə o kwa nə, cu mi su?»

⁹Sôwâ mäsini ini: «Mum na.» Sôwâ mäsini ini: «Â â, mum cu mi, ama mum ra' nji kə rumu.» Bay swə nə dāma: «Na na.»

¹⁰Handay ci vun rumu: «Gi ma i ru ar nə su?»

¹¹Mum dām vun ndaya: «Swə mə də kə Zezu ray nya kî, mum ma' i rin kə ndi bay la' ne nana: "A də bara mə də kə Silowe bay kol i ru wə hana." Na ta wə han bay kəki mēni na kol, na təŋ kə weri.»

¹²Handay ci vun rumu: «Swə nə wə ka su?» Mum dām vun ndaya: «Na cu we mi.»

¹³Kəri rum, sôwâ mbə kə swə mēni ke dəŋâr nə wə kor kul sôwâ Zuwif mə də kə Farisiyen.

¹⁴Fəta mēni Zezu ray nya bay ar i ne num kə ndi nə fəta pemây sôwâ Zuwif.

¹⁵Zə rum, kul sôwâ Zuwif mə də kə Farisiyen ci vun swə nə wa kwa mēni gi kədan mum wə weri mgbaŋ ni na. Mum la' ne ndaya: «Mum ma' nya ta ne nan i kî, na faŋ kol i rin, bay mgbaŋ ni nə na wə weri.»

¹⁶Sôwâ mäsini mə du kul sôwâ Zuwif mə də kə Farisiyen la' ne numu: «Swə mēni gi kwa mə ndani nə cu car mbə hay' Ifray mi, zə mum cu ta zə dan dlay fəta pemây sôwâ Zuwif mi.» Ama sôwâ mäsini du nday ini: «Swə nə la' bə gi kwa mə bro' si, gi ma mum gak gi yew mēni kuni su?» Bay handay bul nji wa dan rumu.

¹⁷Zə rum, kul sôwâ Zuwif mə də kə Farisiyen ci vun swə mēni ke dəŋâr nə kəreme: «Bay mə ha, ha in dan mi wa swə mēni ar i ne nu nə su?» Mum dām vun ndaya: «Mum bə ka' dan na.»

¹⁸Ama sôwâ Zuwif cu bə ve i mum ke dəŋâr bay mgbaŋ ni nə mum gak weri nə mi, hā handay də sôwâ umu.

¹⁹Kədan handay ci vun ndaya. Zə rum, handay ci vun ndaya: «Mēni nə vay mi mēni hi la' i mum vra' kə dəŋâr su? La' ndəna' si, gi ma mum wə weri mgbaŋ ni nə su?»

²⁰Sôwâ um dām vun ndaya: «Namba we si, mum nə vay mba bay mum vra' kə dəŋâra.

²¹Ama namba cu we kwa mēni gi kədan mum weri mgbaŋ ni nə mi. Bay namba cu we swə mēni ar i ne num nə mēta', i ci vun rum ye, mum jeŋ si, bay mum gak dām vun ri kə tu rumu!»

²²Sôwâ um in ndəna', zə handay wə ne wəlok sôwâ Zuwif. Zə sôwâ Zuwif kawvun kədan handay 'way sôwâ daŋ' mēni wə in i Zezu nə Kris wə rawti so Ifray sôwâ Zuwif də rəka.

²³Zə rum, sôwâ um ini: «Mum jeŋ si, i ci vun rum ye.»

²⁴Kul sôwâ Zuwif mə də kə Farisiyen də swə mēni ke dəŋâr nə sem hoḅ rum bay la' ne numu: «A in njeŋ kor Ifraya! Namba we si swə nə bə gi kwa mə bro'o.»

²⁵Mum dām vun ndaya: «Mum la' bə gi kwa mə bro' ko cu bə gi kwa mə bro' mi, na cu we mi. Ama na we kwa daw, i na ke dəŋâr, bay mgbaŋ ni nə, na wə weri.»

- ²⁶Handay ci vun rumu: «Mum gi ma wa ru su? Mum gi ma kədan mum ar i ru su?»
- ²⁷Mum dām vun ndaya: «Na in dan rum ne ni si ama hi cu mun mi! Zə mi hi wə wa' kədan hi mun dan rum kərem su? Hi ta' hi wa' faŋ sum ta zə rum su?»
- ²⁸Handay i num ɓay la' ne numu: «Mə ha, ha bə ta zə swə na! Ama mə namba, namba sum ta zə Moyizə.
- ²⁹Namba we si, Ifray ge dan kə Moyizə, ama mə mum, namba cu we ri car um mi!»
- ³⁰Swə nə dām vun ndaya: «Dan rum dan mə jin' wa na: Hi cu we ri car um mi, ama mum ar i ne nana!
- ³¹Namba we si, Ifray cu mun vun sum gi kwa mə bro' mi, ama mum wə mun vun swə mənɪ wə um ô ɓay wə gi kwa mənɪ mum wə wa'a.
- ³²Daka təŋ zə rum, swə dāw cu mun i swə ar i ne kə swə mənɪ vra' kə dəŋâr kpe mi.
- ³³Swə mənɪ nə la' cu car mbə hay' Ifray mi si, mum cu gak gi kwa məsin mi.”
- ³⁴Handay dām vun rumu: «Ha wə du kwa mə bro' daka vra' wû, ɓay ha wa' kədan ha ta' kwa mba ne su?» Bay handay 'way num pā ta rəka.
- ³⁵Zezu mun i handay 'way num si. Mum ndewa kə rum ɓay la' ne numu: «Ha ve Vay sumra' su?»
- ³⁶Swə nə dām vun rumu: «Bârî, a ta' num ne nan kədan na gak um ve.”
- ³⁷Zezu la' ne numu: «Ha we num si, ɓay mum kə mənɪ wə ge dan kə ru mgbaŋ ni na.”
- ³⁸Swə nə ini: «Bârî, na ve nu si.» Bay mum kuduk ta nya kor Zezu.
- ³⁹Zezu faŋ ini: «Na mbə wə du sôwâ nya kədan na ɓok dan, kədan dəŋâr weri, ɓay kədan sôwâ mənɪ weri faŋ dəŋâra.”
- ⁴⁰Sôwâ məsin mə du kul sôwâ Zuwif mə dē kə Farisiyen mənɪ wə hay' rum mun dan rum ɓay ci vun rumu: «Mə namba, namba dəŋâr ta' su?»
- ⁴¹Zezu dām vun ndaya: «Hi la' dəŋâr si, hi cu kə kwa mə bro' mi, ama zə hi wə ini: "Namba wə weri, hi kə kwa mə bro' bəka daŋ'ŋ.”»

Jean 10

- ¹«Na in mi ne, kəzini: Swə mənɪ cu pā wə vun vari kədan mum ze də rawti gid' cime mi, ama mum dam wa kəŋga' gid' rum kədan mum ze də han, bə rum nə hura ɓay bə bargu kwa.
- ²Ama swə mənɪ pā wə vun vari, bə rum nə bə ji cime.
- ³Bə ji vun gid' cime wə ar vun vari zə rum, ɓay cime mun wor rumu. Mum dē cime um kə semdē nday dāw dāw daŋ' ɓay wur mbə rawti gid' də rəka kə ndaya.
- ⁴Kəri mənɪ mum wur ta rəka kə nday daŋ', mum ta wə kor nday ɓay cime kuni ji zu rum, zə handay mun wor rum si.

- ⁵Ama handay cu ji zu rəkway mi. Zawa, handay də pik ne seŋ kə rum, zə handay cu mun wor rum mi.”
- ⁶Zezu in dan mə gəgan rum ne nday, ama handay cu mun zu dan rum mi.
- ⁷Zezu faŋ in kəreme: «Na in mi ne kəzin', na nə vun vari gid' cime.
- ⁸Sôwâ daŋ' mənî mbə cop kə rin, handay hura bay sum bargu kwa, ama cime cu mun wor nday mi.
- ⁹Na nə vun vari: Swə mənî pā wə vun vari rum, bə rum də fe sid, mum gak də ze bay pā, bay mum də za' kwati.
- ¹⁰Hura mbə kədan mum kəy hura, kə ci swə, bay dənok kwa sara. Ama mə na, na mbə kədan sôwâ fe nyî, bay fe nyî rum bayrumu.”
- ¹¹«Na nə bə ji cime mə bay: Bə ji cime mə bay wə mar zə cime umu.
- ¹²Swə məsin wə ji cime zə wa' po' tawa. Bə rum cu bə ji cime mə kəzin' mi, bay cime rum mə mum cu mi. kəri mənî swə nə we dəghaw' wə mbə, mum dā ne ar cime, bay dəghaw' kaw cime bay pla' wa ndaya.
- ¹³Mum dā ne zə mum wə gi sin zə wa' po' taw, bay mum cu dīk dan wa cime rum mi.
- ¹⁴Na nə bə ji cime mə bay, na we cime man, bay cime man we nan,
- ¹⁵ce' ndə mənî Ba man we nan, bay na we Ba man, na wə mar zə cime mana.
- ¹⁶Na kə cime məsin mənî cu wə gid' mənî nə mi, say na də nday keḃ mbə kə nday ta'a. Handay də mun wor rin, bay handay də faŋ kul mə dāw kə bə ji cime mə dāwa.
- ¹⁷Ba man bə nan zə na də ne nyî rin kədan na faŋ fe kəreme.
- ¹⁸Swə dāw cu gak tle nyî rin mi, ama na də ne nyî rin kə bə tu rini. Na kə vari ne rum, bay na kə vari fe rum kəreme. Ba man ne vari ne nan kədan na gi ndəna'a.”
- ¹⁹Sôwâ Zuwif faŋ bul nji kərem wa dan rumu.
- ²⁰Sôwâ juk du nday ini: «Mum kə gam wa rumu! Mum laya! Zə mi hi wə mun dan um su?”
- ²¹Sôwâ məsin du nday ini: «Swə mənî kə gam wa rum cu gak ge dan ndəna' mi. Gam gak ar i ne kə dənjar su?”
- ²²Sôwâ Zuwif wə gi cer ar vun so Ifray wə so Jeruzalem kə wakaya.
- ²³Zezu wə gaŋ zə daŋki Salomon mənî wə vun so po' fur sôwâ Zuwif.
- ²⁴Kəri rum, sôwâ Zuwif bəwa mbə gay' gan wa rum bay ci vun rumu: «Ha də mba ar wə du cik mənî nə ndəna' hā su? Ha la' Kris si, a in ne mba təlak ye!”
- ²⁵Zezu dām vun ndaya: «Na in ne ni si, ama hi cu ve dan man mi. Sin mənî na wə gi kə semde Ba man, sin rum wə in njeŋ dan wa rini,
- ²⁶ama hi cu ve dan man mi, zə hi cu wə du kul cime man mi.

²⁷Cime man wə mun wor rin, na we nday, bay handay wə ji zu rini.

²⁸Na wə nday ne nyî mə də hâ. Handay cu mar kpe mi, bay swə daw cu gak nday bar ba rin mi.

²⁹Ba man mənî ne nday ne nan, mum kə mbra' pâ kwa daŋ', bay swə daw cu gak nday bar ba Ba man mi.

³⁰Ba man kə na, namba dāwa.”

³¹Sôwâ Zuwif faŋ ra' gway' kərem kədan handay um ge kə ndi.

³²Zə rum, Zezu la' ne ndaya: «Na gi sin mə bay juk wə kor ri kə gbəgbon Ba mana. Zə sin mə ka wə du nday hi wa' kədan hi man ge kə gway' su?”

³³Sôwâ Zuwif dam vun rumu: «Namba cu wa' kədan namba wû ge kə gway' wə zə sin mə bay mi, ama zə ha wə ge dan mə bro' wa Ifray, zə ha sumra', ama ha wə gi tu ru ce' ndə Ifraya.”

³⁴Zezu dam vun ndaya: «Swə məsin wây' wə du derwa dan dlay mi i Ifray ini: Hi ifraya.

³⁵Namba we si, swə daw cu gak par dan mənî wây' wə du Derwa Ifray nə də rəka mi. Ifray dē sôwâ mənî mum ne dan um ne nday kə ifraya.

³⁶Bay mə na, Ba man par nan bay sin nan mbə wə du sôwâ nya, gi ma hi gak in i na wə ge dan mə bro' wa Ifray kəri mənî na wə in i na Vay Ifray nə su?

³⁷Na la' cu gi sin Ba man mi si, i ve nan mi.

³⁸Ama na la' wə gi sin rum si, ko hi la' cu ve nan mi laŋ, i ve sin man kədan hi we njen i Ba man kəta' wə du rin, bay na kəta' wə du Ba mana.”

³⁹Handay keḅ kədan handay um kaw kərem, ama mum sid' mbə ba ndaya.

⁴⁰Zezu faŋ 'ya ta dapa ga' sin ze Zurdeŋ kərem, wə ri mənî Zaŋ ke gi baptem ne kə sôwâ han ba', bay mum suk wə hana.

⁴¹Sôwâ juk mbə hay' rumu. Handay ini: «Zaŋ cu gi yew mi, ama dan daŋ' mənî mum in wa swə mənî nə kəzini.”

⁴²Bay sôwâ juk ve Zezu wə hana.

Jean 11

¹Swə mə dē kə Lazar suk wə so Betani, mum kə gaḅa. Mari kə njar sə Marta gay' wə so rum ta'a.

²Mari, ma məti ke wu' urdi ta sem Bârî bay faŋ kutu sem rum kə sâ wa sa. Njər sə Lazar kə mənî kə gaḅ na.

³Njar rum mə hoḅ kuni sin swə məsin ta hay' Zezu kədan nə in ne numu: «Bârî, bây wû kə gaḅa.”

- ⁴Kəri mənı Zezu mun dan rum, mum ini: «Gaḅ Lazar cu də um ci mi: Ama gaḅ rum wə də ta' mbra' Ifray ḅay wə də ne mbra' ne kə Vay Ifray ta'a.»
- ⁵Zezu bə Marta kə njar sə, ḅay Lazar ta'a.
- ⁶Kəri mənı mum mun i Lazar kə gaḅ, mum faṅ gi bəka hoḅ wə ri mənı mum wə hana.
- ⁷Mum faṅ la' ne kə sum ta zə rumu: «Mə faṅ də nya Zude.»
- ⁸Sum ta zə rum ḁam vun rumu: «Bə ta' kwa, cu bar bəka juk mi, sôwâ Zuwif wə keḅ kədan handay wû ge kə gway', ḅay ha wa' kədan ha faṅ də han kərem su?»
- ⁹Zezu ḁam vun ndaya: «Wə du bəka ḁaw, ler fəta guḅ wa hoḅ wə ke han, cu ndəna' mi su? Swə la' wə ta kə fəta si, mum cu dle wa sem mi zə mum wə weri mə ḅu mə wa nya.
- ¹⁰Ama swə la' wə ta kə dukri si, mum dle wa sem zə mum cu kə ri mə ḅu mi.»
- ¹¹Zezu in dan rum ne nday, ḅay mum faṅ ini: «Bây mba Lazar wə nde sen, ama na wə də um dla'a.»
- ¹²Sum ta zə rum ḁam vun rumu: «Bârî, mum la' wə nde sen si, mum də cara.»
- ¹³Zezu wa' dan in i Lazar mar si, ama sum ta zə rum ḁik i mum in dan wa sen mə kəzini.
- ¹⁴Zə rum, Zezu la' ne nday təlaka: «Lazar mar si.
- ¹⁵Ama ḅay zə ri zə na cu wə han kəri rum mi. Ndəna' hi də man ve. Mə də hay' rum ye!»
- ¹⁶Kəri rum, Tomas mənı sôwâ um ḁe kə nyerwa la' ne kə sum ta zə Zezu məsini: «Namba ta', mə də kə rum kədan namba mar kə rumu.»
- ¹⁷Kəri mənı Zezu mbə day so Betani, mum za' Lazar gi bəka fəḁi' wə rawti zra si.
- ¹⁸So Betani kə so Jeruzalem seṅ ce' ndə kilometrə hinji',
- ¹⁹ḅay sôwâ Zuwif juk mbə so Marta kə Mari kədan handay nday ḅu ḁumwa mar njər ndaya.
- ²⁰Kəri mənı Marta mun i Zezu mbə day, ta 'ya ta ndewa kə rum, ama Mari suk wə so.
- ²¹Marta la' ne kə Zezu: «Bârî, ha la' kəzə wə ti si, njər rin cu mar mi.
- ²²Ama na we si, ko mgbaṅ ni nə, Ifray də wû ne kwa ḁaṅ' mənı ha wə də o ḁa rumu.»
- ²³Zezu la' ne sa: «Njər riṅ wə də car mbə mara.»
- ²⁴Marta ḁam vun rumu: «Na we si mum də pâ mbə mar kə bəka ndo' nya.»
- ²⁵Zezu la' ne sa: «Na nə bə car sôwâ mbə mar, ḅay na nə bə ne nyî ta'a: Swə mənı ve nan, bə rum də ke kə nyî, ko mum la' mara.

- ²⁶Bay swə mənɪ kə i, ɓay bə rum ve nan, mum cu də mar kpe mi. Həŋ ve dan rum si su?”
- ²⁷Ta ɗam vun rumu: «Awo, Bârî, na ve si, ha nə Kris, Vay Ifray mənɪ mbə wə du sôwâ nya.”
- ²⁸Kəki mənɪ Marta in dan ndəna', ta faŋ 'ya ta hay' njar sə Mari ɓay la' ne sə 'yeŋe: «Bə ta' kwa kəta' kəna, ɓay mum wə maŋ ɗe.”
- ²⁹Kəri mənɪ Mari mun dan rum, ta car ɓay ɗəma ta hay' Zezu.
- ³⁰Zezu cu ze mbok so mətə', ama mum wə ri mənɪ Marta ta ndewa kə rum han nə ɓo.
- ³¹Kəri mənɪ sôwâ Zuwif mənɪ gay' wə so kədan handay ɓu Mari ɗumwa mar njər sə kuni we sə car ɓay pâ kə ɗəma, handay wur ra' zə sa. Handay ɗik i ta wə də vun zra kədan ta də ci' wə hana.
- ³²Kəri mənɪ Mari ta ɗay ri mənɪ Zezu wə han ɓay we num, ta kuduk ta nya kor rum ɓay la' ne numu: «Bârî, ha la' kəzə wə ti si, njər rin cu mar mi.”
- ³³Zezu we ta wə ci', ɓay sôwâ Zuwif mənɪ mbə kə sə wə ci' ta', vunduk par num ɓay mum ɗik dan juku.
- ³⁴Mum ci vun ndaya: «Hi mo' num wə ka su?» Handay ɗam vun rumu: «Bârî, a mbə kar ye.”
- ³⁵Zezu ci'i.
- ³⁶Zə rum, sôwâ Zuwif ini: «I kar ri'i: Mum bə num dle tu si!”
- ³⁷Ama sôwâ məsin du nday ini: «Mum ar i ne kə ɗəŋâr, mum cu gak tak mar Lazar ta' mi su?”
- ³⁸Vunduk Zezu wə ɗik dan də kofo. Mum 'ya ta vun zra, zra rum nə nyir gway', ɓay vun rum ta' kə gway'i.
- ³⁹Zezu la' ne ndaya: «I pla' gway' rum də rəka.» Marta, njar bə mar, la' ne numu: «Bârî, mum wə səsî sar ye, zə mum gi bəka fəɗi' wə rawti zra si.”
- ⁴⁰Zezu ɗam vun sa: «Na in naŋ si, həŋ la' ve nan si, həŋ də we mbra' Ifray, cu ndəna' mə su?”
- ⁴¹Sôwâ faŋ pla' gway' rum ta rəka. Zezu tle i ta fray ɓay ini: «Bəba, na gi soko ne nu zə ha wə man munu.
- ⁴²Na we si, ha wə man mun bəka ɗaŋ', ama na in ndəna' zə sôwâ mənɪ gay' gan wa rin kədan handay ve i ha sin nana.”
- ⁴³Kəki mənɪ mum in dan rum, mum ka' dan kə gbəgboŋo: «Lazar, a pâ mbə ti rəka!”
- ⁴⁴Mar nə pâ, sem rum kə ɓa rum ɗəlak kə zim, ɓay vuk rum ku' kə zim ta'a. Zezu la' ne ndaya: «I ulay' num ɓay ar num də ye!”

⁴⁵Sôwâ juk wə du sôwâ Zuwif mənɪ wə so Mari we kwa mənɪ Zezu gi, ɓay handay ve numu.

⁴⁶Ama sôwâ məsin du nday ta hay' kul sôwâ Zuwif mə də kə Farisiyen ɓay in dan kwa mənɪ Zezu gi nə ne ndaya.

⁴⁷Kul sôwâ Zuwif mə də kə Farisiyen kə sum rôwâ mə du sum po' fur ɓa kuni wa sum rôwâ Fada mə Mbri ɓay ci vun ndaya: «Namba də gi ma su? Zə swə nə wə gi yew juku.

⁴⁸Namba la' ar num wə gi ndəna' si, sôwâ daŋ' də um ve, ɓay sum rôwâ nya Romə də mbə, ɓay handay də bru so po' fur mba ɓay sôwâ nya mba ta'a!»

⁴⁹Swə daw du nday mə də kə Kayif, mum nə toŋ po' fur kə kim rum, la' ne ndaya: «Hi cu mun zu kwa məsin mi!

⁵⁰Hi cu we i ɓay zə ri kədan swə daw mar zə sôwâ, pā mənɪ sôwâ daŋ' mar nə mi su?»

⁵¹Mum cu in dan rum kə bə tu rum mi, ama zə mum toŋ po' fur kə kim rum, mum ka' dan i Zezu wə də mar zə sôwâ Zuwif,

⁵²cu zə sôwâ nya rum taw mi, ama kədan mum də ɓawa daw Ifray daŋ' mənɪ pla' wa faŋ tu mə daw.

⁵³Daka fəta rum, sum rôwâ mə du sôwâ Zuwif kawvun kədan handay ci Zezu.

⁵⁴Zə rum, Zezu cu gaŋ wə du sôwâ Zuwif takram za' mi: Mum 'ya ta nya mənɪ həre' kə igop, wə so mə də kə Efrayim, mum bar han kə sum ta zə rumu.

⁵⁵Cer Zuwif mə də kə Pakə nə həre', ɓay sôwâ nya rum juk ta so Jeruzalem kədan handay wok tu nday zə cer rumu.

⁵⁶Handay wə keɓ Zezu, ɓay kəri mənɪ handay ɓawa wə so po' fur sôwâ Zuwif, handay ci vun nji mbok nji: «Hi dik ma su? Mum cu də mbə ri cer kpe mi!»

⁵⁷Sum rôwâ mə du sum po' fur kə kul sôwâ Zuwif mə də kə Farisiyen ne kuni vari ne kə sôwâ kədan swə la' we ri mənɪ Zezu wə han nə si, say bə rum ta' ri rum ne nday kədan handay um kawa.

Jean 12

¹Bəka gwa' kanki' kədan cer sôwâ Zuwif mə də kə Pakə nə gi, Zezu ta so Betani, so mənɪ Lazar mənɪ Zezu par mbə mar nə suk wə hana.

²Sôwâ gi kwati ne num wə han, ɓay Marta kə mənɪ ɓul kwati rumu. Lazar kəta' wə du sôwâ mənɪ gay' wə vun tablə kə Zezu.

³Kəri rum, Mari tle urdi mənɪ coɓ rum kəcik kə reta litrə. Urdi rum gi kə wədi kwa mə də kə «nar», ta wu' urdi rum ta sem Zezu ɓay ta faŋ kutu sem rum kə sâ wa sə, ndəna', sî urdi nə nduɓ wə rawti so rum daŋ'ŋ.

⁴Swə dāw mə du sum ta zə Zezu, Yudas Iskariyot, swə mənɪ wə də um ar də ɓa sôwâ nə ini:

⁵«Zə mi handay cu gi coɓ urdi rum fe sɔlay kis hinji' kə ndi kədan handay ne sɔlay rum ne kə sum ca mi su?»

⁶Mum in ndəna' cu zə mum wə dɪk dan wa sum ca mi, ama zə mum nə hura, mum nə bə ji mbu sɔlay, ɓay mum wə kəy hura sɔlay mənɪ handay ar ne num ɓa.

⁷Ama Zezu la' ne numu: «A ar sɔ 'yeŋe! Ta gi ndə na' zə ta wə dɪk dan wa bəka mənɪ sôwâ wə də man mo' kə ndi.

⁸Hi də ke kə sum ca hay' ri bəka daŋ', ama mə na, hi cu də ke kə rin hay' ri bəka daŋ' mi.»

⁹Raw sôwâ Zuwif mun i Zezu wə so Betani, handay ta wə han, cu zə Zezu taw mi, ama kədan handay kar Lazar mənɪ Zezu car mbə mar nə ta'a.

¹⁰Kəri rum, sum rôwâ mə du sum po' fur kawvun kədan handay ci Lazar ta',

¹¹zə sôwâ Zuwif juk wə nday ar ɓay ve Zezu zə dan Lazar.

¹²Siw rum, raw sôwâ mənɪ mbə kədan handay gi cer sôwâ Zuwif mə də kə Pakə mun i Zezu wə mbə so Jeruzalem.

¹³Zə rum handay tum tlap mənɪ' ɓay wur ta ndewa kə rumu. Handay do dana: «Mbra' hay' Ifraya! Ifray nə kuswa' swə mənɪ mbə kə semde Bârî! Ifray nə kuswa' jwə sôwâ Israyel!»

¹⁴Zezu za' kor dāw, ɓay mum ur suk ta wa rum ce' ndə mənɪ Dan rum wây' wə du dərwa:

¹⁵«So Siyɔŋ, əŋ ne wəlok mi! Əŋ kar ri'i: Jwə maŋ wə mba. Mum suk wa vay koro.»

¹⁶Cop rum, sum ta zə Zezu cu mun zu dan rum mi, ama kəri mənɪ Zezu ze wə ri mbra' Ifray, handay dla' wa dan mənɪ Dərwa Ifray in dan rum wa rum kə kwa mənɪ handay gi zə rumu.

¹⁷Sôwâ daŋ' mənɪ ke kə Zezu kəri mənɪ mum də Lazar wə rawti zra ɓay car num mbə mar, handay in dan kwa mənɪ handay we nə ne kə sôwâ.

¹⁸Raw sôwâ mun i mum gi yew rum, zə rum, handay mbə ndewa kə rumu.

¹⁹Kul sôwâ Zuwif mə də kə Farisiyen in kuni mbok nji: «I kar ri', kwa daŋ' mənɪ namba gi cu gak gi kwa məsin mi: Sôwâ daŋ' wə ta zə rumu!»

²⁰Sôwâ Grek məsin kəta' wə du sôwâ mənɪ mbə so Jeruzalem kədan handay bur Ifray wə du cer rumu.

²¹Handay ta hay' Filip (mum suk wə so Betsayda nya Galile) ɓay la' ne numu: «Bârî, namba wə wa' kədan namba kar Zezu.»

²²Filip ta in dan rum ne kə Andre, ɓay handay hoɓ jak faŋ ta in dan rum ne kə Zezu.

- ²³ Zezu dām vun ndaya: «Ri mēni Vay sumra' wə də fe mbra' um nə mbə mgbəŋ ni nə si.
- ²⁴ Na in mi ne, kəzini: I u dāw la' cu nde ta nya ɓay cim mi si, mum suk kə dāw um sara. Ama mum la' cim mi si, mum də dlər i u rawa.
- ²⁵ Swə mēni wə bə tu rum, bə rum də mara. Ama swə mēni wə sî tu rum wa nya mēni nə, bə rum də ke kə nyî mə də hâ.
- ²⁶ Swə la' wə wa' kədan mum gi sin zə rin si, say bə rum ta zə rini. Ndəna', bə sin man də ke wə ri mēni na wə də ke han nə ta'a. Ba man wə sâ' swə mēni wə gi sin zə rumu.”
- ²⁷ «Mgbəŋ ni nə, vunduk rin par nana. ʼBay na də in ma su? Na də ini: Bəba, a sid' nan wə du boni mēni wə də mbə wa rin kə ri rum su? Ama, na mbə kədan na ce boni wə du ri rumu.
- ²⁸ Bəba, a mbra' semdē ru.» Kəri rum, wor car mbə wafray ini: «Na mbra' semdē rin si, ɓay na də um mbra' kəreme.”
- ²⁹ Raw sôwâ mēni gay' wə han ɓay mun wor nə, handay ini: «Dləmbur buŋô na!» Sôwâ məsin du nday ini: «Vay sin Ifray mə wafray in dan ne numu!”
- ³⁰ Ama Zezu la' ne ndaya: «Wor nə cu in dan mbə wə zə rin mi, ama wə zə ri.
- ³¹ Mgbəŋ ni nə, ri mēni Ifray wə də bok dan wa sôwâ nya mēni nə mbə day si. Mgbəŋ ni nə, Ifray wə də 'way jwə nya mēni nə də rəka.
- ³² Bay mə na, kəri mēni sôwâ də man rew də fray, na də gi sôwâ daŋ' mbə hay' rini.”
- ³³ (Kə in dan rum, mum ta' vari mar mēni mum wə də mara.)
- ³⁴ Raw sôwâ dām vun rumu: «Namba mun wə du dərwa dan dlay mba i Kris də ke kə i də hâ. La' ndəna' si, gi ma ha gak in i sôwâ də rew Vay sumra' də fray su? Sa nə Vay sumra' nə su?”
- ³⁵ Zezu dām vun ndaya: «Ri mə bu gwa' wə du ri kə ri kî ɓo. I ta də kofo kə ri mēni hi kəta' kə ri mə bu nə, kədan ri mə ura' nə mbə wa ri mi. Zə swə mēni wə ta wə ri mə ura', bə rum cu we ri mēni mum wə ta də han nə mi.
- ³⁶ Zə rum, i ve ri mə bu nə kəri mēni hi kəta' kə rum, kədan hi faŋ sôwâ mə ri mə bu.» Kəki mēni Zezu in dan rum, mum 'ya ta pe' seŋ kə ndaya.
- ³⁷ Ko kəri mēni mum gi yew juk wə kor nday, handay cu ve num mi,
- ³⁸ kədan nyen mbi dan mēni bə ka' dan mə dē kə Esaya ini: «Bârî, sa nə ve dan in mba su? Bârî ta' gbəgboŋ ne kə sa su?”
- ³⁹ Handay cu gak ve num mi zə Esaya in wə ri məsin kəreme:
- ⁴⁰ «Ifraŋ dəŋâr i nday, ɓay mum co' wa nday, kədan i nday weri mi, ɓay vunduk nday mun zu dan mi. ʼBay kədan handay faŋ mbə hay' rin kədan na nday car mi.”
- ⁴¹ Esaya in ndəna', zə mum we mbra' Zezu, ɓay mum in dan wa rumu.

⁴²Kə ndi nə daŋ', sôwâ juk wə du sum rôwâ mə du sôwâ Zuwif ve Zezu. Ama handay cu in dan rum tɔlak mi, zə handay cu wa' i kul sôwâ Zuwif mə dɛ kə Farisiyen nday 'way wə rawti so Ifray sôwâ Zuwif də rəka mi.

⁴³Handay wə wa' mbra' mə sôwâ pâ mbra' mə Ifraya.

⁴⁴Zezu ka' dana: «Swə mənɪ ve nan, bə rum cu ve nan taw mi, ama mum ve swə mənɪ sin nan nə ta'a.

⁴⁵Swə mənɪ we nan, bə rum we swə mənɪ sin nan nə ta'a.

⁴⁶Mə na, na mbə wə du sôwâ nya ce' ndə ri mə bu, kədan sa su daŋ' mənɪ ve nan, bə rum cu suk wə du ri mə ura' mi.

⁴⁷Swə la' mun dan man bay cu ta zə dan rum mi si, na cu kə mənɪ bok dan wa rum mi, zə na cu mbə kədan na bok dan wa sôwâ nya mi, ama kədan na nday sidi.

⁴⁸Swə mənɪ vad' nan bay cu ve dan man mi, bə rum kə bə bok dan wa rumu. Dan man mənɪ na in nə kə mənɪ wə də bok dan wa rum kə bəka ndo' nya.

⁴⁹Zə na cu in dan kə wa tu rin mi, ama Ba man mənɪ sin nan, mum kə tu rum ne vari dan mənɪ na gak in bay ta' nə ne nana.

⁵⁰Bay na we si, dan dlay mənɪ mum ne vari rum nə wə ne nyî mə də hâ. Zə rum, dan mənɪ na in, na in ce' ndə mənɪ Ba man ne vari rum ne nana.»

Jean 13

¹Bəka gwa' daw kədan cer sôwâ Zuwif mə dɛ kə Pakə nə gi, Zezu we si, ri mənɪ mum də ar nya mənɪ nə kədan mum də hay' Ba um nə mbə si, mum bə sôwâ um mənɪ wə wa nya bəka daŋ', bay mum bə nday hâ ndo' rumu.

²Zezu kə sum ta zə rum wə ti kwati, satan no' dan dɪk ta vunduk Yudas Iskariyot, vay Simoŋ kədan mum ar Zezu də ba sôwâ.

³Zezu we si Ba um ne gbəgbəŋ wa kwa daŋ' ne num, mum car mbə hay' Ifray bay mum wə faŋ də hay' Ifray ta'a.

⁴Zə rum, mum car mbə vun tablə, mum ulay' mbraw um njay, bay mum tle zim jew ta fir rumu.

⁵Kəki rum mum faŋ wu' mbi ta timbi bay təŋ kə kol sem ne kə sum ta zə rum kə ndi bay kutu sem nday kə zim mənɪ mum jew wə fir rumu.

⁶Mum mbə day hay' Simoŋ Piyer, bay Simoŋ ci vun rumu: «Bârî, ha də kol sem man ne kə tu ru su!»

⁷Zezu dām vun rumu: «Ha cu we kwa mənɪ na wə gi mgbəŋ ni nə mi, ama ha də mum zu rum kofo bo.»

⁸Piyer la' ne numu: «Â â, ha cu də kol sem man ne kpe mi!» Zezu dām vun rumu: «Na la' cu kol sem ne nu mi si, ha cu də fe bayda hay' rin mi.»

- ⁹Simon Piyer la' ne numu: «La' ndəna' si, Bârî, a kol sem ne nan taw mi, ama a kol ɓa kə wa ne nan ta'a.»
- ¹⁰Zezu ɗam vun rumu: «Swə mənɪ mbi tu si, bə rum cu kə mē' kol ri məsin mi, say sem, zə tu rum ɗaŋ' par si: Hi ɗaŋ' par si, ama hi cu ɗaŋ' mi.»
- ¹¹Zezu we swə mənɪ wə də um ar də ɓa sôwâ nə si. Zə rum, mum ini: «Hi cu par ɗaŋ' mi.»
- ¹²Kəki mənɪ Zezu kol sem ne nday, mum faŋ ge mbraw ta tu rumu. Mum faŋ suk ta vun tablə ɓay ci vun ndaya: «Hi mun zu dan kwa mənɪ na gi hay' ri nə si su?»
- ¹³Hi wə man ɗe kə Bə ta' kwa ɓay Bârî, ɓay hi in njeŋ, zə na na.
- ¹⁴Na, Bârî mi ɓay Bə ta' kwa mi, na la' kol sem ne ni si, hi ta', say i kol sem ne kə nji mbok nji.
- ¹⁵Na ta' vari rum ne ni kədan hi gi ce' ndə mənɪ na gi wə hay' ri.
- ¹⁶Na in mi ne kəzin', bə sin cu kə mbra' pā toŋ sin um mi, ɓay vay sin cu kə mbra' pā swə mənɪ sin num mətə'a.
- ¹⁷Mgbaŋ ni nə, hi we kwa rum si, hi la' gi kwa rum si, hi də tuk kəɗama.
- ¹⁸Na cu in dan rum wa ri ɗaŋ' mi. Na we sôwâ mənɪ na da' nday si. Ama say dan mənɪ Derwa Ifray in nə gi: Swə mənɪ wə ti kwati man, bə rum faŋ car wa kə rini.
- ¹⁹Mgbaŋ ni nə, na in dan rum ne ni cop kwa rum cu gi mətə', kədan kəri mənɪ kwa rum də mbə, hi də ve i na nə swə mənɪ Na na.
- ²⁰Na in mi ne kəzin', swə mənɪ ve swə mənɪ na sin, bə rum ve nan ta', ɓay swə mənɪ ve nan, bə rum ve swə mənɪ sin nan nə ta'a.»
- ²¹Kəki mənɪ Zezu in dan rum, vunduk par num, ɓay mum ini: «Na in mi ne kəzin', swə ɗaw du ri wə də man ar də ɓa sôwâ.»
- ²²Sum ta zə rum kar i nji mbok nji, handay cu we i mum in dan wa sa su mi.
- ²³Swə ɗaw mə du sum ta zə rum, mum nə swə mənɪ Zezu bə, mum suk wə vun tablə hay' Zezu.
- ²⁴Simon Piyer tum num kə i ɓay la' ne numu: «A ci vun rum, mum wə in dan wa sa su?»
- ²⁵Zə rum, bə ta zə Zezu nə gun vun ta hay' Zezu ɓay ci vun rumu: «Bârî, sa nə su?»
- ²⁶Zezu ɗam vun rumu: «Na wə pok kwati jo' mbar kə ndi ɓay swə mənɪ na də um ne, ka mum na.» Zə rum, Zezu pok kwati, mum jo' mbar kə ndi, ɓay ne kə Yudas, vay Simon Iskariyot.
- ²⁷Kəri mənɪ Yudas ve kwati nə, Satan ze vunduk rum, Zezu la' ne numu: «Kwa mənɪ ha wə də gi, a gi kwa rum ga'ri ye.»

- ²⁸Swə dāw mə du sôwâ mēni gay' wə vun tablə cu mun zə mi mum in dan rum ne num su mi.
- ²⁹Yudas nə bə ji mbu selay, zə rum, sôwâ mēsin du nday dīk i Zezu in ne num i nə də cōb kwa gi cer zə nday ko mum in ne num i nə ne kwane kə sum ca.
- ³⁰Kəri rum, Yudas ve kwati nə bay pâ ga'ri, ka dukri gi si.
- ³¹Kəki mēni Yudas pâ si, Zezu ini: «Mgbaŋ ni nə, Vay sumra' fe mbra' um si, bay Ifray də fe mbra' zə tu rum ta'a.
- ³²Bay Ifray la' də fe mbra' zə rum si, Ifray kə tu rum də ne mbra' ne kə Vay um, bay mum wə də gi kwa rum mgbəŋ ni na.
- ³³Daw man, na kəta' wə du ri kə ri kî ɓo. Hi də man keɓ, ama na wə mi in ne mgbəŋ ni nə dan mēni na in ne kə sôwâ Zuwif: "Hi cu gak də ri mēni na wə də han nə mi."
- ³⁴Na wə mi ne dan dlay mə mbrewē: I bə nji mbok nji. Say i bə nji mbok nji ce' ndə mēni na bə ni.
- ³⁵Hi la' wə bə nji mbok nji si, sôwâ daŋ' də we i hi sum ta zə rini."
- ³⁶Simon Piyer ci vun rumu: «Bârî, ha də ka su?» Zezu dām vun rumu: «Ha cu gak ta zə rin wə ri mēni na wə də han mgbəŋ ni nə mi, ama də kofo ha də ta zə rin ɓo."
- ³⁷Piyer ci vun rumu: «Bârî, zə mi na cu gak ta zə ru mgbəŋ ni nə mi su? Na gila' tu rin kədan na mar zə ru!"
- ³⁸Zezu ci vun rumu: «Kəzin', ha gila' tu ru kədan ha mar zə rin su? Na in wû ne kəzin', cop kəri mēni gulok cu də ge el mēto', ha də in sem hinji' i ha cu we nan mi.»

Jean 14

- ¹Zezu la' ne ndaya: «I dīk dan mi: I ve Ifray, bay i ve nan ta'a.
- ²Ri suk kəta' juk wə so Ba man, bay na də gila' ri suk zə ri: Dan rum la' cu kəzin' mi si, na cu gak mi in ne mi.
- ³Bay kəki mēni na la' ta gila' ri suk zə ri si, na də faŋ gewa mbə bay mi ra' də hay' rin kədan hi də ke wə ri mēni na wə hana.
- ⁴Hi we vari mēni wə də ri mēni na wə də han nə si."
- ⁵Tomas la' ne numu: «Bârî, namba cu we ri mēni ha wə də han nə mi, gi ma kədan namba gak də we vari rum su?"
- ⁶Zezu dām vun rumu: «Na nə vari, na nə kəzin', bay na nə nyî. Swə dāw cu gak də hay' Ba man mi, say kə rini.
- ⁷Hi la' we nan si, hi də we Ba man ta'a. Bay daka mgbəŋ ni nə, hi wə we dan um, bay hi we num kə i."
- ⁸Filip la' ne numu: «Bârî, a ta' Ba wû ne mba, bay kwa rum də mba ndaka."

- ⁹Zezu ci vun rumu: «Na kə ri ɓa' si, ɓay ha cu we nan mi su, Filip? Swə məni we nan, bə rum we Ba man si ta'a. Zə mi ha wə ini: "A ta' Ba wû ne mba su?"»
- ¹⁰Ha cu ve i na wə du Ba man, ɓay Ba man wə du rin nə mi su? Dan məni na in ne ni daŋ' cu car wə hay' rin mi! Ba man məni wə du rin wə gi sin umu.
- ¹¹Kəri məni na ini: Na wə du Ba man, ɓay Ba man wə du rin, i ve nana. La' cu mi si, i ve nan zə sin məni na gi.
- ¹²Na in mi ne kəzin', swə məni ve nan, bə rum də gi sin məni na gi. Bay mum də gi sin mə toŋ pā mə na, zə na wə də hay' Ba mana.
- ¹³Bay na də gi kwa daŋ' məni hi wə də o kə semdə rin, kədan sôwâ we mbra' Ba Vay zə Vaya.
- ¹⁴Hi la' o kwa kə semdə rin si, na də gi kwa rumu.”
- ¹⁵«Hi la' wə man bə si, hi də ta zə dan dlay mana.
- ¹⁶Na də o Ba man kədan nə sin Swə məsin məni də mi rəgin mi ne, ɓay mum də ke kə ri bəka daŋ'ŋ.
- ¹⁷Mum nə Simbed' mə kəzin', sôwâ nya cu gak um ve mi, zə handay cu gak um we kə i ko we dan um mi. Ama mə hi, hi we num si, zə mum kəta' kə ri, ɓay mum wə du ri.
- ¹⁸Na cu də mi ar du cakiya' dāw ri mi. Na də gewa mbə hay' ri.
- ¹⁹Ri gwa' kî, sôwâ nya cu də man we za' mi, ama mə hi, hi də man we. Na kəta' kə i zə rum, hi də ke kə i ta'a.
- ²⁰Kəri məni bəka rum də mbə, hi də we i na wə du Ba man, ɓay hi wə du rin, ɓay na wə du ri.
- ²¹Swə məni kaw dan dlay man ɓay wə ta zə rum, mum nə swə məni wə man ba: Ba man də bə swə məni wə man bə, ɓay na də um bə ta', ɓay na də ta' tu rin um ne.”
- ²²Yudas mum nə cem kə Yudas Iskariyot ci vun rumu: «Bârî, zə mi ha də ta' tu ru mba ne, ama ha cu də ta' tu ru ne kə sôwâ nya mi su?”
- ²³Zezu dām vun rumu: «Swə məni wə man bə, bə rum də ta zə dan məni na ini. Ba man də um bə, ɓay Ba man kə na, namba də gay' kə rumu.
- ²⁴Swə məni cu man bə mi, bə rum cu ta zə dan man mi. Dan man məni hi wə mun cu car mbə hay' rin mi, ama dan rum car mbə hay' Ba man məni sin nana.
- ²⁵Na in dan rum ne ni kəri məni na kəta' kə ri ɓo.
- ²⁶Swə məni wə mi rəgin, Simbed' mə Kəleŋ məni Ba man də sin kə semdə rin, mum də ta' kwa daŋ' mi ne, ɓay mum də mi gi dla' wa dan daŋ' məni na in ne ni.
- ²⁷Na wə ar heɓ mi ne, na wə ne heɓ man mi ne, na cu wə ne heɓ ce' ndə məni sôwâ nya wə ne heɓ nə mi. I dîk dan mi, i ne wəlok mi.

²⁸Hi mun dan mēni na in ne ni si: "Na dē 'ya, ama na dē gewa mbə hay' ri." Hi la' bə nan si, hi dē tuk kədam kəzə, zə na wə dē hay' Ba man, zə Ba man pā nan kə mbra' si.

²⁹Mgbaŋ ni nə, na in dan rum ne ni, cop kwa rum cu gi mətō', kədan kəri mēni kwa rum dē mbə, hi dē ve dan mana.

³⁰Na cu dē in dan mi ne juk za' mi, zə jwə nya mēni nə wə dē mba. Mum cu kə gbəgboŋ wa rin mi,

³¹ama say sôwâ nya kuni we i na wə bə Ba man, bay na wə gi sin ce' ndə mēni Ba man ne vari ne nana. I car ye, mē 'ya ni ti si!»

Jean 15

¹«Na nə ya gu viŋə mē kəzin', bay Ba man nə bə sine gu viŋə rumu.

²Mum tlərad' ba gu daw daw daŋ' mēni cu wə vra' mi, bay mum wə gila' ba gu daw daw daŋ' mēni wə vra' kədan ba rum vra' dē kofo.

³Kwata' man mēni na ta' ne ni nə gila' ri si.

⁴I gay' tləba nji kə rin, bay na dē suk tləba nji kə ri! Ce' ndə mēni ba gu viŋə cu gak vra' kə daw rum dan tləba nji kə ya gu mi, ndəna' ta', hi cu gak vra' kə daw ri, dan tləba nji kə rin mi.

⁵Na nə ya gu viŋə, bay hi ba sə kuna: Swə mēni wə suk tləba nji kə rin bay na wə suk tləba nji kə rum, bə rum wə vra' juk, zə hi cu gak gi kwa məsin dan rin mi.

⁶Swə mēni cu suk tləba nji kə rin mi, handay dē um dā ta rəka ce' ndə ba gu, bay mum dē co', ndəna', sôwâ wə ra' ba gu mēni co' si njay dē ku, bay ku nday ye'e.

⁷Hi la' wə gay' tləba kə rin, bay dan man wə suk wə vunduk ri si, i o kwa mēni hi kə mē' rum, bay hi dē fe.

⁸Kəri mēni hi wə vra' juk, hi wə ta' i hi sum ta zə rin, bay kə vari rum, hi wə ta' mbra' Ba man ta'a.

⁹Na wə mi bə, ce' ndə mēni Ba man wə man ba. I gay' du bə mana.

¹⁰Hi la' wə ta zə dan dlay man si, hi dē gay' du bə man, ce' ndə mēni na wə ta zə dan dlay Ba man, bay na wə suk du bə umu.

¹¹Na in dan rum ne ni kədan kədam man nə ke du ri, bay kədam mi nə ke kədam mē kəzini.

¹²Dan dlay man nə ni na: I bə nji mbok nji, ce' ndə mēni na wə mi ba.

¹³Bə mē toŋ pā daŋ', mēni swə gak ta' ne kə bāy um nə ni na: Say mum mar zə bə rumu.

¹⁴Hi la' wə gi kwa mēni na wə mi in ne nə si, ka hi bāy mana.

- ¹⁵Na cu mi dē kə sum sin za' mi, zə bə sin cu we kwa mənɪ toŋ sin um wə gi nə mi. Zawa, na wə mi dē kə bāy, zə na ta' kwa daŋ' mənɪ Ba man ta' ne nan nə ne ni.
- ¹⁶Hi cu par nan mi, ama na da' ni ɓay ne vari ne ni kədan hi də vra', vra' mənɪ wə də hā: Ndəna', kwa daŋ' mənɪ hi də o ɓa Ba man kə semdē rin, mum də mi ne.
- ¹⁷Dan dlay mənɪ na wə mi ne nə ni na: I bə nji mbok nji.”
- ¹⁸«Sôwâ nya la' sî ni si, i we i handay sî nan copo.
- ¹⁹Hi la' mə nya kəzə si, sôwâ nya mi bə, zə hi wə du ndaya: Ama na da' ni wə du sôwâ nya, ɓay hi cu wə du nday za' mi, zə rum, handay wə mi sî.
- ²⁰I dla' wa dan mənɪ na in ne ni nə ri'i: "Bə sin cu kə mbra' pā toŋ sin um mi." Sôwâ la' gi boni ne nan si, handay də keɓ zu ri ta'a. Handay la' ta zə kwata' man si, handay də ta zə kwata' mi ta'a.
- ²¹Ama handay də gi kwa rum daŋ' mi ne zə rin, zə handay cu we swə mənɪ sin nan nə mi.
- ²²Na la' cu mbə kəzə ɓay in dan ne nday mi si, handay cu ke kə kwa mə bro' mi. Ama mgbaŋ ni nə, handay cu gak riway wa kwa mə bro' nday mi.”
- ²³Swə mənɪ wə man sî, bə rum wə sî Ba man ta'a.
- ²⁴Na la' cu gi sin mənɪ swə məsin cu gak gi mi kəzə du nday mi si, handay cu ke kə kwa mə bro' mi. Ama mgbaŋ ni nə handay we sin man, ɓay handay sî nan kə Ba man hoɓ jaka.
- ²⁵Ama kwa rum gi ndəna' kədan nyen mbi dan mənɪ wāy' wə du dərwa dan dlay ndaya: Handay sî nan dan zə rumu.
- ²⁶«Bə kawɓa ri nə wə də mbə, mum nə Simbed' mə kəzin' mənɪ car mbə hay' Ba mana. Na də um sin mi ne kə semdē Ba man, ɓay mum də in dan wa rini.
- ²⁷Bay hi ta', hi də in dan wa rin, zə hi kəta' kə rin daka təŋ zu rumu.»

Jean 16

- ¹«Na in dan rum ne ni kədan hi ar dan mənɪ hi ve nə mi.
- ²Sôwâ də mi 'way wə rawti so Ifray sôwâ Zuwif də rəka. Bay ri rum wə də mbə kəta', wə ri rum, sôwâ mənɪ wə də mi ci wə dīk i kə vari rum handay wə gi sin zə Ifraya.
- ³Handay də gi ndəna' zə handay cu we Ba man ko na mi.
- ⁴Ama na in dan rum ne ni kədan hi də dla' wa dan mənɪ na in ne ni kəri mənɪ handay wə də gi kwa rumu.» «Na cu in dan rum ne ni kə təŋ zu rum mi zə na kəta' kə ri.
- ⁵Ama mgbaŋ ni nə, na wə də hay' swə mənɪ sin nan, ɓay swə dāw du ri cu ci vun rini: "Ha də ka su mi.”
- ⁶Ama zə na in ndəna', dan dīk nyen vunduk ri.

- ⁷Ama na in tu dan ne ni: Pram zə ri, say na 'ya. Zə na la' cu 'ya mi si, Bə kawba ri cu də mbə hay' ri mi. Ama na la' 'ya si, na də um sin mi ne.
- ⁸Bay kəri məni mum də mbə, mum də ta' ne kə sôwâ nya i handay vi' vari wa dan kwa mə bro' kə wa dan kwa mə njeŋ bay wa dan bok Ifraya.
- ⁹Wa dan kwa mə bro', zə handay cu ve nan mi.
- ¹⁰Wa dan kwa mə njeŋ, zə na wə də hay' Ba man, bay hi cu də man we za' mi.
- ¹¹Wa dan bok Ifray, zə Ifray bok dan wa jwə nya məni nə si.
- ¹²Na kə dan məsin juk kərem kədan na mi in ne, ama hi cu gak mun zu dan rum mgbaŋ ni nə mi.
- ¹³Kəri məni Simbed' mə kəzin' wə də mbə, mum də mi ta' dan mə kəzin' daŋ'ŋ. Mum cu də in dan mə wa tu rum mi, ama mum də in dan daŋ' məni mum wə mun, bay mum də ka' dan wa kwa məni wə də mbə mi ne.
- ¹⁴Mum də man ne mbra', zə mum də ve dan man bay də ka' mi ne.
- ¹⁵Kwa daŋ' məni Ba man kəta' kə ndi, kwa rum mə na ta'a. Zə rum na in i Simbed' mə Kəleŋ də ve dan məni wə hay' rin bay də ka' mi ne."
- ¹⁶«Ri gwa' kî, hi cu də man we za' mi, bay kəki rum kî, hi də man we kəreme."
- ¹⁷Zə rum, sôwâ məsin wə du sum ta zə rum ci vun nji mbok nji: «Dan rum wa' dan in ma su? Mum in ne mba: "Ri gwa' kî, hi cu man we za' mi, bay kəki rum kî, hi də man we kəreme." Bay mum in ta'a: "Zə na wə də hay' Ba mana."
- ¹⁸Kəri məni mum ini: "Ri gwa' kî", dan rum wa' dan in ma su? Namba cu mun zu dan məni mum in nə mi!"
- ¹⁹Zezu we si, handay wa' ci vun rum, zə rum, mum la' ne ndaya: «Na in mi ne: Ri gwa' kî, hi cu də man we za' mi, bay kəki rum kî, hi də man we kəreme." Hi wə ci vun nji mbok nji wa dan rum nə su?
- ²⁰Na in mi ne kəzin', hi də ci' bay hi də ge wor, ama sôwâ nya də tuk kədama. Hi də dîk dan, ama dan dîk mi də faŋ kədama.
- ²¹Kəri ma hərə' kə vra', ta kə dîk dan zə ri boni za' sa. Ama kəri məni ta la' vra' si, ta dūmwa boni rum bay ta tuk kədām zə ta vra' vay wə wa nya məni na.
- ²²Ndəna' kə ri ta', mgbaŋ ni nə hi kə dan dîk, ama na də mi we kərem, bay vunduk ri də tuk kədām, swə dāw cu gak tle kədām rum mbə vunduk ri mi.
- ²³Kəri məni bəka rum də mbə, hi cu də ci vun rin wa dan məsin za' mi. Na in mi ne kəzin', kwa daŋ' məni hi də o ba Ba man kə semdē rin, mum də mi ne.
- ²⁴Hâ mgbaŋ ni nə, hi cu o kwa məsin kə semdē rin dāw mi. I o, bay hi də fe. Ndəna', kədām mi də ke kədām mə kəzini."

²⁵«Na in dan rum daŋ' ne ni kə dan mə gəgan, ama ri rum də mbə kəta', na cu də in dan kə dan mə gəgan mi ne za' mi, ama na də ta' kwa wa Ba man mi ne təlaka.

²⁶Kəri mənɪ bəka rum də mbə, hi də o kwa ɓa Ba man kə semdɛ rin ɓay na cu in ne ni i na wə də um o zə ri mi.

²⁷Zə Ba man kə tu rum wə mi ba. Mum wə mi bə, zə hi wə man bə, ɓay hi ve i na car mbə hay' Ifraya.

²⁸Na car hay' Ba man, ɓay na mbə du sôwâ nya. Mgbanɪ ni nə, na ar sôwâ nya, ɓay na wə də hay' Ba mana”

²⁹Zə rum, sum ta zə rum la' ne numu: «Mgbanɪ ni nə, ha in dan ne mba təlak, dan in dan kə dan mə gəgana.

³⁰Mgbanɪ ni nə, namba we si, ha we kwa daŋ', ɓay ha cu kə mē' i sôwâ ci vun ru mi. Zə rum, namba ve i ha car mbə hay' Ifraya.”

³¹Zezu ci vun ndaya: «Hi ve dan rum hâ mgbanɪ ni nə su?

³²Ri rum də mbə kəta', ɓay ri rum mbə si. Hi daŋ' də pla' wa, swə ɗaw ɗaw daŋ' də so um, ɓay hi də man ar kə ɗaw rini. Ama kəzin', na cu kə ɗaw rin mi, zə Ba man kəta' kə rini.

³³Na in dan rum daŋ' ne ni kədan hi də ke kə heɓ wə du ɓa nji kə rini. Hi də ce boni wa nya, ama i kaw vunduk, na ŋgô nya si!»

Jean 17

¹Kəki mənɪ Zezu in dan rum ndəna', mum tle i ta wafray ɓay ini: «Bəba, ri rum mbə si, a ne mbra' ne kə Vay wû, kədan Vay nə wû ne mbra' ta'a.

²Zə ha ne gbəgboŋ ne num wa sôwâ daŋ', kədan mum ne nyî mə də hâ kə sôwâ daŋ' mənɪ ha ne nday ne numu.

³Zə nyî mə də hâ nə kə mənɪ handay wû we, ha Ifray mə kəzin' ɗaw sar, ɓay we Zezu Kris mənɪ ha sini.

⁴Na ta' mbra' wû wa nya si, ɓay na ndo' sin mənɪ ha ne nan kədan na gi nə si.

⁵Zə rum, Bəba, a ne mbra' mənɪ na ke kə ndi cop kəri mənɪ nya cu gi mətə' ne nan wə kor ru mgbanɪ ni na.

⁶Na ta' nu ne kə sôwâ mənɪ ha da' nday du sôwâ nya ne nana. Handay mə ha, ha ne nday ne nan, ɓay handay ta zə dan wû.

⁷Mgbanɪ ni nə, handay we i kwa daŋ' mənɪ ha ne nan car mbə hay' ru,

⁸zə na ta' dan mənɪ ha ne nan ne nday, ɓay handay ve dan rumu. Handay we kəzin' i na car mbə hay' ru, ɓay handay ve i ha sin nana.

⁹Na wə wû o zə ndaya. Na cu wə wû o zə sôwâ nya mi, ama na wə wû o zə sôwâ mənɪ ha ne nday ne nana: Handay mə ha.

¹⁰Kwa daŋ' mɔni na kɛ ndi nɛ mɛ ha, ɓay kwa daŋ' mɔni ha kɛ ndi nɛ mɛ na, ɓay sɔwɔ dɛ we mbra' man wɛ du ndaya.”

¹¹Na cu du sɔwɔ nya za' mi, zɛ na wɛ dɛ hay' ru, ama handay wɛ du sɔwɔ nya ɓo. Bɛba mɛ kɛlɛŋ, a ji nday zɛ mbra' semdɛ ru, semdɛ mɔni ha ne nan, kɛdan handay ke dɛw ce' ndɛ ha kɛ na, namba dɛwa.

¹²Kɛri mɔni na ke kɛ nday, na ji nday zɛ mbra' semdɛ ru, semdɛ mɔni ha ne nana. Na ji nday, ɓay swɛ dɛw du nday cu vi' mi, say swɛ mɔni vi' tu rum kɛdan dan mɔni wɔy' wɛ du Derwa Ifray nɛ nyen mbi.

¹³Ama mgbaŋ ni nɛ, na wɛ dɛ hay' ru, ɓay na in dan ndɛna' kɛri mɔni na wɛ du sɔwɔ nya ɓo kɛdan handay ke kɛ kɛdam man mɛ kɛzin' du ndaya.

¹⁴Na ta' dan wɔ ne nday, ɓay sɔwɔ nya sɔ nday, zɛ handay cu mɛ nya mi, ce' ndɛ na ta' na cu mɛ nya mi.

¹⁵Na cu wɔ o kɛdan a ra' nday mbɛ du sɔwɔ nya mi, ama kɛdan a ji nday hay' Satan.

¹⁶Handay cu mɛ nya mi, ce' ndɛ na ta', na cu mɛ nya mi.

¹⁷A gi nday faŋ sɔwɔ wɔ mɛ kɛlɛŋ. Dan wɔ nɛ dan mɛ kɛzini:

¹⁸Na sin nday wɛ du sɔwɔ nya, ce' ndɛ mɔni ha sin nan wɛ du sɔwɔ nya.

¹⁹Na ar tu rin daŋ' ne nu zɛ nday, kɛdan handay ta', handay faŋ sɔwɔ wɔ mɛ kɛlɛŋ.

²⁰«Na cu wɛ wɔ o zɛ nday taw mi, ama na wɛ wɔ o zɛ sɔwɔ mɔni wɛ dɛ man ve zɛ dan ka' ndaya:

²¹Na wɛ wɔ o zɛ nday kɛdan handay daŋ' faŋ dɛwa. Bɛba, say handay ɓa nji kɛ mba, ce' ndɛ ha wɛ du rin, ɓay na wɛ du ru, say handay faŋ dɛw kɛdan sɔwɔ nya ve i ha sin nana.

²²Na ne mbra' mɔni ha ne nan nɛ ne nday, kɛdan handay faŋ dɛw ce' ndɛ ha kɛ na, namba dɛwa,

²³na wɛ du nday, ɓay ha wɛ du rin, kɛdan handay faŋ dɛw kɛzin', ɓay kɛ vari rum sɔwɔ nya we i ha sin nan, ɓay ha wɛ nday bɛ ce' ndɛ mɔni ha wɛ man ba.

²⁴Bɛba, ha ne nday ne nan, ɓay na wɛ wa' i handay ke kɛ rin wɛ ri mɔni na dɛ ke han, kɛdan handay we mbra' mɔni ha ne nan, zɛ ha bɛ nan cop kɛri mɔni nya cu gi mɛto'o.

²⁵Bɛba mɛ njeŋ, sɔwɔ nya cu we nu mi, ama mɛ na, na we nu si, ɓay sɔwɔ mɔni kuni we i ha sin nana.

²⁶Na ta' nu ne nday si, ɓay na dɛ kofo kɛ wɔ ta' nday ne kɛrem, kɛdan bɛ mɔni ha kɛ ndi zɛ rin nɛ dɛ ke du nday, ɓay kɛdan na kɛ tu rin dɛ ke du nday ta'a.»

Jean 18

¹Kɛri mɔni Zezu in dan rum ndɛna', mum 'ya kɛ sum ta zɛ rum ɓay ur mbi ze Kedron ta dapa ga' sini. Sine kɛta' wɛ han, ɓay Zezu kɛ sum ta zɛ rum cok ta hana.

- ²Yudas, swə mənɪ ar Zezu ta ɓa sôwâ, nə we ri rum si, zə Zezu wə ɓa han kə sum ta zə rum ɓa'a.
- ³Zə rum, Yudas ta wə du sine rum kə kul soje ɓay sum ji vun so po' fur sôwâ Zuwif mənɪ sum rôwâ mə du sum po' fur kə kul sôwâ Zuwif mə də kə Farisiyen sin ndaya. Handay mbə kə kwa zi, ɓay handay ra' ɓaŋgay kə za dūm ku.
- ⁴Zezu we kwa ɗaŋ' mənɪ wə də gi wa rum, zə rum mum ta də hay' nday ɓay ci vun ndaya: «Hi wə keɓ sa su?»
- ⁵Handay ɗam vun rumu: «Namba wə keɓ Zezu mə so Nazaret.» Zezu ɗam vun ndaya: «Na ni na.» Bay Yudas, swə mənɪ ar Zezu ta ɓa sôwâ, nə car han kə ndaya.
- ⁶Kəri mənɪ Zezu in ne ndaya: «Na ni na», handay faŋ ta kəki ɓay njay ta nya.
- ⁷Zezu faŋ ci vun nday kəreme: «Hi wə keɓ sa su?» Handay ɗam vun rumu: «Namba wə keɓ Zezu mə so Nazaret.»
- ⁸Zezu ɗam vun ndaya: «Na in ne ni si, na ni na. Hi la' wə man keɓ si, i ar sôwâ mənɪ kuni 'ya ri'i.»
- ⁹Mum in ndəna' kədan dan mənɪ mum in ɓa' si nə nyen mbi: «Bəba, na cu vi' swə ɗaw mə du sôwâ mənɪ ha ne nan nə mi.»
- ¹⁰Simon Piyer kə masəlam, mum par ɓay tum hum ɓa fun bə sin toŋ po' fur kə ndi. Bə sin nə də kə Malkus.
- ¹¹Ama Zezu la' ne kə Piyer: «A no' masəlam də zəbar rumu! Ha ɗik i na cu də ce timbi boni mənɪ Ba man ne nan nə mi su?»
- ¹²Kul soje kə toŋ nday, ɓay sum ji vun so po' fur sôwâ Zuwif kaw kuni Zezu ɓay ɓaŋ numu.
- ¹³Cop rum, handay ta kə rum kor Hana. Mum nə kəka Kayif, toŋ po' fur kə kim rumu.
- ¹⁴Kayif kə mənɪ in ne kə sôwâ Zuwif: Pram kədan swə ɗaw mar zə sôwâ ɗaŋ'ŋ.
- ¹⁵Simon Piyer kə bə ta zə Zezu məsin ji zu Zezu. Toŋ po' fur we nji kə bə ta zə Zezu nə si. Zə rum, mum ze ta rawti cava toŋ po' fur nə kə Zezu.
- ¹⁶Ama Piyer car rəka wə vun gama. Zə rum, bə ta zə Zezu məsin mənɪ we nji kə toŋ po' fur nə faŋ pā ɓay ge dan kə ma məti wə ji vun vari so rumu. Kəki rum, mum tle Piyer ze ta rawti cava kə rumu.
- ¹⁷I ji vun vari rə ci vun Piyer: «Ha cu du sum ta zə swə mə nay' nə ta mi su?» Piyer ɗam vun sa: «Â â, na cu du nday mi!»
- ¹⁸Kəri rum, cer simbeɗ'na, zə rum sum sin kə sum ji vun so nyen kuni ku, ɓay handay gay' wə də rumu. Piyer ta car du nday ɓay də ku nə ta'a.
- ¹⁹Kəri rum, toŋ po' fur nə ci vun Zezu wa sum ta zə rum kə kwata' umu.

²⁰Zezu dām vun rumu: «Na in dan ne kə sôwâ daŋ' tɛlak, kəri mɛni na ta' kwa, na ta' wə rawti so Ifray sôwâ Zuwif kə rawti so po' fur sôwâ Zuwif, ri mɛni sôwâ Zuwif daŋ' wə ɓa hana. Na cu in dan ko dāw hura hura mi.

²¹Zə mi ha wə ci vun rin su? A ci vun sôwâ mɛni mun dan mɛni na in ne ndaya: Handay we dan mɛni na in ne nday nə si.”

²²Kəri mɛni Zezu in dan rum, swə dāw wə du sum ji vun so toŋ po' fur sôwâ Zuwif mɛni car wə hay' Zezu pum zəhum ne num ɓay ini: «Ha dām dan vun toŋ po' fur ndəna' su?”

²³Zezu dām vun rumu: «Na la' in dan mə bro' si, a ta' dan mə bro' mɛni na in nə ne mba. Ama na la' in dan mə njeŋ si, zə mi ha pum nan su?”

²⁴Hana ɓaŋ num ɓay sin num ta hay' Kayif, toŋ po' furu.

²⁵Kəri rum, Simoŋ Piyer car wə han wə ri dɛ ku nə ɓo. Sôwâ mɛsin ci vun rumu: «Ha cu du sum ta zə swə mə nay' nə ta' mə su?» Ama Piyer riway dan rum kə ini: «Â â, na cu du nday mi.”

²⁶Swə dāw mə du sum sin toŋ po' fur, mum nə bray swə mɛni Piyer ke tum hum rum nə, mum ci vun Piyer: «Na cu we nu kə rum wə du sine mi su?”

²⁷Ama Piyer riway dan rum kəreme. Kəri rum sar, gulok ge ele.

²⁸Kə ɓəka cɛɗ, handay tle Zezu mbə so Kayif kədan handay dɛ so toŋ nya rumu. Ama sôwâ Zuwif cu cok ta rawti so um mi, zə handay wa' kədan kaw tu nday kəleŋ cɛ' ndə mɛni vun fur nday wə gi, kədan handay gi cer sôwâ Zuwif mə dɛ kə Pakə.

²⁹Zə rum, toŋ nya rum mə dɛ kə Pilatə pā ta hay' nday ɓay ci vun ndaya: «Hi tum sem swə mɛni nə wa mi su?”

³⁰Handay dām vun rumu: «Mum la' cu ɓə gi kwa mə bro' kəzə mi si, namba cu um kaw mbə kor ru kə rum mi.”

³¹Pilatə la' ne ndaya: «I tle num kə tu ri, ɓay i ɓok dan wa rum cɛ' ndə dan dlay mi.» Sôwâ Zuwif dām vun rumu: «Namba cu kə vari kədan namba ci swə mi!”

³²Kwa rum gi ndəna' kədan nyen mbi dan mɛni Zezu ke in kəri mɛni mum ta' mar mɛni mum wə dɛ mara.

³³Pilatə faŋ ze ta so kəreme. Mum dɛ Zezu ɓay ci vun rumu: «Ha jwə sôwâ Zuwif su?”

³⁴Zezu ci vun rumu: «Ha in ndəna' zə ha dɪk dan rum kə tu ru su? Ko sôwâ mɛsin in dan mə wa rin ne nu su?”

³⁵Pilatə dām vun rumu: «Ha dɪk i na swə Zuwif su? Sôwâ wū kə sum rôwâ mə du sum po' fur kə mɛni ar nu mbə ɓa rini! Ha gi mi su?”

³⁶Zezu dām vun rumu: «Na cu suk jwə wa nya mēni nə mi. Na la' suk jwə wa nya mēni nə kəzə si, sôwâ man wə də zi wa rin kədan handay tak sôwâ mēni wə man ar də ɓa sôwâ Zuwif. Ama cu ndə na' mi. Na cu suk jwə wa nya mēni nə mi.»

³⁷Zə rum, Pilatə ci vun rumu: «La' ndəna' si, ha jwə su?» Zezu dām vun rumu: «Ha in njeŋ i na nə jwə na. Na vra', ɓay na mbə wə du sôwâ nya kədan na in njeŋ dan wa dan mə kəzini. Sa su daŋ' mēni car zu mbə du dan mə kəzin', bə rum wə mun dan mana.»

³⁸Pilatə ci vun rumu: «Dan mə kəzin' nə mi su?» Kəki mēni Pilatə in dan rum, mum faŋ pā ta hay' sôwâ Zuwif kəreme. Mum la' ne ndaya: «Na cu za' zu dan mēni i ɓok dan mar wa swə nə dāw mi.

³⁹Kə cer sôwâ Zuwif mə dē kə Pakə daŋ', na wə ar daŋgay' dāw mi ne, ce ndə vun fur mi, hi wa' i a ar jwə sôwâ Zuwif ne ni su?»

⁴⁰Kəri rum, handay təŋ kə do dan kəreme: «Â â, a ar num mi, a ar Barabas ne mba!» Barabas nə bə bargu kwa.

Jean 19

¹Ndəna', Pilatə ne vari ne kə soje kədan handay tle Zezu ɓay um pe kə ləva.

²Soje kuni ci pəlay wa kə ŋây' ɓay no' ta ne num wa, handay ge mbraw mə tlew ne numu.

³ɓay handay jik ta hay' rum ɓay ini: «Soko ye, jwə sôwâ Zuwif!» ʼBay handay pum zəhum ne numu.

⁴Pilatə faŋ pā kərem ɓay la' ne kə raw sôwâ: «I kar ri', na wə də pā mbə rəka kor ri kə rum kədan hi we i na cu za' zu dan mēni i ɓok dan mar wa rum dāw mi.»

⁵Kəri rum Zezu pā mbə rəka. Mum no' pəlay wa ŋây' wa rum kə mbraw mə tlew wə tu rumu. Pilatə la' ne ndaya: «Swə nə ni na!»

⁶Ama kəri mēni sum rôwâ mə du sum po' fur kə sum ji vun so po' fur sôwâ Zuwif we num, handay do dana: «A gay' num də wa gu! A gay' num də wa gu!» Pilatə la' ne ndaya: «I tle num, ɓay i gay' num də wa gu kə tu ri, zə na cu za' zu dan mēni i ɓok dan mar wa rum mi.»

⁷Sôwâ Zuwif dām vun rumu: «Namba kə dan dlay, ɓay ce' ndə mēni dan dlay rum in, mum nde i mar si, zə mum in i mum Vay Ifraya.»

⁸Kəri mēni Pilatə mun dan rum, wəlok faŋ gi num ta kofo.

⁹Mum faŋ ze ta so kərem ɓay ci vun Zezu: «Ha car mbə ka su?» Ama Zezu cu dām vun rum mi.

¹⁰Zə rum, Pilatə ci vun rumu: «Ha cu dām vun rin mi su! Ha cu we i na kə gbəgboŋ kədan na wû ar, ɓay na kə gbəgboŋ kədan na wû gay' də wa gu mi su?»

¹¹Zezu dām vun rumu: «Ha cu kə gbəgboŋ wa rin kpe mi, say ka gbəgboŋ wû car mbə wafraya. Zə rum, swə mēni ar nan ta ɓa ru, bə rum kə dan wa rum pā nu si.»

- ¹²Daka ri rum, Pilatə keḅ vari kədan mum ar Zezu, ama sôwâ Zuwif dle kə do dana: «Ha la' ar swə nə si, ka ha cu bây jwə mə mbri mə nya Romə mi! Sa su daŋ' mənɪ gi tu rum ce' ndə jwə, bə rum vad' jwə mə mbri mə nya Romə!»
- ¹³Kəri mənɪ Pilatə mun dan rum, mum tle Zezu pā rəka kə rum, mum suk wa kwasuk bok dan wə ri mənɪ sôwâ dām kə gway'i. Sôwâ wə dē ri rum kə vun Hebre: «Gabata».
- ¹⁴Bəka gwa' dāw kədan cer sôwâ Zuwif mə dē kə Pakə nə də gi. Ce' ndə fəta duwa, Pilatə la' ne kə sôwâ Zuwif: «Jwə mi nə ni na!»
- ¹⁵Ama handay dle kə do dana: «A ci num si! A gay' num də wa gu!» Pilatə ci vun ndaya: «Hi wa' i a gay' jwə mi də wa gu su?» Sum rôwâ mə du sum po' fur dām vun rumu: «Namba cu kə jwə məsin mi, say jwə mə mbri mə nya Romə»
- ¹⁶Kəri rum, Pilatə ar Zezu ta ɓa nday kədan handay um gay' də wa gu. Zə rum, handay kaw Zezu.
- ¹⁷Zezu tle gu gay' um kə tu rum ɓay pā mbə mbok so kədan mum də ri mə dē kə «Ri so wa». Sôwâ wə dē ri rum kə vun Hebre: «Golgota».
- ¹⁸Wə ri rum, handay gay' num ta wa gu kə sôwâ məsin hoḅ hay' rum, dāw ga' ti, dāw ga' ti, ɓay Zezu wə du ndaya.
- ¹⁹Pilatə wāy' dan mənɪ na: «Zezu mə so Nazaret, Jwə sôwâ Zuwif» wa kwa wāy' kwa, ɓay mum ne vari ne kə sôwâ kədan handay gay' kwa wāy' rum də fray wa gu gay' Zezu.
- ²⁰Sôwâ Zuwif juk in kwa wāy' rum, zə ri mənɪ handay gay' Zezu ta wa gu nə hərə' kə so, ɓay kwa wāy' rum wāy' kə vun Hebre, kə vun Latin, ɓay vun Grek.
- ²¹Zə rum, sum rôwâ mə du sum po' fur la' ne kə Pilatə: «A wāy' "Jwə sôwâ Zuwif mi", ama a wāy'i: Swə mə ni nə ini: Na jwə sôwâ Zuwif.»
- ²²Pilatə dām vun ndaya: «Dan mənɪ na wāy' si nə ke ndəna'a.»
- ²³Kəri mənɪ soje gay' Zezu ta wa gu si, handay ra' mbraw um ɓay bul nday cem cem fədi', dāw zə soje dāwa. Handay tle mbraw um mə mbri ta'a: Mbraw rum ci dan vun furu.
- ²⁴Soje kuni in kə nji mbok nji: «Mə ŋgār mbraw rum mi, ama mə pum parwa kədan mə kar sa də fe mbraw rum su na.» Kwa rum gi ndəna' kədan nyen mbi dan mənɪ Derwa Ifray ini: «Handay bul mbraw man mbok nday, ɓay handay pum parwa wa mbraw man mə mbri.» Soje kuni gi ndəna'a.
- ²⁵Ya Zezu, kə njar sə, ɓay Mari mə ma Klopas, kə Mari mə so Magdala gay' kuni hərə' kə gu gay' Zezu.
- ²⁶Zezu we ya um kə bə ta zə rum mənɪ mum bə nə gay' wə hana. Mum la' ne kə ya umu: «Yiya, vay maŋ ni na.»
- ²⁷Mum faŋ la' ne kə bə ta zə rum na: «Ya wū ni na.» Bay kəri rum, bə ta zə Zezu nə tle sə ta so um kə sa.

²⁸Kəki dan rum, Zezu we si, mgbaŋ ni nə kwa daŋ' ndo' si, kədan nyen mbi dan mənɪ Derwa Ifray in, mum ini: «Mê' mbi ci nan si.»

²⁹Dənay cin wə han kə sum viŋə mə cumok peḏe. Kəri rum, soje tle dliw ɓay dɛlak kwa mə ra' nji kə soso ɓay no' ta wə sum mə cumoko. Mum ɓaŋ ta vun dliw ɓay sa ta vun Zezu.

³⁰Kəri mənɪ Zezu tuk mbi rum, mum ini: «Dan rum daŋ' ndo' si!» Mum faŋ no' wa ɓay mara.

³¹Bəka gwa' ɗaw kədan fəta pemây sôwâ Zuwif nə mbə, ɓay sôwâ Zuwif cu wa' i mar kuni ke wa gu gay' kə fəta pemây rum mi, zə fəta pemây nə fəta mə toŋo. Zə rum, handay ta ci vun Pilatə kədan nə kəy sem ne kə sôwâ mənɪ soje gay' ta wa gu ɓay ulay' mar nday mbə nya.

³²Zə rum, soje kuni mbə kəy sem swə mə vun kofo, ɓay sem bāy hoɓ um mənɪ handay gay' ta gu hay' Zezu.

³³Ama kəri mənɪ handay mbə hay' Zezu, handay za' num mar si. Zə rum, handay cu kəy sem rum mi.

³⁴Ama soje ɗaw du nday kap hay' ne kə Zezu kə saɓ, ɓay kəri rum sar, vəswə kə mbi ne mbə hana.

³⁵Bə we kwa rum in njeŋ dan wa rum, ɓay dan rum kəzin', mum we kə tu rum i mum in dan mə kəzin', ɓay mum in dan rum kədan hi ta', hi ve dan rumu.

³⁶Zə kwa rum gi ndəna' kədan nyen mbi dan mənɪ Dan rum wây' wə du ɗerwa: «Sôwâ cu də kəy so rum ɗaw mi.»

³⁷Bay wə ri məsin Derwa Ifray wə in kəreme: «Sôwâ də kar swə mənɪ handay kap hay' ne numu.»

³⁸Kəki rum, Zozef mə so Arimate o vari ɓa Pilatə kədan mum tle mar Zezu. Zozef nə swə mənɪ wə ta zə Zezu, ama mum wə ta hura hura, zə mum wə ne wəlok sôwâ Zuwif. Pilatə ne vari ne num, ɓay Zozef tle mar Zezu.

³⁹Nikodem, swə mənɪ ke ta hay' Zezu fəta məsin kə dukri ɗaw ri', ta kə Zozef ta'a. Mum tle mbir gu mə ɗe kə «mir» mənɪ tɕum kə mbir gu məsin mə ɗe kə «alowes» i kilo gu hinji'i.

⁴⁰Handay tle mar Zezu ɓay ku' kə zim mo' mara. Handay wu' urdi rum wə han ce' ndə mənɪ vun fur sôwâ Zuwif wə gi kəri mənɪ handay wə gila' mar kədan handay mo'o.

⁴¹Wə ri mənɪ handay gay' Zezu ta wa gu, sine kəta' wə hana. Wə du sine rum, zra mar mə mbrew mənɪ sôwâ cu no' mar han ɗaw mətə' kəta' wə hana.

⁴²Zə dan gila' tu mə fəta pemây sôwâ Zuwif nə mbə, ɓay zra mar nə həre'e. Zə rum, handay no' mar Zezu ta hana.

Jean 20

¹Kə dimaŋsə, kə bəka ced, ka ri ura' ɓo, Mari mə so Magdala ta wə vun zra. Ta we gway' mə ta' vun zra nə ɓuru ta kə hay'i.

²Zə rum, ta faŋ kə ne ta hay' Simoŋ Piyer kə bə ta zə Zezu məni mum bə, ɓay ta in ne ndaya: «Sôwâ tle mar Zezu mbə zra um si, ɓay namba cu we ri məni handay cin num han nə mi.»

³Piyer kə bə ta zə Zezu məsin 'ya ta vun zra.

⁴Handay pik ne vun nji hoɓ jak, ama bə ta zə Zezu məsin ne ga'ri pâ Piyer, ɓay mum ta day vun zra copo.

⁵Mum goɓ kədan mum kar rawti zra ɓay mum we zim mo' mar məni handay mo' mar kə ndi nə njay wə han, ama mum cu ze ta han mi.

⁶Kəki rum, Simoŋ Piyer ne ta day, ɓay mum ze ta rawti zra. Mum we zim mo' mar məni handay mo' mar kə ndi nə njay wə han,

⁷kə zim məni handay dɛlak wa Zezu kə ndi nə ta'a. Zim rum cu njay wa nji kə zim mo' mar məni handay mo' mar kə ndi nə mi, ama zim rum dɛlak cin kə hay' ceme.

⁸Kəri rum, bə ta zə Zezu məsin, swə məni mbə day vun zra cop nə, ze ta han ta'a. Mum we kwa rum, ɓay mum ve dan rumu.

⁹Kəri rum, sum ta zə Zezu cu mun zu dan 'Derwa Ifray məni in i Zezu də mbə mar nə mɛto'o.

¹⁰Kəki rum, sum ta zə Zezu mə hoɓ kuni faŋ ta so ndaya.

¹¹Mari car wə rəka həre' kə vun zra ɓay ci'i. Kəri məni ta wə ci', ta goɓ kədan ta kar rawti zra,

¹²ta we sum sin Ifray mə wafray hoɓ ge mbraw mə ɓu gay' wə ri məni sôwâ no' mar Zezu wə han, daw suk ga' ri cin wa, ɓay məsin suk ga' ri njay seme.

¹³Handay ci vun sa: «Mə jwə, zə mi həŋ wə ci' su?» Ta dām vun ndaya: «Sôwâ tle Bârî man, ɓay na cu we ri məni handay cin num han nə mi.»

¹⁴Kəki məni ta in dan rum, ta faŋ i ɓay we Zezu car wə han, ama ta cu we i mum Zezu na mi.

¹⁵Zezu ci vun sa: «Mə jwə, zə mi həŋ wə ci' su? Həŋ wə keɓ sa su?» Ta dîk i mum nə bə ji sine, zə rum ta la' ne numu: «Bârî, ha la' kə məni tle num si, a ta' ri məni ha cin num han nə ne nan, ɓay na də um tle.»

¹⁶Zezu la' ne sa: «Mari!» Ta faŋ i ta hay' rum ɓay la' ne num kə vun Hebre: «Rabuni!» Dan rum wa' ini: «Bə ta' kwa».

¹⁷Zezu la' ne sa: «Ŋ dāk nan mi, zə na cu ur də hay' Ba man mɛto'o. Ama əŋ də in ne kə daw ba man i na wə də ur də hay' Ba man məni Ba mi ta', ɓay na də hay' Ifray man məni Ifray mi ta'a.»

¹⁸Zə rum, Mari mə so Magdala 'ya ta hay' sum ta zə Zezu bay la' ne ndaya: «Na we Bârî!» Bay ta in dan daɲ' mənî Zezu in ne sə nə ne ndaya.

¹⁹Fəta pemây kə bel rum, sum ta zə Zezu ba wə rawti so. Handay gay' vun vari zə handay wə ne wəlok sôwâ Zuwif, kəri rum Zezu mbə car du nday bay la' ne ndaya: «Heḅ nə ke kə ri!»

²⁰Kəki mənî mum in dan rum, mum ta' ba rum kə hay' rum ne ndaya. Kəri mənî sum ta zə Zezu we Bârî, handay tuk kədam juku.

²¹Zezu la' ne nday kəreme: «Heḅ nə ke kə ri. Ce' ndə mənî Ba man sin nan, na ta' na wə mi sini.»

²²Kəki dan rum, mum fo' simbed' ta wa nday, bay la' ne ndaya: «I ve Simbed' mə Kəleɲe!

²³Sôwâ mənî hi də vrum kwa mə bro' nday, kwa mə bro' də vrum ta', bay sôwâ mənî hi cu də vrum kwa mə bro' nday mi, kwa mə bro' nday cu də vrum mətə'a.»

²⁴Ama swə daw wə du sum ta zə Zezu mə guḅ wa hoḅ, um də kə Tomas Sôwâ wə um də kə «Nyerwa» cu ke kə nday kəri mənî Zezu ke du nday nə mi.

²⁵Sum ta zə Zezu məsin la' ne numu: «Namba we Bârî.» Ama Tomas dam vun ndaya: «Na la' cu we tan wur mənî sôwâ ke gay' num han kə kwa gay' kwa nə mi si, bay na la' cu cin vayḁa rin ta tan wur nə mi si, bay na la' cu no' ba rin ta mbir mə hay' rum nə mi si, na cu də ve dan rum mi.»

²⁶Kəki rum bəka coho', sum ta zə Zezu ba wə rawti so nə kərem, bay Tomas kəta' kə ndaya. Handay gay' vun vari, ama Zezu mbə car du nday bay ini: «Heḅ nə ke kə ri.»

²⁷Mum faɲ la' ne kə Tomas: «A sa vayḁa ru mbə ti, bay a kar ba rini. A sa ba ru no' mbə hay' rin, a ar way dan si, bay a ve.»

²⁸Tomas dam vun rumu: «Bârî man bay Ifray mana!»

²⁹Zezu ci vun rumu: «Ha ve nan zə ha we nan su? Kədam zə sôwâ mənî ve nan dan man we.»

³⁰Zezu gi yew məsin juk wə kor sum ta zə rum mənî dan rum cu wây' wə dərwa mənî nə mi.

³¹Ama dan mənî wây' wə han nə wây' kədan hi ve i Zezu nə Kris, Vay Ifray, bay kəri mənî hi ve dan rum, hi də ke kə nyî zə semde rumu.

Jean 21

¹Kəki rum, Zezu ta' tu rum ne kə sum ta zə rum kərem wə vun ya mbi Tiberiyadə. Kwa rum gi ndəni na'a:

²Simon Piyer kə Tomas sôwâ wə um də kə «Nyerwa» bay Nataniyel swə mənî car mbə so Kana nya Galile kə daw Zebede bay sum ta zə Zezu məsin hoḅ ba kuni hana.

- ³Simon̄ Piyeṛ la' ne ndaya: «Na dɔ lam mbi.» Handay dɔm vun rumu: «Namba dɔ kɔ ru ta'a.» Zɔ rum, handay 'ya ɓay ur ta rawti da, handay lam mbi kɔ dukri rum hɔ bɔka, ama handay cu fe kwa mɔsin mi.
- ⁴Kɔri mɔni fɔta wɔ dam zu, Zezu mbɔ car vun dapa ya mbi, ama sum ta zɔ rum cu we i mum Zezu na mi.
- ⁵Kɔri rum, Zezu ci vun ndaya: «Daw jid' kwa, hi fe keve si su?» Handay dɔm vun rumu: «Cu mi.»
- ⁶Mum la' ne ndaya: «I dɔ ziw dɔ ga' ɓa fun hay' da, ɓay hi dɔ za' keve hana.» Zɔ rum, handay dɔ ziw, ɓay handay tum keve dle tu si hɔ handay cu gak dlam ziw rum mbɔ rawti da mi.
- ⁷Bɔ ta zɔ Zezu mɔni Zezu bɔ nɔ la' ne kɔ Piyeṛ: «Bârî na!» Kɔri mɔni Simon̄ Piyeṛ mun i Bârî, mum ge mbraw zɔ mum ke kɔ tu uray ɓay mum dam ta du mbi.
- ⁸Sum ta zɔ Zezu mɔsin faɗ mbɔ day vun dapa kɔ da. Handay dlam ziw mɔni nyen kɔ keve na. Handay ke seɗ kɔ vun dapa i sa sem kisi.
- ⁹Kɔri mɔni handay dam ta nya, handay we ku nyen wɔ han kɔ keve njay wa rum kɔ vun tlɔpe' fun.
- ¹⁰Zezu la' ne ndaya: «I da' keve mɔsin wɔ du keve mɔni hi ke tum nɔ mbɔ kɔ ndi.»
- ¹¹Simon̄ Piyeṛ ur ta rawti da, ɓay mum dlam ziw mɔni nyen kɔ keve mɔ rôwâ nɔ mbɔ nya kɔ ndi. Handay in keve rum ɓay za' kis kɔ guvatl wa hinji'i. Bay kɔ ndi nɔ daɗ', ziw nɔ cu ŋgâr mi.
- ¹²Zezu la' ne nday: «I mbɔ ti ye.» Ko swɔ dɔw wɔ du sum ta zɔ rum cu gak ci vun rumu: «Ha sa su mi?» Zɔ handay we si: Mum nɔ Bârî na.
- ¹³Zezu jik ta hay' ku. Mum tle vun tlɔpe' fun ɓay ne nday, ɓay ndɔna' ta' mum ne nday keve.
- ¹⁴Mum nɔ sem hinji' rum mɔni Zezu ta' tu rum ne kɔ sum ta zɔ rum daka ri mɔni Ifray par num mbɔ mara.
- ¹⁵Kɔki mɔni handay ti kwati, Zezu ci vun Piyeṛ: «Simon̄, vay Zaɗ, ha wɔ man bɔ pɔ mɔni sôwâ mɔni kuni wɔ man bɔ nɔ si su?» Mum dɔm vun rumu: «Awo, Bârî, ha we si na wɔ wû ba.» Zezu la' ne numu: «A ur daw cime mana.»
- ¹⁶Mum faɗ ci vun rum sem hoɓ rumu: «Simon̄, vay Zaɗ, ha bɔ nan si su?» Mum dɔm vun rumu: «Awo, Bârî, ha we si na wɔ wû ba.» Zezu la' ne numu: «A ji cime mana.»
- ¹⁷Mum faɗ ci vun rum sem hinji' rumu: «Simon̄, vay Zaɗ, ha bɔ nan si su?» Piyeṛ faɗ dɩk dan juk zɔ Zezu ci vun rum sem hinji'i: «Ha wɔ man bɔ su?» Bay mum dɔm vun rumu: «Bârî, ha we kwa daɗ', ha we si na wɔ wû ba!» Zezu la' ne numu: «A ur cime mana.

¹⁸Kəzin', kəri məni ha vay jid' ɓo, ha ge mbraw kə tu ru, ɓay ha gaŋ wə ri daŋ' məni ha wə wa'a. Ama kəri məni ha də faŋ kəsa', ha də hom ɓa ɓay də ar tu ru ne kə swə məsin kədan mum ge mbraw wû ne, ɓay mum də kə ru wə ri məni ha cu wa' də han mi."

¹⁹Kə dan rum, Zezu ta' mar məni Piyer wə də mar, ɓay də gi mbra' ne kə Ifraya. Kəki rum, Zezu la' ne numu: «A ta zə rini."

²⁰Piyer faŋ i ɓay we bə ta zə Zezu məni Zezu bə nə kəki nday, mum nə swə məni gun vun ta hay' Zezu kəri məni handay ke ti kwati, ɓay ci vun rumu: «Bârî, sa nə swə məni wə də wû ar də ɓa sôwâ nə su?"

²¹Kəri məni Piyer we num, mum ci vun Zezu: «Bârî, mi nə də gi wa swə məni nə su?"

²²Zezu dām vun rumu: «Na la' wa' i nə ke kə i hâ na də faŋ gewa si, dan rum tap nu ma su? Mə ha, a ta zə rini."

²³Zə rum, dan rum pla' ndap wə du sôwâ məni wə ta zə Zezu i bə ta zə Zezu nə cu də mar mi. Ama Zezu cu in ne kə Piyer i mum cu də mar mi mi, ama mum in ne numu: «Na la' wa' i nə ke kə i hâ na də faŋ gewa si, dan rum tap nu ma su?"

²⁴Bə ta zə Zezu məni nə, mum kə məni in dan wa kwa rum, ɓay wây' dan rum wə dərwa, ɓay namba we si dan məni mum in nə kəzini.

²⁵Zezu gi sin məsin juku: Sôwâ la' wây' dan sin rum kə buwa kə buwa daŋ' si, na dîk i wa nya kə mbri rum daŋ', ri njay dərwa rum cu gak ke han mi.

Sin Daw Sini

Sin Daw Sini 1

- ¹Teyofil, wə du ɗerwa man mə vun kofo, na wây' dan kwa ɗaŋ' mənɪ Zezu gi ɓay ta' daka təŋ zu sin um,
- ²hâ day bəka mənɪ Ifray tle num ta wafraya. Kəri mənɪ Ifray cu tle num ta wafray mətɔ', mum ta' kwa kə gbəgbɔŋ Simbed' mə Kələŋ ne kə sum sin mənɪ mum da' ndaya.
- ³Kəki mar um, mum ta' tu rum ne nday kə vari cem cem kədan handay we i mum kəta' kə i kəki boni mənɪ mum ce. Wə du bəka gufədi', mum mbə du nday ɓay in dan wa dan vari mənɪ Ifray wə də suk jwə wa sôwâ um ne ndaya.
- ⁴Fəta məsin, kəri mənɪ mum ɓa ri mə ɗaw kə nday, mum in dan mənɪ nə ne ndaya: «I ar so Jeruzalem mi, ama i ji kwa mənɪ Ba man kawvun wa rum kədan mum mi ne, kwane mənɪ na in dan wa rum ne ni ɓa' si.
- ⁵Zə Zaŋ gi baptem ne kə sôwâ kə mbi, ama kofo bəka cep, hi də fe baptem kə Simbed' mə Kələŋe.”
- ⁶Kəri mənɪ sum sin ɓa kə Zezu, handay ci vun rumu: «Bârî, ha də ne gbəgbɔŋ jwə ne kə sôwâ Israyel mgbaŋ ni kərem su?”
- ⁷Zezu ɗam vun ndaya: «Cu tap ni kədan hi we ri mənɪ wə də mbə, ko bəka rum mi, zə Ba man kə mənɪ par bəka rum kə gbəgbɔŋ umu.
- ⁸Ama hi də fe gbəgbɔŋ kəri mənɪ Simbed' mə Kələŋ də dam mbə wa ri, ɓay hi də faŋ sum in njeŋ dan wa rin wə so Jeruzalem, kə nya Zude kə Samari, ɓay hâ vun ndo' nya.”
- ⁹Kəki mənɪ Zezu in dan rum, mum ur ta wafray, kəri mənɪ handay wə um kar, dləmbur mbə kəmbo' num i ndaya.
- ¹⁰Kəri mənɪ handay wə kar ri də wafray wə ri mənɪ Zezu pā han, kəkor sar, sôwâ hɔb ge mbraw mə ɓu mbə gay' hərə' kə nday
- ¹¹ɓay ci vun ndaya: «Hi sôwâ nya Galile, zə mi hi gay' kar ri də wafray su? Zezu, mənɪ ur ta wafray, mum də faŋ gewa mbə ce' ndə mənɪ hi we num 'ya də wafray ta'a.”
- ¹²Kəri rum, sum sin dam mbə wa igway' mə ɗe kə "igway' gu olivə" wə han juk, ɓay handay faŋ ta so Jeruzalem. Ri rum seŋ i ta mə fəta pemâya.
- ¹³Kəri mənɪ handay mbə day so Jeruzalem, handay ur cok ta rawti tak i so mə fray, wə ri mənɪ handay wə gay' han ɓa'a. Sôwâ rum ni na: Piyer, Zaŋ, Zakə, Andre, Filip, Tomas, Bartelemi, Matiye, Zakə mə vay Alfe, Simoŋ, swə mə nyen peɗ' kə sây' zə nya um, kə Zudə mə vay Zakə.
- ¹⁴Handay ɗaŋ' wə ɓa ri mə ɗaw bəka ɗaŋ' kədan handay in dan kə Ifray wanji kə Mari mə ya Zezu, kə rawkwa məsin ɓay daw ya Zezu ɓa kuni han ta'a.

¹⁵Fəta məsin, kəri məni sôwâ məni ve Kris ba wə han, raw nday ke i kis kə guhoḅ, Piyer car fray du nday bay la' ne ndaya:

¹⁶«Daw ba man, say dan məni Simbed' mə Kələṇ pla' David kədan mum wây' cop wə du dərwa um wa Yudas, swə məni ta' vari ne kə sôwâ məni kaw Zezu nə gi.

¹⁷Zudas ke du mba bay gi sin kə mba ta'a.»

¹⁸Zudas coḅ sine kə səlay məni mum fe zə sin mə bro' məni mum gi. Mum faṇ nde kap wa ta nya du sine rumu. Rawti rum kə daw rawti njul' ta rəka.

¹⁹Sôwâ məni gay' wə so Jeruzalem daṇ' mun dan kwa məni gi. Zə rum, handay dē sine rum kə vun nday «Hakeldama», məni wa' dan in kə vun mba «sine vəswa».

²⁰Zə David wây' dan məni nə wə du dərwa Nyeme: So um nə də faṇ vri, swə dāw nə suk han mi. Bay mum wây' wə ri məsini: Swə məsin nə faṇ bə ji zə sin umu.

²¹⁻²²«Zə rum, say swə məsin nə ba kə mba ce' ndə swə mə in njeṇ dan wa pâ mbə mar Zezu. Say bə rum nə ke swə dāw mə du sôwâ məni ke gaṇ kə mba kə ri daṇ' məni Bârî Zezu ke gaṇ wa nya kə mba, daka kəri məni Zaṇ gi baptem wa rum, hâ day bəka məni Ifray tle num du mba ta wafraya.»

²³Zə rum, handay ra' sôwâ hoḅ njaya: Zozef mə dē kə Barsabas. Sôwâ um dē kə Zustus ta', bay Matiyas.

²⁴Handay faṇ in dan kə Ifray kə dan məni na: «Bârî, ha we vunduk sôwâ daṇ', a ta' swə məni ha par wə du sôwâ mə hoḅ mə ni kuni

²⁵kədan mum suk tan Yudas ce' ndə vay sin ne mba, zə Yudas ar sin rum bay mum ta ri mə mumu.»

²⁶Handay faṇ pe za du nday kədan handay par swə dāw, handay par za Matiyas bay handay faṇ in num ta du sum sin mə guḅ wa dāwa.

Sin Daw Sini 2

¹Kəri məni bəka Paṇtekotə mbə həre', sôwâ məni ve Kris daṇ' ba wə ri mə dāwa.

²Kəkor sar, tlər kwa car mbə wafray ce' ndə simbed' məni wə sa' kə gbəgbəṇjo: Tlər rum mbə nyen rawti so məni handay gay' wə han biti.

³Kəri rum, handay we kwa ce' ndə se'le ku məni bul bay suk ta wa nday dāw dāw daṇ'ṇ.

⁴Simbed' mə Kələṇ mbə nyen vunduk nday daṇ' bay handay təṇ kə ge vun cem cem ce' ndə məni Simbed' mə Kələṇ ne vari rum ne nday kədan ge dan rumu.

⁵Sôwâ Zuwif məni wə ô Ifray car wə nya cem cem daṇ' mbə gay' so Jeruzalem.

⁶Kəri məni handay mun tlər kwa rum, raw sôwâ ba nji wə ri mə dāwa. Swə dāw dāw daṇ' du nday mun sôwâ məni ve Kris wə ge dan ne kə sôwâ kə vun nya məni handay car mbə han, bay kwa rum jin' wa ne ndaya.

⁷Kwa rum jin' wa ne kə sôwâ daŋ' mənɪ gay' wə han, ɓay handay in kə nji mbok nji: «Sôwâ mənɪ kuni, handay cu sôwâ nya Galile daŋ' mi su?

⁸La' ndəna' si, gi ma swə dāw dāw daŋ' du mba wə mun handay wə ge dan kə vun nya mənɪ namba vra' han nə su?

⁹Wə du mba, sôwâ məsin car mbə nya Partes, Medi, Elam, Mezopotami, Zude, Kapados, Pontes, Azi,

¹⁰Frizi, Pamfili, Egip, kə nya Libi mənɪ hərə' kə so Sirenə. ʔay sôwâ məsin du mba car mbə so Romə.

¹¹Sôwâ məsin du mba vra' Zuwif, ɓay sôwâ məsin du mba mənɪ cu zə saŋ sôwâ Zuwif mi, faŋ wə ta zə vun fur sôwâ Zuwif. Sôwâ məsin du mba car mbə nya rəkway mə du mbi mə dɛ kə Kretə, ɓay nya Arabi. Ama kə ndi nə daŋ', namba wə mun handay wə in dan sin Ifray mə mbri kə vun nya cem cem mənɪ namba car mbə hana.”

¹²Kwa rum jin' wa ne nday daŋ', hâ handay cu we i handay dɪk ma su mi, handay ci vun mbok nji: «Kwa mənɪ nə wa' ta' mi su?”

¹³Ama sôwâ məsin du nday mây sôwâ mənɪ ve Kris kə ini: «Handay gal kə sumu!”

¹⁴Kəri rum Piyer car fray kə sum sin mə guɓ wa dāwa. Mum təŋ kə ka' dan ne kə raw sôwâ: «Hi sôwâ Zuwif kə sôwâ mənɪ gay' wə so Jeruzalem daŋ', i mun dan mənɪ nə, ɓay i pe hum dan mənɪ na wə dɛ in mi ne nə kə ɓayrumu!

¹⁵Sôwâ mənɪ kuni cu gal kə sum ce' ndə mənɪ hi wə dɪk nə mi, zə mgbaŋ ni nə fəta bəka ɓo.”

¹⁶Ama dan mənɪ bə ka' dan mə dɛ kə Juwel ke ka' nə ni wə gi mgbaŋ ni na:

¹⁷Ifray ini: Kwa mənɪ kuni wə dɛ gi kə ndo' vun bəka rumu: Na dɛ sin Simbed' man wa sôwâ daŋ', daw mi mə njiwkwa kə mə rawkwa dɛ ka' dana. Daw barway mi dɛ we kwa, ɓay kəsa' mi dɛ məsini.

¹⁸Kə bəka rum, na dɛ sin Simbed' man wa sum sin man mə njiwkwa kə mə rawkwa, ɓay handay dɛ ka' dana.

¹⁹Na dɛ gi kwa cem cem mə jin' wa sôwâ mə fray wafray, ɓay yew cem cem wa nya, cop bəka Bârî mə mbri kə mbra' dɛ mbə, vəswə, kə ku, ɓay dɛwku dɛ mba.

²⁰Fəta dɛ faŋ ura', ɓay cer dɛ faŋ mə tlew ce' ndə vəswə, cop kədan bəka Bârî mə kə mbra' mba.

²¹Kəri rum, ko sa su daŋ' mənɪ dɛ sem Bârî, bə rum dɛ sidi.

²²«Hi sôwâ Israyel, i pe hum dan mənɪ na wə dɛ mi in ne: Zezu mə so Nazaret mum nə swə mənɪ Ifray ta' gbəgboŋ um ne ni kə rum, zə Ifray gi yew cem cem kə kwa cem cem mə jin' wa sôwâ, ɓay kwa cem cem mə ta' kwa kə rum du ri, ce' ndə mənɪ hi we kə tu ri,

- ²³wə du bə Ifray kə kwawe um, mum gila' vari cop kədan mum ar Zezu də ɓa ri, hi ci num kəri məni hi ar sum kwa mə bro' gay' num ta wa gu.
- ²⁴Ama Ifray par num mbə mar, mum ulay' num mbə du boni mar, zə mar cu kə vari kədan mum suk kə gbəgboŋ wa rum za' mi.”
- ²⁵Zə rum, David in dan məni kuni wa rumu: Na wə we Bârî kor rin bəka daŋ', mum kəta' wə ɓa fun rin kədan na ne wəlok mi.
- ²⁶Zə rum, vunduk rin ke tuk kəɗam, ɓay se'le rin ke ge yi kə tuk kəɗama. Bay ko kə tətâ tu rin məni na kə ndi, na də suk pemây wə ri rum zə na gak cin vunduk rin wa rumu.
- ²⁷Zə ha cu də ar nyî rin wə ri məni sum mar wə han nə mi. Ha cu də ar tu swə mə ɓay wû cim mi.
- ²⁸Ha ta' vari mə də ri mə fe nyî mə də hâ ne nana. Kəri məni na də we vuk wû, na də tuk kəɗam juku.
- ²⁹«Daw ba man, na kə vari kədan na in dan wa ba mbi mba, David, təlak mi ne: Mum mar, sôwâ mo' num ɓay 'wəy um kəta' tam wə du mba.
- ³⁰Ama mum ke bə ka' dan, ɓay mum we i Ifray kawvun kə rum kə sur vun kədan swə ɗaw du daw rawti rum wə də suk jwə tan umu.”
- ³¹David we kwa məni Ifray wə də gi kofo, ɓay zə rum mum in dan wa pâ mbə mar Kris kəri məni mum ini: Ifray cu də um ar wə ri məni sum mar wə han nə mi, ɓay mum cu ar tu rum cim mi.
- ³²Ifray par Zezu məni na in dan wa rum nə mbə mar, ɓay namba daŋ' sum we njeŋ dan rumu.
- ³³Ifray tle num ta cin ɓa fun rum, ɓay mum ne Simbed' mə Kəleŋ məni mum kaw car mbə hay' Ba um, ɓay Zezu sin num mbə wa mba. Kwa rum ni hi wə we ɓay hi wə mun mgbaŋ ni na.
- ³⁴Zə David kə tu rum cu ur ta wafray mi, ama mum ini: Bârî la' ne kə Bârî mana: A suk ɓa fun rin,
- ³⁵hâ na də njay sum sî ru zə sem ru, ce' ndə kwa njay seme.
- ³⁶«Zə rum, say sôwâ Israyel daŋ' kuni we njeŋe: Zezu məni hi gay' ta wa gu, mum nə swə məni Ifray cin num Bârî kə Kris!”
- ³⁷Kəri məni handay mun dan məni nə, vunduk par ndaya. Handay ci vun Piyer kə sum sin məsini: «Daw ba mba, namba də gi ma su?”
- ³⁸Piyer ɗam vun ndaya: «I faŋ vunduk ri: Bay swə ɗaw ɗaw daŋ' du ri nə ve baptem kə semɗe Zezu Kris kədan Ifray vrum kwa mə bro' mi, ndəna' hi də fe kwane Simbed' Kəleŋe.

³⁹Zə Ifray kawvun wa rum kə ri kə daw mi, bay kə sôwâ daŋ' mənɪ gay' wə nya mə seŋ, sôwâ daŋ' mənɪ Bârî Ifray mba də nday dē.”

⁴⁰Piyer in dan məsin cem cem juk ne nday kədan mum nday har kə ini: «I sid' tu ri kə bul nji kə sôwâ mə bro' mənɪ kuna!”

⁴¹Sôwâ juk du nday ve dan Piyer bay fe baptem, fəta rum, raw sôwâ i mbu hinji' mbə ɓa kə kul sôwâ mənɪ ve Kris.

⁴²Handay wə pe hum zə kwata' mənɪ sum sin wə ta' nə kə bayrumu. Handay wə ɓa nji kə daw ba nday kə ba. Handay daŋ' wə ti kwati wə ri mə daw bay wə in dan kə Ifray ta'a.

⁴³Ifray gi yew cem cem kə kwa cem cem mə jin' wa sôwâ juk kə ɓa sum sini. Kwa rum gi wəlok ne kə sôwâ daŋ'ŋ.

⁴⁴Sôwâ daŋ' mənɪ ve Kris ɓawa wə ri mə daw, bay handay ɓawa kwa daŋ' mənɪ handay kə ndi wanji dawa.

⁴⁵Handay coɓ kwa kə sine nday kə kwa mənɪ wə ɓa nday, kədan handay bul səlay rum mbok nji. Swə daw daw daŋ' fe i mē' umu.

⁴⁶Bəka daŋ', handay wə ɓa də so po' fur sôwâ Zuwif. Handay wə ɓa ti kwati ri mə daw so nday, bay handay wə ti kwati nday kə tuk kədam kə vunduk mə dawa.

⁴⁷Handay wə bur Ifray bay wə bə sôwâ daŋ'ŋ. Bəka daŋ', Bârî wə dlər kul sôwâ Kris də kofo kə sôwâ mənɪ fe sidi.

Sin Daw Sini 3

¹Fəta məsin, kə fəta riya, Piyer kə Zaŋ wə də so po' fur sôwâ Zuwif kədan handay in dan kə Ifray wə hana.

²Hərə' kə vun vari so po' fur rum mə dē kə «Vun Vari mə 'Bay», swə məsin kəta' suk han, mum hurbu daka vra' um, bəka daŋ', sôwâ wə um tle cin han kədan mum o səlay ɓa sôwâ mənɪ wə ze də rawti so po' fur rumu.

³Mum we Piyer kə Zaŋ mənɪ wə cok kuni də rawti so po' fur rum, bay mum o kwa ɓa ndaya.

⁴Piyer kə Zaŋ njay i ta wa rum, bay Piyer la' ne numu: «A kar mba ri'i!”

⁵Swə nə kar nday kə bayrum, zə mum dɪk i mum wə də fe kwa ɓa ndaya.

⁶Piyer la' ne numu: «Na cu kə səlay mi, ama kwa mənɪ na kə ndi, na wû ne: Kə semdē Zezu Kris mə so Nazaret, a ta ye!”

⁷Piyer faŋ tle ɓa fun rum bay kaw num car fraya. Kəkor sar, sem hurbu nə kə gol sem rum faŋ gbəgboŋo.

⁸Mum dam ta fraya. Mum car kə sem bay mum təŋ kə ta. Mum ze ta rawti so po' fur kə sum sin kuni kə ta, kə dam, bay bur Ifraya.

- ⁹Raw sôwâ daŋ' we num wə ta kə bur Ifraya.
- ¹⁰Kəri mənɪ handay we i mum nə swə mənɪ ke suk wə Vun Vari mə 'Bay so po' fur rum kə o kwa, wəlok gi nday ɓay kwa rum jin' wa ne nday daŋ'ŋ.
- ¹¹Zə swə nə cu ar Piyer kə Zaŋ mi, sôwâ daŋ' mənɪ kwa rum jin' wa ne nday, handay ne ta hay' nday wə zə daŋki mə dɛ kə «Daŋki Salomoŋ».
- ¹²Kəri mənɪ Piyer we ndəna', mum la' ne ndaya: Hi sôwâ Israyel, zə mi kwa rum jin' wa ne ni su? Zə mi hi wə mba kar ce' ndə mənɪ namba gi swə nə car ta kə gbəgbəŋ tu mba ko zə namba ɓa kə Ifray su?
- ¹³«Ifray mə Abraham, mə Isak, ɓay mə Yakub, Ifray ba mbri ramba kə mənɪ ne mbra' ne kə bə sin um, Zezu mənɪ hi kə tu ri hi ar num ta ɓa sôwâ rôwâ, ɓay hi vad' num kor Pilatə, ko kəri mənɪ mum wə wa' kədan mum um ulaya.
- ¹⁴Hi vad' swə mənɪ Kələŋ ɓay njeŋ, ɓay hi o Pilatə kədan nə ulay' bə ci mar mi ne zawa.
- ¹⁵Ndəna' hi ci swə mənɪ wə ta' vari nyî. Ama Ifray par num mbə mar, ɓay namba sum we njeŋ dan rumu.
- ¹⁶Hurbu mənɪ hi wə um we ɓay kar nə, kə gbəgbəŋ semdɛ Zezu, mum faŋ ŋgam ŋgam ce' ndə mənɪ hi daŋ' we kə i ri zə mum ve Zezu.
- ¹⁷Daw ba man, mgbaŋ ni nə na we si, kwa mənɪ hi kə sôwâ rôwâ mi gi kə Zezu, hi gi dan we rumu.
- ¹⁸Ama ndəna' Ifray gi kwa mənɪ mum ka' dan rum cop kə vun sum ka' dan daŋ'ŋ: Say Mesi um nə də ce boni.
- ¹⁹Zə rum i faŋ vunduk ri, ɓay i mbə hay' Ifray kədan mum vrum kwa mə bro' mi.
- ²⁰Hi la' gi ndəna' si, Bârî wə də sin ri pemây mi ne, ɓay mum də sin Kris mənɪ mum par num cop zə ri nə mi ne ta'a. Mum nə Zezu.
- ²¹Kə mə mgbaŋ ni nə, say Zezu Kris nə suk wafray hâ day ri mənɪ kwa daŋ' də faŋ kə mbrew ce' ndə mənɪ Ifray ka' dan wa rum ɓa' si kə vun sum ka' dan um mə ɓaya.
- ²²Zə Moyizə ini: Bârî, Ifray mi, də sin bə ka' dan ce' ndə na mi ne. Mum də ke zə saŋ mi, say hi də mun dan daŋ' mənɪ mum də in mi ne.
- ²³Ko sa su daŋ' mənɪ cu də mun vun bə ka' dan rum mi, Ifray də um 'way wə du sôwâ um də rəka ɓay də um ci.
- ²⁴'Bay sum ka' dan daŋ', təŋ kə Samiyel ka' dan wa bəka mənɪ kuna.
- ²⁵Dan kawvun mənɪ Ifray gi kə vun sum ka' dan kuni wə zə ri, ɓay hi kəta' kə kwafe wə du kawvun mənɪ Ifray kaw kə ba mbri rami, kəri mənɪ mum in ne kə Abraham: Na də kuswa' sôwâ nya daŋ' kə daw rawti ru.
- ²⁶Zə rum Ifray par Bə sin um, ɓay mum sin num hay' ri copo. Mum gi ndəna' kədan mum kuswa' swə dāw dāw daŋ' du ri ɓay um gi ar sin mə bro' umu.»

Sin Daw Sini 4

- ¹Kəri məni Piyer kə Zaŋ wə in dan ne kə sôwâ 6o, sum po' fur, kə toŋ sum ji vun so po' fur sôwâ Zuwif, 6ay kul sôwâ Zuwif mə də kə Sadusiyen mbə daya.
- ²Handay ra' bak kə sum sin mə ho6 kuni, zə handay wə ta' ne kə sôwâ i Ifray par Zezu mbə mar, wa' dan in i Ifray də ra' sôwâ məni mar kədan handay ke kə i.
- ³Zə rum, handay ra' nday 6ay cok nday ta so daŋgay' hâ bəka, zə fəta so' si.
- ⁴Ama sôwâ juk wə du sôwâ məni mun dan ta' Piyer ve dan rum, 6ay raw sôwâ məni ve Kris dlər ta kofo i mbu vatla.
- ⁵Siw rum, sum rôwâ mə du sum po' fur kə sum rôwâ mə du sôwâ Zuwif, 6ay sum pay zu dan dlay 6a kuni wə so Jeruzalem.
- ⁶Handay 6a kə toŋ po' fur mə də kə Hana kə Kayif, 6ay Zaŋ kə Alezaŋdrə, 6ay raw sôwâ məsin məni zə bray toŋ po' furu.
- ⁷Handay ra' sum sin kuni mbə kor nday kə nday 6ay handay ci vun ndaya: «Kə gbəgboŋ sa, ko kə semdə sa, hi gi kwa məni nə su?»
- ⁸Piye, məni Simbed' mə Kələŋ nyen vunduk rum, ɖam vun sum rôwâ kuna:
- ⁹«Hi sum rôwâ mə du sum po' fur kə sum rôwâ mə du sôwâ Zuwif, sôwâ wə mba cik kə ci vun mba tam wa sin mə 6ay məni gi wa hurbu, 6ay ci vun mba i hurbu nə car mə ma su na?»
- ¹⁰Say hi daŋ', i we 6ay sôwâ Israyel kuni we ta', swə məni nə car wə kor ri faŋ ŋgam ŋgam zə gbəgboŋ semdə Zezu Kris mə so Nazaret, məni hi gay' ta wa gu, 6ay Ifray par num mbə mara.
- ¹¹Zezu swə məni 'Derwa Ifray wə in dan wa rumu: Gway' məni hi, sum ɖam so ar ge ta rəka, gway' rum faŋ gway' mə cin dleŋ so.
- ¹²Swə za' sid' kə rum taw, zə wə wa nya daŋ', Ifray cu ne semdə swə məsin ne mba kədan namba gak sid' kə ndi mi.»
- ¹³Kəri məni sum rôwâ Fada mə Mbri we i Piyer kə Zaŋ wə in dan tələk, 6ay handay sôwâ mə uray məni cu gi lekol mi, kwa rum jin' wa ne ndaya. Kəri rum, handay mun i handay ke ta zə Zezu
- ¹⁴ama handay we hurbu məni faŋ ŋgam ŋgam nə ca hay' nday, 6ay handay cu gak in dan məsin za' mi.
- ¹⁵Zə rum, handay ne vari ne nday kədan kuni wur wə ri 6a sum rôwâ Fada də rəka, 6ay handay faŋ təŋ kə ge dan kə nji mbok nji.
- ¹⁶Handay ci vun nji mbok nji: «Namba də gi mi kə sôwâ məni kuni su? Zə sôwâ daŋ' məni gay' wə so Jeruzalem we si njeŋe: Handay kə məni gi yew mə mbri rum, 6ay namba cu gak riway wa dan rum za' mi.

- ¹⁷Ama kədan dan rum nə pla' də kofo wə du sôwâ mi, mə tak nday kə gbəgbon̄ kədan kuni ar in dan ne kə ko sa su kə semdê Zezu si.”
- ¹⁸Kəri rum, handay dē nday kərem, bay handay dlay nday kədan kuni ar in dan ko ta' kwa kə semdê Zezu nə si cete.
- ¹⁹Ama Piyer kə Zaŋ dām vun ndaya: «I kənji' kə tu ri la' bay kor Ifray kədan namba mun vun ri pâ mun vun Ifray si na!
- ²⁰Ama mə namba, namba cu gak ar in dan wa kwa mēni namba we bay mun nə mi.”
- ²¹Sum rôwâ Fada mə Mbri dlay nday kə gbəgbon̄ kərem, bay faŋ ar vari ne ndaya. Handay cu za' dan mēni handay gak bok dan wa nday kə ndi nə mi, zə sôwâ daŋ' wə gi mbra' ne kə Ifray wa kwa mēni mbə gi.
- ²²Swə mēni faŋ ŋgam ŋgam zə yew mēni handay gi wa rum, mum gi kim pâ gu fədi' si.
- ²³Kəri mēni handay ar vari ne nday, Piyer kə Zaŋ faŋ ta hay' sôwâ nday, bay in dan daŋ' mēni sum rôwâ mə du sum po' fur kə sum rôwâ mə du sôwâ Zuwif in kuni nə ne ndaya.
- ²⁴Kəri mēni handay mun dan rum, sôwâ mēni ve Kris dle kə in dan kə Ifray kə vunduk mə dāwa. Handay ini: «Bârî, ha kə mēni gi wafray, nya, bay ya mbi kə kwa daŋ' mēni wə hana.
- ²⁵Kə gbəgbon̄ Simbed' mə Kələŋ, ha ne dan mēni kuni ne kə ba mbi mba David, bə sin wû, kəri mēni mum ci vunu: Zə mi sôwâ mēni cu zə saŋ sôwâ Zuwif mi ra' bak su? Zə mi sôwâ wə ta zə dan mə uray su?
- ²⁶Sum jwə nya wə gila' tu nday zə zi, bay sum rôwâ wə kawvun wa Bârî, bay wa Jwə umu.
- ²⁷Zə dan rum njeŋ, Herodə kə Poŋsə Pilatə ba kə sôwâ mēni cu zə saŋ sôwâ Zuwif mi kə sôwâ Israyel wə so mēni na. Handay kawvun wa Zezu, bə sin wû mə bay mēni ha par num ce' ndə Kris.
- ²⁸Kwa daŋ' mēni ha wa' ba' si, du gbəgbon̄ wû kə bə wû nə ni handay gi na.
- ²⁹Ama mgbaŋ ni nə, Bârî, a kar dan mə bro' nday, bay a ne vari ne kə sum sin wû kədan handay ka' dan wû dan wəloko.
- ³⁰A ta' gbəgbon̄ wû kədan namba gi kwa cem cem mə jin' wa sôwâ kə yew cem cem kə semdê Zezu, bə sin wû mə baya.”
- ³¹Kəri mēni handay ndo' in dan kə Ifray si, ri mēni handay gay' wə han nə par nyene: Simbed' mə Kələŋ mbə nyen vunduk nday daŋ' bay handay təŋ kə ka' dan Ifray dan wəloko.
- ³²Kul sôwâ mēni ve Kris, handay kə vunduk mə dāw bay kə dan dīk mə dāw, swə dāw du nday cu in i kwa mēni wə ba rum nə mə mum taw sar mi, ama kwa daŋ' mēni wə ba nday, kwa rum zə nday daŋ'ŋ.

³³Daw sin in njeŋ wa dan pâ mbə mar Bârî Zezu kə gbəgbəŋ bayrum, bay Ifray kuswa' nday juku.

³⁴Bə ca cu du nday kpe mi: Zawa, sôwâ daŋ' mənî kə sine ko kə so, handay coḅ kwa kə ndi, bay handay mbə kə səlay rum

³⁵ne kə sum sini. Daw sin faŋ bul səlay rum ne kə swə daw daw daŋ' i mē' umu.

³⁶Ce' ndə swə zə saŋ Levi mə də kə Zozef mənî vra' wə nya Siprə mənî suk wə du mbi. Daw sin wə um də kə Barsabas mənî wa' dan ini: "Swə mənî wə jeŋ vunduk sôwâ."

³⁷Mum coḅ kwa kə sine um, bay mum mbə kə səlay rum ne kə sum sini.

Sin Daw Sini 5

¹Ama swə məsin kəta' mə də kə Ananiyas, ma rum də kə Safira, mum coḅ kwa kə sine ndaya.

²Mum ŋge səlay mbə han wə du səlay rum cin zə tu rum, mum faŋ ta kə kam rum ne kə sum sini. Mum kawvun kə ma rum wa dan rumu.

³Piyer ci vun rumu: «Ananiyas, zə mi ha ar Satan ve vunduk ru kədan mum wû gi hay dan kor Simbed' mə Kələŋ kə ŋge səlay wə du səlay mənî ha gi coḅ sine wû fe ndi bay cin zə tu ru su?

⁴Cop kəri mənî ha cu coḅ kwa kə sine rum mətə', sine rum mə ha, bay kəki mənî ha coḅ kwa kə ndi, səlay rum mə ha ta', cu ndəna' mə su? Zə mi ha faŋ dik wə vunduk ru kədan ha gi kwa mənî nə su? Ha cu hay dan kor sumra' mi, ama kor Ifraya."

⁵Kəri mənî Ananiyas mun dan rum, mum nde ta nya bay mara. Bay wəlok gi sôwâ daŋ' mənî mun dan rumu.

⁶Daw barway mbə ku' mar rum kə zim bay tle ta mo' rəka.

⁷Kəki rum ler hinji', ma Ananiyas mbə ze rawti so rum, ta cu we kwa mənî gi nə mi.

⁸Piyer ci vun sa: «Ōŋ in ne nan ri', səlay mənî hi tle sine mi gi coḅ nə daŋ' rum nə ni nə su?» Ta dām vun rumu: «Awo, daŋ' rum ni na!"

⁹Zə rum, Piyer ci vun sa: «zə mi həŋ kawvun kə nji maŋ kədan hi kənji' Simbed' Bârî su? Ōŋ kar ri'i: Sôwâ mənî ke mo' nji maŋ kəta' wə vun vari, bay handay də maŋ tle də rəka ta'a."

¹⁰Kəri rum sar, ta nde ta nya hay' sem rum bay mara. Daw barway kuni cok ta rawti so bay za' sə mar si bay handay tle mar sə ta rəka bay mo' hay' nji sa.

¹¹Wəlok gi kul sôwâ mənî ve Kris daŋ' kə sôwâ daŋ' mənî mun dan rum juku.

¹²Daw sin gi kwa cem cem mə jin' wa sôwâ kə yew cem cem juk wə du sôwâ. Sôwâ mənî ve Kris daŋ' ba wa zə Daŋki Saloməŋ.

¹³Ko swə daw cu car rəka mbə ze du nday mi, ama sôwâ daŋ' wə nday mbə juku.

- ¹⁴Njiwkwa kə rawkwa juk ve dan Bârî, bay kul sôwâ Kris dlər də kofo kofo.
- ¹⁵Bay sôwâ təŋ kə ra' sum gaḅ də hay' vari kə nday, handay njay nday wa aŋgaw kə la' bar kədan kəri məni Piyer wə də pâ han, njəbo tu rum pâ wa sôwâ məsin du ndaya.
- ¹⁶Raw sôwâ juk məni gay' wə pəḍak so Jeruzalem ra' sum gaḅ kə sôwâ məni kə gam wa ne mbə kə nday, bay handay daŋ' cara.
- ¹⁷Kəri rum, toŋ po' fur kə sôwâ daŋ' məni kə rum, wa' dan ini: Sôwâ məni wə ta zə dan kul sôwâ Zuwif mə ḍe kə Sadusiyen, car kuni sây' wa sum sini. Handay kawvun kədan handay keḅ zu ndaya.
- ¹⁸Handay ra' sum sin i sôwâ daŋ' bay cok nday ta so daŋgay'i.
- ¹⁹Ama kə dukri rum, vay sin Bârî mə wafray mbə ar vun vari so daŋgay', mum ra' sum sin wur ta rəka kə nday bay la' ne ndaya:
- ²⁰«I də gay' wə so po' fur sôwâ Zuwif, bay i ka' dan wa dan vari suk mə mbrew ne kə sôwâ!»
- ²¹Daw sin kuni mun vun rumu. Kə bəka ced, handay 'ya ta so po' fur sôwâ Zuwif bay təŋ kə ta' kwa wə hana. Toŋ po' fur kə sôwâ məni kə rum ḍe sum rôwâ daŋ' mə du sôwâ Zuwif kə sum rôwâ Fada mə Mbri kədan kuni bawa ce' ndə məni daw Israyel wə gi ba'a. Handay faŋ sin soje kuni ta so daŋgay' kədan handay ra' sum sin mbə kə ndaya.
- ²²Ama kəri məni handay ta day so daŋgay', handay cu za' sum sin wə han mi. Handay faŋ ta hay' sum rôwâ Fada mə Mbri bay in ne ndaya:
- ²³«Namba za' vun vari so daŋgay' təta' kə vari rum, bay soje məni wə ji vun vari so rum gay' wə ri ndaya. Ama kəri məni namba ar vun vari so rum, namba cu za' swə ḍaw wə han mi.»
- ²⁴Kəri məni toŋ sum ji vun vari so po' fur sôwâ Zuwif kə sum rôwâ mə du sum po' fur mun kuni dan rum, handay cu we i handay ḍik ma su wa dan wur sum sin kuni za' mi.
- ²⁵Kəri rum, swə məsin car mbə rəka bay la' ne ndaya: «I mun ri', sôwâ məni hi cok nday wə so daŋgay', handay kəta' wə rawti so po' fur sôwâ Zuwif. Handay wə ta' kwa ne kə sôwâ wə hana!»
- ²⁶Zə rum, toŋ ji vun vari so po' fur rum 'ya dle kə sôwâ um ta han bay ra' sum sin mbə kə nday, ama handay cu ra' nday kə gbəgboŋ mi, zə handay wə ne wəlok i sôwâ də nday ge kə gway'i.
- ²⁷Kəki məni handay mbə kə nday, handay njay nday kor sum rôwâ Fada mə Mbri, bay toŋ po' fur ci vun nday kə ini:
- ²⁸«Namba tak ni kə gbəgboŋ kədan i ar ta' kwa ne kə sôwâ kə semḍe swə nə si, bay i kar ri', hi pla' kwata' mi ndap so Jeruzalem daŋ' bay hi wa' cin dan mar um wa mba ta'a!»

²⁹Piyer kə sum sin məsin dām kuni vun ndaya: «Say namba mun vun Ifray pâ mun vun sumra'a.

³⁰Ifray ba mbri ramba par Zezu mēni hi ci num kəri mēni hi gay' num ta wa gu.

³¹Ifray tle num cin wə ɓa fun rum ce' ndə Jwə kə Bə Sid' kədan mum ne vari ne kə sôwâ Israyel kədan handay faɲ vunduk nday, ɓay Ifray vrum kwa mə bro' ndaya.

³²Namba sum we njeɲ kwa rum, namba ɓay Simbed' mə Kələɲ mēni Ifray ne kə sôwâ mēni mun vun rumu."

³³Kəri mēni sum rôwâ Fada mə Mbri mun dan rum, handay ra' bak, ɓay handay wa' kədan handay ci sum sini.

³⁴Ama swə dāw mə du kul sôwâ Zuwif mə dē kə Farisiyen kəta' wə du ndaya: Semdē rum kə Gamaliyel, bə pay zu dan dlay mēni sôwâ daɲ' wə um mbâ. Mum car fray wə du sum rôwâ Fada mə Mbri ɓay ci vun nday kədan kuni ar sum sin wur də rəka kî ri'i.

³⁵Mum faɲ la' ne kə sum rôwâ Fada mə Mbri: «Hi sôwâ Israyel, i kaw wa ri kə kwa mēni hi wə də gi wa sôwâ mə ni kuna.

³⁶Bəka mēni swə mə dē kə Tedas mbə day nə cu bar ɓayrum mətə'o: Mum mbə ta' tu rum ce' ndə swə mə kə mbra', ɓay raw sôwâ ke i kis fədi' təɲ kə ta zə rumu. Ama sôwâ ci num, ɓay sôwâ daɲ' mēni wə ta zə rum pla' wa, ɓay dan um ndo' cete.

³⁷Kəki rum, kəri mēni sôwâ wə wāy' tu, Yudas mə nya Galile car mbə, mum ɓu sôwâ juk ta zə rumu. Ama sôwâ ci num ta', ɓay sôwâ daɲ' mēni ta zə rum pla' wa.

³⁸Zə rum, na in mi ne: I gi kwa məsin tu sôwâ mēni kuni mi. I ar nday 'ya! Zə dan nday kə sin nday la' car mbə hay' sumra' si, dan rum wə də ndo'o.

³⁹Ama dan rum la' car mbə hay' Ifray kəzin' si, hi cu gak tak dan rum mi. I kaw wa ri kədan i zi kə Ifray mi!» Sum rôwâ Fada mə Mbri ve dan Gamaliyel,

⁴⁰handay faɲ dē sum sin kuni mbə rawti so, handay pe nday kə ləva ɓay dlay nday i kuni dok ta' kwa ne kə sôwâ kə semdē Zezu za' mi. Kəki rum, handay ar nday piki.

⁴¹Daw sin 'ya mbə rawti so sum rôwâ Fada mə Mbri kə tuk kədam juk, zə Ifray we nday nde i ce boni zə semdē Zezu.

⁴²Bəka daɲ' handay cu ar dan ta' kwa kə ka' Dan mə Kədam mēni in dan wa Kris mə dē kə Zezu ne kə sôwâ wə rawti so po' fur sôwâ Zuwif kə rawti so ndaya.

Sin Daw Sini 6

¹Kəri rum, sum ta zə Zezu dlər ta kofo, sum ta zə Zezu mə ge vun grek car dan kə sôwâ mēni wə ge vun hebre, handay in i rənda nday cu fe kwati kəri mēni handay wə ɓul kwati ne kə rənda bəka daɲ' nə mi.

²Zə rum, sum ta zə Zezu mə guɓ wa hoɓ ɓawa kul sôwâ mə ta zə Zezu daɲ' ɓay la' ne ndaya: «Cu ɓay kədan namba ar ka' Dan Ifray ɓay gi sin ɓul kwati mi.

³Zə rum, daw ba mba, i da' sôwâ sedâ' mēni sôwâ wə in njeŋ dan mə ɓay wa nday, mēni Simbed' mə Kəleŋ nyen vunduk nday ɓay kə gwet, ɓay namba də ar sin də ɓa ndaya.

⁴Ndəna', namba gak də ar tu mba kə in dan kə Ifray kə ka' dan sara.”

⁵Raw sôwâ daŋ' tuk kədam kə dan rumu: Zə rum, handay da' sôwâ mēni kuni: Etiyen, swə mēni ve Kris ɓayrum, ɓay mēni Simbed' mə Kəleŋ nyen vunduk rum, kə Filip, Prokor, Nikanor, Timon, Parmenas, ɓay Nikola, swə mə so Aŋtiyosə mēni faŋ wə ta zə vun fur sôwâ Zuwif.

⁶Handay faŋ ta kə nday kor sum sin, ɓay handay in dan kə Ifray ɓay njay ɓa wa ndaya.

⁷Dan Ifray pla' ta kofo kofo ɓay raw sôwâ mēni wə ta zə Zezu wə so Jeruzalem dlər ta kofo juku. Sum po' fur juk ve Kris.

⁸Etiyen, swə mēni Ifray kuswa' num ɓay ne gbəgbon ne num, gi yew cem cem kə kwa cem cem mə jin' wa sôwâ wə du sôwâ.

⁹Sôwâ məsin car mbə so Ifray sôwâ Zuwif mə ɗe kə «Bek mə fe wa tu». Wə du nday sôwâ Zuwif mēni car mbə so Siren kə so Alekzandri, ɓay sôwâ Zuwif məsin mēni car mbə nya Silisi kə nya Azi. Handay təŋ kə way dan kə Etiyen.

¹⁰Ama handay cu gak car kor rum kə dan ge vun mi, zə mum wə ge dan kə gwet mēni Simbed' Ifray ne numu.

¹¹Zə rum, handay ra' səlay po' sôwâ kə ndi kədan handay ini: «Namba mun mum wə i Moyizə kə Ifraya.”

¹²Ndəna', handay ɓu zu sôwâ kə sum rôwâ mə du sôwâ Zuwif ɓay sum pay zu dan dlaya. Handay mbə hay' Etiyen, handay kaw num ɓay 'ya kə rum ta kor sum rôwâ Fada mə Mbri.

¹³Handay mbə kə sôwâ mēni gak hay dan wa rum, handay ini: «Swə mēni nə cu ar dan ge dan mə bro' wa so po' fur mba ɓay wa dan dlay Moyizə ta'a.

¹⁴Namba mun mum in i Zezu mə so Nazaret wə də bru so po' fur rum ɓay wə də faŋwa dan vun fur mēni Moyizə ta' ne mba.”

¹⁵Sôwâ daŋ' mēni gay' wə ri mēni sum rôwâ Fada mə Mbri wə ɓa han, handay njay i ta wa Etiyen ɓay handay we vuk rum ra' nji kə vuk vay sin Ifray mə wafraya.

Sin Daw Sini 7

¹Toŋ po' fur ci vun Etiyen: «Dan rum ndəna' su?”

²Etiyen ɗam vun rumu: «Daw ba man kə ba man kuni, i mun dan mana. Ifray mə kə mbra' ta' tu rum ne kə ba mbri mba Abraham kəri mēni mum wə nya Mezopotami, cop kəri mēni mum cu ta suk Karan mət'o.

³Ifray la' ne numu: A 'ya ar nya wû kə sôwâ wû, ɓay a də nya mēni na də wû ta' ne.

- ⁴Zə rum Abraham 'ya ar nya Kalde bay ta suk so Karan. Kəki mənɪ ba um mar si, Ifray ra' num mbə so Karan ta njay wə nya mənɪ hi gay' wə han mgbaŋ ni na.
- ⁵Ifray cu ne nya mə kəca um ne num ko ri cin duk sem wə han mi, ama Ifray kawvun kə rum i mum də um ne nya rum, bay i daw rawti rum də ti nya rum kəki rumu. Kəri mənɪ Ifray in dan rum, ka Abraham cu kə vay mətə'o.
- ⁶Dan mənɪ Ifray in ne num nə ni na: Daw rawti ru də gay' wə nya rəkway, wə nya rum, handay də faŋ bek bay sôwâ mə nya rum də nday rik du kim kis fədi'i.
- ⁷Ama Ifray ini: Na də bok dan wa sôwâ mənɪ də nday gi beke. Kəki rum, handay də wur mbə nya rum bay də man bur wə ri mənɪ na.”
- ⁸Ifray faŋ ndo' vun dan kawvun rum kə Abraham. Kwa mənɪ ta' kwa rum nə tagura. Zə rum, kəri mənɪ Abraham vra' Isak, mum tagura rum kə bəka coho' rumu. Isak vra' Yakub, bay mum tagura rum ndəna' ta', bay Yakub tagura daw um mə guɓ wa hoɓ mənɪ faŋ ba mbri ramba mə kə mbra'a.
- ⁹Ba mbri ramba mə kə mbra' kuni gi sây' kə Zozef bay kaw num coɓ ta nya Egip ce' ndə beke. Ama Ifray kəta' kə rumu.
- ¹⁰Mum sid' num du cik um daŋ' bay kəri mənɪ Zozef mbə car kor Farawoŋ jwə mə nya Egip, Ifray ne gwet ne num kədan mum gi kwa mə kədam tu jwə na. Zə rum, mum cin Zozef ce' ndə toŋ wa nya Egip kə wa so um daŋ'ŋ.
- ¹¹Kəri rum, mē' nde wa nya Egip daŋ' kə nya Kana daŋ' ta'a. Sôwâ ce boni juk bay ba mbri ramba cu za' kwati za' mi.
- ¹²Kəri mənɪ Yakub mun i u kəta' wə nya Egip, mum sin ba mbri ramba ta han sem daw rumu.
- ¹³Kəri mənɪ handay faŋ ta han sem hoɓ rum, Zozef ta' tu rum ne kə daw ba um, bay Farawoŋ mun dan wa zə bray Zozef.
- ¹⁴Zə rum, Zozef sin sin kədan mum ra' ba um Yakub kə sôwâ so um daŋ', handay sôwâ guseda' wa vatla.
- ¹⁵Ndəna' Yakub 'ya ta nya Egip bay mum mar wə han, ndəna' ba mbri ramba mar wə han ta'a.
- ¹⁶Sôwâ ra' mar nday ta so Sikem kə ndi, bay handay mo' nday wə zra mənɪ Abraham coɓ kə selay wə ba daw Hemor wə so Sikem.
- ¹⁷«Kəri mənɪ Ifray wə də gi kwa mənɪ mum kawvun kə Abraham nə mbə həre' si, raw sôwâ mba dlər ta kofo bayrum wə nya Egip.
- ¹⁸Kəri rum, jwə mə mbrew məsin mbə suk nya Egip, mum cu we Zozef mi.”
- ¹⁹Jwə nə gi sôwâ mba kə vur vur, bay rik ba mbri ramba: Mum gi nday kə bak kədan kuni ra' daw gule nday pik də rəka kədan handay ke kə nyî mi.

- ²⁰Kəri rum, Moyizə vra'a. Mum bay juk bay Ifray tuk kədam kə rumu. Ya um ur num wə du cer hinji' wə rawti so ba umu.
- ²¹Kəri mənı handay tle num ge ta rəka, vay Farawon mə ma tle num ur ce' ndə vay vra' sa.
- ²²Ndəna', Moyizə wum gwet mə nya Egip daŋ', bay mum faŋ swə mə kə mbra' wə du dan ge kə sin gi umu.
- ²³«Kəri mənı Moyizə gi kim gufədi', mum wa' kə vunduk rum kədan mum də kar daw ba um, sôwâ Israyel.
- ²⁴Mum we swə mə nya Egip wə rik swə daw du ndaya. Mum ta ve wa swə nə, bay mum ci swə mə nya Egip kədan mum sa' bal rumu.
- ²⁵Mum dik i daw ba um də mun i Ifray wə də nday ulay' kə ba rum, ama handay cu mun zu dan rum mi.»
- ²⁶Siw rum, Moyizə za' sôwâ Israyel hoɓ wə pum nji, bay mum jin nday kədan handay gay' hebe. Mum la' ne ndaya: "Bây man kwa, hi daw ba. Zə mi hi wə rik nji su?"
- ²⁷Ama swə mənı wə rik bây hoɓ um nə pla' Moyizə ta kə hay' bay ci vun rumu: "Sa nə cin nu ce' ndə bârî kə bə bok dan wa mba su?"
- ²⁸Ha wa' kədan ha man ci ce' ndə mənı ha ci swə mə nya Egip kum nə su?
- ²⁹Kəri mənı Moyizə mun dan rum, mum ne ta suk nya Madiyaŋ, mum vra' daw njiwkwa hobo.
- ³⁰«Kəki rum kim gufədi', vay sin Ifray mə wafray mbə ta' tu rum ne kə Moyizə wə du ku mənı wə ye' ŋây' wə du igop həre' kə igway' mə de kə Sinay.
- ³¹Kəri mənı Moyizə we kwa rum, kwa rum jin' wa ne numu. Ama kəri mənı mum jik ta hay' kwa rum həre' kədan mum kar kwa rum, mum mun wor Bârî mənı ini:
- ³²"Na Ifray ba mbi wû kuni, Ifray Abraham, kə Isak, bay Yakub."» Kwa rum gi wəlok ne kə Moyizə bay tu rum par nyen bay mum ne wəlok kar kwa rumu.
- ³³Bârî la' ne numu: "A par tərak sem ru, zə ri mənı ha car wə han nə ri mənı Ifray par cin zə rumu.
- ³⁴Na we cik mənı sôwâ man tuk wə nya Egip bay na mun ndəma' nday, na dam mbə kədan na nday ulaya. A də mgbaŋ ni nə, na wû sin də nya Egip.
- ³⁵«Mum nə Moyizə mənı sôwâ Israyel vad num kə ini: "Sa nə cin nu ce' ndə bârî kə bə bok dan wa mba su?" Ifray sin num ce' ndə bârî kə bə ulay' sôwâ. Ifray gi kwa rum kə ba vay sin um mə wafray mənı mbə ta' tu rum ne kə Moyizə wə du ku mənı wə ye' ŋây'i.
- ³⁶Mum kə mənı pâ mbə nya Egip kə sôwâ Israyel kə gi yew cem cem kə kwa cem cem mə jin' wa sôwâ wə nya rum, wə vun Ya Mbi mə Tlew bay wə du igop du kim gufədi'i.

³⁷Moyizə kə mənɪ la' ne kə sôwâ Israyel: Ifray də mi sin bə ka' dan ce' ndə na, mum də ke zə saŋ mi.

³⁸Mum kə mənɪ ke kə kul sôwâ Israyel wə du igopo. Mum ke han kə ba mbri ramba kə vay sin Ifray mə wafray mənɪ ge dan kə rum wa igway' mə də kə Sinay. Mum fe dan mənɪ wə ne nyî mə də hâ kədan mum faŋ mba ne.

³⁹Ama ba mbri ramba cu bə mun vun rum mi. Handay vad' num bay handay wa' kədan handay faŋ də nya Egip."

⁴⁰Handay la' ne kə Aron: "A ri ifray məsin ne mba kədan handay ta kor mba, zə namba cu we kwa mənɪ gi wa Moyizə mənɪ pā mbə nya Egip kə mba nə mi."

⁴¹Kəri rum, handay ri vay naw bay handay po' fur kor rumu. Handay gi cer zə kwa mənɪ handay ri kə ba ndaya.

⁴²Ama Ifray faŋ ki ge ne nday bay mum ar nday kədan handay bur ciciw mə wafray ce' ndə mənɪ sum ka' dan wây' wə du dərwa ndaya: Hi sôwâ Israyel, kəri mənɪ hi fol kwa mə ta kə sem bay po' fur du kim gufədi' wə du igop, hi po' kor rin su?

⁴³Cu mi, ama hi tle jew ifray mə də kə Molok kə ciciw ifray mi mə də kə Refan. Handay ifray mə vun fur mənɪ hi ri kə ba kədan hi nday buru. Zə rum, na də mi ra' njay i nya Babilon ga' day' seŋe.

⁴⁴«Wə du igop, ba mbri ramba gi jew mənɪ wə ta' i Ifray kəta' kə ndaya: Handay kap jew rum ce' ndə mənɪ Ifray in ne kə Moyizə, kə vari mənɪ Ifray ta' ne numu."

⁴⁵Kəki rum, ba mbri ramba fe jew rum wə ba nday, bay handay tle jew rum du nday kəri mənɪ handay ta zə Zozuwe bay ti nya sôwâ mənɪ Ifray 'way kor ndaya. Jew rum suk han hâ day ri David.

⁴⁶Mum nə swə mənɪ Ifray gi bay hay' rumu. David kə mənɪ o vari kədan nə dām so zə Ifray Yakub.

⁴⁷Ama Salomon kə mənɪ dām so rumu.

⁴⁸Ama Ifray mə wafray cu suk wə rawti so mənɪ dām kə ba sumra' mi. Ce' ndə mənɪ bə ka' dan ini:

⁴⁹Wafray nə ri suk man, bay nya ri njay sem rini. Hi gak dām so mi man ne su? Na gak pemây wə ri mə ka su?

⁵⁰Na cu gi kwa mənɪ kuni daŋ' kə ba rin mi su?

⁵¹«Hi sôwâ mə wa bokrok, vunduk ri bro' bay hum ri nduḅ si, hi wə tak Simbed' mə Kəleŋ bəka daŋ'ŋ. Hi ce' ndə ba mbri rami ta'a.

⁵²Wə du sum ka' dan, mə ka ba mbri rami cu gi boni ne nday mi nə su? Handay ci sôwâ mənɪ ka' dan mbə Swə mə Njeŋ, bay mgbaŋ ni nə hi kə mənɪ ar num ta ba sôwâ bay ci numu.

⁵³Hi fe dan dlay Ifray wə ɓa sum sin um mə wafray, ama hi cu ta zə dan dlay rum mi.”

⁵⁴Kəri məni sum rôwâ Fada mə Mbri mun dan rum, handay ra' bak kə cwə se' wa Etiyen.

⁵⁵Ama Simbed' mə Kələŋ nyen vunduk Etiyen, mum kar ri ta wafray, ɓay mum we mbra' Ifray kə Zezu məni car wə ɓa fun Ifraya.

⁵⁶Mum ini: «I kar ri', na we wafray ar vun ɓay Vay sumra' car wə ɓa fun Ifraya.”

⁵⁷Zə rum, handay do dan kə gbəgbonɔ, ɓay handay nduɓ hum nday kə ɓa. Handay daŋ' njay ne ta wa Etiyen ɓay kaw numu.

⁵⁸Handay dlam num mbok so pā ta rəka kə rum, ɓay təŋ kə um ge kə gway'i. Sum we njeŋ dan rum ar mbraw nday wə hay' vay jid' mə dē kə Sol.

⁵⁹Kəri məni handay wə um ge kə gway', Etiyen o Ifray ndəni na: «Bârî Zezu, a ve nyî rini!”

⁶⁰Mum faŋ kuduk ta nya kə vun cingit ɓay ka' dan kə gbəgbonɔ: «Bârî, a in kwa mə bro' məni handay gi nə də wa nday mi.» Kəki məni mum in dan rum, mum mara.

Sin Daw Sini 8

¹Bay Sol tuk kədam kə mar Etiyen. Kə fəta rum, sôwâ təŋ kə keɓ zu kul sôwâ Kris wə so Jeruzalem. Sôwâ daŋ' məni ve Kris pla' wa wə nya Zude kə nya Samari, say gwa' sum sini.

²Sôwâ məni wə ô Ifray tle mar Etiyen mo', ɓay handay ci' mar um juku.

³Ama Sol keɓ kədan mum dənok kul sôwâ Kris. Mum ta so kə so, ɓay mum ra' sôwâ məni ve Kris mə njiwkwa kə mə rawkwa daŋ' cok ta so daŋgay'i.

⁴Sôwâ məni pla' ta ri cem cem wə gaŋ wə nya rum kə ka' Dan mə Kədam ne kə sôwâ.

⁵Filip ta so Samari, ɓay mum təŋ kə ka' dan Kris ne kə sôwâ so rumu.

⁶Kəri məni raw sôwâ mun dan Filip ɓay we yew məni mum gi, handay ve dan rumu.

⁷Kəri rum, gam wur mbə wa sôwâ juk kə do dan, ɓay hurbu kə lem juk cara.

⁸Zə rum, sôwâ so rum tuk kədam juku.

⁹Swə məsin kəta' wə so rum mə dē kə Simon, mum bə gi yew ɓay kwa gi um jin' wa sôwâ so Samari. Mum ta' tu rum ce' ndə swə mə kə mbra',

¹⁰ɓay sôwâ rôwâ kə dawre' daŋ' ve dan um kə ini: «Swə məni nə mum nə gbəgbonɔ Ifray məni sôwâ wə dē kə gbəgbonɔ mə mbri.”

¹¹Zə yew məni mum wə gi ɓa' kuni jin' wa ne nday, handay ve dan umu.

¹²Ama kəri məni handay ve Dan mə Kədam məni Filip ka' wa dan vari məni Ifray wə də suk jwə wa sôwâ um kə semdē Zezu Kris, njiwkwa kə rawkwa daŋ' fe baptem.

- ¹³Simonɔ̃ kə tu rum ve dan rum, ɓay mum fe baptem ta', mum suk hay' Filip, ɓay kəri mənɪ mum we kwa mə jin' wa sôwâ kə yew mənɪ Filip gi, kwa rum jin' wa ne numu.
- ¹⁴Daw sin mənɪ wə so Jeruzalem mun i sôwâ so Samari ve dan Ifray si, zə rum handay sin Piyer kə Zaɲ hay' ndaya.
- ¹⁵Kəri mənɪ handay ta day so Samari, handay in dan kə Ifray zə sôwâ mənɪ ve Kris kədan handay fe Simbed' mə Kələɲe.
- ¹⁶Zə Simbed' mə Kələɲ cu dam mbə wa swə dāw du nday mətə'o. Handay fe baptem kə semde Bârî Zezu tawa.
- ¹⁷Kəri rum Piyer kə Zaɲ njay ɓa wa nday, ɓay handay fe Simbed' Kələɲe.
- ¹⁸Kəri mənɪ Simonɔ̃ we sum sin njay ɓa wa sôwâ mənɪ ve Kris, ɓay Simbed' mə Kələɲ dam mbə wa nday, mum tle səlay mbə hay' Piyer kə Zaɲ kə ndi.
- ¹⁹Bay la' ne ndaya: «I ne gbəgbonɔ̃ mənɪ nə ne nan ta' kədan swə mənɪ na də njay ɓa wa rum, mum də fe Simbed' mə Kələɲe.»
- ²⁰Ama Piyer dām vun rumu: «Ha də vi' kə səlay wû dan', zə ha dîk i ha gak cob kwane Ifray kə səlaya.
- ²¹Ha cu kə kwafe ko ri kî du sin mba mi, zə vunduk ru cu njeɲ kor Ifray mi.
- ²²Zə rum, a faɲ vunduk ru wa dan dîk mə bro' wû ɓay a o Bârî kədan nə vrum dan dîk mə bro' wû, vari la' kəta' si.
- ²³Zə na we vunduk ru nyen ped' kə dan bro' mə bak, ɓay ha bek kwa mə bro'o.»
- ²⁴Simonɔ̃ la' ne kə Piyer kə Zaɲ: «Hi kə tu ri, i o Bârî zə rin kədan kwa mənɪ hi in dan wa rum nə mbə wa rin mi.»
- ²⁵Kəki mənɪ sum sin mə hoɓ kuni in njeɲ dan wa Zezu ɓay ka' dan Bârî, handay faɲ ta so Jeruzalem. Kəri mənɪ handay wə vari, handay ka' Dan mə Kədam wə so cem cem juk wə nya Samari.
- ²⁶Vay sin Bârî mə wafray la' ne kə Filip: «A car, ɓay a cin wa də ga' zu wə vari mənɪ car so Jeruzalem kədan də so Gaza. Vari rum cukudu.»
- ²⁷Filip car 'ya dle. Bay kəri mənɪ mum wə vari, mum ndewa kə swə məsini. Swə nə swə nya Etiyopi. Mum jəraw na. Mum swə sərəwsi mə kə mbra' mənɪ wə ji doknay ma mə de kə Kaɲdasə mətɪ suk jwə wa nya Etiyopi. Mum ke wə so Jeruzalem kədan mum bur Ifray,
- ²⁸ɓay mum faɲ wə də so umu. Mum suk wə rawti Saret um, ɓay mum wə in dərwa mənɪ bə ka' dan mə de kə Esaya wây'i.
- ²⁹Simbed' in ne kə Filip: «A ta də hay' Saret nə hərə' ɓay a ta kə ndi tap tapa.»
- ³⁰Filip ne ta day hay' rum, ɓay mum mun swə nya Etiyopi nə wə in ri dərwa mənɪ bə ka' dan mə de kə Esaya wây' ɓay mum ci vun rumu: «Ha wə mun zu ri dərwa mənɪ ha wə in nə kəta' su?»

³¹Swə nə dām vun rumu: «Na gak mun zu rum ma dan swə man pay zu rum su?» Bay mum dē Filip kədan nə ur mbə suk hay' rum wə rawti Saret.

³²Ri dērwa mənī mum wə in nə ni na: «Mum ce' ndə cime mənī sôwâ kaw də ri fol kə ndi. Mum ce' ndə vay cime mənī car 'yeŋ wə kor bə ri sâ tu rumu. Mum cu ar vun rum mi.

³³Handay gi num faŋ kî, bay handay cu ge dan mə njeŋ wa rum mi. Sa nə gak in dan wa zu tlor rum su? Zə handay vi' nyî rum wa nya si.”

³⁴Swə sərəwsi nə ci vun Filip: «Na o nu, a in ne nan ri', bə ka' dan in dan mənī nə wa sa su? Wa tu rum su? Ko wa swə məsin su?”

³⁵Filip təŋ kə pay zu ri dērwa rum, bay mum ta' Dan mə Kədam mənī wə in dan wa Zezu ne numu.

³⁶Kəri mənī handay wə ta də vari, handay ta day wə ri mənī mbi wə han, bay swə sərəwsi nə ini: «Mbi ni na. Mi nə man tak dan fe baptem su?»

[³⁷Filip dām vun rumu: «Ha la' ve dan rum kə vunduk ru daŋ' si, ha gak fe baptem.» Swə nə dām vun rumu: «Na ve si: Zezu Kris nə Vay Ifraya.»]

³⁸Mum faŋ ne vari kədan kaw Saret um ca. Filip kə swə sərəwsi nə hoŋ jak dam ta du mbi bay Filip gi baptem ne numu.

³⁹Kəri mənī handay wur mbə du mbi, Simbed Bârî tle Filip bay swə sərəwsi nə cu we num za' mi, ama mum tle vari kə tuk kədama.

⁴⁰Filip ta za' tu rum wə so Azot. Mum faŋ gaŋ so kə so kə ka' Dan mə Kədam wə ri daŋ' hâ mum ta day so Sezare.

Sin Daw Sini 9

¹Kəri rum, Sol keŋ zu sôwâ mə ta zə Bârî də kofo kədan mum nday ci mi. Mum ta za' toŋ po' fur

²bay ci vun dērwa də gaŋ wə ba rum kədan mum də ze wə rawti so Ifray sôwâ Zuwif mə so Damas kuni, kədan mum la' za' njiwkwa ko rawkwa mənī tle vari Bârî wə han si, mum nday baŋ bay ta so Jeruzalem kə ndaya.

³Kəri mənī mum wə vari də so Damas, bay mum ta hərə' kə so rum, kəkor sar ri mə bu car mbə wafray wədi mbə wa rumu.

⁴Mum nde ta nya bay mum mun wor in dan ne numu: «Sol, Sol, zə mi ha wə keŋ zu rin su?”

⁵Mum ci vun: «Ha sa su, Bârî?» Wor nə dām vun rumu: «Na nə Zezu mənī ha wə keŋ zu rumu.

⁶Ama a car ye, a də so Damas bay sôwâ də wû ta' kwa mənī ha də gi nə wə hana.”

⁷Sôwâ mēni wə ta də kə Sol faŋ gay' dan in dan mēsini. Handay mun wor rum ama handay cu we swə mi.

⁸Sol car mbə nya bay ar i, ama mum cu gak weri mi. Handay faŋ kaw ba rum ta so Damas kə rum,

⁹wə du bəka hinji', mum cu gak weri mi bay mum cu ti kwati ko ce kwace mi.

¹⁰Swə mə ta zə Zezu mə də kə Ananiyas kəta' wə so Damas. Mum we kwa bay wə du kwawe rum, Bârî la' ne numu: «Ananiyas!» Mum dām vun rumu: «Na ni nə, Bârî.»

¹¹Bârî la' ne numu: «A car mgbaŋ ni nə, bay a tle vari mə də kə "Vari mə Səreŋ", a də so Yudas bay a də də swə so Tarsə mə də kə Sol. Mum wə in dan kə Ifray

¹²bay wə du kwawe, mum we swə mə də kə Ananiyas ze ta wa rum bay njay ba wa rum kədan mum faŋ weri kəreme.»

¹³Ananiyas dām vun rumu: «Bârî, sôwâ juk in dan swə nə ne nan kə kwa mə bro' daŋ' mēni mum gi tu sôwâ wû mə kəleŋ mēni wə so Jeruzalem.

¹⁴Bay mum mbə ti kə gbəgbəŋ mēni sum rôwâ mə du sum po' fur ne num kədan mum ra' sôwâ daŋ' mēni wə də semdə ru.»

¹⁵Ama Bârî la' ne numu: «A də ye, zə na par num kədan mum gi sin man, kədan mum ta' semdə rin ne kə sôwâ mēni cu zə saŋ sôwâ Zuwif mi kə sum jwə nday, bay kə sôwâ Israyel daŋ'ŋ.

¹⁶Na kə tu rin na də um ta' boni daŋ' mēni mum də ce zə rin um ne.»

¹⁷Zə rum, Ananiyas 'ya dle, mum ta day so, mum njay ba wa Sol bay la' ne numu: «Sol, vay ba man, Bârî Zezu mēni ta' tu rum ne nu wə vari kəri mēni ha wə mbə, mum ni sin nan hay' ru kədan ha faŋ weri kərem bay kədan Simbed mə Kəleŋ nyen vunduk ru.»

¹⁸Kəkor sar, daw kwa ra' nji kə bəle' keve wur mbə i Sol, bay mum faŋ weri kəreme. Mum car fray bay fe baptem.

¹⁹Kəki rum, mum ti kwati, bay gbəgbəŋ faŋ mbə tu rumu. Sol suk kə sôwâ mə ta zə Zezu mēni wə so Damas bəka cep.

²⁰Kəki rum, mum ta wə rawti so Ifray sôwâ Zuwif bay təŋ kə ka' dan i Zezu nə Vay Ifraya.

²¹Dan rum jin' wa ne kə sôwâ daŋ' mēni mun dan rum, bay handay ci vun: «Swə mēni ke wə keɓ zu sôwâ mēni wə də semdə Zezu wə so Jeruzalem nə cu ni nə mi su? Bay mum cu ni mbə ti kədan mum nday ra' bay də kor sum rôwâ mə du sum po' fur kə nday mi su?»

²²Ama Sol wə ka' dan də kofo kə gbəgbəŋ bəka daŋ'ŋ. Kəri mēni mum ta' i Zezu nə Kris ne kə sôwâ Zuwif mēni gay' wə so Damas, dan rum jin' wa ne ndaya.

²³Kəki bəka raw gi, sôwâ Zuwif kawvun du nday kədan handay ci Sol.

- ²⁴Ama Sol mun zu dan mēni handay wə wa' də gi wa rumu. Handay wə gay' ji vun gam so fəta kə dukri daŋ' kədan handay um ci.
- ²⁵Ama kə dukri mēsin sôwâ mēni wə ta zə Sol mbə tle num cin rawti kaɗaŋ' ɓay sa wa la' tu ruɓ so rum ta rəka.
- ²⁶Kəri mēni Sol ta day so Jeruzalem, mum keɓ kədan mum ɓa kə sum ta zə Zezu, ama handay daŋ' ne wəlok, zə handay dīk i mum cu faŋ bə ta zə Zezu kəzin' mi.
- ²⁷Ama Barsabas tle num ta hay' sum sin, mum in vari mēni Sol we Bârî wə vari ne nday kə dan mēni Bârî in ne num, mum faŋ in vari mēni Sol ka' dan kə semɗe Zezu wə so Damas dan wəlok ne nday ta'a.
- ²⁸Daka ri rum Sol ɓa kə nday, mum gaŋ wə so Jeruzalem kə ka' dan kə semɗe Bârî dan wəloko.
- ²⁹Mum ge dan kə sôwâ Zuwif mēni wə ge vun grek ta' ɓay mum way dan kə nday, ama handay keɓ vari kədan handay um ci.
- ³⁰Kəri mēni daw ba um mun dan rum, handay tle Sol 'ya ta so Sezare kə rum, ɓay handay sin num ta so Tarsə.
- ³¹Kəri rum, kul sôwâ Kris mēni gay' wə nya Zude, kə nya Galile ɓay nya Samari daŋ', handay gay' heɓ, handay wə jeŋ də kofo ɓay wə gay' wə du wəlok Bârî, ɓay handay dlər də kofo kə gbəgbəŋ Simbeɗmə Kəleŋe.
- ³²Piyer gaŋ wə nya daŋ'ŋ. Fəta mēsin mum ta day hay' sôwâ mēni ve Kris mēni gay' wə so Lida.
- ³³Mum za' swə mēsin wə han mə ɗe kə Ene. Mum bar wa kwabar du kim coho' zə mum kə gaɓ suk hurbu.
- ³⁴Piyer la' ne numu: «Ene, Zezu Kris car nu si. A car ye ɓay a gila' kwabar wû.» Kəkor sar, Ene car fraya.
- ³⁵Sôwâ mēni gay' so Lida kə nya Saron daŋ' we num, ɓay handay faŋ vunduk nday ɓay mbə hay' Bârî.
- ³⁶Ma mə ve Kris mə ɗe kə Tabita kəta' wə so Jope. Semɗe sə faŋ kə vun grek «Dorkas» wa' dan in kə vun mba: «Mêwe». Ta wə gi sin mə ɓay bəka daŋ' kə kawɓa sum ca ta'a.
- ³⁷Kəri rum, gaɓ kaw sə ɓay ta mara. Kəki mēni handay mbi mbi mar ne sə, handay tle sə ta cin tak i so mə wafraya.
- ³⁸Sôwâ mə ta zə Zezu mēni gay' wə so Jope mun i Piyer wə so Lida mēni hərə' kə so Jope, handay sin sôwâ hoɓ ta hay' rum kə dan mēni na: «Namba o nu, a ne mbə ga'ri ri'il'»
- ³⁹Piyer 'ya ta kə nday ga'ri sar, kəri mēni mum ta day han, handay tle num ur ta tak i so mə wafraya. Rənda daŋ' ɓa mbə hay' rum kə ci' kə ta' vay mbraw kə mbraw mə toŋ mēni Dorkas ke kap kəri mēni ta ke kə i ɓo ne numu.

⁴⁰Piyer 'way sôwâ daŋ' wur ta rëka, mum faŋ kuduk ta nya kə vun cingit bay in dan kə Ifraya. Kəki rum, mum faŋ i ta hay' mar bay ini: «Tabita, əŋ car ye!» Ta ar i, bay kəri mənɪ ta we Piyer, ta car suk kə zu.

⁴¹Piyer kaw ɓa sə bay tle sə car fray, mum faŋ dɛ sôwâ mə ve Kris kə rənda kuni bay ne Tabita ne nday kə i.

⁴²Dan rum pla' wə so Jope daŋ' bay sôwâ juk ve Bârî.

⁴³Piyer suk wə so Jope bəka raw, mum dam wə so bə mbal dɪke mə dɛ kə Simoŋ.

Sin Daw Sini 10

¹Swə məsin mə dɛ kə Korney kəta' wə so Sezare. Mum nə toŋ kul soje mə nya Romə mənɪ sôwâ wə dɛ kə «kul soje mə nya Itali».

²Mum nə swə mənɪ wə ô bay wə ne wəlok Ifray, mum kə cava um daŋ' wə bur Ifray, mum wə kawɓa sum ca juk wə du sôwâ Zuwif, bay mum wə in dan kə Ifray bəka daŋ'ŋ.

³Fəta məsin, kə fəta riya, mum we kwa, mum we vay sin Ifray mə wafray takram ze ta wa rum bay la' ne numu: «Korney!»

⁴Mum kar vay sin Ifray mə wafray nə kə wəlok bay ci vun rumu: «Mi nə su, Bârî?» Vay sin Ifray mə wafray nə dām vun rumu: «Ifray mun kwa o wû nə si, bay we kə kwa mənɪ ha kawɓa sum ca kə ndi nə ta', bay mum dɪk dan wa ru.

⁵Mgbanj ni nə, a sin sôwâ də so Jope kədan handay də dɛ Simoŋ mə dɛ kə Piyer mbə kə rumu.

⁶Mum dam wə so bə mbal dɪke mə dɛ kə Simoŋ, so rum wə vun ya mbi.”

⁷Kəri mənɪ vay sin Ifray mə wafray mənɪ in dan ne num nə 'ya dle, Korney dɛ sôwâ hoɓ wə du sum sin um kə swə daw mənɪ wə ô Ifray wə du soje mənɪ wə um ji,

⁸mum in zu dan kwa daŋ' mənɪ ke gi nə ne nday bay mum faŋ sin nday ta so Jope.

⁹Siw rum, kəri mənɪ handay wə vari hərə' kə so Jope, Piyer ur ta wa dap so kə fəta duwa kədan mum in dan kə Ifraya.

¹⁰Mê' ti num, bay mum wa' kədan mum ti kwati. Kəri mənɪ sôwâ wə gi kwati kədan handay um ne, mum we kwa.

¹¹Mum we wafray ar vun bay kwa dam mba. Kwa rum ce' ndə kudɛl mə toŋ dam mbə nya car kə dleŋ fəɗi'i.

¹²Vun cap kwa mə ta kə sem fəɗi' kə kwa mə nyen tu nyen mənɪ dlam rawti nya, bay rugwa mə dla' fray daŋ' wə rawti rumu.

¹³Wor la' ne numu: «Piyer, a car ye, a fol, bay a ti ye.”

¹⁴Ama Piyer dām vun rumu: «Cu ndəna' mi, Bârî! Zə na cu ti kwa mə bro' ko kwa mə kə day daw mi.”

- ¹⁵Wor nə faŋ in dan ne num kəreme: «Kwa məni Ifray in i bay, a kar kwa rum ce' ndə kwa mə kə day mi!»
- ¹⁶Kwa rum gi ndəna' sem hinji', bay kəkor sar, kwa rum faŋ tle ta wafraya.
- ¹⁷Piyer wə dīk dan wa zu dan kwa məni mum we, ama kəri rum, sôwâ məni Korney sin nday, handay ci vun so Simoŋ, bay mgbaŋ ni nə handay mbə gay' wə vun gam so rumu.
- ¹⁸Handay la' dan bay ci vunu: «Simoŋ mə dē kə Piyer nə dam wə ti su?»
- ¹⁹Piyer wə dīk dan wa zu dan kwawe um nə, kəri məni Simbed' Ifray la' ne numu: «A kar ri'i: Sôwâ wə ti hinji' wə wû kebe.
- ²⁰A car ye, a dam də nya, bay a 'ya kə nday dan ciciw, zə na kə məni sin ndaya»
- ²¹Zə rum, Piyer dam ta hay' sôwâ kuni bay la' ne ndaya: «Na nə swə məni hi wə kebe. Hi mbə zə dan mi su?»
- ²²Handay dām vun rumu: «Toŋ soje mə dē kə Korney sin mba mba. Mum swə mə bay, məni wə ô Ifray, bay sôwâ Zuwif daŋ' wə um sâ'a. Vay sin Ifray in ne num i nə dē nu mbə so um kədan mum mun dan məni ha də um in ne.»
- ²³Piyer ve nday wə so um, bay handay bar dukri rum wə hana. Siw rum, mum car 'ya kə nday, sôwâ məsin wə du daw ba um mə so Jope 'ya kə rum ta'a.
- ²⁴Səday' rum, mum ta day so Sezare. Korney wə ji wa nday kə bray um kə bây um kuni məni mum dē ndaya.
- ²⁵Kəri məni Piyer wə ze də rawti so, Korney ta ndewa kə rum bay mum kuduk nya bay bar ta nya kor rumu.
- ²⁶Ama Piyer tle num car fray bay la' ne numu: «A car fray ye, zə na sumra' ce' ndə ha ta'a.»
- ²⁷Kəki rum, mum dle kə ge dan kə Korney. Mum ze ta rawti so bay mum za' sôwâ raw ba wə hana.
- ²⁸Mum la' ne ndaya: «Hi we si, vun fur sôwâ Zuwif cu ne vari ne kə swə Zuwif kədan mum ba ŋji kə swə məni cu zə saŋ sôwâ Zuwif mi, ko ze də so um mətə'a. Ama Ifray ta' ne nan i a kar swə daw ce' ndə swə mə bro' ko swə mə kə day mi.
- ²⁹Zə rum, kəri məni hi sin sin dē nan, na cu vad' dē mi mi, na ni mbə na. Bay mgbaŋ ni nə na wa' kədan na we zə mi hi dē nan su?»
- ³⁰Korney dām vun rumu: «Bəka rum gi hinji' ce' ndə fəta mə mgbaŋ ni nə, na wə in dan kə Ifray wə so man kə fəta riya. Kəkor sar, swə daw ge mbraw mə wədi mbə car kor rin,
- ³¹bay la' ne nana: "Korney, Ifray mun kwa o wû si, bay mum dla' wa kwa məni ha kawba sum ca kə ndi ta'a.

- ³²A sin sôwâ dɛ so Jope kɛdan handay dɛ dɛ Simonɔ mɛ dɛ kɛ Piyer. Mum dam wɛ so bɛ mbal dɛkɛ mɛ dɛ kɛ Simonɔ. So rum wɛ vun ya mbi.
- ³³Zɛ rum, na sin sôwâ dɛ nu ga'ri, bay ha gi bay kɛ mbɛ daya. Mgbanɔ ni nɛ, namba danɔ ba ti kor Ifray kɛdan namba mun dan danɔ mɛni Bârî ne nu kɛdan ha ini.”
- ³⁴Piyer tɛnɔ kɛ dana: «Mgbanɔ ni nɛ, na we si, kɛzini: Ifray cu gi sôwâ cem cem mi.
- ³⁵Ama mum ve sôwâ danɔ mɛni wɛ um ô, bay wɛ gi kwa mɛ nɛnɔ kor rum dan dɛkɛ dan wa zɛ sanɔ ndaya.
- ³⁶Hi we dan mɛni Ifray sin hay' sôwâ Israyel, Dan mɛ Kɛdam mɛni in dan wa heɓ mɛni za' kɛ Zezu Kris. Mum nɛ Bârî sôwâ danɔnɔ.
- ³⁷Hi we dan kwa mɛni mbɛ wɛ nya Zude danɔ, tɛnɔ daka nya Galile kɛki mɛni Zanɔ ka' dan wa baptem.
- ³⁸Hi we vari mɛni Ifray ne gbɛgbonɔ Simbed'um ne kɛ Zezu mɛ so Nazaret. Hi we vari mɛni Zezu ganɔ wɛ nya rum kɛ gi sin mɛ bay kɛ car gab sôwâ danɔ mɛni wɛ zɛ gbɛgbonɔ Satan, zɛ Ifray kɛta' kɛ rumu.
- ³⁹Namba sum we nɛnɔ kwa danɔ mɛni mum gi wɛ nya sôwâ Zuwif kɛ so Jeruzalem. Handay gay' num ta wa gu bay mum mara.
- ⁴⁰Ama kɛki bɛka hinji' Ifray par num mbɛ mar, bay mum ne gbɛgbonɔ ne num kɛdan mum ta' tu rumu.
- ⁴¹Mum cu ta' tu rum ne kɛ sôwâ danɔ mi, ama mum ta' tu rum ne mba, sôwâ mɛni Ifray da' mba vun kofo ce' ndɛ sum we nɛnɔ dan rumu. Kɛki mɛni Ifray par num mbɛ mar, namba ti kwati kɛ ce kwace kɛ rumu.
- ⁴²Mum ne vari ne mba kɛdan mɛ ka' dan ne kɛ sôwâ kɛ in nɛnɔ dan i mum nɛ swɛ mɛni Ifray cin num kɛdan mum bok dan wa sôwâ mɛ kɛ i kɛ sôwâ mɛ mara.
- ⁴³Sum ka' dan danɔ in dan wa rumu: Handay in i ko sa su danɔ mɛni ve num, bɛ rum dɛ vrum kwa mɛ bro' um zɛ gbɛgbonɔ semdɛ rumu.”
- ⁴⁴Kɛri mɛni Piyer wɛ in dan ɓo, Simbed' mɛ Kɛlɛnɔ dam mbɛ wa sôwâ danɔ mɛni wɛ mun dan umu.
- ⁴⁵Kɛri mɛni sôwâ Zuwif mɛni ve Kris mɛni mbɛ kɛ Piyer we i Ifray sin Simbed'um wa sôwâ mɛni cu zɛ sanɔ sôwâ Zuwif mi, kwa rum jin' wa ne ndaya.
- ⁴⁶Handay mun handay wɛ ge dan kɛ vun mɛsin cem cem kɛ mbâ Ifraya. Zɛ rum Piyer ini:
- ⁴⁷«Sôwâ mɛni kuni fe Simbed' mɛ Kɛlɛnɔ ce' ndɛ namba. Sa gak nday tak dan fe baptem mɛ gi kɛ mbi nɛ su?”
- ⁴⁸Bay mum ne vari ne nday kɛdan kuni gi baptem ne nday kɛ semdɛ Zezu Kris. Handay fanɔ ci vun rum kɛdan nɛ suk kɛ nday bɛka cepe.

Sin Daw Sini 11

- ¹Daw sin kə daw ba mənɪ wə nya Zude mun i sôwâ mənɪ cu zə saŋ sôwâ Zuwif mi ve dan Ifray ta'a.
- ²Kəri mənɪ Piyer faŋ mbə so Jeruzalem, sôwâ Zuwif mənɪ ve Kris car dan kə rum
- ³kə ini: «Ha ze rawti so sôwâ mənɪ cu tagura mi bay ha ti kwati kə ndaya!»
- ⁴Zə rum, Piyer in zu dan kwa daŋ' mənɪ gi daka təŋ zu rum ne ndaya:
- ⁵«Kəri mənɪ na wə in dan kə Ifray wə so Jope, na we kwa: Na we kwa dam mbə hay' rini. Kwa rum ce' ndə kudɛl mə təŋ car mbə wafray kə dɛŋ fədi' dam mbə hay' rin həre'e.
- ⁶Na kar rawti rum kə bayrum, bay na we kwa mə ta kə sem fədi', kə tlew goɓ, bay kwa mə nyen tu nyen mə wa nya, kə rugwa mə fray daŋ' wə hana.
- ⁷Na faŋ mun wor in dan ne nana: "Piyer, a car ye, a fol, bay a ti ye."
- ⁸Ama na dam vun rumu: "Cu ndəna' mi, Bârî! Zə kwa mə bro' ko kwa mə kə day cu ze vun rin daw mi."
- ⁹Wor nə faŋ in dan wafray mbə ne nan kəreme: "Kwa mənɪ Ifray in i bay, a kar kwa rum ce' ndə kwa mə kə day mi.
- ¹⁰Kwa rum gi ndəna' sem hinji', bay kwa rum faŋ tle ta wafray kəreme.
- ¹¹Kəri rum sar, sôwâ hinji' mbə day so mənɪ na dam wə hana. Swə so Sezare sin ndaya.
- ¹²Simbed' Ifray la' ne nan i a də kə nday dan ciciwi. Daw ba man kanki' mənɪ kuni ke kə rin wə so Sezare, bay namba daŋ' cok ta rawti so Korney.
- ¹³Mum in ne mba vari mənɪ mum we vay sin Ifray mə wafray mbə car wə rawti so um, bay la' ne numu: "A sin sôwâ də so Jope kədan handay də dɛ Simoŋ mə dɛ kə Piyer.
- ¹⁴Mum də in dan mənɪ ha kə sôwâ so wû daŋ' də siɗ'kə ndi wû ne.
- ¹⁵Kəri mənɪ na təŋ ge dan, Simbed' mə Kəɛŋ dam mbə wa nday, ce' ndə mənɪ mum ke dam mbə wa mba kə təŋ zu rum ta'a.
- ¹⁶Kəri rum, na dla' wa dan mənɪ Bârî ke ini: "Zaŋ gi baptem ne kə sôwâ kə mbi, ama Ifray də gi baptem mi ne kə Simbed'umu."
- ¹⁷Ifray ne kwane mə daw mənɪ mum ne mba kəri mənɪ namba ve Bârî Zezu Kris nə ne ndaya. La' ndəna' si, na nə sa kədan na tak sin Ifray su?"
- ¹⁸Kəki mənɪ handay mun dan rum, handay gay' 'yeŋ 'yeŋ, bay handay təŋ kə gi mbra' ne kə Ifray kə ini: «Kəzin', Ifray ne vari ne kə sôwâ mənɪ cu zə saŋ sôwâ Zuwif mi kədan handay faŋ vunduk nday bay fe nyî mə də hâ."

¹⁹Sôwâ mæni ve Kris pla' wa ri cem cem zə boni mæni mbə kəri mæni sôwâ ci Etiyen. Sôwâ mæsin du nday ta hâ nya Fenisi kə nya Siprə mæni suk wə du mbi, bay so Aṇṭiyosə, ama handay ka' dan Ifray ne kə sôwâ Zuwif tawa.

²⁰Ama sôwâ mæni ve Kris mæni car mbə nya Siprə mæni suk wə du mbi kə so Siren kuni ta so Aṇṭiyosə, bay handay ka' Dan mə Kədam mæni in dan wa Bârî Zezu ne kə sôwâ mæni cu zə saṇ sôwâ Zuwif mi ta'a.

²¹Gbəgbəṇ Bârî kəta' kə nday, bay sôwâ raw ve dan nday bay faṇ vunduk nday mbə hay' Bârî.

²²Kul sôwâ Kris mə so Jeruzalem mun dan rum, zə rum handay sin Barsabas ta so Aṇṭiyosə.

²³Kəri mæni mum ta day han, bay mum we vari mæni Ifray kuswa' sôwâ mæni ve Kris, mum tuk kədam, bay mum la' ne nday i kuni gay' ṇgədiṇ' kə Bârî kə vunduk mə njeṇe.

²⁴Barsabas nə swə mə bay, Simbed' mə Kəleṇ nyen vunduk rum bay mum ve Kris bayrumu. Sôwâ juk ve dan Bârî.

²⁵Kəki rum, Barsabas 'ya ta so Tarsə kədan mum də keḅ Sol.

²⁶Kəri mæni mum za' num, mum tle num ta so Aṇṭiyosə kə rumu. Handay gay' kim daw kə kul sôwâ Kris wə han, bay handay ta' kwa ne kə sôwâ juku. Sôwâ təṇ kə də sôwâ mæni ta zə Zezu kə «Sôwâ Kris» wə so Aṇṭiyosə copo.

²⁷Kəri rum, sum ka' dan car mbə so Jeruzalem ta so Aṇṭiyosə.

²⁸Swə daw du nday mə də kə Agabus car fray, bay kə gbəgbəṇ Simbed' Ifray, mum ka' i mē' mə mbri wə də ndewa nya daṇ'ṇ. (Mē' rum mbə nde kəri mæni Klodə suk jwə mə mbri wə nya Romə).

²⁹Sôwâ mæni ta zə Zezu gila' dan du nday kədan handay daw daw daṇ' də ne kwa ce' ndə mæni mum gak ne kədan handay sin kwa rum də kawḅa daw ba nday mæni gay' wə nya Zude.

³⁰Handay gi ndəna', bay handay sin kwa rum ta hay' sum rōwâ mə du sôwâ mæni ve Kris mə nya Zude kə ba Barnabas kə Sol.

Sin Daw Sini 12

¹Kəri rum, jwə Herodə təṇ kə gi boni ne kə sôwâ mæni wə du kul sôwâ Kris.

²Mum ci Zakə mə vay ya Zaṇ kə masəlama.

³Kəri mæni mum we kwa rum kədam tu ne kə sôwâ Zuwif, mum kaw Piyer ge ta so daṇgay'i. Kwa rum gi kəri cer mæni sôwâ Zuwif wə gi kə duwa' mə gi dan dlumu.

⁴Kəki mæni Herodə kaw Piyer, mum ge num ta so daṇgay', bay mum ra' kul soje fədi' kədan handay um ji. Wə du kul rum daṇ' soje wə han fədi' fədi'i. Mum dik kədan mum də kor sôwâ kə rum kəki cer sôwâ Zuwif mə də kə Pakə.

⁵Soje wə ji Piyer wə so daŋgay', ama kul sôwâ Kris wə in dan kə Ifray zə rum kə gbəgbəŋo.

⁶Kə dukri məni Herodə wa' kədan mum də kor sôwâ kə Piyer siw, Piyer wə nde sen wə du soje hoḅ, handay gay' num kə cururu hoḅ, bay soje kuni wə ji vun vari so daŋgay'i.

⁷Kəkor sar, vay sin Bârî mə wafray mbə day, bay ri mə bu dəri wə rawti tak i so daŋgay'i. Vay sin Ifray mə wafray nə gay Piyer dla' sen, bay la' ne numu: «A car fray ga'ri!» Cururu ulay' mbə ba rum njay ta nya.

⁸Vay sin Ifray mə wafray nə faŋ la' ne numu: «A baŋ fir ru, bay a no' təraka.» Piyer gi ndəna', bay vay sin Ifray la' ne numu: «A ge mbraw wû, bay a ji zu rini.»

⁹Piye ji zu rum pâ mbə so daŋgay'i. Mum dik i kwa məni vay sin Ifray mə wafray wə gi nə cu kəzin' mi. Mum dik i mum we kwa.

¹⁰Handay pâ tu kul soje mə cop məni wə ji vun vari tak i so daŋgay', bay handay faŋ pâ tu kul soje hoḅ rum məni wə ji vun vari so rum, bay handay mbə day vun vari mə njike məni ar vun rum ta ga' mbok so: Vun varirum ar kə tu rum kor nday, bay handay wuru. Handay ra' vari, bay kəkor sar vay sin Ifray mə wafray nə 'ya ar Piyer,

¹¹kəri rum, Piyer we kwa məni gi tu rum, bay mum ini: «Mgbaŋ ni nə, na we si, kəzini: Bârî sin vay sin um mə wafray hay' rin bay mum ulay' nan wə du gbəgbəŋ Herodə kə du kwa mə bro' daŋ' məni sôwâ Zuwif wə keḅ kədan handay də gi wa rini.»

¹²Kəri məni mum we kwa məni gi tu rum ndəna', mum 'ya ta so Mari, ya Zaŋ mə də kə Markə: Raw sôwâ bawa han kədan handay in dan kə Ifraya.

¹³Piye mbə tu' vun vari, bay i sin mə də kə Rode ta kədan ar vun vari bay dām də rumu.

¹⁴Ta mun wor Piyer, bay ta tuk kədam hâ ta faŋ ne ta rawti so, dan ar vun vari, bay la' ne kə sôwâ i Piyer wə rəka.

¹⁵Handay dām vun sa: «Həŋ laya!» Ama ta də kofo kə in i mum nə kəzini! Zə rum, handay ini: «Vay sin um na.»

¹⁶Kəri rum Piyer car hâ wə tu' vun vari. Kəri məni handay ar vun vari, handay we num bay kwa rum jin' wa ne ndaya.

¹⁷Piye hâ' nday kə ba kədan handay seŋ vun, bay mum in vari məni Bârî ulay' num mbə so daŋgay' ne ndaya. Mum faŋ la' ne ndaya: «I də in dan rum ne kə Zakə kə daw ba man məsini.» Kəki rum, mum pâ 'ya ta ri məsini.

¹⁸Kəri məni bəka ra' si, soje do dan kə ci vun mbok nji: Mi nə mbə gi Piyer nə su?

¹⁹Herodə sin soje kədan handay um keḅ, ama handay cu za' num mi. Mum faŋ ci vun soje məni ji vun so daŋgay', bay mum ne vari ne kə soje məsin kədan kuni ci ndaya. Kəki rum, Herodə ar nya Zude kədan mum də so Sezare, bay mum suk wə hana.

²⁰Herodə tle bak bayrum wa sôwâ so Tir kə so Sidon. Zə rum, handay bawə mbə hay' rumu. Cop rum handay gila' dan kə Blastus, bə ji vun so jwa. Kəki rum, handay ta kor Herodə, bay handay o num kədan heḅ nə ke mbok nday, zə nya nday wə za' kwati car mbə nya Herodə.

²¹Kəri mənɪ bəka mənɪ Herodə cin nə mbə day, mum ge mbraw jwə um, mum suk wa kwasuk um, bay mum ka' dan ne kə sôwâ.

²²Sôwâ do dana: «Sumra' cu kə mənɪ wə ka' dan nə mi, ama ifray na!”

²³Ama kəri rum sar, vay sin Bârî mə wafray mbə pum Herodə kə gaḅ, zə mum ve mbra' Ifray cin ta wa tu rumu. Dgun sik rawti rum, bay mum mara.

²⁴Dan Ifray pla' ta kofo kofo.

²⁵Kəri mənɪ Barnabas kə Sol ndo' sin nday wə so Jeruzalem, handay faṅ gewa. Handay tle Zaṅ mə de kə Markə kə ndaya.

Sin Daw Sini 13

¹Wə du kul sôwâ Kris mə so Anṭiyosə, sum ka' dan kə sum ta' kwa kəta'a: Barnabas, Simeyən mə de kə Swə mə Ura', Lusiyus mə so Siren, Manayen mənɪ zə bây Herodə, toṅ nya Zude, kə Sol.

²Fəta məsin, kəri mənɪ handay wə bur Bârî kə saṅ kwa, Simbed' mə Kələṅ la' ne ndaya: «I da' Barnabas kə Sol kədan handay gi sin mənɪ na de nday zə rumu.”

³Kəki mənɪ handay saṅ kwa bay in dan kə Ifray, handay njay ba wa nday bay sin ndaya.

⁴Ndəna' Simbed' mə Kələṅ sin Barnabas kə Sol. Handay ta so Selusi bay handay ur ta rawti da wə han kədan handay də nya Siprə mənɪ suk wə du mbi.

⁵Kəri mənɪ handay ta day so Salaminə, handay təṅ kə ka' dan Ifray wə so Ifray sôwâ Zuwif. Zaṅ Markə kəta' kə nday kədan mum nday jini.

⁶Handay gaṅ wə nya rum daṅ' hâ ta day so Pafos. Handay ta za' bə gi yew mə de kə Bar-Zezu wə hana. Mum nə swə Zuwif mənɪ wə gi tu rum ce' ndə bə ka' dana.

⁷Mum suk wə hay' Sergiyus Pawulus, toṅ nya rumu. Mum nə swə mə kə gwete. Toṅ nə de Barnabas kə Sol mbə kor rum zə mum wə wa' kədan mum mun dan Ifraya.

⁸Ama bə gi yew mənɪ sôwâ um de kə Elimas kə vun grek, cu ve dan nday mi, bay mum keḅ kədan mum gi toṅ nə ar dan mənɪ mum ve.

⁹Kəri rum, Simbed' mə Kələṅ mbə nyen vunduk Sol mə de kə Pol ta', mum pe i wa bə gi yew nə

¹⁰bay la' ne numu: «Ha vay Satan, ha bə sî kwa mə bay daṅ', ha bə vur vur kə bə bro' dan, ha ndo' vun faṅwa dan mə kəzin' Bârî kə hay dan kə ma su?

- ¹¹A kar ri', mgbaŋ ni nê Bârî dē wû pumu. Ha dē faŋ dēŋâr, bay ha cu dē we fêta mi du baka cepe.» Kêkor sar, i Elimas dēŋâr, bay mum za' tu rum wê du ri mē ura'a. Mum faŋ gaŋ lam ri kêb swê kēdan bē rum kaw ba rumu.
- ¹²Kêri mēni toŋ nê we kwa rum gi ndēna', mum ve Kris. Kwata' mēni in dan wa Bârî jin' wa ne numu.
- ¹³Pol kê sôwâ mēni kê rum ur kuni ta rawti da wê so Pafos kēdan handay dē so Perge mē nya Pamfili. Zaŋ ar nday wê han, bay faŋ ta so Jeruzalem.
- ¹⁴Handay car mbê so Perge ta day so Anŋiyosê mē nya Pisidi. Kê fêta pemây sôwâ Zuwif, handay cok ta so Ifray sôwâ Zuwif bay gay' wê hana.
- ¹⁵Kêki mēni sôwâ in dan mē du dērwa dan dlay Moyizê kê mē du dērwa sum ka' dan, sum rôwâ mē so rum sin sin ta hay' nday ini: «Daw ba mba, hi la' kê dan kēta' kēdan hi in ne kê sôwâ kēdan hi nday jeŋ kê ndi si, i in ye!»
- ¹⁶Pol car fray, mum hâ' nday kê ba bay ini: «Hi sôwâ Israyel kê hi sôwâ mēni cu zê saŋ sôwâ Zuwif mi mēni wê ne wêlok Ifray wê ti, i mun dan mana!
- ¹⁷Ifray mēni sôwâ Israyel wê um bur, mum kê mēni da' ba mbri ramba. Mum kê mēni dlêr nday ta kofo kêri mēni handay gay' ce' ndê rækway wê nya Egip, bay mum kê mēni wur kê nday mbê nya Egip kê gbêgboŋ umu.
- ¹⁸Mum kê mēni red'vunduk wa nday du kim gufêdî' wê du igopo.
- ¹⁹Mum kê mēni bru zê saŋ cem cem sedâ' wê nya Kana bay faŋ ne nya nday ne kê sôwâ um ce' ndê nya mē kêca ndaya:
- ²⁰Kwa rum daŋ' gi du kim ke kis fêdî' kê guvatla. Kêki rum, mum ne sum bok dan ne nday hâ day ri bē ka' dan mē dē kê Samiyel.
- ²¹Kêki rum, handay o jwê, bay Ifray ne Sol vay Kis, swê zê saŋ Benyami ne ndaya. Mum suk jwê kim gufêdî'i.
- ²²Kêki mēni Ifray par jwê wa Sol, mum faŋ ne David ne nday ce' ndê jwê ndaya. Mum in dan wa rumu: "Na za' David, vay Jese, mum nê swê mēni kēdam tu rin bay mum dē gi kwa daŋ' mēni na wa' i nê gi."“
- ²³Ifray faŋ ne Zezu, daw du daw rawti David, ce' ndê Bê Sid' zê sôwâ Israyel ce' ndê mēni mum kawvun wa rum kê ndaya.
- ²⁴Cop ka Zezu cu mbê mēto', Zaŋ wê ka' dan dē sôwâ Israyel daŋ' kēdan handay faŋ vunduk nday bay ve baptem.
- ²⁵Kêri mēni Zaŋ hêre' kê ndo' sin um, mum ini: "Hi dîk i na sa su? Na cu swê mēni hi wê ji wa rum nê mi! Ama i kar ri', bē rum wê dē mbê kêki rin bay na cu nde i kēdan na par têrak sem rum mi.”
- ²⁶«Daw ba man, hi daw rawti Abraham kê hi sôwâ mēni cu zê saŋ sôwâ Zuwif mi mēni wê ô Ifray ti, Ifray sin dan sid' mēni nê mbê ne mba.

²⁷Ama sôwâ so Jeruzalem kə sôwâ rôwâ nday cu ve kuni i Zezu nə Bə Sid na mi. Bay handay cu mun zu dan sum ka' dan mənî sôwâ wə in kə fəta pemây sôwâ Zuwif daŋ' nə mətə', kə ndi nə daŋ', handay gi dan sum ka' dan mənî nə kəri mənî handay bok dan wa Zezu.

²⁸Ko kəri mənî handay cu za' zu dan kədan handay bok dan wa rum mi, handay o Pilatə kədan mum um ci.

²⁹Kəki mənî handay gi kwa daŋ' mənî Derwa Ifray wə in dan rum wa Zezu, handay ulay' mar um mbə wa gu, bay handay mo' num,

³⁰ama Ifray par num mbə mar,

³¹bay Zezu ta' tu rum ne kə sôwâ mənî ke ta zə rum daka nya Galile hâ so Jeruzalem bəka raw, bay mgbaŋ ni nə handay sum we njeŋ dan rum kədan handay in dan wa rum ne kə sôwâ Israyel.

³²Namba kə tu mba, namba tle Dan mə Kədam mənî nə mbə ne ni: Kwa mənî Ifray kawvun wa rum kə ba mbri ramba,

³³mgbaŋ ni nə, Ifray gi kwa rum zə mba, daw rawti nday, kəri mənî mum par Zezu mbə mar ce' ndə mənî dan rum wây' wə du Nyem David sapitrə hobo: Ha vay man, Tam na faŋ ba wû."

³⁴«Dan mənî Ifray in i mum də par Zezu mbə mar bay tu rum cu də faŋ cim kpe mi nə ni na: Na də mi kuswa' kə kuswa' mə bay bay njeŋ mənî na kawvun wa rum kə David

³⁵Bay mum jeŋ dan rum wə ri məsini: Ha cu də ar tu Swə mə Kəleŋ wû cim mi.

³⁶Kəri mənî David gi sin mənî Ifray ne num kədan mum gi kəri rum, mum mara. Sôwâ mo' num hay' ba mbi um bay tu rum cimi.

³⁷Ama swə mənî Ifray par num mbə mar cu cim mi.

³⁸Daw ba man, say hi we njeŋe: Sôwâ wə ka' dan vrum kwa mə bro' kə Zezu mi ne.

³⁹Sa su daŋ' mənî ve num, mum də vrum kwa mə bro' bə rum daŋ', kwa mə bro' mənî dan dlay Moyizə cu gak vrum mi.

⁴⁰I kaw wa ri kədan kwa mənî sum ka' dan in dan rum nə mbə wa ri mi:

⁴¹I kar ri', hi sôwâ mənî wə jed' dan Ifray, i gay' sototo bay i də vi' ye! Zə na wə gi sin du bəka mi mənî hi cu də ve mi, ko swə la' pay zu rum ne ni daŋ'ŋ."

⁴²Kəri mənî Pol kə Barnabas wur mbə so Ifray sôwâ Zuwif, sôwâ ci vun nday kədan kuni faŋ mbə ka' dan wa dan mənî nə ne nday kərem kə fəta pemây sôwâ Zuwif mə kəki.

⁴³Kəki mənî ba ndo', sôwâ juk wə du sôwâ Zuwif bay du sôwâ mənî cu zə saŋ sôwâ Zuwif mi mənî wə ta zə vun fur sôwâ Zuwif ji kuni zu Pol kə Barnabas. Pol kə Barnabas ge dan kə nday, bay handay jeŋ vunduk ne nday kədan kuni gay' ŋgədiŋ' wə du bay Ifraya.

⁴⁴Kəri mənı fəta pemây sôwâ Zuwif mbə day, sôwâ so rum daŋ' ɓa kədan handay mun dan Bârî.

⁴⁵Kəri mənı sôwâ Zuwif we raw sôwâ ndəna', handay gi sây' juku. Handay ge dan mə bro' wa dan mənı Pol ka', ɓay handay i numu.

⁴⁶Pol kə Barnabas in dan ne nday dan wəloko: «Bay kədan dan Ifray nə ka' hay' ri copo! Ama zə hi vad' dan rum ɓay hi kar i hi cu nde i kədan hi fe nyî mə də hâ mi, namba də mi ar ɓay namba də hay sôwâ mənı cu zə saŋ sôwâ Zuwif mi.

⁴⁷Zə Bârî in dan mənı nə ne mba: Na cin nu ce' ndə ri mə ɓu zə sôwâ mənı cu zə saŋ sôwâ Zuwif mi, kədan ha tle dan sid' ne kə sôwâ nya daŋ'ŋ.”

⁴⁸Kəri mənı sôwâ mənı cu zə saŋ sôwâ Zuwif mi mun dan rum, handay tuk kədam, ɓay handay təŋ kə gi mbra' ne kə dan Bârî. Sôwâ daŋ' mənı Ifray da' nday kədan handay də fe nyî mə də hâ, handay ve Kris.

⁴⁹Dan Bârî pla' wə nya rum daŋ'ŋ.

⁵⁰Ama sôwâ Zuwif ɓu zu rawkwa mə kə semde mənı wə ô Ifray kə sôwâ mə kə mbra' mə so rumu. Handay təŋ kə keɓ zu Pol kə Barnabas ɓay handay 'way nday wə nya ndaya.

⁵¹Zə rum, sôwâ mə hoɓ kuni tu' ɓərim sem nday ta wa nday, ɓay handay 'ya ta so Ikoniyo.

⁵²Sôwâ mənı ta zə Zezu mə so Anɓiyosə tuk kədam juk, ɓay Simbed mə Kələŋ nyen vunduk ndaya.

Sin Daw Sini 14

¹Pol kə Barnabas cok ta rawti so Ifray sôwâ Zuwif mə so Ikoniyo ce' ndə mə ɓa'a. Handay ka' dan ne kə sôwâ mənı wə han kə gbəgboŋ hâ sôwâ Zuwif kə sôwâ grek juk ve Kris.

²Ama sôwâ Zuwif mənı cu ve dan rum mi ɓu zu sôwâ mənı cu zə saŋ sôwâ Zuwif mi kədan handay dık dan mə bro' wa daw ba ndaya.

³Pol kə Barnabas gay' wə so Ikoniyo ɓəka rawa. Handay ka' dan Bârî ne kə sôwâ dan wəlök ɓay Bârî ta' i dan mənı handay wə ka' wa ɓay um nə kəzin' kə ne gbəgboŋ nday ne kədan handay gi kwa cem cem mə jin' wa sôwâ kə yew cem ceme.

⁴Sôwâ so rum ɓul nji hoɓ wa dan rumu: Sôwâ məsin wə zə sôwâ Zuwif, ɓay sôwâ məsin wə zə sum sini.

⁵Sôwâ Zuwif kə sôwâ mənı cu zə saŋ sôwâ Zuwif mi kə sôwâ rōwâ nday gila' tu kuni kədan handay rik Pol kə Barnabas ɓay kədan handay nday ge kə gway'i.

⁶Kəri mənı handay mun dan rum, handay ne ta so Listrə kə so Derbe wə nya Likoni kə pəɗək ndaya.

⁷Handay təŋ kə ka' Dan mə Kədam wə hana.

- ⁸Swə məsin kəta' wə so Listrə. Mum suk hurbu daka vra' um, bay mum cu ta daw mi.
- ⁹Mum mun dan məni Pol in, Pol pe i wa rum bay we i zə mum ve dan rum, mum gak cara.
- ¹⁰Zə rum, mum la' dan ne num kə gbəgboŋo: «A car ca kə sem ru!» Mum dam car kə sem rum bay təŋ kə ta.
- ¹¹Kəri məni raw sôwâ we kwa məni Pol gi, handay do dan kə vun Likoni: «Ifray kuni faŋ tu nday ce' ndə sumra', bay handay dam mbə du mba.»
- ¹²Handay də Barnabas kə Zes, bay də Pol kə Hermes, zə dan daŋ' pâ mbə vun rumu.
- ¹³Bə po' fur ifray mə də kə Zes, məni so po' fur rum dam wə vun gam so rum, mbə kə ba naw mə rôwâ kə wədi kwa wə vun gam so rumu. Mum kə raw sôwâ daŋ' wə wa' kədan handay po' fur kə ndi kor Pol kə Barnabas.
- ¹⁴Ama kəri məni sum sin, Pol kə Barnabas mun dan kwa məni sôwâ wə də gi, handay ngâr mbraw tu nday, bay handay pik ne ta du sôwâ kə do dana:
- ¹⁵«Sôwâ kuni, zə mi hi gi ndəna' su? Namba ta', namba sumra' ce' ndə hi. Namba mbə ka' Dan mə Kədam mi ne kədan namba mi də kədan i ar kwa uray mə ni kuni, bay i faŋ də hay' Ifray mə kə i məni gi fray kə nya, bay ya mbi kə kwa daŋ' məni wə hana.
- ¹⁶Ba' si, Ifray ar sôwâ daŋ' tle vari məni handay wə wa'a.
- ¹⁷Kə ndi nə daŋ', mum wə ta' tu rum kə kwa mə bay məni mum wə gi ne kə sôwâ bəka daŋ'ŋ. Daka wafray mum wə gi bay um hay' ri kə sin buŋô mi ne, kə wakaya cem cem kəri nday, mum wə ne kwati mi ne bay mum wə nyen vunduk ri kə tuk kədamā.»
- ¹⁸Ko kəri məni sum sin kuni in dan ndəna', handay tak sôwâ məni wə wa' po' fur kor nday kəciki.
- ¹⁹Sôwâ Zuwif car wə so Anŋiyosə mə nya Pisidi kə so Ikoniom ta wə hana. Handay bu zu raw sôwâ bay handay ge Pol kə gway' kədan handay um ci, handay faŋ dlam num wə mbok so pâ ta rəka kə rum, zə handay dik i mum mar si.
- ²⁰Ama kəri məni sôwâ məni ve Kris ba mbə hay' rum, mum car fray bay faŋ ta du so. Siw rum, mum ta so Derbe kə Barnabas.
- ²¹Pol kə Barnabas ka' Dan mə Kədam wə so Derbe. Sôwâ juk faŋ sôwâ məni ta zə Zezu wə hana. Kəki rum, handay faŋ ta so Listrə kə so Ikoniom bay so Anŋiyosə mə nya Pisidi.
- ²²Handay jeŋ vunduk ne kə sôwâ məni ve Kris bay la' ne nday i kuni gay' ngədiŋ' wə du dan məni handay ve. Handay la' ne ndaya: «Say namba ce boni juk kədan namba də ze ri məni Ifray wə də suk jwə wa mba.»
- ²³Wə du kul sôwâ Kris daw daw daŋ', handay da' sum rôwâ, kəki məni handay saŋ kwa bay in dan kə Ifray, handay ar nday ta ba Bârî məni handay ve numu.
- ²⁴Kəki rum, handay ta pâ nya Pisidi bay ta day nya Pamfili.

²⁵Handay ka' dan Ifray wə so Perge bay handay faɲ ta so Atali.

²⁶Handay ur ta rawti da wə han kədan handay də so Aɲtiyosə, so mənɪ sôwâ ar nday wə du bay Ifray zə sin mənɪ handay gi ndo' mgbəɲ ni na.

²⁷Kəri mənɪ handay ta day so Aɲtiyosə, handay bəwa kul sôwâ Kris mənɪ wə han, bay handay in zu dan kwa daɲ' mənɪ Ifray gi kə nday ne nday, kə vari mənɪ Ifray ar vari zə sôwâ mənɪ cu zə saɲ sôwâ Zuwif mi kədan handay ve num ta'a.

²⁸Handay bar wə han kə sôwâ mənɪ ve Kris bəka rawa.

Sin Daw Sini 15

¹Sôwâ məsin car wə nya Zude ta so Aɲtiyosə bay təɲ kə ta' kwa mənɪ nə ne kə daw ba nday mə du Kris: «Hi la' cu tagura ce' ndə mənɪ dan dlay Moyizə ne vari rum ne ni mi si, hi cu gak sid' mi.»

²Pol kə Barnabas vad' dan nday bay təɲ kə way dan kə nday juk wa dan rumu. Zə rum, handay da' Pol kə Barnabas kə sôwâ məsin mə so Aɲtiyosə cep kədan handay də so Jeruzalem kədan handay də ge dan wa dan rum kə sum sin kə sum rôwâ mə du sôwâ mənɪ ve Kris mənɪ wə hana.

³Kul sôwâ Kris mənɪ wə han sin ndaya. Kəri mənɪ handay ta pâ nya Fenisi kə nya Samari, handay in dan mənɪ sôwâ mənɪ cu zə saɲ sôwâ Zuwif mi faɲ mbə hay' Ifray ne kə sôwâ. Dan rum kədam tu daw ba daɲ'ɲ.

⁴Kəri mənɪ handay ta day so Jeruzalem, kul sôwâ Kris mənɪ wə han, kə sum sin bay sum rôwâ mə du sôwâ mənɪ ve Kris ve nday, bay handay in zu dan kwa daɲ' mənɪ Ifray gi kə nday ne ndaya.

⁵Ama sôwâ məsin mə du kul sôwâ Zuwif mə də kə Farisiyen mənɪ faɲ sôwâ mənɪ ve Kris car fray bay ini: "Say sôwâ mənɪ cu zə saɲ sôwâ Zuwif mi mənɪ ve Kris kuni tagura, bay kuni ta zə dan dlay Moyizə."

⁶Daw sin kə sum rôwâ mə du sôwâ mənɪ ve Kris bəwa kədan handay kar dan rumu.

⁷Kəki mənɪ handay way dan wa rum hâ hâ, Piyer car fray bay ini: «Daw ba man, hi we si, Ifray par nan du ri ba' si kədan na ka' Dan mə Kədam ne kə sôwâ mənɪ cu zə saɲ sôwâ Zuwif mi kədan handay mun bay ve dan rumu.

⁸Bay Ifray, mənɪ wə we vunduk sôwâ, ta' i mum ve nday kəri mənɪ mum ne Simbed' um ne nday ce' ndə mənɪ mum ne mba ta'a.

⁹Mum cu gi nday cem kə mba mi, mum kol vunduk nday zə handay ve dan rumu.

¹⁰La' ndəna' si, zə mi hi kənji' Ifray mgbəɲ ni nə kə cin kwazi' mənɪ ba mbri ramba ko namba cu gak tle mi nə, də wa sôwâ mənɪ ve Kris su?

¹¹Zawa, namba ve i namba sid' zə bay Bârî Zezu ce' ndə handay ta'a."

- ¹²Sôwâ mē ri ɓa ɗaŋ' gay' 'yeŋ 'yeŋ, ɓay handay mun dan Barnabas kē Pol mēni in zu dan kwa cem cem mē jin' wa sôwâ kē yew cem cem ɗaŋ' mēni Ifray gi kē nday wē du sôwâ mēni cu zē saŋ sôwâ Zuwif mi ne ndaya.
- ¹³Kēri mēni handay ndo' vun in zu dan nday si, Zakē ɗam dan ini: «Daw ba man, i mun dan mana!
- ¹⁴Simeyoŋ in zu dan vari mēni Ifray ji sôwâ mēni cu zē saŋ sôwâ Zuwif mi daka tēŋ zu rum kēdan mum ɗa' sôwâ wē du nday kēdan handay faŋ sôwâ mē mumu.”
- ¹⁵Bay dan sum ka' dan wanji ɗaw kē dan rum, zē Dan rum wây' wē du ɗerwa:
- ¹⁶Kēki rum, na ɗē faŋ mbē, ɓay na ɗē faŋ ɗam so David mēni ke bru. Na ɗē faŋ ɗam tan vri rum, ɓay na ɗē gila' rum car ɓaya.
- ¹⁷Kēdan sôwâ mēsin ɗaŋ' ɗē keɓ Bârî, wanji kē sôwâ mēni cu zē saŋ sôwâ Zuwif mi ɗaŋ' mēni na ɗa' nday kēdan handay faŋ mbē zē sem rin, Bârî in dan rum ndēna'a.
- ¹⁸Bârî mēni ta' kwa rum daka ɓa' si.
- ¹⁹Zakē faŋ ini: «Zē rum, na ɗîk i mē gi vari mē kēcik wē kor sôwâ mēni cu zē saŋ sôwâ Zuwif mi mēni faŋ mbē hay' Ifray nē mi.
- ²⁰Ama mē wây' ɗerwa ne nday kēdan mē in ne nday kēdan kuni ar ti tlew mēni sôwâ po' fur kor ifray mē vun fur kē ndi nē si, kēdan kuni ar gi ghēghay, ɓay kēdan kuni ar ti tlew mēni sôwâ kēkô', kē ar ti wēswa.
- ²¹Zē daka ɓa' si, sôwâ ka' dan dlay Moyizē wē mbok so ɗaŋ', ɓay handay in dan dlay rum wē rawti so Ifray sôwâ Zuwif kē fēta pemây sôwâ Zuwif ɗaŋ'ŋ.”
- ²²Kēri rum, sum sin kē sum rôwâ mē du sôwâ mēni ve Kris, ɓay kul sôwâ Kris ɗaŋ' gila' dan mbok nday kēdan handay ɗa' sôwâ mēsin du nday ɓay nday sin ɗē so Aŋtiyosē kē Pol kē Barnabas. Handay ɗa' Yudas mē ɗē kē Barsabas kē Silas. Handay hoɓ jak kē semɗe wē du daw ba ndaya.
- ²³Handay sin nday kē ɗerwa mē ni na: Handay wây' dan rum ndēna'a: «Namba daw ba mi, sum sin kē sum rôwâ mē du sôwâ mēni ve Kris. Namba kaw jeɓ ri, hi daw ba mba mēni cu zē saŋ sôwâ Zuwif mi mēni gay' wē so Aŋtiyosē, kē nya Siri, ɓay nya Silisi.
- ²⁴Namba mun i sôwâ mēsin wē du mba ta hay' ri ɓay wē jin' wa mi ne kē mi gi ɗîk dan kē dan ge ndaya. Namba cu sin nday ta hay' ri kē dan dlay rum mi.
- ²⁵Zē rum, namba gila' dan mbok mba kēdan namba ɗa' sum sin ɓay nday sin ɗē mi ne, handay ɗē ɗē kē daw bây mē ɓay mba, Barnabas kē Pol,
- ²⁶mēni ne tu nday zē sin Bârî mba, Zezu Kris.
- ²⁷Zē rum, namba sin Yudas kē Silas ne ni, handay ɗē mi in dan mēni namba wây' ne ni nē kē tu ndaya.

²⁸Zə dan rum kəɗam tu Simbed' mə Kəleŋ ɓay kəɗam tu mba ta' kədan namba cin kwazi' məsin də wa ri mi, say dan dlay məni kuni tawa:

²⁹I ti tlew məni sôwâ po' fur kor ifray mə vun fur kə ndi nə mi, i ti vəswə mi, i ti tlew məni sôwâ kəkô' mi, i gi nja mi. Hi la' ji tu ri hay' kwa məni kuni si, ka hi gi ɓaya. I gay' heɓ ye!"

³⁰Handay sin sum sin kuni, ɓay sum sin kuni ta so Aŋtiyosə. Handay ɓawa kul sôwâ ɗaŋ' məni ve Kris məni wə han ɓay handay ne ɗerwa ne ndaya.

³¹Kəri məni handay in ɗerwa rum, handay tuk kəɗam kə dan rum məni jeŋ vunduk ne ndaya.

³²Yudas kə Silas, handay sum ka' dan, ge dan ne kə daw ba nday hâ hâ kədan handay jeŋ vunduk nday ne, ɓay kədan handay nday ne gbəgboŋ ta'a.

³³Kəki məni handay bar wə han bəka cep, daw ba nday ar vari ne nday kə dan mə ne heɓ kədan handay faŋ də hay' sôwâ məni sin ndaya.

[³⁴Ama Silas tuk kəɗam kədan mum suk wə hana.]

³⁵Ama Pol kə Barnabas bar wə so Aŋtiyosə. Handay kə sôwâ məsin juk ta' kwa kə ka' dan Bârî ne kə sôwâ.

³⁶Kəki rum bəka cep, Pol la' ne kə Barnabas: «Mə faŋ də gaŋ kar daw ba mba wə so cem cem ɗaŋ' məni namba ka' dan Bârî wə han, kədan namba kar vari gay' ndaya.»

³⁷Barnabas wa' kədan mum tle Zaŋ mə ɗe kə Markə kə nday,

³⁸ama Pol ɗik cu ɓay kədan handay um tle kə nday mi, zə mum 'ya ar nday wə nya Pamfili ɓay mum cu ta kə nday hâ ndo' sin nday kpe mi.

³⁹Handay way dan wa rum mbok nday hâ handay ɓul nji. Barnabas tle Markə ur ta rawti da kə rum kədan handay də nya Siprə məni suk wə du mbi.

⁴⁰Pol par Silas, ɓay kəki məni daw ba nday ar num wə du ɓay Bârî, mum 'ya dle.

⁴¹Mum ta pâ nya Siri kə nya Silisi, ɓay mum jeŋ vunduk ne kə kul sôwâ Kris cem cem wə hana.

Sin Daw Sini 16

¹Pol ta day so Derbe kə so Listrə. Swə məni ta zə Zezu Kris mə ɗe kə Timote suk wə hana. Ya um, ta ma zuwif məti ve dan Zezu Kris, ama ba um swə Grek na.

²Daw ba məni gay' wə so Listrə kə so Ikoniyom wə um sâ' juku.

³Pol wə wa' kədan Timote gaŋ kə rumu. Zə rum, mum tle num ɓay tagura rum, mum gi ndəna' zə sôwâ Zuwif məni gay' wə nya rum, zə handay ɗaŋ' we si, ba um swə Grek na.

⁴Wə so cem cem mənɪ handay pā han, handay in dan mənɪ sum sin kə sum rōwā mə du sōwā mənɪ ve Kris mə so Jeruzalem baŋ bay wāy' ne kə sōwā mənɪ cu zə saŋ sōwā Zuwif mi mənɪ ve Kris nə ne nday, bay handay dlay nday kədan kuni ta zə dan rumu.

⁵Zə rum, kul sōwā Kris cem cem wə jeŋ də kofo wə du dan mənɪ handay ve bay raw nday wə dlər də kofo bəka daŋ'ŋ.

⁶Simbed' mə Kələŋ tak nday dan ka' dan Ifray wə nya Azi. Zə rum handay ta pā nya Frizi kə nya Galatə.

⁷Kəri mənɪ handay ta day haga nya Mizi, handay wə wa' kədan handay də nya Bitini, ama Simbed' Zezu tak ndaya.

⁸Zə rum, handay ta pā nya Mizi bay ta day so Trowas.

⁹Kə dukri Pol we kwa: Mum we swə mə nya Maseduwanə car wə um dē: «A mbə nya Maseduwanə kədan a jin mba ri'i!»

¹⁰Kəki kwawe rum sar, namba keɓ vari kədan namba də nya Maseduwanə, zə namba we njeŋ i Ifray dē mba kədan mə də ka' Dan mə Kədam ne kə sōwā nya rumu.

¹¹Namba ur ta rawti da wə so Trowas, bay namba ta nya Samotrasə mənɪ suk wə du mbi. Siw rum, namba ta day so Neyapolis.

¹²Namba car wə han ta so Filip, so rum so mə toŋ wə ga' ri məsin wə nya Maseduwanə. Sōwā so Romə za' so rumu. Namba bar wə so rum bəka rawa.

¹³Kə fəta pemāy sōwā Zuwif, namba wur mbə vun so rum kədan namba də hay' ze, zə namba dɪk i namba gak za' ri mənɪ sōwā Zuwif in dan kə Ifray wə hana. Namba gay' ta nya, bay namba ge dan kə rawkwa mənɪ bəwa wə hana.

¹⁴Ma daw wə du rawkwa kuni mə dē kə Lidi, car mbə so Tiyatir. Ta i gi par zim mə tlew bay ta i bur Ifraya. Ta wə pe hum dan ka' mba zə Bârî ar hum sə kədan ta mun dan mənɪ Pol wə ini.

¹⁵Ta faŋ fe baptem kə sōwā so sə daŋ', kəki rum, ta dē mba kə ini: «Hi la' kar nan ce' ndə ma mətɪ ve dan Bârî kəzin' si, i mbə dam wə so mana.» Bay ta swā kə mba hā namba ve dan sa.

¹⁶Fəta məsin, kəri mənɪ namba wə də ri mənɪ sōwā in dan kə Ifray wə han, i sin məsin mbə ndewa kə mba. Ta kə gam wa sə, gam rum wə sə gi ka' dan wa kwa mənɪ wə də gi kofo ɓo, bay ta wə fe səlay bayrum ne kə sōwā rōwā sə kə dan ka' sa.

¹⁷Ta təŋ kə ta zə Pol kə mba kə ka' dana: «Sōwā mənɪ kuni sum sin Ifray mə wafraŋ na! Handay wə mi ta' vari sid'ne!»

¹⁸Ta gi ndəna' bəka raw, hā dan rum gi Pol tle baka. Mum faŋ i bay la' ne kə gam mənɪ wa ma ra: «Kə semdē Zezu Kris, na dlay nu: A pā mbə wa sa!» Kəri rum sar, gam nə pā mbə wa sa.

¹⁹Kəri mənɪ sōwā rōwā ma rə we i handay cu gak fe səlay zə sə za' mi, handay kaw Pol kə Silas bay dlam nday ta ri bəwa sōwā kor sum rōwā so rumu.

- ²⁰Handay ta kor sum bok dan mə so Romə kə nday bay ini: «Sôwâ mənî kuni wə dənok so mba. Handay sôwâ Zuwif na,
- ²¹bay handay wə ta' dan vun fur mənî dan dlay mba tak mba, hay namba sôwâ mə so Romə, dan ve dan rum ko gi kwa rumu.”
- ²²Raw sôwâ ba kə nday bay car wa ndaya. Sum bok dan kərut mbraw tu Pol kə Silas bay ne vari ne kə soje kədan kuni pe nday kə ləva.
- ²³Kəki mənî handay pe nday juk kə ləva, handay ra' nday cok ta rawti so dāngay'i. Handay la' ne kə soje mə ji vun vari so dāngay' i nə ji nday kə bayrumu.
- ²⁴Kəri mənî soje nə mun dan rum, mum ra' nday cok ta rawti tak i mə zə ndo' so dāngay', bay mum gay' sem nday kə laya.
- ²⁵Kə du dukri, Pol kə Silas wə in dan kə Ifray bay wə bur Ifray kə nyeme. Dāngay' məsin wə nday munu.
- ²⁶Kəkor sar, nya tən kə nyen hā zu so dāngay' dān' nyene. Kəri rum sar, vun vari so dāngay' dān' ar bay cururu mənî soje jew dāngay' kə ndi dān' ulay' mbə ba nday njay ta nya.
- ²⁷Soje mənî wə ji vun vari so dāngay' nə dla' sen, bay kəri mənî mum we vun vari so dāngay' dān' ar hoho, mum par masəlam um kədan mum də ci tu rum kə ndi, zə mum dīk i dāngay' dān' ne si.
- ²⁸Ama Pol dlay dan kə gbəgboŋo: «A ci tu ru mi! Namba kəta' dān' tira.”
- ²⁹Soje nə o ku bay dəma ta rawti so dāngay' kə ndi, tu rum par nyen kə wəlok, bay mum kuduk ta nya kor Pol kə Silas.
- ³⁰Mum faŋ ra' nday wur kə nday bay ci vun ndaya: «Sum rōwâ, na gi ma kədan na sid' su?”
- ³¹Handay dām vun rumu: «A ve Bârî Zezu, bay ha də sid', ha kə sôwâ so wû dān'ŋ.”
- ³²Bay handay ta' dan Bârî ne num kə sôwâ dān' mənî kəta' wə rawti so umu.
- ³³Kəri rum kə du dukri, soje nə ra' nday wur kə nday kədan mum kol mbir ndaya. Kəri rum sar, mum fe baptem kə sôwâ so um dān'ŋ.
- ³⁴Mum ra' Pol kə Silas ur ta rawti so um kə nday, bay mum ne kwati ne ndaya. Mum kə sôwâ so um dān' tuk kədam juk, zə handay ve Ifraya.
- ³⁵Kəri mənî bəka ra' si, sum bok dan mə so Romə sin sôwâ rōwâ soje ta hay' soje mə ji vun vari so dāngay' ini: «A ulay' sôwâ kuni si.”
- ³⁶Soje nə in ne kə Pol: «Sum bok dan sin sôwâ rōwâ soje mbə ne nan i a ulay' ni si. Zə rum, hi gak wur bay i də heḅ ye.”
- ³⁷Ama Pol la' ne kə sôwâ rōwâ soje kuna: «Handay pe mba kə ləva i sôwâ dan bok dan wa mba, namba kə dərwa mənî mba gi faŋ sôwâ mə so Romə ta', handay cok mba

ta dangay'i. Bay mgban ni nê handay wê wa' kédan handay mba ar wur hura hura su? Cu gak gi ndéna' mi! Say handay mbê mba ulay' kê tu ndaya!"

³⁸Sôwâ rôwâ soje kuni fañ ta in dan rum ne kê sum bok dan kuna. Kêri mênî handay mun i Pol kê Silas kê dërwa mênî nday gi fañ sôwâ so Romê nê, wêlok gi nday juku.

³⁹Zê rum, handay mbê hay' Pol kê Silas kê in dan mê so' vunduk ne ndaya. Kêki rum, handay ra' nday wur mbê so dangay' kê nday bay o nday kédan kuni 'ya ar so ndaya.

⁴⁰Kêri mênî Pol kê Silas wur mbê so dangay', handay 'ya ta so Lidi. Kêki mênî handay we daw ba nday mê du Kris mênî wê han, bay handay jêñ vunduk ne nday handay 'ya dle.

Sin Daw Sini 17

¹Handay pâ wê so Amfipolis kê so Apoloni, bay handay ta day so Tesalonikê. So mun dan Ifray sôwâ Zuwif kêta' wê hana.

²Pol ze ta rawti so rum ce' ndê mênî mum wê gi ba'a. Kê fêta pemây sôwâ Zuwif hinji', mum wê way dan kê sôwâ mênî gay' wê han wa dan Dërwa Ifray,

³mum pay zu dan rum ne nday kê ta' i Kris dê ce boni, bay mum dê car mbê mara. Mum la' ne ndaya: «Kris mênî na wê ka' dan rum mi ne, mum nê Zezu mênî na wê ta' mi ne.»

⁴Sôwâ mênî wê du nday ve dan rum bay handay ta zê Pol kê Silas. Sôwâ Grek raw mênî wê ô Ifray kê rawkwa mê kê mbra' juk ta zê nday ta'a.

⁵Ama sôwâ Zuwif gi sây' kê bawâ sum ndal mênî wê gañ mbok so bay handay car dan wê so rum dañ' kê do dana. Handay fañ reñ wa so Jason kédan handay kêb Pol kê Silas wê han kédan handay nday ra' dê kor sôwâ.

⁶Ama handay cu za' nday wê han mi, zê rum handay kaw Jason kê daw ba mênî bay dlam nday ta kor sôwâ rôwâ so rum bay têñ kê ka' dana: «Sôwâ mênî kuni dênok nya wê ri dañ', bay mgban ni nê handay mbê wê tira!

⁷Jason ve nday wê so umu Sôwâ mênî kuni dañ' wê gi kwa cem kê vari dan dlay jwê mê mbri mê so Romê, zê handay wê in i jwê mênî kêta' mê dê kê Zezu."»

⁸Dan rum car vunduk raw sôwâ kê sôwâ rôwâ mê so rum mênî mun dan rumu.

⁹Jason kê sôwâ mênî kê rum po' sêlay dan bok mê wa nday ne kê sôwâ rôwâ mê so rum, bay handay ar ndaya.

¹⁰Kêri mênî ri dli si, daw ba sin Pol kê Silas ta so Bere. Kêri mênî handay ta day han, handay cok ta rawti so Ifray sôwâ Zuwif.

¹¹Sôwâ Zuwif mê so Bere kê wa pâ sôwâ Zuwif mê so Tesalonikê, handay ve dan Ifray kê bê juk, bêka daw daw dañ', handay wê kêb zu dan Dërwa Ifray kédan handay kar dan mênî Pol wê ta' nê la' kênin' si.

- ¹²Sôwâ raw wə du nday ve Kris, bay wə du sôwâ Grek, rawkwa mə kə semde juk kə njiwkwa juk ve Kris ta'a.
- ¹³Ama kəri mənî sôwâ Zuwif mə so Tesalonikə mun i Pol wə ka' dan Ifray wə so Bere ta', handay ta han bay handay tən kə bu zu raw sôwâ bay car vunduk ndaya.
- ¹⁴Kəri rum sar, daw ba sin Pol ta ga' vun ya mbi, ama Silas kə Timote gay' wə so Bere.
- ¹⁵Sôwâ mənî wə cin vari Pol ta kə rum hâ day so Atenə, bay handay fañ gewa mbə so Bere kə dan mənî Pol sin kədan handay ne kə Silas kə Timote. Mum wə wa' i kuni mbə za' num ga'ri.
- ¹⁶Kəri mənî Pol wə ji wa Silas kə Timote wə so Atenə, vunduk ti num juk zə mum we so rum nyen ped' kə ifray mə vun furu.
- ¹⁷Mum way dan kə sôwâ Zuwif kə sôwâ mənî cu zə sañ sôwâ Zuwif mi mənî wə ô Ifray wə so Ifray sôwâ Zuwif. Bay bəka dañ' mum wə way dan wə ri bəwa kə sôwâ mənî wə ndewa kə rumu.
- ¹⁸Sum ta' kwa məsin mə du kul sôwâ mə de kə Epikuriyen kə kul sôwâ mə de kə stoyisiyen tən kuni kə way dan kə rumu. Sôwâ məsin wə du nday ini: «Bə dan mbri mənî nə wa' dan in ma su?» Sôwâ məsin ini: «Namba kar ce' ndə mənî mum wə ka' dan wa ifray vun fur nya məsin mba ne.» Handay in ndəna', zə Pol wə ka' dan wa Zezu kə Pâ mbə mara.
- ¹⁹Zə rum, handay tle num 'ya ta kə rum kor sum rôwâ Fada mə Mbri mənî gay' wə ri bəwa mə de kə Ayeropazə, bay handay ci vun rumu: «Namba gak za' mun zu kwata' mə mbrew mənî ha wə ta' nə su?»
- ²⁰Zə ha ta' dan mə mbrew ne mba, bay namba wə wa' kədan namba mun zu dan rumu.”
- ²¹Zə sôwâ mə so Atenə kə sôwâ rəkway mənî gay' wə han cu gi kwa məsin mi, say ar tu nday kə mun dan mə mbrew bay ge dan wa rumu.
- ²²Zə rum, Pol car ca kə sem kor sum rôwâ Fada mə Mbri mənî gay' wə ri bəwa mə de kə Ayeropazə bay ini: «Hi sôwâ mə so Atenə, na we si, hi sôwâ mənî wə bur ifray cem cem juku.
- ²³Zə kəri mənî na gañ wə mbok so mi, na we ri mənî hi wə bur ifray mi han, bay na za' ri po' fur məsin mənî dan wây' wə wa rumu: "Zə ifray mənî namba cu we mətə'o". Ifray mənî hi wə bur dan we rum, na mbə mi ta' zu dan rumu.”
- ²⁴Ifray mənî gi nya kə kwa dañ' mənî wə han, mum nə Bârî mə wafray kə nya, bay mum cu wə suk wə rawti so mənî sumra' dām kə ba nday nə mi.
- ²⁵Mum cu kə mē' i sumra' gi sin zə rum ce' ndə mənî mum wə wa' kwa ba nday mi, zə mum kə mənî wə ne nyî, kə simbed', bay kwa dañ' ne kə sôwâ dañ'ŋ.

²⁶«Daka swə dāw mum gi zə saŋ sôwâ daŋ', bay mum njay nday wa nya daŋ', cop kəri mənɪ mum cu gi sumra' mətɔ', mum cin ri kə haga nya mənɪ handay wə də gay' hana.

²⁷Mum gi ndəna' kədan handay um keɓ kə ləlam, bay wə du lam ri nday, ke məsin handay də um za' su na. Ama Ifray cu seŋ kə ko sasu du mba mi.

²⁸Zə ce' ndə swə məsin ini: "Zə Ifray namba kə nyî, namba gak nyen tu, bay namba kəta'a." Bay ce' ndə mənɪ sum dā nyem mi məsin ini: "Namba ta', namba daw umu."

²⁹Zə namba daw Ifray, say mə dɪk i Ifray ra' nji kə kwa mənɪ sôwâ wə ri kə njike mə bondo, ko njike mə bu, ko kə gway' ce' ndə dan dɪk ko gwet nday mi.

³⁰Kəri mənɪ sumra' cu we dan Ifray mətɔ', mum cu in dan mə bro' nday mənɪ handay gi dan we rum wa nday mi, ama mgbaŋ ni nə mum wə də sôwâ daŋ' wə ri daŋ' kədan kuni faŋ vunduk ndaya.

³¹Mum cin bəka kəta' dāw mənɪ mum wə bok dan wa sôwâ nya daŋ' njeŋ kə swə dāw mənɪ mum par, mum ta' ne kə sôwâ daŋ' i dan rum kəzin' kəri mənɪ mum par swə nə mbə mara!"

³²Kəri mənɪ handay mun Pol in dan wa swə mənɪ pā mbə mar, sôwâ məsin du nday mây num, ama sôwâ məsin ini: «Namba wa' kədan namba mun dan rum vun ru fəta məsin kəreme."

³³Ndəna' Pol faŋ 'ya ar ndaya.

³⁴Kə ndi nə daŋ', sôwâ məsin mbə hay' rum bay ve dan umu: Wə du nday Denis kəta', mum swə mə du sum rôwâ Fada mə Mbri mə ri bawa mə də kə Ayeropazə kə ma mə də kə Damaris, bay sôwâ məsin ta'a.

Sin Daw Sini 18

¹Kəri rum, Pol 'ya ar so Atenə, bay ta so Korintə.

²Mum ta ndewa kə swə Zuwif mə də kə Akilas wə hana. Mum vra' wə nya Pongtə. Mum car mbə nya Itali kə ma rum, Priskila, zə jwə mə mbri mə də kə Klodə ne vari ne kə sôwâ Zuwif daŋ' kədan kuni 'ya ar so Romə. Pol ta suk kə nday,

³bay zə mum kap dɪke mə kaw jew ce' ndə handay, mum suk kə nday bay handay gi sin wa nji.

⁴Kə fəta pemây sôwâ Zuwif dāw dāw daŋ', Pol wə way dan kə sôwâ Zuwif kə sôwâ Grek mənɪ gay' wə so Ifray sôwâ Zuwif kədan mum nday gi ve dan umu.

⁵Kəri mənɪ Silas kə Timote car mbə nya Maseduwanə ta day han, Pol ar tu rum kə ka' dan tawa. Mum wə ta' i Zezu nə Kris na ne kə sôwâ Zuwif.

⁶Ama kəri mənɪ handay vad' num bay i num, mum tu' bərim mbraw um ta wa nday bay la' ne ndaya: «Hi la' vi' si, ka dan mi na, dan man cu mi! Daka mgbaŋ ni nə na wə də hay' sôwâ mənɪ cu zə saŋ sôwâ Zuwif mi."

⁷Zə rum, mum 'ya ar nday bay ta so swə mə də kə Tisiyus zustus, swə mənɪ wə bur Ifraya. So um wə hay' so Ifray sôwâ Zuwif.

⁸Toŋ so Ifray sôwâ Zuwif nə mə də kə Krispus ve Bârî kə sôwâ so um daŋ'ŋ. Sôwâ juk mə so Koriŋtə mənɪ wə mun dan Pol, ve dan um bay fe baptem ta'a.

⁹Kə dukri, Pol we kwa, wə du kwawe rum, Bârî la' ne numu: «A ne wəlok mi, ama a də kofo kə dan ge wû, a seŋ vun mi.

¹⁰Zə na kəta' kə ru bay swə daw cu gak də cin ba tu ru kədan mum wû gi bro' mi, zə sôwâ man kəta' raw wə so mənɪ na.”

¹¹Pol bar wə so Koriŋtə kim daw kə cer kanki', bay mum ta' dan Ifray ne kə sôwâ mənɪ wə hana.

¹²Kəri mənɪ Galiyoŋ suk toŋ wə nya Akay, sôwâ Zuwif bawa kaw Pol, handay dlam num ta kor sum bok dana.

¹³Bay ini: «Swə mənɪ nə wə keɓ kədan mum gi sôwâ bur Ifray kə vari mənɪ cem kə dan dlay mba.”

¹⁴Pol wə wa' kədan mum ge dan, ama Galiyoŋ la' ne kə sôwâ Zuwif: «Dan rum la' dan mə bro' ko kwa bro' mə mbri si, na də ar tu rin kədan na mun vun ri, hi sôwâ Zuwif.

¹⁵Ama zə dan rum dan mə way dan wa dan cem cem, kə wa dan semdə cem cem, bay wa dan dlay mi, i də gila' dan rum kə tu ri zə dan mi na. Na cu bə bok dan wa dan mə ndani nə mi!”

¹⁶Bay mum 'way nday wə ri bok dan ta rəka.

¹⁷Kəri rum, handay kaw toŋ so Ifray sôwâ Zuwif mə də kə Sostenə bay təŋ kə um pum kor sum bok dana. Ama Galiyoŋ cu tle fur kwa rum mi.

¹⁸Pol bar wə so Koriŋtə hâ. Kəki rum mum 'ya ar daw ba um bay mum ur ta rawti da kə Priskila kə Akilas kədan handay də nya Siri. Cop, kəri mənɪ Pol cu ur ta rawti da mətə', mum bir wa wə so Keŋkreyas, zə mum sur vun.

¹⁹Handay ta day so Efezə, bay Pol ar Priskila kə Akilas wə hana. Mum 'ya ta rawti so Ifray sôwâ Zuwif bay way dan kə sôwâ Zuwif mənɪ wə hana.

²⁰Handay o num kədan nə bar wə hay' nday, ama mum cu mun mi.

²¹Mum 'ya ar nday kə ini: «Ifray la' bə si, na də gewa mbə hay' ri.» Mum faŋ ur ta rawti da wə so Efezə bay 'ya dle.

²²Kəri mənɪ mum ta day so Sezare, mum ta so aŋtiyosə kədan mum kaw jeɓ kul sôwâ Kris mənɪ wə han,

²³Kəki mənɪ mum bar han kî, mum 'ya dle. Mum ta pâ nya Galatə kə nya Frizi kə jeŋ vunduk ne kə sôwâ mənɪ ta zə Zezu daŋ'ŋ.

²⁴Swə Zuwif mə də kə Apolos mənɪ vra' wə so Alezaŋdri mbə day so Efezə. Mum swə mənɪ wə ge dan bay juk, bay mum we Derwa Ifray juku.

²⁵Mum wum dan Vari Bârî, bay vunduk rum nyen ped' kə sây' zə sin Ifraya. Mum wə ka' dan kə ta' kwa wa dan Zezu kə vari rum, ama mum we dan baptem Zaŋ tawa.

²⁶Mum tən̄ kə ge dan dan wəlok wə so Ifray sôwâ Zuwif. Kəri mən̄i Priskila kə Akilas mun dan um, handay tle num ta so nday kə rum, bay handay pay zu dan Vari Ifray kə vari mə bay pâ daŋ' rum ne numu.

²⁷Kəki rum, Apolos wə wa' kədan mum də nya Akay, daw ba um jən̄ vunduk ne num, bay handay wây' dərwa wə hay' sôwâ mən̄i ve Kris wə nya rum kədan kuni ve num kə bayrumu. Kəri mən̄i mum ta day han, mum ge dan kə sôwâ mən̄i ve Kris zə bay Ifraya.

²⁸Zə kə kwata' mən̄i Apolos ta' kə gbəgboŋ, mum ta' kor sôwâ daŋ' i sôwâ Zuwif vi' vari, mum ta' ne nday wə du Dərwa Ifray i Zezu nə Kris na.

Sin Daw Sini 19

¹Kəri mən̄i Apolos wə so Korintə, Pol ta pâ nya mə du gway' hâ mum ta day so Efezə. Mum za' sôwâ mən̄i wə ta zə Zezu mən̄i wə han,

²bay mum ci vun ndaya: «Kəri mən̄i hi ve Kris, hi fe Simbed' mə Kələŋ si su?» Handay dām vun rumu: «Namba cu mun i Simbed' mə Kələŋ kəta' dāw mi.»

³Pol faŋ ci vun nday kəreme: «Hi fe baptem mə mi su?» Handay dām vun rumu: «Baptem mə Zaŋ.»

⁴Pol la' ne ndaya: «Zaŋ wə gi baptem wa sôwâ mən̄i faŋ vunduk nday, bay mum wə in ne kə sôwâ Israyel kədan kuni ve swə mən̄i wə də mbə kəki rum, wa' dan ini: Zezu.»

⁵Kəki mən̄i handay mun dan rum, handay ve baptem kə semdē Bârî Zezu.

⁶Pol njay ɓa wa nday, bay Simbed' mə Kələŋ dam mbə wa ndaya: Handay tən̄ kə in dan kə vun mən̄i swə cu gak we mi, bay handay ka' dan mən̄i Ifray ne ndaya.

⁷Raw njiwkwa rum ce' ndə mə guɓ wa hobo.

⁸Wə du cer hinji', Pol gaŋ də rawti so Ifray sôwâ Zuwif bay ge dan han dan wəlok, mum wə way dan wa dan vari Jwə Ifray bay mum wə keɓ kədan mum gi sôwâ ve dan rumu.

⁹Ama sôwâ məsin wə du nday gi wa bokroko. Handay vad' dan rum, bay handay ge dan mə bro' wa dan Vari Bârî kor sôwâ mən̄i ɓawa wə han, zə rum Pol 'ya ar nday bay mum ra' sôwâ mən̄i wə ta zə Zezu 'ya kə nday, bay mum wə way dan kə sôwâ bəka daŋ' wə so ta' kwa swə mə dē kə Tiranus.

¹⁰Mum gi ndəna' kim hoɓ kədan sôwâ daŋ' mən̄i gay' wə nya Azi, sôwâ Zuwif kə sôwâ grek, mun kuni dan Bârî.

¹¹Ifray gi yew mə rôwâ cem cem kə ɓa Pol.

¹²Ndəna' sôwâ ra' mbraw Pol ko vun zim mən̄i dāk tu rum ta hay' sum gaɓ kə ndi, bay gaɓ nday car bay gam pâ mbə wa ndaya.

- ¹³Sôwâ Zuwif mäsini mēni wə gaŋ wə ri daŋ' kə 'way gam wa sôwâ də rəka, handay tuk kədan handay 'way gam wa sôwâ kə semdē Bârî Zezu ta'a. Handay la' ne kə gam kuna: «Na la' ne ni kə semdē Zezu mēni Pol wə ka' dan rum, i wur də rəka!»
- ¹⁴Sôwâ mēni wə gi kwa rum, handay sedā'a. Handay daw mə njiwkwa toŋ po' fur Zuwif mə dē kə Seva.
- ¹⁵Ama gam dām vun ndaya: «Na we Zezu, bay na we Pol si ta', ama hi, hi sa kuni su?»
- ¹⁶Bay swə mə kə gam wa rum nə dam ta wa nday, gbəgbonj um pā wa nday si daŋ'ŋ. Mum rik nday dle tu si, hā handay wur mbə so um pik ne kə tu uray kə mbir tu ndaya.
- ¹⁷Sôwâ daŋ' mēni gay' wə so Efezə, sôwâ Zuwif kə sôwâ grek, mun kuni dan kwa rumu. Wəlok gi nday daŋ', bay handay təŋ kə mbā semdē Bârî Zezu bayrumu.
- ¹⁸Sôwâ juk wə du sôwâ mēni ve Kris mbə do dan kwa mə bro' mēni handay ke gi nə kor sôwâ daŋ'ŋ.
- ¹⁹Sôwâ raw wə du sôwâ mēni wə gi yew ra' dərwa gi yew nday bay mbə ge ku rum kor sôwâ daŋ'ŋ. Sôwâ in raw səlay cob dərwa rum, bay handay za' raw səlay rum i mbu gu vatla.
- ²⁰Ndəna', kə gbəgbonj Bârî, dan um pla' ta kofo, bay raw sôwâ mēni ve dan rum dlər ta kofo.
- ²¹Kəki kwa rum, Pol gila' dan rum wə vunduk rum kədan mum pā wə nya Maseduwanə kə nya Akay, bay kədan mum də so Jeruzalem. Mum ini: «Kəri mēni na la' ta day han si, say na də kar so Romə ta'a.»
- ²²Zə rum, mum sin sum sin um hoḃ wə du sôwâ mēni wə um jin, Timote kə Erastə, ta wə nya Maseduwanə, ama mum kə tu rum gwa' bar wə nya Azi kî.
- ²³Kəri rum, dan car wa dan Vari Bârî bayrumu.
- ²⁴Bə kəda njike mə tlew mə dē kə Demetriyus wə ri daw so kə njike mə bu mēni ra' nji kə so po' fur ifray mə dē kə Artemis, bay sum sin um wə fe səlay kə ndi juku.
- ²⁵Mum bəwa sum sin um kə sôwâ mäsini mēni wə gi sin mə daw kə rum, bay mum la' ne ndaya: «Sôwâ kwa, hi we si, namba wə za' kwa ur tu mba kə sin mēni na.
- ²⁶Ama hi kə tu ri, hi wə we, bay hi wə mun dan kwa mēni Pol nə wə gi: Mum wə in i ifray mēni sôwâ gi kə ba nday kuni, ifray cu mi, hā mum gi sôwâ juk ve dan rum, cu ti wə so Efezə taw mi, ama gwa' kî kədan dan rum ndap nya Azi daŋ' ta'a.
- ²⁷Dan rum cu də dənok sin mba taw mi, ama sôwâ də ar mbra' so po' fur ifray mba mə toŋ mə dē kə Artemis, bay sôwâ mə nya Azi kə sôwâ wa nya daŋ' mēni wə bur ifray rə də sə ar, bay mbra' sə də ndo'o.»
- ²⁸Kəri mēni handay mun dan rum, handay ra' bak bay təŋ kə do dana: «Artemis, ifray sôwâ mə so Efezə rə toŋo!»

²⁹Dan do nday pla' ndap so rum dan'ŋ. Sôwâ ra' Gayus kə Aristarkə bay 'ya ta ri bawa sôwâ kə ndaya. Handay hoɓ jak sôwâ mə nya Maseduwanə məni wə gaŋ kə Pol.

³⁰Pol wə wa' kədan mum də kor sôwâ, ama sôwâ məni ve Kris tak numu.

³¹Sôwâ məsin mə du sôwâ rôwâ mə nya Azi məni bāy um, handay sin sin ta hay' rum kədan handay um o kədan nə də ri bawa sôwâ mi.

³²Kəri rum, sôwâ məni wə ri ba rum dɛɖu dana. Sôwâ məsin wə du nday wə ge dan wa kwa daw, bay sôwâ məsin wə ge dan wa kwa məsini. Bay sôwâ juk du nday cu we zu dan ba nji nday mi.

³³Sôwâ məsin mə du raw sôwâ pay zu dan rum ne kə Alezaŋdrə, swə məni sôwâ Zuwif pla' num ta kor kədan mum də car kor sôwâ. Alezaŋdrə hâ' sôwâ kə ba zə mum wə wa' ge dan kədan mum rigin Gayus kə Aristarkə kor raw sôwâ.

³⁴Ama kəri məni handay mun i mum swə Zuwif na, handay do dan mə daw vun nji dan' hâ hərə' kə ler hobo: «Artemis ifray sôwâ mə so Efezə rə toŋo!»

³⁵Kəri rum, bə wāy' kwa mə so rum tak raw sôwâ kəcik bay ini: «Hi sôwâ so Efezə, sôwâ nya dan' we si: so Efezə nə wə ji so po' fur ifray mə toŋ mə dɛ kə Artemis kə gway' mə bay məni car daka wafray nde mbə nya wə so mba.

³⁶Swə daw cu gak way dan wa dan rum mi. Zə rum, i gay' 'yeŋ, bay i gi kwa dan dik dan mi.

³⁷Hi mbə ti kə sôwâ məni cu dənok so po' fur ko ge dan mə bro' wa ifray mba mi.

³⁸Demetriyus kə sum sin um la' kə dan wa swə məsin si, bəka bok dan kəta', bay sum rôwâ kəta' ta'a. Handay gak də bok dan kor ndaya.

³⁹Hi la' kə dan məsin məni hi wə wa' kədan hi ge si, i də gila' dan rum wə kor raw sôwâ məni wə bawa kə vari rumu.

⁴⁰Namba wə du cik zə sôwâ məsin də tum sem mba i dan car wə so mba zə kwa məni namba gi tama. Dan mə njeŋ kədan namba bawa sôwâ ndəna' cu mi. Namba cu gak pay zu dan rum njeŋ mi.» Kəki məni mum in dan rum, mum ar vari ne kə raw sôwâ 'ya dle.

Sin Daw Sini 20

¹Kəri məni dan do rum ndo' si, Pol bawa sôwâ məni ve Kris bay jeŋ vunduk ne ndaya. Mum faŋ la' ne nday i kuni gay' heɓ ye, bay mum 'ya kədan mum də nya Maseduwanə.

²Mum ta pâ wə nya rum, bay mum jeŋ vunduk ne kə sôwâ məni ve Kris wə nya rum kə dan ka' cem cem juku. Mum faŋ ta day nya Gresə.

³Mum bar han cer hinji'i. Mum wa' ur da kədan mum də nya Siri, kəri rum mum mun i sôwâ Zuwif kawvun wa rum kədan handay də um ci, zə rum, mum faŋ ta pâ nya Maseduwanə.

⁴Bay sôwâ mœni kuni 'ya gaŋ kœ rum ta'a: Sopater, vay Pirus mœ so Bere, kœ Aristarkœ, bay Sekundus mœ so Tesalonikœ, kœ Gayus mœ so Derbe, bay Timote, kœ Tisikœ, bay Trofim mœ nya Azi.

⁵Handay 'ya dle ta kofo bay ta ji wa mba wœ so Trowas.

⁶Kœki cer mœni sôwâ Zuwif wœ gi kœ duwa' mœ gi dan dlum, namba ur ta rawti da wœ so Filip, bay kœki rum bœka vatl, namba ta za' nday wœ so Trowas. Namba bar han bœka sedâ'a.

⁷Fœta pemây kœ riya, namba bœwa kœdan namba ti kwati mœni Bârî ne, bay Pol ka' dan ne kœ sôwâ mœni wœ han, zœ mum wœ dœ 'ya ndœ siw rum, mum ka' dan hâ du i dukri.

⁸Wœ rawti tak i so mœ fray mœni namba bœ wœ han, bangay kœta' wœ han rawa.

⁹Vay jid' mœ dœ kœ Etise suk wœ vun zram. Kœri mœni Pol wœ ka' dan hâ hâ, mum kaw sen hâ mum nde sene. Wœ du nde sen um, mum nde daka vun zram so mœ fray buwa hinji' rum ta nya. Sôwâ tle num, ama mum mar si.

¹⁰Pol dam mbœ gof wa rum, mum tle num kaw mbœ vunduk bay ini: «I dîk dan mi, mum kœ i!»

¹¹Mum faŋ ur ta rawti so, mum bul kwati bay ti kœ ndaya. Mum ge dan kœ nday hâ fœta dam zu, bay mum 'ya dle.

¹²Handay 'ya kœ vay jid' nœ kœ i, bay sôwâ daŋ' tuk kœdama.

¹³Namba 'ya ta kofo Pol, bay namba ur ta rawti da kœdan namba dœ so Asos. Namba dœ tle Pol wœ hana. Mum gila' dan rum kœ mba, zœ mum wœ wa' kœdan mum ta kœ seme.

¹⁴Kœri mœni mum mbœ za' mba wœ so Asos, namba tle num ta rawti da bay namba 'ya ta so Mitilenœ.

¹⁵Namba 'ya wœ han, bay siw rum namba ta day hay' nya Siyo mœni suk wœ du mbi. Sœday' rum, namba ta day hay' nya Samos mœni suk wœ du mbi. 'Bay sœday' mœ day' rum, namba mbœ day so Mile.

¹⁶Pol wœ wa' kœdan mum zop so Efezœ dan car han, zœ mum cu wa' kœdan mum vi' ri wœ nya Azi mi. Mum wœ dœma kœdan mum dœ gi cer sôwâ Zuwif mœ dœ kœ Panjekotœ wœ so Jeruzalem, vari rum la' kœta' si.

¹⁷Pol sin sin wœ so Mile ta so Efezœ kœdan mum dœ sum rœwâ mœ du kul Kris kœdan kuni mbœ hay' rumu.

¹⁸Kœri mœni handay mbœ day hay' rum, mum la' ne ndaya: «Hi we vari mœni na suk kœ ri bœka mœni na ta mbœ day wœ nya Azi.

¹⁹Na gi sin zœ Bârî kœ hom tu, kœ zim i bay wœ du boni mœni na ce kœri mœni sôwâ Zuwif kawvun wa rini.

- ²⁰Hi we si, kəri məni na ka' dan kə ta' kwa ne ni wə ri bəwa sôwâ bay wə rawti so mi, na cu pe' dan mə bay hay' ri ko dāw mi.
- ²¹Na dē sôwâ Zuwif kə sôwâ grek kədan kuni ar kwa mə bro' nday bay faŋ mbə hay' Ifray bay ve Bârî mba Zezu.
- ²²Bay mgbaŋ ni nə, na wə də so Jeruzalem ce' ndə məni Simbed' Ifray wə man pla'a. Na cu we kwa məni də man gi wə han nə mi.
- ²³Say kwa dāw na we si, wə so dāw dāw daŋ', Simbed' mə Kəleŋ wə man in i so daŋgay' kə boni wə man ji."
- ²⁴Ama ko na la' mar, ko na la' cu mar mi, kwa rum cu kə mbra' hay' rin mi, zə dan mə kə mbra' rum, say na ndo' vun gaŋ man bay na də ndo' sin məni Bârî Zezu ne nan kədan na gi, wa' dan ini: Ka' Dan mə Kədam məni in dan wa bay Ifraya.
- ²⁵«Na gaŋ wə du ri daŋ' kə ka' dan wa dan vari məni Ifray wə də suk jwə wa sôwâ um, ama mgbaŋ ni nə, na we si, swə dāw du ri cu də man we za' mi.
- ²⁶Zə rum, na wə mi in ne tama: Swə dāw du ri la' vi' si, dan man cu mi zə vunduk rin fele.
- ²⁷Zə na ka' dan Ifray daŋ' ne ni dan mi pe' dan məsin rumu."
- ²⁸I ji tu ri, bay i ji kul sôwâ Kris məni Simbed' Ifray ar wə ba ri kədan hi ji. I ji kul sôwâ Ifray məni mum coḅ nday kə mar Vay umu.
- ²⁹«Na we si, kəki 'ya man, sôwâ məsin məni ce' ndə dəghaw' mə bro' də mbə du ri, bay handay də pla' wa kul rumu.
- ³⁰Bay ko du ri, sôwâ də car kə hay dan bay də bu sôwâ məni ve Kris kədan handay ta zə ndaya.
- ³¹La' ndəna' si, i ji tu ri bay i dla' wa dan məni na: Wə du kim hinji', fəta kə dukri daŋ', na wə har swə dāw dāw daŋ' du ri kə zim i.
- ³²Bay mgbaŋ ni nə, na ar ni wə ba Ifray kə dan um məni in dan wa bay um məni kə gbəgbəŋ kədan mum gak jeŋ vunduk mi ne, bay kədan mum ne kwa mə bay məni mum cin zə sôwâ um daŋ' ce' ndə bayda mi ne.
- ³³Na cu kə mē' səlay, ko mbraw ba swə dāw mi.
- ³⁴Hi kə tu ri, hi we si, na gi sin kə ba rin kədan na za' kwa məni bay zə rin kə sôwâ məni kə rini.
- ³⁵Wə du kwa daŋ', na ta' ne ni, say mə kawḁa sum ca kə dla' wa dan məni Bârî Zezu in kə tu rumu: Kəri məni swə wə ne kwa, bə rum wə tuk kədam pā mə kəri məni mum wə fe kwa."
- ³⁶Kəki məni Pol in dan ndəna', mum kuduk ta nya kə vun cingit kə nday daŋ' bay in dan kə Ifraya.

³⁷Handay daŋ' təŋ kə ci' kəri məni handay kərek Pol kə ɓa nday mbə jewre ɓay soɓ num kə vun kədan handay um ar vari ne.

³⁸Pâ daŋ' rum, handay wə dɪk dan zə mum in i handay cu də um we za' mi. Kəki rum, handay cin vari rum hâ ta day hay' da.

Sin Daw Sini 21

¹Kəki məni namba ɓul nji kə nday, namba 'ya kə da. Namba ta day nya Kosə məni suk wə du mbi, ɓay siw rum, namba ta day nya Rodes məni suk wə du mbi. Daka han, namba ta day so Patara.

²Namba ta za' da wə han məni wə də nya Fenisi, namba ur ta rawti da rum ɓay 'ya kə ndi.

³Kəri məni namba mbə hərə' kə nya Siprə məni suk wə du mbi, namba wə gak we nya rum, ama namba pâ ga' zu nya rum kədan namba də nya Siri ɓay namba ta day so Tir. Zə handay wə dam kwazi' da wə han, namba dam ta nya wə hana.

⁴Namba za' sôwâ məni ve Kris wə han, ɓay namba bar hay' nday bəka sedâ'a. Kə gbəgbəŋ Simbed' Ifray, handay la' ne kə Pol i nə də so Jeruzalem mi.

⁵Ama kəri məni bəka rum ndo' si, namba 'ya dle kədan namba də gaŋ mba na. Handay, kə rawkwa nday ɓay kə daw nday daŋ' cin kuni vari mba pâ mbok so rum ta rəka. Namba kuduk ta nya kə vun cingit vun ya mbi ɓay in dan kə Ifraya.

⁶Kəki məni namba ne vari ne kə nji, namba ur ta rawti da ɓay handay faŋ ta so ndaya.

⁷Kəri məni namba car wə so Tir ta day so Tolemayus, gaŋ mba mə ta wa mbi ndo' si. Namba kaw jeɓ daw ba mba məni wə han, ɓay namba bar han bəka daw hay' ndaya.

⁸Siw rum, namba 'ya dle ta day so Sezare. Namba cok ta rawti so bə ka' Dan mə Kədam mə də kə Filip, ɓay namba dam wə so umu. Mum daw wə du sôwâ mə sedâ' məni handay da'a.

⁹Mum kə daw rawkwa fədi' məni cu cin nji mətə'o, handay wə ka' dan məni Ifray ne ndaya.

¹⁰Kəri məni namba wə han bəka raw, bə ka' dan mə də kə Agabus car wə nya Zude mbə daya.

¹¹Mum mbə hay' mba, ɓay mum tle zew baŋ fir Pol, mum baŋ sem um kə tu rum kə ɓa rum kə ndi ɓay ini: «Simbed' mə Kəleŋ in dan məni na: Sôwâ Zuwif də baŋ bə zew fir məni nə ndəna' wə so Jeruzalem, ɓay handay də um ar də ɓa sôwâ məni cu zə saŋ sôwâ Zuwif mi.»

¹²Kəki məni namba mun dan rum, namba kə sôwâ məni wə han, namba o Pol kədan nə də so Jeruzalem mi.

¹³Ama Pol dām vun mba: «Zə mi hi wə ci' kə gi vunduk rin par su? Na gila' tu rin cu kədan sôwâ man baŋ taw mi, ama kədan na fe mar wə so Jeruzalem zə semdê Bârî Zezu ta'a.»

¹⁴Zə namba cu gak um tak mi, namba ar num bay namba ini: «Say Bârî nə gi bə umu!»

¹⁵Kəki məni namba bar han bəka cep, namba gila' tu mba, bay namba 'ya kədan namba də so Jeruzalem.

¹⁶Sôwâ məni ta zə Zezu mə so Sezare cin vari mba, handay ta kə mba wə so Nason məni car mbə nya Siprə məni suk wə du mbi. Mum ve Kris ba' si. Namba wə də dam so umu.

¹⁷Kəri məni namba ta day so Jeruzalem, daw ba mba ve mba kə tuk kədamā.

¹⁸Siw rum, Pol ta kə mba wə so Zakə, sum rôwâ mə du sôwâ məni ve Kris daŋ' bawa wə hana.

¹⁹Pol kaw jeḅ nday bay in zu dan kwa daŋ' məni Ifray gi kə tu rum kə sin gi ba rum wə du sôwâ məni cu zə saŋ sôwâ Zuwif mi nə ne ndaya.

²⁰Kəki məni handay mun dan rum, handay gi mbra' ne kə Ifray bay handay faŋ la' ne kə Pol: «Vay ba mba, ha we si, sôwâ Zuwif i mbu raw ve Kris, bay handay daŋ' kaw dan dlay Moyizə kə gbəgboŋo.

²¹Handay mun i ha wə ta' ne kə sôwâ Zuwif məni gay' wə du sôwâ məni cu zə saŋ sôwâ Zuwif mi daŋ' kədan kuni ar ta zə dan dlay Moyizə, bay handay mun i ha wə in nday ne kədan kuni tagura daw nday mi, bay kuni ta zə vun fur sôwâ Zuwif mi.

²²Namba də gi ma su? Zə handay də mun i ha mbə ti si.

²³A gi kwa məni namba də in wû ne. Sôwâ fədi' kəta' wə tira, handay sur vunū.

²⁴A də kə nday, a ba kə nday kəri məni handay wok tu nday bay a po' səlay wa nday kədan handay bir wa ndaya. Ha la' gi ndəna' si, sôwâ daŋ' də we i dan məni sôwâ wə in wa ru nə hay dan na. Ama mə ha, ha wə ta zə dan dlay Moyizə.

²⁵Ama mə sôwâ məni cu zə saŋ sôwâ Zuwif mi, məni ve Kris, namba sin dərwa wə hay' nday kədan namba in zu dan məni namba gila' rumu: Kuni ti tlew məni sôwâ po' fur kə ndi wə hay' ifray vun fur nə mi, ko vəswə, ko tlew məni sôwâ kəkô' nə mi, bay kuni gi nja mi.»

²⁶Zə rum, Pol ra' sôwâ mə fədi' kuni bay siw rum, mum ba kə nday kəri məni handay wok tu nday, kəki rum, mum ze ta rawti so po' fur sôwâ Zuwif, bay mum ka' dan wa bəka mə wok tu nday də ndo', wa' dan ini: Bəka məni sôwâ gak də po' fur zə nday daw daw daŋ'ŋ.

²⁷Kəri məni bəka sedā' rum həre' kə ndo', sôwâ Zuwif mə nya Azi we Pol wə so po' fur sôwâ Zuwif, handay bu zu raw sôwâ daŋ', bay handay kaw numu.

²⁸Handay do dana: «Sôwâ Israyel, i jin mba ri'i! Swə mənɪ wə gaŋ wə ri daŋ' kə ka' dan mə bro' wa sôwâ Israyel, kə wa dan dlay Moyizə, bay wa so po' fur sôwâ Zuwif mənɪ nə ne kə sôwâ daŋ' nə ni na, bay mgbaŋ ni nə, mum ra' sôwâ grek bay cok ta rawti so po' fur mba kə ndaya. Ndəna' mum dənok ri mə bay mənɪ na.»

²⁹Handay in ndəna' zə handay we Trofim mə so Efezə kə Pol wə mbok so, bay handay dɪk i Pol tle num ta rawti so Po' fur sôwâ Zuwif kə rumu.

³⁰Dan do rum pla' ndap so rum daŋ', bay sôwâ car ri cem cem daŋ' bawa mba. Handay kaw Pol bay dlam num wə rawti so po' fur sôwâ Zuwif pâ ta rəka kə rum, bay kəri rum sar, handay ta' vun vari so rumu.

³¹Handay keɓ kədan handay um ci kəri rum, toŋ kul soje mə nya Romə mun i sôwâ car dan wə so Jeruzalem kə mbri rum daŋ'ŋ.

³²Kəkor sar, mum ra' sôwâ rôwâ soje kə soje daŋ', bay handay ne ta hay' raw sôwâ: Kəri mənɪ handay we toŋ soje nə kə soje mə raw rum wə mbə wa nday, handay ar dan pum Pol.

³³Toŋ soje nə jik ta hay' Pol. Mum kaw num bay ne vari ne kə soje um kədan kuni jew num kə cururu hobo. Mum faŋ ci vun i mum sa su? Mum gi mi su?

³⁴Ama wə du raw sôwâ, sôwâ məsin wə do dan wa kwa mə daw, bay sôwâ məsin wə do dan wa kwa məsini. Zə toŋ soje nə cu gak mun zu dan rum kə bayrum wə du dan do nday nə mi, mum ne vari ne kə soje um kədan kuni də so soje kə rumu.

³⁵Kəri mənɪ handay ta day vun gam kə rum, soje kuni tle num fray kə ba, zə raw sôwâ ra' bak juku.

³⁶Sôwâ daŋ' wə ta zə rum kə do dana: «I ci numu!»

³⁷Kəri mənɪ soje kuni həre' kə cok də so rum kə rum, Pol ci vun toŋ soje na: «Na gak fe vari kədan na in dan wû ne si su?» Toŋ soje nə dam vun rumu: «Ha we vun Grek si su?»

³⁸La' ndəna' si, ha cu swə mə nya Egip mənɪ car dan wây bay ra' soje mə bar nya mbu fədi' mbə kə nday wə du igop nə mi su?»

³⁹Pol dam vun rumu: «Na swə Zuwif na. Na vra' wə so Tarsə wə nya Silisi, na suk wə so mə mbri. Na o nu, a ne vari ne nan kədan na in dan ne kə sôwâ.»

⁴⁰Toŋ soje nə ne vari ne numu. Zə rum Pol ur ta car wə vun so rum, bay mum hâ' sôwâ kə ba. Kəri mənɪ handay daŋ' seŋ vun nday, Pol in dan ne nday kə vun Hebre:

Sin Daw Sini 22

¹«Daw ba man kə ba man kwa, i mun dan mənɪ na wə də in mgbaŋ ni nə kədan na sid' tu rini.»

²Kəri mənɪ handay mun i mum ge dan kə vun Hebre, handay gay' 'yeŋ 'yeŋe. Bay Pol ini:

³«Na swə Zuwif na, na vra' wə so Tarsə wə nya Silisi ama na jeŋ bârî wə ti, so Jeruzalem bay na wum kwawe ɓa Gamaliyel, mum ta' dan dlay ba mbri ramba ne nan njeŋe. Na ke nyen ped' kə sây' zə Ifray ce' ndə hi tama.

⁴Na gi boni ne kə sôwâ mənî wə ta Vari Bârî hâ sôwâ məsin mara. Na ra' njiwkwa kə rawkwa bay cok nday ta so daŋgay'i.

⁵Toŋ po' fur kə sôwâ rôwâ Fada mə Mbri gak in kuni i dan mənî na in nə kəzini. Na fe ɗerwa wə ɓa nday kədan na də hay' daw ba mba mə so Damas. Na ta han kədan na ra' sôwâ mənî ve Kris mənî gay' wə han, bay kədan na mbə so Jeruzalem kə nday kədan handay ce boni.”

⁶«Kəri mənî na wə vari bay na ta hère' kə so Damas, kə fəta du wa, kəkor sar ri mə bu car mbə wafray wədi bayrum mbə wa rini.

⁷Na nde ta nya, bay na mun wor in dan ne nana: "Sol, Sol, zə mi ha wə keɓ zu rin su?"“

⁸Na ci vun rumu: "Ha sa su, Bârî?" Bay mum ɗam vun rini: "Na nə Zezu mə so Nazaret mənî ha wə keɓ zu rini.”

⁹Sôwâ mənî ta kə rin we ri mə bu rum, ama handay cu mun wor swə mənî ge dan kə rin nə mi.

¹⁰Na ci vun rumu: "Na də gi mi su, Bârî?" Bay Bârî la' ne nana: "A car ye, a də so Damas bay sôwâ də wû ta' kwa ɗaŋ' mənî Ifray wə də ne vari rum wû ne kədan a də gi nə wə hana.”

¹¹Na faŋ ɗəŋâr zə ri mə bu mənî wədi bayrum wa rin, zə rum sôwâ mənî ta kə rin kaw ɓa rin ta so Damas kə rini.

¹²«Swə məsin mə ɗe kə Ananiyas kəta' wə hana. Mum wə ô Ifray bay mum wə ta zə dan dlay mba. Sôwâ Zuwif mə so Damas ɗaŋ' wə um mbâ.

¹³Mum mbə za' nana: Mum car hère' kə rin bay la' ne nana: Sol, vay ba man, i ru nə tal ye! Kəri rum sar, i rin tal, bay na we numu.”

¹⁴Mum ini: "Ifray ba mbri ramba par nu ɓa' si kədan ha we bə um, kədan ha we Bə Sin um mə njeŋ, bay kədan ha mun dan ge vun rumu.

¹⁵Zə ha də ke bə in njeŋ dan wa rum kədan ha ka' dan kwa mənî ha we kə kwa mənî ha mun wa rum wə kor sôwâ ɗaŋ'ŋ.

¹⁶Bay mgbaŋ ni nə, ha wə ji mi kərem su? A car ye, a ve baptem bay kwa mə bro' wû də kol kə ɗe semɗe rumu.”

¹⁷«Na faŋ ta so Jeruzalem, bay kəri mənî na wə in dan kə Ifray wə rawti so po' fur sôwâ Zuwif, na we kwa.

¹⁸Na we Bârî, bay mum la' ne nana: "A ɗəma, a pâ ar so Jeruzalem ga'ri, zə sôwâ so rum cu də ve dan mənî ha wə in wa rin nə mi.”

¹⁹Na dām vun rumu: "Bârî, handay we njeŋ i na gaŋ wə rawti so Ifray sôwâ Zuwif cem cem, bay na wə ra' sôwâ mēni ve dan wû bay nday cok də so daŋgay' bay na nday pe.

²⁰Bay kəri mēni sôwâ ci bə in njeŋ dan wû mə dē kə Etiyen, na ke han kə tu rin ta'a. Na tuk kədam kə sôwâ mēni ci num, bay na bə ji mbraw ndaya.

²¹Bârî la' ne nana: "A də ye, zə na də wû sin də seŋ wə hay' sôwâ mēni cu zə saŋ sôwâ Zuwif mi."“

²²Raw sôwâ mun dan mēni Pol wə in hâ day ri mēni mum in dan rumu. Ama zə dan rum, handay təŋ kə do dana: «I vi' wa swə mēni nə si! I ci num si! Cu kəri ke kə i mi!”

²³Handay do dan kə kəfit mbraw nday, bay pik nya ta wafraya.

²⁴Toŋ kul soje mə nya Romə ne vari ne kə soje um kədan kuni də kə Pol wə rawti so nday, bay kuni pe num kə ləva kədan kuni gi num mun zu dan mēni raw sôwâ wə do dan ndəna' wa rum na.

²⁵Ama kəri mēni handay baŋ num kə zew kədan handay um pe, Pol ci vun toŋ soje mēni car wə hana: «Hi kə vari kədan hi pe swə mēni kə dərwa faŋ swə Romə dan bok dan wa rum su?”

²⁶Kəki mēni soje nə mun dan rum, mum 'ya ta hay' toŋ soje nə bay la' ne numu: «Swə mēni nə kə dərwa faŋ swə nya Romə! Ha də gi ma su?”

²⁷Toŋ soje nə ta hay' Pol bay ci vun rumu: «Ha kə dərwa faŋ swə nya Romə su?» Pol dām vun rumu: «Awo.”

²⁸Toŋ soje nə ini: «Na po' səlay bayrum kədan na faŋ swə mə nya Romə.» Pol la' ne numu: «Mə na, na vay rawti sôwâ mə nya Romə.”

²⁹Kəri rum sar, soje mēni wə də um pe kədan handay um gi in zu dan kəzə wur ar numu. Bay kəri mēni toŋ soje nə mun i Pol nə swə mēni kə dərwa faŋ swə nya Romə na, wəlok gi num juk zə mum kə mēni ne vari ne kə soje um kədan kuni baŋ num kə cururu.

³⁰Toŋ soje nə wə wa' kədan mum we njeŋ dan mēni sôwâ Zuwif tum sem Pol kə ndi. Zə rum, siw rum mum ne vari ne kə soje um kədan kuni ulay' cururu Pol, bay mum ne vari ne kə sum rôwâ mə du sum po' fur kə sum rôwâ Fada mə Mbri kədan kuni bawa. Mum faŋ mbə kə Pol bay cin rum wə kor ndaya kədan mun zu dan rumu.

Sin Daw Sini 23

¹Pol cin i wa sum rôwâ Fada mə Mbri bay ini: «Daw ba man, na suk kor Ifray kə kwawe vunduk mə bay hâ tama.”

²Toŋ po' fur mə dē kə Ananiyas ne vari ne kə sôwâ mēni gay' həre' kə Pol kədan kuni pum vun ne numu.

³Pol la' ne numu: «Kəzin' Ifray də wû pum, ha gəlaŋ məni sôwâ tlâ kə bəho'o! Ha suk ti kədan ha bok dan wa rin ce' ndə məni dan dlay in, ama ha faŋ vi' dan dlay rum kəri məni ha ne vari ne kə sôwâ kədan kuni pum nana.”

⁴Sôwâ məni gay' hère' kə Pol la' ne numu: «Ha wə i toŋ po' fur Ifraya!”

⁵Pol dām vun ndaya: «Daw ba man, na cu we i mum nə toŋ po' fur na mi. Zə Dan rum wây' wə du dərwa: A in dan mə bro' wa bârî mə du sôwâ wû mi.”

⁶Pol we si, sôwâ məsin wə du sum rôwâ Fada mə Mbri nə car mbə du kul sôwâ Zuwif mə də kə Sadusiyeŋ, bay sôwâ məsin wə du nday car mbə du kul sôwâ Zuwif mə də kə Farisiyeŋ. Zə rum, mum ka' dan wə kor ndaya: «Daw ba man, na swə Farisiyeŋ na, vay rawti sôwâ Farisiyeŋ, ama na kə dan wa rin, zə na cin vunduk rin i Ifray də ra' sôwâ mbə mara.”

⁷Kəri məni kul sôwâ Zuwif mə də kə Sadusiyeŋ kə kul sôwâ Zuwif mə də kə Farisiyeŋ mun dan rum, handay təŋ kə dle vun mbok nday, bay sôwâ məni ba wə han bul nji hobo.

⁸Kul sôwâ Zuwif mə də kə Sadusiyeŋ wə in i Ifray cu də ra' sôwâ mbə mar mi, bay sum sin Ifray mə wafray cu mi, bay simbed' cu mətə', ama kul sôwâ Zuwif mə də kə Farisiyeŋ ve dan məni kuni daŋ'ŋ.

⁹Dan do nday ta kofo bayrum, bay sôwâ məsin mə du sum pay zu dan dlay, handay wə du kul sôwâ Zuwif mə də kə Farisiyeŋ ta' car fray bay vad' nday kə gbəgbəŋo. Handay ini: «Namba cu za' dan mə bro' wa swə məni nə mi. Ke məsin, kəzin' simbed' ko vay sin Ifray mə wafray ge dan kə rum su na!”

¹⁰Vun dle nday ta kofo bayrum hâ toŋ soje nə ne wəlok i sôwâ də ŋgâr tu Pol. Zə rum, mum ne vari ne kə soje um kədan kuni cok də du sôwâ bay par Pol wə du nday bay də kə rum wə so ndaya.

¹¹Kə dukri rum, Bârî mbə hay' Pol bay la' ne numu: «A kaw vunduk ru! Ha də in njeŋ dan wa rin wə ti so Jeruzalem, bay say a də in njeŋ dan wa rin wə so Romə ta'a.”

¹²Siw rum kə bəka, sôwâ Zuwif bəwa kədan handay kawvun bay handay sur vun kədan handay ti kwati ko ce kwace mi hâ ka handay ci Pol si.

¹³Sôwâ məni kawvun nə, handay pâ gufədi' si.

¹⁴Handay ta za' sum rôwâ mə du sum po' fur kə sum rôwâ mə du sôwâ Zuwif bay la' ne ndaya: «Namba kawvun kə sur vun kədan namba ti kwati mi hâ ka namba ci Pol si.

¹⁵La' ndəna' si, hi kə sum rôwâ Fada mə Mbri daŋ', i ci vun toŋ soje mgbaŋ ni nə kədan nə mbə kə Pol ne ni. I gi ce ndə məni hi wə wa' kədan hi kar njeŋ dan rum, mə namba, namba də gila' tu mba kədan namba də um ci cop ka mum cu mbə day hay' ri mətə'o.”

¹⁶Ama vay njar Pol mun dan kawvun ndaya. Mum 'ya ta so soje, mum ze ta rawti so rum bay in zu dan rum ne kə Pol.

¹⁷Zə rum Pol dē swə dāw mə du sôwâ rôwâ soje bay la' ne numu: «A dā cin vay jid' mēni nā dā hay' toŋ soje, zə mum kə dan kədan mum um in ne.»

¹⁸Soje nā ta kə rum wə hay' toŋ soje nday bay ini: «Daŋgay' mə dē kə Pol dē nan kədan a mbə kə vay jid' mēni nā ne nu, zə mum kə dan kədan mum wū in ne.»

¹⁹Toŋ soje nā kaw ba vay jid' nā 'ya ta rəka kə rum dāw nday bay ci vun rumu: «Ha kə dan mi kədan ha man in ne su?»

²⁰Mum dām vun rumu: «Sôwâ Zuwif kawvun kədan handay wū o kədan a dā kə Pol wə kor sum rôwâ Fada mə Mbri siwi. Handay dā gi ce' ndə mēni handay wə wa' kədan handay kar njeŋ dan rumu.

²¹Ama a ve dan nday mi: Zə sôwâ pâ gufədi' wə du nday wə dā pe' vari kədan handay ci Pol. Handay kawvun wa dan rum kə sur vun kədan handay ti kwati ko ce kwace mi, hā ka handay ci Pol si. Handay gila' tu nday, bay mgbaŋ ni nā handay wə ji dan dām rum wə vun ru taw ye.»

²²Kəki mēni toŋ soje nā har vay jid' nā kədan nā in dan mēni mum in ne num nā ne kə swə dāw mi, mum ar vari ne numu.

²³Kəki rum, toŋ soje nā dē sôwâ rôwâ hoḅ mə du soje um bay la' ne ndaya: «I bāwa soje kis hoḅ, kə sôwâ mə kə nda' gusedā', bay sôwâ mə kə saḅ kis hoḅ, bay i gila' tu ri kədan i dā so Sezare kə bel mə mbri.

²⁴I baŋ nda' zə Pol ta', bay i dā hay' toŋ nya mə dē kə Feliksə kə rum hebe.»

²⁵Mum faŋ wāy' dērwa mēni na:

²⁶«Na Klodə Lisiyas, na kaw jeḅ ru, Feliksə, toŋ nya mə kə mbra'a.

²⁷Na wə in dan mēni nā hay' ru: Sôwâ Zuwif kaw swə mēni nā bay wə wa' kədan handay um ci. Kəri mēni na mun i mum nā swə mə nya Romə, na ta kə soje man bay na sid' num wə ba ndaya.

²⁸Na wə wa' kədan na we dan mēni sôwâ Zuwif tum sem rum kə ndi, zə rum na ta kə rum wə kor sum rôwâ Fada mə Mbri.

²⁹Na za' handay tum sem rum kə dan cem cem wə du dan dlay nday, ama handay cu gak za' dan mə bro' wa rum ko dāw kədan handay gak um ci, ko um ge dā so daŋgay' kə ndi mi.

³⁰Bay kəri mēni na mun i sôwâ Zuwif kawvun wa rum, kəri rum sar na sin num wə hay' ru, bay na la' ne kə sum tum sem rum kədan kuni dā tum sem rum wə kor ru.»

³¹Soje kuni gi ce' ndə mēni toŋ soje nā in ne nday, handay tle Pol kə dukri rum 'ya hā so Aŋtipatris kə rumu.

³²Siw rum, soje mēni ta kuni kə sem faŋ ta so nday bay ar sum nda' ta kofo kə Pol.

³³Kəri mēni sum nda' ta day so Sezare, handay ne dērwa nā ne kə toŋ nya nā, bay handay ar Pol ne num ta'a.

³⁴Toŋ nya nə in dɛrwa rum, bay mum ci vun Pol i mum car mbə nya mə ka su? Kəki mənɪ mum mun i mum car mbə nya Silisi,

³⁵mum la' ne numu: «Kəri mənɪ sum tum sem ru la' mbə si, na də ci vun ru.» Mum faŋ ne vari ne kə soje um kədan kuni ji Pol wə so Herodə.

Sin Daw Sini 24

¹Kəki rum bəka vatɪ, toŋ po' fur mə də kə Ananias mbə day so Sezare kə sôwâ mənɪ mə du sum rôwâ mə du sôwâ Zuwif, bay swə mənɪ we dan dlay dan bok mə də kə Tertulus. Handay mbə gay' wə kor toŋ nya mə də kə Felikse kədan handay tum sem Pol.

²Handay də num, bay Tertulus təŋ kə tum sem rum kə dan mənɪ na: «Toŋ man mə kə mbra', namba za' gay' heɓ zə ru, bay nya mba faŋwa zə gwet wû.

³Namba wə gi soko wû ne bəka daŋ' kə ri daŋ' zə kwa mə bay mənɪ ha wə gi zə mba.

⁴Ama na cu wa' kədan na wû cik kə dan bayrum mi. Zə rum, na o nu kədan a mun dan mba kî kə kəɗama.

⁵Namba za' swə mə ni nə wə dənok sôwâ. Mum wə car dan wə du sôwâ Zuwif wə nya daŋ', bay mum jwə kul sôwâ mə də kə Nazoreyen na.

⁶Mum keɓ vari kədan mum dənok so po' fur mba, bay namba kaw numu. [Namba wə wa' kədan namba bok dan wa rum ce' ndə mənɪ dan dlay mba ne vari rum,

⁷ama toŋ kul soje mə nya Romə mə də kə Lisiyas mbə wə du mba bay bar num ba mba kə gbəgboŋo.

⁸Kəki rum, Lisiyas ne vari ne kə sum tum sem rum kədan kuni mbə wə kor ru.] Ha la' ci vun rum si, ha gak də mun njeŋ dan tum sem rum daŋ' wə vun rumu.”

⁹Sôwâ Zuwif daŋ' kawvun wa dan rum bay in i dan rum ndə na'a.

¹⁰Toŋ nya nə də Pol kə ba kədan nə ge dan, bay Pol ini: «Na we si: Ha nə bə bok dan wa sôwâ nya mə ni nə kim raw si. Zə rum, na tuk kəɗam kədan na ge dan kə tu rin wə kor ru.

¹¹Ce' ndə mənɪ ha gak we njeŋ dan rum kə tu ru, bəka rum cu gi guɓ wa hoɓ mətə', na ta so Jeruzalem kədan na bur Ifray wə hana.

¹²Swə dāw cu za' nan wə ri way dan kə sôwâ wə rawti so po' fur sôwâ Zuwif mi, ko wə ri bu zu raw sôwâ wə rawti so Ifray sôwâ Zuwif, ko wə mbok so mi.

¹³Sôwâ mənɪ kuni cu gak ta' zu dan mənɪ handay tum sem rin kə ndi mgbaŋ ni nə wû ne mi.”

¹⁴Ama na wə in dan mənɪ nə wə kor ru: Na wə bur Ifray ba mbri ramba kə ta Vari Bârî mənɪ handay wə də kə kwata' mə bro' mənɪ wə bul sôwâ. Ama na ve dan daŋ' mənɪ wāy' wə du dɛrwa dan dlay kə dɛrwa sum ka' dana.

¹⁵Na cin vunduk rin wa dan Ifray mēni in i Ifray wə də ra' sôwâ mə bay kə sôwâ mə bro' daŋ' mbə mar, ce' ndə mēni handay ve ta'a.

¹⁶Zə rum, na wə gi tu rin kəcik kədan na ke kə kwawe vunduk mə bay bəka daŋ' wə kor Ifray bay wə kor sumra' ta'a.

¹⁷«Kəki mēni na gaŋ wə rəka so Jeruzalem kim raw, na faŋ ta han kədan na ne səlay mə kaw ba ne kə sôwâ man, bay kədan na po' fur han ta'a.

¹⁸Kəki mēni na wok tu, na po' fur wə rawti so po' fur sôwâ Zuwif. kəri rum, handay za' nan wə hana. Raw sôwâ cu kə rin mi, bay dan do cu mi.

¹⁹Ama sôwâ Zuwif məsin mə nya Azi ke wə han ta'a. Handay la' kə dan wa rin si, say kuni mbə kor ru kədan kuni tum sem rini.

²⁰Ko say sôwâ mə ni kuni in dan mə bro' mēni handay za' wa rin kə ri mēni na car wə kor sum rôwâ Fada mə Mbri,

²¹say wa dan daw mēni na in kəri mēni na ke kor ndaya. Na ini: Na kə dan wa rin zə na ve i Ifray wə də ra' sôwâ mbə mara bay na fe dan bok tama!”

²²Felikse we dan Vari Bârî juku. Zə rum, mum tak dan nday, bay la' ne ndaya: «kəri mēni toŋ soje mə də kə Lisiyas wə də mbə, na də bok dan wa dan mi bo.”

²³Mum ne vari ne kə soje mēni wə ji Pol kədan nə ji num, ama nə gi num bro' mi, bay nə ar bây um kuni gaŋ mbə hay' rumu.

²⁴Kəki rum bəka cep, Felikse mbə kə ma rum Drusil. Ta nə ma Zuwif na. Mum sin də Pol, bay mum mun dan mēni Pol wə in wa dan ve Zezu Kris.

²⁵Ama kə ri mēni Pol təŋ kə in dan wa ta mə bay, kə tak tu, bay dan bok mēni wə də mbə, Felikse təŋ kə ne wəlok, bay mum ini: «Ha gak 'ya mgbaŋ ni na. kəri mēni na la' za' ri si, na faŋ wû də bo.”

²⁶Mum dîk i Pol də um ne səlaya. Zə rum, mum də num sem raw kədan mum ge dan kə rumu.

²⁷Kəki kim hoḅ pâ si, Porsiyus Festus tle ri Felikse ce' ndə toŋ nya rumu. Felikse wə wa' kədan mum gi kwa mə kədam tu sôwâ Zuwif. Zə rum, mum ar Pol wə so daŋgay'i.

Sin Daw Sini 25

¹Bəka hinji' kəki mēni Festus mbə day wə nya rum, mum car wə so Sezare ta so Jeruzalem.

²Sum rôwâ mə du sum po' fur kə sum rôwâ mə du sôwâ Zuwif tum kuni sem Pol wə kor rum wə hana. Handay o Festus

³kədan nə ve dan nday, bay nə sin Pol mbə so Jeruzalem, zə handay bargu rum kədan handay də um ci wə vari.

⁴Ama Festus dām vun nday i Pol wə so daŋgay' wə so Sezare, bay na kə tu rin, na faŋ də han ga'ri.

⁵«Say sôwâ rôwâ mi də cin nan wə so Sezare, bay kuni tum sem rum wə han, mum la' gi kwa mə bro' si.»

⁶Festus bar wə du nday bəka pâ coho' ko guḅ, bay mum faŋ ta so Sezare, siw rum, mum suk wə ri bok dan bay mum ne vari ne kə soje mənɪ wə han kədan kuni mbə kə Pol.

⁷Kəri mənɪ Pol mbə day, sôwâ Zuwif mənɪ car mbə so Jeruzalem reŋ wa rum, bay handay təŋ kə tum sem rum kə dan mə bro' cem cem raw, ama handay cu gak ta' i dan tum sem rum nə kəzin' mi.

⁸Ama Pol riway dan nday kə ini: «Na cu gi kwa mə bro' wa dan dlay sôwâ Zuwif, ko wə so po' fur nday, ko hay' jwə mə mbri mə nya Romə mi.»

⁹Festus wə wa' kədan mum gi kwa mə kədam tu sôwâ Zuwif, zə rum mum ci vun Pol: «Ha wa' kədan ha faŋ də so Jeruzalem kədan na də bok dan wa ru wa dan rum wə han su?»

¹⁰Pol dām vun rumu: «Na ni car wə ri bok dan jwə mə mbri mə nya Romə, bay na wa' kədan dan bok man nə ndo' wə hana. Na cu gi kwa mə bro' məsin hay' sôwâ Zuwif mi, ha we kə tu ru si.

¹¹Na la' gi kwa mə bro', ko kwa məsin mənɪ na nde i fe mar wa rum si, na cu vad' mar rum mi. Ama dan tum sem mənɪ handay wə tum sem rin kə ndi la' cu kəzin' mi si, swə dāw cu gak man ar də ba nday mi. Na wə o vari kədan na də kor jwə mə mbri mə nya Romə.»

¹²Festus faŋ ge dan kə sum rôwâ um, kəki rum mum la' ne kə Pol: «Ha o vari kədan ha də kor jwə mə mbri mə nya Romə, kəzin' ha də kor rumu.»

¹³Kəki rum bəka cep, jwə mə mbri mə nya Romə mə də kə Agripa kə ma rum Bernike mbə day so Sezare kədan handay kaw jeḅ Festus.

¹⁴Handay bar wə han bəka raw, zə rum Festus in zu dan Pol ne kə jwə na. Mum la' ne numu: «Felixə ar swə məsin wə so daŋgay' tira.

¹⁵Kəri mənɪ na ta so Jeruzalem, sum rôwâ mə du sum po' fur sôwâ Zuwif kə sum rôwâ mə du sôwâ Zuwif tum kuni sem rum bay handay o nan kədan na bok dan mar wa rumu.

¹⁶Na dām vun nday i sôwâ mə nya Romə cu kə vari kədan handay ar swə mənɪ kə dan wa rum də ba sum tum sem rum cop dan bə rum za' ri kədan mum mbə wə kor sum tum sem rum bay ge dan siḉ tu rum nə mi.

¹⁷Zə rum handay mbə ti kə rin, na cu vi' ri mi, siw rum na ta suk wə ri bok dan, bay na ne vari ne kə soje mənɪ wə han kədan kuni mbə kə swə na.

¹⁸Sum tum sem rum car fray ge dan, ama handay cu mbə kə dan tum sem mə bro' ce' ndə mənɪ na dɪk nə mi.

¹⁹Handay way dan wa kwata' nday taw, ɓay wa swə mə də kə Zezu mənɪ mar, ama Pol in i mum kə i.

²⁰Na cu we vari kədan na keɓ mun zu dan mə ndani nə mi. Zə rum, na ci vun Pol mum la' wa' kədan mum faŋ də so Jeruzalem kədan na də ɓok dan wa rum wa dan rum wə han si.

²¹Ama Pol o vari kədan jwə mə mbri mə nya Romə də ɓok dan wa rumu. Zə rum, na ne vari ne kə soje kədan kuni ji Pol wə so daŋgay' hā ka na za' ri kədan na gak um sin də hay' jwə mə mbri mə nya Romə.”

²²Agripa la' ne kə Festus: «Na wə wa' kədan na mun dan swə nə kə tu rini.» Festus dām vun rumu: «Siw, ha də mun dan umu.”

²³Siw rum, Agripa kə Bernike mbə kə mbra' juk, ɓay handay cok ta rawti so ɓok dan sôwâ, kə sum rôwâ soje, ɓay sum rôwâ mə so rumu. Festus ne vari ne kə soje mənɪ wə han kədan kuni mbə kə Pol.

²⁴Festus faŋ ini: «Jwə Agripa kə sôwâ daŋ' mənɪ wə ti kə mba, hi we swə mənɪ sôwâ Zuwif daŋ' mbə tum sem rum hay' rin wə so Jeruzalem ce' ndə mə ti ta'a. Handay do dan i mum cu kəri ke kə i za' mi.

²⁵Mə na, na cu za' i mum gi kwa mə bro' mənɪ nde i mum fe mar kə ndi nə mi. Ama mum kə tu rum o vari kədan mum də kor jwə mə mbri mə nya Romə, zə rum na keɓ vari kədan na um sin də hana.

²⁶Na cu we njeŋ dan mənɪ na gak wây' wa rum wə hay' jwə mə mbri mə nya Romə nə mi, zə rum na mbə wə kor ri, pâ daŋ' rum, wə kor ru, jwə Agripa, zə kəki mənɪ ha ci vun rum, na za' dan mənɪ na gak wây' wa rumu.

²⁷Na dɪk cu ɓay kədan na sin daŋgay' dan wây' njeŋ dan tum sem wə wa rum mi.»

Sin Daw Sini 26

¹Agripa la' ne kə Pol: «Vari kəta' kədan ha ge dan sid' tu ru.» Zə rum, Pol hā' sôwâ kə ɓa, ɓay mum ge dan sid' tu rum kə dan mənɪ na:

²«Jwə Agripa, na tuk kədam zə na fe vari tam kədan na ge dan sid' tu rin wə kor ru wa dan mənɪ sôwâ Zuwif tum sem rin kə ndi nə daŋ'ŋ.

³Pâ daŋ' rum na tuk kədam zə ha we dan vun fur sôwâ Zuwif kə dan way nday daŋ'ŋ. Zə rum, na o nu kədan a red' vunduk ru kədan a mun dan mana.”

⁴«Sôwâ Zuwif daŋ' we ta man daka nyêw man, handay we ta man daka kəri mənɪ na ke wə du sôwâ man ɓay kəri mənɪ na ke wə so Jeruzalem ta'a.”

⁵Daka ɓa' si, handay we i na wə du kul sôwâ Zuwif mə də kə Farisiyen. Kul sôwâ Zuwif mə də kə Farisiyen nə wə ta zə vun fur mba njeŋ pā sôwâ məsin daŋ'ŋ. Handay gak in njeŋ dan wa rum, handay la' wa' si.

⁶Bay mgbaŋ ni nə na kə dan wa rin zə na cin vunduk rin wa dan mənɪ Ifray kawvun wa rum kə ba mbri ramba.

⁷Zə saŋ sôwâ mba guɓ wa hoɓ njay vunduk nday i dan kawvun rum wə də ndo' wə du bəka ndaya. Zə rum, handay wə bur Ifray fəta kə dukri daŋ'ŋ. Jwə, sôwâ Zuwif wə tum sem rin zə na cin vunduk rin wa dan kawvun rumu.

⁸Hi sôwâ Zuwif, zə mi hi cu gak ve i Ifray wə də ra' sôwâ mbə mar mi su?

⁹«Mə na, na ke dɪk i na wə də gi kwa daŋ' kədan na də dənok semdə Zezu mə so Nazaret.

¹⁰Na gi kwa rum ndəna' wə so Jeruzalem. Sum rōwâ mə du sum po' fur ne dərwa də gaŋ ne nan, ɓay na ra' sôwâ mənɪ ve Kris juk cok ta so daŋgay', ɓay kəri mənɪ sôwâ wə ɓok dan mar wa nday, na kawvun kə ndaya.

¹¹Sem raw, na gi boni ne nday wə rawti so Ifray sôwâ Zuwif daŋ', ɓay na keɓ kədan na nday gi kə gbəgbonj kədan kuni ar dan mənɪ handay ve, na tle bak kə nday hā na keɓ zu nday wə so cem cem wə nya məsini.”

¹²«Ndəna', na ta wə so Damas kə dərwa də gaŋ mənɪ sum rōwâ mə du sum po' fur ne nana.

¹³Jwə, kəri mənɪ na wə vari kə fəta du wa, na weri mə ɓu mənɪ wədi rum pā wədi fəta si. Ri mə ɓu rum car mbə wafray wədi mbə wa rin kə sôwâ mənɪ wə gaŋ kə rini.

¹⁴Namba daŋ' njay ta nya ɓay na mun wor in dan ne nan kə vun Hebre: "Sol, Sol, zə mi ha wə keɓ zu rin su? Ha wə rik tu ru kəri mənɪ ha wə vad' dan man ce' ndə mənɪ naw wə rik tu rum kəri mənɪ mum wə lap gu mənɪ bə lim rum wə um lim kə ndi.”

¹⁵Na ci vun rumu: "Ha sa su, Bârî?" Bay Bârî ini: "Na nə Zezu mənɪ ha wə keɓ zu rini.”

¹⁶Ama a car ca fray kə sem ru! Na ta' tu rin ne nu kədan na wû gi faŋ bə sin mana: Ha də ke bə in njeŋ dan wa rin kədan ha in ne kə sôwâ i ha we nan tam, ɓay kədan ha də ka' dan mənɪ na wə də ta' wû ne nə ne nday ta'a.

¹⁷Na də wû sid' mbə ɓa sôwâ Zuwif kə sôwâ mənɪ cu zə saŋ sôwâ Zuwif mi ɓay na də wû sin wə hay' nday

¹⁸kədan ha ar i nday ne, kədan ha nday ra' wə du ri mə ura' ɓay nday njay wə ri mə ɓu, ɓay kədan ha nday ra' wə du gbəgbonj Satan ɓay nday njay wə du gbəgbonj Ifraya. Bay kəri mənɪ handay ve dan man, na də vrum kwa mə bro' nday, ɓay na də nday njay wə du sôwâ mənɪ Ifray da' ndaya.”

¹⁹«Ndəna', jwə Agripa, na cu vad' kwawe mənɪ car daka wafray mbə wa rin nə mi.

²⁰Na ka' dan rum cop wə hay' sôwâ mə so Damas kə so Jeruzalem, kəki rum, na ka' dan rum ne kə sôwâ nya Zude daŋ' kə sôwâ mənɪ cu zə saŋ sôwâ Zuwif mi ta'a. Na ka' ne nday i kuni faŋ vunduk nday ɓay kuni mbə hay' Ifray, ɓay kədan kuni gi sin mənɪ wə ta' njeŋ i handay faŋ vunduk ndaya.

²¹Zə rum, sôwâ Zuwif kaw nan kəri mənɪ na ke wə rawti so po' fur sôwâ Zuwif, ɓay handay keɓ vari kədan handay man ci.

²²Ama Ifray jin nan hâ tam, ɓay na car wə ti kədan na in njeŋ dan man wə kor sôwâ rôwâ kə dawre' daŋ'ŋ. Na cu in dan məsin mi say dan mənɪ sum ka' dan kə Moyizə ka' kuni i wə də gi:

²³Kris wə də ce' boni, i Ifray wə də um par mbə mar cop, ɓay i mum wə də ka' dan ri mə ɓu ne kə sôwâ Zuwif kə sôwâ mənɪ cu zə saŋ sôwâ Zuwif mətə'a."

²⁴Kəri mənɪ Pol wə ge dan siɗ tu rum ndəna', Festus ka' dana: «Pol, ha laya! Ha wum kwa dle tu si, hâ kwa wum rum faŋ lay ru!"

²⁵Pol ɗam vun rumu: «Festus, toŋ man mə kə mbra', na cu lay mi, dan mənɪ na wə in nə kəzin' ɓay kə zu rumu.

²⁶Jwə Agripa we dan rum si, zə rum, na gak ge dan wə kor rum dan wəlok, na we si mum we dan kwa rum ɗaw ɗaw daŋ'ŋ. Zə kwa rum cu gi pəpə' mi.

²⁷Jwə Agripa, ha ve dan sum ka' dan si su? Na we si, ha ve dan nday si!"

²⁸Agripa la' ne kə Pol: «Gwa' kî kədan ha man gi faŋ swə Kris."

²⁹Pol ɗam vun rumu: «Ko la' ga'ri, ko la' cu ga'ri mi, na wə o Ifray kədan ha taw mi, ama kə hi sôwâ daŋ' mənɪ wə mun dan man tam, hi faŋ ce' ndə na, ama say dan cururu mənɪ na!"

³⁰Jwə kə toŋ nya nə, ɓay Bernike kə sôwâ daŋ' mənɪ ke kə nday car kuni fraya.

³¹Kəki mənɪ handay wur ta rəka, handay təŋ kə in dan kə nji mbok nji: «Swə nə cu gi kwa mə bro' mənɪ mum nde i fe mar wa rum ko um ge də so daŋgay' mi."

³²Bay Agripa la' ne kə Festus: «Swə nə la' cu ci vun vari kədan mum də kor jwə mə mbri mə nya Romə kəzə mi si, ha gak um ar ge.»

Sin Daw Sini 27

¹Kəri mənɪ handay gila' dan kədan namba də nya Itali kə da, handay ar Pol kə daŋgay' məsin wə ɓa toŋ soje mə ɗe kə Zuliyos. Mum nə toŋ kul soje mə nya Romə mə ɗe kə «Kul soje mə jwə mə mbri mə nya Romə».

²Namba ur ta rawti da mə so Adramitə. Da rə wə də gaŋ wə ri car da cem cem mənɪ wə vun doŋ doŋ ya mbi wə nya Azi, ɓay namba 'ya kə ndi. Swə mə so Tesalonikə, nya Maseduwanə mə ɗe kə Aristarkə kəta' kə mba.

³Siw rum, namba ta day so Sidoŋ. Zuliyos gi ɓay hay' Pol ɓay mum ne vari ne num kədan nə də kar bây um kədan mum fe kwa wə ɓa ndaya.

- ⁴Kəki məni namba car wə han, simbed' təŋ kə sa' mbə wa mba. Zə rum, namba pā wə hay' nya Siprə məni suk wə du mbi, wə ga' ri məni simbed' cu sa' wə han mi.
- ⁵Namba ur ya mbi həre' kə nya Silisi kə nya Pamfili, bay namba ta day so Mira wə nya Lisi.
- ⁶Toŋ soje nə za' da mə so Alezandri məni wə də nya Itali wə han, bay mum cok mba ta rawti da rumu.
- ⁷Wə du bəka raw, namba ta wa mbi kə da sêse, bay namba ta day so Kərido kəcik juku. Simbed' tak mba dan ta də kofo. Zə rum, namba pā wə hay' ri mə də kə Salmone kədan namba də pā wə hay' nya Kretə məni suk wə du mbi, wə ga' ri məni simbed' cu sa' wə han mi.
- ⁸Namba ta ta kofo kəcik wə hay' vun doŋ doŋ nya rum, bay namba ta day wə ri mə də kə «Ri car da mə bayə». Ri rum həre' kə so Lasaya.
- ⁹Namba bar wə han hā cer sôwâ Zuwif məni toŋ po' fur wə po' fur kə saŋ kwa zə kwa mə bro' sôwâ Zuwif nə pā dle. Wə ri rum, kəcik kədan namba ta də kofo kə da. Zə rum, Pol har ndaya:
- ¹⁰«Sôwâ kwa, na we gaŋ mba wə də ke kəcik bay da kə kwazi' daŋ' wə də dənok, ndəna' kə nyî mba də vi' ta'a.»
- ¹¹Ama toŋ soje nə cin vunduk rum wa dan bə cinik da kə bə da pā dan məni Pol in nə si.
- ¹²Ri car da nə cu bay kədan da car wə han kə vun ndor mi. Zə rum, sôwâ raw wə du mba wə wa' kədan namba 'ya ar ri rumu. Handay wə wa' kədan namba də day so Fenika, vari la' kəta' si. So rum ri car da mə nya Kretə məni suk wə du mbi. So rum suk cin i ta ga' zu fəta riya kə ga' wa fəta riya. Handay wə wa' kədan namba gay' cer simbed' wə hana.
- ¹³Kəri rum, simbed' mə ga' zu təŋ kə sa' fad' fadā. Zə rum, sôwâ kuni dīk i handay gak gi ce' ndə dan dīk ndaya. Handay tle njike mə jew da ge ta rawti da rə, bay handay ta ta kofo wə hay' vun doŋ doŋ nya Kretə məni suk wə du mbi.
- ¹⁴Ama kəkor sar, simbed' mə də kə «Simbed' mə ga' wa fəta bəka» car wə wa gway' nya rum sa' mbə wa mba kə gbəgboŋo.
- ¹⁵Simbed' rum pla' da mba, bay namba cu gak cinik da wə kor simbed' mi. Zə rum, namba ar simbed' rum pla' da.
- ¹⁶Namba pā ga' zu nya mə kî mə də kə Kawda məni suk wə du mbi, nya rum tak simbed' ne mba kî, zə rum namba za' vari kəcik kədan namba jew vay da wə hana.
- ¹⁷Handay tle vay da nə cin ta wa da mə toŋ, bay handay jew da mə toŋ rə kə zewe. Handay ne wəlok i simbed' də nday pla' də wa nyetl mə vun doŋ doŋ nya Libi. Zə rum, handay ulay' mbraw məni handay jew wa da kədan simbed' pla' da kə ndi nə njay ta rawti da, bay handay ar da rə kədan simbed' sə pla'a.

- ¹⁸Simbed' rum wə də kofo kə sa' kə gbəgbəŋo. Siw rum, handay tən kə ra' kwazi' mə rawti da pik də ya mbi,
- ¹⁹ḡay səday' rum, handay ra' kwa sin mə rawti da pik də ya mbi kə ɓa ndaya.
- ²⁰Wə du bəka raw, namba cu gak we fəta ko ciciw mi, ḡay simbed' rum wə də kofo kə sa' kə gbəgbəŋ hā namba cu dīk i namba də sīd mi.
- ²¹Bəka gi raw, sôwâ mə rawti da cu ti kwati mi. Kəri rum, Pol car wə kor nday ḡay la' ne ndaya: «Sôwâ kwa, hi la' ve dan mənī na in ne ni nə kəzə si, ḡay hi la' cu 'ya ar nya Kretə mənī suk wə du mbi nə kəzə mi si, namba cu za' dənok kə vi' kwa mə ndani nə mi.
- ²²Ama mgbəŋ ni nə, na wə mi o i kaw vunduk ri, zə swə dāw wə du ri cu də vi' nyī rum mi. Say da wə də vi' dāw sara.
- ²³Kum kə dukri, Ifray mənī na mə mum, ḡay na wə um bur, mum sin vay sin um mə wafray wə hay' rini.
- ²⁴Mum la' ne nana: "Pol, a ne wəlok mi! Say a də car wə kor jwə mə mbri mə nya Romə. Zə ḡay Ifray, mum ar nyī sôwâ dāŋ' mənī wə rawti da kə ru kuni wə ɓa ru!"
- ²⁵Zə rum sôwâ kwa, i kaw vunduk ri, zə na cin vunduk rin wa Ifraya: Kwa rum wə də gi ce' ndə mənī mum in ne nana.
- ²⁶Ama simbed' rum wə də mba pla' də vun dapa nya məsin mənī suk wə du mbi."
- ²⁷Kə dukri guḡ wa fədi' rum, simbed' wə mba pla' wa ya mbi Mediterane. Kə du dukri, sum cinik da dīk i namba hərə' kə nya.
- ²⁸Zə rum, handay jew zew ta njike ge ta mbi kədan handay kənji' ciriŋ mbi kə ndi. Handay za' ciriŋ mbi rum pum ɓa gu hinji' wa sedā'a. Handay ta ta kofo kī, ḡay handay kənji' ciriŋ mbi kərem, ḡay handay za' ciriŋ mbi rum pum ɓa guhoḡ wa coho'o.
- ²⁹Handay ne wəlok i da mba də tay gway' wə ri məsini. Zə rum, handay njay njike mə jew da fədi' ta mbi cew da, ḡay handay gay' lew kə ji vun bəka.
- ³⁰Sum cinik da keḡ vari kədan handay ne ar da, zə rum handay ulay' vay da cin ta mbi ḡay gi ce' ndə mənī handay wə də njay njike mə jew da məsin də mbi wə kor da.
- ³¹Ama Pol la' ne kə tən soje mə nya Romə kə soje um kuna: «Sôwâ mənī kuni la' cu gay' wə rawti da mi si, hi cu gak sīd mi."
- ³²Zə rum, soje kuni hay' zew mənī jew vay da ḡay ar vay da nə 'ya dle.
- ³³Hərə' kə vun bəka, Pol o nday dāŋ' kədan kuni ti kwati kə ini: «Tam bəka gi guḡ wa fədi' mənī hi gay' dan ti kwati.
- ³⁴Zə rum, na o ni kədan i ti kwati zə hi wə wa' gbəgbəŋ kədan hi sīd kə ndi. Swə dāw du ri cu də vi' mi, ko sâ wa bə rum dāw cu də vi' mi."
- ³⁵Kəki mənī Pol in dan rum, mum tle vun tləpe' fun ḡay gi soko ne kə Ifray wə kor nday dāŋ', mum faŋ pok dle kə ti rumu.

³⁶Zə rum, handay daŋ' kaw vunduk bay dle kə ti rum ta'a.

³⁷Raw mba wə rawti da daŋ' gi kis hoɓ kə guseda' wa kanki'i.

³⁸Kəri mənɪ rawti nday sa' si, handay ra' u mə rawti da pik ta ya mbi kədan da rə faŋ tɔfewe.

³⁹Kəri mənɪ bəka ra' si, sum cinik da cu we nya rum mi. Ama handay we vun dap ze kə vun nyetl mə bay, bay handay gila' dan kədan handay cin da wə han vari la' kəta' si.

⁴⁰Handay hay' zew njike mə jew da bay ar nday du mbi. Kəri rum, handay ulay' zew ləfun mənɪ handay wə cinik da kə ndi. Handay faŋ jew mbraw ta vuk da kədan simbed' pla' da də vun nyetle.

⁴¹Ama da ta za' vun cidew nyetl bay car wə hana. Vuk da ɲâr ta nyetl bay cu gak jik mi, kəri rum jo mbi mbə kə gbəgboŋ haɓ zu rumu.

⁴²Soje kuni wa' kədan handay ci daŋgay' kədan swə dāw du nday nə lur mbi ne sid' mi.

⁴³Ama toŋ soje mə nya Romə nə wa' kədan mum sid' Pol. Zə rum, mum tak nday wa dan dɪk ndaya. Mum ne vari ne kə sôwâ mənɪ we lur mbi si kədan kuni dam də mbi cop kədan kuni də vun dapa.

⁴⁴Sôwâ məsin gak kaw gu da ko pupol da kə ɓa nday bay ji zu ndaya. Ndəna' sôwâ daŋ' ur ta dapa hebe.

Sin Daw Sini 28

¹Kəki mənɪ namba ur ta dapa heɓ si, namba mun i nya rum wə dɛ kə Maltə.

²Sôwâ nya rum gi mba bay juku. Zə buŋô təŋ kə se bay ri so' juk, handay nyen ku mgbiɓ ne mba, bay handay la' mba gay' wə hay' ku zə simbede.

³Pol ra' daw gu kə ɓa kədan mum njay də ku. Kəri rum, kay' tuk ku, bay mum pâ mbə han rew wə ɓa Pol.

⁴Kəri mənɪ sôwâ nya rum we wu' rew wə ɓa Pol, handay in kə nji mbok nji: «Kəzin', swə mənɪ nə bə ci sôwâ na. Ko mum la' sid' mbə mbi daŋ', ifray mba mə dɛ kə swə mə njeŋ cu də um ar kə i mi.”

⁵Ama Pol pik wu' nə ta ku, bay mum cu tuk ti rum mi.

⁶Handay dɪk i ɓa rum də 'wəy ko mum də mar ga'ri. Ama kəri mənɪ handay gay' ji kwa rum hâ hâ, dan we kwa məsin rum gi, handay faŋwa dan dɪk nday bay ini: «Mum ifray na!”

⁷Jwə nya rum dɛ kə Publiyus. So um həre' kə ri rumu. Mum ve mba bay juk bay namba bar wə han bəka hinji'i.

⁸Ba Publiyus bar wə ri bar, zə mum kə gaɓ wa kə pe rawti. Pol ta kar num bay mum in dan kə Ifray, bay mum njay ɓa wa rum bay car gaɓ umu.

- ⁹Kəki kwa rum, sum gaḅ məsin məni wə nya rum mbə hay' rum ḅay mum car gaḅ nday ta'a.
- ¹⁰Handay mbâ mba juk, ḅay kəri məni namba wə ur də rawti da kədan namba 'ya, handay ne kwa məni namba kə mē' rum zə vari gaṇ mba ne mba.
- ¹¹Kə ndo' vun cer hinji', namba 'ya kə da mə so Alezaṇdri məni suk cer simbed' wə nya rumu. Da rum wə də kə Diyoskur, wa' dan in «Nyerwa».
- ¹²Namba ta day wə so Sirakus ḅay namba bar wə han bəka hinji'i.
- ¹³Namba car wə han, ta day so Regiyo. Siw rum, simbed' mə ga' zu təṇ kə sa' ḅay gi bəka hoḅ namba ta day so Puzoles.
- ¹⁴Namba za' daw ba mba wə han, ḅay handay o mba kədan mə bar wə hay' nday bəka sedā'a. Ndəna', namba ta day so Romə.
- ¹⁵Daw ba mba mə so Romə mun dan mbə mba, ḅay handay wur hâ mbə ndewa kə mba wə lumə mə so Apiyus ḅay wə so mə də kə «So rəkway mə hinji'i». Kəri məni Pol we nday, mum gi soko ne kə Ifray ḅay kwa rum jeṇ vunduk ne numu.
- ¹⁶Kəri məni namba ta day so Romə, sôwâ rôwâ ne vari ne kə Pol kədan nə bar kə daw rum, ḅay soje um ji.
- ¹⁷Kəki rum bəka hinji', Pol də sum rôwâ sôwâ Zuwif mə so Romə mbə hay' rumu. Kəri məni handay ḅawa, mum la' ne ndaya: «Daw ba man, na cu gi kwa mə bro' ko hay' sôwâ mba ko wa dan vun fur ba mbri ramba mi, kə ndi nə daṇ' sôwâ kaw nan daṇgay' wə so Jeruzalem ḅay ar nan wə ḅa sôwâ mə nya Romə.
- ¹⁸Handay ci vun rin wa kwa məni na gi, ḅay handay wa' kədan man ar ge zə handay cu za' zu dan məni handay gak ḅok dan mar wa rin kə ndi daw mi.
- ¹⁹Ama sôwâ Zuwif cu ve dan rum mi, zə rum gi ndə gbê' kədan na o vari kədan na də kor jwə mə mbri mə nya Romə, ama cu in i na mbə tum sem sôwâ man mi.
- ²⁰Zə rum, na də ni kədan na mi kar, ḅay ge dan mi ne. Zə na fe cururu məni nə zə swə məni sôwâ Israyel njay vunduk nday wa rumu.”
- ²¹Handay ḅam vun rumu: «Namba cu fe ḅerwa məni car mbə nya Zude wa dan wû daw mi, ḅay swə daw wə du daw ba mba cu car kəna mbə ti kədan mum in dan wa ru ko ge dan mə bro' wa ru mba ne mi.
- ²²Ama namba wə wa' kədan namba mun dan ge wû, zə namba we si: Wə ri daṇ' sôwâ wə vad'kul sôwâ məni ha wə nday ta' kwa ne.”
- ²³Handay cin bəka ne kə Pol, ḅay kə bəka rum sôwâ raw mbə wə hay' rum wə ri dam umu. Daka bəka hâ riya, Pol wə pay zu dan bə ka' dan wa dan vari məni Ifray wə də suk jwə wa sôwâ um nday ne. 'Bay mum wə keḅ kədan mum nday gi ve dan mə wa Zezu, kə in dan dlay Moyizə kə ḅerwa sum ka' dana.
- ²⁴Sôwâ məsin wə du nday ve dan məni mum in, ama sôwâ məsin wə du nday cu ve dan rum mi.

²⁵Handay bul nji wa dan rum bay pla' dle. Zə rum Pol in dan mənɪ nə ne ndaya: «Simbed mə Kələŋ in njeŋ kəri mənɪ mum in dan mənɪ nə kə ba mbri rami kə vun bə ka' dan mə də kə Esaya:

²⁶Mum ini: A də hay' sôwâ mənɪ kuni, bay a in ne ndaya: Hi də pe hum kə bayrum, ama hi cu də mun zu dan rum mi. Hi də kar ri kə bayrum, ama hi cu də we mi.

²⁷Zə vunduk sôwâ mənɪ kuni cu dɪk dan mi. Handay nduɓ hum nday si, handay dəŋâr i nday si, la' cu kəzə ndəna' mi si, i nday gak weri, hum nday gak mun dan, vunduk nday gak keɓ mun zu dan, bay handay gak də faŋ mbə hay' Ifray bay mum də nday cara.”

²⁸Pol faŋ in kəreme: «Say i we: Dan sid' mənɪ Ifray sin ta hay' sôwâ mənɪ cu zə saŋ sôwâ Zuwif mi, handay wə də mun dan rumu!»

[²⁹Kəri mənɪ Pol in dan rum, sôwâ Zuwif pla' dle kə way dan bayrum mbok ndaya.]

³⁰Pol po' sôwâ kə səlay bay mum bar wə han kim hoɓo. Mum ve sôwâ daŋ' mənɪ wə mbə um kara.

³¹Mum ka' dan wa dan vari mənɪ Ifray wə də suk jwə wa sôwâ um kə ta' kwa mənɪ in dan wa Bârî Zezu Kris nday ne dan wəlok, bay kwa məsin cu gak tak num mi.

Rome

Rome 1

- ¹Na Pol, bə sin Zezu Kris, Ifray dē nan kədan na faŋ bə sin um ɓay par nan kədan na ka' Dan mə Kədam umu.
- ²Ifray kawvun wa Dan mə Kədam rum ɓa' si, ɓay sum ka' dan um wāy' dan kawvun rum wə du Derwa Ifraya.
- ³Dan rum in dan wa Vay um, Bârî mba, mum nə sumra' zə mum vay rawti David.
- ⁴Ama Ifray ta' i mum Vay um kə gbəgbəŋ kəri mənɪ mum car mbə mar, Zezu Kris Bârî mba. Zə rum, mum Simbed' mə Kələŋ ta'a.
- ⁵Zə Zezu, Ifray ne ɓay um ne mba, ɓay mum dē mba kədan namba faŋ sum sin um kədan namba dē sôwâ nya daŋ' mbə ve Dan mə Kədam ɓay ta zə Dan rumu. Mum gi ndəna' kədan sôwâ bur semdē Kris.
- ⁶Hi sôwâ mənɪ gay' wə so Romə, hi wə du sôwâ mənɪ kuni ta'a. Ifray dē ni kədan i ke sôwâ mə Zezu Kris.
- ⁷Na wāy' dərwa hay' ri, hi sôwâ mənɪ gay' wə so Romə, hi sôwâ daŋ' mənɪ Ifray wə mi bə ɓay dē ni kədan i faŋ sôwâ um, na wə wa' i Ba mba Ifray kə Bârî mba Zezu Kris, kuni ne ni ɓay kə hebe.
- ⁸Cop rum, na gi soko ne kə Ifray zə ri daŋ' kə semdē Zezu Kris: Zə sôwâ wə ge dan wa dan vari mənɪ hi ve Kris wə du sôwâ nya daŋ'ŋ.
- ⁹Zə Ifray mənɪ na wə gi sin zə rum kə vunduk mə daw kə ka' Dan mə Kədam mənɪ in dan wa Vay um, mum we si: Dan mənɪ na in nə kəzin', mum we si, na wə dɪk dan wa ri bəka daŋ',
- ¹⁰kəri daŋ' mənɪ na wə in dan kə Ifray, na wə ci vun rum kədan nə də gila' vari man ne kədan na də hay' ri, mum la' bə si.
- ¹¹Zə mē' də mi kar wə man ti juk, kədan na də mi ne kwane mənɪ Simbed' Ifray wə ne kədan hi fe gbəgbəŋ wə vunduk ri
- ¹²pâ daŋ' rum, na wə wa' də du ri kədan na kə hi daŋ' mə jeŋ vunduk nji. Vunduk rin də jeŋ zə dan mənɪ hi ve, ɓay vunduk ri də jeŋ zə dan mənɪ na ve ta'a.
- ¹³Daw ba man, na wa' i i we: Na keɓ vari sem raw kədan na də hay' ri, ama na cu za' vari mi hâ tam, na wə wa' i dan ka' man nə gi sôwâ faŋ vunduk nday du ri ce' ndə mənɪ dan ka' man nə gi sôwâ nya məsin faŋ vunduk nday ta'a.
- ¹⁴Zə na kə bal wa rin kədan na də hay' sôwâ daŋ': Sôwâ grek kə sôwâ mənɪ cu sôwâ grek mi, ɓay sôwâ mə we kwa kə sôwâ mə dan we kwa.
- ¹⁵Zə rum, na wə wa' kədan na də ka' Dan mə Kədam du ri, hi sôwâ mənɪ gay' wə so Romə.

- ¹⁶Zur cu man gi kə ka' Dan mə Kədam mi, zə mum nə gbəgbon Ifray mənɪ gak sɪd' sɔwâ daŋ' mənɪ ve dan rumu: Cop rum sɔwâ Zuwif, ɓay kəki rum sɔwâ grek ta'a.
- ¹⁷Zə Dan mə Kədam nə wə ta' vari mənɪ Ifray wə gi sɔwâ njeŋ kor rumu. Vari rum kə ve Kris dāw sar, daka təŋ zu rum hā ndo' vun rum, ce' ndə mənɪ Dan rum wāy' wə du dɛrwa: «Swə mənɪ Ifray gi num njeŋ kor rum zə mum ve num, bə rum də ke kə nyî.»
- ¹⁸Bak Ifray car daka wafray mbə wa sɔwâ daŋ' mənɪ cu ne wəlok Ifray mi ɓay wə gi vur vur. Zə vur vur nday wə tak sɔwâ dan we dan mə kəzini.
- ¹⁹Ifray wə gi boni nday ne zə handay gak we kwa mənɪ Ifray wə gi nə takrama: Ifray kə tu rum ta' kwa rum ne nday takrama.
- ²⁰Ifray kə kpak mənɪ swə dāw cu gak we mi, ce' ndə gbəgbon um mə də hā kə kpak Ifray umu. Ama daka kəri mənɪ Ifray gi nya, sɔwâ gak we kpak um wə du kwa mənɪ mum gi. Zə rum, handay cu gak riway mi.
- ²¹Handay we Ifray si, ama handay cu wə gi mbra' um ne ko gi soko um ne ce' ndə mənɪ mum nə Ifray mi. Zawa, handay faŋ lay wə du dan dɪk nday, ɓay vunduk nday mə bro' nyen pɛd' kə ri mə ura'a.
- ²²Handay gi tu nday ce' ndə sum kwawe, ama handay laya.
- ²³Handay ar dan gi mbra' ne kə Ifray mənɪ cu mar mi, ɓay handay faŋ gi mbra' ne kə foto mə ra' nji kə sumra' mənɪ wə mar, rugwa, tlew gop, kə wu' mənɪ sɔwâ wə gi kə ɓa ndaya.
- ²⁴Zə rum, Ifray ar nday wə du sin mə bro' ce' ndə mənɪ vunduk nday wə wa', ɓay handay wə gi kwa mə kə zur kə nji mbok nji dan zuru.
- ²⁵Handay samwa dan mə kəzin' mənɪ in dan wa Ifray kə hay dan, handay wə bur kwa mənɪ Ifray gi kə gi sin zə rum ɓay ar Bə gi kwa rum mənɪ nde i bur bəka daŋ'ŋ. Amen.
- ²⁶Zə rum, Ifray ar nday wə du kwa səna' mə kə zur mənɪ handay wə də gi dan zuru. Ndəna', rawkwa nday ar bar kə njiwkwa nday ɓay wə bar kə rawkwa məsini.
- ²⁷Ndəna' ta', njiwkwa ar bar kə rawkwa nday ɓay wə səna' bar kə nji mbok nji. Njiwkwa wə gi sin mə kə zur kə nji mbok nji dan zuru. Zə rum, Ifray wə də gi boni nday ne ce' ndə sin mə bro' ndaya.
- ²⁸Handay vad' dan mə kəzin' mənɪ handay we wa Ifray, zə rum Ifray ar nday wə du kwawe nday mə bro' kədan handay gi kwa mənɪ handay cu kə vari gi rum mi.
- ²⁹Vunduk nday nyen pɛd' kə sin mə vur vur, sin mə bro', səna' kwa, ɓay kwa mə bro', handay wə gi sây', wə ci mar, wə dle vun, wə gi vur vur, ɓay wə gi kolo. Handay wə hay dan wa sɔwâ məsin,
- ³⁰ɓay handay wə ge dan mə bro' kə nji mbok nji, handay wə sî Ifray, wə i nji mbok nji, wə mbra' tu nday, ɓay wə ge dan wa tu nday kor sɔwâ. Handay wə keɓ vari mə mbrew kədan handay gi kwa mə bro', ɓay handay cu mun vun sɔwâ nday mi.

³¹Handay cu kə kwawe mi, bay handay cu gi kwa mənɪ handay kawvun wa rum nə mi, handay cu kə bə mi, bay handay cu we ca wa sôwâ məsɪn mi.

³²Handay we si, dan dlay Ifray in i sôwâ mənɪ wə gi kwa mə ndani nə, handay də fe mar, kə ndi nə daŋ', handay cu də kofo kə sin mə bro' nday taw mi, ama handay wə tuk kədam kə sôwâ mənɪ wə gi sin rum ta'a.

Rome 2

¹Ha swə mənɪ wə bok dan wa sôwâ məsɪn, ha cu gak riway mi, ko ha sa su daŋ'ŋ. Zə kəri mənɪ ha wə bok dan wa sôwâ məsɪn bay ha wə gi kwa rum kə tu ru ta', ha wə kaw tu ru kə tu ru.

²Namba we si: Ifray wə bok dan njeŋ wa sôwâ mənɪ wə gi kwa mə ndani na.

³Ha swə mənɪ wə bok dan wa sôwâ məsɪn, bay ha wə gi kwa rum kə tu ru ta' ha dɪk i ha də sɪd wə du dan bok mə Ifray su?

⁴Ha wə jed sin mə bay mə mbri mənɪ Ifray wə gi kə vunduk rum mənɪ mum wə red wa ru bay ji um mənɪ mum wə wû ji kə ndi nə su? Ha cu we i Ifray wə gi sin mə bay rum zə ru, zə mum wə wa' i a faŋ vunduk ru nə mi su?

⁵Ama wa ru bokrok, ha cu faŋ vunduk ru mi zə rum ha wə də boni mə mbri mbə wa ru kə bəka mənɪ Ifray wə də mbə ta' bak um kə dan bok um mə njeŋ wa sôwâ daŋ'ŋ.

⁶Kəri rum, Ifray wə də po' swə daw daw daŋ' ce' ndə sin mənɪ bə rum gi:

⁷Sôwâ mənɪ wə ar tu nday kə sin mə bay, bay wə keɓ mbra' kə mbâ, kə kim mə də hâ wə ba Ifray, Ifray də nday ne nyî mə də hâ,

⁸ama sôwâ mənɪ wə gi wa bokrok bay cu mun vun dan mə kəzin' mi, ama wə ar tu nday ta zə dan mə vur vur, Ifray wə də tle bak wa nday bayrumu.

⁹Boni kə dan dɪk də ke wa sôwâ daŋ' mənɪ wə gi kwa mə bro'o. Cop rum wa sôwâ Zuwif, bay kəki rum wa sôwâ grek ta'a.

¹⁰Ama Ifray wə də ne mbra' kə mbâ, bay heɓ ne kə sôwâ daŋ' mənɪ wə gi kwa mə baya. Cop rum kə sôwâ Zuwif, bay kəki rum kə sôwâ grek ta'a.

¹¹Zə Ifray cu gi sôwâ cem cem mi.

¹²Sôwâ daŋ' mənɪ wə gi kwa mə bro' dan we dan dlay Moyizə, handay də vi' dan dan dlay rumu. Ama sôwâ mənɪ we dan dlay Moyizə bay handay cu ta zə dan dlay rum mi, Ifray wə də bok dan wa nday ce' ndə mənɪ dan dlay rum ini.

¹³Ifray cu də gi sôwâ njeŋ kor rum zə handay wə mun dan dlay kə hum taw mi, ama zə handay wə ta zə dan dlay rumu.

¹⁴Sôwâ mənɪ cu zu saŋ sôwâ Zuwif mi cu we dan dlay Moyizə mi. Ama kəri mənɪ handay kə tu nday wə gi kwa mənɪ dan dlay ne vari rum, handay ta' i dan dɪk vunduk nday nə dan dlay na, ko handay la' cu kə dan dlay Moyizə mi daŋ'ŋ.

¹⁵Kwa mēni handay wə gi nə wə ta' i kwa mēni dan dlay ne vari rum nə wāy' wə vunduk ndaya. Dan dīk vunduk nday wə ta' ndəna' ta'a. Fəta mēsin dan dīk nday wə nday ta' i handay gi kwa mə bro', bay fəta mēsin mum wə nday ta' i handay gi kwa mə baya.

¹⁶Ndəna' ta' kə bəka mēni Ifray wə də bok dan wa kwa daŋ' mēni pe' wə vunduk sumra' kə Zezu Kris, ce' ndə Dan mə Kədam mēni na wə ka' nə ini.

¹⁷Ama, ha wə də tu ru kə swə Zuwif, hi wə car wa dan dlaya, bay ha wə mbra' tu wa Ifray wū,

¹⁸ha we bə Ifray si, bay dan dlay ta' vari ne nu kədan ha par kwa mə baya.

¹⁹Ha wə dīk i ha swə kaw səja dəŋār, kə bə dəri mə bu kor sōwā mēni gay' wə ri mə ura',

²⁰bay bə ta' kwa ne kə sum dan wa, kə bə ta' kwa ne kə dawre'e. Zə ha kə dan dlay, ha wə dīk i ha we kwa daŋ', bay dan daŋ' mēni ha wə in nə kəzini.

²¹La' ndəna' si, ha swə mēni wə ta' kwa ne kə sōwā mēsin, zə mi ha cu ta' kwa rum ne kə tu ru mi su? Ha swə mēni wə ka' ne kə sōwā i kəy hura mi, zə mi ha wə kəy su?

²²Hi sōwā mēni wə in i gi nja mi, zə mi hi wə gi su? Ha swə mēni wə jed' ifray mə vun fur, zə mi ha wə kəy hura kwa wə rawti so po' fur nday su?

²³Ha wə mbra' tu ru wa dan dlay, ama ha wə dənok mbā Ifray kəri mēni ha wə gi kwa mēni dan dlay cu ne vari rum mi.

²⁴Derwa Ifray wə in i sōwā mēni cu zu saŋ sōwā Zuwif mi wə ge dan mə bro' wa sem Ifray zə hi sōwā Zuwif.

²⁵Ha la' wə ta zə dan dlay si, gura wū nə kə sini. Ama ha la' cu ta zə dan dlay rum mi si, gura wū cu kə sin mi.

²⁶Bay jeḅ la' wə ta zə dan dlay si, Ifray cu də nday kar ce' ndə sum tagura mi su?

²⁷Jeḅ mēni wə ta zə dan dlay wə də bok dan wa ru, ha swə Zuwif mēni cu ta zə dan dlay mi, ko ha la' kə dan dlay mēni Moyizə wāy', ko ha la' tagura.

²⁸Vra' Zuwif cu swə mēni sōwā wə we kə i, ko mēni tagura nə taw mi,

²⁹ama vra' Zuwif nə swə mēni faŋ Zuwif wə vunduk rum, bay swə mēni vunduk rum gila' si. Dan dlay cu gak gi sin rum mi, say Simbed' Ifray kə mēni gi sin rumu. Ifray wə bur vra' Zuwif nə, ama sumra' cu um bur mi.

Rome 3

¹La' ndəna' si, sōwā Zuwif pā sōwā mēni cu zu saŋ sōwā Zuwif mi si su? Gura nə kə sin su?

²Awo, pā rum kəta' wə ri daŋ'ŋ! Zə cop rum, Ifray ar dan um wə ba sōwā Zuwif.

- ³Swə gak in ma wa sôwâ mäsın wə du nday məni cu ta zə dan Ifray njeŋ mi nə su? Ifray də ar njeŋ um zə dan njeŋ nday su?
- ⁴Cu ndəna' mi! Sumra' wə hay dan, Ifray nə car wa njeŋ, ce' ndə məni 'Derwa wə ini: Say sôwâ daŋ' kuni we i dan məni ha wə in nə njeŋ, bay handay la' wə bok dan wa ru si, say a ta' i kwa məni ha wə gi nə njeŋe.
- ⁵Ama sin mə vur vur məni namba wə gi la' ta' i Ifray nə njeŋ si, namba də in ma su? Namba də in i Ifray wə gi vur vur zə mum wə gi boni mba ne su? Na wə in dan rum kə vari dan dik sôwâ.
- ⁶Cu ndəna' mi! Zə Ifray la' cu njeŋ mi si, mum gak bok dan wa sôwâ nya ma su?
- ⁷Ama hay dan man la' wə ta' njeŋ Ifray takram bay wə gi mbra' um də kofo si, zə mi Ifray wə bok dan wa rin ce' ndə na bə gi kwa mə bro' bo su?
- ⁸La' ndəna' si, zə mi namba cu ini: Mə gi kwa mə bro' kədan namba də fe kwa mə bay mi su? Sôwâ mäsın wə ge dan mə bro' wa rin kə tum sem rin wa dan rumu. Ifray wə də bok dan wa sum rum, bay handay nde i dan bok rumu!
- ⁹Namba gak in ma su? Namba sôwâ Zuwif, namba pâ sôwâ mäsın si su? Cu mi! Ce' ndə məni na in vun kofo: Sôwâ Zuwif kə sôwâ məni cu zu saŋ sôwâ Zuwif mi daŋ' vun nji daw zə kwa mə bro' wə suk gbəgbəŋ wa nday daŋ'ŋ.
- ¹⁰Ce' ndə məni Dan rum wây' wə du derwa: «Swə mə njeŋ cu mi, ko daw cu mi.
- ¹¹Swə mə mun zu dan mə njeŋ cu mi, swə məni wə keɓ Ifray cu mi.
- ¹²Sôwâ daŋ' bul nji seŋ kə Ifray, handay daŋ' vi' si. Swə məni wə gi sin mə bay cu mi, ko daw cu mi.
- ¹³Wor nday ce' ndə zra mar məni ar vun ho, se'le nday wə vi' sôwâ. Dan məni wə pâ mbə vun nday nə ce' ndə tlor wu'.
- ¹⁴Vun nday nyen peɗ' kə dan ge nê' mə bro'o.
- ¹⁵Handay wə ne ga'ri kədan handay ci mara.
- ¹⁶Wə ri məni handay pâ han daŋ', handay wə ar dan mə dənok kə dan mə kəcik kəki ndaya.
- ¹⁷Handay cu we vari məni wə ne heɓ nə mi.
- ¹⁸Handay wə ta dan ne wəlok Ifraya.”
- ¹⁹Namba we si, dan məni dan dlay in daŋ', mum in ne kə sôwâ məni wə ta zə dan dlay rum, kədan swə daw nə gak riway mi, bay kədan ta' i Ifray wə də bok dan wa sôwâ nya daŋ'ŋ.
- ²⁰Zə Ifray cu gi swə daw njeŋ kor rum zə bə rum ta zə dan dlay mi. Ama dan dlay wə ta' ne kə swə i mum gi kwa mə bro'o.

²¹Ama mgbaŋ ni nə, Ifray ta' vari mēni mum wə mba gi njeŋ kor rum nə ne mba. Vari rum cu kə dan dlay mi, dan dlay kə sum ka' dan in kuni njeŋ dan wa dan rumu.

²²Ifray wə gi sôwâ njeŋ kor rum zə handay ve Zezu Kris zə mum gi ndəna' zə sôwâ daŋ' mēni ve Kris, zə cem cem cu mbok nday kor Ifray mi.

²³Sôwâ daŋ' gi kwa mə bro' bay handay bul nji seŋ kə mbra' Ifraya.

²⁴Ama zə bay Ifray mēni mum ne uray, mum gi sôwâ njeŋ kor rum kə Zezu Kris mēni tumwa ndaya.

²⁵Ifray po' fur zə mba kə Zezu kədan vəswə rum nə faŋ vari mēni Ifray gak vrum kwa mə bro' sôwâ mēni ve dan rumu. Ifray gi ndəna' kədan mum ta' i mum njeŋe. Ba' si, Ifray wə jiwa sôwâ mēni wə gi kwa mə bro' ba' si, bay mum cu gi boni ne nday mi.

²⁶Ama mgbaŋ ni nə, Ifray ta' vari mēni mum wə gi sôwâ njeŋ kor rum nə ne mba. Kə vari rum, mum ta' i mum njeŋ kə tu rum bay mum ta' i mum wə gi sôwâ mēni ve Zezu daŋ' njeŋ kor rum ta'a.

²⁷La' ndəna' si, sôwâ gak mbra' tu nday wa kwa məsin su? Cu mi! Zə mi su? Zə handay wə ta zə dan dlay su? Cu mi! Ama zə handay ve Kris.

²⁸Zə namba we si, Ifray wə gi swə njeŋ kor rum zə mum ve Kris, cu zə bə rum wə ta zə dan dlay mi.

²⁹Ifray nə, mum Ifray sôwâ Zuwif taw su? Mum cu Ifray sôwâ mēni cu zu saŋ sôwâ Zuwif mi ta' mi su? Awo, mum Ifray nday ta',

³⁰zə Ifray nə daw sar, mum də gi sôwâ Zuwif njeŋ kor rum zə handay ve dan um bay mum də gi sôwâ mēni cu zu saŋ sôwâ Zuwif mi njeŋ kor rum zə handay ve Kris.

³¹Dan rum wa' dan in i kəri mēni namba ve Kris, dan dlay cu kə sin zə mba mi su? Cu ndəna' mi! Zawa, namba wə ne gbəgboŋ ne kə dan dlaya.

Rome 4

¹Namba də in ma wa ba mbri mba Abraham su? Mum fe mi zə i mum sumra' su?

²Ifray la' gi Abraham njeŋ kor rum kəzə zə sin mə bay cem cem mēni mum gi kuni si, Abraham gak mbra' tu rumu. Ama mum cu gak mbra' tu rum kor Ifray mi.

³Dan rum wây' wə du dərwa: «Abraham ve Ifray, bay Ifray kar num ce' ndə swə mə njeŋ kor rum zə mum ve dan umu.»

⁴Swə mēni wə gi sin, bə rum fe bal cik umu. Bə rum cu in bal cik rum ce' ndə kwafe mə uray mi, ama ce' ndə bal cik zə sin mēni mum gi.

⁵Ama swə mēni cu cin vunduk rum wa sin mēni mum wə gi nə mi, ama bə rum cin vunduk rum wa Ifray mēni wə kar swə mə bro' ce' ndə swə mə njeŋ, Ifray də kar bə rum ce' ndə swə mə njeŋ kor rum zə mum ve numu.

⁶David in ndəna' ta' kəri məni mum in dan wa kədam məni swə wə tuk, swə məni Ifray kar ce' ndə swə mə njeŋ kor rum dan sin umu:

⁷«Kədam zə sôwâ məni Ifray vrum sin mə bro' nday, bay pik kwa mə bro' nday ta rəka!

⁸Kədam zə swə məni Bârî cu in kwa mə bro' um wa rum mi.»

⁹Kədam rum wə wa sôwâ məni tagura taw su? Mum cu zə jeḅ ta' mi su? Namba ke in i «Ifray kar Abraham ce' ndə swə mə njeŋ kor rum zə mum ve dan umu.»

¹⁰Kwa rum gi kə ma su? Kəki məni Abraham tagura su? Ko kəri məni mum kə jeḅ ɓo su? Kwa rum cu gi kəki gura um mi, ama kəri məni mum jeḅe.

¹¹Abraham tagura kəki rum seje. Gura nə ce' ndə lamba məni ta' i Ifray kar num ce' ndə swə mə njeŋ kor rum zə mum ve dan um kəri məni mum kə jeḅe. Ndəna', Abraham faŋ ba sôwâ daŋ' məni ve Ifraya. Ifray kar nday ce' ndə sôwâ mə njeŋ kor rum, ko kəri məni handay cu tagura mi.

¹²Mum ba sôwâ məni tagura ta', cu zə gura nday taw mi, ama zə handay ve dan Ifray ce' ndə məni ba mba Abraham ve dan Ifray kəri məni mum ke jeḅe.

¹³Ifray kawvun kə Abraham kə daw rawti rum i handay də ti nya ce' ndə bayda. Ifray cu kawvun kə rum zə mum ta zə dan dlay mi, ama zə Ifray kar num ce' ndə swə mə njeŋ kor rum zə mum ve dan umu.

¹⁴Ifray la' ne bayda kəzə ne kə sôwâ məni wə ta zə dan dlay taw si, dan məni handay ve nə uray bay dan məni Ifray kawvun wa rum kə nday cu kə sin mi.

¹⁵Zə dan dlay wə mbə kə bak Ifray, ama wə ri məni dan dlay cu han mi, sôwâ cu gak we kwa mə bro' nday mi.

¹⁶Ifray kawvun kə Abraham zə mum ve dan umu. Mum gi ndəna' kədan dan məni mum kawvun wa rum nə ke kwane Ifray mə uray, bay kədan dan məni mum kawvun wa rum nə ke kə sin zə daw rawti Abraham daŋ', cu zə sôwâ məni wə ta zə dan dlay taw mi, ama zə sôwâ məni wə ve Ifray ce' ndə məni Abraham ve dan rum ta'a. Abraham nə ba mba daŋ'ŋ.

¹⁷Ce' ndə məni Dan rum wây' wə du ɗerwa: Na gi nu faŋ bəba zə saŋ rawa. Mum faŋ ba mba kor Ifray zə mum ve dan Ifray məni wə ra' sôwâ mbə mar, bay wə gi kwa məni cu mi, faŋ kwa məni kəta'a.

¹⁸Ko kəri məni Abraham cu kə ri kədan mum cin vunduk rum wa dan Ifray mi, mum ve dan rum bay cin vunduk rum wa dan rumu. Zə rum, mum faŋ «bəba sôwâ rawa.» Ce' ndə məni Dan rum wây' wə du ɗerwa: Raw daw rawti ru də ke ndani na'a.

¹⁹Kəri rum, Abraham kə kim kisi. Ama kəri məni mum wə ɗik dan wa tu rum məni faŋ ce' ndə mar, bay wə ɗik dan wa Sara məti car lər, mum cu ar dan məni mun ve nə mi.

²⁰Mum cu ar dan mēni mum ve nē mi, ɓay mum cu way dan wa dan mēni Ifray kawvun wa rum kē rum nē mi. Zawa dan mēni mum ve nē ne gbəgbəŋ ne num, ɓay mum gi mbra' ne kē Ifraya.

²¹Mum we kē tu rum njeŋ i Ifray gak gi kwa mēni mum kawvun wa rumu.

²²Zə rum, Ifray kar Abraham ce' ndə swə mə njeŋ kor rum zə mum ve dan umu.

²³Ama dan mēni wə ini: Ifray kar Abraham ce' ndə swə mə njeŋ kor rum, dan rum cu wāy' wə zə Abraham taw mi,

²⁴ama wə zə mba ta', namba sôwâ mēni Ifray də mba kar ce' ndə sôwâ mə njeŋ kor rum zə namba ve swə mēni par Bârî mba Zezu mbə mara.

²⁵Ifray ar num mar zə kwa mə bro' mba ɓay mum faŋ par num mbə mar kədan mum mba gi njeŋ kor Ifraya.

Rome 5

¹Ifray wə mba kar njeŋ kor rum zə namba ve Kris, zə rum mgbaŋ ni nē, namba gay' heɓ kē rum zə Bârî mba Zezu Kris.

²Zə namba ve Zezu, mum ne vari ne mba kədan namba ke wə du ɓay Ifray, ɓay mgbaŋ ni nē, namba gay' wə du ɓay rum ɓay namba wə tuk kədam zə namba wə ji, i namba wə də gay' wə du mbra' Ifraya.

³Cu ndəna' taw mi, ama namba wə tuk kədam wə du boni mba ta', zə namba we si boni rum wə gi swə red'vunduku.

⁴Kə red'vunduk, swə gak car ŋgəɗiŋ' kor kwa mēni wə um ɓu, ɓay wə du car ŋgəɗiŋ', swə gak cin vunduk rum wa kwa mēni wə də mba.

⁵Swə mēni cin vunduk rum wa kwa mēni wə də mbə, kwa rum cu kē zur i bə rum mi, zə Ifray cin bə um wə vunduk mba kə Simbed'um mə Kəleŋ mēni mum ne mba.

⁶Kəri mēni namba ke tətâ ɓo, Kris mar zə sum kwa bro', mum mar kəri mēni Ifray para.

⁷Kəcik kədan swə fe mar zə swə mə njeŋe. Məsin swə gak kaw vunduk kədan mum mar zə swə mə ɓaya.

⁸Ama Ifray ta' i mum bə mba dle tu si: Kəri mēni namba ke sum gi kwa mə bro' ɓo, Kris mbə mar zə mba.

⁹Bay mgbaŋ ni nē, Ifray gi mba njeŋ kor rum zə mar Zezu, ɓay pâ daŋ' rum, Zezu də mba sid' kor bak Ifraya.

¹⁰Namba ke sum sî Ifray, ama mum gi mba faŋ bây um zə mar Vay um ɓay pâ daŋ' rum, mgbaŋ ni nē zə namba faŋ bây um, namba də sid' zə nyî Vay umu.

¹¹Cu ndəna' taw mi, ama namba wə tuk kədam kə Ifray zə Bârî mba Zezu Kris mēni gi mba faŋ gay' heɓ kē Ifray mgbaŋ ni na.

¹²Kwa mə bro' mbə wa nya zə swə dāw, Adam, ɓay mar mbə zə kwa mə bro' rumu. Ndəna' mar rum nde wa sôwâ dan', zə handay dan' gi kwa mə bro'o.

¹³Cop, kəri mənɪ Ifray cu ne dan dlay ne kə Moyizə mətə', kwa mə bro' kəta' wə wa nya, ama zə dan dlay cu mbə mətə', Ifray cu tle fur kwa mə bro' mi.

¹⁴Ama daka ri Adam hâ day ri Moyizə, mar suk gbəgbonj wa sôwâ dan', ko wa sôwâ mənɪ cu gi kwa mə bro' ce' ndə mənɪ Adam gi kəri mənɪ mum cu mun vun Ifray mi nə mi. Adam nə foto swə mənɪ wə də mba.

¹⁵Ama handay cu vun nji mi, zə kwane mənɪ Ifray ne uray nə cem kə kwa mə bro' mənɪ Adam gi. Kəzin', sôwâ juk mar zə kwa bro' swə dāw, Adam. Ama ɓay Ifray nə ɓayrum pā kwa mə bro' rum si, ɓay kwane mənɪ Ifray ne uray ne kə sôwâ juk zə swə dāw, Zezu Kris, nə pā kwa mə bro' rum si ta'a.

¹⁶Bay kwane Ifray nə gi sin cem kə kwa mə bro' mənɪ swə dāw gi: Zə dan ɓok mənɪ mbə zə kwa mə bro' swə dāw nə cin dan mə bro' wa sôwâ mənɪ gi kwa mə bro' ama kwane mənɪ Ifray ne uray kəki kwa mə bro', nə ra' dan mə bro' wa sôwâ mənɪ gi kwa mə bro' juk ta rəka.

¹⁷Kəzin', mar mbə suk gbəgbonj wa sôwâ dan' zə kwa mə bro' swə dāwa. Ama zə swə dāw, Zezu Kris, namba fe kwa mə pā dan' rumu. Sôwâ dan' mənɪ wə fe ɓay Ifray mə mbri kə njeɲ um mənɪ mum ne uray, handay də ke kə nyî mə də hâ zə Kris.

¹⁸Zə swə dāw, Adam, gi kwa mə bro', sôwâ dan' za' dan ɓok wa nday, ndəna' ta', zə swə dāw, Zezu Kris, gi sin mə njeɲ, Ifray ra' dan mə bro' wa sôwâ dan' ta rəka ɓay mum ne nyî mə də hâ ne ndaya.

¹⁹Zə swə dāw cu mun vun mi, sôwâ juk faɲ sum gi kwa mə bro'o. Ndəna' ta', zə swə dāw mun vun, Ifray gi sôwâ juk njeɲ kor rumu.

²⁰Ifray ne dan dlay kədan kwa mə bro' dlər də kofo. Ama wə ri mənɪ kwa mə bro' wə dlər də kofo, ɓay Ifray wə dlər də kofo ɓayrum pā kwa mə bro' rum si.

²¹Zə ce' ndə mənɪ kwa mə bro' suk gbəgbonj wa sôwâ kə mar, ndəna' ta', ɓay Ifray suk gbəgbonj wa sôwâ kə njeɲ kədan mum mba ne nyî mə də hâ zə Bârî mba Zezu Kris.

Rome 6

¹Namba də in ma su? Namba də kofo kə gi kwa mə bro' kədan ɓay Ifray nə də ke wa mba ɓayrum su?

²Cu ndəna' mi! Namba mar wə hay' kwa mə bro' si, namba gak ta du kwa mə bro' kərem su?

³Hi cu we i kə ri mənɪ namba ve baptem kədan namba ɓa dāw kə Zezu Kris, namba ɓa dāw kə rum wə du mar um wə du baptem rum nə mi su?

⁴Zə rum, kəri mənɪ namba ve baptem, namba mar kə rum ɓay sôwâ mō' mba kə rum ta', ɓay ce' ndə mənɪ Bəba par Kris mbə mar kə gbəgbonj um, ndəna' ta' mum də mba ne nyî mə mbrewe.

⁵Namba la' ba daw ka rum kari mani namba da mar ce' nda mani mum mar na si, ndana' ta', namba da ba daw ka rum kari mani Ifray da mba ra' mba mar ce' nda mani mum par Zezu mba mara.

⁶Ma we dan mani na ka bayrumu: Kpak tu mani namba ke ka ndi ba' si na mar ka Kris wa gu, kadan gbagboŋ kpak tu mba ma bro' na donok, bay kadan namba cu da ke bek kwa ma bro' za' mi.

⁷Za swa mani mar si fan swa ma njeŋ, kwa ma bro' cu ka gbagboŋ wa rum mi.

⁸Namba la' mar ka Kris si, namba ve i namba da ke ka nyi ka rum ta'a.

⁹Namba we si: Daka kari mani Ifray par Kris mba mar, mum cu da mar karem za' mi. Mar cu ka gbagboŋ wa rum za' mi.

¹⁰Kari mani mum mar, mum mar wa hay' kwa ma bro' sem daw sar da ha, ama nyi um mani mum ka ndi na, mum ka ndi za Ifraya.

¹¹Ndana' ka hi ta', i kar tu ri ce' nda mar wa hay' kwa ma bro', bay i kar tu ri ce' nda hi ka i za Ifray wa du ba mi ka Zezu Kris.

¹²Kwa ma bro' cu gak suk gbagboŋ wa tu ri mani wa mar, kadan mum mi gi ta za kwa sana' tu ri za' mi.

¹³I ar kwa tu ri cem cem gi kwa ma bro' ce' nda kwa sin mani wa gi sin ma bro' mi, zawa i ne tu ri ne ka Ifray ce' nda sawa mani Ifray ra' mba mar, bay i ne tu ri cet ne ka Ifray ce' nda kwa sin ma gi kwa ma njeŋe.

¹⁴Kwa ma bro' cu gak suk gbagboŋ wa ri mi, za hi cu ta za dan dlay mi, ama hi wa ta za bay Ifraya.

¹⁵Namba gak in ma su? Namba da gi kwa ma bro' za namba cu ta za dan dlay mi, ama za namba wa ta za bay Ifray su? Cu ndana' mi!

¹⁶Hi we si njeŋ, kari mani hi ar tu ri ne ka swa kadan hi ta za rum, hi fan bek swa mani hi wa ta za rumu. Hi la' wa ta za kwa ma bro' si, hi da mara. Hi la' wa ta za Ifray si, mum da mi gi njeŋ kor rumu.

¹⁷Ama ma gi soko ne ka Ifraya: 'Ba' si, hi ke bek kwa ma bro', ama mgbaj ni na, hi wa ta za dan ma kazin' mani hi za' wa du kwata' Ifray ka vunduk ri dan'ŋ.

¹⁸Ifray sid' ni mba du sin ma bro', bay hi fan bek gi kwa ma njeŋe.

¹⁹Na wa in dan mani na ce' nda mani sumra' ma teta wa in, za hi cu gak mun zu dan ma seŋ mato'o. 'Ba' si, hi ar tu ri ce' nda bek ka gi kwa ma ka zur ka sin ma bro' kadan hi ta wa du sin ma bro' dan zuru. Ndana' ta', mgbaj ni na, i ar tu ri cet ce' nda bek ka gi kwa ma njeŋ kadan hi ta ce' nda mani Ifray wa wa'a.

²⁰Kari mani hi ke bek kwa ma bro', hi cu tle fur gi kwa ma njeŋ mi.

²¹Hi za' mi ka gi sin mani hi ke gi, bay zur wa mi gi wa rum mgbaj ni na su? Ndo' vun sin rum na mar na.

²²Ama mgbaŋ ni nə, Ifray sid' ni mbə du kwa mə bro' ɓay gi ni faŋ bek umu. Kwa mənɪ hi wə za' han, hi wə ta ce' ndə mənɪ Ifray gi ni faŋ njeŋ, ɓay ndo' vun rum, hi də fe nyî mə də hâ.

²³Zə bal cik mənɪ swə wə fe zə kwa mə bro' mənɪ mum gi nə mara. Ama kwane mənɪ Ifray ne uray ne mba wə du ɓa mba kə Bârî mba Zezu Kris nə nyî mə də hâ.

Rome 7

¹Daw ba man, hi we dan mənɪ na wə də in mi ne nə si njeŋ, zə hi we dan dlay si. Dan dlay kəta' kə gbəgbon wa swə kəri mənɪ mum kə i ɓo.

²Dan rum ce' ndə ma məti cin nji. Dan dlay tləɓa ma rə kə nji sə kəri mənɪ mum kə i ɓo. Ama mum la' mar si, dan dlay mənɪ tləɓa sə kə rum nə par mbə wa sə si.

³Ta la' cin nji məsin kəri mənɪ nji sə kə i ɓo si, sôwâ də sə də kə i gi nja. Ama nji sə la' mar si, dan dlay rum cu wa sə za' mi, ɓay ta kə vari kədan ta cin nji məsin dan gi nja.

⁴Daw ba man, dan rum də ke ndəna' zə ri ta', hi mar wə hay' dan dlay, zə hi kwa tu Kris ɓay mgbaŋ ni nə, hi nə mə Swə mənɪ car mbə mar, kədan namba gi sin mə ɓay zə Ifraya.

⁵Kəri mənɪ namba ke wə ta zə kpak tu mba, dan dlay wə pla' zu kwa səna' tu mba mə bro' kədan namba gi kwa mə bro', ɓay kwa rum mba pla' də mara.

⁶Ama mgbaŋ ni nə, Ifray sid' mba mbə du dan dlay, zə namba mar wə hay' kwa mənɪ kaw mba ce' ndə daŋgay'i. Ndəna', namba gak gi sin zə Ifray kə vari mə mbrew mənɪ wə gi sin zə gbəgbon Simbed' Ifray, cu kə vari mə kəmba mənɪ wə gi sin zə gbəgbon dan dlay mənɪ wây' nə mi.

⁷Namba də in ma su? Dan dlay nə kwa mə bro' su? Cu ndəna' mi! Zawa, dan dlay nə kə mənɪ ta' kwa mə bro' ne nana. Dan dlay la' cu in kəza: A səna' kwa mi si, na cu gak we kwa səna' mi.

⁸Kwa mə bro' za' vari wə du dan dlay kədan mum car kwa səna' cem cem wə vunduk rini. Zə dan dlay la' cu kəzə mi si, kwa mə bro' ce' ndə mara.

⁹Ba' si, kəri mənɪ dan dlay cu mbə mətə', na ke kə i, ama kəri mənɪ dan dlay mbə day, kwa mə bro' car i,

¹⁰ɓay na mara: Ifray ne dan dlay kədan mum tle swə də fe nyî mə də hâ, ama mə na, dan dlay rum tle nan ta mara.

¹¹Kwa mə bro' za' vari wə du dan dlaya. Mum ɓu nan, ɓay mum ci nan kə dan dlay rumu.

¹²Ndəna', dan dlay nə kə tu rum car mbə hay' Ifray, dan dlay daw daw daŋ' car mbə hay' Ifray, ɓay handay njeŋ ɓay ɓaya.

¹³Kwa mə ɓay faŋ mbə kə mar wa rin su? Cu ndəna' mi! Kwa mə bro' kə mənɪ mbə kə mar rumu: Kwa mə bro' tle kwa mə ɓay faŋ ci nan kə ndi. Kəri mənɪ kwa mə bro' gi

ndəna', mum ta' kpak tu rum mə kəzin' nə ta rəka. Kəri mənɪ dan dlay mbə day, kwa mə bro' faŋ bro' bayrumu.

¹⁴Namba we si, dan dlay car mbə hay' Simbed', ama mə na, na swə mə tətā bay kwa mə bro' coḅ nan ce' ndə bek umu.

¹⁵Na cu mun zu kwa mənɪ na wə gi nə mi, zə na cu gi kwa mənɪ na wə wa' gi rum nə mi: Zawa, na wə gi kwa mənɪ na sî.

¹⁶Na la' wə gi kwa mənɪ na cu bə gi rum mi nə si, na wə we ndəna' i dan dlay nə baya.

¹⁷Mgbanj ni nə, na cu kə mənɪ wə gi ndəna' nə mi, ama kwa mə bro' mənɪ wə vunduk rin kə mənɪ wə gi rumu.

¹⁸Na we si, kwa mə bay cu wə vunduk rin mi, wa' dan ini: Wə kpak tu rin, zə ko mē' gi kwa mə bay la' kəta' wə vunduk rin, na cu kə gbəgbəŋ kədan na gi kwa rum mi.

¹⁹Na cu gi kwa mə bay mənɪ na kə mē' gi rum nə mi, zawa na faŋ gi kwa mə bro' mənɪ na cu bə gi rum nə mi.

²⁰Na la' wə gi kwa mənɪ na cu bə gi kwa rum mi nə si, kwa rum wə ta' i na cu kə mənɪ wə gi kwa rum nə mi, ama kwa mə bro' mənɪ wə vunduk rin kə mənɪ wə gi kwa rumu.

²¹Zə rum, na za' dan dlay mənɪ nə wə vunduk rini: Kəri mənɪ na wə wa' kədan na gi kwa mə bay, na faŋ za' na wə gi kwa mə bro' tawa.

²²Wə dan dīk vunduk rin mə seŋ, na wə tuk kədam kə dan dlay Ifraya.

²³Ama na wə za' dan dlay məsin wə tu rin mənɪ wə zi kə dan dlay mənɪ dan dīk vunduk rin wə tuk kədam kə ndi. Mum nə kə mənɪ wə man kaw ce' ndə daŋgay' zə dan dlay kwa mə bro' mənɪ wə tu rini.

²⁴Ay' 'yum zə na bə ndəkara! Sa nə də man sid' mbə wə tu mənɪ wə man ci nə su?

²⁵Na gi soko ne kə Ifray zə Bârî mba Zezu Kris! Ndəna', na wə ta zə dan dlay Ifray kə dan dīk vunduk rin, ama kə kpak tu rin, na wə ta zə dan dlay kwa mə bro'o.

Rome 8

¹Zə rum, mgbanj ni nə, dan bok cu wa sôwâ mənɪ ɓa daw kə Zezu Kris nə mi.

²Zə dan dlay Simbed' mə Kələŋ mənɪ wə ne nyî mə də hâ mba ne zə ɓa mba kə Zezu Kris nə sid' nan mbə du dan dlay kwa mə bro' kə mara.

³Ifray gi kwa mənɪ dan dlay Moyizə cu gak gi mi zə kpak tu sumra' gi dan dlay rum faŋ tətā: Ifray bok dan wa kwa mə bro' mənɪ wə du kpak tu sumra'a. Mum gi ndəna' kəri mənɪ mum sin Vay um mənɪ mbə kə kpak tu ra' nji kə kpak tu sumra' mə bro', kədan mum faŋ kwa po' fur zə kwa mə bro'o.

⁴Ifray gi ndəna' kədan kwa mə njeŋ mənɪ dan dlay wə wa' nə mbə gi wə du mba, namba sôwâ mənɪ cu ta ce' ndə kpak tu mba wə wa' nə mi, ama mənɪ wə ta ce' ndə Simbed' mə Kələŋ wə wa'a.

- ⁵Sôwâ mœni wə ta ce' ndə mœni kpak tu nday wə wa', kwa wa' rum wə suk gbəgboŋ wa dan dīk vunduk nday, ama sôwâ mœni wə ta ce' ndə mœni Simbed' Ifray wə wa', kwa wa' rum wə suk gbəgboŋ wa dan dīk vunduk ndaya:
- ⁶Sôwâ mœni wə ar kwa wa' kpak tu nday nə suk gbəgboŋ wa dan dīk vunduk nday, handay də mara. Ama sôwâ mœni wə ar kwa wa' Simbed' Ifray nə suk gbəgboŋ wa dan dīk vunduk nday, Ifray də ne nyî mə də hâ kə heḅ ne kə sum rumu.
- ⁷Sôwâ mœni ar kpak tu nday suk gbəgboŋ wa dan dīk vunduk nday, handay sum sî Ifraya. Handay cu ta zə dan dlay Ifray mi. Kəzin', handay cu gak mi!
- ⁸Sôwâ mœni wə ta zə kpak tu nday, handay cu gak gi kwa mœni wə kəḁam tu Ifray mi.
- ⁹Ama mə hi, hi cu ta ce' ndə mœni kpak tu ri wə wa' nə mi, ama hi wə ta ce' ndə mœni Simbed' mə Kəleŋ wə wa', zə Simbed' Ifray suk wə vunduk ri. Swə mœni cu kə Simbed' Kris mi, bə rum cu mə Kris mi.
- ¹⁰Ama Kris la' suk wə vunduk ri si, tu ri mar zə kwa bro', ama Simbed' kə nyî wə vunduk ri, zə Ifray gi ni njeŋ kor rumu.
- ¹¹Simbed' swə mœni par Zezu mbə mar la' suk wə vunduk ri si, swə mœni par Kris mbə mar nə də ne nyî kə tu ri mœni wə mar zə Simbed' um mœni suk wə vunduk ri.
- ¹²Ndəna' ta', daw ba man, namba kə bal wa mba, ama bal rum cu zə namba ta ce' ndə mœni kpak tu mba wə wa' nə mi.
- ¹³Zə hi la' wə ta ce' ndə mœni kpak tu ri wə wa' nə si, hi də mara. Ama hi la' ci sin mœni kpak tu ri wə gi nə kə Simbed' mə Kəleŋ si, hi də ke kə nyî mə də hâ.
- ¹⁴Sôwâ daŋ' mœni wə ta zə Simbed' Ifray, handay daw Ifraya.
- ¹⁵Zə Simbed' mœni Ifray ne ni, mum cu mi gi faŋ bek ḁay mi gi ne wəlok mi, zawa, mum mi gi faŋ daw Ifray, ḁay mba ne vari kədan namba faŋ ḁe Ifraya: «Aba, Bəba!»
- ¹⁶Simbed' Ifray kə tu rum wə in ne kə simbed' mba i namba daw Ifraya.
- ¹⁷Zə namba daw um, namba də ti bayḁa mœni Ifray kawvun wa rum kə sôwâ umu. Bay namba də ti bayḁa Ifray wa nji ḁaw kə Kris. Zə namba la' wə ce boni kə rum si, namba də gay' kə rum wə du mbra' um ta'a.
- ¹⁸Na kar i boni mœni namba wə ce mgbaŋ ni nə cu gak kənji' kə mbra' mœni Ifray wə də ta' mba ne kofo nə mi.
- ¹⁹Kwa daŋ' mœni Ifray gi wə ji bəka mœni Ifray wə də ta' ne kə daw umu: Kwa rum daŋ' wə ji bəka rum kə mē' ḁayrumu.
- ²⁰Zə Ifray bok dan wa kwa daŋ' mœni mum gi, ḁay handay faŋ kwa mœni cu kə sin mi, kwa rum cu gi zə handay wə wa' ndəna' kə tu nday mi, ama kwa rum gi zə Ifray wə wa' ndəna'a. Ama kə ndi nə daŋ', handay wə ji dan rum kə red' vunduk,
- ²¹bəka mœni Ifray də sid' kwa daŋ' mœni mum gi mbə du vun nē' mœni wə nday ḁənok, ḁay handay də fe wa tu nday ce' ndə daw Ifraya.

- ²²Namba we si: Mgbaŋ ni nɔ, kwa daŋ' mɔni Ifray gi wɔ ndɔma' kɔ boni ce' ndɔ mɔni ma wɔ ce kɔri mɔni ta wɔ vra'a.
- ²³Ama kwa daŋ' mɔni Ifray gi cu ndɔma' taw mi, namba sɔwɔ mɔni fe Simbed' mɔ Kɔleŋ mɔni mum ne mba ce' ndɔ kwane cop wɔ du kwane um, namba wɔ ndɔma' wɔ vunduk mba ta', kɔ ji ri mɔni Ifray wɔ dɔ tumwa mba bay wɔ dɔ mba gi faŋ daw umu.
- ²⁴Zɔ namba njay vunduk mba wa dan rum, namba fe sidi. Sɔwɔ la' we kwa mɔni handay njay vunduk nday wa rum nɔ si, handay cu njay vunduk nday wa rum za' mi. Sa nɔ wɔ cin vunduk rum wa kwa mɔni mum we si nɔ su?
- ²⁵Ama namba la' wɔ njay vunduk mba wa kwa mɔni namba cu we mi nɔ si, namba wɔ car ŋgɔdɪŋ' kɔri mɔni namba wɔ ji kwa rumu.
- ²⁶Ndɔna' ta', Simbed' mɔ Kɔleŋ wɔ mbɔ kawɔa mba, namba sɔwɔ mɔ tɔtɔ, zɔ namba cu we in dan kɔ Ifray kɔ vari rum mi. Ama Simbed' kɔ tu rum wɔ in dan kɔ Ifray zɔ mba kɔ ndɔma' mɔni swɔ cu gak in kɔ vun mi.
- ²⁷Bay Ifray mɔni wɔ we dan dɪk vunduk sumra', mum wɔ we kwa mɔni Simbed' mɔ Kɔleŋ wɔ o, zɔ Simbed' wɔ o kwa zɔ sɔwɔ mɔ kɔleŋ ce' ndɔ mɔni Ifray wɔ wa'a.
- ²⁸Namba we si wɔ du kwa daŋ', Ifray wɔ gi sin mɔ bay zɔ sɔwɔ mɔni wɔ um ba, sɔwɔ mɔni mum dɛ nday ce' ndɔ mɔni vunduk rum wɔ wa'a.
- ²⁹Zɔ sɔwɔ mɔni Ifray da' nday ba' si, mum dɪk wɔ vunduk rum ba' si kɔdan mum nday gi ra' nji kɔ Vay mɔ mbri wɔ du raw daw ba.
- ³⁰Sɔwɔ mɔni Ifray dɪk dan wa nday wɔ vunduk rum ba' si, mum dɛ nday ta'a. Bay sɔwɔ mɔni mum dɛ nday, mum gi nday njeŋ kor rumu. Bay sɔwɔ mɔni mum gi nday njeŋ kor rum, mum bul mbra' um kɔ ndaya.
- ³¹Dan rum la' ndɔna' si, namba dɔ in ma su? Ifray la' kɔta' kɔ mba si, sa gak mba tak su?
- ³²Mum cu dɛ i wa Vay um mi, zawa mum ar num ce' ndɔ kwa po' fur zɔ mba daŋ', gi ma mum cu dɔ mba ne kwa mɔsin daŋ' kɔ Vay um mi su?
- ³³Sa dɔ tum sem sɔwɔ mɔni Ifray da' nday nɔ su? Bɔ rum cu mi, zɔ Ifray kɔ tu rum wɔ nday gi njeŋ kor rumu.
- ³⁴La' ndɔna' si, Sa dɔ bɔk dan wa nday su? Bɔ rum cu mi, zɔ Zezu Kris nɔ swɔ mɔni mar, pɔ daŋ' rum Ifray par num mbɔ mar, bay mum ta suk wɔ ba fun Ifray, bay mum wɔ o Ifray zɔ mba.
- ³⁵Kwa mi gak bul mbok mba kɔ bɔ Kris nɔ su? Boni gak su? Dan dɪk su? Sɔwɔ mɔni wɔ keɔ zu mba su? Mɛ' su? Ca su? Cik su? Ko masɔlam su?
- ³⁶Ce' ndɔ mɔni Dan rum wɔy' wɔ du dɛrwa: Bɔka daŋ', sɔwɔ wɔ keɔ kɔdan handay mba ci zɔ ru. Handay mba gi ce' ndɔ cime mɔni sɔwɔ kaw kɔdan handay dɔ ri fol kɔ ndi.
- ³⁷Ama wɔ du kwa rum daŋ', namba gay' gaŋsem kɔ swɔ mɔni bɔ mba.

³⁸Zə na we si njeŋe: Ko mar, ko nyî, ko sum sin Ifray mə wafray, ko usiya mənî gay' jwə kə gbəgboŋ mbok fray kə nya, ko kwa mə mgbaŋ ni nə, ko kwa mənî wə də mbə,

³⁹ko gbəgboŋ mə wafray, ko gbəgboŋ mə zə nya, ko kwa məsin daŋ' mənî Ifray gi, kwa daw du nday cu gak bul mbok mba kə bə mənî Ifray ta' ne mba kə Bârî mba Zezu Kris nə kpe mi.

Rome 9

¹Na wə in tu dan, na nə mə Kris bay na cu hay dan mi. Simbed' mə Kələŋ ta' ne kə dan dik mə vunduk rin i dan mənî na wə in nə kəzini:

²Vunduk rin wə dik dan juk bay boni rum wə də kofo kofo.

³Na kə tu rin wə wa' i Ifray nə ge nê' rin bay man bul kə Kris, kəzə kwa rum la' gak jin daw ba man mənî handay zu saŋ man si na.

⁴Handay daw rawti Israyel, Ifray gi nday faŋ daw um bay mum ta' mbra' um ne ndaya. Mum ne dan kawvun um ne nday, mum ne dan dlay ne nday, mum ta' vari bur Ifray ne nday, bay mum kawvun wa dan cem cem ne ndaya.

⁵Handay daw rawti ba mbri randay mə kə mbra'a. 'Bay Kris, wə du tu sumra' um, mum mbə pâ zu saŋ nday ta'a. Na wa' i sôwâ daŋ' bur Ifray bəka daŋ', mum kə mənî suk gbəgboŋ wa kwa daŋ'ŋ. Amen.

⁶Na cu wa' in i dan kawvun Ifray nə cu kə sin mi mi: Ndəna' daw rawti Israyel, handay cu sôwâ Israyel mə kəzin' daŋ' mi.

⁷'Bay daw rawti Abraham, handay cu daw um mə kəzin' daŋ' mi. Zə Ifray in ne kə Abraham: Na də in daw rawti Isak ce' ndə daw wû ta'a.

⁸Dan rum wa' dan in i daw mənî vra' kə gbəgboŋ tu, handay cu daw Ifray mi. Ama Ifray wə in daw mənî vra' ce' ndə dan mənî mum kawvun wa rum kə nday nə daw um mə kəzin' tawa.

⁹Zə Ifray kawvun kə dan mə ni na: «Siwiti ndə ni na', na də faŋ mbə, bay na mbə za' Sara kə vay mə nji wə ba sa.»

¹⁰Cu ndəna' taw mi, daw Rebeka mə hoŋ, handay kə ba daw, ba mbri ramba Isak.

¹¹⁻¹²Ama Ifray da' sôwâ kə dan dik vunduk rum, kədan ta' i Ifray wə car njeŋ wa dan dik vunduk rum, mum in ne kə Rebeka: «Vay maŋ mə mbri wə də gi sin zə vay mə nyêwe.» Mum in ndəna' kəri mənî ta cu njay daw mə njiwkwa kuni mətò', ko handay cu gi kwa mə bay ko kwa mə bro' mətò'o. Mum gi ndəna' kədan mum ta' i dan um cu car wa sin nday mi, ama car wa də mənî mum də nday kə ndi.

¹³Ce' ndə mənî Dan rum wây' wə du dərwa: Na bə Yakub, ama na sî Eso.

¹⁴Namba də in ma su? Ifray cu swə mə njeŋ mi su? Cu ndəna' mi!

¹⁵Zə Ifray in ne kə Moyizə: «Na də we ca wa swə mənî na wə wa' we ca wa bə rum, bay na də ci' ca wa swə mənî na wə wa' ci' ca wa bə rumu.»

- ¹⁶La' ndəna' si, dan rum cu car wa kwa wa' swə ko sin bə rum mi, ama dan rum car wa we ca mə Ifray tawa.
- ¹⁷Wə du 'Derwa Ifray, Ifray in ne kə jwə nya Egip: «Na cin nu jwə kədan na ta' gbəgbonj man kə ru, bay kədan semde rin nə pla' wa nya daŋ'ŋ.»
- ¹⁸Ndəna', Ifray we ca wa swə məni mum wə wa' we ca wa bə rum, bay mum ne wa bokrok ne kə swə məni mum wə wa' ne wa bokrok ne kə bə rumu.
- ¹⁹Məsin swə də ci vun rini: La' ndəna' si, zə mi Ifray wə də kofo kə mgbor sôwâ su? Sa gak tak kwa məni Ifray wə wa' gi nə su?
- ²⁰Ama ha sa kədan ha way dan kə Ifray su? Dənay ruḅ gak ci vun i ri rumu: «Zə mi həŋ gi nan ndəna' su si su?»
- ²¹I ri dənay kə vari gi kwa məni ta wə wa' kə ruḅ dənay sə kə cin ruḅ mə dāw məni ta ge, ta gak ri dənay məsin kə mbâ bay məsin cu ke kə mbâ mi.
- ²²Hi də in ma wa kwa məni Ifray wə gi nə su? Mum wa' ta' bak um, bay mum wa' ta' gbəgbonj um ta'a. Zə rum, mum red' vunduk rum juk kə ji sôwâ məni mum tle bak wa nday, bay mum həre' kə nday ci.
- ²³Ndəna', mum wa' ta' mbra' um mə mbri mba ne, namba sôwâ məni mum we ca wa mba. Namba sôwâ məni mum gila' mba ba' si kədan namba fe mbra' um,
- ²⁴zə namba sôwâ məni mum da' mba, mum cu de sum rum wə du sôwâ Zuwif taw mi, ama mum de nday wə du sôwâ məni cu zu saŋ sôwâ Zuwif mi ta'a.
- ²⁵Ce' ndə məni mum in wə du dərwa bə ka' dan mə de kə Oze: «Sôwâ məni cu wə du sôwâ man mi, na də nday de: Sôwâ mana. Bay zu saŋ məni na cu bə mi, na də nday de: Sôwâ man məni na ba.
- ²⁶Bay wə ri məni na in ne kə sôwâ: Hi cu sôwâ man mi, wə ri rum to', sôwâ də nday de: Daw Ifray mə kə i.»
- ²⁷Bay bə ka' dan mə de kə Esaya nə ka' dan wa sôwâ Israyel: «Ko sôwâ Israyel la' raw ce' ndə nyetl vun ya mbi daŋ', Ifray də sid'kam sôwâ du ndaya.
- ²⁸Zə Bârî də gi dan ge um məni mum in wa nya nə daŋ' ga'ri.»
- ²⁹Bay ce' ndə bə ka' dan mə de kə Esaya nə in vun kofo: «Bârî mə kə gbəgbonj daŋ' la' cu ar daw rawti mba kəzə mi si, namba də ke ce' ndə sôwâ so Sodomə, namba də ke ce' ndə sôwâ so Gomorə.»
- ³⁰Namba də in ma su? Namba ini: Sôwâ məni cu zu saŋ sôwâ Zuwif mi, məni cu keḅ kədan handay faŋ sôwâ mə njeŋ kor Ifray mi, Ifray gi nday njeŋ kor rum zə handay ve Kris.
- ³¹Ama raw sôwâ Israyel məni wə keḅ dan dlay məni gak nday gi njeŋ kor Ifray kə ndi, handay cu za' dan dlay rum mi.

³²Zə mi su? Zə handay cu keḅ kədan handay ke njeṅ kor Ifray zə handay ve dan um mi, ama handay wə dīk i handay faṅ njeṅ zə sin ndaya. Handay dle wa sem wa gway' mə dle wa sem,

³³ce' ndə mənī Dan rum wāy' wə du dərwa: «I kar ri'i: Na cin gway' mənī wə gi sôwâ dle wa sem wə so Siyoṅ, pra mənī wə gi sôwâ nde. Ama swə mənī ve num, zur cu də gi bə rum mi.»

Rome 10

¹Daw ba man, kwa mənī na wə wa' kə vunduk rin daṅ' nə, say sôwâ Zuwif fe sidī. Na wə in dan kə Ifray wa kwa rum bəka dāw dāw daṅ'ṅ.

²Na gak in wa nday i handay nyen peḏ' kə sây' zə Ifray, ama sây' nday cu car wa kwawe mə kəzin' mi.

³Handay cu we vari mənī Ifray wə gi sôwâ njeṅ kor rum kə ndi nə mi, ḃay handay wə keḅ vari faṅ njeṅ kor rum kə tu nday, ndəna' handay cu ar tu nday ta wə vari mənī Ifray wə gi sôwâ njeṅ kor rum kə ndi nə mi.

⁴Zə Kris mbə ndo' vun dan dlay Moyizə si, kədan Ifray gi sôwâ daṅ' mənī ve Kris njeṅ kor rumu.

⁵Dan mənī Moyizə wāy' wa dan njeṅ mə kor Ifray kə vari dan dlay nə ni na: «Swə mənī wə ta zə dan dlay, bə rum də ke kə nyî mə də hâ zə rumu.»

⁶Ama dan mənī in dan wa dan njeṅ mə kor Ifray zə sôwâ ve Kris nə ni na: «A ci vun wə vunduk ru mi: Sa nə də ur də wafrey su?» (Ce' ndə mənī wa' in, o Kris kədan nə dam mbə nya).

⁷A ci vun wə vunduk ru mətə'a: «Sa nə də dam də ri mar su?» (Ce' ndə mənī wa' ini kədan par Kris mbə mara).

⁸Dan rum in ma su? Dan rum ini: «Dan Ifray həre' kə ru, wə vun ru ḃay wə vunduk ru.» Dan rum nə dan mənī namba ve, ḃay mənī namba wə ka'a.

⁹Ha la' in kə vun ru i Zezu nə Bârî na, ḃay ha la' ve wə vunduk ru i Ifray par num mbə mar si, ha də fe sidī.

¹⁰Zə swə ve dan Ifray kə vunduk rum, ḃay Ifray um gi njeṅ kor rumu. Swə in dan mənī mum ve kə vun rum, ḃay Ifray um sidī.

¹¹Derwa wə ini: «Sa su daṅ' mənī ve num, zur cu də gi bə rum mi.»

¹²Ndəna', sôwâ Zuwif kə sôwâ mənī cu zu saṅ sôwâ Zuwif mi cu cem mi. Handay daṅ' kə Bârî dāw mənī wə ne kwa mə ḃay um ne kə sôwâ daṅ' mənī wə um dē.

¹³Ce' ndə mənī Dan rum wāy' wə du dərwa: «Sa su daṅ' mənī wə dē sem Bârî, bə rum də fe sidī.»

¹⁴Ama handay gak de sem Bârî ma, dan handay um ve su? Bay handay gak um ve ma, dan handay mun dan rum su? Bay handay gak mun dan rum ma, dan sôwâ ka' dan rum nday ne su?

¹⁵Bay sôwâ gak ka' dan rum ma, dan sôwâ mäsın nday sin su? Ce' ndə mənı Dan rum wây' wə du dərwa: «Bay juk kədan sôwâ mənı wə ka' Dan mə Kədam kuni mba!»

¹⁶Ama sôwâ cu ve Dan mə Kədam rum daŋ' mi. Ce' ndə mənı bə ka' dan mə de kə Esaya ini: «Bârî, sa nə ve dan mənı namba ka' nə su?»

¹⁷Ndəna', sôwâ gak ve Kris kə ô mənı handay wə mun dan mənı sôwâ wə ka'a. Bay dan mənı sôwâ wə ka' nə dan Kris na.

¹⁸Ama na wə ci vunı: Handay cu mun dan ka' rum mi su? Awo, handay mun si! Dan rum wây' wə du dərwa: «Sôwâ mun wor nday wə wa nya daŋ'ŋ. Bay sôwâ mun dan nday hâ ndo' nya.»

¹⁹Na ci vun kəreme: Sôwâ Israyel cu mun dan rum mi su? Moyizə dam ci vun rum copo: «Na də car sây' mənı wə vunduk ri wa sôwâ mənı cu zu saŋ sôwâ Zuwif mi. Na də mi gi ra' bak wa sôwâ mə dan we kwa.»

²⁰Bay bə ka' dan mə de kə Esaya faŋ in dan mə pâ dan mə nay' na. Mum ini: «Sôwâ mənı cu wə man keɓ mi, handay za' nan si. Sôwâ mənı cu wə ci vun rin mi, na ta' tu rin ne nday si.»

²¹Ama mum in wa sôwâ Israyel: Bəka daŋ', na gun ɓa rin hay' sôwâ mənı cu mun vun rin mi, bay wə gi wa ɓokroko.

Rome 11

¹Zə rum, na ci vunı: Ifray vad' sôwâ um si su? Cu ndəna' mi! Na kə tu rin, na swə Israyel. Na vay rawti Abraham. Na swə zə saŋ Benyami.

²Ifray cu vad' sôwâ um mənı mum da' nday vun kofo ce' ndə sôwâ um kuni mi. Hi cu we dan mənı Derwa Ifray in wə ri mənı Eliya ci' tu wa sôwâ Israyel kor Ifray nə mə su?

³Mum ini: «Bârî, handay ci sum ka' dan wû, bay handay bru kwa cu kwa po' fur wû cem cem ta nya. Say gwa' na daw sar, bay handay wə keɓ kədan handay man ci ta'a.»

⁴Ifray dam vun rum ma su? Mum ini: «Na kə sôwâ man i mbu sedā' mənı cu kuduk ta nya kor ifray vun fur mə de kə Baal mi.»

⁵Ndəna', mgbaŋ ni nə ta'a. Gwa' sôwâ cep mənı Ifray da' nday zə bay umu.

⁶Mum da' nday zə bay um, cu zə sin mənı handay wə gi nə mi. La' cu ndə na' mi si, bay Ifray cu də ke bay mə kəzin' mi.

⁷Namba də in ma su? Sôwâ Israyel cu za' kwa mənı handay wə keɓ nə mi. Say sôwâ mənı Ifray da' nday, handay za' kwa rumu. Sôwâ mäsın cu gak mun zu dan rum mi.

⁸Ce' ndə mənɪ Dan rum wây' wə du dɛrwa: «Ifray gi nday faɲ sum wa bɔkroko. Mum gi ndəna' kədan handay cu gak weri kə i nday mi, ɓay handay cu gak mun dan kə hum nday mi hâ bəka rumu.»

⁹Bay David ini: «Na wa' i kwati nday faɲ ruwa, kə təkəy', kə kwa dle wa sem, ɓay boni zə ndaya.

¹⁰Na wa' i i nday kuni dɛɲâr kədan handay weri za' mi, ɓay duɓ nday kuni duɲ də hâ.»

¹¹Zə rum, na ci vunu: kəri mənɪ sôwâ Zuwif dle wa sem, handay njay ta nya faɗ su? Cu ndəna' mi! Ama zə kwa mə bro' nday, sôwâ mənɪ cu zu saɲ sôwâ Zuwif mi za' vari kədan handay sidi. Zə rum, sây' car wə vunduk sôwâ Zuwif wa ndaya.

¹²Kwa mə bro' sôwâ Zuwif la' ne ɓay ne kə sôwâ nya juk si, ɓay dɛnok nday la' ne ɓay ne kə sôwâ mənɪ cu zu saɲ sôwâ Zuwif mi juk si, kə ri mənɪ raw sôwâ Zuwif mənɪ Ifray da' nday faɲ vunduk nday kədan handay fe sidi, kwafe rum də ke ɓayrumu!

¹³Mgbaɲ ni nə, na wə in mi ne, hi sôwâ mənɪ cu zu saɲ sôwâ Zuwif mi: Na bə sin mənɪ Ifray sin nan hay' ri, ɓay na wə mbra' tu rin kə sin mana.

¹⁴Ndəna', na wa' kədan na car sây' wə vunduk sôwâ man kədan sôwâ məsin du nday fe sidi.

¹⁵Zə kə ri mənɪ Ifray vad' nday, sôwâ nya za' vari kədan handay gila' dan nday kə Ifraya. kəri mənɪ Ifray wə də faɲ nday ve, kwa rum də ke ce' ndə mi su? Kwa rum də ke ce' ndə mar mənɪ faɲ car i!

¹⁶Alkamari mə vun kofo la' kələɲ si, kam fur rum ke kələɲ ta'a. Tlor gu la' kələɲ si, ɓa gu rum ke kələɲ ta'a.

¹⁷Sôwâ Israyel ce' ndə gu olivə mə sine mənɪ Ifray tum ɓa məsin rumu. Bay hi, sôwâ mənɪ cu zu saɲ sôwâ Zuwif mi, hi ce' ndə gu olivə mə du za mənɪ Ifray tləɓa ta tan ri ndaya. Bay mgbaɲ ni nə, hi wə fe gbəgbəɲ mənɪ wə car mbə tlor mənɪ wə ur gu olivə mə sine.

¹⁸Zə rum, hi cu gak jed' ɓa gu mənɪ swə tum kuni mi. Hi gak mbra' tu ri mə ma su? Hi cu kə mənɪ wə kaw tlor rum mi, zawa, tlor rum kə mənɪ wə mi kawa.

¹⁹Hi wə də in man ne: «Ama handay tum ɓa gu kuni kədan handay man tləɓa də tan ri ndaya.»

²⁰Dan rum njeɲe. Ifray tum nday zə handay cu ve dan um mi, ɓay hi gay' wə tan ri nday zə hi ve Kris. Ama i kaw wa ri kədan i mbra' tu ri mi. Zawa, i ne wəloko.

²¹Zə Ifray la' cu ar sôwâ Zuwif ce' ndə ɓa gu mə kpak rum mi si, mum cu də mi ar mə ta'a.

²²I kar vari mənɪ Ifray ta' ɓay um kə bak umu: Mum tle bak wa sôwâ mənɪ wə gi kwa mə bro', ɓay mum gi sin mə ɓay wə hay' ri. Ama say i gay' wə du ɓay umu. La' cu ndə na' mi si, mum də mi tum ce' ndə mənɪ mum tum ɓa gu kuni ta'a.

²³Bay sôwâ Zuwif la' ar wa bokrok nday si, Ifray dë nday tlôba dë ri mënë handay ke han vun kofo. Zë Ifray kë gbëgbon këdan mum nday tlôba këreme.

²⁴Hi sôwâ mënë cu zu saŋ sôwâ Zuwif mi, hi cë' ndë ba gu olivë më du za. Ifray tum ni bay tlôba ni ta tu gu olivë më sine mënë kpak tu rum cem kë kpak tu ri. Sôwâ Zuwif cë' ndë ba gu olivë më sine. Zë rum, cu këcik këdan Ifray dë faŋ nday tlôba dë wa gu mënë handay ke han ba' në mi.

²⁵Daw ba man, na wa' këdan na ta' dan më këzin' mënë ke pe' në mi ne, këdan hi gi tu ri cë' ndë sum kwawe mi. Dan rum ni na: Sôwâ mësin wë du sôwâ Israyel gi wa nday bokroko. Ama kwa rum dë ke ndë na' hâ raw sôwâ mënë cu zu saŋ sôwâ Zuwif mi mënë Ifray da' nday kuni fe sidi.

²⁶Ndëna', Ifray dë sid sôwâ Israyel daŋ'ŋ. Cë' ndë mënë Dan rum wây' wë du dërwa: «Bë Sid' dë car mbë so Siyon. Mum dë ra' kwa më bro' daŋ' mbë wa daw rawti Yakub dë rëka.

²⁷Bay këri mënë na dë ra' kwa më bro' nday dë rëka, na dë kawvun më ni në kë ndaya.”

²⁸Sôwâ Zuwif faŋ sum sî Ifray, zë handay vad' Dan më Këdama. Kwa rum faŋ bay zë ri, hi sôwâ mënë cu zu saŋ sôwâ Zuwif mi. Ama handay faŋ bây Ifray zë mum da' nday vun kofo zë mum kawvun kë ba mbri randay wa ndaya.

²⁹Zë Ifray cu faŋ ra' kwane mënë mum bul ne kë sôwâ mi, bay mum cu samwa dan dik um wa sôwâ mënë mum dë nday mi.

³⁰Ba' si, hi, sôwâ mënë cu zu saŋ sôwâ Zuwif mi, hi cu mun vun Ifray mi. Ama mgbaj ni në, Ifray we ca wa ri zë sôwâ Zuwif cu mun vun rum mi.

³¹Ndëna' ta', zë handay we i Ifray we ca wa ri kë ri mënë handay cu mun vun rum mi, mgbaj ni në, handay cu mun vun rum mi, këdan mum we ca wa nday ta'a.

³²Zë Ifray gi sôwâ daŋ' cë' ndë daŋgay' zë dan mun vun, këdan mum ta' we ca um wa nday daŋ'ŋ.

³³Ndak Ifray në toŋo. Gwet kë kwawe um seŋe. Sa gak pay zu dan dik um su? Sa gak mun zu sin gi um su?

³⁴Cë' ndë mënë Dan rum wây' wë du dërwa: «Sa gak we dan dik Bârî su? Sa gak ke bë har um su?

³⁵Sa gak um ne kwa cop, këdan bë rum faŋ fe bal rum su?”

³⁶Zë kwa daŋ' wë car mbë hay' rum, kwa daŋ' këta' kë rum bay zë rumu. Mbra' në ke kë Ifray hâ dë hâ! Amen.

Rome 12

¹Daw ba man, na wə mi o zə we ca Ifray kədan i ar tu ri ne kə Ifray ce' ndə kwa po' fur mə kə i, məni cin wə zə Ifraya. Kwa rum wə kədam tu rumu. Mum nə vari bur Ifray mə baya.

²I gi kwa ce' ndə məni sôwâ nya wə gi kuni mi, zawa i ar Ifray nə gila' ri kə faɲwa gwet mi cete. Hi la' gi ndəna' si, hi gak we kwa məni Ifray wə wa', kwa mə bay, kwa məni wə kədam tu rum, bay kwa mə njeɲe.

³Zə kwane məni Ifray ne nan wə du bay um, na in mi ne daɲ'ɲ: I dɪk dan toɲ mə wa tu ri pā wa toɲ tu ri mi. Zawa, i dɪk dan njeɲe. Na wa' i sa su daɲ' du ri nə dɪk dan tu rum ce' ndə vari məni Ifray ne num kədan mum ve dan umu.

⁴Wə tu sumra', namba kə kwa han cem cem raw, wə du nday, handay kə sin nday cem ceme.

⁵Ndəna' ta', ko namba la' raw, namba faɲ tu mə dāw wə du ba mba kə Kris, bay namba daɲ' tləba nji ce' ndə kwa cem cem məni tləba nji wə tu mə dāwa.

⁶Mə gi sin kə kwane cem cem məni Ifray ne mba dāw dāw daɲ' wə du bay umu. Swə dāw du mba la' fe mə ka' dan məni Ifray ne num si, say nə ka' ce' ndə vari məni Ifray ne num kədan mum ve dan rumu.

⁷Swə məsin la' fe mə gi zə sôwâ si, say nə gi. Swə məsin la' fe mə ta' kwa si, say nə ta'a.

⁸Swə məsin la' fe mə jeɲ vunduk ne kə sôwâ si, say nə jeɲe. Swə məni la' fe mə ne kwa mə bay um ne kə sôwâ məsin si, say nə ne kə vunduk mə baya. Swə məsin la' fe mə suk bârî wa sôwâ si, say nə tle fur rumu. Swə məsin la' fe mə kawba sôwâ mə du cik si, say nə gi kə kədam.

⁹Say bə mi nə ke njeɲe. I sî kwa mə bro', i bə kwa mə baya.

¹⁰I ke kə bə nji mbok nji ce' ndə daw ya məni wə bə nji. Bay i tuk kədam kə mbâ nji mbok nji.

¹¹I gi sin, i ke ndal mi, i nyen kə simbed mə bay, bay i gi zə Bârî kə vunduk mə dāwa.

¹²I tuk kədam kə kwa məni hi wə njay vunduk ri wa rum, i car ɲgəɲ' wə du boni, i in dan kə Ifray bəka daɲ'ɲ.

¹³I kawba sôwâ mə njeɲ du kwa məni handay kə mē' rum, i ve rəkway məni wə mbə so mi kə bayrumu.

¹⁴I o Ifray kədan nə kuswa' sôwâ məni wə gi boni mi ne. I o num kədan nə kuswa' nday bay nə ge nē' nday mi.

¹⁵I tuk kədam kə sôwâ məni wə tuk kədam, i ci' kə sôwâ məni wə ci'i.

¹⁶I gay' bay mbok nji: I mbra' tu ri mi, zawa i ve sin məni cu kə mbra' mi. I gi tu ri ce' ndə sum kwawe mi.

¹⁷I po' swə mənɪ gi kwa mə bro' hay' ri kə kwa mə bro' mi. I keɓ vari gi kwa mə ɓay kor sôwâ dan'ɲ.

¹⁸Hi la' gak kəta' si, i keɓ kədan i gay' heɓ kə sôwâ dan'ɲ.

¹⁹Bây man kwa, i sa' bal swə mənɪ gi kwa mə bro' hay' ri kə tu ri mi. Zawa, i ar Ifray nə gi bak um, zə Dan rum wây' wə du ɗerwa: «Bârî ini: Na kə mənɪ wə də sa' bal sôwâ mənɪ wə gi kwa mə bro'o. Na kə mənɪ wə də po' bal rumu.»

²⁰Bay ta'a: «Bə sî wû la' kə mē' si, a ne kwati ne num, mum la' kə mē' mbi si, a ne mbi ne num ce, zə ha la' gi ndəna' si, kwa rum də ke ce' ndə mənɪ ha wə ɓa riŋê ku də wa rumu.»

²¹A ar kwa mə bro' suk gbəgboŋ wa ru mi, zawa a suk gbəgboŋ wa kwa mə bro' kə kwa mə ɓaya.

Rome 13

¹Say sa su dan' mun vun sum rôwâ mənɪ gay' gbəgboŋ wa nya, zə sum rôwâ mənɪ gay' wə gi sin dan gbəgboŋ mənɪ car mbə hay' Ifray cu mi, zə Ifray kə mənɪ njay sum rôwâ mənɪ wə gi sin wa nya mgbaŋ ni na.

²La' ndəna' si, swə mənɪ wə jed' sum rôwâ nya, ka bə rum wə jed' dan dlay mənɪ Ifray cini. Bay sôwâ mənɪ wə jed' gbəgboŋ rum, Ifray wə də ɓok dan wa ndaya.

³Zə sôwâ mənɪ wə gi kwa mə ɓay, wəlok sum rôwâ cu nday gi mi, say sôwâ mənɪ wə gi kwa mə bro'o. Ha la' bə i wəlok sum rôwâ nya gi nu mi si, say a gi kwa mə ɓaya. Ha la' gi ndəna' si, handay də wû sâ'a.

⁴Zə handay wə gi sin zə Ifray kədan handay kawɓa ru kədan ha gi kwa mə ɓaya. Ama ha la' gi kwa mə bro' si, a ne wəlok nday, zə handay cu ra' masəlam ɓa uray mi. Kəri mənɪ handay wə gi boni ne kə sôwâ mənɪ gi kwa mə bro', kwa rum wə tak bak Ifraya.

⁵Zə rum, wə ɓay kədan sôwâ mun vun sum rôwâ nya, cu zə tak bak Ifray taw mi, ama zə dan ɗik vunduk nday wə nday ta' gi kwa rumu.

⁶Zə hi wə po' grama ta'a: Zə sum rôwâ mənɪ wə ɓawa grama, handay wə gi sin Ifray kə ri mənɪ handay wə ɓawa grama kə vari rumu.

⁷I po' kwa dan' mənɪ handay wə ci vun rum ɓa ri: I po' grama ne kə sôwâ mənɪ wə ci vun grama ɓa ri, ɓay i po' «duwanə» ne kə sôwâ mənɪ wə ci vun «duwanə» wa kwa mə ɓa ri. I mbâ sum rôwâ dan' ɓay i ne wəlok nday, zə handay nde i fe kwa rum si.

⁸I gay' kə bal swə ɗaw wa ri mi, bal mənɪ hi gak gay' kə ndi, say i bə nji mbok nji. Swə mənɪ wə bə sôwâ məsin, bə rum wə ta zə dan dlay cete.

⁹Dan dlay mənɪ kuna: «A gi nja mi, a ci mar mi, a kəy hura mi, a səna' kwa mi,» dan dlay rum dan' ɓa wə du dan dlay mə ɗaw mənɪ na: «A bə jik wû ce' ndə mənɪ ha wə bə tu ru.»

¹⁰Swə mənɪ wə bə jik um, bə rum cu gak gi kwa mə bro' hay' jik um mi. Swə mənɪ wə bə sôwâ məsin, bə rum wə ta zə dan dlay cete.

¹¹I gi ndəna', zə hi we bəka gewa Kris nə həre'e: Ri dla' sen mi mbə si. Zə sid' mbə həre' kə mba mgbaŋ ni nə pā mə kəri mənɪ namba ve Kris vun kofo nə si.

¹²Dukri wə ndo' ye, bəka wə ra' ye. Zə rum mə ar sin mənɪ sôwâ wə gi kə dukri bay mə ra' kwa zi kədan namba zi wə ri mə bu.

¹³Mə ta njeŋ ce' ndə mənɪ sôwâ wə ta kə fəta. I ji tu ri wə du ru mə bro', gal kə sum, gi ghəghay, gi kwa mə kə zur dan zur, dle vun bay gi sây'i.

¹⁴Ama i ge kpak Bârî mba Zezu Kris bay i ar kpak tu ri mə bro' bu ni kədan hi gi kwa mənɪ mum wə wa' nə mi.

Rome 14

¹I ve swə mənɪ tətâ wə du dan mənɪ mum ve, dan jed' dan dīk umu.

²Dan mənɪ swə məsin ve nə ne vari ne num kədan mum ti kwati daŋ'ŋ. Ama swə məsin mənɪ tətâ wə du dan mənɪ mum ve nə, bə rum wə ti mbar tlap tawa.

³Swə mənɪ wə ti kwati daŋ', mum cu kə vari kədan mum jed' swə mənɪ cu ti kwati cem cem nə mi mi. Bay swə mənɪ cu ti kwati cem cem mi, mum cu kə vari kədan mum bok dan wa swə mənɪ wə ti kwati daŋ' nə mə ta', zə Ifray ve bə rumu.

⁴Ha nə sa kədan ha bok dan wa bə sin swə məsin su? Ko mum la' car ŋgədiŋ' wə du sin um, ko mum la' cu car ŋgədiŋ' mi, dan Bârî um na. Bay mum də car ŋgədiŋ' zə Bârî kə gbəgboŋ kədan mum um kaw cara.

⁵Swə məsin wə dīk i bəka məsin kə mbra' pā bəka məsin si. Ama swə məsin wə dīk i bəka daŋ' wə vun ŋji dāwa. Say swə dāw dāw daŋ' car wa dan mənɪ mum kar njeŋe.

⁶Swə mənɪ wə dīk i bəka məsin kə mbra' pā bəka məsin si, bə rum gi ndə na' kədan mum mbâ Bârî. Swə mənɪ wə ti kwati daŋ', bə rum wə gi ndə na' kədan mum mbâ Bârî, zə mum wə gi soko ne kə Ifray zə kwati umu. Swə mənɪ cu ti kwati cem cem mi, bə rum wə gi ndə na' Kədan mum mbâ Bârî, bay mum wə gi soko ne kə Ifray ta'a.

⁷Zə swə dāw du mba cu ke kə i kə wa tu rum mi, bay swə dāw du mba cu mar kə wa tu rum mə ta'a. Namba la' kə i, namba kə i zə Bârî,

⁸bay namba la' mar, namba mar zə Bârî. Ndəna' ta', ko namba la' kə i, ko namba la' mar, namba mə Bârî na.

⁹Zə Kris mar, bay mum car mbə mar kədan mum ke Bârî wa sôwâ mə mar kə sôwâ mə kə i.

¹⁰Ama mə ha, zə mi ha wə bok dan wa vay ba wû su? Bay mə ha, zə mi ha wə jed' vay ba wû su? Namba daŋ', namba wə də car kor Ifray kədan mum bok dan wa mba.

¹¹Zə Dan rum wây' wə du dērwa: «Bârî ini: Zə na kə i, sôwâ daŋ' də kuduk nya kor rini. Bay swə dāw dāw daŋ' də in kə vun rum i na Ifraya.»

- ¹²Ndona', swə dāw dāw daŋ' du mba də in dan tu rum kor Ifraya.
- ¹³Zə rum, mə ar bɔk dan wa nji mbok nji si. Zawa, i gila' dan mə ni nə mbok nji: i gi kwa mənɪ wə gak ɓu vay ba mi dle wa sem, ko nde də du kwa mə bro' mi.
- ¹⁴Wə du ɓa man kə Bârî mba Zezu, na we si njeŋe: Kwa cu bro' kə tu rum dāw sar mi. Ama swə la' dɪk i kwa məsɪn wə ke kə day si, kwa rum faŋ kwa mə kə day zə bə rumu.
- ¹⁵Ha la' gi vay ba wû dɪk dan wa kwati mənɪ ha wə ti nə si, ka ha cu ta kə bə mi. A ar kwati mənɪ ha wə ti nə də ke ce' ndə kwa mə vi' swə mənɪ Kris mar wə zə rum nə mi.
- ¹⁶I ar vari ne kə sôwâ məsɪn kədan handay ge dan mə bro' wa kwa mənɪ hi wə kar ce' ndə kwa mə ɓay nə mi.
- ¹⁷kəri mənɪ sôwâ wə in dan wa dan vari mənɪ Ifray wə də suk gbəgbɔŋ wa sôwâ um, handay cu in dan wa dan dlay kwati ko kwace mi, ama handay wə in dan wa njeŋ, kə heɓ, ɓay kədam mənɪ Simbed Ifray wə ne.
- ¹⁸Swə mənɪ wə gi sin zə Kris kə vari mə ni nə, Ifray wə tuk kədam kə bə rum, ɓay sumra' wə tuk kədam kə rum ta'a.
- ¹⁹Zə rum, mə keɓ kwa mənɪ wə mbə kə heɓ ɓay wə mba jin kədan namba jeŋ nji mbok nji wə du dan mənɪ namba ve.
- ²⁰A dənok sin Ifray zə dan kwati mi. Swə gak ti kwati daŋ', ama cu ɓay kədan mum ti kwati mənɪ wə gi vay ba um nde də du kwa mə bro' mi.
- ²¹Bay kədan a ar ti tlew kə ar ce mbi vra' gu mə de kə «viŋə», ɓay ar kwa daŋ' mənɪ gak gi vay ba wû nde də du kwa mə bro'o.
- ²²A ji dan mənɪ ha ve wa rum mbok ru kə Ifraya. Kədam zə swə mənɪ dan dɪk vunduk rum cu wə um tum kə ri mənɪ mum wə gi kwa mənɪ mum wə kar ce' ndə njeŋ nə mi.
- ²³Ama swə mənɪ wə way dan wa kwati la' ti kwati rum si, Ifray də um kaw kə dan, zə kwa mənɪ bə rum gi cu car wa dan mənɪ mum ve nə mi. Bay kwa daŋ' mənɪ cu car wa dan mənɪ mum ve nə mi, kwa rum nə kwa mə bro'o.

Rome 15

- ¹Namba sôwâ mənɪ gbəgbɔŋ wə du dan mənɪ namba ve, say mə kawɓa sôwâ mə tətâ wə du dan mənɪ namba ve, zə namba cu gak gi kwa mə kədam tu mba taw mi.
- ²Say swə dāw dāw daŋ' du mba nə keɓ gi kwa mə ɓay zə jik um, kə kwa mə kədam tu rum kədan mum um gi də kofo wə du dan mənɪ mum ve.
- ³Zə kəri mənɪ Kris ke wa nya, mum cu gi kwa mə kədam tu rum taw mi, zawa ce' ndə mənɪ Dan rum wây' wə du dərwa: «I cem cem mənɪ sôwâ mənɪ sî nu ke wû i kuni faŋ mbə wa rini.»
- ⁴Dan daŋ' mənɪ wây' wə du Dərwa Ifray ɓa' si, dan rum wây' kədan ta' kwa mba ne, zə Dərwa Ifray wə mba ne red vunduk kə jeŋ vunduk, namba njay vunduk mba wa rumu.

⁵Na wa' i Ifray mæni wə ne red vunduk kə jeŋ vunduk ne kə sôwâ, nə gi ni faŋ sôwâ mæni gak gay' heɓ kə nji mbok nji ce' ndə mæni Zezu Kris ke gi,

⁶kədan hi daŋ' gi mbra' ne kə Ifray, Ba Bârî mba Zezu Kris kə wor mə dāwa.

⁷La' ndəna' si, i ve nji mbok nji ce' ndə mæni Kris ve ni. I gi ndəna' kədan i mbra' Ifraya.

⁸Zə na in mi ne, Kris nə faŋ bə sin zə sôwâ Zuwif kədan mum nyen mbi dan mæni Ifray kawvun wa rum kə ba mbri randaya. Mum gi ndəna' kədan mum ta' i Ifray nə njeŋe.

⁹Ndəna' ta', mum mbə kədan sôwâ mæni cu zu saŋ sôwâ Zuwif mi gi mbra' ne kə Ifray zə bay um ce' ndə mæni Dan rum wây' wə du dërwa: «Zə rum, na də wû bur wə du sôwâ mæni cu zu saŋ sôwâ Zuwif mi. Bay na də dā nyem kədan na bur semde ru kə ndi.”

¹⁰Derwa Ifray wə in wə ri məsin ta'a: «Hi sôwâ mæni cu zu saŋ sôwâ Zuwif mi, i tuk kədam kə sôwâ mæni Ifray da'a!”

¹¹Bay wə ri məsin mum wə in kəreme: «Hi sôwâ mæni cu zu saŋ sôwâ Zuwif mi, i bur Bârî. Na wə wa' i sôwâ daŋ' bur numu!”

¹²Bə ka' dan mə de kə Esaya in kəreme: «Vay rawti Jese də mba. Mum də car kədan mum suk wa sôwâ mæni cu zu saŋ sôwâ Zuwif mi. Bay handay də njay vunduk nday wa rumu.”

¹³Na wə wa' i Ifray mæni wə ne gbəgboŋ ne kə sôwâ kədan handay njay vunduk nday wa rum, nə nyen vunduk ri kə kədam kə heɓ mə kəzin' zə dan mæni hi ve wa rum bay kədan Simbed mə Kəleŋ nə jeŋ dan mæni wə vunduk ri də kofo.

¹⁴Daw ba man, na kə tu rin, na we si njeŋ, vunduk ri nyen ped' kə bay, bay wa ri nyen ped' kə kwawe bay hi gak har nji mbok nji.

¹⁵Kə ndi nə daŋ', wə ri məsin wə du dërwa mæni nə, na wây' dan rum kə ku kədan na mi gi dla' wa kwa mæni na ta' ne ni ba' si, na wây' ndəna' zə bay mæni Ifray ne nan

¹⁶kədan na faŋ bə sin Zezu Kris zə sôwâ mæni cu zu saŋ sôwâ Zuwif mi, na wə gi sin ce' ndə bə po' fur kə ri mæni na wə ka' Dan mə Kədam mæni car mbə hay' Ifray, kədan sôwâ mæni cu zu saŋ sôwâ Zuwif mi faŋ kwa po' fur mə kədam tu Ifray mæni Simbed mə Kəleŋ gila' rum zə Ifraya.

¹⁷Zə rum, wə du ba mba kə Zezu Kris, na gak mbra' tu rin kə sin mæni na wə gi zə Ifraya.

¹⁸Zə na cu gak in dan məsin mi, say sin mæni Kris gi kə rin kədan mum de sôwâ mæni cu zu saŋ sôwâ Zuwif mi kədan handay ta zə Ifray, mum gi sin rum kə vari dan cem cem kə sin cem cem,

¹⁹Bay gbəgboŋ kwa ta' kwa cem cem kə yew cem cem, bay kə gbəgboŋ Simbed' Ifraya. Zə vari rum, na gaŋ ka' Dan mə Kədam məni in dan wa Kris wə ri daŋ', daka so Jeruzalem hā day nya Iliri.

²⁰Ama wə du gaŋ man, na keɓ kədan na ka' Dan mə Kədam wə ri məni sôwâ cu mun semde Kris han daw mi, zə na cu wa' i na də kofo kə gi sin məni swə məsin təŋ gi rum nə mi.

²¹Ce' ndə məni Dan rum wâŋ' wə du ɖerwa: «Sôwâ məni sôwâ məsin cu in dan wa rum ne nday daw mi, handay də um we bay sôwâ məni cu mun dan rum daw mi, handay də mun zu dan rumu.»

²²Kwa rum kə məni tak nan sem raw dan də so mi.

²³Ama mgbəŋ ni nə, na ndo' sin man wə nya məni kuni si, daka kim raw, mē' də mi kar wə man ti juk,

²⁴Bay na ɖik i na gak fe vari kəri məni na wə də nya Espanə. Na də pâ wa ri kədan na mi kar, na wə wa' i na də suk kî du ri, bay kəki rum hi gak kawba rin kədan na də day nya rumu.

²⁵Ama mgbəŋ ni nə, na də so Jeruzalem kədan na də gi sin zə raw sôwâ Ifray məni wə hana.

²⁶Zə sôwâ Kris məni gay' wə nya Maseduwanə kə nya Akay, handay gila' dan kədan handay ɓawa kwa bay sin ne kə sum ca məni wə du sôwâ Ifray mə so Jeruzalem.

²⁷Handay gila' dan rum kə tu nday, ama njeŋ rum si, dan rum ce' ndə dole hay' ndaya. Zə sôwâ Kris mə du sôwâ Zuwif məni gay' wə so Jeruzalem, handay bul kwa mə bay məni Simbed' Ifray ne nday kə sôwâ məni cu zu saŋ sôwâ Zuwif mi. Zə rum, sôwâ məni cu zu saŋ sôwâ Zuwif mi gak bul kwa mə bay məni wə ɓa nday kə sôwâ Zuwif ta'a.

²⁸Kəri məni na də ndo' sin rum bay na də ne kwane rum nday ne, na də nya Espanə bay na də pâ so mi kəri məni na wə də hana.

²⁹Bay na we si, kəri məni na wə də so mi, na də mi kuswa' kə kuswa' mə Kris.

³⁰Ama daw ba man, kə semde Bârî mba Zezu Kris kə bə məni Simbed' Ifray wə ne, na mi o, i zi kə rin kəri məni hi wə in dan kə Ifray zə rini.

³¹I o Ifray kədan nə siɖ nan wə du sôwâ nya Zude məni cu ve Kris mi, bay kədan sôwâ Ifray məni gay' wə so Jeruzalem də tuk kədam kə kwane məni na wə də nday ne.

³²Ndəna', na də day so mi kə kədam bay Ifray la' wa' si, na də za' ri pemây du ri.

³³Na wə wa' i Ifray məni wə ne heɓ ne kə sôwâ, nə ke kə ri daŋ'ŋ! Amen.

Rome 16

¹Na sin vay ba mba mə ma mə ɖe kə Fobe mėti wə gi sin zə kul sôwâ Kris məni gay' wə so Kenkreyas.

- ²I ve sə kə semdê Bârî ce' ndə mənî sôwâ Ifray wə gi mbok nji, bay i kawba sə du kwa daŋ' mənî ta kə mē' rum du ri. Zə ta kə tu sə, ta kawba sôwâ juk, bay ta kawba rin ta'a.
- ³I kaw jeḅ Priskila kə Akilas mənî wə gi sin zə Zezu Kris ce' ndə na.
- ⁴Handay wa' ar tu nday kədan handay mar kəzə zə rini. Na gi soko ne nday juk, na cu taw mi, ama kul sôwâ mənî cu zu saŋ sôwâ Zuwiḡ mi mənî ve Kris gi soko ne nday ta'a.
- ⁵I kaw jeḅ kul sôwâ Kris mənî wə ɓa wə so nday ta'a. I kaw jeḅ bâŋ man mə kə vunduk rin, Epaynet mənî ve Kris cop kə sôwâ məsin wə nya Azi.
- ⁶I kaw jeḅ Mari məti gi sin zə ri bayrumu.
- ⁷I kaw jeḅ Andronikus kə Zuniyas mənî sôwâ nya mə daw kə rini. Handay ke wə so daŋgay' kə rin, handay kə semdê wə du sum sin Kris, bay handay ve Kris cop kə rini.
- ⁸I kaw jeḅ Ampliyatus, bâŋ man mə du Bârî.
- ⁹I kaw jeḅ Urbiŋ mənî wə gi sin zə Kris ce' ndə namba, bay bâŋ man Stakis.
- ¹⁰I kaw jeḅ Apeles mənî car ŋgədiŋ' wə du dan mənî mum ve wa Kris kəri mənî cik mbə wa rumu. I kaw jeḅ sôwâ so Aristobul.
- ¹¹I kaw jeḅ Herodiyon mənî wə nya mə daw kə rini. I kaw jeḅ sôwâ so Narsis mənî ve Bârî.
- ¹²I kaw jeḅ Trifen kə Trifosa mənî wə gi sin zə Bârî, bay bâŋ man Persidə məti gi sin juk zə Bârî.
- ¹³I kaw jeḅ Rufus, bə sin Bârî mə kə mbra', kə ya um məti ce' ndə ya man ta'a.
- ¹⁴I kaw jeḅ Asiŋkrite, kə Flegon, bay Hermes, kə Patrobos, bay Hermas, kə daw ba mba məsin mənî kəta' kə ndaya.
- ¹⁵I kaw jeḅ Filologe, kə Zuli, bay Nere, kə njar rum, bay Olimpās, kə raw sôwâ Ifray mənî kəta' kə ndaya.
- ¹⁶I kaw jeḅ nji mbok nji kə kaw nji də vunduk kə soḅ nji kə vun kə dan diḡ mə ɓaya. Kul sôwâ Kris daŋ' kaw jeḅ ri.
- ¹⁷Daw ba man, na mi hara: I kaw wa ri hay' sôwâ məsin mənî wə mbə kə dan mə bul sôwâ bay wə dənok sôwâ Kris bay wə ta' kwa cem kə kwata' mənî hi ve. I gay' seŋ kə ndaya.
- ¹⁸Zə sôwâ mə ndani kuni cu gi sin zə Bârî mba Kris mi, ama handay wə gi sin zə rawti nday, handay wə dənok dan diḡ sôwâ mənî cu jeŋ wə du dan mənî handay ve nə mi kə vun kədam nday bay dan ge nday mə bay mənî wə bu sôwâ.
- ¹⁹Sôwâ daŋ' we i hi wə mun vun Bârî, zə rum na wə tuk kədam kə ri. Ama na wə wa' i i ke kə gwet kədan hi gi kwa mə bay, bay i ke njeŋ dan gi kwa mə bro'o.

²⁰Ifray mēni wə ne heḅ ne kə sôwâ, mum də haḅ wa ne kə Satan ga'ri zə sem ri. Na wə wa' i ḅay Bârî mba Zezu nə ke kə ri.

²¹Timote, bâḃ hoḅ sin man kaw jeḅ ri, Lusiyus kə Jason ḅay Sosipater mēni wə nya mə ḁaw kə rin kaw jeḅ ri ta'a.

²²Ḃay na, Tersiyus mēni wâḃ' ḁerwa mēni nə, na kaw jeḅ ri kə semḁe Bârî mba mēni ḁa mba.

²³Gayus mēni na dam rəkway wə so um, ḅay kul sôwâ Kris ḁaḃ' ḁa wə so um, mum kaw jeḅ ri. Erastə, bə ji səlay so rum, kə Kartus, vay ba man, kaw jeḅ ri ta'a.

[²⁴Na wə wa' i ḅay Bârî mba Zezu Kris nə ke kə ri ḁaḃ'ḣ. Amen.]

²⁵Mə bur Ifraya! Mum kə gbəḃboḃ kəḁan mum mi gi faḃ gbəḃboḃ wə dan mēni hi ve, ce' ndə Dan mə Kəḁam mēni na wə ka' wa Zezu Kris, ḅay ce' ndə kwawe mēni Ifray ta' ne mba du dan ḁik Ifray mēni ke pe' 'yeḣe. Dan ḁik rum ke pe' ḁa' si,

²⁶ama mḡbaḃ ni nə, dan rum ta' ta rəka kə ḁerwa sum ka' dan ḅay ce' ndə mēni Ifray mə ḁə hâ ne vari rum, dan rum wə ta' ne kə sôwâ nya ḁaḃ' kəḁan handay ve ḅay ta zə dan rum,

²⁷Mbra' nə ke kə Ifray mə kə gwet kə semḁe Zezu Kris hâ ḁə hâ! Amen.

1 Corinthe

1 Corinthe 1

- ¹Na Pol. Ifray dë nan kə bə vunduk rum kədan na faŋ vay sin Zezu Kris. Na kə vay ba man Sostenə,
- ²namba wây' dërwa mənɪ nə hay' kul sôwâ Ifray mənɪ wə so Koriŋtə, sôwâ mənɪ Ifray dë nday kədan handay ke mə mum wə du ɓa nday kə Zezu Kris, ɓay hay' sôwâ daŋ' wə ri daŋ' mənɪ wə dë semdë Bârî mba Zezu Kris, Bârî nday mənɪ Bârî mba.
- ³Namba wə wa' i Ba mba Ifray kə Bârî mba Zezu Kris kuni ne ni ɓay kə heɓe.
- ⁴Bəka daŋ' na wə gi soko ne kə Ifray man zə ri, zə ɓay mənɪ mum ne ni kə Zezu Kris.
- ⁵Zə wə du ɓa mi kə Kris, hi faŋ sum ndak wə du kwane rum daŋ', pā daŋ' rum wə du kwane mə dan ge kə mə kwawe.
- ⁶Njeŋ dan mənɪ namba in wa Kris nə pe tlor wə vunduk ri ŋgəɗiŋ'ŋ.
- ⁷Zə rum, kwane Ifray daw cu kəɗa ni mi, hi sôwâ mənɪ wə ji ri mənɪ Bârî mba Zezu Kris wə də mba.
- ⁸Mum kə mənɪ wə mi ji hâ ndo' rum kədan swə daw nə gak ge dan mə bro' wa ri kə bəka Bârî mba Zezu Kris nə mi.
- ⁹Ifray mənɪ dë ni kədan hi gay' tləɓa nji kə Vay um, Bârî mba Zezu Kris, mum njeŋ wə du dan in umu.
- ¹⁰Daw ba man, na o ni kə semdë Bârî mba Zezu Kris: I kawvun wa nji daw ɓay i bul nji mi, i gay' mbok nji kə dan dɪk mə daw ɓay kwa wa' mə daw.
- ¹¹Daw ba man, sôwâ məsin wə du sôwâ cava Klowe in ne nan i hi wə dle vun mbok nji.
- ¹²Dan mənɪ na wə wa' in nə ni na: Swə daw daw daŋ' du ri wə in dan cem ceme. Swə məsin wə ini: «Na zə Pol». Swə məsin wə ini: «Na zə Apolos». Swə məsin kərem wə ini: «Na zə Piyer». Bay swə məsin wə ini: «Na zə Kris».
- ¹³Hi dɪk i Kris bul du cem cem raw su? Pol kə mənɪ mar wə wa gu zə ri nə su? Hi ve baptem kə semdë Pol su?
- ¹⁴Na gi soko ne kə Ifray zə na cu gi baptem ne kə swə daw du ri mi, say Krispus kə Gayus.
- ¹⁵Ndəna', swə daw du ri cu gak in i hi ve baptem kə semdë rin mi.
- ¹⁶Ahâ, kəzini! Na gi baptem ne kə sôwâ so Stefanas ta', ama na cu dɪk i na gi baptem ne kə swə məsin kərem za' mi.
- ¹⁷Kris cu sin nan kədan na gi baptem ne kə sôwâ mi, ama mum sin nan kədan na ka' Dan mə Kədam ɓay kəri mənɪ na wə ka' Dan rum, na cu ka' Dan rum kə vun ge gwet sumra' mi, zə na cu wə wa' i mar mənɪ Kris mar wə wa gu nə vi' gbəgbəŋ um mi.

¹⁸Zə dan ka' mənɪ wə in dan wa mar mənɪ Kris mar wə wa gu nə dan mə lay hay' sôwâ mənɪ wə vi', ama zə namba sôwâ mənɪ wə vari sid, dan rum gbəgbonɪ Ifraya.

¹⁹Zə Dan rum wây' wə du dɛrwa: «Na də dɛnok gwet sum gwet, Na də pik kwawe sum kwawe də rəka.»

²⁰La' ndəna' si, bə gwet ka su? Bə kwawe ka su? Bə way dan mə wa nya mənɪ nə ka su? Ifray cu gi gwet mə nya mənɪ nə faɲ lay mi su?

²¹Zə, wə du gwet Ifray, mum tak sôwâ kədan handay um we kə gwet wa nday, ama Ifray gila' vari kədan mum sid sôwâ mənɪ ve num kə dan ka' mənɪ namba wə ka' bay sôwâ məsin wə kar ce' ndə laya.

²²Sôwâ Zuwif wə wa' yew bay sôwâ Grek wə keɓ gwete.

²³Ama mə namba, namba wə ka' dan Kris mənɪ sôwâ gay' num ta wa gu, dan rum kwa dle wa sem zə sôwâ Zuwif, bay dan rum lay zə sôwâ mənɪ cu zə saɲ sôwâ Zuwif mi,

²⁴ama zə sôwâ mənɪ Ifray dɛ nday, ko sôwâ Zuwif, ko sôwâ mənɪ cu zə saɲ sôwâ Zuwif mi daɲ', Kris nə gbəgbonɪ Ifray kə gwet Ifraya.

²⁵Zə kwa mənɪ sôwâ wə kar ce' ndə lay Ifray, kwa rum kə gwet pâ gwet sumra' si, bay kwa mənɪ sôwâ wə kar ce' ndə tətâ Ifray, kwa rum kə gbəgbonɪ pâ gbəgbonɪ sumra' si.

²⁶Daw ba man, i kar dan wa suk mi mənɪ hi ke suk kəri mənɪ Ifray dɛ ni: Wə i sumra', Ifray cu dɛ sôwâ mə kə gwet, ko sôwâ mə kə gbəgbonɪ, ko sôwâ mə kə semdɛ bayrum mi.

²⁷Ama Ifray da' sôwâ mənɪ sôwâ nya wə nday kar ce' ndə sôwâ mə lay kədan mum ta' zur sum gwet kə ndaya. Mum da' sôwâ mənɪ sôwâ nya wə nday kar ce' ndə sôwâ mə tətâ kədan mum ta' zur sum gbəgbonɪ kə ndaya.

²⁸Ifray da' sôwâ mənɪ sôwâ nya wə nday kar ce' ndə sôwâ mə dɛrɛ' bay wə nday jed' ce' ndə kwa mə uray kədan mum dɛnok sôwâ mənɪ sôwâ nya wə nday kar ce' ndə sôwâ mə kə mbra' kə nday,

²⁹ndəna', swə dāw cu gak mbra' tu rum wə kor Ifray mi.

³⁰Ama Ifray tləba ni kə Zezu Kris, bay mum gi Kris faɲ gwet mba, Ifray gi mba njeɲ kor rum zə Kris, mum gi mba faɲ sôwâ mə njeɲ zə Kris, bay mum tumwa mba kə Kris.

³¹Zə rum, ce' ndə mənɪ Dan rum wây' wə du dɛrwa: «Swə mənɪ wə wa' kədan mum mbra' tu rum, say bə rum mbra' tu rum zə sin mənɪ Bârî gi.»

1 Corinthe 2

¹Daw ba man, kəri mənɪ na ta so mi kədan na ka' dan mə kəzin' Ifray mənɪ ke pe' mi ne, na cu ka' dan rum kə gwet mə sumra' ko kə mbra' tu mi.

²Zə na gila' tu rin kədan kəri mənɪ na də ke du ri, na cu keɓ kədan na we dan məsin mi, say in dan Zezu Kris, bay pâ daɲ' rum mar um mənɪ mum mar wə wa gu.

- ³Zə rum, kəri mənɪ na ta ta hay' ri, na tətâ bay tu rin nyen kə wəlok bayrumu.
- ⁴Na cu ta' kwa ko ka' dan kə dan mə kədām mənɪ car mbə gwet sumra' mi, ama kə gbəgbonj mənɪ Simbed' Ifray ne nana.
- ⁵Ndəna', hi cu ve Kris zə gwet sumra' mi, ama zə gbəgbonj Ifraya.
- ⁶Kə ndi nə daŋ', na wə ka' dan gwet ne kə sôwâ Kris mənɪ jɛŋ si, ama gwet rum cu gwet nya mənɪ nə, ko gwet sum jwə mənɪ gay' gbəgbonj wa nya mənɪ nə, mənɪ gbəgbonj nday wə də dənok kuni mi.
- ⁷Zawa, na wə ka' dan gwet Ifray mənɪ ke pe' wə hay' sumra', gwet mənɪ Ifray gila' rum zə mbra' mba cop kəri mənɪ nya cu gi mətə'o.
- ⁸Jwə dāw wə du sum jwə mənɪ gay' gbəgbonj wa nya mənɪ nə cu we gwet rum mi, handay la' we gwet rum kəzə si, handay cu gay' Bârî mə kə mbra' də wa gu mi.
- ⁹Ama ce' ndə mənɪ Dan rum wây' wə du dərwa: «Kwa mənɪ swə cu we ko mun dāw mi, kwa mənɪ swə cu dīk dan wa rum dāw mi, Ifray gila' kwa rum zə sôwâ mənɪ wə um ba.»
- ¹⁰Ama Ifray ta' kwa mənɪ pe' nə ne mba kə Simbed' umu. Zə Simbed' Ifray gak keɓ zu dan daŋ', ko dan mənɪ Ifray gila' nday pe' seŋe.
- ¹¹Sa wə du sumra' gak we dan dīk vunduk swə su? Say simbed' bə rumu. Ndəna' ta', swə dāw cu gak we dan dīk Ifray mi, say Simbed' Ifraya.
- ¹²Namba cu fe simbed' mə nya mənɪ nə mi, ama namba fe Simbed' mənɪ car mbə hay' Ifray kədan namba we kwa daŋ' mənɪ Ifray ne mba.
- ¹³Zə rum, namba cu in dan wa rum kə dan mənɪ car mbə wə gwet sumra' mi, ama kə dan mənɪ Simbed' Ifray wə mba ne. Ndəna', namba wə pay zu dan mə kəzin' mənɪ car mbə hay' Ifray ne kə sôwâ mənɪ kə Simbed' Ifray wə vunduk ndaya.
- ¹⁴Swə mənɪ cu kə Simbed' Ifray wə vunduk rum mi, bə rum cu gak ve dan mə kəzin' mənɪ car mbə hay' Simbed' Ifray nə mi. Dan rum dan mə lay wə hay' rum, mum cu gak mun zu dan rum mi, zə say swə mənɪ kə Simbed' Ifray wə vunduk rum gak kənji' dan rumu.
- ¹⁵Swə mənɪ kə Simbed' Ifray wə vunduk rum gak kənji' kwa daŋ', ama swə dāw cu gak um kənji' mi.
- ¹⁶Ce' ndə mənɪ Dan rum wây' wə du dərwa: «Sa we dan dīk Bârî su? Sa gak um har su?» Ama mə namba, namba kə dan dīk mə Kris.

1 Corinthe 3

- ¹Daw ba man, njeŋ rum si, na cu gak in dan ne ni ce' ndə mənɪ na wə in ne kə sôwâ mənɪ Simbed' Ifray cu gi sin wə vunduk nday mi juk mi, say na in dan ne ni ce' ndə mənɪ na wə in ne kə sôwâ mə wa nya mənɪ nə, ce' ndə mənɪ na wə in ne kə dawre' mənɪ ve Kris kə mbrewe.

- ²Na ne mbir ne ni ce, na cu gak ne kwati mə ɓokrok ne ni mi, zə hi cu gak ti kwati rum mi. Ko mgbəŋ ni nə, hi cu gak ti kwati rum mi,
- ³zə hi wə ta ce' ndə sôwâ mə wa nya məni nə ɓo. Hi wə gi sây', ɓay hi wə dle vun kə nji mbok nji. Kwa rum cu ta' i hi sôwâ mə wa nya mə ni nə ɓay ta' i hi wə ta ce' ndə məni sôwâ daŋ' wə ta mi su?
- ⁴Kəri məni swə məsin du ri wə ini: «Na zə Pol», ɓay swə məsin wə ini: «Na zə Apolos», hi cu gi ce' ndə sôwâ daŋ' wə gi mə su?
- ⁵Njeŋ rum si, sa nə Apolos su? Sa nə Pol su? Namba sum sin Ifray məni kawɓa ri kədan hi um ve. Swə ɗaw ɗaw daŋ' du mba wə gi sin məni Ifray ne num kədan mum gi.
- ⁶Na jo' zep kwa ta nya, Apolos wu' mbi ta wa rum, ama Ifray kə məni gi kwa rum ci ɓay mbudū.
- ⁷Ndəna', swə məni wə jo' zep kwa kə swə məni wə wu' mbi ta wa rum, handay hoɓ jak cu kə mbra' mi. Ifray kə məni kə mbra', zə mum kə məni gi kwa rum ci ɓay mbudū.
- ⁸Swə məni wə jo' zep kwa kə swə məni wə wu' mbi wa rum, handay wə vun nji. Ifray də po' bal cik swə ɗaw ɗaw daŋ' ce' ndə sin məni mum gi.
- ⁹Zə namba sum sin məni ɓa nji wə gi sin Ifray, ɓay hi sine Ifray, hi so Ifray ta'a.
- ¹⁰Ce' ndə kwane məni Ifray ne nan, na gi sin ce' ndə bə ɗam so mə kə gwet, ɓay na tor zu so rum, ɓay mgbəŋ ni nə, swə məsin wə ɗam də wa rumu. Ama say swə ɗaw ɗaw daŋ' nə kaw wa rum kə vari məni mum wə ɗam də hana.
- ¹¹Zə Ifray cin Zezu Kris ce' ndə zu so, ɓay swə ɗaw cu gak tor zu məsin mi.
- ¹²Sôwâ məsin də ɗam də wa rum kə njike mə bondo, ko kə njike mə ɓu, ko kə gway' cem cem məni coɓ nday kəciki. Sôwâ məsin də ɗam də wa rum kə gu, ko kə kəya', ko kə za.
- ¹³Ama Ifray wə də ta' cap sin swə ɗaw ɗaw daŋ' kə bəka dan ɓoko. Zə kə bəka rum, ku wə də ta' sin swə ɗaw ɗaw daŋ'ŋ. Ku rum wə də kənji' sin swə ɗaw ɗaw daŋ' kədan ta' cap sin rumu.
- ¹⁴Swə la' ɗam ta wa zu rum kə kwa məni ku cu gak ye' mi si, bə rum də fe bal cik umu.
- ¹⁵Zawa, swə la' ɗam ta wa zu rum kə kwa məni ku gak ye' si, bə rum də vi' bal cik umu. Kə ndi nə daŋ', mum də sid' ama sid' rum də ke ce' ndə swə məni sid' wə du ku mbə rəka.
- ¹⁶Hi we si njeŋ, hi so po' fur Ifray, ɓay Simbed' Ifray suk wə vunduk ri.
- ¹⁷La' ndəna' si, swə la' ɗənok so po' fur Ifray si, Ifray wə də ɗənok bə rumu.

¹⁸Na cu wə wa' i swə nə vi' tu rum mi: Swə daw du ri la' wə dik i mum kə gwet ce' ndə mənɪ sôwâ nya wə kar gwet si, say bə rum nə faŋ lay kədan nə faŋ bə gwet mə kəzini.

¹⁹Zə gwet mənɪ sôwâ nya wə kar ce' ndə gwet nə lay wə i Ifraya. Zə Dan rum wây' wə du dərwa: «Ifray kaw sum gwet wə du yel ndaya.»

²⁰Bay wə ri məsin 'Derwa Ifray wə in ta'a: «Bârî we i dan dik sum gwet nə kwa uraya.»

²¹Ndəna', say swə nə mbra' tu rum wa sin mənɪ sôwâ wə gi nə mi, zə kwa daŋ' mə hi na:

²²Pol, Apolos, Kefas, nya, nyî, mar, ri mə tam, kə ri mənɪ wə də mbə, kwa rum daŋ' mə hi na,

²³bay hi mə Kris, bay Kris mə Ifraya.

1 Corinthe 4

¹Zə rum, say i kar mba ce' ndə sum sin Kris mənɪ Ifray ar dan mə kəzin' um mənɪ pe' wə ba ndaya.

²Kwa mənɪ toŋ sin wə wa' hay' bə sin mənɪ mum ar sin wə ba rum nə, say bə sin nə ke njeŋe.

³Mə na, ko hi, ko sum bok dan mə wa nya mənɪ nə wə bok dan wa rin, dan rum cu cik nan mi. Na cu bok dan wa tu rin kə tu rin mətə'a.

⁴Na we si dan dik vunduk rin bay, ama dan rum cu ta' i na dan dan mə bro' mi. Bârî kə mənɪ wə bok dan wa rin kə njeŋ umu.

⁵Zə rum, o bok dan wa swə daw cop dan ri mənɪ Ifray par cin nə mbə mi. I ji ri mənɪ Bârî wə də mba. Mum də tle kwa mənɪ pe' wə ri mə ura' mbə ri mə bu kə ndi, bay mum də ta' dan dik mənɪ pe' wə vunduk sumra' də rəka. Kəri rum, Ifray wə də sâ' swə daw daw daŋ' ce' ndə sin mənɪ bə rum gi.

⁶Daw ba man, dan daŋ' mənɪ na ke in, na in wa Apolos kə wa tu rin kədan na ta' kwa mi ne kə ndi, na wa' i i wum kwata' mənɪ nə kə kwata' mba mənɪ na: «I cuwol vun haga dan mənɪ wây' wə du dərwa mi.» Say swə daw du ri nə mbra' tu rum wa swə məsin bay jed swə məsin mi.

⁷Zə sa cin nu toŋ wa sôwâ məsin su? Ifray cu ne nu kwa daŋ' mənɪ ha kə ndi mi su? La' ndəna' si, zə mi ha wə mbra' tu ru wa kwa rum ce' ndə kwa rum cu kwafe mi su?

⁸Mgbaŋ ni nə, hi kə kwa daŋ' mənɪ hi kə mē' rumu! Mgbaŋ ni nə, hi ndak si! Hi faŋ sum jwə, ko kəri mənɪ namba cu faŋ mətə'o. Na wə wa' i i faŋ sum jwə mə kəzin' kədan namba gak faŋ sum jwə kə ri ta'a.

⁹Zə na wə dɪk i Ifray njay mba, namba sum sin um wə ri mə kəki sôwâ daŋ', namba ce' ndə sôwâ mənɪ sôwâ ɓok dan wa nday kədan handay mar wə ri ɓawa sôwâ wə kor sôwâ daŋ'ŋ: Daw sin Ifray mə wafray kə sôwâ daŋ'ŋ.

¹⁰Namba lay zə sin Kris, ama hi sum gwet wə du ɓa mi kə Kris. Namba sum tətâ, ama hi sum gbəgbonjo. Sôwâ wə mba jedɗ, ama handay wə mi mbâ!

¹¹Hâ day mgbəŋ ni nə, mē' kwati kə mē' mbi wə mba ti, namba cu kə tu uray, sôwâ wə mba pum, namba wə gaŋ də ga' ti də ga' ti zə namba cu kə so mi,

¹²namba wə cik tu mba kə gi sin kədan namba ur tu mba kə tu mba. Kəri mənɪ sôwâ wə mba i, namba wə nday kuswa'a. Kəri mənɪ sôwâ wə keɓ zu mba, namba wə reɗ vunduk mba.

¹³Kəri mənɪ sôwâ wə ge dan bro' wa mba, namba wə ɗam vun nday kə kəɗama. Sôwâ wə mba kar ce' ndə day mənɪ handay wə ɓa də njay wə vun hal, ce' ndə soɗ hâ mgbəŋ ni na.

¹⁴Na cu wây' dan rum hay' ri kədan na ta' zur ri kə ndi mi, ama kədan na ta' kwa mi ne kə ndi, ce' ndə mənɪ na wə har daw man mənɪ na wə ba.

¹⁵Zə ko hi la' kə sum ta' vari mbu guɓ wə du ta mi kə Kris si, hi cu kə ɓəba raw mi. Zə wə du ta mi kə Zezu Kris, na kə mənɪ ba mi, zə na kə mənɪ ta' Dan mə Kəɗam ne ni.

¹⁶Zə rum, na wə mi o: I jənok nana.

¹⁷Zə rum, sin Timote, vay man mənɪ na wə ɓə hay' ri. Mum nə swə mə njeŋ wə du ɓa um kə Bârî. Mum də mi gi dla' wa dan mə toŋ mənɪ na wə ta zə rum wə du ta man kə Zezu Kris. Na wə ta' dan mə toŋ rum wə du kul sôwâ Kris wə ri daŋ'ŋ.

¹⁸Sôwâ məsin wə du ri wə mbra' tu nday kə dɪk i na cu də mbə hay' ri kədan na mi kar mi.

¹⁹Ama Bârî la' ɓə si, na də də so mi hərə', ɓay kəri rum, na cu də kar dan sôwâ mənɪ wə mbra' tu nday taw mi, ama na də kar gbəgbonjo nday ta'a!

²⁰Zə ri mənɪ Ifray wə də suk jwə wa sôwâ um nə cu dan ge vun mi, ama gbəgbonjo.

²¹Hi wa' mi su? Hi wa' i a də hay' ri kə dliw su? Ko də hay' ri kə ɓə ɓay simbeɗ mə ɓay su?

1 Corinthe 5

¹Ndəna' wə ri daŋ', sôwâ wə in dan wa ghəghay mənɪ wə du ri, ghəghay rum bro' ɓayrum, ko wə du sôwâ mənɪ cu we Kris mi, swə cu mun dan ghəghay rum wə du nday mi: Zə sôwâ wə in i swə məsin du ri wə bar kə mok ba umu.

²Bay hi wə mbra' tu ri ɓo su? Say i dɪk dan kəzə zawa, ɓay say i 'way swə mənɪ wə gi ghəghay rum du ri də rəka.

³⁻⁴Mə na, ko na la' seŋ kə ri kə tu, dan dɪk man hərə' kə ri. Na ɓok dan wa swə mənɪ wə gi kwa mə bro' rum kə semɗe Bârî mba Zezu ce' ndə mənɪ na wə du ri kə tu rini.

Kəri mənı hi wə də ɓa, ɓay dan dɪk man də ke du ri, gbəgbon̄ Bârî mba Zezu wə də ke du mba.

⁵Zə rum, say i ar swə nə wə ɓa Satan kədan mum dənok tu swə nə, ɓay ndəna', nyî rum gak də sɪd'kə Bəka Bârî.

⁶Mbra' tu mi cu ɓay mi! Hi cu we vun mə mbri mənı nə mi su? «Dlum kî də hulum fut dan'ŋ.»

⁷I par dlum mə kəmba, wa' dan ini: Kwa mə bro' mi, wə vunduk ri də rəka kədan hi ke dan dan mə bro', hi də ke ce' ndə fut mə mbrew mənı cu tlum kə dlum mi. Mgban̄ ni nə, hi ndə na', zə Kris, vay cime po' fur cer mba mə dē kə Pakə nə fol si.

⁸Zə rum, mə gi cer mba kə kwati mənı wə gi kə dlum mə kəmba mi, wa' dan ini: Kwa mə bro' ɓay ghəghay, ama mə gi cer mba kə kwati mənı cu tlum kə dlum mi, wa' dan ini: Wə du kələŋ ɓay njeŋe.

⁹Wə du dərwa mənı na wây' hay' ri, na o ni kədan i ɓa kə sôwâ mənı wə gi ghəghay mi.

¹⁰Na cu in dan rum wa sôwâ mənı wə gi ghəghay, ko səna' kwa, ko kəy hura, ko ta zə ifray mə vun fur dan' mi, kədan hi nday ar dan' si, say i wur mbə du sôwâ dan' mənı gay' wə wa nya.

¹¹Na wa' in mi ne i i ɓa kə vay ba mba mənı wə gi ghəghay, ko səna' kwa, ko ta zə ifray mə vun fur, ko i kwa, ko gal kə sum, ko kəy hura mi. Dan məsin rum ni na: Hi cu kə vari ti kwati kə swə mə ndani nə mi.

¹²Na cu kə vari kədan na ɓok dan wa sôwâ mənı cu sôwâ Kris mi. Ama hi cu kə vari kədan hi ɓok dan wa sôwâ mənı wə ɓa kə ri mi su?

¹³Ifray kə mənı də ɓok dan wa sôwâ mə rəka. Ce' ndə mənı Dan rum wây' wə du dərwa: «I 'way swə mə bro' du ri də rəka.»

1 Corinthe 6

¹Kəri mənı swə dāw du ri kə dan wa vay ba um, zə mi mum ar dan də kor sôwâ Ifray kə rum ɓay mum də kor sum ɓok dan mənı cu we Kris mi kə rum su?

²Hi cu we i sôwâ Ifray wə də ɓok dan wa sôwâ nya nə mə su? 'Bay hi la' də ɓok dan wa sôwâ nya si, hi cu gak ɓok dan wa dan mə kî mənı nə mi su?

³Hi cu we i namba də ɓok dan wa sum sin Ifray mə wafray mə su? La' ndəna' si, namba cu gak ɓok dan wa kwa nya mənı nə mi su?

⁴La' ndəna' si, kəri mənı kwa mə ndani nə mbə wə du ri, hi də kor sôwâ mə dère' wə du kul sôwâ Kris kədan handay ɓok dan wa dan rum su?

⁵Na in dan rum kədan zur mi gi. Ndəna' swə mə kə gwet cu du ri ko dāw kədan mum gak gila' dan mbok daw ba mi su?

⁶Bay kədan vay ba mənɪ kə dan wa vay ba um də kor sum ɓok dan mənɪ cu ve Kris mi kədan handay ɓok dan wa rum su?

⁷Kəzin', hi wə ɓok dan wa nji mbok nji. Kwa rum wə ta' i hi kə dan mə bro' wə du ri. Cu pram zə ri kədan hi ar vay ba mi gi sin mə bro' hay' ri mi su? Cu pram zə ri kədan hi ar vay ba mi ra' kwa mi mi su?

⁸Zawa, hi kə mənɪ wə gi sin mə bro' ɓay wə kəy hura, ɓay hi wə gi kwa rum hay' daw ba mi!

⁹Hi we si njeŋ, sôwâ mə bro' cu də cok wə ri mənɪ Ifray wə də suk jwə wa sôwâ um mi. I vi' tu ri mi! Sôwâ mənɪ wə gi ghəghay, sôwâ mənɪ wə ta zə ifray mə vun fur, sôwâ mənɪ wə gi nja, njiwkwa mənɪ wə bar kə nji,

¹⁰sôwâ mənɪ wə kəy hura, sôwâ mənɪ wə sənə' kwa, sôwâ mənɪ wə gal kə sum, sôwâ mənɪ wə i kwa, ɓay sôwâ mənɪ wə bargu sôwâ məsin, sôwâ mənɪ kuni daŋ' cu də cok wə ri mənɪ Ifray wə də suk jwə wa sôwâ um mi.

¹¹Sôwâ məsin wə du ri ke ndəna'a. Ama Ifray kol kwa mə bro' mi, mum da' ni njay kə hay' zə tu rum, ɓay mum gi ni njeŋ kor rum zə semde Bârî mba Zezu Kris ɓay zə Simbed Ifray mba.

¹²Sôwâ məsin du ri wə ini: «Na kə vari kədan na gi kwa daŋ'ŋ.» Awo, ama kwa daŋ' cu ɓay zə ri mi. Na gak ini: «Na kə vari kədan na gi kwa daŋ'», ama na cu bə ar kwa daw man kaw faŋ bek mi.

¹³Hi wə in ta'a: «Kwati wə zə rawti, ɓay rawti wə zə kwati.» Awo, ama Ifray wə də nday ndo' hoɓ jaka. Ama Ifray cu gi tu sumra' kədan gi ghəghay mi, tu sumra' wə zə Bârî, ɓay Bârî wə zə sumra'a.

¹⁴Ifray par Bârî mbə mar, ɓay mum wə də mba ra' mbə mar kə gbəgboŋ umu.

¹⁵Hi we si, tu ri kuni kwa tu Kris na. Na də tle kwa tu Kris məsin kədan na gi faŋ kwa tu i gi nja su? Cu ndə na' mi!

¹⁶Hi cu we i swə mənɪ bar kə i gi nja, bə rum faŋ tu daw kə sə nə mi su? Zə Dan rum wây' wə du dərwa: «Handay hoɓ jak faŋ tu dāwa.»

¹⁷Ama swə mənɪ wə ɓa tu kə Bârî, bə rum faŋ daw kə rum wə du dan diki.

¹⁸I ne ar dan gi ghəghay seŋe. Kwa mə bro' məsin daŋ' mənɪ swə wə gi cu dak tu rum mi, ama swə mənɪ ar tu rum gi ghəghay, bə rum wə gi kwa mə bro' wə tu rumu.

¹⁹Hi cu we i tu ri kuni ri suk Simbed Ifray, Simbed mənɪ mum ne ni mənɪ wə vunduk ri nə mi su? Hi cu kə wa tu ri mi.

²⁰Ifray coɓ ni kə ciki. Zə rum, i ar tu ri gi mbra' ne kə Ifraya.

1 Corinthe 7

¹Mgbaŋ ni nə, mə kar dan ci vun cem cem mənɪ hi ci vun rin wə du dərwa mənɪ hi wây' hay' rini: Də ke pram zə swə kədan nə cin ma mi.

- ²Ama zə dan ghəghay pla' ndap ri dan', pram zə swə daw daw dan' nə ke kə ma mə kəca um, bay ma daw daw dan' tə ke kə nji mə kəca sa.
- ³Say səmanji nə nyen mbi sin gi səmanji hay' ma rum, bay ndəna' ta', say ma tə nyen mbi sin gi ma hay' nji sa.
- ⁴Ma cu gak gi kwa mənɪ ta wə wa' kə tu sə mi, zə tu sə nə mə nji sa. Ndəna' ta', səmanji cu gak gi kwa mənɪ mum wə wa' kə tu rum mi, zə tu rum nə mə ma rumu.
- ⁵I vad' tu ne kə nji mi, say i gila' dan rum du ri zə ri kî, kədan hi ar tu ri kədan hi in dan kə Ifraya. Ama kəki rum, i faŋ ne tu kə nji kə vari rum kəreme. Hi la' cu gi ndəna' mi si, hi gak vi' vari tak tu ri bay njay də du bu Satan.
- ⁶Dan mənɪ na in nə cu dan dlay mi, ama na ar vari gi rumu.
- ⁷Njeŋ rum si, na wə wa' i sôwâ nya dan' ke ce' ndə na. Ama swə daw daw dan' kə kwane mənɪ Ifray ne num, swə məsin kə kwane mənɪ nə, bay swə məsin kə kwane mə nay' na.
- ⁸Dan mənɪ na wə in ne kə sôwâ mə dan cin nji kə rənda nə ni na: Bay zə ri kədan i də kofo dan cin nji ce' ndə na.
- ⁹Ama hi la' cu gak tak tu ri mi si, say i cin nji. Pram zə ri kədan i cin nji pâ mənɪ hi səna' bar kə nji si.
- ¹⁰Na ne dan dlay mənɪ nə ne kə sôwâ Kris mənɪ cin nji si dan dlay rum cu car mbə hay' rin mi, ama car mbə hay' Bârî: Ma mətɪ cin nji si, say tə bul nji kə nji sə mi.
- ¹¹Ta la' bul nji kə nji sə si, say tə suk dan nji, ko tə faŋ gila' dan kə nji sə, bay say səmanji nə 'way ma rum mi.
- ¹²Na wə in dan mənɪ nə ne kə sôwâ məsin na kə mənɪ wə in dan rum, dan Bârî cu mi: Swə mənɪ ve Kris la' cin ma mətɪ cu ve Kris mi, bay ma rə ve kədan ta suk kə rum si, say nə 'way sə mi.
- ¹³Ndəna' ta', ma mətɪ ve Kris la' cin nji mənɪ cu ve Kris mi, bay swə nə ve kədan mum suk kə sə si, say tə 'ya ar num mi.
- ¹⁴Zə Ifray wə ve səmanji mənɪ cu ve Kris mi zə ba um kə ma rum mətɪ ve Kris, bay Ifray wə ve ma mətɪ cu ve Kris mi zə ba sə kə nji sə mənɪ ve Kris. La' cu ndəna' mi si, daw nday də ke ce' ndə daw sôwâ mənɪ cu ve Kris mi, ama njeŋ rum si, Ifray wə nday ve.
- ¹⁵Ama swə mənɪ cu ve Kris mi la' wə wa' kədan mum bul nji kə swə mənɪ ve Kris si, say swə nə ar num gi ndəna'a! Wə du dan rum, swə mənɪ ve Kris, ko səmanji, ko ma, bə rum kə wa tu rum, zə Ifray də ni kədan hi gay' hebe.
- ¹⁶Həŋ ma mətɪ ve Kris, həŋ we kə mi i həŋ cu də sid' nji maŋ mi su? Ha, swə mənɪ ve Kris, ha we kə mi i ha cu də sid' ma ru mi su?

- ¹⁷Ama pâ daŋ' rum, say swə dāw dāw daŋ' nə ta də kofo ce' ndə kwane məni Bârî ne num bay ce' ndə məni mum ke kəri məni Ifray dē numu. Na wə ta' dan məni nə wə du kul sôwâ Kris daŋ'ŋ.
- ¹⁸Swə la' tagura kəri məni Ifray dē num si, say nə keḅ kədan nə faŋ jeḅ za' mi. Bay swə la' jeḅ kəri məni Ifray dē num si, say nə keḅ kədan nə tagura za' mi.
- ¹⁹Dan tagura, ko dan jeḅ cu kə mbra' mi: Dan mə kə mbra' rum nə say ta zə dan dlay Ifraya.
- ²⁰Say swə dāw dāw daŋ' suk ce' ndə məni mum ke kəri məni Ifray dē numu.
- ²¹Ha ke bek kə ri məni Ifray dē nu su? A dīk dan wa rum mi. Ama ha la' kə vari kədan ha fe wa tu ru si, a fe ye.
- ²²Zə bek məni Bârî ke dē num, mum nə swə məni kə wa tu rum hay' Bârî. Ndəna' ta', swə məni kə wa tu rum məni Kris dē num, mum nə bek Kris.
- ²³Ifray coḅ ni kə ciki: Zə rum, say i faŋ bek sumra' za' mi.
- ²⁴Daw ba man, say swə dāw dāw daŋ' nə suk kor Ifray ce' ndə məni mum ke kəri məni Ifray dē numu.
- ²⁵Wa dan sôwâ mə dan cin nji, na cu za' dan rum hay' Bârî mba mi, ama na wə in dan dīk man ce' ndə swə məni Bârî ta' bay um ne numu. Zə rum, hi gak njay vunduk ri wa dan rumu.
- ²⁶Zə cik məni kəta' tam, na dīk i bay zə swə kədan nə suk ce' ndə məni mum suku.
- ²⁷Ha kə ma su? La' ndəna' si, a keḅ kədan a ḅul nji kə sə mi. Ha cu kə ma mi su? La' ndəna' si, a keḅ kədan a cin ma mi.
- ²⁸Ama ha la' cin ma si, ka ha cu gi kwa mə bro' mi, bay way la' cin nji si, ka ta cu gi kwa mə bro' mēta'a. Ama sôwâ məni wə cin nji, handay də ce boni wə du bəka dāw dāw daŋ', bay na wə wa' kədan na mi siḉ mbə du boni rumu.
- ²⁹Daw ba man, dan məni na wə wa' in nə ni na: Ri gwa' kî. Daka mgbaŋ ni nə, say sum cin nji kuni gay' ce' ndə məni handay cu cin nji mi.
- ³⁰Say sôwâ məni wə ci' kuni ke ce' ndə məni handay cu kə dan dīk mi, say sôwâ məni wə mây kuni ke ce' ndə məni handay cu tuk kədam mi, say sôwâ məni wə coḅ kwa kuni ke ce' ndə məni handay cu coḅ kwa mi.
- ³¹Say sôwâ məni wə gi sin kə kwa mə bay mə wa nya məni nə kuni ke ce' ndə məni handay cu gi sin kə ndi mi. Zə nya məni nə cu də kim də hâ za' mi.
- ³²Na wə wa' i i ke dan dan dīk daŋ'ŋ. Swə məni cu cin ma mi, bə rum wə dīk dan wa sin Bârî, bay mum wə keḅ kədan mum gi kwa mə kədam tu Bârî.
- ³³Ama swə məni cin ma, bə rum wə dīk dan wa kwa nya: Mum wə keḅ kədan mum gi kwa məni kədam tu ma rumu.

³⁴Ndəna', vunduk rum bul hobo. Ndəna' ta', ma məti cu cin nji mi, ko way, i rum wə dīk dan wa sin Bârî, zə ta wə wa' kədan ta ar tu sə kə dan dīk sə zə rumu. Ama ma məti cin nji, i rum wə dīk dan wa kwa nya: Ta wə keɓ kədan ta gi kwa mə kədam tu nji sa.

³⁵Na in dan rum, zə na wə wa' kədan na kawɓa ri kə ndi. Na cu wa' kədan na cin kwazi' wə wa ri mi, na wə wa' i i gay' bay kə vari rum, bay ar tu ri cet zə sin Bârî.

³⁶Mə kar dan nja məni vad' dan cin nji, vay jid' la' dīk i mum cu gi bay wə hay' nja um mi si, bay mē' sə la' ti num hā mum kar i pram handay cin nji si, baya: Say kuni cin nji ce' ndə məni mum wə wa'a. Handay cu gi kwa mə bro' mi.

³⁷Zawa, vay jid' la' dīk wə vunduk rum dan swə um gi kə dole, i mum suk dan cin ma si, bay mum la' kə gbəgbonj kədan mum tak tu rum si, bay mum dīk kə tu rum i mum də gak gi ndəna', bə rum gi bay kəri məni mum ar cin vay ra.

³⁸Ndəna', swə məni cin nja um, bə rum gi baya. Ama swə məni cu cin nja um mi, bə rum gi bay pâ num si.

³⁹Ma məti cin nji, i rum tləba nji kə nji sə kəri məni mum kə i ɓo, ama nji sə la' mar si, ta kə vari kədan ta cin swə məni ta wə wa', ama say tə cin swə məni ve Kris.

⁴⁰Ama ta la' suk dan cin nji məsin si, ta də tuk kədam pâ mə cin nji si. Dan dīk man ndəna', bay na dīk i na kə Simbed' Ifray ta'a.

1 Corinthe 8

¹Mgbanj ni nə, mə kar dan ci vun wa dan ti tlew məni sôwâ wə po' fur kə ndi wə hay' ifray mə vun fur, ce' ndə məni hi wə ini: «Namba daɲ' kə kwawe». Dan rum kəzin', ama kwawe rum wə gi swə mbra' tu rumu. Ama bə wə gi swə də kofo wə du dan məni mum ve.

²Swə məni wə dīk i mum we kwa, bə rum cu we kwa rum ce' ndə məni mum gak we kwa rum mətə'o.

³Ama swə məni wə bə Ifray, Ifray we bə rumu.

⁴Zə rum, dan ci vun nə ni na: Swə gak ti tlew məni sôwâ po' fur kə ndi wə hay' ifray mə vun fur su? Namba we si njeɲ, ifray mə vun fur cu ta' kwa mə kəzin' wa nya mi, say Ifray daw sara.

⁵Ko kwa məni sôwâ wə də kə «ifray» la' kəta' wafray ko wa nya, bay ko «ifray» cem cem kə «bârî» cem cem la' kəta' raw daɲ',

⁶wə hay' mba, Ifray nə daw sar, mum nə Ba mba məni gi kwa daɲ', bay namba kə i zə rum, ndəna' ta', Bârî daw sar, mum nə Zezu Kris məni kwa daɲ' kəta' zə rum, bay namba kə i zə rumu.

⁷Ama sôwâ daɲ' cu we dan mə kəzin' rum mi. Sôwâ məsin fî kə ta zə ifray mə vun fur məni handay pâ mbə du rum ɓo, kəri məni handay ti tlew rum, handay kar tlew rum

ce' ndə tlew mə ifray mə vun fur, dan dik vunduk nday tətâ, bay handay kar i tlew rum wə nday dənoko.

⁸Ama kwati cu kə mənɪ wə mba gi jik də hay' Ifray mi. Namba la' cu ti kwati mi si, kwa mənɪ cu mba kəɗa mi. Bay namba la' ti kwati si, namba cu də fe kwa mənɪ zə rum mətə'a.

⁹Ama i kaw wa ri kədan i gi sôwâ mə tətâ wə du dan mənɪ handay ve kuni njay də du kwa mə bro' kə sin mənɪ hi wə gi wə du dan fe wa tu ri nə mi.

¹⁰Zə swə mə tətâ la' we nu, ha swə mənɪ kə kwawe suk wə ti tlew wə rawti so po' fur ifray mə vun fur si, kwa rum cu də car dan dik vunduk rum kədan mum ti tlew mənɪ sôwâ wə po' fur kə ndi wə hay' ifray mə vun fur nə mi su?

¹¹Bay ndəna', swə mə tətâ nə vay ba mba mənɪ Kris mar wə zə rum, wə də vi' zə kwawe wû.

¹²Kə gi kwa mə bro' wə hay' daw ba mi, bay kə dənok dan dik vunduk nday mə tətâ kə vari mə ndani nə, hi wə gi kwa mə bro' wə hay' Kris.

¹³Zə rum, kwati la' wə gi vay ba man nde də du kwa mə bro' si, na cu də ti tlew kpe za' mi, zə na cu bə kədan na gi vay ba man nde də du kwa mə bro' mi.

1 Corinthe 9

¹Na cu kə wa tu rin mi su? Na cu bə sin mi su? Na cu we Bârî mba Zezu kə i rin mi su? Hi cu kwafe mə du sin mənɪ na gi zə Bârî mi su?

²Ko sôwâ mənɪ la' cu man ve ce' ndə bə sin mi daŋ', hi gak man ve ce' ndə bə sin kəzini. Zə wə du ba man kə Bârî, hi faŋ kwata' mənɪ wə ta' i na vay sini.

³Dan mənɪ na dām kədan na bar tu rin kə ndi wə hay' sôwâ mənɪ wə ge dan mə bro' wa rin nə ni na:

⁴Na cu kə vari kədan na ve kwati kə kwace zə sin man mi su?

⁵Na cu kə vari kədan na cin ma mətɪ ve Kris bay gaŋ kə sə ce' ndə sum sin mənɪ, kə daw ya Bârî, bay Kefas wə gi kuni mi su?

⁶Say na kə Barnabas taw gak gi sin kədan namba ur tu mba su?

⁷Soje mə ka wə ur tu rum kə tu rum kəri mənɪ mum wə vun zi su? Bə sine gu mə ka cu ti vra' gu sine um mum pe nə mi su? Bə ji kwa mə ka cu ce mbir kul doknay mənɪ mum wə ji mi su?

⁸Hi dik i dan mənɪ na in nə car mbə du kwa mənɪ sôwâ wə gi du bəka daŋ' taw su? Dan dlay Moyizə cu in dan wa dan rum ta' mi su?

⁹Zə dan mənɪ wây' wə du dərwa dan dlay Moyizə nə ni na: «I no' cərak də vun naw mənɪ wə pum u mi.» Ifray wə dik dan wa naw su?

¹⁰Mum cu wə in dan rum wa mba mi su? Kəzin', dan rum wây' wə zə mba. Say swə mənɪ wə kura sine kə swə mənɪ wə pum u kuni njay vunduk nday i handay də fe bal cik sin ndaya.

¹¹Namba jo' zep dan Ifray wə vunduk ri. Namba la' ve vun kwa mə ɓay mənɪ wə ɓa ri si, dan rum dan mə toŋ su?

¹²Sôwâ məsin la' kə vari kədan handay gi ndəna' wə hay' ri si, namba cu kə vari gi rum nday pâ mi su? Ama namba cu gi ndəna' mi. Zawa, namba wə car ŋgəɗiŋ' wə du kwa ɗaŋ', zə namba cu wa' cin kwa dle wa sem wə kor Dan mə Kəɗam mənɪ wə in dan wa Kris mi.

¹³Hi we si njeŋe: Sôwâ mənɪ wə gi sin wə rawti so po' fur, handay wə fe kwati nday wə so rum, ɓay sôwâ mənɪ wə cu kwa po' fur wa kwa cu kwa po' fur, handay wə fe vun kwati mə handay wə du kwa po' fur rumu.

¹⁴Ndəna' ta', Bârî ne dan dlay i sôwâ mənɪ wə ka' Dan mə Kəɗam kuni ur tu nday kə sin rumu.

¹⁵Ama na cu gi kwa rum ɗaw mi, ɓay na cu wây' dan rum kədan na fe kwa kə ndi mi. Pram na mar pâ mənɪ swə məsin də par kwa mənɪ na wə mbra' tu rin wa rum nə də rəka!

¹⁶Na cu kə vari kədan na mbra' tu rin zə na wə ka' Dan mə Kəɗam mi, Ifray kaw nan kədan na gi ndəna'a: Boni wə ke wa rin, na la' cu ka' Dan mə Kəɗam rum mi si!

¹⁷Na la' ar tu rin kədan na gi sin rum kə tu rin si, na gak ji bal cik man, ama zə Ifray kaw nan kədan na gi sin rum, na nyen mbi sin rum kə dole.

¹⁸La' ndəna' si, bal cik man wə ka' su? Bal cik man kə ka' Dan mə Kəɗam rum ne kə sôwâ uray dan ci vun kwa mənɪ bə ka' Dan mə Kəɗam kə vari ci vun rumu.

¹⁹Awo, na kə wa tu rin, na cu bek swə ɗaw mi, ama na faŋ bek zə sôwâ ɗaŋ' kədan na siɗ sôwâ raw du ndaya.

²⁰Kəri mənɪ na wə gi sin wə du sôwâ Zuwif, na faŋ ce' ndə swə Zuwif kədan na nday siɗi. Kəri mənɪ na wə gi sin wə du sôwâ mənɪ dan dlay Moyizə suk gbəgbəŋ wa nday, ko kəri mənɪ dan dlay rum cu suk gbəgbəŋ wa rin mi, na wə faŋ ce' ndə swə mənɪ dan dlay rum suk gbəgbəŋ wa rum kədan na nday siɗi.

²¹Ndəna' ta', kəri mənɪ na wə gi sin wə du sôwâ mənɪ cu we dan dlay rum mi, na faŋ ce' ndə handay, dan ɗik dan wa dan dlay rum kədan na nday siɗ, dan rum cu wa' dan in i na cu ta zə dan dlay Ifray mi mi, zə dan dlay Kris suk gbəgbəŋ wa rini.

²²Kəri mənɪ na wə gi sin wə du sôwâ mə tətâ wə du dan mənɪ handay ve, na wə faŋ ce' ndə swə mə tətâ ta', kədan na nday siɗi. Ndəna', na gi tu rin faŋ kwa ɗaŋ' zə sôwâ ɗaŋ' kədan kə vari rum na gak siɗ sôwâ məsin du ndaya.

²³Na gi kwa rum ɗaŋ' zə Dan mə Kəɗam kədan na fe vun kwa mə ɓay mə zə Dan mə Kəɗam rumu.

²⁴Hi we si njeŋ, sôwâ mœni wə kəŋji' ne, handay wə ne daŋ', ama swə dāw sar də fe kwafe mœni cin zə rumu. Zə rum, i ne kə vari mœni hi gak fe kwafe rum kə ndi.

²⁵Swə dāw dāw daŋ' mœni wə wa' kədan mum ne, bə rum wə lim tu rum kə gbəgboŋo. Handay wə gi kwa rum kədan handay fe njukwa mœni cu də kim də hâ mi, ama mə namba, namba wə gi kwa rum kədan namba fe njukwa mœni wə də kim də hâ.

²⁶Na wə ne, zə rum, na ce' ndə swə mœni wə hom ɓa kap swə kə ndi. Bə rum cu kap ri ghay ghay mi.

²⁷Na wə gi tu rin kə gbəgboŋ, ɓay na wə tak tu rin kə gbəgboŋ, zə na cu wa' i Ifray nə ar nan də rəka mi, na swə mœni ka' Dan mə Kədam ne kə sôwâ mœsini.

1 Corinthe 10

¹Daw ba man, na wə wa' i i dla' wa dan kwa mœni mbə gi wa ba mbri ramba mœni dləmbur kəmbə' nday daŋ', ɓay handay daŋ' pā du ya mbi ze cewrek,

²handay daŋ' fe baptem wə du dləmbur ɓay du ya mbi rum zə ɓa nday kə Moyizə.

³Handay daŋ' ti kwati mə dāw mœni Ifray ne nday,

⁴ɓay handay daŋ' ce kwace mœni Ifray ne ndaya. Zə handay ce kwace mœni car mbə gway' Ifray mœni wə ta kə ndaya: Gway' rum nə Kris.

⁵Ama Ifray cu tuk kədam kə sôwâ juk du nday mi, zə rum handay mar wə du igopo.

⁶Kwa rum gi wa nday kədan ta' kwa mba ne, kədan namba ke kə səna' kwa mə bro' ce' ndə mœni handay ke kə ndi mi.

⁷Ko kədan namba ta zə ifray mə vun fur ce' ndə mœni sôwâ mœsin du nday ke gi kuni mi, ce' ndə mœni Dan rum wāy' wə du dərwa: «Sôwâ gay' ta nya kədan handay ti kwati ɓay ce kwace, ɓay kəki rum, handay car kədan handay ru kə dla'a.»

⁸Say mə ar tu mba gi ghəghay ce' ndə mœni sôwâ mœsin du nday ke gi kuni mi: Kəri rum, sôwâ mbu guhoɓ wa hinji' mar bəka dāwa.

⁹Say mə kəŋji' Kris ce' ndə mœni sôwâ mœsin du nday ke gi kuni mi: Kəri rum, wu' ti nday ɓay handay mara.

¹⁰Say i ci' tu ce' ndə mœni sôwâ mœsin du nday ke gi kuni mi: Kəri rum, Vay sin Ifray mə wafay mœni wə ci mar nə mbə ci ndaya.

¹¹Kwa rum mbə wa nday kədan ta' kwa ne kə sôwâ mœsin, dan kwa rum wāy' kədan mba har, zə namba wə du bəka mœni vun ndo' nya hərə'e.

¹²Zə rum, say swə mœni wə dik i mum car fray nə kaw wa rum kədan nə nde də nya mi.

¹³Bu mœni mbə wa ri, bu rum vun nji dāw kə bu mœni wə mbə wa sôwâ daŋ'ŋ. Ifray nə njeŋ wə du dan in um, ɓay mum cu də ar bu mœni pā gbəgboŋ ri mbə wa ri mi.

Ama kəri mənı bu wə də mbə wa ri, mum də ne gbəgbon red vunduk mi ne, bay ndəna', mum də ne vari kədan hi gak pā du bu rum mi ne.

¹⁴Zə rum, daw bāy man, i kaw wa ri hay' ifray mə vun furu.

¹⁵Na wə in dan rum mi ne ce' ndə mənı na wə in dan ne kə sōwā mənı kə wa. I kənji' dan mənı na wə in nə kə tu ri.

¹⁶I dık dan wa timbi ce kwa mənı namba gi soko ne kə Ifray wa rumu. Kəri mənı namba wə ce kwace rum, kwace rum cu mba ba kə vəswə Kris mi su? Bay kwati mənı namba bul, kəri mənı namba wə ti kwati rum, kwati rum cu mba ba kə tu Kris mi su?

¹⁷Kwati rum daw, bay ko namba raw, namba tu daw zə namba wə ti kwati mə daw.

¹⁸I dık dan wa sōwā Israyel: Sōwā mənı wə ti kwa mənı sōwā wə po' fur kə ndi, handay cu ba kə Ifray mənı kwa cu po' fur rum wə zə rum nə mi su?

¹⁹Kə dan rum, na wa' in i ifray mə vun fur ko tlew mənı sōwā wə po' fur kə ndi hay' ifray nə kə sin su?

²⁰Â â! Ama na wə in i sōwā mənı cu we Kris mi, kwa mənı handay wə po' fur kə ndi, handay wə ne kwa rum ne kə usiya, cu kə Ifray mi. Na cu wə wa' i ba nji kə usiya mi.

²¹Hi cu gak ce kwace wə kwa ce kwa mə Bârî kə kwa ce kwa usiya hoḅ jak kə ri mə daw mi, bay hi cu gak ti kwati wə tablə Bârî kə tablə usiya hoḅ jak kə ri mə daw mi.

²²Namba wə wa' kədan namba car sây' Bârî su? Namba dık i namba kə gbəgbon pā num su?

²³Sōwā məsin wə ini: «Namba kə vari kədan namba gi kwa daŋ'», awo, ama kwa rum daŋ' cu bay mi. «Namba kə vari kədan namba gi kwa daŋ'», ama kwa rum daŋ' cu gak ne gbəgbon mba ne mi.

²⁴Say swə nə keḅ kwa zə tu rum mi, ama say swə daw daw daŋ' nə keḅ kwa kədan nə kawba sōwā məsin kə ndi.

²⁵Hi kə vari ti tlew daŋ' mənı sōwā wə gi coḅ rum wə lumo dan ci vun dan dık vunduk ri.

²⁶Zə ce' ndə mənı Dan rum wāy' wə du dərwa: «Nya kə kwa daŋ' mənı wə han mə Bârî.»

²⁷Swə mənı cu ve Kris mi la' dē ni kədan i də ti kwati so um bay hi la' ve dan rum si, i ti kwati daŋ' mənı mum də mi ne dan ci vun dan dık vunduk ri.

²⁸Ama swə məsin la' in ne ni: «Tlew rum, kwa po' fur mənı sōwā po' fur kə ndi hay' ifray mə vun fur» si, kə ri rum, i ti tlew rum mi zə swə mənı in dan rum ne ni, bay zə dan dık vunduku.

²⁹Na cu in dan rum wa dan dık vunduk ri mi, ama wa dan dık vunduk swə na. Swə məsin də ci vun rini: Ama zə mi dan dık vunduk swə məsin wə tak dan fe wa tu rin su?

³⁰Na la' gi soko ne kə Ifray wa kwati mənɪ na wə ti si, zə mi sôwâ məsin wə ge dan mə bro' wa rin zə kwati mənɪ na gi soko ne kə Ifray wa rum nə su?

³¹Zə rum, ko hi la' wə ti kwati, ko hi la' wə ce kwace, ko hi la' wə gi kwa mi su daŋ', i gi kwa daŋ' kədan i gi mbra' ne kə Ifraya.

³²Say ta mi kuni gi sôwâ Zuwif, ko sôwâ mənɪ cu zə saŋ sôwâ Zuwif mi, ko kul sôwâ Ifray dle wa sem mi.

³³I gi ce' ndə na, na wə keɓ kədan na gi kwa mə kədam tu sôwâ wə du kwa daŋ', na cu wə keɓ kwa mə bay zə tu rin mi, ama zə sôwâ daŋ' kədan handay də fe sidi.

1 Corinthe 11

¹I jənok nan ce' ndə mənɪ na wə jənok Kris.

²Na wə mi sâ' zə hi wə dɪk dan wa rin kə ri daŋ', bay zə hi wə ta zə kwata' mənɪ na ta' ne ni.

³Ama na wə wa' i i mun zu dan mənɪ na: Kris nə jwə wa njiwkwa daŋ', səmanji nə jwə wa ma rum, bay Ifray nə jwə wa Kris.

⁴Zə rum, səmanji la' jew kwa wa rum kəri mənɪ mum wə in dan kə Ifray, ko wə ka' dan mənɪ Ifray ne num nə wə ri mənɪ sôwâ wə bawə han kədan handay bur Ifray si, bə rum wə ta' zur Kris.

⁵Ama ma la' cu jew kwa wa sə kəri mənɪ ta wə in dan kə Ifray, ko wə ka' dan mənɪ Ifray ne sə nə wə ri mənɪ sôwâ wə bawə han kədan handay bur Ifray mi si, i rum wə ta' zur nji sa. Ta ce' ndə ma mətɪ sôwâ bir wa sa.

⁶Ma la' cu jew kwa wa sə mi si, say tə bir wa sə si ta'a! Ama zə kə zur hay' ma mətɪ wə ri wa sə ko wə bir wa sə, say tə jew kwa wa sa.

⁷Cu bay kədan səmanji jew kwa wa rum mi: Zə mum wə ta' kpak Ifray kə mbra' umu. Ama ma wə ta' mbra' səmanji.

⁸Zə Ifray cu pok tu ma ri səmanji kə ndi mi, ama mum pok tu səmanji ri ma kə ndi.

⁹Bay Ifray cu ri səmanji zə ma mi, ama Ifray ri ma zə səmanji.

¹⁰Zə rum, bay zə sum sin Ifray mə wafray, say ma tə jew kwa wa sə kədan ta ta' i ta suk zə gbəgbəŋ nji sa.

¹¹Ama wə du ta mba kə Bârî, ma cu kə wa tu sə hay' nji sə mi, bay səmanji cu kə wa tu rum hay' ma rum mətə'a.

¹²Zə ce' ndə mənɪ Ifray pok tu səmanji ri ma kə ndi, ndəna' ta', səmanji vra' pâ mbə rawti ma, bay kwa daŋ' car mbə hay' Ifraya

¹³I kənji' dan mənɪ nə kə tu ri: Bay kədan ma in dan kə Ifray wə ri mənɪ sôwâ wə bawə han kədan handay bur Ifray dan jew kwa wa sə su?

¹⁴Kpak kwa wa nya daŋ' wə mi ta' i kə zur kədan səmanji ke kə sâ wa mə jəraka.

- ¹⁵Ama mbra' wə zə ma məti kə sâ wa mə jəraka. Zə Ifray ne sâ wa mə jərak ne kə ma ce' ndə kwa kəmbo' wa.
- ¹⁶Ama swə la' wə wa' kədan mum way dan rum də kofo si, say bə rum we dan məni na: Ko namba, ko kul sôwâ Ifray cem cem cu kə vun fur məsin wə ri məni namba wə bəwa han kədan namba bur Ifray mi.
- ¹⁷Wə du dan məni na wə də in, na cu gak mi sâ' mi, zə bəwa mi kuni cu wə mi gi də kofo ama wə mi ne ciki.
- ¹⁸Cop rum, sôwâ in ne nan i kəri məni hi wə bəwa, kul sôwâ məni bul nji kəta' cem cem wə du ri, bay na ve reta dan rumu.
- ¹⁹Bay zə ri kədan dan bul nji nə ke du ri kədan sôwâ gak we sôwâ mə njeŋ wə du ri.
- ²⁰Kəri məni hi wə bəwa, hi cu ti kwati məni Bârî ne nə kəzin' mi.
- ²¹Kəri məni hi gay' wə vun tablə, swə dāw dāw daŋ' du ri wə dēma kədan mum ti kwati mə kəca um, zə rum, mē' wə ti sôwâ məsin, bay sôwâ məsin wə gal kə sumu.
- ²²Hi cu kə so kədan hi ti kwati kə ce kwace han mi su? Ko hi wə jed' ri məni kul sôwâ Kris wə bəwa han kədan handay bur Ifray nə su? Bay hi wə ta' zur sôwâ məni cu kə kwa mi kuni su? Hi wə wa' i a in dan mi wa rum ne ni su? Na gak mi sâ' su? Cu mi, na cu gak mi sâ' mi.
- ²³Zə kwata' məni Bârî ne nan bay na ta' ne ni nə ni na: Kə riya dukri məni Zudas ta' Bârî mba Zezu ne kə sum sî um, mum tle kwati,
- ²⁴Bay kəki məni mum gi soko ne kə Ifray, mum jak kwati rum bay ini: «Məni nə tu rin məni na ne zə ri. I gi kwa rum kədan i dūmwa rin mi.»
- ²⁵Ndəna' ta', kəki kwati rum, mum tle kwa ce kwa bay ini: «Kwa ce kwa məni nə dan kawvun mə mbrew kə vəswə rini. Kəri daŋ' məni hi wə ce kwace məni wə rawti kwa ce kwa rum, i gi kwa rum kədan i dūmwa rin mi.»
- ²⁶Zə kəri daŋ' məni hi wə ti kwati rum kə ce kwace məni wə timbi ce kwa rum, hi wə ka' dan mar Bârî hâ bəka məni mum wə də mba.
- ²⁷Zə rum, swə la' ti kwati məni Bârî ne, ko ce kwace məni wə rawti timbi ce kwa məni Bârî ne kə vunduk mə bro' si, bə rum wə gi kwa mə bro' wə tu Bârî kə vəswə rumu.
- ²⁸La' ndəna' si, say swə dāw dāw daŋ' nə kənji' tu rum kə tu rum cop, bay kəki rum nə ti kwati rum bay ce kwace məni wə rawti kwa ce kwa rumu.
- ²⁹Zə swə la' wə ti kwati rum bay wə ce kwace məni wə rawti kwa ce kwa rum dan we zu dan tu Bârî si, bə rum wə dlam dan bök Ifray mbə wa rum kəri məni mum wə ti kwati rum bay wə ce kwace rumu.
- ³⁰Zə dan rum, sôwâ juk du ri kə gaḅ bay tətâ, bay sôwâ məsin du ri mara.
- ³¹Namba la' wə kənji' tu mba kə tu mba si, Ifray cu də bök dan wa mba mi.

³²Ama Bârî wə bok dan wa mba kədan mum gila' mba kə ndi kədan dan mə bro' cu də ke wa mba ce' ndə mənî dan mə bro' wə də ke wa sôwâ nya mi.

³³La' ndəna' si, daw ba man, Kəri mənî hi wə bəwa kədan hi ti kwati mənî Bârî ne nə, i ji nji mbok nji.

³⁴Mê' la' wə ti swə məsin si, say bə rum nə ti kwati wə so um kədan dan bok Ifray nə də mbə wa ri wə ri bəwa mi mi. Wa dan ci vun məsin cem cem, na də gila' dan rum kəri mənî na wə də day so mi.

1 Corinthe 12

¹Mgbaŋ ni nə, mə kar dan ci vun wa kwane cem cem mənî Simbed Ifray wə ne: Daw ba man, na wə wa' i i we dan mə kəzin' wa kwane kuna.

²Hi we si: Kəri mənî hi ke sôwâ mənî cu we Kris mətə', dan dik mi wə mi pla' də hay' ifray mə vun fur mənî cu dan mi.

³Zə rum, na wə wa' i i we dan mənî nə njeŋe: Swə mənî wə ta zə Simbed Ifray cu gak ini: «Vun nê' də ke wa Zezu» mi. Bay swə cu gak ini: «Zezu nə Bârî» mi, say ka bə rum wə ta zə Simbed Ifraya.

⁴Kwane mənî Simbed Ifray wə ne kəta' cem cem, ama Simbed mə daw kə mənî wə ne kwane rumu.

⁵Sin kəta' cem cem, ama sôwâ wə gi sin rum zə Bârî mə daw.

⁶Vari gi sin kəta' cem cem, ama Ifray mə daw kə mənî wə ne vari gi sin rum ne kə sôwâ daŋ'ŋ.

⁷Simbed Ifray mənî suk wə vunduk sôwâ nə wə ne kwane ne kə swə kədan bə rum gi sin mə bay kə ndi zə sôwâ daŋ'ŋ.

⁸Simbed Ifray wə ne kwane mə ge dan kə gwet ne kə swə məsin, bay mum wə ne kwane mə ge dan kə kwawe ne kə swə məsini.

⁹Simbed Ifray mə daw kə mənî wə ne kwane mə ve dan Ifray ne kə swə məsin, bay wə ne kwane mə car gaḍ ne kə swə məsini.

¹⁰Simbed Ifray nə wə ne kwane mə gi yew ne kə swə məsin, bay mum wə ne kwane mə ka' dan mənî Ifray wə ne nə ne kə swə məsini. Bay mum wə ne kwane mə bul du simbed mə bro' kə simbed mə kəzin' ne kə swə məsini. Mum wə ne kwane mə in dan kə vun cem cem mənî swə cu we mi ne kə swə məsin, bay mum wə ne kwane mə pay zu dan rum ne kə swə məsini.

¹¹Simbed mə daw wə ne kwane cem cem ne kə swə daw daw daŋ' ce' ndə mənî mum wə wa'a.

¹²Kris ce' ndə tu daw mənî kə kwa wə han cem cem rawa: Ko kwa tu la' cem cem raw, tu rum daw.

¹³Zə namba daŋ', ko sôwâ Zuwif, ko sôwâ mēni cu zə saŋ sôwâ Zuwif mi, ko bek, ko sôwâ mēni kə wa tu nday, namba daŋ' fe baptem wə du Simbed' mə dāw kədan namba faŋ tu dāw, bay Ifray ne Simbed' mə dāw ne mba kədan namba ce.

¹⁴Tu cu kə kwa wə han dāw sar mi, ama kwa wə han cem cem rawa.

¹⁵Sem la' wə ini: «Zə na cu ɓa mi, na cu kwa tu mi» si, sem rum cu gwa' dan ke kwa tu zə dan rum mi.

¹⁶Bay hum la' wə ini: «Zə na cu i mi, na cu kwa tu mi» si, hum rum cu gwa' dan ke kwa tu zə dan rum mi.

¹⁷Tu kə mbri rum daŋ' la' i sar si, gi ma kədan tu rum mun dan su? Bay tu kə mbri rum daŋ' la' hum sar si, gi ma kədan tu rum mun sî kwa su?

¹⁸Njeŋ rum si, Ifray pe kwa dāw dāw daŋ' wə tu ce' ndə mēni mum wə wa'a.

¹⁹Tu la' kə kwa wə han dāw sar si, ka tu cu mi!

²⁰Ama njeŋ rum si, kwa tu cem cem raw, bay tu dāwa.

²¹Zə rum, i cu gak in ne kə ɓa: «Na cu kə mē' ru mi» mi. Bay wa cu gak in ne kə seme: «Na cu kə mē' ru mi» mēta'a.

²²Zawa, kwa tu mēni sôwâ wə kar ce' ndə kwa tu mə tətâ bayrum, kwa tu rum kə sini.

²³Kwa tu mēni namba kar ce' ndə kwa tu mēni cu kə mbra' mi, namba wə kar zu kwa tu rum pâ kwa tu mēsin si. Bay kwa tu mēni wə gi zur mba ne, namba wə pe' kwa tu rum kə bayrum,

²⁴ama namba cu kə mē' pe' kwa tu mēni wə kədam tu mba mi. Ifray ɓa kwa tu daŋ' wə tu kə vari mēni wə gi mbra' bayrum ne kə kwa tu mēni cu kə mbra' mi.

²⁵Ndəna', tu cu ɓul nji mi, ama kwa tu cem cem daŋ' wə dīk dan wa nji mbok nji.

²⁶Kwa tu dāw la' ce boni si, kwa tu mēsin daŋ' wə ce boni kə kwa tu rumu. Bay kwa tu la' fe mbra' si, kwa tu mēsin daŋ' wə tuk kədam kə kwa tu rumu.

²⁷Hi daŋ', hi tu Kris, bay swə dāw dāw daŋ' du ri nə kwa tu wə tu rumu.

²⁸Ndəna', Ifray ne sin mə kə mbra' ne kə sôwâ mēsin wə du kul sôwâ Kris. Wə vun kofo, mum njay sum sin, bāy hoɓ rum, mum njay sum ka' dana. Bāy hinji' rum, mum njay sum ta' kwa, kəki rum, mum ne kwane kə sôwâ mēni wə gak gi yew, sôwâ mēni wə gak car gaɓ, sôwâ mēni wə gak kawɓa sôwâ mēsin, sôwâ mēni wə gak ta' vari ne kə sôwâ mēsin, bay sôwâ mēni wə gak in dan kə vun mēni swə cu we mi.

²⁹Sôwâ daŋ' cu sum sin, ko sum ka' dan, ko sum ta' kwa mi. Sôwâ daŋ' cu gak gi yew,

³⁰ko cu fe kwane mə car gaɓ, ko in dan kə vun mēni swə cu we mi, ko pay zu dan rum mi.

³¹La' ndəna' si, i ke kə mē' kwane mə kə mbra' pâ daŋ' rumu. Ama mgbaŋ ni nə, na wə də ta' vari mēni kə mbra' pâ daŋ' mi ne.

1 Corinthe 13

¹Ko na la' gak in dan kə vun sôwâ məsin cem cem bay vun sum sin Ifray mə wafray daŋ', ama na la' cu kə bə mi si, dan in man ce' ndə njike ko ŋguloŋ məni wə ci'i.

²Ko na la' kə kwafe mə ka' dan məni car mbə hay' Ifray, ko na la' kə kwawe daŋ', ko na la' mun zu dan məni pe' 'yeŋ daŋ', ko na la' ve i na gak gi igway' jik də rəka daŋ', ama na la' cu kə bə mi si, na kwa mə uraya.

³Ko na la' bul kwa mə bay daŋ' məni wə ba rin ne kə sôwâ məsin, ko na la' ar tu rin kədan ku ye', ama na la' cu kə bə mi si, kwa rum cu gak ke kə sin hay' rin mi.

⁴Bə wə gi swə red' vunduk rum, bə wə gi swə gi kwa mə bay, bə wə tak swə dan gi sây', bə wə tak swə dan mbra' tu rum kor sôwâ məsin, bə wə tak swə dan mbra' tu rum,

⁵bə wə tak swə dan gi kwa mə gi zur, bə wə tak swə dan keɓ kwa zə tu rum, bə wə tak swə dan tle bak, bə wə tak swə dan kaw dan mə bro' wə vunduk rum,

⁶bə wə tak swə dan tuk kədam kə kwa mə bro', ama bə wə gi swə tuk kədam kə dan mə kəzini.

⁷Bə wə gi swə red' vunduk wa kwa daŋ', bə wə gi swə ve kwa daŋ', bə wə gi swə cin vunduk rum wa kwa daŋ', bay bə wə gi swə car ŋgədiŋ' wa kwa daŋ'ŋ.

⁸Bə wə ke də hâ. Ama dan məni car mbə hay' Ifray məni sum ka' dan wə ka' nə kə sin kəri kî. Kwafe mə in dan kə vun məni swə cu we mi nə də ndo'o. Bay kwafe mə we kwa nə də ndo' ta'a.

⁹Zə namba cu we kwa ndo' daŋ' mi, bay namba cu ka' dan məni Ifray ne mba nə daŋ' məta',

¹⁰ama kəri məni kwa mə kəzin' wə də mbə, kwa rum daŋ' də vi'i.

¹¹Kəri məni na ke vay nyêw, na ge dan ce' ndə vay nyêw, na wə dîk dan ce' ndə vay nyêw, bay na wə gi kwa ce' ndə vay nyêwe. Ama kəri məni na faŋ bârî, na ar kwa gi vay nyêw daŋ' ta kəki.

¹²Mgbaŋ ni nə, kwa məni namba wə we kuni, ce' ndə nyî tu məni swə wə we wə kwa kar nyî tu, ama kəri rum, namba də we kwa daŋ' takrama. Mgbaŋ ni nə, na cu we kwa ndo' daŋ' mi, ama kəri rum, na də we kwa daŋ', ce' ndə məni Ifray wə we nana.

¹³Mgbaŋ ni nə, kwa hinji' məni kuna wə kəta'a: Handay wə ve Kris, handay wə njay vunduk nday wa dan Ifray, bay handay wə bə sôwâ məsin, ama wə du kwa mə hinji' kuni, bə kə mbra' pâ nday daŋ'ŋ.

1 Corinthe 14

¹La' ndəna' si, i keɓ ba. I ke kə mē' kwane cem cem məni Simbed mə Kəleŋ wə ne ta', pâ daŋ' rum, i ke kə mē' kwane mə ka' dan məni Ifray wə ne.

²Swə mənɪ wə in dan kə vun mənɪ swə cu we mi, bə rum cu in dan rum ne kə sumra' mi, ama mum wə in dan rum ne kə Ifray, zə sumra' cu gak mun zu dan rum mi: Mum wə in dan mə kəzin' mənɪ pe' 'yeŋ nə kə gbəgbəŋ Simbed' mə Kələŋe.

³Ama swə mənɪ wə ka' dan mənɪ Ifray ne num, bə rum wə in dan rum ne kə sôwâ kədan mum nday gi də kofo wə du dan mənɪ handay ve nə, ɓay kədan mum jeŋ vunduk nday ɓay so' vunduk ndaya.

⁴Swə mənɪ wə in dan kə vun mənɪ swə cu we mi, bə rum wə gi tu rum də kofo wə du dan mənɪ mum ve nə taw, ama swə mənɪ wə ka' dan mənɪ Ifray ne num, bə rum wə gi kul sôwâ Kris daŋ' də kofo wə du dan mənɪ handay ve na.

⁵Na wə wa' i hi daŋ', i in dan kə vun mənɪ swə cu we mi, ama pâ daŋ' rum, na wə wa' i i ke kə kwane mə ka' dan mənɪ Ifray wə ne. Zə swə mənɪ wə ka' dan mənɪ Ifray ne num nə kə mbra' pâ swə mənɪ wə in dan kə vun mənɪ swə cu we mi nə si, say ka swə məsin mənɪ kə kwafe mə pay zu dan rum kəta' wə han kədan mum gi kul sôwâ Kris daŋ' də kofo wə du dan mənɪ handay ve na.

⁶La' ndəna' si, daw ba man, na la' wə də hay' ri, ɓay na la' də in dan kə vun mənɪ swə cu we mi si, na də ke kə sin mi hay' ri su? Na cu də ke kə sin hay' ri mi, say ka na ta' kwa mənɪ Ifray ta' ne nan nə ne ni, ko ta' kwane ne ni, ko ka' dan mənɪ Ifray ne nan nə ne ni, ko ta' kwawe ne ni.

⁷Ndəna' ta' kə kwa mə ci' ce' ndə duɓ kəya' ko mbəliŋi: Bə pe kwa rum la' cu faŋwa ɓa rum kə vari rum mi si, gi ma kədan sôwâ gak we wor rum su?

⁸Bay bə pe duɓ la' cu faŋwa ɓa rum kə vari rum mi si, sa də gila' tu rum kədan mum də vun zi su?

⁹Ndəna' ta', dan mənɪ hi wə in dan kə vun mənɪ swə cu we mi la' cu ɓay mi si, gi ma kədan sôwâ gak mun zu dan rum su? Dan rum ce' ndə simbed' mənɪ wə sa' uraya.

¹⁰Vun cem cem kəta' raw wa nya, ama vun mə dan zu cu du nday daw mi.

¹¹Ama na la' cu we vun mənɪ swə məsin wə in dan kə rin kə ndi mi si, bə rum də ke ce' ndə rəkway hay' rin, ɓay na də ke ce' ndə rəkway hay' bə rumu.

¹²Ndəna' kə hi ta'a: Zə hi kə mē' kwane cem cem mənɪ Simbed' wə ne, i keɓ kədan i ndak kə kwane mənɪ wə gi kul sôwâ Kris də kofo wə du dan mənɪ handay ve na.

¹³Zə rum, say swə mənɪ wə in dan kə vun mənɪ swə cu we mi nə o Ifray kədan nə ne kwane mə pay zu dan rum ne numu.

¹⁴Zə na la' in dan kə Ifray kə vun mənɪ swə cu we mi si, simbed' man kə mənɪ wə in dan kə Ifray, ama kwawe man wə ke dan sini.

¹⁵La' ndəna' si, na də gi mi su? Na də o Ifray kə simbed' man, ama na də in dan kə Ifray kə kwawe man ta'a. Na də dā nyem kə simbed' man, ama na də dā nyem kə kwawe man ta'a.

¹⁶Ha la' wə gi soko ne kə Ifray kə simbed' wû taw, gi ma kədan swə mə uray mənɪ wə ɓa kə ri wə ri ɓa mi gak ɗam «Amen» wa soko mənɪ ha wə gi ne kə Ifray su?

¹⁷Ko ha la' gi soko ne kə Ifray kə dan mə ɓay ɗaŋ', swə məsin rum cu də kofo wə du dan mənɪ mum ve nə mi.

¹⁸Na wə gi soko ne kə Ifray zə na in dan kə vun mənɪ swə cu we mi pā ni ɗaŋ'ŋ.

¹⁹Ama kəri mənɪ na wə kor kul sôwâ Kris, na wə wa' in dan vatɪ mənɪ sôwâ gak mun zu nday kədan na ta' kwa ne kə sôwâ məsin kə ndi, pā mənɪ na in dan mbu guɓ kə vun mənɪ swə cu we mi si.

²⁰Daw ba man, i ɗik dan ce' ndə dawre' mi. Wə du dan mə bro', i ke dawre', ama wə du dan ɗik mi, i ke sôwâ rôwâ.

²¹Derwa dan dlay wə in dan mənɪ na: «Bârî ini: Na də in dan ne kə sôwâ mənɪ kuni kə vun sôwâ mənɪ wə in dan kə vun rəkway mənɪ swə cu we mi, ɓay kə vun rəkwaya. Ama kə ndi nə ɗaŋ', handay cu də man mun mi.»

²²Ndəna', kwane mə in dan kə vun mənɪ swə cu we mi nə kwa ta' kwa zə sôwâ mənɪ cu ve Kris mi, cu zə sôwâ mənɪ ve Kris si mi. Zawa, kwane mə ka' dan mənɪ Ifray ne nə kwa ta' kwa zə sôwâ mənɪ ve Kris si, cu zə sôwâ mənɪ cu ve Kris mi mi.

²³La' ndəna' si, kul sôwâ Kris ɗaŋ' la' ɓawa wə ri mə ɗaw si, ɓay handay ɗaŋ' la' təŋ kə in dan kə vun mənɪ swə cu we mi nə si, ɓay sôwâ mə uray ko sôwâ mənɪ cu ve Kris mi la' ze du ri rum si, handay cu də in i hi lay mi su?

²⁴Ama handay ɗaŋ' la' wə ka' dan mənɪ Ifray ne nday si, ɓay swə mənɪ cu ve Kris mi ko swə mə uray la' ze du ri rum si, bə rum də we kwa mə bro' um zə dan mənɪ mum mun na, dan ɗaŋ' mənɪ mum mun nə də bok dan wa rum,

²⁵ɓay dan ɗik um mənɪ pe' 'yeŋ kuni də wur rəka wə ri mə ɓu. Zə rum, mum də kuduk nya ɓay də bur Ifray kə in i kəzin', Ifray kəta' du ri!

²⁶Daw ba man, namba də ndo' vun dan rum ma su? Kəri mənɪ hi ɓawa kədan hi bur Ifray, swə məsin du ri kə nyem kədan mum ɗâ, swə məsin kə kwata' kədan mum ta', swə məsin kə dan mənɪ Ifray ne num kədan mum ka', swə məsin kə dan kədan mum in kə vun mənɪ swə cu we mi, ɓay swə məsin kə dan kədan mum pay zu dan rumu. Ama say sôwâ gi kwa rum ɗaŋ' kədan kuni gi kul sôwâ Kris də kofo wə du dan mənɪ handay ve na.

²⁷Swə ɗaw la' təŋ kə in dan kə vun mənɪ swə cu we mi nə si, say sôwâ hoɓ ko hinji' kuni gi ndəna' buwa kə buwa, ɓay say swə məsin nə pay zu dan mənɪ handay wə in kuna.

²⁸Bə rum la' cu za' swə məsin mənɪ gak pay zu dan rum mi si, say bə rum nə ar in dan rum wə ri mənɪ kul sôwâ Kris ɓawa han nə si, ɓay say nə in dan rum kə tu rum ɓay kə Ifray sara.

²⁹Mə sum ka' dan, say hoɓ ko hinji' du nday mənɪ Ifray ne dan ka' ne nday, kuni ka', ɓay say sôwâ məsin kuni kənji' dan mənɪ handay wə ka' kuna.

³⁰Ama Ifray la' ta' kwawe ne kə swə məsin məni wə du ri nə si, say swə məni wə in dan nə seŋ vun rum si.

³¹Hi daŋ', hi gak ka' dan məni Ifray ne ni nə buwa kə buwa kədan hi ta' kwa ne kə kul sôwâ Kris, bay kədan hi jeŋ vunduk ndaya.

³²Say sôwâ məni kə kwafe mə ka' dan məni Ifray ne nday kuni kar zu dan məni handay wə ka' na.

³³Zə Ifray mba cu Ifray mə gi kwa ghəghay mi, ama mum Ifray məni wə ne hebe. Ce' ndə məni kwa rum wə gi wə du raw kul sôwâ Ifray daŋ',

³⁴say rawkwa kuni gay' 'yeŋ wə ri məni sôwâ Kris bəwa wə hana: Handay cu kə vari kədan handay in dan wə han mi. Ce' ndə məni dan dlay sôwâ Zuwif ini: «Say rawkwa kuni gay' zə gbəgboŋ njiwkwa ndaya.»

³⁵Handay la' wə wa' kədan handay mun zu dan məsin si, say kuni ci vun njiwkwa nday wə so ndaya. Kə zur kədan ma in dan wə ri məni kul sôwâ Kris bəwa hana.

³⁶Ko dan Ifray car mbə hay' ri su? Hi kə məni fe dan rum taw su?

³⁷Swə la' dīk i mum bə sin Ifray, ko i mum kə kwafe məni Simbed' mə Kəleŋ ne nə si, say bə rum nə we i dan məni na wāy' hay' ri nə dan dlay Bârî na.

³⁸Ama bə rum la' cu tle fur dan rum mi si, say i tle fur bə rum mətə'a.

³⁹Ndəna', daw ba man, say i ke kə mē' ka' dan məni Ifray ne ni nə, ama i tak sôwâ dan in dan kə vun məni swə cu we mi kuni mi.

⁴⁰Say i gi kwa daŋ' bay, bay kə vari rumu.

1 Corinthe 15

¹Daw ba man, mgbəŋ ni nə, na wə dīa' wa Dan mə Kədam məni na ka' ne ni, məni hi ve bay məni hi njay vunduk ri wa rum njeŋe.

²Hi də fe sīd' zə rum, hi la' ve dan rum ce' ndə məni na ka' ne ni nə si. La' cu ndəna' mi si, hi ve dan rum uraya.

³Na ta' kwata' məni na fe ne ni copo: Kris mar zə kwa mə bro' mba ce' ndə məni Derwa Ifray ini.

⁴Sôwâ mo' num, bay kəki rum bəka hinji', Ifray par num mbə mar ce' ndə məni Derwa Ifray ini.

⁵Mum ta' tu rum ne kə Piyer, kəki rum mum ta' tu rum ne kə sum sin um mə guɓ wa hoɓo.

⁶Mum faŋ ta' tu rum ne kə sôwâ məni ta zə rum wə ri mə dāwa. Raw nday pâ kis vatl si. Sôwâ raw du nday kə i tam ɓo, ama sôwâ məsin du nday mar si.

⁷Kəki rum, mum ta' tu rum ne kə Zakə, bay mum faŋ ta' tu rum ne kə sum sin um daŋ'ŋ.

- ⁸Kəki məni mum ta' tu rum ne nday daŋ', mum ta' tu rum ne nan ta', ko na ce' ndə vay məni vra' ar cer ara.
- ⁹Na wə kî du sum sin, njeŋ rum si, na cu nde i kədan swə man də kə bə sin mi, zə na gi boni ne kə kul sôwâ Ifraya.
- ¹⁰Ama zə bay Ifray, na faŋ ce' ndə məni na kəta' tam, bay bay məni Ifray ne nan nə cu uray mi. Zawa, na gi sin pâ sum sin məsin daŋ'ŋ: Njeŋ rum si, na cu kə məni gi sin rum mi, ama bay Ifray məni kə rin kə məni gi sin rumu.
- ¹¹Ndəna', ko dan rum la' car mbə hay' rin, ko la' car mbə hay' nday daŋ', namba daŋ' ka' dan rum ndəna', bay hi ve dan rum ndəna' ta'a.
- ¹²Namba wə ka' i Kris car mbə mar si, la' ndəna' si, gi ma kədan sôwâ məsin du ri wə in i Ifray cu də ra' sôwâ mbə mar mi su?
- ¹³Dan rum la' kəzin' si, Kris cmbə u car mar mətə'a.
- ¹⁴Bay kəzə Kris la' cu car mbə mar mi si, dan ka' mba nə uray, bay dan məni hi ve nə cu kə sin mətə'a.
- ¹⁵Pâ daŋ' rum, ka namba wə hay dan wa Ifray, zə namba in wa rum i mum par Kris mbə mar, ama mum la' cu də ra' sôwâ mbə mar mi si, mum cu gi kwa rum mi.
- ¹⁶Zə kəzə Ifray la' cu də ra' sôwâ mbə mar mi si, mum cu par Kris mbə mar mətə'a.
- ¹⁷Bay kəzə Ifray la' cu par Kris mbə mar mi si, dan məni hi ve nə cu kə sin mi, bay hi gay' wə du kwa mə bro' mi bo.
- ¹⁸Bay sôwâ məni ke ve Kris bay mar, handay vi' si ta'a.
- ¹⁹Namba la' njay vunduk mba wa Kris zə bəka nyî mba wa nya məni nə taw si, namba nde i sôwâ ci' ca wa mba pâ sôwâ nya daŋ'ŋ.
- ²⁰Ama njeŋ rum si, Kris car mbə mar, kə gi kwa rum, mum ta' i mum də ra' sôwâ mbə mar ta', zə mum car mbə mar copo.
- ²¹Zə ce' ndə məni mar mbə wa sôwâ daŋ' zə swə daw, ndəna' ta' sôwâ daŋ' də wur mbə mar zə swə daw.
- ²²Ce' ndə məni sôwâ daŋ' wə mar zə handay ba kə Adam, ndəna' ta', sôwâ daŋ' də ke kə nyî zə handay ba kə Kris.
- ²³Ama swə daw daw daŋ' də pâ kə ri um buwa kə buwa. Ifray par Kris mbə mar cop kwa daŋ'ŋ. Ifray faŋ də ra' sôwâ məni ve Kris mbə mar kəri məni Kris wə də mba.
- ²⁴Kəki rum, kwa daŋ' də ndo', kəri məni Kris də ndo' gbəgbonj usiya məni gay' jwə kə gbəgbonj mbok fray kə nya, bay mum də ar gbəgbonj jwə də ba Ifray Ba umu.
- ²⁵Zə say Kris suk jwə hâ day ri məni Ifray wə də ngô sum sî um daŋ' bay də nday njay də nya zə sem Kris.
- ²⁶Bə sî məni Ifray wə də ndo' kəki kwa daŋ' nə mara.

²⁷Zə Dan rum wây' wə du dərwa: «Ifray njay kwa daŋ' wə zə sem rumu.» Ama namba we si njeŋe: Kəri məni 'Derwa Ifray wə in «daŋ'», Ifray kə tu rum cu han mi, zə mum kə məni njay kwa daŋ' zə sem Kris.

²⁸Kəri məni Ifray də njay kwa daŋ' zə sem Kris, kəri rum, mum Vay Ifray, mum wə də ar kwa daŋ' məni Ifray njay zə sem rum kuni ne kə Ifraya. Ndəna', Ifray də suk jwə wa kwa daŋ' njeŋe.

²⁹I dīk dan wa sôwâ məni wə ve baptem zə mara. Handay dīk i handay də fe mi kə ndi su? Kəzə Ifray la' cu də ra' sôwâ mbə mar mi si, zə mi handay wə ve baptem zə nday su?

³⁰Bay mə namba, zə mi namba wə ar tu mba də du boni kəri daŋ' su?

³¹Daw ba man, bəka daw daw daŋ' na wə we mar kə i rin, na wə in dan rum mi ne zə na wə mbra' tu rin zə ri wə du ba mba kə Zezu Kris Bârî mba.

³²Na la' zi wə ti so Efezə ce' ndə məni na wə zi kə tlew gop kədan na fe mbra' hay' sumra' si, kwa rum də gi mi hay' rin su? Kəzə Ifray la' cu də ra' sôwâ mbə mar mi si, pram mə gi ce' ndə məni vun mə mbri məni nə wə ini: «Mə ti kwati, bay ce kwace, zə siw namba də mara.»

³³I vi' tu ri mi: «Gaŋ kə sôwâ mə bro' wə dənok sin mə bay.»

³⁴I faŋ mbə tle vari mə njeŋ, bay i ar gi kwa mə bro'o. Na in dan rum ndəna' kədan zur mi gi. Sôwâ məsin du ri cu we Ifray mi.

³⁵Ama sôwâ məsin də ci vunū: Ifray wə də ra' sôwâ mbə mar mə ma su? Tu nday də ke mə ma su?

³⁶Ha laya! Kəri məni ha wə jo' i kwa də nya, i kwa rum cu gak ci sar mi, say tu rum mar si ri'i.

³⁷Kwa məni ha wə jo' də nya nə i kwa uray to', ko i u, ko i kwa məsin, ama ha cu jo' tu kwa rum sar mi.

³⁸Ifray ne tu ne kə kwa i rum ce' ndə məni mum wə wa'a. Mum ne tu ne kə zep kwa daw daw daŋ' ce' ndə cap ndaya.

³⁹Tlew kwa mə kə i cu wa nji daŋ' mi. Tlew sumra' cem, tlew kwa mə ta kə sem fədi' cem tlew rugwa cem bay tlew keve cem ta'a.

⁴⁰Tu kwa mə wafray kəta', bay tu kwa mə nya kəta' ta', bay tu kwa mə wafray cem kə bay tu kwa mə nya.

⁴¹Bay tu fəta cem, bay tu cer cem, bay bay tu ciciw cem ta', ko wə du ciciw cem cem bay nday cem ceme.

⁴²Kwa rum də ke ndəna' kəri məni Ifray wə də ra' sôwâ mbə mar ta'a: Kəri məni sôwâ mo' mar ta nya, mar nə cim, kəri məni mum wə car mbə mar, mum cu də mar za' mi.

⁴³Kəri mənı sôwâ mo' mar ta nya, mar nə bro' bay têtâ. Kəri mənı Ifray wə də um par mbə mar, mum də ke bay bay gbəgbonjo.

⁴⁴Kəri mənı sôwâ mo' mar ta nya, mar nə tu mə kə tlewe. Kəri mənı Ifray wə də um par mbə mar, mum də ke kə tu mə simbed' mə kəleŋe. Tu mə kə tlew kəta'a. La' ndəna' si tu mə kə simbed' kəta' ta'a.

⁴⁵Zə Dan rum wây' wə du ɖerwa: «Ifray gi Adam, swə mə vun kofo, kə i», ama Adam mə ndo' vun nə Simbed' mənı wə ne nyî.

⁴⁶Swə mə kə simbed' cu kə mənı mbə vun kofo mi, ama swə mənı kə tu mə kə tlewe. Swə mə kə simbed' mbə kəki rumu.

⁴⁷Ifray ri Adam mə vun kofo kə bərim nya, ama bâŋ hoɖ Adam nə car mbə wafraya.

⁴⁸Sôwâ mə nya ra' nji kə swə mənı Ifray ri kə bərimi. Sôwâ mə wafray ra' nji kə swə mənı car mbə wafraya.

⁴⁹Bay ce' ndə mənı namba ke ra' nji kə swə mənı Ifray ri kə nya, ndəna' ta', namba də ra' nji kə swə mənı car mbə wafraya.

⁵⁰Daw ba man, dan mənı na wə wa' in nə ni na: Kwa mənı Ifray ri kə tlew tu bay vəswə cu gak də ze ri mənı Ifray wə də suk jwə wa sôwâ um nə mi, bay kwa mənı wə mar cu gak suk wə ri mənı kwa mənı cu də mar za' mi wə suk han nə mi.

⁵¹Na də in dan mənı pe' 'yeŋ mi ne. Namba cu də mar ɖaŋ' mi, ama Ifray wə də faŋwa tu mba ɖaŋ'ŋ.

⁵²Kwa rum də gi ga'ri ce' ndə tum i kəri mənı ndo' vun duɖ wə də pe. Zə kəri mənı vay sin Ifray mə wafray wə də pe duɖ rum, Ifray wə də ra' sôwâ mbə mar kədan handay də mar za' mi, bay mum də faŋwa tu mba ɖaŋ'ŋ.

⁵³Zə say tu mənı wə cim nə ge tu mənı cu cim za' mi, bay say tu mənı wə mar nə ge tu mənı cu mar za' mi.

⁵⁴Kəri mənı tu mənı wə cim wə də ge tu mənı cu cim za' mi, bay kəri mənı tu mənı wə mar wə də ge tu mənı cu mar za' mi, kəri rum, dan mənı nə mənı wây' wə du ɖerwa Ifray wə də gi: «Mar ndo' si, Ifray ŋgô num si.»

⁵⁵«Ha mar, gaŋsem wû ka su? Ha mar, gbəgbonj mənı ha ke kaw sôwâ kə ndi nə ka su?»

⁵⁶Gbəgbonj mənı mar wə kaw sôwâ kə ndi nə car mbə du kwa mə bro', bay gbəgbonj kwa mə bro' car mbə du dan dlaya.

⁵⁷Ama mə gi soko ne kə Ifray mənı ne gaŋsem ne mba zə Bârî mba Zezu Kris!

⁵⁸Zə rum, daw ba man, i car ŋgəɖiŋ', bay i nyen mi, i ke kə sây' kədan i gi sin Bârî bəka ɖaŋ', zə hi we si, cik mənı hi wə tuk wə du ɖa mi kə Bârî nə cu uray mi.

1 Corinthe 16

- ¹Na wə də in dan məsin kərem wa dan kwane zə kawba kul sôwâ Ifray mə so Jeruzalem: I gi ce' ndə kwata' mənɪ na ta' ne kə kul sôwâ Kris mənɪ gay' wə nya Galasi.
- ²Dimanşə dəw dəw daŋ', say swə dəw dəw daŋ' du ri nə par səlay wə du səlay mənɪ mum fe nə cin kə hay' bay kar zu rum kə bayrum kədan kə ri mənɪ na də day so mi, hi də təŋ kə bawa kwane rum i rin ɓo mi.
- ³Kəri mənɪ na də day so mi, na də sin sôwâ mənɪ hi da' nday kədan handay ra' kwane mi də so Jeruzalem kə ndi, bay na də sin dərwa mənɪ wə in dan wa nday ta'a.
- ⁴Kwane mi la' nde i kədan na də han kə tu rin si, handay gak də han kə rini.
- ⁵Kəki mənɪ na də pâ wə nya Maseduwanə, na də də so mi. Say na də pâ wə hana.
- ⁶Na dik na də suk wə so mi bəka raw, ko məsin na də suk cer simbed' kə ri. Zə rum, hi gak kawba rin kədan na də day ri daŋ' mənɪ na wə də hana.
- ⁷Zə na cu wa' kədan na mi də kar kəri mənɪ na wə də pâ so mi taw mi, Bârî la' bə si, na wə wa' i na də suk wə so mi bəka rawa.
- ⁸Ama na də suk ti wə so Efezə hâ day bəka cer mə də kə Paŋtekotə.
- ⁹Zə na fe vari kədan na gi sin mə təŋ wə ti kə bəka rum, ko kəri mənɪ sum sî rin kəta' wə ti rawa.
- ¹⁰Timote la' ta day si, i ve num du ri kə bayrum, zə mum wə gi sin zə Bârî ce' ndə na.
- ¹¹Swə dəw nə jed' num mi. Zawa, i kawba rum kədan mum də kofo wə vari gaŋ um kə heɓ, kədan mum gak gewa mbə hay' rin, zə na wə um ji kə daw ba mana.
- ¹²Mə vay ba mba Apolos, na o num sem raw kədan nə də mi kar kə daw ba mba məsin, ama mum cu kə mē' kədan mum də mi kar mgbəŋ ni nə mətə'o. Ama kəri mənɪ mum la' za' vari si, mum də də ɓo.
- ¹³I ji, i gay' ŋgədiŋ' wə du dan mənɪ hi ve, i kaw vunduk ri i ke kə gbəgbəŋ,
- ¹⁴I gi kwa daŋ' kə ba.
- ¹⁵Na mi in ne kərem, hi we Stefanas kə sôwâ so um si, handay faŋ vunduk nday cop wə du sôwâ nya Akay, bay handay ne tu nday kə gi sin zə raw sôwâ Ifraya.
- ¹⁶Daw ba man, na wə mi o kədan i ar tu ri ta zə sôwâ mə ndani kuni kə sôwâ daŋ' mənɪ wə gi sin kə ndaya.
- ¹⁷Na wə tuk kədam kə mbə Stefanas, Fortunatus, bay Akaykus. Handay jeŋ vunduk ne nan kə man ne kwa daŋ' tan ri,
- ¹⁸zə handay so' vunduk ne nan ce' ndə mənɪ handay so' vunduk ne ni ta'a. Say i kar sôwâ mə ndani kuna.
- ¹⁹Kul sôwâ Kris mə nya Azi cem cem kaw jeɓ ri. Akilas kə Priskila kə kul sôwâ Kris mənɪ ɓa wə so nday kaw jeɓ ri bayrum kə semde Bârî.

²⁰Daw ba mba daŋ' mənɪ wə ti kaw jeɓ ri. I kaw jeɓ nji mbok nji kə ba.

²¹Na wây' dan mənɪ nə kə ɓa rini: Na Pol, na kaw jeɓ ri.

²²Swə la' cu bə Bârî mi si, vun nê' də ke wa bə rumu! Maranata wa' dan ini: "Bârî, a mbə ye!"

²³Na wə wa' i ɓay Bârî mba Zezu nə ke kə ri.

²⁴Bə man kəta' kə ri daŋ' wə du ɓa mba kə Zezu Kris.

2 Corinthe

2 Corinthe 1

¹Na Pol, kə bə mə Ifray, na faŋ vay sin Zezu Kris, na kə vay ba man Timote. Namba wây' dërwa mənî nə hay' kul sôwâ Ifray mənî gay' wə so Koriŋtə, bay hay' raw sôwâ Ifray daŋ' mənî gay' wə nya Akay daŋ'ŋ.

²Namba wə wa' i Ba mba Ifray kə Bârî mba Zezu Kris kuni ne ni bay kə hebe.

³Mə bur Ifray Ba Bârî mba Zezu Kris. Ba mba mənî vunduk rum nyen ped' kə ci' ca, Ifray mənî wə so' vunduk ne kə sôwâ kə ri daŋ'ŋ!

⁴Mum wə so' vunduk mba ne wə du boni mba daŋ', kədan namba gak so' vunduk ne kə sôwâ məsîn mənî wə ce boni cem cem daŋ'ŋ. Namba gak so' vunduk nday ne ce' ndə mənî Ifray so' vunduk ne mba.

⁵Zə ce' ndə mənî namba wə ce boni cem cem juk kə Kris, ndəna' ta', Kris wə so' vunduk mba ne.

⁶Namba la' wə ce boni si, kwa rum mi gi kədan Ifray so' vunduk mi ne, bay kədan mum mi sidî. Ifray la' so' vunduk ne mba si, kwa rum mi gi kədan kəri mənî Ifray so' vunduk ne ni, hi gak car ŋgədiŋ' wə du boni mənî ra' nji kə boni mənî namba wə ce ta'a.

⁷Kəzin', namba njay vunduk mba wa ri, zə namba we si, ce' ndə mənî hi wə ce boni kə mba, ndəna' ta', Ifray wə so' vunduk mi ne ce' ndə mənî mum so' vunduk ne mba ta'a.

⁸Daw ba man, namba wə wa' i i we boni mənî namba ce wə nya Azi. Boni pâ wa mba bayrum, hâ namba cu gak rom boni rum mi, bay namba təŋ kə dik i namba cu də ke kə i kərem za' mi.

⁹Namba dik i mar kaw mba si. Ama kwa rum gi ndəna' kədan ta' mba ne i namba gak njay vunduk mba wa tu mba mi, ama say mə njay vunduk mba wa Ifray mənî wə ra' sôwâ mbə mar sara.

¹⁰Mum kə mənî sid' mba mbə du boni mar mə ndani nə, bay mum kə mənî də mba sid' kəreme. Awo, namba njay vunduk mba wa rum i mum də mba sid' kəreme.

¹¹Zə hi kə tu ri, hi də mba jin kə in dan kə Ifray zə mba. Ndəna', Ifray də dām dan kwa o mənî sôwâ juk wə um o zə mba, mum də mba kuswa', bay sôwâ juk də gi soko um ne zə mba.

¹²Kwa mənî namba gak mbra' tu mba wa rum nə ni na: Dan dik vunduk mba wə mba ta' ne njeŋ i ta mba wə nya mənî nə dan dan mə bro' bay njeŋ, bay pâ daŋ' rum, ta mba wə du ri, kwa rum car mbə hay' Ifray, Ifray kə mənî ta' vari rum ne mba, gwet sumra' cu kə mənî ta' vari rum mi.

¹³Wə du dërwa mənî namba wây' ne ni, namba cu wây' dan məsîn mi, say dan mənî na dik i hi gak in bay mun zu rumu.

¹⁴Ko mgbaŋ ni nə, hi we dan rum kî to', na wə wa' i i də we dan rum cet, kədan kə bəka Bârî Zezu, hi gak də mbra' tu ri zə mba ce' ndə mənɪ namba wə də mbra' tu mba zə ri.

¹⁵Na ke cin vunduk rin wa dan rum, hâ na ke keɓ vari kədan na də so mi kədan hi də tuk kəɗam sem hoɓ rumu.

¹⁶Zə na ke gila' vari kədan na də pâ wə so mi kəri mənɪ na wə də nya Maseduwanə, ɓay kəri mənɪ na də faŋ gewa mbə han, na də mi kar kəreme. Ndəna', hi gak də kawɓa rin kədan na də kofo kə gaŋ man hâ nya Zude.

¹⁷Kəri mənɪ na gila' vari rum, na cu ɗik dan wa rum kə vari rum mi su? Kəri mənɪ na gila' vari rum, dan ɗik sumra' kə mənɪ ta' vari rum ne nan kədan na gak in «awo» kə «â â» hoɓ jak su?

¹⁸Ifray we si njeŋe: Kəzin', dan mənɪ na in ne ni nə cu «awo» kə «â â» hoɓ jak mi.

¹⁹Zə Zezu Kris, Vay Ifray, mənɪ Silas, kə Timote, ɓay na, namba ka' dan wa rum ne ni, mum cu mbə kədan mum ke «Awo» kə «Â â» hoɓ jak mi. Zawa, mum nə «Awo» mə Ifraya!

²⁰Zə mum nə «Awo» mənɪ wə jeŋ dan ɗaŋ' mənɪ Ifray ini. Zə rum, kə Zezu Kris, namba wə in «Amen» kədan namba gi mbra' ne kə Ifraya.

²¹Bay Ifray kə tu rum kə mənɪ gi mba kə hi car ŋgəɗiŋ' wə du ɓa mba kə Kris. Ifray kə tu rum kə mənɪ da' mba.

²²Mum kə mənɪ cin lamba um wə tu mba, ɓay mum kə mənɪ sin Simbed' um wə vunduk mba ce' ndə kwa jeksem kwa mə ɓay mənɪ mum njay wə zə mba.

²³Na in ne ni kəzin' mə kor Ifraya: Na cu hay dan mi, na cu wa' i na faŋ də so Koriŋtə mi, zə na cu wa' kədan na də mi mgbor mi.

²⁴Namba cu keɓ kədan namba mi ne dan mənɪ hi də ve nə kə dole mi, zə hi wə car ŋgəɗiŋ' wa dan mənɪ hi ve nə, ama namba wə wa' kədan namba gi sin kə ri kədan hi tuk kəɗama.

2 Corinthe 2

¹Zə rum, na cu wa' i na də so mi mi, zə na cu wa' kədan na də mi gi ɗik dan kərem za' mi.

²Zə na la' mi gi ɗik dan kərem si, sa nə gak man gi tuk kəɗam kərem su? Say sôwâ mənɪ na gi nday ɗik dan kuni tawa!

³Zə rum, na wây' ɗerwa rum hay' ri, na cu wa' i na də so mi mi, zə na cu wa' kədan sôwâ mənɪ wə man gi tuk kəɗam kuni faŋ gi nan ɗik dan mi, zə na we si, kəri mənɪ na tuk kəɗam, hi ɗaŋ', hi wə tuk kəɗam ta'a.

⁴Awo, kəri məni na wây' dərwa rum hay' ri, vunduk rin cik nan bay na dīk dan juk, na wây' dərwa rum kə ci', cu kədan na mi gi ke kə dan dīk mi, ama kədan hi we vari məni na wə mi ba.

⁵Swə məsin du ri la' gi swə məsin dīk dan si, mum cu gi nan dīk dan mi, ama mum gi ni daŋ' dīk dan, ko pram na in mum gi sôwâ cem cem du ri dīk dana.

⁶Kəri məni kəli sôwâ du ri mgbor bə rum, dan rum nde si.

⁷Zə rum, mgbəŋ ni nə, say i vrum kwa mə bro' məni mum ke gi, bay i jeŋ vunduk ne num kədan dan dīk mə mbri məni wə vunduk rum nə 'way num də rəka mi.

⁸Zə rum, na wə mi o i gi kwa hay' rum kədan ta' ne num i hi wə um ba.

⁹Na wây' dərwa hay' ri zə dan məni na: Na wə wa' kədan na mi kənji' kədan na kar ke hi wə ta zə dan ta' man bəka daŋ' su na.

¹⁰Kəri məni hi vrum kwa mə bro' məni swə məsin ke gi nə, na wə vrum kwa mə bro' rum ta', zə kwa mə bro' məni na vrum nə, kwa mə bro' swə məsin məni na gak vrum la' kəta' si, na vrum kwa mə bro' rum zə ri wə kor Kris,

¹¹kədan na ar Satan ŋgô mba mi. Zə namba we dan dīk um si njeŋe.

¹²Kəri məni na mbə day so Trowas kədan na ka' Dan Mə Kədam məni wə in dan wa Kris, na za' Bârî ar vari kədan na gi sin wə hana.

¹³Ama kəri rum, dan dīk man cu suk heḅ mi, zə na cu za' vay ba man Titə wə han mi. Zə rum, na 'ya ar nday, bay na tle vari kədan na də nya Maseduwanə.

¹⁴Ama mə gi soko ne kə Ifray, zə wə du ba mba kə Kris, Ifray wə mba ra' bay wə gaŋ kə mba ce' ndə sôwâ məni ta 'way zi wə ra' bek məni handay kaw han bay gaŋ kə nday kor sôwâ daŋ'ŋ. Mum wə gi sin kə mba kədan mum ta' Kris ne kə sôwâ wə ri daŋ' ce' ndə urdi məni sî rum wə pla' ndap ri daŋ'ŋ.

¹⁵Zə namba ce' ndə kwa mə sî ndə urdi mə də kə «aŋsaŋsə» məni Kris wə ne kə Ifray, namba ndəna' zə sôwâ məni wə vari sid, bay zə sôwâ məni wə vi'i.

¹⁶Wə zə sôwâ məni wə vi', sî rum sî mar məni wə mbə kə mar, wə zə sôwâ məni wə vari sid, sî rum sî nyî məni wə mbə kə nyî. La' ndəna' si, sa gak gi sin mə ndani nə su?

¹⁷Namba cu ce' ndə sôwâ məsin juk məni wə tle dan Ifray faŋ kwa gi par kə ndi kuni mi. Zawa, zə Ifray kə məni sin mba, namba wə in dan njeŋ kor rum wə du Kris.

2 Corinthe 3

¹Dan rum wə ta' i namba təŋ kə mbra' tu mba kərem su? Ko namba o dərwa məni wə in dan wa mba wə ba sôwâ məsin kədan namba də hay' ri kə ndi ce' ndə məni sôwâ məsin wə gi kuni su?

²Hi kə tu ri, hi dərwa mba məni wây' wə vunduk mba, bay sôwâ nya daŋ' gak we bay ini.

³Awo, dan rum njeŋ, hi ɖerwa mɛni Kris wây' ɖay sin kɛ ɖa mba, ɖerwa rum cu wây' kɛ mbi wây' kwa mi, ama wây' kɛ Simbed Ifray mɛ kɛ i, ɖerwa rum cu wây' wa gway' mɛni sôwâ wɛ her kɛdan handay wây' kwa wa rum nɛ mi, ama wây' wɛ vunduk sumra'a.

⁴Namba in dan rum ndɛna', zɛ namba njay vunduk mba wa Ifray zɛ Kris.

⁵Zɛ namba kɛ tu mba, namba cu gak gi sin mɛ ndani nɛ mi. Gbɛgboŋ mɛni namba wɛ gi sin kɛ ndi wɛ car mbɛ hay' Ifraya.

⁶Mum kɛ mɛni gi mba faŋ sum sin mɛni wɛ gi sin kɛ dan kawvun mɛ mbrew, dan rum cu car wa dan dlay mɛni wây' nɛ mi, ama car wa Simbed mɛ Kɛleŋɛ. Zɛ dan dlay mɛni wây' nɛ wɛ ci sôwâ, ama Simbed nɛ wɛ ne nyî ne kɛ sôwâ.

⁷Ifray wây' dan dlay rum wa gway' wây' kwa kɛ kwa wây' kwa, ɖay kɛri rum, mbra' um ɖɛ ri, vuk Moyizɛ wɛɖi ta', ɖay ko kɛri mɛni wɛɖi rum cu ɖayrum ce' ndɛ mɛ vun kofo za' mi, sôwâ Israyel cu gak um kar mi. Dan dlay mɛni wɛ mbɛ kɛ mar la' mbɛ kɛ mbra' ndɛ na' si,

⁸mbra' mɛni wɛ mbɛ kɛ sin mɛni Simbed wɛ gi nɛ toŋ pâ num si!

⁹Dan dlay mɛni ke kaw sôwâ nɛ ke kɛ mbra', dan mɛni wɛ gi sôwâ njeŋ kor Ifray nɛ kɛ mbra' pâ num si!

¹⁰Namba gak in i mbra' mɛni ɖɛri vun kofo cu ɖɛri za' mi, namba la' kɛnji' mbra' rum kɛ mbra' mɛni wɛ ɖɛri mgbaŋ ni nɛ si na.

¹¹Zɛ kwa mɛni wɛ ndo' ga'ri la' kɛ mbra' si, kwa mɛni wɛ ke dɛ hâ nɛ kɛ mbra' pâ num si!

¹²Zɛ namba njay vunduk mba wa dan rum ndɛna', namba gak in dan wa rum kɛ gbɛgboŋo.

¹³Namba cu ce' ndɛ Moyizɛ mɛni kɛmbo' vuk rum kɛ zim kɛdan mum tak sôwâ Israyel dan we wɛɖi rum mɛni wɛ dɛ ndo' nɛ mi.

¹⁴Ama kwawe nday faŋ dɛŋâr hâ handay cu gak we kwa rum mi! 'Bay hâ tam, kɛri mɛni handay wɛ in ɖerwa dan kawvun mɛ kɛmbar, zim rum wɛ kɛmbo' kwawe nday ɖo. Zim rum wɛ tal dɛ rɛka zɛ swɛ mɛni wɛ ɖa kɛ Kris tawa.

¹⁵Ko tam, kɛri ɖaŋ' mɛni handay wɛ in ɖerwa Moyizɛ, zim rum wɛ kɛmbo' kwawe ndaya.

¹⁶Ama ce' ndɛ mɛni Dan rum wây' wɛ du ɖerwa: Kɛri mɛni swɛ ɖaw faŋ mbɛ hay' Bârî, zim rum wɛ tal dɛ rɛka.

¹⁷Bârî nɛ Simbed, ɖay wɛ ri mɛni Simbed Bârî kɛta' wɛ han, dan fe wa tu kɛta' wɛ han ta'a.

¹⁸Namba ɖaŋ', zim vuk mba tal si, namba wɛ ta' mbra' Ifray, ndɛna', namba faŋ ce' ndɛ Bârî, ɖay namba pâ mbɛ du mbra' mɛ vun kofo kɛdan namba dɛ cok wɛ du mbra' mɛni toŋ pâ mɛ vun kofo nɛ si, Simbed Bârî kɛ mɛni gi sin rumu.

2 Corinthe 4

- ¹Wə du ɓay Ifray, mum ne sin rum ne mba, zə rum, namba cu ne wəlok mi.
- ²Namba ar sin mənɪ sôwâ wə gi hura hura kə sin mə gi zur daŋ', namba cu gi sin kə vari vur vur mi, ɓay namba cu faŋwa dan Ifray mɛta', zawa, namba wə pay zu dan mə kəzin' rum təlak, ɓay ndəna', namba wə keɓ kədan sôwâ daŋ' njay vunduk nday wa mba kor Ifraya.
- ³Ama Dan mə Kədam mənɪ namba wə ka' nə la' cu təlak mi si, dan rum cu təlak mi zə sôwâ mənɪ wə vi' kuni tawa.
- ⁴Handay cu ve dan rum mi zə jwə nya ni nə dəŋâr kwawe nday, mum tak nday dan weri mə ɓu mənɪ Dan mə Kədam rum wə dəri wa mbra' Kris, mənɪ foto Ifraya.
- ⁵Zə namba cu wə ka' dan wa tu mba mi, ama namba wə ka' dan wa Zezu Kris mənɪ Bârî. Mə namba, namba wə in i namba sum sin mi zə Zezu.
- ⁶Ifray mənɪ ini: Ri mə ɓu nə dəri wə ri mə ura', mum kə mənɪ gi ri mə ɓu um dəri wə vunduk mba kədan namba we mbra' Ifray mənɪ wə wədi wə vuk Zezu Kris.
- ⁷Ama namba, sôwâ mənɪ kə kwane rum wə vunduk mba, namba ce' ndə dənay ruɓ kədan sôwâ we njeŋ i gbəgbəŋ mə mbri rum car mbə hay' Ifray, cu car mbə hay' mba mi.
- ⁸Namba wə ce boni cem cem juk, ama boni rum cu faŋ nya mba mi. Namba kə dan dɪk juk, ama namba cu ar njay vunduk mba wa Ifray zə dan dɪk rum mi.
- ⁹Sôwâ wə keɓ zə mba, ama Ifray cu mba ar mi. Sôwâ wə mba pum njay də nya, ama namba cu mar mi.
- ¹⁰Bəka daŋ', namba wə ce boni mar Zezu wə tu mba kədan sôwâ məsin gak we i mum kəta' wə tu mba.
- ¹¹Wə du ta mba, bəka daŋ' namba həre' kə mar zə Zezu kədan sôwâ məsin gak we i mum kəta' wə tu mba mənɪ wə mara.
- ¹²Ndəna', mə namba, mar wə gi sin wə tu mba, ama mə hi, nyî wə gi sin wə tu ri.
- ¹³Dan rum wây' wə du dərwa: «Na ve Bârî, zə rum, na in dana.» Ndəna', kə Simbed' mə daw, namba ta', namba ve Bârî, ɓay zə rum, namba in dana.
- ¹⁴Namba we si, Ifray mənɪ par Bârî Zezu mbə mar, mum də mba ra' mbə mar kə Zezu ta', ɓay mum də mba ra' kə ri də kor rumu.
- ¹⁵Kwa rum daŋ' də gi zə ri kədan kəri mənɪ ɓay Ifray wə dlər də kofo, raw sôwâ mənɪ wə gi soko um ne kuni wə dlər də kofo ta' zə mbra' Ifraya.
- ¹⁶Zə rum vunduk cu mba par mi, ko tu mba la' wə dənok kî kî, nyî mba wə faŋ kwa mə mbrew bəka daŋ'ŋ.
- ¹⁷Boni mə kî mənɪ namba wə ce mgbaŋ ni nə cu də ke də hâ mi, boni rum wə gila' mbra' mə mbri mənɪ wə ke də hâ zə mba.

¹⁸Zə namba cu njay vunduk mba wa kwa mənɪ sôwâ gak we kə i nday mi, ama wa kwa mənɪ sôwâ cu gak we kə i nday mi. Kwa mənɪ sôwâ gak we kə i nday cu ke də hâ mi, ama kwa mənɪ sôwâ cu gak we kə i nday mi, kwa rum wə ke də hâ.

2 Corinthe 5

¹Zə namba we si, jew mənɪ namba wə han tam, wa' dan ini: Tu mba mə wa nya, jew rum la' dənok si, Ifray gila' so zə mba wafray, Ifray gila' so rum kə tu rum, bay so rum də ke də hâ.

²Bay mgbaŋ ni nə, namba wə ndəma' zə mē' də ge tu mə mbrew wə ri mə wafray wə mba ti juku.

³Zə kəri mənɪ namba wə də ge tu mə mbrew rum, namba cu də ke dan tu mi.

⁴Awo, kəri mənɪ namba gay' wə jew mə nya mənɪ nə, namba wə ndəma' ce' ndə mənɪ namba tle kwazi' wə wa mba. Kwa rum cu ta' i namba wə wa' kədan namba ar tu mba mə nya mə ni nə mi, ama namba wə wa' kədan namba ge tu mə mbrew wafray, kədan tu mə kə nyî nə sa' tu mənɪ mara.

⁵Ifray kə tu rum kə mənɪ gila' mba kədan namba we faŋwa rum, bay mum ne Simbed' rum ne mba ce' ndə kwa jeksem kwa mə bay mənɪ mum njay wə zə mba.

⁶Zə rum, bəka daŋ' vunduk cu mba par mi. Namba we si, kəri mənɪ namba kəta' kə tu mənɪ nə, namba gay' seŋ kə Bârî mba.

⁷Zə namba wə ta du dan mənɪ namba ve, cu du kwa mənɪ namba gak we kə i mba mi.

⁸Vunduk cu mba par mi, bay namba wə wa' ar tu mənɪ nə kədan namba də gay' hay' Bârî.

⁹Ama pâ daŋ' rum, ko namba la' kəta' kə tu mənɪ nə, ko namba la' ar tu rum daŋ', namba wə wa' kədan namba də gi kwa mənɪ wə kədam tu rumu.

¹⁰Zə namba daŋ' də car kor Kris kədan mum də bok dan wa mba kədan swə dāw dāw daŋ' də fe bal cik um ce' ndə sin mənɪ mum gi, ko mə bay, ko mə bro', kəri mənɪ mum ke kə i wa nya mənɪ na.

¹¹Namba we vari ô Bârî, bay namba wə keɓ kədan namba ta' vari rum ne kə sôwâ. Ifray we mba si njeŋ, bay na wə dik i wə vunduk ri, hi we nan si ta'a.

¹²Namba cu wə keɓ kədan namba faŋ ta' tu mba mi ne kərem za' mi, ama namba wə wa' kədan namba mi ne vari kədan hi gak mbra' tu ri zə mba, ndəna' hi gak dam dan vun sôwâ mənɪ wə mbra' tu nday wa kwa mənɪ sôwâ gak we kə i nday, cu wa kwa mənɪ wə vunduk swə mi.

¹³Namba la' lay kəzin' si, ka namba lay zə Ifraya. Ama namba la' jeŋ i jeŋ si, namba jeŋ i zə ri.

¹⁴Zə bə Kris wə ta' vari mba ne, zə namba we si njeŋ, swə dāw mar zə sôwâ daŋ', wa' dan ini: Sôwâ daŋ' mar kə rumu.

¹⁵Mum mar zə sôwâ daŋ' kədan sôwâ məni kə i kuni gi sin zə tu nday za' mi, ama kuni gi sin zə swə məni mar, ɓay Ifray par num mbə mar wə zə ndaya.

¹⁶Zə rum, namba cu kar swə ɗaw ce' ndə vari məni sôwâ məsin wə kar sôwâ za' mi. Ko ɓa' si, namba la' ke kar Kris ce' ndə məni sôwâ ke kar num si, mgbaŋ ni nə, namba cu um kar ndəna' za' mi.

¹⁷Kəri məni swə wə faŋ vunduk rum ɓay ɓa kə Kris, bə rum faŋ swə mə mbrewə. Kwa mə kəmbaŋ ndo' si, kwa mə mbrew mbə hana.

¹⁸Kwa rum daŋ' car mbə hay' Ifray məni gila' dan məni ɓul mba kə rum kə Kris, ɓay mum ar sin wə ɓa mba kədan namba ɗe sôwâ məsin kədan kuni ve dan rumu.

¹⁹Zə Ifray gila' dan məni ɓul sôwâ kə rum kə Kris, dan ɗik dan wa kwa mə bro' nday, ɓay mum ar sin wə ɓa mba kədan namba ka' dan məni mum gila' rum ne kə sôwâ daŋ'ŋ.

²⁰Zə rum, namba wə gi sin zə Kris, ce' ndə Ifray kə tu rum wə mi ɗe kə vun mba. Namba wə mi o kə semɗe Kris, i ar tu ri ne kə Ifraya.

²¹Kris cu kə kwa mə bro' mi, ama Ifray gi num faŋ bə kwa mə bro' zə mba kədan wə du ɓa mba kə Kris, namba gak faŋ njeŋ kor Ifraya.

2 Corinthe 6

¹Zə rum, namba sôwâ məni wə gi sin kə Ifray, namba wə mi o kədan i ar ɓay Ifray məni hi fe nə vi' mi.

²Zə Ifray in wə du Ɗerwa umu: «Kəri məni na ta' ɓay man ne nu, kəri rum, na mun vun ru. Kə bəka siɗ, na jin nu.» I kar ri'i! Mgbaŋ ni nə, ri məni hi gak fe ɓay Ifray han nə ni na. Tam, bəka məni swə gak fe siɗ hana.

³Namba cu wə wa' i swə ɗaw nə za' vari kədan nə ge dan mə bro' wa sin mba mi, zə rum namba cu keɓ kədan namba gi swə ɗaw dle wa sem mi.

⁴Zawa, wə du kwa daŋ', namba wə wa' i namba sum sin Ifray, namba car ŋgəɗiŋ' wə du boni, du ca, ɓay du dan ɗiki.

⁵Sôwâ pum mba ɓay njay mba ta so daŋgay', sôwâ məsin car dan wa mba, namba gi sin mə kəcik juk, namba cu za' ri nde sen mi, ɓay namba cu fe kwati mi.

⁶Namba wə ta' i namba sum sin Ifray kə sin mba mə dan dan mə bro', kə kwawe mba, kə vari məni namba wə red vunduk mba, kə ɓay mba, kə Simbeɗ Ifray, kə bə mba mə njeŋ,

⁷kə vari məni namba wə ka' dan mə kəzin', ɓay kə gbəgbəŋ Ifray, namba ra' njeŋ wə ɓa mba ce' ndə məni sôwâ wə ra' kwa zi wə ɓa nday, kədan namba zi kə ndi ɓay rigin tu mba kə ndi ta'a.

⁸Sôwâ mäsın wə gi mbra' mba ne, bay sôwâ mäsın wə ta' zur mba. Sôwâ mäsın wə ge dan mə bro' wa mba, bay sôwâ mäsın wə ge dan mə bay wa mba, ko kəri məni namba wə ka' dan mə kəzin', sôwâ mäsın wə mba kar ce' ndə sum hay dana.

⁹Ko kəri məni sôwâ daŋ' we mba, sôwâ mäsın du nday wə mba kar ce' ndə rəkway, ko kəri məni namba kə i, ce' ndə məni hi wə we, sôwâ mäsın wə mba kar ce' ndə sôwâ məni mar, sôwâ mäsın wə gi boni mba ne, ama handay cu mba ci mi.

¹⁰Sôwâ mäsın wə mba gi dik dan, ama kə ndi nə daŋ', namba wə tuk kədam bəka daŋ'ŋ. Sôwâ mäsın wə mba kar ce' ndə sum ca, ama namba gi sôwâ juk faŋ sum ndaka. Sôwâ mäsın wə mba kar ce' ndə sôwâ məni cu kə kwa mäsın mi, ama namba kə kwa daŋ'ŋ.

¹¹Bây mba mə so Koriŋtə, namba in dan rum ne ni təlaka. Namba ar vunduk mba ne ni bwi.

¹²Namba ar vunduk mba ne ni bwi, ama hi cu ar vunduk ri ne mba ko kî mi.

¹³Zə rum, na wə in dan məni nə mi ne ce' ndə məni hi daw mana: I ke kə dan dik wa mba ce' ndə dan dik məni namba kə ndi wa ri, i ar vunduk ri ne mba bwi!

¹⁴I ɓa nji kə sôwâ mə bro' mi. Zə ɓa rum cu kə vari mi. Sôwâ mə njeŋ kə sôwâ mə vur vur gak ɓa nji mə ma su? Ri mə ɓu kə ri mə ura' gak ɓa nji mə ma su?

¹⁵Kris kə Satan gak ɓa nji mə ma su? Swə məni ve Kris kə swə məni cu ve Kris mi gak ɓa nji mə ma su?

¹⁶So po' fur Ifray kə ifray mə vun fur gak ɓa nji mə ma su? Zə namba so po' fur Ifray mə kə i, ce' ndə məni Ifray kə tu rum ini: «Na də suk wə du sôwâ man, bay na də gaŋ kə ndaya. Na də ke Ifray nday, bay handay də ke sôwâ mana.»

¹⁷Zə rum, Bârî ini: «Say i 'ya ar nday, bay i ɓul nji kə ndaya. I ɗak kwa mə kə day mi, bay na də mi ve.

¹⁸Na də ke ba mi, bay hi də ke daw man mə njiwkwa kə mə rawkwa. Bârî mə kə gbəgbon daŋ' in ndəna'a.»

2 Corinthe 7

¹Bây man kwa, dan rum daŋ' kə sin zə mba, zə rum, mə ar kwa daŋ' məni wə ɗənok tu mba kə nyî mba, bay mə gi tu mba kə gbəgbon kədan mə ke njeŋ kə ta du ô Ifraya.

²I ar ri ne mba wə vunduk ri. Namba cu gi bro' hay' swə ɗaw mi, namba cu ɗənok swə ɗaw mi, namba cu ra' kwa wə ɓa swə ɗaw kə kol mi.

³Na cu wə in dan rum kədan na in dan mə bro' wa ri mi, zə ce' ndə məni na in vun kofo: Hi wə vunduk mba, ko namba la' kə i kə nji, ko namba la' mar kə nji daŋ'ŋ.

⁴Na cin vunduk rin dlew wa ri, na wə mbra' tu rin zə ri, wə du boni daŋ' məni namba ce, vunduk cu par nan mi, bay na wə tuk kədam juku.

⁵Ko kəri mənɪ namba ta day nya Maseduwanə, namba cu fe pemây mi, namba ndewa kə cik wə ri cem cem daŋ'ŋ. Namba dle vun kə sôwâ məsin, ɓay vunduk mba ne wəloko.

⁶Ama Ifray mənɪ wə ne gbəgboŋ ne kə sôwâ mə tətâ, mum ne gbəgboŋ ne mba kəri mənɪ Titə mbə daya.

⁷Mbə um cu jeŋ vunduk ne mba taw mi, ama dan mənɪ mum in ne mba wa vari mənɪ hi jeŋ vunduk ne num nə jeŋ vunduk ne mba ta'a. Mum in ne mba i mē' kədan na faŋ də mi kar kərem wə mi ti juk, hi wə dɪk dan zə rin kə ci' ɓay i hi hərə' kədan hi man rigini. Zə rum, mgbəŋ ni nə, na wə tuk kədam juk kəreme.

⁸Zə ko ɗerwa mənɪ na wây' hay' ri nə la' gi ni dɪk dan daŋ', mgbəŋ ni nə, na cu ɗe mava wa rum mi. Kəri mənɪ na mun i ɗerwa rum gi ni dɪk dan juk kə ri kî, kəri rum, na gak ɗe mava.

⁹Ama mgbəŋ ni nə, na wə tuk kədam, cu zə na gi ni dɪk dan mi. Ama zə dan dɪk mi gi ni faŋ vunduk ri. Ifray gi sin kə dan dɪk mi, zə rum, namba cu gi kwa mə bro' hay' ri mi.

¹⁰Zə dan dɪk mi mənɪ Ifray gi sin kə ndi kə mənɪ gi ni faŋ vunduk ri kə mi ne siɗ, ɓay namba cu gak ɗe mava wa dan rum mi. Ama dan dɪk mə sôwâ mə nya wə mbə kə mara.

¹¹Ifray gi sin kə dan dɪk mənɪ hi ke kə ndi, ɓay mgbəŋ ni nə, i kar ndo' vun dan rum ye! Dan dɪk rum gila' ri kədan hi faŋ sôwâ mənɪ wə gi kwa kə vari rum, mum gi ni faŋ sôwâ mənɪ hərə' kədan hi rigin tu ri, mum gi ni faŋ sôwâ mənɪ wə car wa kwa mə bro', mum gi ni faŋ sôwâ mənɪ wə ô Ifray, mum car mē' wə vunduk ri kədan na faŋ də mi kar kərem, mum car sây' gi kwa mə ɓay wə vunduk ri, mum gi ni faŋ sôwâ mənɪ wə ɓok dan wa sôwâ mənɪ wə gi kwa mə bro'o. Kə vari kwa mənɪ hi wə gi daŋ', hi wə ta' i hi cu kə dan mə bro' wa ri wə du kwa rum mi.

¹²Na cu wây' ɗerwa rum hay' ri zə swə mənɪ gi kwa mə bro' rum, ko zə swə mənɪ mum gi kwa mə bro' rum hay' rum mətə', ama na wây' ɗerwa rum hay' ri kədan hi we njeŋ kor Ifray vari mənɪ hi wə mba bə nə toŋo.

¹³Kwa gi mi kə mənɪ jeŋ vunduk ne mba. Kwa gi mi cu jeŋ vunduk mba taw mi, ama namba tuk kədam ɓayrum kərem kəri mənɪ namba we kədam mənɪ Titə kə ndi zə hi daŋ' so' vunduk ne numu.

¹⁴Na ke mbra' tu rin zə ri hay' rum, ɓay hi cu ta' zur rin mi, ama ce' ndə mənɪ namba wə in dan mə kəzin' mi ne bəka daŋ', ndəna' ta', mbra' mənɪ namba ke mbra' tu mba kə ndi zə ri kor Titə nə njeŋe.

¹⁵Ndəna', bə um zə ri wə jeŋ də kofo kə ri daŋ' mənɪ mum wə dla' wa dan vari mənɪ hi daŋ' ar tu ri ta zə dan um, ɓay vari mənɪ hi ve num kə wəlok dlaɓ dlaɓa.

¹⁶Na wə tuk kədam juk zə kəri mənɪ na cin vunduk rin wa ri, hi cu ta' zur rin mi.

2 Corinthe 8

- ¹Daw ba mba, namba wə wa' i i we vari məni Ifray ne ɓay um ne kə kul sôwâ Kris cem cem məni wə nya Maseduwanə.
- ²Boni cem cem kənji' nday juk, ama kə ndi nə daŋ', handay tuk kədam juku. Ko kəri məni handay kə ca daŋ', handay ne kwa juku.
- ³Na wə mi in kəzini: Handay ne kwa rum kə vunduk mə ɗaw, hâ kwane rum pā wa gbəgboŋ nday,
- ⁴handay o mba kə tu' ɓa kədan handay gak ɓa kə sôwâ məsin wə du kwane məni handay wə sin kədan kawɓa raw sôwâ Ifray məni gay' wə nya Zude kə ndi.
- ⁵Kwane nday pā wa dan ɗik mba, handay ne tu nday ne kə Bârî cop, ɓay kəki rum, handay ne tu nday ne mba kə bə Ifraya.
- ⁶Zə rum, namba o Titə məni təŋ sin mə ɓay rum du ri kədan nə də so mi, ɓay nə də kofo kə sin mə ɓay rum hâ ndo' rumu.
- ⁷Hi sum ndak wə du kwa daŋ'ŋ: Hi ve dan Kris, hi kə kwane mə dan ge kə mə kwawe, hi kə sây' mə gi kwa mə ɓay, kə bə məni namba car mē' rum wə vunduk ri, zə rum, namba wə wa' i i ta' ndak mi wə du sin mə ɓaya.
- ⁸Na cu in dan rum ne ni ce' ndə dan dlay mi, ama na in dan wa dan sây' gi kwa mə ɓay məni sôwâ məsin kə ndi, kədan na kənji' njeŋ bə mi kə ndi.
- ⁹Zə hi we ɓay Bârî mba Zezu Kris si, mum ke bə ndak, ama mum faŋ bə ca wə zə ri, kədan hi faŋ sum ndak zə ca umu.
- ¹⁰Ndəna' na wə ta' dan ɗik man mi ne wa dan rumu: 'Bay zə ri kədan hi də kofo kə sin məni hi təŋ wəta, hi cu kə məni təŋ zə ne kwa rum cop taw mi, ama hi kə məni təŋ kə ɗik dan wa dan rum cop ta'a.
- ¹¹Zə rum, mgbaŋ ni nə, i də kofo kə gi sin rum, ɓay i ndo' sin rumu. I ndo' sin rum kə bə məni hi ke kə ndi kəri məni hi gila' dan kədan hi gi sin rum, ɓay i gi sin rum kə kwa məni wə ɓa ri.
- ¹²Zə swə la' wə ne kwa kə vunduk mə ɓay si, Ifray wə ve kwane rum ce' ndə kwa məni bə rum kə ndi wə ɓa rum, cu ce' ndə kwa məni bə rum cu kə ndi wə ɓa rum mi mi!
- ¹³Na cu wə keɓ kədan na mi gi faŋ sum ca kədan na kawɓa sôwâ məsin kə ndak mi mi, ama na wə keɓ kədan hi ke vun nji.
- ¹⁴Mgbaŋ ni nə, hi kə kwa juk, zə rum, hi gak kawɓa sôwâ məsin məni cu kə kwa wə ɓa nday mi. Fəta məsin, hi la' kə ca si, ɓay handay la' kə kwa wə ɓa nday si, handay gak kawɓa ri: Kə vari rum, hi də ke vun nji.
- ¹⁵Ce' ndə məni Dan rum wây' wə du ɗerwa: «Swə məni ra' kwa ɓayrum, kam kwa rum cu ke ɓa rum mi. 'Bay swə məni ra' kwa kî, kwa rum cu um kəɗa mi.»
- ¹⁶Mə gi soko ne kə Ifray məni car sây' wə vunduk Titə zə ri, ce' ndə sây' məni namba kə ndi wə vunduk mba zə ri ta'a!

¹⁷Titə cu ve dan kwa o mba taw mi, ama vunduk rum nyen ped' kə sây' zə ri hâ mum keɓ vari kədan mum də hay' ri kə tu rumu.

¹⁸Namba sin vay ba mba kə rum, kul sôwâ Kris daŋ' wə um sâ' zə vari məni mum wə ka' Dan mə Kədama.

¹⁹Bay kul sôwâ Kris daŋ' par num kədan mum də kə mba kəri məni namba wə də kə kwane rum zə mbra' Bârî, bay kədan namba ta' ne kə sôwâ daŋ' i namba wə wa' kawɓa sôwâ məsini zə sin mba.

²⁰Namba cu wə wa' i swə daw za' vari kədan mum ge dan mə bro' wa mba zə namba cu gi sin kə kwane rum kə vari rum mi mi.

²¹Namba cu wə wa' kədan namba gi kwa mə bay wə i Bârî taw mi, ama wə i sôwâ ta'a.

²²Namba sin vay ba mba məsin kə nday ta', namba kənji' num sem raw, bay kəri daŋ', namba za' i mum həre' kədan mum kawɓa sôwâ məsin, ama mgbaŋ ni nə, sây' gi kwa mə bay məni wə vunduk rum zə ri wə də kofo bayrum zə mum cin vunduk rum wa ri.

²³Mə Titə, mum bây hoɓ man, bay mum wə gi sin kə rin zə ri. Mə daw ba mba məsin məni kə rum, kul sôwâ Kris daŋ' sin nday, bay handay wə gi sin zə mbra' Kris.

²⁴I ta' i hi wə nday bə kəzin', kədan kul sôwâ Kris daŋ' gak we dan rum njeŋ, bay handay gak we i mbra' məni namba mbra' tu mba kə ndi zə ri nə njeŋe.

2 Corinthe 9

¹Cu kə sin kədan na wây' derwa hay' ri wa dan kwane məni hi sin kədan hi kawɓa raw sôwâ Ifray kə ndi za' mi.

²Zə na we si, hi gi kwa rum kə vunduk mə bay, bay na mbra' tu rin zə ri hay' sôwâ nya Maseduwanə kə ini: «Daw ba mba məni gay' wə nya Akay handay həre' kədan handay kawɓa daw ba mba məsin daka wəta,» sây' məni wə vunduk ri kə məni car sây' wə vunduk sôwâ raw du ndaya.

³Ama na sin daw ba mba məni kuni hay' ri kədan mbra' məni namba mbra' tu mba kə ndi zə ri wa kwane rum nə faŋ dan mə uray mi, na wə wa' i i ke həre' kədan hi kawɓa daw ba mba məsin ce' ndə məni na ini.

⁴La' cu ndəna' mi si, sôwâ nya Maseduwanə la' də hay' ri kə rin si, bay handay la' za' i hi cu həre' kədan hi kawɓa daw ba mba məsin mi si, zur də mba gi wa ri zə namba njay vunduk mba wa ri, bay pâ daŋ' rum, zur də mi gi.

⁵Zə rum, na dîk i bay kədan na o daw ba mba mə ni kuni kədan kuni də hay' ri cop rin kədan handay də gila' kwane məni hi in dan wa rum ɓa' si na. Ndəna', kwane rum ke həre' kəri məni na wə də day, bay kwa rum də ta' i hi ne kwane rum kə vunduk mə bay, cu kə dole mi.

⁶I dla' wa dan məni na: Swə məni jo' zep ta nya kî, bə rum də ɓawa rum kî ta', bay swə məni jo' zep ta nya bayrum, bə rum də ɓawa rum bayrum ta'a.

⁷La' ndəna' si, say swə dāw dāw daŋ' nə ne kwa ce' ndə mənɪ mum gila' dan rum wə vunduk rum, dan mgbərum dan, ko dan dole, zə Ifray wə bə swə mənɪ wə ne kwa kə tuk kədama.

⁸Ifray kə gbəgbonɔ kədan mum ne kwa mə bay cem cem bayrum mi ne, cu kədan hi ke kə kwa daŋ' mənɪ kə sin zə ri bəka daŋ' taw mi, ama kədan kwa məsin gwa' wə ɓa ri kədan hi də kofo kə gi sin mə bay cem cem daŋ' kə ndi ta'a.

⁹Ce' ndə mənɪ Dan rum wāy' wə du dərwa: «Mum ne kwa kə bə ca bayrum, bay mum wə ke də hā.»

¹⁰Ifray mənɪ wə ne zep kwa ne kə bə jo' kwa, bay wə ne kwati ne kə sôwâ kədan handay ur tu nday kə ndi, mum də mi ne zep kwa daŋ' mənɪ kə sin zə ri, bay mum də gi zep kwa rum ci bay mbud də kofo kədan kwane mənɪ hi ne kə vunduk mə bay nə dlər də kofo bayrumu.

¹¹Mum də mi ne kwa juk kə ri daŋ', kədan kə ri daŋ', hi gak ne kwane kə sôwâ məsin kədan sôwâ juk də gi soko ne kə Ifray zə kwane mənɪ hi ne nday kə ɓa mba.

¹²Zə sin mənɪ hi wə gi nə, cu wə kawɓa sôwâ Ifray taw mi, ama wə gi sôwâ juk gi soko ne kə Ifray ta'a.

¹³Sin rum wə də ta' kpak mi, zə rum sôwâ juk də gi mbra' ne kə Ifray zə hi wə ta zə Dan mə Kədam Kris njeŋ, handay də gi mbra' um ne zə hi wə ɓul kwa mə bay mənɪ hi kə ndi kə nday bay kə sôwâ məsin daŋ' kə vunduk mə bay ta'a.

¹⁴Handay də in dan kə Ifray zə ri kə bə mənɪ kəta' bayrum wə vunduk nday zə ri zə bay mə mbri mənɪ Ifray ne ni.

¹⁵Mə gi soko ne kə Ifray zə kwane um mənɪ swə cu gak kənji' mi!

2 Corinthe 10

¹Na, Pol, na wə ci vun kwa dāw hay' ri kə tu rini: Sôwâ məsin wə in i na hom tu rin kəri mənɪ na wə du ri, ama i na kə gbəgbonɔ wa ri kəri mənɪ na seŋ kə ri. Na wə mi o kə kədam mə Kris bay bay umu.

²I pla' nan kə gbəgbonɔ kədan na gi gbəgbonɔ wa ri kəri mənɪ na də ke du ri mi, zə na we si njeŋ, na gak gi gbəgbonɔ wa sôwâ mənɪ wə in i namba wə gi sin mba kə vari mənɪ sumra' wə gi sin ndaya.

³Kəzin', ko kəri mənɪ namba gay' wə du sôwâ nya, namba cu zi kə vari mənɪ sôwâ nya wə zi kuni mi.

⁴Kwa zi mənɪ namba wə zi kə ndi cu kwa zi mə sôwâ mə nya mənɪ nə mi, ama kwa zi rum, kwa zi Ifray mə gbəgbonɔ mənɪ gak dənok so mə gbəgbonɔ. Namba wə dənok dan dīk mə hay dan,

⁵Namba wə bru dan daŋ' mənɪ sôwâ wə ge wə du mbra' tu nday kədan handay tak kwawe Ifray mə wafray kə ndi də rəka. Namba wə kaw dan dīk sôwâ daŋ' kədan namba nday gi mun vun Kris.

⁶Bay kəki mənɪ hi ta' i hi wə mun vun Kris njeŋ, namba hərə' kədan namba bok dan wa sôwâ daŋ' mənɪ cu mun vun Kris mi.

⁷Hi wə kar ga' rəka tawa. Swə la' dɪk i mum mə Kris si, say bə rum nə dɪk dan wa dan mənɪ na: Namba mə Kris ce' ndə mum ta'a.

⁸Zə ko na la' wə mbra' tu rin zə gbəgbəŋ mənɪ Bârî ne mba daŋ', zur cu man gi mi, Bârî ne gbəgbəŋ rum ne mba kədan namba mi gi jeŋ də kofo wə du dan mənɪ hi ve, cu kədan namba mi dənok kə ndi mi.

⁹Na cu wə wa' i sôwâ dɪk i na wə keɓ kədan na mi gi ne wəlok kə dərwa mənɪ na wây' hay' ri kuni mi.

¹⁰Zə sôwâ məsin wə ini: «Dərwa mənɪ Pol wây' hay' mba kuni kəcik bay kə gbəgbəŋ. Ama kəri mənɪ mum wə du mba kə tu rum, mum tətâ bay dan ge um cu kə sin mi.»

¹¹Say swə mənɪ wə in ndəna', nə we njeŋe: Dan mənɪ namba wây' wə du dərwa mba kəri mənɪ namba seŋ kə ri cu cem kə sin mənɪ namba wə də gi kəri mənɪ namba də ke du ri nə mi.

¹²Kəzin', namba cu wə wa' kədan namba gi tu mba vun nji kə sôwâ mənɪ wə kar tu nday kə mbra', ko kənji' tu mba kə nday mi, handay laya. Handay wə kənji' tu nday kə kwa kənji' kwa mənɪ handay gila' rum kə tu nday, bay handay wə kənji' ta nday kə sin ndaya!

¹³Mə namba, namba cu də mbra' tu mba pâ vun haga mənɪ Ifray be ne mba nə mi, namba də mbra' tu mba wə du vun haga sin mənɪ Ifray be ne mba kəri mənɪ mum ar vari ne mba kədan namba gi sin rum hâ day hay' ri.

¹⁴Namba cu cuwol vun haga mənɪ Ifray be ne mba nə mi, namba la' cu day hay' ri kəzə mi si, kwa rum də ke ndəna', ama namba ta day hay' ri kə Dan mə Kədam mənɪ wə in dan wa Kris.

¹⁵Ndəna', namba cu cuwol vun haga mənɪ Ifray be ne mba nə mi, namba cu mbra' tu mba wa sin mənɪ sôwâ məsin wə gi nə mi, zawa namba wə wa' i i də kofo wə du dan mənɪ hi ve, bay namba wə wa' i namba gak gi sin mə toŋ mənɪ pâ mə vun kofo du ri, dan cuwol vun haga mənɪ Ifray be ne mba.

¹⁶La' ndəna' si, namba gak ka' Dan mə Kədam rum wə nya məsin mənɪ wə i nya mi ga' day', dan mbra' tu mba wa sin mənɪ sôwâ məsin ke gi wə ri mənɪ handay ke gi wə hana.

¹⁷Ama ce' ndə mənɪ Dan rum wây' wə du dərwa: «Swə mənɪ wə wa' kədan mum mbra' tu rum, say bə rum nə mbra' tu rum wa sin mənɪ Bârî gi.»

¹⁸Zə Ifray cu wə ve swə mənɪ wə mbra' tu rum kə tu rum mi, ama mum wə ve swə mənɪ Bârî wə ge dan mə bay wa rumu.

2 Corinthe 11

- ¹Ko kəri məni na gi lay kî du ri, na wə wa' i i rom nana. Awo, i rom nan ye!
- ²Na wə gi sây' wa ri ce' ndə məni Ifray wə gi sây' wa ri. Zə hi ce' ndə way mə dan cin nji məti na ne kə nji, mum nə Kris kədan mum də cini.
- ³Ama na wə ne wəlok kədan kwawe mi də dənok, bay kədan hi də ar ba mi mə njeŋ bay bay kə Kris, ce' ndə məni Evə vi' vari Ifray kəri məni wu' bu sə kə hay dan umu.
- ⁴Zə hi wə ve swə məsin məni wə mbə hay' ri bay ka' dan wa Zezu məsin cem kə məni namba ka' dan wa rum ne ni. Bay hi wə ve simbed' məsin bay dan məsin cem kə Simbed' Ifray bay Dan mə Kədam məni namba ka' ne ni nə ta'a.
- ⁵Na cu dik i na kî wə hay' sum sin məni hi ve ce' ndə sum sin mə rōwâ kuni mi!
- ⁶Ke məsin, na cu swə məni we se'le dan ge ce' ndə handay mi su na, ama kəzin', na kə kwawe pâ mə handaya. Namba ta' kwawe mba ne ni təlak kə ri daŋ' kə vari cem cem daŋ' ta'a.
- ⁷Kəri məni na ka' Dan mə Kədam Ifray ne ni, na ka' Dan rum ne ni uray, na hom tu rin kədan hi ke kə mbra', kəri məni na gi kwa rum ndəna', na gi bro' su?
- ⁸Na gi ce' ndə məni na kəy hura hay' kul sôwâ Kris məsin kəri məni na ve səlay wə ba nday kədan na mi jini.
- ⁹Bay kəri məni na ke hay' ri, ko kə ri məni na kə mē' səlay, na cu cik swə daw du ri kə dan rum mi. Zə daw ba man məni car mbə nya Maseduwanə mbə ne nan kwa daŋ' məni na ke kə mē' rum, ce' ndə məni na cu cik swə daw du ri ba' si mi, ndəna' ta', na cu də gi kwa rum kofo za' mi.
- ¹⁰Kə dan mə kəzin' mə Kris məni wə vunduk rin, na wə mi ne: Wə nya Akay daŋ', swə daw cu gak tak dan mbra' rum məni na wə mbra' tu rin wa rum nə kpe mi.
- ¹¹Zə mi na wə in dan ndəna' su? Zə na cu wə mi bə mi su? Ifray we si njeŋ, na wə mi ba!
- ¹²Na də də kofo kə gi sin ce' ndə məni na wə gi mgbaŋ ni nə, kədan na tak sum sin məsin məni hi wə ve, məni wə keɓ vari kədan handay mbra' tu nday kə in i handay wə gi sin ce' ndə namba!
- ¹³Handay sum sin mə hay dan məni wə hay dan wa sin nday, bay wə gi tu nday ce' ndə sum sin Kris.
- ¹⁴Dan rum cu gak jin' wa mba ne mi: Zə Satan kə tu rum gak gi tu rum ce' ndə bə sin Ifray mə wafray mə ri mə bu.
- ¹⁵La' ndəna' si, ko kəri məni sum sin um wə gi tu nday ndə sum sin mə njeŋ, dan rum cu gak jin' wa mba ne mi, ama ndo' vun rum, handay də fe dan bok wa nday ce' ndə sin məni handay gi.
- ¹⁶Na faŋ dok kəreme: Na cu wə wa' i swə daw nə kar nan ce' ndə lay mi, ama hi la' wə man kar ce' ndə lay si, i ve nan ce' ndə lay kədan na gak mbra' tu rin kî.

- ¹⁷Kəzin', dan mənɪ na wə in mgbəŋ ni nə, dan mənɪ Bârî wə wa' i a in nə cu mi, wə du dan mbra' mənɪ na wə mbra' tu rin wa rum, na wə ge dan ce' ndə laya.
- ¹⁸Zə sôwâ məsin juk wə mbra' tu nday wa sin nday, na ta', na də mbra' tu rin ta'a.
- ¹⁹Hi sôwâ mə kə gwet, hi wə ve sôwâ mə lay kə kədama!
- ²⁰Ko kəri mənɪ handay wə mi dlay ce' ndə bek, ko handay wə ra' kwa ɓa ri, ko handay wə mi vi', ko handay wə mi jed, ko handay wə mi ge zə hum daŋ', hi wə nday ve.
- ²¹Zur wə man gi kə in dan mə ni nə, namba cu ke kə gbəgbəŋ kədan namba gi ndəna' mi! Ama swə la' wə wa' kədan mum mbra' tu rum wa kwa si, na wə wa' kədan na mbra' tu rin ta', mgbəŋ ni nə, na wə ge dan ce' ndə laya.
- ²²Handay sôwâ Zuwif su? Na swə Zuwif ta'a. Handay sôwâ nya Israyel su? Na swə nya Israyel ta'a. Handay daw rawti Abraham su? Na vay rawti Abraham ta'a.
- ²³Handay sum sin Kris su? Mgbəŋ ni nə na wə ge dan ce' ndə swə mə dan wa, ama na bə sin Kris mə ɓay pā nday, na gi sin ɓayrum pā nday ta', na gi daŋgay' sem raw pā nday si, na fe pum sem raw pā nday si, na we mar kə i sem raw pā nday si.
- ²⁴Sôwâ Zuwif pe nan kə ləva gufədi' wa cefadew kə ri cem cem vatla.
- ²⁵Sôwâ nya Romə pum nan sem hinji', ɓay sôwâ məsin ge nan kə gway' sem dāwa. Da kuk nan sem hinji', ɓay sem dāw na gi bəka dāw kə dukri dāw wə vun mbi.
- ²⁶Wə du gaŋ man cem cem raw, na ce boni wə mbi mənɪ mbə haɓ rəka, na ce boni wə ɓa sôwâ mə bargu kwa, na ce boni wə ɓa sôwâ mənɪ zə saŋ man ɓay wə ɓa sôwâ mənɪ cu zə saŋ man mi ta', na ce boni wə mbok so mə mbri ɓay wə gop, na ce boni wə ya mbi ɓay wə ɓa daw ba man mə hay dana.
- ²⁷Na gi sin mə kəcik cem cem, ɓay na ce boni wə du sin rumu. Fəta məsin, na cu nde sen mi, fəta məsin mē' ti nan ɓay mē' mbi ti nan ta', fəta məsin, na cu za' kwati mi, fəta məsin, na ce boni simbed mə ri ri, ɓay fəta məsin, na kə tu uraya.
- ²⁸Bay dan in dan wa boni məsin mənɪ na ce, bəka daŋ', dan dɪk mənɪ na kəta' kə ndi wə vunduk rin wa kul sôwâ Kris cem cem daŋ' wə man mbra' ce' ndə kwazi' mə kə mbra'a.
- ²⁹Swə la' tətā si, na tuk tu rin tətā ta'a. Swə la' nde wə du kwa mə bro' si, na wə ke kə dan dɪk wə vunduk rini.
- ³⁰Na la' gak mbra' tu rin si, na də mbra' tu rin wa kwa daŋ' mənɪ wə ta' tətā tu rini.
- ³¹Ifray, Ba Bârî mba Zezu Kris we si, na cu hay dan mi, na wə wa' i sôwâ daŋ' mbra' semde rum də hā.
- ³²Kəri mənɪ na ke so Damas, toŋ nya mənɪ ke gi sin zə jwə Aretas njay soje wə vun vari so rum kədan handay man kawa.
- ³³Ama sôwâ məsin tle nan cin wə rawti kəkel ɓay no' nan wə vun zarəho mənɪ ar wə la' tu ruɓ so rum ta rəka, ɓay na siɗ mbə ɓa rum ndəna'a.

2 Corinthe 12

¹Ko na la' we i mbra' tu cu bay mi daŋ', say na mbra' tu rini! Ama mgbaŋ ni nɔ, na dɔ in dan wa kwawe cem cem mɔni Bârî ta' ne nana.

²Na we swə Kris mɔsin, ba' si kim guɓ wa fəɗi', Ifray tle num wafray seje. Ko Ifray tle num ta han kə tu kəzin', ko Ifray ta' kwawe ne num, na cu we mi. Say Ifray we kwa rum tawa.

³Awo, na we si, Ifray tle swə nɔ hâ ta ri mɔ dɛ kə Paradis. Ko Ifray tle num ta han kə tu kəzin', ko Ifray ta' kwawe ne num na cu we mi. Say Ifray we kwa rum taw,

⁴Bay kəri mɔni mum wə Paradis, swə nɔ mun dan mɔni swə cu gak faŋ in zu dan rum mi.

⁵Na dɔ mbra' tu rin wa swə na, ama na cu dɔ mbra' tu rin wa tu rin mi, say na wə mbra' tu rin wa kwa daŋ' mɔni wə ta' tɔtâ tu rini.

⁶Na la' wə wa' kɔdan na mbra' tu rin si, na cu dɔ ke lay mi, zɔ na wə in tu dana. Ama na wə ar dan mbra' tu rin zɔ na cu wə wa' i swə mɔsin dɩk dan wa rin pâ wa mɔni mum wə dɩk dan wa rin kəri mɔni mum we kwa mɔni na wə gi bay mun dan mɔni na wə in kuni mi.

⁷Ama Ifray ne gaɓ mɔ kɛcik ne nan kɔdan mum man tak dan mbra' tu rin wa kwawe mɔ mbri mɔni mum ta' ne nana. Gaɓ rum mbə wə tu rin ce' ndɔ vay sin Satan kɔdan mum man tak dan mbra' tu rini.

⁸Na o Bârî wa gaɓ rum sem hinji' kɔdan nɔ car gaɓ rumu.

⁹Mum dām vun rini: «Bay man nde nu si, zɔ kəri mɔni ha tɔtâ, gbəgbɔŋ man gak gi sin wə vunduk ru.» Zɔ rum, na wə wa' kɔdan na mbra' tu rin wa tɔtâ man kɔdan gbəgbɔŋ Kris nɔ ke kə rini.

¹⁰Zɔ rum, na wə tuk kɔdām kəri mɔni na tɔtâ, kəri mɔni sôwâ mɔsin wə man i, kəri mɔni na wə ce boni, kəri mɔni sôwâ wə keɓ zu rin, bay kəri mɔni na wə tuk cik wə du sin mɔni na wə gi zɔ Kris! Zɔ kəri mɔni na tɔtâ, na gbəgbɔŋo.

¹¹Na wə ge dan ce' ndɔ lay, ama hi kə mɔni wə man gi kɔdan na ge dan ndɔna'a. Kɛzɔ, hi kə mɔni gak man rigini. Zɔ ko na la' cu kwa mɔsin mi daŋ', na cu kî wə hay' sum sin mɔni hi ve ce' ndɔ sum sin mɔ rôwâ kuni mi.

¹²Kəri mɔni na ke du ri, na car ŋgɛɗiŋ' wa sin mɔni ta' i na vay sin Kris: Na ta' kwa ta' kwa ne ni, kə gi kwa mɔ jin' wa ne kə sôwâ bay yewe.

¹³Kwa mɔsin mɔni na gi hay' kul sôwâ Kris mɔsin mɔni na cu gi wə hay' ri mi kɔta' su? Say na cu cik swə dāw du ri kɔdan kawɓa rin mi tawa. I vrum dan mɔ bro' rum ye!

¹⁴Mgbaŋ ni nɔ, na hɔre' kɔdan na faŋ dɔ so mi sem hinji' rum, bay na cu dɔ mi cik kə o kwa ɓa ri mi: Hi kə mɔni na bɔ, na cu bɔ sɔlay mi mi, zɔ daw cu kə mɔni wə keɓ kwa kɔdan handay ur sôwâ nday kə ndi mi, ama sôwâ nday kə mɔni wə keɓ kwa kɔdan handay ur daw nday kə ndi.

¹⁵Mə na, na də tuk kəɗam kə ne kwa ɗaŋ' mənɪ na kə ndi, ɓay ne tu rin ta' kədan na mi jini. Na la' wə mi bə ndəna' si, hi də man bə kî su?

¹⁶La' ndəna' si, hi də ve i na cu cik swə ɗaw du ri mi. Ama swə məsin wə də in i na ɓu ni kə kol ɓay kaw ni kə hay dana.

¹⁷Na ti kwa ɓa ri kə swə ɗaw mə du sôwâ mənɪ na sin hay' ri si su?

¹⁸Na o Titə kədan nə də hay' ri, ɓay na sin vay ba mba mənɪ hi we nə kə rumu. Hi gak in i Titə ti kwa ɓa ri su? Na kə mum, namba cu gi sin kə dan ɗik mə ɗaw mi su? Namba cu ta kə vari mə ɗaw mi su?

¹⁹Ke məsin, hi wə ɗik i daka ɓa' si, namba wə keɓ kədan namba rigin tu mba kor ri su na? Cu ndəna' mi, bāy man kwa, namba wə in dan kor Ifray ce' ndə mənɪ Kris wə wa', ɓay kwa ɗaŋ' mənɪ namba wə gi, namba wə gi kwa rum kədan namba mi gi də kofo wə du dan mənɪ hi ve.

²⁰Na wə ne wəlok kədan kəri mənɪ na də hay' ri, na də mi za' cem kə mənɪ na wə wa', ɓay hi də man za' cem kə mənɪ hi wə wa' ta'a. Na wə ne wəlok kədan na də za' i hi wə dle vun kə nji mbok nji, hi kə sây' wa nji mbok nji, hi wə ra' bak kə nji mbok nji, hi wə gi ghaw kə nji mbok nji, hi wə ge dan mə bro' wa nji mbok nji, hi wə hay dan wa nji mbok nji, hi wə mbra' tu ri, ɓay hi wə gi kwa mə ghəghaya.

²¹Na wə ne wəlok kədan kəri mənɪ na də hay' ri kərem, Ifray də man gi faŋ kî kor ri, ɓay na də ci' wa sôwâ juk mənɪ gi kwa mə bro' kəri mənɪ na ke du ri, ɓay cu faŋ vunduk nday, ko cu ar gi kwa mə kə day, ko gi ghəghay, ko gi kwa mə kə zur dan zur mi.

2 Corinthe 13

¹Mgbaŋ ni nə, na wə də so mi sem hinji' rumu. Ce' ndə mənɪ Dan rum wây' wə du ɗerwa: «Say dan tum sem swə ɗaŋ' nə car kə vun sum we njeŋ dan rum hoɓ ko hinji'i.»

²Na kə dan ɗaw kədan na har sôwâ mənɪ gi kwa mə bro' kəri mənɪ na ke du ri ɓay kə sôwâ məsin ɗaŋ'ŋ: Na in dan rum ne ni kəri mənɪ na ke du ri sem hoɓ rum, ama mgbaŋ ni nə, kəri mənɪ na seŋ kə ri, na dok dan rum kəreme: Kəri mənɪ na də də hay' ri fəta məsin kədan na mi kar, na cu də we ca wa swə ɗaw mi.

³Hi wə wa' kədan hi we Kris kə mənɪ wə in dan kə vun rini. Kəri mənɪ na də də hay' ri, hi də we dan rumu: Kris cu tətâ wə du ri mi, ama mum wə ta' gbəgbəŋ um wə du ri.

⁴Kəzin', sôwâ gay' num ta wa gu zə tətâ um, ama mum kə i zə gbəgbəŋ Ifraya. Wə du ɓa mba kə rum, namba tətâ ta', ama kə vari sin mənɪ namba gi du ri, namba ta kə Kris zə gbəgbəŋ Ifraya.

⁵I kənji' tu ri kə tu ri kədan i we, hi wə ta wə du dan mənɪ hi ve nə su? Hi we si, Zezu Kris suk wə vunduk ri, cu ndəna' mi su? La' cu ndəna' mi si, ka hi nde si.

⁶Ama i we, namba cu nde ɗaŋ' mi.

⁷Namba wə o Ifray kədan i gi kwa mə bro' dāw mi. Wə du dan rum, namba cu wə wa' kədan namba ta' i namba gak gi kwa daŋ' mi, ama namba wə wa' kədan i gi kwa mə ɓay, ko sôwâ məsin la' wə mba kar ce' ndə sôwâ məni cu gak gi kwa məsin mi daŋ'ŋ.

⁸Zə namba cu gak gi sin cem kə dan mə kəzin' Ifray mi, ama namba wə gi sin kə ndi.

⁹Namba wə tuk kədam kəri məni namba tətâ ama hi gbəgboŋo. Zə rum, namba wə o Ifray kədan i faŋ sôwâ mə njeŋ ta'a.

¹⁰Zə rum, na wây' dərwa məni nə hay' ri ndəna' kəri məni na seŋ kə ri ɓo, kədan kəri məni na də ke du ri, na də ge dan mə kəcik mi ne kə gbəgboŋ məni Bârî ne nan nə mi, mum ne gbəgboŋ rum ne nan kədan na mi gi də kofo wə du dan məni hi ve, cu kədan na mi dənok mi.

¹¹Mgbaŋ ni nə, daw ba man, i gay' heɓ ye, i keɓ kədan i ta njeŋ, i ve dan məni na har ni kə ndi, i kawvun kə nji mbok nji, gay' heɓ, ɓay Ifray mə kə bə ɓay heɓ də ke kəri.

¹²I kaw jeɓ nji mbok nji kə kaw nji də vunduk kə ba. Raw sôwâ Ifray daŋ' kaw jeɓ ri.

¹³Na wə wa' i ɓay Bârî mba Zezu Kris, kə bə Ifray, ɓay ɓa məni Simbeɗ Ifray wə mba ɓa kə ndi kuni ke kə ri daŋ'ŋ.

Galatie

Galatie 1

- ¹Na Pol, bə sin Kris, sumra' cu kə mə gi nan faŋ bə sin Kris, ko swə məsin mi, ama kə Zezu Kris kə Ba um Ifray mənɪ par num mbə mara.
- ²Daw ba man daŋ' mənɪ wə ti, ɓa kə rin kədan namba sin ɗerwa mənɪ nə hay' kul sôwâ Kris mənɪ gay' wə nya Galasi ɓay in nday ne:
- ³Namba wə wa' i Ba mba Ifray kə Bârî mba Zezu Kris kuni ne ni ɓay kə heɓe.
- ⁴Kris ne tu rum kə tu rum kədan mum mba sid' du kwa mə bro' mba, ɓay kədan mum mba sid' mbə du sôwâ nya mə bro' mə tam mənɪ nə, ce' ndə mənɪ Ba mba Ifray wə wa'a.
- ⁵Mbra' nə ke kə Ifray hâ də hâ! Amen.
- ⁶Kwa gi mi jin' wa ne nan, zə hi ar swə mənɪ ɗe ni kə ɓay mənɪ car mbə hay' Kris, ɓay hi faŋ i ri ga'ri ta hay' dan mə kədam məsinɪ.
- ⁷Njeŋ rum si, Dan mə Kədam məsin cu mi, ama na in ndəna' ne ni zə sôwâ məsin wə wa' kədan handay jin' wa mi ne kə faŋwa Dan mə Kədam mənɪ car mbə hay' Kris.
- ⁸Ama ko swə məsin, ko namba kə tu mba, ko vay sin Ifray mə wafray la' mbə mi ka' Dan mə Kədam məsin cem kə mənɪ namba ka' ne ni nə si, vun nê' də ke wa bə rumu!
- ⁹Namba in dan rum ne ni si, ɓay mgbəŋ ni nə na faŋ dok kəreme: Swə məsin la' mbə mi ka' Dan mə Kədam məsin cem kə mənɪ hi ve nə si, vun nê' də ke wa bə rumu!
- ¹⁰Mgbəŋ ni nə wə du dan rum, na wə keɓ mbra' mə sumra' su? Cu mi! Na wə wa' mbra' mə Ifraya. Na wə keɓ kədan na gi kwa mə kədam tu sumra' su? Na la' wə keɓ kədan na gi kwa mə kədam tu sumra' kərem si, na cu də ke bə sin Kris za' mi.
- ¹¹Daw ba man, na in mi ne: Dan mə Kədam mənɪ na wə ka' nə dan ɗik wa sumra' mə wa nya mənɪ nə cu mi.
- ¹²Na cu fe Dan rum hay' sumra' mi, ɓay swə cu ta' Dan rum ne nan ɗaw mi, ama Zezu Kris kə mənɪ ta' Dan rum ne nana.
- ¹³Hi mun dan kwa mənɪ na ke gi kəri mənɪ na ke ta zə kwata' sôwâ Zuwif: Hi we vari mənɪ na ke gi boni ne kə kul sôwâ Ifray cem cem kə gbəgbəŋ, kə vari mənɪ na ke keɓ kə gbəgbəŋ kədan na nday riki.
- ¹⁴Na pâ zə bâŋ man daŋ' kə ta zə kwata' sôwâ Zuwif, na ke kə sây' juk zə vun fur ba mbri ramba pâ nday daŋ'ŋ.
- ¹⁵Ama wə du ɓay Ifray, mum par nan cop kəri mənɪ na cu vra' mətə', ɓay mum ɗe nan kədan na gi sin zə rumu.

¹⁶Bay kəri məni ri məni mum par nə mbə day, mum ta' Vay um ne nan kədan na ka' Dan mə Kədam məni in dan wa rum nə ne kə sôwâ məni cu zu saŋ sôwâ Zuwif mi, kəri rum, na cu ta ci vun njeŋ dan rum hay' swə dāw mi.

¹⁷Bay na cu ta so Jeruzalem kədan na ci vun sôwâ məni faŋ sum sin Kris cop kə rin kuni mətə', ama kə ri rum sar, na 'ya ta nya Arabi, kəki rum, na faŋ ta so Damas.

¹⁸Kəki rum kim hinji', na faŋ ta so Jeruzalem kədan na də kar Piyer, bay na suk kə rum bəka guḅ wa vatla.

¹⁹Na cu we bə sin Kris məsin dāw mi, say Zakə njər Bârî.

²⁰Dan məni na wây' ne ni nə kəzin', na in mi ne kor Ifray, na cu hay' dan mi.

²¹Kəki rum, na ta nya Siri kə nya Silisi.

²²Wə du ri rum daŋ', raw kul sôwâ Kris məni gay' wə nya Zude cu we nan dāw mi.

²³Handay mun dan məni sôwâ məsin wə in wa rin tawa: «Swə məni ke gi boni ne mba ba' si, mgbaŋ ni nə mum faŋ wə ka' dan məni mum ke keḅ kə gbəgboŋ kədan mum dənoko.»

²⁴Bay handay gi mbra' ne kə Ifray wa dan mana.

Galatie 2

¹Kəki rum kim guḅ wa fədi', na faŋ ta so Jeruzalem kə Barnabas. Na tle Titə kə rin ta'a.

²Na ta han zə Ifray ta' ne nan i a də hana. Wə du ba man kə sôwâ rôwâ, na pay zu Dan mə Kədam məni na wə ka' ne kə sôwâ məni cu zu saŋ sôwâ Zuwif mi ne ndaya. Na cu wa' i sin man məni na gi si, ko məni na wə də gi nə ke uray mi.

³Ko Titə, bây hoḅ man, mum swə Grek, sôwâ cu gi num kə dole kədan nə tagura mi.

⁴Ama dan rum car zə daw ba mba mə bro' məni mbə cok du mba ce' ndə sum kar bəkay kwa, handay wə keḅ kədan handay we dan fe wa tu mba məni namba kə ndi wə du ba mba kə Zezu Kris, bay handay wə keḅ kədan handay mba gi faŋ beke.

⁵Namba cu ar ri ne nday, ko kî mi, zə namba wa' ji Dan mə Kədam nə njeŋ zə ri.

⁶Ama sôwâ məni sôwâ Zuwif wə nday kar ce' ndə sôwâ rôwâ, ko handay la' ma su daŋ', dan rum cu tap nan mi, zə Ifray cu gi sôwâ cem cem mi, sôwâ rôwâ kuni cu ta' kwa mə mbrew ne nan mi.

⁷Zawa, handay we i Ifray ne sin ne nan kədan na ka' Dan mə Kədam ne kə sôwâ məni cu tagura mi, ce' ndə məni mum ne sin ne kə Piyer kədan mum ka' Dan mə Kədam ne kə sum tagura.

⁸Zə ce' ndə məni Simbed' gi Piyer faŋ bə sin Kris zə sôwâ Zuwif, mum gi nan faŋ bə sin Kris zə sôwâ məni cu zu saŋ sôwâ Zuwif mi ta'a.

⁹Zakə, kə Piyer, bay Zaŋ məni sôwâ Zuwif wə nday kar ce' ndə sôwâ rôwâ, handay we si, Ifray ne sin rum ne nana. Zə rum, handay ne ɓa nday ne mba, na kə Barnabas, kədan ta' i namba kawvun mbok nji. Namba də gi sin du sôwâ məni cu zu saŋ sôwâ Zuwif mi, bay handay də gi sin du sôwâ Zuwif.

¹⁰Handay o mba wa dan məni nə tawa: Mə dūmwa sum ca wə du kul sôwâ Kris mə so nday mi, bay na cin vunduk rin wa dan rum kədan na gi ndəna'a.

¹¹Kəri məni Piyer mbə day so Aŋtiyosə, na mgbor num kor sôwâ daŋ', zə mum vi' vari.

¹²Zə kəri rum, Zakə sin sôwâ məsin wə so Aŋtiyosə. Cop sôwâ mbə nday, Piyer ti kwati kə daw ba mba məni cu zu saŋ sôwâ Zuwif mi. Ama kəri məni sôwâ kuni mbə day, mum par tu rum ta rəka, bay mum cu mun dan ti kwati kə nday za' mi. Mum gi ndəna' zə mum ne wəlok sôwâ kuni, zə handay wə du sôwâ məni in i say sôwâ daŋ' tagura.

¹³Daw ba man məsin məni zu saŋ sôwâ Zuwif təŋ kə gi kwa məni Piyer gi nə ta', hā Barnabas kə tu rum, mum ar tu rum kə vur vur ta zə kwa gi nday ta'a.

¹⁴Kəri məni na we i handay cu ta njeŋ ce' ndə dan mə kəzin' wə du Dan mə Kəɗam ta' vari rum ne nday nə mi, na in ne kə Piyer kor sôwâ daŋ'ŋ: «Ha swə Zuwif, ama wə ti, ha ta ce' ndə sôwâ məni cu zu saŋ sôwâ Zuwif mi, ha cu ta ce' ndə swə Zuwif mi: Gi ma ha gak gi sôwâ məni cu zu saŋ sôwâ Zuwif mi ta ce' ndə sôwâ Zuwif su?»

¹⁵Namba kə tu mba, namba vra' Zuwif, namba cu sum gi kwa mə bro' ce' ndə sôwâ məni cu zu saŋ sôwâ Zuwif mi mi.

¹⁶Ama namba we si, Ifray wə gi swə njeŋ kor rum zə bə rum ve Zezu Kris taw sar, cu zə i mum wə ta zə dan dlay mi. Namba ta', namba ve Zezu Kris, bay Ifray gi mba njeŋ kor rum zə namba ve num si, cu zə i namba ta zə dan dlay mi, zə Ifray cu də gi swə ɗaw njeŋ kor rum zə bə rum ta zə dan dlay mi.

¹⁷Ama namba la' wə keɓ kədan namba faŋ sôwâ mə njeŋ kor Ifray zə ɓa mba kə Kris si, bay namba za' i namba ke sum gi kwa mə bro' ce' ndə sôwâ məni cu zu saŋ sôwâ Zuwif mi ɓo, kwa rum wə ta' i Kris nə bə mbə kə kwa mə bro' su? Cu ndəna' mi!

¹⁸Na la' təŋ kə cin dan dlay məni na ke ar nə kərem si, kwa rum wə ta' i na cu ta zə dan dlay mi.

¹⁹Mə na, na mar wə hay' dan dlay si, dan dlay kə məni ci nan kədan na ke kə i zə Ifraya. Na mar kə Kris wa gu.

²⁰Zə rum, na cu kə wa tu rin za' mi, ama Kris kə məni wə suk gbəgbəŋ wa rini. Zə ta məni na wə ta tam, na wə ta kə cin vunduk rin wa Vay Ifray məni bə nan bay mar zə rini.

²¹Na cu vad' bay Ifray mi. Ifray la' gi swə njeŋ kor rum zə bə rum wə ta zə dan dlay kəzə si, ka mar Kris cu kə sin mi.

Galatie 3

- ¹Hi sôwâ nya Galatê, hi laya! Sa nə tle nyî ri su? Na ta' vari mœni Zezu Kris mar wa gu nə ne ni tɔlaka.
- ²Na wa' i i dām dan mœ dāw ni nə vun rini: Hi fe Simbed' mœ Kœlɛŋ zœ hi ta zœ dan dlay su? Ko zœ hi mun Dan mœ Kœdām, bay hi ve Dan rum su?
- ³Hi lay ma ndam su? Hi tœŋ zœ rum kœ Simbed' mœ Kœlɛŋ, mgbaŋ ni nə, hi wa' ndo' vun rum kœ gbœgboŋ tu ri su?
- ⁴Boni daŋ' mœni hi ke ce kuni uray su? Kœzin', dan rum kœ sini.
- ⁵Kœri mœni Ifray ne Simbed' um ne ni, bay gi yew cem cem du ri, mum gi kwa rum zœ hi wœ ta zœ dan dlay su? Ko zœ hi mun Dan mœ Kœdām mœni hi ve Dan rum su?
- ⁶«Ndœna' Abraham ve Ifray, bay Ifray kar num ce' ndœ swœ mœ njeŋ kor rum zœ mum ve numu.»
- ⁷Zœ rum, hi gak we i sôwâ mœni ve Kris, handay daw rawti Abraham.
- ⁸Derwa Ifray ta' cop i Ifray wœ dœ gi sôwâ mœni cu zu saŋ sôwâ Zuwif mi njeŋ kor rum zœ handay ve Kris: Zœ rum, dan rum ta' Dan mœ Kœdām mœni nə ne kœ Abraham: «Ifray dœ kuswa' sôwâ nya daŋ' kœ ru.»
- ⁹Abraham ve dan rum, bay Ifray kuswa' numu. Ndœna' ta', Ifray wœ kuswa' sôwâ daŋ' mœni ve dan um ce' ndœ mœni mum kuswa' Abraham.
- ¹⁰Sôwâ mœni ar tu nday kœ ta zœ dan dlay, handay wœ ta du ndœkar, zœ Dan rum wâŋ' wœ du dœrwa: «Vun nê' wœ wa sa su daŋ' mœni cu ta zœ dan daŋ' mœni wâŋ' wœ du dœrwa dan dlay nə mi.»
- ¹¹Kœ ndi nə daŋ', namba we si, Ifray cu gi swœ njeŋ kor rum zœ bœ rum wœ ta zœ dan dlay mi, zœ Derwa Ifray ini: «Swœ mœni Ifray gi num njeŋ kor rum zœ mum ve num, bœ rum dœ ke kœ nyî mœ dœ hâ.»
- ¹²Ama dan dlay cu car wa dan mœni sôwâ ve nə mi. Zawa, ce' ndœ mœni Dan rum wâŋ' wœ du dœrwa: «Swœ mœni wœ gi kwa daŋ' mœni dan dlay ne vari rum, bœ rum dœ ke kœ nyî mœ dœ hâ zœ rumu.»
- ¹³Kris tumwa mba mbœ du ndœkar mœni wœ mbœ wa sôwâ mœni cu ta zœ dan dlay daŋ' mi kœri mœni mum ra' ndœkar mba wa rum, zœ Dan rum wâŋ' wœ du dœrwa: «Vun nê' wœ wa sa su daŋ' mœni fe mar wa gu.»
- ¹⁴Mum gi ndœna' kœdan kuswa' mœni Ifray kawvun kœ Abraham wa rum nə mbœ wa sôwâ mœni cu zu saŋ sôwâ Zuwif mi zœ Zezu Kris bay zœ namba ve Kris, namba fe Simbed' Ifray mœni Ifray kawvun kœ mba wa rumu.
- ¹⁵Daw ba man, na dœ kœnji' dan rum kœ dan tu sumra'a: Ndœna', kœri mœni swœ dāw kawvun kœ swœ mœsin kœ vari rum, swœ mœsin cu gak dœnok dan rum, ko ge dan mœsin dœ han mi.

¹⁶Ndəna' ta', Ifray kawvun kə Abraham kə vay rawti rumu. Derwa Ifray cu ini: «Kə daw rawti rum» ce' ndə mənɪ mum wə in ne kə sôwâ mə raw mi, derwa Ifray ini: «Kə vay rawti ru» kə ta' swə dāw sar, Kris.

¹⁷Dan mənɪ na wa' kədan na in nə ni na: Ifray kawvun kə Abraham, ɓay mum in i nə də gi kwa rumu. Dan dlay mənɪ mbə kəki dan rum kim kis fədi' kə gu hinji', cu gak dənok dan mənɪ Ifray kawvun wa rum, ko ci dan mənɪ mum in ne kə Abraham nə mi.

¹⁸Zə, kwane mənɪ Ifray ne ce' ndə bayda la' car wa dan dlay si, ka kwane rum cu car wa dan Ifray za' mi. Ama Ifray ta' ɓay um ne kə Abraham zə dan mənɪ mum in ne numu.

¹⁹La' ndəna' si, zə mi Ifray ne dan dlay su? Mum ne dan dlay kədan mum ta' ne kə sôwâ i kwa mənɪ handay wə gi nə suk sây' kwa mənɪ Ifray wə wa', dan dlay rum suk hâ vay rawti Abraham mənɪ Ifray kawvun wa rum nə mbə daya: Daw sin Ifray mə wafray mbə kə dan dlay rum ne kə swə dāw mənɪ Ifray par ce' ndə bə vari.

²⁰Ama bə vari cu kə sin kəri mənɪ swə dāw rum mi, Ifray mum dāw rumu.

²¹Dan rum wa' in i dan dlay suk sây' dan mənɪ Ifray kawvun wa rum nə su? Cu ndəna' mi! Ifray la' ne dan dlay mənɪ sôwâ gak fe nyî kə ndi kəzə si, swə gak faɲ njeɲ kor Ifray zə dan dlay rumu.

²²Ama Derwa Ifray wə in i kwa mə bro' suk gbəgbəɲ wa sôwâ nya daɲ' kədan kwane mənɪ Ifray kawvun wa rum nə də ne kə sôwâ mənɪ ve Zezu Kris.

²³Cop kəri mənɪ ri mənɪ sôwâ gak ve Kris cu mbə mətə', dan dlay kaw mba ce' ndə daɲgay' hâ Ifray də ta' ri rumu.

²⁴Ndəna', dan dlay ke bə ji mba hâ Kris mbə day, kədan Ifray mba də gi njeɲ kor rum zə namba ve numu.

²⁵Mgbəɲ ni nə, ri mənɪ sôwâ gak ve Kris nə mbə si, ɓay namba cu gay' zə bə ji nə za' mi.

²⁶Zə hi ve Kris, Ifray gi ni faɲ daw um wə du ɓa mi kə Zezu Kris.

²⁷Hi daɲ', kəri mənɪ hi fe baptem, hi ɓa kə Kris, ɓay hi ge kpak mə Kris tu ri ce' ndə mənɪ hi wə ge mbrawa.

²⁸Zə rum, sôwâ Zuwif cu cem kə sôwâ mənɪ cu zu saɲ sôwâ Zuwif mi mi, bek cu cem kə swə mə kə wa tu rum mi, njiwkwa cu cem kə rawkwa mi, zə hi daɲ' faɲ dāw wə du ɓa mi kə Zezu Kris.

²⁹Hi la' sôwâ mə Kris si, hi daw rawti Abraham, ɓay Ifray də mi ne bayda mənɪ mum kawvun wa rum na.

Galatie 4

¹Dan məsin mənɪ na wə in nə ni na: Vay mənɪ wə də ti so ba um, kəri mənɪ mum kî ɓo, mum cu cem kə bek mi, ko mum la' bə ti so daɲ'ɲ.

²Kəri məni mum kî ɓo, ba um um ar də ba sôwâ məsin məni wə um ur kə kar zə um hâ ri məni ba um par cin nə mbə daya.

³Ndəna' kə mba ta', kəri məni namba ke ce' ndə dawre', namba ke bek usiya məni gay' kə gbəgboŋ wa nya.

⁴Ama kəri məni ri məni Ifray par cin nə mbə day, mum sin Vay um, ma mə nya məni nə kə məti vra' num, ɓay mum ta zə dan dlay sôwâ Zuwif,

⁵kədan mum tumwa sôwâ məni wə ta zə dan dlay rum, kədan namba də faŋ daw Ifraya.

⁶Ifray sin Simbed Vay um wə vunduk mba kədan mum ta' i hi daw um ɓay Simbed nə wə ini: «Aba, Bəba!»

⁷Ndəna', ha cu bek za' mi, ama ha vay Ifray, ɓay zə ha vay Ifray, mum də wû ne baydā məni mum cin zə daw umu.

⁸Ba' si, hi cu ke we Ifray mi, ɓay hi ke bek zə ifray cem cem məni cu Ifray mə kəzin' mi,

⁹ama mgbaŋ ni nə, hi we Ifray si, pram na ini: Mgbaŋ ni nə Ifray we ni si, gi ma hi faŋ ta zə usiya məni tətâ ɓay cu kə sin mi kuni su? Gi ma hi wa' faŋ bek nday kərem su?

¹⁰Hi wə kar bəka məsin, kə cer məsin, ɓay ri məsin, kə kim məsin ce' ndə kwa mə kə mbra'a.

¹¹Na ne wəlok wa dan mi, zə sin daŋ' məni na ke gi wə du ri nə də ke uraya!

¹²Daw ba man, na o ni: I gi tu ri faŋ ce' ndə na, ce' ndə məni na gi tu rin faŋ ce' ndə hi. Hi cu gi kwa mə bro' hay' rin daw mi.

¹³Hi gak dla' wa dan zə mi na ka' Dan mə Kədam du ri vun kofo su? Na gi sin rum kəri məni na ke kə gaɓa.

¹⁴Gaɓ man ne cik ne ni juk, ama kə ndi nə daŋ', hi cu jed'nan ko vad'nan mi. Zawa, hi ve nan ce' ndə məni na vay sin Ifray mə wafraŋ, ko ce' ndə na Zezu Kris kə tu rumu.

¹⁵Hi ke tuk kədam dle tu si! Mi nə gi ni su? Na gak in dan məni nə wa ri: Vari la' kəta' si, hi də par i ri man ne!

¹⁶Mgbaŋ ni nə, wə du dan mə kəzin' məni na wə ka' du ri nə, na faŋ bə sî ri su?

¹⁷Sây' məni sôwâ kuni kə ndi zə ri cu ɓay mi. Handay wə wa' kədan handay ɓul mbok ri kə rin, kədan hi ta zə nday kə vunduku.

¹⁸Kəzin', ɓay kədan swə ke kə sây' wə vunduk rum wa kwa, kwa rum la' ɓay, cu kə ri məni na wə du ri taw mi, ama kə ri daŋ'ŋ.

¹⁹Daw man, ce' ndə ma wə ce boni kəri məni ta wə vra', na wə ce boni kərem zə ri hâ kədan hi jeŋ du Kris.

²⁰Na wə wa' juk kədan na ke du ri mgbəŋ ni nə, kədan na faŋwa wor dan ge man, zə na wə dīk dan wa ri juku.

²¹Hi sôwâ mənɪ wə wa' ta zə dan dlay, i in ne nan ri'i: Hi cu mun dan mənɪ dan dlay wə in nə mi su?

²²Dan dlay wə in i Abraham kə daw njiwkwa hoɓ, daw vra' kə i bek mə ma rum, bay məsin vra' kə ma mə kəca umu.

²³Vay mənɪ vra' kə i bek mə ma rum, mum vra' kə gbəgbəŋ tu, ama vay mənɪ vra' kə ma mə kəca um, mum vra' kə dan mənɪ Ifray kawvun wa rum na.

²⁴Swə gak mun dan rum ce' ndə kwa ta' kwa: Rawkwa mə hoɓ mənɪ kuni wə ta' dan kawvun mə hoɓo. Agar wə ta' dan kawvun mənɪ Ifray kaw kə Moyizə wa igway' mə də kə Sinay. Ta wə vra' daw sə wə du beke.

²⁵Agar mətɪ wə ta' igway' mə də kə Sinay wə nya Arabi, wə ta' so Jeruzalem mə nya mənɪ nə, mənɪ wə du bek kə sôwâ so rum daŋ' ta'a.

²⁶Ama so Jeruzalem mə wafray, ta kə wa tu sə, bay ta ya mba.

²⁷Zə dərwa Ifray wə ini: «Mə lər, əŋ tuk kədama! Həŋ ma mətɪ cu ce boni vra' daw mi, əŋ ge yi kə tuk kədama! Zə ma mətɪ nji sə jed' sə, ta də vra' daw bayrum pâ ma mətɪ kə nji.»

²⁸Daw ba man, mə hi, hi daw mənɪ vra' kə dan mənɪ Ifray kawvun wa rum nə, ce' ndə Isak.

²⁹Ba' si, vay mənɪ vra' kə gbəgbəŋ tu gi boni ne kə vay mənɪ vra' kə Simbed' Ifray, bay dan rum ndəna' tam ta'a.

³⁰Ama Derwa Ifray wə in ma su? Dan rum wây' wə du dərwa: «A 'way i bek kə vay sə də rəka, zə vay mənɪ vra' kə i bek cu kə vari kədan mum ti so ba um wa nji kə vay mənɪ vra' kə ma mə kəca ba um mi.»

³¹Ndəna' ta', daw ba man, namba cu daw i bek mi, ama namba daw ma mə kəca ba mba.

Galatie 5

¹Kris sid' mba kədan namba ke kə wa tu mba kəzini. Zə rum, i gay' du rum ŋgədiŋ', bay i ji tu ri kədan hi faŋ də du bek za' mi.

²I mun ri'i: Na Pol, na in mi ne: Hi la' ve dan tagura si, Kris cu kə sin zə ri mi.

³Na wə in kərem hay' sa su daŋ' mənɪ wə ar tu rum zə tagura, say bə rum nə ta zə dan dlay daŋ'ŋ.

⁴Hi sôwâ mənɪ wə keɓ kədan hi faŋ njeŋ kor Ifray kə ta zə dan dlay, hi bul nji kə Kris si, bay hi wur du bay Ifray ta rəka.

- ⁵Mə namba, namba wə njay vunduk mba i Ifray də mba gi faŋ njeŋ kor rum, namba wə ji kwa rum kə gbəgboŋ Simbed mə Kələŋ mənɪ wə gi sin zə namba ve Kris.
- ⁶Zə namba la' ɓa ɗaw kə Zezu Kris si, ko namba la' tagura, ko namba la' cu tagura mi, dan rum cu kə mbra' mi, dan mə kə mbra' rum, say namba ar dan mənɪ namba ve nə gi sin kə ba.
- ⁷Hi ke wə ta njeŋe. Sa nə faŋ tak ni dan ta zə dan mə kəzin' nə su?
- ⁸Dan mənɪ handay in ne ni kədan mi vi', dan rum cu car mbə hay' Ifray mənɪ ɗe ni nə mi.
- ⁹Ce' ndə mənɪ sôwâ wə ini: «Kwa mə hulum fur kî də hulum fur ɗaŋ'ŋ.»
- ¹⁰Ama Bârî ne vari ne nan kədan na cin vunduk rin wa ri i hi cu də ɗik dan cem kə rin mi. Ama swə mənɪ wə mi jin' wa ne nə, ko mum sa su, Ifray də ɓok dan wa rumu.
- ¹¹Daw ba man, mə na, na la' wə ka' i say sôwâ tagura ɓo si, zə mi sôwâ wə gi boni man ne ɓo su? Dan rum la' kəzin' si, dan mənɪ na wə ka' wa Kris mənɪ sôwâ gay' num ta wa gu nə cu də ke kwa dle wa sem ɗaw mi.
- ¹²Na wə wa' i sôwâ mənɪ wə mi jin' wa ne kuni ta də kofo kə sin nday, say kuni par hul' tu ndaya!
- ¹³Daw ba man, mə hi, Ifray ɗe ni kədan hi ke kə wa tu ri. Ama zə hi fe wa tu ri si, i ar tu ri ta zə kwa səna' kpak tu ri mi! Zawa, i jin nji mbok nji kə ba.
- ¹⁴Zə dan dlay ɗaŋ' ɓawa wə wa dan mə ɗaw mənɪ na: «A bə jik wû ce' ndə mənɪ ha wə bə tu ru.»
- ¹⁵Ama hi la' wə ti nji kə se' ɓay kwâ' nji kə njike sem ce' ndə kwa gop si, i kaw wa ri: La' cu ndəna' mi si, hi də ɗənok nji mbok nji.
- ¹⁶Dan mənɪ na wə wa' kədan na in mi ne nə ni na: I ar Simbed Ifray ta kə ri, ɓay i ta zə kwa səna' kpak tu ri mi.
- ¹⁷Zə kpak tu mba wə səna' kwa mənɪ Simbed mə Kələŋ cu wə bə nə mi, ɓay Simbed mə Kələŋ wə səna' kwa mənɪ kpak tu mba cu wə bə mi. Handay wə jak wa nji mbok nji, zə rum, hi cu gak gi kwa mənɪ hi wə wa' nə mi.
- ¹⁸Simbed la' wə ta kə ri si, dan dlay cu kə gbəgboŋ wa ri za' mi.
- ¹⁹Namba we kwa mənɪ kpak tu wə gi nə si: gi ghəghay, gi kwa mə kə day, gi kwa mə kə zur dan zur,
- ²⁰ta zə ifray mə vun fur, kaw hwa', sî sôwâ, dle vun, gi sây', tle bak, gi kwa kədan mum za' mbra' kə ndi, dan kawvun,
- ²¹səna' kwa, gal kə sum, ru mə bro', kə sin məsin mənɪ ra' nji kə sin mənɪ kuna. Na mi har mgbaŋ ni nə ce' ndə mənɪ na har ni vun kofo: Sôwâ mənɪ wə gi ndəna', handay cu də gay' wə ri mənɪ Ifray wə də suk jwə wa sôwâ um nə mi.

²²Ama kwa mēni Simbed' wə ne nə ni na: bə, kəɗam, heɓ, red'vunduk, gi sin mə ɓay, ɓay, njeɲ,

²³'yeɲ, kə tak tu. Dan dlay cu wa kwa mə ndani kuni mi.

²⁴Sôwâ mēni ta zə Zezu Kris ci kpak tu nday kə kwa səna' kpak tu nday daɲ' kə mara.

²⁵Simbed' ne nyî ne mba, say nə ta kə mba ta'a.

²⁶Mə mbra' tu mba mi, mə ra' bak kə nji mbok nji, ko gi sây' kə nji mbok nji mi.

Galatie 6

¹Daw ba man, swə ɗaw du ri la' za' swə mēsin du ri nde du kwa mə bro' si, hi sôwâ mēni kə Simbed' Ifray, i ɗam ɓa rum cin vari mə njeɲ, ama i gi kwa rum kə kəɗama. Bay na wə in ne kə swə ɗaw ɗaw daɲ' du ri: A ji tu ru kəɗan kwa mə bro' nə ɓu nu mɛta'a.

²I kawɓa nji mbok nji kə ra' cik wa nji. Kəri mēni hi wə gi ndəna', ka hi wə ta zə dan dlay Kris.

³Swə la' wə ɗik kə tu rum i mum kə mbra' si, mum swə mə uray na, ɓay mum wə ɓu tu rumu.

⁴Say swə ɗaw ɗaw daɲ' nə kar sin gi um kə tu rumu. Sin um la' ɓay si, mum gak tuk kəɗam kə ndi, dan kəɲji' sin um kə sin sôwâ mēsin.

⁵Zə swə ɗaw ɗaw daɲ' nə tle kwazi' um kə tu rumu.

⁶Swə mēni wə wum Dan mə Kəɗam, say bə rum nə ɓul kwa mə ɓay um daɲ' kə swə mēni wə um ta' ne.

⁷I vi' tu ri mi: Swə cu gak ru Ifray mi. Zə kwa mēni swə jo', mum də ɓawa kwa rum ta'a.

⁸Mum la' jo' kwa mēni wə kəɗam kpak tu rum si, kpak tu rum də fe mara: Ama mum la' jo' kwa mēni wə kəɗam tu Simbed' si, Simbed' də um ne nyî mə də hâ.

⁹Mə ar gi sin mə ɓay mi. Zə namba la' cu ar gi rum mi si, namba də ɓawa kwa rum kəri mēni ri rum wə də mba.

¹⁰Ndəna' ta', vari la' kəta' si, mə gi sin mə ɓay hay' sôwâ daɲ', ɓay pâ daɲ' rum, mə gi sin mə ɓay hay' kul sôwâ mēni ve Kris.

¹¹I kar kwa wây' rum faɲ rôwâ, zə mgbaɲ ni nə, na wây' kwa rum kə ɓa rini!

¹²Sôwâ mēni wə wa' kəɗan handay mi gi tagura kə dole, handay sôwâ mēni wə gi kwa mēni kəɗam tu sumra' ɓay mbra' tu ndaya. Ama handay wə gi kwa rum ndəna' zə handay cu bə i sôwâ gi boni ne nday zə handay ve i siɗ nə kə Kris mēni mar wa gu.

¹³Sôwâ mēni wə ta zə dan tagura, handay cu ta zə dan dlay kə tu nday mi. Handay wə wa' i hi tagura kəɗan handay gak mbra' tu nday wa ri zə hi ar tu ri ne nday ɓay handay tagura ri.

¹⁴Mə na, na wə wa' mbra' tu rin kə gu gay' Bârî mba Zezu Kris sara. Zə kəri mənî Zezu mar wa gu, kwa nya mar hay' rin si, ɓay na mar hay' kwa nya si ta'a.

¹⁵Ko na la' tagura, ko na la' cu tagura mi, dan rum cu kə mbra' mi, dan mə kə mbra', say na vra' kə mbrewe.

¹⁶Na wə in ne kə sôwâ daŋ' mənî wə ta zə dan rum, na wə wa' i heɓ Ifray kə we ca um kuni ke kə nday, ɓay ke kə sôwâ Ifray daŋ'ŋ.

¹⁷Daka tam sar, na cu wa' i swə nə cik nan za' mi, zə tan wur mənî na kə ndi wə tu rin kuni wə ta' i na nə mə Zezu.

¹⁸Daw ba man, na wə wa' i ɓay Bârî mba Zezu Kris nə ke kə ri daŋ'ŋ. Amen.

Ephèse

Ephèse 1

¹Na Pol, wə du bə Ifray, mum par nan kədan na ke vay sin Zezu Kris. Na wây' dərwa mənɪ nə hay' kul sôwâ Ifray mənɪ gay' wə so Efezə, sôwâ mənɪ njeŋ wə du ɓa nday kə Zezu Kris.

²Na wə wa' i Ba mba Ifray kə Bârî mba Zezu Kris kuni ne ni ɓay kə hebe.

³Mə bur Ifray Ba Bârî mba Zezu Kris: Mum kuswa' mba wə du ɓa mba kə Kris kə mba kuswa' kə kuswa' daŋ' mənɪ car mbə hay' Ifray mə wafraya.

⁴Zə cop kəri mənɪ Ifray cu gi nya mətə', mum da' mba kədan namba ke ɓay ɓay dan dan mə bro' kor rum, wə du bə Ifray,

⁵mum gila' dan rum cop i mum də mba gi faŋ daw um kə Zezu Kris. Mum wa' gi ndəna' zə kwa rum kədam tu rumu.

⁶Zə rum, mə bur Ifray zə ɓay um mə mbri mənɪ mum ne mba ɓayrum kə Vay um mənɪ mum ba.

⁷Zə Ifray tumwa mba kə vrum kwa mə bro' mba kə mar Kris. Ndəna', mum ta' ɓay um mə mbri

⁸mənɪ mum ne mba ɓayrumu. Wə du gwet Ifray kə kwawe um,

⁹mum ta' dan dɪk um mənɪ ke pe' nə ne mba. Mum gila' dan rum cop kədan mum gi dan rum kə Kris.

¹⁰Dan mənɪ Ifray wə də gi kə ndo' vun nya nə ni na: Mum wə də ɓa kwa daŋ' mənɪ wə wafray kə wa nya wə zə jwə dāwa. Mum nə Kris.

¹¹Wə du ɓa mba kə Kris, namba faŋ daw cava Ifraya. Zə wə du dan mənɪ Ifray gila' rum ɓa' si, mum da' mba, ɓay Ifray wə gi kwa daŋ' ce' ndə mənɪ mum gila' dan rum ɓay mum wa' kə tu rumu.

¹²Zə rum, namba sôwâ mənɪ cin vunduk mba wa Kris cop kə sôwâ məsin, mə bur Ifray zə mum kə mbra'a!

¹³Hi ta', kəri mənɪ hi mun dan mə kəzin', Dan mə Kədam mənɪ mbə ne ni sid, hi ve Kris, ɓay kəri rum, Ifray cin lamba um wa ri kə mi ne Simbed' um mənɪ mum ke kawvun wa rum na,

¹⁴Simbed' nə bə jeksem mba wə du kwa mə ɓay mənɪ Ifray in i mum də ne kə sôwâ umu. Simbed' nə mba ta' ne njeŋ i namba kwa mə ɓay rum kəri mənɪ Ifray də tumwa mba kə ndo' vun rumu. Zə rum, mə bur Ifray zə mum kə mbra'a!

¹⁵Zə rum, daka kəri mənɪ na mun dan wa dan vari mənɪ hi ve Bârî mba Zezu, kə dan bə mi mənɪ hi bə sôwâ mə kəleŋ daŋ' kə ndi,

¹⁶na cu ar gi soko ne kə Ifray wa ri mi. Na wə dɪk dan wa ri kəri mənɪ na wə in dan kə Ifraya.

¹⁷Bay na wə o Ifray mə Bârî mba Zezu Kris, Ba um mə kə mbra', kədan nə ne ni Simbed'um mənɪ də mi gi mun zu kwa bay mi ta' Ifray kədan hi də um we.

¹⁸Na wə um o kədan nə dɛri mə bu wə vunduk ri kədan hi we kwa mənɪ Ifray dɛ ni kədan hi njay vunduk ri wa rum, bay kədan hi we bayda mə mbri mənɪ mum cin zə sôwâ um,

¹⁹bay kədan hi we gbəgbonj mənɪ Ifray ne mba, sôwâ mənɪ ve numu. Gbəgbonj rum wa nji daw kə gbəgbonj mənɪ Ifray ta' kə gbəgbonj

²⁰kəri mənɪ mum par Kris mbə mar, bay cin num ba fun rum wafraya.

²¹Wə han, Ifray cin Kris wa jwə danj', wa mbra' danj', wa gbəgbonj danj', wa sôwâ rôwâ danj', bay wa semde məsin danj' mənɪ wə ci' wa nya, cu wa nya mə tam taw mi, ama wə wa nya mənɪ wə də mbə nə ta'a.

²²Ifray njay kwa danj' wə zə sem Kris, bay mum cin Kris wa kul sôwâ Kris ce' ndə jwə mə toŋ,

²³kul sôwâ Kris nə tu Kris, Kris mənɪ wə ri danj', mum wə du kul sôwâ Kris ta'a.

Ephèse 2

¹Ba' si, hi ke mar zə sin mə bro' kə kwa mə bro' mi,

²kəri rum, hi ke wə ta ce' ndə sôwâ nya mənɪ na. Hi ke wə mun vun jwə gam, usiya mənɪ suk jwə wa sôwâ mə dan mun vun Ifraya.

³Namba danj', namba ke ce' ndə handay ta', namba ke wə ta kə kwa sɛna' kpak tu mba, bay namba ke wə gi kwa mənɪ kpak tu mba kə dan dɪk mba wə wa'a: Zə rum, bak Ifray ke suk wa mba, ce' ndə mənɪ bak rum suk wa sôwâ məsin ta'a.

⁴Ama Ifray we ca wa mba bayrum, bay mum bə mba dle tu si.

⁵Zə rum, kəri mənɪ namba ke mar zə sin mə bro' mba, mum faŋ car i mba kə Kris, hi fe sid' zə bay Ifray,

⁶wə du ba mba kə Zezu Kris, Ifray ra' mba mbə mar kə rum, kədan namba də ti jwə kə rum wafraya.

⁷Ifray gi ndəna' kədan mum ta' bay um mə mbri wə ri danj' kə sin mə bay um mənɪ mum ta' ne mba kə Zezu Kris.

⁸Zə hi sid' zə bay Ifray, bay zə hi ve Kris. Sid' rum cu car mbə hay' ri mi, mum nə kwane Ifray na.

⁹Mum cu mbə zə sin mə bay mi mi. Ndəna', swə cu gak mbra' tu rum wa rum mi.

¹⁰Zə Ifray kə mənɪ gi mba. Wə du ba mba kə Zezu Kris, mum gi mba kədan namba gi sin mə bay mənɪ mum gila' nday cop kədan namba nday gi.

¹¹Hi sôwâ mœni cu tagura mi, handay wœ mi dœ kœ jœb, bay handay wœ dœ tu nday kœ sum tagura (zœ kwa mœni sôwâ wœ gi wœ tu nday), i dla' wa dan mœni hi ke ba' si:

¹²Kœri rum, hi ke seŋ kœ Kris, hi ke sôwâ rœkway, bay hi cu ke wœ du sôwâ mœni Ifray da' kuni mi. Hi cu ke wœ du dan kawvun Ifray mœni mum kawvun wa rum kœ sôwâ um kuni mi. Hi ke gay' wœ du sôwâ nya, hi cu ke kœ kwa mœni hi gak njay vunduk ri wa rum mi, bay hi cu ke kœ Ifray mi.

¹³Ama mgbaŋ ni nœ, wœ du ba mi kœ Zezu Kris, hi sôwâ mœni ke seŋ, hi faŋ mbœ hœre' zœ mar Kris.

¹⁴Zœ Kris kœ tu rum kœ mœni ne mba heb kœ gi sôwâ Zuwif kœ sôwâ mœni cu zu saŋ sôwâ Zuwif mi faŋ sôwâ mœ dœwa. Kœ mar Kris, mum bru la' tu ruœ mœni ke tak i nday bay ke gi nday faŋ sum sî nji.

¹⁵Mum dœnok dan dlay sôwâ Zuwif kœ dan daŋ' mœni wœ han, kœdan mum gi zu saŋ mœ hoœ kuni faŋ sôwâ mœ mbrew dœw wœ du ba nday kœ rumu. Ndœna', mum cin heb du ndaya.

¹⁶Kœ mar Kris wa gu, mum tle sî mœni ke mbok nday nœ ta rœka: Kœ mar um, mum ba zu saŋ mœ hoœ kuni faŋ tu dœw, bay gila' nday kœ Ifraya.

¹⁷Ndœna', Kris mbœ ka' Dan mœ Kœdam mœni wœ ne heb nœ ne ni, hi sôwâ mœni cu zu saŋ sôwâ Zuwif mi, mœni ke seŋ kœ Ifray, bay ne kœ sôwâ Zuwif mœni ke hœre' kœ rum ta'a.

¹⁸Zœ Kris, namba daŋ', sôwâ Zuwif kœ sôwâ mœni cu zu saŋ sôwâ Zuwif mi, namba gak mbœ kor Ba mba kœ vari Simbed' Ifray mœni wœ kawba mba.

¹⁹Zœ rum, hi sôwâ mœni cu zu saŋ sôwâ Zuwif mi, hi cu rœkway kœ sôwâ mœni wœ gaŋ kœ sem za' mi, bay hi faŋ sôwâ cava Ifraya.

²⁰Hi ta', hi gway' wœ du so mœni wœ dam dœ fray wa tor zu so mœni sum sin Kris kœ sum ka' dan kuni tor, Zezu Kris kœ tu rum, mum gway' mœ kaw dleŋ so rumu.

²¹Mum kœ mœni kaw gbœgboŋ so rum daŋ', bay mum kœ mœni wœ gi so rum mbud' dœ kofo du Bârî kœdan faŋ so bur Ifraya.

²²Wœ du ba mi kœ rum, hi ta', hi gway' wœ du so mœni wœ dam dœ fray kœdan hi kœ sôwâ mœsin daŋ' faŋ so mœni Ifray wœ suk han kœ Simbed' umu.

Ephèse 3

¹Zœ rum, na wœ o Ifray, na Pol mœni daŋgay' mœ Zezu Kris zœ ri, hi sôwâ mœni cu zu saŋ sôwâ Zuwif mi.

²Kœzin', hi mun dan sin mœni Ifray ne nan wœ du bay um kœdan na gi zœ ri nœ si.

³Ifray ta' dan dîk um mœni ke pe' nœ ne nan, bay na wœy' dan wa rum kî zœ ri.

⁴Bay kœri mœni hi wœ dœ in dan rum, hi gak we kwa mœni na we dan dîk um mœni ke pe' wa Kris.

⁵Ba' si, Ifray cu ta' dan dik um mēni ke pe' nē ne kē sōwā mi, ama mgbaŋ ni nē, kē Simbed' mē Kēlēŋ, Ifray ta' dan dik rum ne kē sum sin um kē sum ka' dan um mē kēlēŋe.

⁶Dan dik rum nē ni na: Kē vari Dan mē Kēdam, sōwā mēni cu zu saŋ sōwā Zuwif mi dē ti bayda Ifray wa nji kē sōwā Zuwif. Handay kwa tu mē dāw, bay handay wē du dan mēni Ifray kawvun wa rum kē Zezu Kris.

⁷Wē du gbəgbəŋ Ifray, mum ne kwane mēni car mbə du bay um ne nana. Zē rum, na faŋ bē sin zē Dan mē Kēdama.

⁸Na kī pā sōwā mē dāre' wē du raw sōwā Ifray daŋ', ama kē ndi nē daŋ', Ifray dē nan kēdan na ka' Dan mē Kēdam mēni in dan wa kwa mē bay Kris mē dan ndo' nē ne kē sōwā mēni cu zu saŋ sōwā Zuwif mi,

⁹bay kēdan na gi sōwā daŋ' we vari mēni dan dik Ifray mēni ke pe' nē wē dē gi. Ifray mēni gi kwa daŋ', mum pe' dan dik rum daka tēŋ zu rum,

¹⁰kēdan mgbaŋ ni nē, usiya mēni gay' jwē kē gbəgbəŋ mbok fray kē nya kuni gak we gwet Ifray cem cem daŋ' zē kul sōwā Kris.

¹¹Ifray gi ndəna' ce' ndə mēni mum wa' daka tēŋ zu rum, mum gi kwa rum kē Bārī mba Zezu Kris.

¹²Wē du ba mba kē rum, bay zē namba ve num, namba kē vari kēdan namba mbə kor Ifray kē vunduk mē dāwa.

¹³Zē rum, na wē mi o kēdan i ar vunduk ri par ni zē boni mēni na wē ce zē ri nē mi. Boni rum dē faŋ mbra' zē ri.

¹⁴Zē rum, na kuduk nya kor Ba mba kē vun cingit,

¹⁵mēni sōwā mē wafraŋ kē mē wa nya daŋ' wē fe semdē nday mē kēzin' wē hay' rumu.

¹⁶Na wē o Ifray kēdan, wē du mbra' um mē mbri, mum dē jēŋ vunduk ri kē gbəgbəŋ Simbed' um,

¹⁷bay kēdan Kris suk wē vunduk ri zē hi ve numu. Na wē o Ifray kēdan nē gi ni pe tlor bay gay' ŋgədiŋ' wē du bē,

¹⁸bay kēdan hi kē raw sōwā Ifray daŋ', hi gak mun zu dan bē Kris: Bwi rum, jərak rum, mbud' rum, kē ciriŋ rumu.

¹⁹Awo, na wē wa' i i we bē Kris kēzin', swē dāw cu gak we bē rum cet mi, bay ndəna', vunduk ri dē nyen kē kwa mē Ifray daŋ'ŋ.

²⁰Mbra' wē hay' swē mēni kē gbəgbəŋ kēdan mum gi kwa mēni pā kwa daŋ' mēni namba wē o ko wē dik kē gbəgbəŋ mēni wē gi sin wē vunduk mba.

²¹Mbra' nē ke kē Ifray wē du kul sōwā Kris bay wē du Zezu Kris kē ri daŋ' bay dē hā! Amen.

Ephèse 4

- ¹Zə rum, na daŋgay' zə na wə gi sin zə Bârî, na wə mi hata: I ta ce' ndə mənî Ifray wə wa' kəri mənî mum dē ni.
- ²I hom tu ri, i gay' 'yeŋ, i red'vunduk ri bəka daŋ', i rom nji kə ba.
- ³I gi tu ri kədan i gay' du ba dāw mənî Simbed' Ifray wə mi ba kə ndi kə heḅ mənî wə mi jew kə nji mbok nji.
- ⁴Tu nə dāw, Simbed' mə Kəleŋ nə dāw, ndəna' ta', sin mənî Ifray dē ni kədan hi njay vunduk ri wa rum nə dāwa.
- ⁵Bârî nə dāw, dan mənî namba ve nə dāw, baptem nə dāw,
- ⁶Ifray mənî Ba sôwâ daŋ' nə dāw, mum kə mənî wə suk jwə wa sôwâ daŋ', mum wə gi sin kə sôwâ daŋ', ḅay mum kə mənî wə suk du sôwâ daŋ'ŋ.
- ⁷Kris ne kwane mə ḅay ne kə sôwâ dāw dāw daŋ' du mba ce' ndə mənî mum kənji' ne bə Kris.
- ⁸Ce' ndə mənî ḁerwa Ifray wə ini: «Kəri mənî ha ur ta wafray, ha ra' daŋgay' 'ya ta kə nday ḅay sôwâ ne kwa ne nu, ko kə sôwâ mənî cu ke ve nu mi daŋ'ŋ.»
- ⁹Mum ur ta wafraya! Wa' dan in ma su? Dan rum wa' dan in i mum dam ta ri mə zə nya mə ciriŋ copo.
- ¹⁰Swə mənî dam ta ri mə zə nya mə ciriŋ, mum kə mənî ur ta wafray seŋ kədan mum də nyen wə ri daŋ'ŋ.
- ¹¹Mum kə mənî ne kwane ne kə sôwâ, mum ne kə sôwâ məsin kədan handay ke sum sin, ne kə məsin kədan handay ke sum ka' dan, ne kə məsin kədan handay ke sum pla' Dan mə Kədam, ne kə məsin kədan handay ke sum ji sôwâ kə sum ta' kwa,
- ¹²mum gi ndəna', kədan handay gila' raw sôwâ Ifray kədan handay gi sin Kris, ḅay kədan tu Kris jeŋ də kofo.
- ¹³Ndəna', namba daŋ' də faŋ dāw du dan mənî namba ve kə kwawe mənî namba kə ndi wa Vay Ifray, namba də faŋ sum rôwâ mənî wə jeŋ də kofo kədan namba day vun ndo' jeŋ mə Kris.
- ¹⁴Kəri rum, namba cu də ke dawre' mənî kwata' sum ta' kwa mə bro' wə nday pla' də ga' ti ga' ti ce' ndə jo mbi wə ra' kwa, ko simbed' wə pla' kwa za' mi, sum ta' kwa mə bro' kuni wə ḅu sôwâ də du dan mə bro' kə kol mənî handay wə gi.
- ¹⁵Zawa, kə ka' dan mə kəzin' kə bə, namba də jeŋ də kofo du kwa daŋ', hâ day Kris mənî mum wa.
- ¹⁶Zə Kris, kwa tu cem cem tləḅa ta tu nji ŋgəḁiŋ', ḅay tu daŋ' tləḅa ta tu nji kə vun fur tu mənî tu nə kə ndi, ndəna', kəri mənî kwa tu dāw dāw daŋ' wə gi sin kə vari rum, tu daŋ' wə mbud' ḅay jeŋ də kofo kə ba.

¹⁷Dan mēni na wə in ɓay ka' kə semɗe Bârî nē ni na: I ta ce' ndə sôwâ mēni cu we Kris mi za' mi, handay sôwâ mēni wə ta zə dan dîk nday mə uraya.

¹⁸Kwawe nday wə ri mə ura', ɓay handay cu kə nyî mə də hâ mēni Ifray wə ne nē mi, zə handay cu we kwa mēsin mi, ɓay wa nday ɓokrok ɓayrumu.

¹⁹Handay cu kə zur mi, handay ar tu nday gi kwa mə kə zur dan zur, ɓay handay wə gi sin mə bro' daŋ' dan tak tu ndaya.

²⁰Dan mēni hi wum wa Kris nē cu ndəna' mi,

²¹kəzin', hi mun dan wa Kris, ɓay zə hi sôwâ Kris, sôwâ ta' kwa mə kəzin' wa Zezu nē ne ni.

²²Zə rum, i ulay' kpak tu ri mə kəmba mēni hi ke wə ta kə ndi ɓa' nē si, kpak tu rum mēni ke wə mi dənok kə kwa sēna' um mə bro'o.

²³Say i faŋ vunduk ri kə dan dîk mi kə mbrewē.

²⁴I ge kpak tu mə mbrew mēni Ifray ri ra' nji kə rum nē wə tu ri, kpak tu rum wə ta' tu rum wə du ta mə kəzin' ɓay kəleŋe.

²⁵Zə rum, i ar hay dan si: Na wə wa' i swə dāw dāw daŋ' nē in dan mə kəzin' hay' jik um, zə namba daŋ' kwa tu mə dāwa.

²⁶Hi la' tle bak si, i kaw wa ri kədan i gi kwa mə bro' kə ndi mi. I za' kə bak hâ fəta no' wa mi.

²⁷I ar ri ne kə Satan mi.

²⁸Na wə wa' i swə mēni wə kəy hura za' mi, ɓay pram nē gi sin kədan nē ur tu rum kə vari mə njeŋ, ɓay kədan nē kawɓa sum ca ta'a.

²⁹I ge dan mə bro' ko dāw mi. Say i ge dan mə ɓay sar, dan mēni wə gak kawɓa sôwâ mēsin kədan handay jeŋ də kofo wə du dan mēni handay ve, ɓay so' mē' vunduk nday, ndəna', hi gi kwa mə ɓay hay' sôwâ mēni wə mun dan mi.

³⁰I gi Simbed Ifray dîk dan mi, zə Ifray cin Simbed nē wa ri ce' ndə lamba. Simbed nē bə jeksem mba kədan Ifray tumwa mba wə du bəka mēni wə də mba.

³¹I ar dan dîk mə bro', bak, ra' vunduk, do dan, ge dan mə bro', kə kwa mə bro' cem cem mēni wə vunduk ri də rəka.

³²Zawa, i gi sin mə ɓay, ɓay i we ca wa nji mbok nji, i vrum kwa mə bro' mēni hi wə gi kə nji mbok nji, ce' ndə mēni Ifray wə vrum kwa mə bro' mēni hi wə gi nē kə Kris.

Ephèse 5

¹Zə hi daw mēni Ifray wə mi bə, i gi tu ri kədan i ke ce' ndə mumu.

²Na wə wa' i i ta kə bə ce' ndə Kris mēni bə mba, ɓay ne tu rum zə mba ce' ndə kwane kə kwa po' fur mēni wə sî kədam tu Ifraya.

- ³Hi wə du raw sôwâ Ifray, zə rum, cu ɓay kədan kwa mənɪ kuni ke du ri mi: Ghəghay, ko sin mə bro', ko sənə' kwa.
- ⁴Cu ɓay kədan hi ge dan mə bro', mə kə zur, ko dan mə lay, ko dan mə uray du ri mətə'a: Zawa, i gi soko ne kə Ifraya.
- ⁵I we dan mənɪ nə kə ɓayrum, bə gi ghəghay, ko bə gi sin mə bro', ko bə sənə' kwa, zə sənə' kwa nə ta zə ifray məsin cem cem na, handay cu də cok wə ri mənɪ Kris kə Ifray wə də suk jwə han nə mi.
- ⁶I ar swə ɗaw ɓu ni kə dan mə lay mi: Zə dan rum, bak Ifray wə də mbə wa sôwâ mənɪ cu mun vun rum mi.
- ⁷Zə rum, i kawvun kə sôwâ mə ndani kuni mi.
- ⁸Ba' si, hi ke wə du ri mə ura', ama mgbəŋ ni nə, wə du ɓa mi kə Bârî, hi wə du ri mə ɓu. Zə rum, i ta ce' ndə sôwâ mənɪ wə ta wə ri mə ɓu.
- ⁹Zə ri mə ɓu wə ne kwa mə ɓay cem cem, dan mə njeŋ, ɓay dan mə kəzini.
- ¹⁰I gi tu ri kədan i we kwa mənɪ wə kəɗam tu Bârî.
- ¹¹I ɓa kə sôwâ mənɪ wə gi sin mə uray mənɪ wə du ri mə ura' kuni mi. Zawa, i wod' sin rum də rəka wə du ri mə ɓu.
- ¹²Kə zur kədan namba ge dan wa sin mənɪ sôwâ mə ndani kuni wə gi han wə ri mə ura'a.
- ¹³Kəri mənɪ namba wod' sin rum ɗaŋ' də rəka wə ri mə ɓu, sôwâ gak we kpak tu nday təlaka.
- ¹⁴Zə kwa ɗaŋ' mənɪ sôwâ wod' ta rəka wə faŋ ri mə ɓu. Zə rum, dan rum wə ini: «Bə nde sen, a dla' sen ye! A car mbə du sum mar ye! ʔay Kris də ɗəri mə ɓu wû ne.»
- ¹⁵Zə rum, i kaw wa ri wə vari ta mi: I ta ce' ndə sum dan we kwa mi, ama ce' ndə sum gwete.
- ¹⁶I gi kwa mə ɓay wə ri ɗaŋ' mənɪ wə mbə kor ri, zə bəka mənɪ namba wə han tam nə bro'o.
- ¹⁷Zə rum, i ke lay mi, ama i gi tu ri kədan i we kwa mənɪ Bârî wə wa' i i gi na.
- ¹⁸I gal kə sum mi, kwa rum wə də mi ɗənok, zawa, i ar Simbed' mə Kələŋ nyen vunduk ri.
- ¹⁹I ge dan kə nji mbok nji kə nyem, kə nyem mə gi mbra', ɓay nyem mənɪ Simbed' Ifray wə mi ne. I bur Bârî kə ɗā nyem kə kəɗam mənɪ wə vunduk ri.
- ²⁰I gi soko ne kə Ba mi Ifray kəri ɗaŋ' ɓay zə kwa ɗaŋ' kə semɗe Bârî mba Zezu Kris.
- ²¹I mun vun nji mbok nji zə hi wə ô Kris.
- ²²Hi rawkwa, i mun vun njiwkwa mi ce' ndə mənɪ hi wə mun vun Bârî.

²³Zə səmanji suk jwə wa ma rum ce' ndə mənɪ Kris suk jwə wa kul sôwâ um, Kris kə tu rum, mum Bə Sid' kul sôwâ um mənɪ tu rumu.

²⁴Ndəna' ta', say rawkwa kuni mun vun njiwkwa nday ce' ndə mənɪ kul sôwâ Kris wə mun vun Kris.

²⁵Hi njiwkwa, i bə rawkwa ri ce' ndə mənɪ Kris bə kul sôwâ um bay ne tu rum zə ndaya.

²⁶Mum gi ndəna', kədan mum gi kul sôwâ um faɲ bay zə Ifray kə nday kol kə mbi bay kə dan um,

²⁷zə mum wə wa' kədan eklisiya um gay' kor rum ce' ndə ma mə bay, dan day, ko dan kaw kaɲ, ko dan kwa mə bro' məsin, ama bay bay dan tan wuru.

²⁸Zə rum, say njiwkwa kuni bə rawkwa nday ce' ndə mənɪ handay wə bə tu ndaya. Swə mənɪ bə ma rum, mum wə bə tu rumu.

²⁹Kəzin', swə daw cu gak sî tu rum mi. Zawa, mum ur tu rum kə ji tu rum ce' ndə mənɪ Kris wə gi kə kul sôwâ umu.

³⁰Zə namba kwa tu Kris na.

³¹Ce' ndə mənɪ Dan rum wây' wə du dərwa: «Zə rum, səmanji də 'ya ar ba um kə ya um kədan mum tləba kə ma rum, bay handay hoɓ jak də faɲ tu dawə.»

³²Dan mə kəzin' mə mbri pe' kəta' wə du dan rumu: Mə na, na wə dɪk i dan rum wə in dan wa Kris kə kul sôwâ umu.

³³Ama dan rum wə in dan wa ri ta', say səmanji daw daw daɲ' nə bə ma rum, bay say ma daw daw daɲ' tə mbâ nji sa.

Ephèse 6

¹Hi daw, i mun vun sôwâ mi zə hi wə ta zə Bârî, zə dan rum njeɲe.

²Dan dlay mənɪ wə ini: «A mbâ ba wû kə ya wû», mum nə dan dlay mə vun kofo mənɪ Ifray kawvun mənɪ nə ta wa rumu:

³«Kədan a tuk kədam bay kədan bəka nyî wû nə ke jərak wa nya mənɪ na.»

⁴Bay hi ba daw, i gi daw mi kə vari mənɪ nday gi ra' bak mi, ama kəri mənɪ hi wə nday ur, i ta' kwa ne nday bay i har nday kə vari mənɪ Bârî ta' ne ni.

⁵Hi bek, i mun vun sum coɓ ri mə ti wa nya kə wəlok kə tu mə nyənyen, bay kə vunduk mə njeɲ ce' ndə mənɪ hi wə gi zə Kris.

⁶I gi ndəna' kəri mənɪ handay wə mi kar kədan hi kədam tu nday taw mi, ama i gi kwa mənɪ Ifray wə wa' kə vunduk ri daɲ' ce' ndə bek mə Kris.

⁷I gi sin bek mi kə bə mə bay ce' ndə mənɪ hi wə gi zə Bârî, cu zə sôwâ taw mi.

- ⁸I dla' wa dan mēni na: Ifray wə də po' swə dāw dāw daŋ' zə sin um mə ɓay, ko bek, ko swə mə kə wa tu rumu.
- ⁹Bay hi, sum coɓ bek, i gi ndəna' hay' bek mi ta'a. I ar dan dɛrɛ' wa nday si: I dla' wa dan mēni na, hi kə bek mi, hi kə Bə coɓ ri dāw wafray mēni cu gi sôwâ cem cem mi.
- ¹⁰Dan mēni gwa' nə ni na: I keɓ gbəgbonj mi wə du ɓa mi kə Bârî, ɓay wə du gbəgbonj um mə mbri.
- ¹¹I ra' kwa zi daŋ' mēni Ifray wə mi ne, kədan hi gak car ŋgəɗiŋ' kor kol Satan.
- ¹²Zə namba cu wə zi kə sumra' mi, ama kə usiya mēni suk jwə kə gbəgbonj wə ri mə ura' mbok fray kə nya.
- ¹³Zə rum, mgbaŋ ni nə, i ra' kwa zi mə Ifray daŋ', kədan kəri mēni bəka mə bro' wə də mbə, hi gak car kor bə sî mi, ɓay kəri mēni zi də ndo', hi də gay' ŋgəɗiŋ'i.
- ¹⁴Zə rum, i ke hərə'e! I baŋ fir ri kə dan mə kəzin' ce' ndə mēni hi wə baŋ fir ri kə zew dīke, i ge njeŋ tu ri ce' ndə mēni hi wə ge mbraw njike.
- ¹⁵I no' sây' ka' Dan mə Kəɗam mēni wə mbə kə heɓ sem ri, ce' ndə mēni hi wə no' təraka.
- ¹⁶I ra' dan mēni hi ve bəka daŋ' ce' ndə mēni hi wə ra' ber ô kədan hi rigin tu ri wə vun riya Satan mēni wə dā mbə wa ri.
- ¹⁷I no' sid' wa ri ce' ndə mēni hi wə no' njukwa zi, ɓay i ra' dan Ifray ce' ndə masəlam mēni Simbeɗ mə Kələŋ wə mi ne.
- ¹⁸I gi kwa rum daŋ' kə in dan kə Ifray, i o num kədan nə kawɓa ri, i in dan kə Ifray kə ri daŋ' ce' ndə mēni Simbeɗ wə ta' mi ne. Zə rum, i ji tu ri ɓay i ar in dan kə Ifray mi, i in dan kə Ifray zə raw sôwâ um mə kələŋ daŋ',
- ¹⁹ɓay i o Ifray zə rin ta', kədan nə ne nan dan mə njeŋ kəri mēni na wə də ar vun in dan, ɓay kədan na in dan rum dan wəlok kədan na ta' Dan mə Kəɗam mēni ke pe' nə ne kə sôwâ.
- ²⁰Na bə vari zə Dan mə Kəɗam rum, ko na wə so daŋgay' mgbaŋ ni na. Zə rum, i o Ifray kədan na in dan rum dan wəlok ce' ndə mēni na gaka.
- ²¹Na wə wa' i i we, vay ba mba, Tisikə, mēni na bə də in dan daŋ' mēni wə hay' rin mi ne kə kwa daŋ' mēni na wə gi. Mum wə kawɓa rin wə du sin Bârî njeŋe.
- ²²Zə rum, na sin num hay' ri kədan mum in dan gay' mba mi ne, ɓay kədan mum faŋ jeŋ vunduk ri ndəna'a.
- ²³Na wə wa' i Ba mba Ifray kə Bârî mba Zezu Kris kuni ne heɓ kə bə ne kə daw ba mba daŋ' wə du dan mēni handay ve na.
- ²⁴Na wə wa' i ɓay Ifray nə ke kə sôwâ daŋ' mēni wə bə Bârî mba Zezu Kris kə bə mə dan ndo'o.

Philippe

Philippe 1

¹Na Pol kə Timote, sum sin Zezu Kris, namba wây' dërwa mēni nə hay' raw sôwâ Ifray mēni gay' wə so Filip, sôwâ mēni ve Zezu Kris, kə sum ji kul sôwâ Kris, bay sôwâ mēni wə kawba kul sôwâ Kris:

²Namba wə wa' i Ba mba Ifray kə Bârî mba Zezu Kris kuni ne ni bay kə hebe.

³Na wə gi soko ne kə Ifray man zə ri dan' kə ri dan' mēni na wə dik dan wa ri.

⁴kəri dan' mēni na wə in dan kə Ifray zə ri, na wə in dan kə rum kə kədam,

⁵zə hi kawba rin kə pla' Dan mə Kədam də kofo daka tən zu rum hâ tama.

⁶Na we dan mēni nə njeje: Ifray mēni tən sin mə bay rum du ri, mum kə mēni də kofo kə sin rum hâ sin rum də ndo' kə bəka gewa Zezu Kris.

⁷Dan mēni na dik ndəna' wa ri dan' nə nje, kəzin' dan dik mi kəta' wə vunduk rin, zə hi dan' ba kə rin wə du sin mēni Ifray ne nan, ko kəri mēni na ke kə wa tu rin kədan na in nje dan wa Dan mə Kədam bay kədan sôwâ gak we i Dan rum tu dan, hi ke kə rin, ko mgbəni ni nə kəri mēni na wə so dan'gay', hi kə rin ta'a.

⁸Ifray we si, na wə in tu dan kəri mēni na in i na bə ni kə bə Zezu Kris mə mbri.

⁹Kwa mēni na wə o zə ri hay' Ifray nə ni na: Na wə o Ifray kədan bə mi nə jən də kofo, kə kwawe mə kəzin', bay mun zu kwa mə nje,

¹⁰kədan hi gak par kwa mə baya. Ndəna', hi də ke bay dan dan mə bro' wa ri kə bəka gewa Kris.

¹¹Zezu Kris wə nyen vunduk ri kə sin mə nje kədan Ifray fe mbra' kə buru.

¹²Daw ba man, na wə wa' i i we dan mēni na: Kwa mēni mbə wa rin gi Dan mə Kədam pla' ta kofo.

¹³Zə rum, soje dan' mēni wə ji so jwə, kə sôwâ məsin han dan' we i na wə so dan'gay' zə na bə sin Kris.

¹⁴Zə na wə so dan'gay', sôwâ juk wə du daw ba man faɲ njay vunduk nday wa Bârî hâ handay dle kə ka' dan Ifray də kofo dan wəloko.

¹⁵Kəzin', sôwâ məsin du nday wə ka' dan Kris zə handay kə sây' wa rin bay zə handay sôwâ mēni wə bə dan dle vun. Ama sôwâ məsin wə ka' dan Kris kə vunduk mə baya.

¹⁶Sôwâ mēni kuni wə gi sin rum kə bə, zə handay we si: Ifray ar ti nan kədan na in nje dan wa Dan mə Kədam.

¹⁷Sôwâ mēni cu ka' dan Kris kə vunduk mə bay mi, ama zə handay wə keɓ mbra' zə tu ndaya. Handay wə dik i handay gak gi boni man də kofo kəri mēni na wə so dan'gay'.

¹⁸Kwa mēni handay wə gi kuni cu man cik mi. Ko dan dīk nday la' bro', ko la' njen daŋ', na tuk kədam zə handay wə ka' dan Kris. Na də tuk kədam də kofo.

¹⁹Zə na we si, hi wə in dan kə Ifray bay zə kawba mēni Simbed Zezu Kris wə ne, sôwâ də man ulaya.

²⁰Kəzin', na wə ji, bay na wə cin vunduk rin wa dan mēni nə, zur cu də man gi mi, zawa, kəri daŋ', bay pâ daŋ' rum, mgbaŋ ni nə, Ifray də jen vunduk rin kədan na də ta' mbra' Kris kə tu rin daŋ', ko na la' kə i, ko na la' wə də mara.

²¹Zə wə hay' rin, na la' kə i, na kə i kədan na gi sin zə Kris, bay na la' də mar, na də fe kwafe.

²²Ama kəri mēni na kə i ɓo, na la' gak gi sin mə bay də kofo si, na cu we kwa mēni na də par nə mi.

²³Dan dīk man ɓul hobo: Mē' kədan na ar tu rin mēni nə kədan na də ke kə Kris wə man ti, kwa rum bay pâ mēni nə si.

²⁴Ama bay zə ri kədan na ke kə i.

²⁵Na we dan rum njen, na we si, na də suk kə ri daŋ' kədan na kawba ri kədan hi də kofo bay tuk kədam wə du dan mēni hi ve na.

²⁶Ndəna', kəri mēni na də faŋ də hay' ri kərem, hi də tuk kədam kə rin bayrum wə du ɓa mi kə Zezu Kris.

²⁷Say i ta ce' ndə mēni Dan mə Kədam Kris wə ta' mi ne. Ndəna', ko na la' də hay' ri kədan na mi kar, ko na la' cu də hay' ri mi, na wə wa' i na mun wa ri i hi wə gay' ŋgədiŋ' kə dan dīk mə daw, bay hi wə zi vun nji kə vunduk mə daw zə Dan mə Kədam mēni hi ve na.

²⁸I ne wəlok sum sî ri mi, kwa rum wə ta' i handay wə vari vi', bay wə ta' i hi wə vari sidî: Sid rum car mbə hay' Ifraya.

²⁹Zə Ifray ne bay um ne ni kədan hi gi sin zə Kris, cu kədan hi um ve taw mi, ama kədan hi ce boni zə rum ta'a.

³⁰Mgbaŋ ni nə, hi gak ɓa kə rin wə du zi man, zi rum mə daw kə mēni hi ke we nan wə zi ɓa si, bay mgbaŋ ni nə na wə zi rum ɓo, ce' ndə mēni hi wə mun dan rumu.

Philippes 2

¹Ba mi kə Kris wə ne gbəgboŋ mi ne kəta' su? Bə um wə jen vunduk mi ne kəta' su? Hi wə ta kə Simbed mə Kəlej kəta' su? Hi wə bə nji kə ci' ca wa nji mbok nji kəta' su?

²Zə rum, na wə mi o, i gi kədam man nyen kə vari mēni na: I kawvun mbok nji, i ke kə bə mə daw, bay i ɓa nji kə vunduk mə daw kə dan dīk mə daw.

³I gi kwa kədan hi za' mbra' zə tu ri kə ndi, ko kədan hi keɓ mbra' mə uray hay' sôwâ kə ndi mi, ama i hom tu ri mbok nji, na wə wa' i swə daw daw daŋ' nə kar sôwâ məsin kə mbra' pâ tu rum si.

⁴Na cu wa' i swə nə keɓ kwa mə kəɗam tu rum taw mi, ama na wa' i swə ɗaw ɗaw ɗaŋ' nə ɗik dan wa kwa mə kəɗam tu sôwâ mäsini.

⁵I ke kə dan ɗik məni Zezu Kris ke kə ndi:

⁶Mum kə kpak Ifray daka təŋ zu rum, ama mum cu ɗik wə vunduk um kədan mum suk vun nji kə Ifray mi.

⁷Zawa, mum ar kwa ɗaŋ' məni mum kə ndi, ɓay mum tle kpak beke. Mum faŋ ra' nji kə sumra', sôwâ kar num ce' ndə sumra'a.

⁸Bay kə tu sumra' um, mum hom tu rum, ɓay mum mun vun Ifray hâ mar, mar mə wa gu.

⁹Zə rum, Ifray tle num ta ri mə kə mbra', ɓay ne num semɗe mə kə mbra' məni pā semɗe məsin ɗaŋ',

¹⁰kədan kwa mə wafray, kə kwa mə wa nya, ɓay kwa mə zə nya ɗaŋ' kuduk nya zə semɗe Zezu.

¹¹Bay kədan kwa rum ɗaŋ' in kə vun nday i Zezu Kris nə Bârî, kədan Ba mba Ifray nə fe mbra'a.

¹²Ndəna', bāy man kwa, hi mun vun rin bəka ɗaŋ' kəri məni na ke wə du ri, ama ɓay zə ri kədan hi mun vun rin mgbəŋ ni nə, kəri məni na cu du ri məta'a. I gi zə siɗ mi kə wəlok kə tu nyənyen,

¹³zə Ifray wə gi sin wə vunduk ri bəka ɗaŋ' kədan mum ne gbəgbəŋ mi ne kədan hi bə kwa məni mum wə wa' ɓay hi gak gi kwa rumu.

¹⁴I gi kwa ɗaŋ' dan ci' tu ko dan way dan,

¹⁵kədan hi ke njeŋ ɓay dan dan mə bro' ce' ndə daw Ifray mə dan tan wur wə tu ri məni gay' wə du sôwâ məni ɗənok si ɓay bro' wa nya məni nə, i ɗeri du nday ce' ndə məni ciciw wə ɗeri wafray,

¹⁶kəri məni hi wə ka' dan siɗ nday ne: Hi la' gi ndəna' si, na də tuk kəɗam zə ri kə bəka gewa Kris, zə kwa rum də ta' i sin man kə kwa ɗaŋ' məni na gi cu uray mi.

¹⁷Vəswə rin la' də ne ce' ndə kwa po' fur wa kwane mi məni hi wə ne kə Ifray zə hi ve Kris si, na də tuk kəɗam, ɓay hi ɗaŋ' də ɓa kə rin wə du kəɗam mana.

¹⁸Ndəna' ta', hi də tuk kəɗam, ɓay na də ɓa kə ri wə du kəɗam mi ta'a.

¹⁹Bârî mba Zezu la' bə si, də kofo kî, na wə wa' kədan na sin Timote də hay' ri ga'ri kədan dan məni na də mun wa ri nə jeŋ vunduk rini.

²⁰Na cu kə swə məsin hay' rin məni wə ɗik dan wa ri ce' ndə mum mi:

²¹Sôwâ məsin ɗaŋ' wə ɗik dan wa sin nday taw, handay cu ɗik dan wa sin Zezu Kris mi.

²²Hi kə tu ri, hi we vari məni Timote ta' njeŋ um, bay vari məni mum gi sin kə rin zə Dan mə Kədam, ce' ndə məni vay wə gi sin kə ba umu.

²³Na wə wa' kədan na um sin də hay' ri kəri məni na də we kwa məni wə də gi wa rini.

²⁴Bay na cin vunduk rin wa Bârî kədan də kofo kî, na də hay' ri kədan na mi kar kə tu rini.

²⁵Na dik bay kədan na faŋ sin vay ba mba, Epafroditə, də hay' ri, mum ba kə rin wə du sin man kə zi man, mum kə məni hi sin num kədan mum kawba rin kə kwa məni na kə mē' rumu.

²⁶Mē' də mi kar wə um ti juk, bay mum wə dik dan juk zə hi mun i mum ke kə gaɓa.

²⁷Kəzin', mum ke kə gaɓ, həre' kə mar, ama Ifray we ca wa rumu. Mum cu we ca wa rum taw mi, ama mum we ca wa rin ta', kədan dan dik man nə də kofo bayrum za' mi.

²⁸Zə rum, na wə wa' kədan na um sin də hay' ri ga'ri kədan hi faŋ tuk kədam kə ri məni hi də um we, bay kədan dan dik man nə ndo' vunu.

²⁹Ndəna', i ve num kə kədam bayrum, ce' ndə vay ba mba wə du Bârî. Na wə wa' i i mbâ sôwâ daŋ' mə ndani nə,

³⁰zə mum ke həre' kə mar zə sin Kris. Mum ar tu rum kədan mum gi sin kə rin, sin məni hi cu gak gi kə tu ri mi.

Philippe 3

¹Daw ba man, dan məni gwa' nə ni na: I tuk kədam wə du ba mi kə Bârî. Cu kəcik kə rin kədan na faŋ in dan wa kwa məni na ke wây' hay' ri nə mi, bay mə hi dan rum də jeŋ kwawe mi.

²I ji tu ri hay' sôwâ məni wə gi kwa mə bro', hay' da kuni, hay' sôwâ məni wə tagura mə hay dana!

³Handay cu sum tagura mə kəzin' mi, namba sum rum, zə namba wə gi sin Ifray zə Simbed' um, namba wə tuk kədam kə Zezu Kris, bay namba cu njay vunduk mba wa sin sumra' mi.

⁴Kə ndi nə daŋ', na gak cin vunduk rin wa sin rum ta'a. Swə la' dik i mum gak cin vunduk rum wa sin sumra' si, na kə dan dik rum pâ num si.

⁵Bəka coho' kəri məni na vra', sôwâ tagura rin, na zə saŋ sôwâ Israyel daka vra' man, zə tlor Benyami, na zə saŋ Hebre məni cu tlum kpe mi. Wə du dan ta zə dan dlay sôwâ Zuwif, na Farisiyen.

⁶Na ke gi boni ne kə kul sôwâ Kris kə sây'i. Wə du dan keɓ faŋ njeŋ kor Ifray kə vari ta zə dan dlay, swə daw cu gak ge dan mə bro' wa rin mi.

⁷Ama dan məni kuni, na ke nday kar ce' ndə kwafe mə mbri zə rin ba' si, mgbaŋ ni nə, na kar nday ce' ndə kwa mə uray zə Kris.

⁸Dan mēni kuni cu taw mi, ama na kar kwa mē bay daŋ' mēni na ke kē ndi ce' ndē kwa mē uray zē kwa mē bay mēni pā nday daŋ'ŋ. Kwa rum nē ni na: Na we Bârî man Zezu Kris. Zē rum, na ar kwa mē bay daŋ' mēni na ke kē ndi. Na wē kar kwa mēni kuni daŋ' ce' ndē sod' kēdan na za' Kris,

⁹Bay kēdan na ba tu dāw kē rum, na cu dīk i na faŋ njeŋ kor Ifray zē na wē ta zē dan dlay mi, ama Ifray gi nan njeŋ kor rum zē na ve Kris. Kwa rum car mbē hay' Ifray, bay Ifray wē ne kwa rum ne kē swē mēni wē um ve.

¹⁰Kwa daŋ' mēni na wē wa' nē ni na: Na wē wa' kēdan na we Kris kē gbēgbōŋ mēni mum kē ndi zē Ifray par num mbē mar, kēdan na dē ke du boni um, bay kēdan na dē faŋ ra' nji kē rum du mar um,

¹¹kēdan Ifray dē man par mbē mar ta'a.

¹²Na cu ta' i na day vun ndo' rum, ko i na faŋ njeŋ si mēto'o. Ama na wē ne dē kofo kē gbēgbōŋ kēdan na dē fe kwafe rum, zē Zezu Kris kaw nan copo.

¹³Daw ba man, na cu dīk i na fe kwafe rum si mi, ama na gi kwa dāwa: Na wē dūmwa kwa mē kēki rin, bay na wē gi tu rin kē gbēgbōŋ kēdan na dē day Kwa mēni wē kor rini.

¹⁴Ndēna', na wē ne dē vun ndo' rum kēdan na fe kwafe rum, kwafe rum nē nyî mē dē hâ wafray mēni Ifray wē dē mba ne kē Zezu Kris.

¹⁵Namba sôwâ daŋ' mēni jeŋ wē du dan Ifray si, mē ke kē dan dīk dāw, ama sôwâ mēsin du ri la' kē dan dīk cem si, Ifray dē ta' dan rum mi ne.

¹⁶Kē ndi nē daŋ', mē dē kofo kē vari dāw mēni hi wē ta han hâ tama.

¹⁷Daw ba man, hi daŋ', i ta ce' ndē mēni na wē ta, namba ta' vari rum ne ni si, zē rum, i njay i ri wa sôwâ mēni wē ta kē vari rumu.

¹⁸Na in dan mēni nē ne ni sem raw, bay mgbaŋ ni nē, na wē mi in kē ci' kēreme: Sôwâ mēsin juk wē ta' i handay sî dan mar Kris mēni mum mar wa gu.

¹⁹Ndo' vun nday, handay dē vi', zē rawti nday nē ifray nday bay handay wē tuk kēdam kē gi sin mēni wē gak gi zur nday ne, bay handay wē dīk dan wa kwa mē nya mēni nē tawa.

²⁰Mē namba, namba sôwâ mē wafray, namba wē ji Bē Sid', Bârî mba Zezu Kris mēni wē dē car wafray mba.

²¹Mum dē faŋ tu mba mē tētâ mē nya mēni nē kēdan handay faŋ ce' ndē tu rum mē kē mbra', mum dē gi kwa rum kē gbēgbōŋ mēni mum kē ndi kēdan mum suk kē gbēgbōŋ wa kwa daŋ'ŋ.

Philippe 4

¹Ndona', daw ba man mœni na bæ, mœ' dœ mi kar kœrem wœ man ti juk, hi kœ mœni wœ man gi tuk kœdam bay fe mbra' juk, bay na wœ tuk kœdam juk kœ ri. Zœ rum, bœy man kwa, i gay' ŋgœdŋ' wœ du ba mi kœ Bârî.

²Evodi kœ Siŋtike, na wœ mi o kœ ci' kœdan i gay' tu nji ce' ndœ daw ya wœ du Bârî.

³Bay ha, bœy hob sin man mœ njeŋ ta', na wœ wû o kœdan a kawba rawkwa mœni kuni, zœ handay kawba rin kœ pla' Dan mœ Kœdam dœ kofo, wanji kœ Klemang kœ sœwâ mœsin daŋ' mœni wœ gi sin kœ rin, mœni semdœ nday wœy' wœ du dœrwa mœni Ifray wœy' semdœ sœwâ mœni kœ nyî mœ dœ hœ wœ hana.

⁴I tuk kœdam wœ du ba mi kœ Bârî bœka daŋ'ŋ. Na wœ in kœrem, i tuk kœdama.

⁵I ta' kœdam mi hay' sœwâ daŋ'ŋ. Dœ kofo kî, Bârî wœ dœ mba.

⁶I dîk dan mœsin mi, ama kœri daŋ' mœni hi wœ in dan kœ Ifray, i o num zœ kwa mœni hi kœ mœ' rum, i o num kœ vunduk mœ gi soko.

⁷Bay heb Ifray mœni wœ pâ wa dan dîk sumra' daŋ' dœ ji vunduk ri kœ dan dîk mi wœ du ba mi kœ Zezu Kris.

⁸Daw ba man, dan mœni gwa' nœ ni na: I njay vunduk ri daŋ' wa kwa mœ bay, bay kwa mœni nde i bur, wa kwa mœ kœzin', kwa mœ kœri mbâ, kwa mœ njeŋ, kwa mœ bay, kwa mœ kœdam, bay kwa mœ kœ mbra', i gi kwa mœni kuna.

⁹I gi kwa mœni hi wum bay fe wœ hay' rin wœ du dan man kœ sin mana. Bay Ifray mœni wœ mba ne heb nœ dœ ke kœ ri.

¹⁰Wœ du ba man kœ Bârî, na tuk kœdam juk mgbaŋ ni nœ, zœ hi za' vari kœdan hi ta' i hi wœ dîk dan wa rin kœreme: Na cu wa' in i hi ar dîk dan wa rin si mi, ama hi cu za' vari kœdan hi ta' dan dîk rum mi.

¹¹Bay na cu in ndœna' zœ na kœ mœ' kwa mi, zœ na wum vari kœdan na tuk kœdam kœ kwa mœni wœ ba rini.

¹²Na we vari suk du ca, bay na we vari suk du ndak ta'a. Ko na la' sa' rawti, ko na la' kœ mœ', ko na la' kœ kwa juk, ko na la' kœ ndi kî daŋ', na wum vari kœdan na tuk kœdam wœ ri daŋ'ŋ.

¹³Na gak car wœ ri mœni kuni daŋ' zœ Kris mœni wœ man ne gbœgboŋo.

¹⁴Ama hi gi kwa mœ bay kœri mœni hi kawba rin wœ du boni mana.

¹⁵Hi kul sœwâ Kris mœ so Filip, hi we njeŋ kœ tu ri, kœri mœni na tœŋ kœ ka' Dan mœ Kœdam ne kœ sœwâ wœ nya Maseduwanœ, bay kœri mœni na hœre' kœ 'ya ar nya rum, wœ du kul sœwâ Kris daŋ', hi kœ mœni kawba rin taw, hi kœ mœni ba kœ rin kœ ne kwa kœ fe kwa tawa.

¹⁶Kœri mœni na ke wœ so Tesalonikœ, hi sin kwa mœni na ke kœ mœ' rum hay' rin pâ sem dœw si.

¹⁷Na cu wœ keb kœdan na fe kwane rum taw mi, ama na wœ wa' i i fe mbi rum dœ hana.

¹⁸Zə rum, na za' kwa daŋ' mənɪ hi sin ne nan, ɓay kwa rum pā kwa mənɪ na kə mē' rum nə si. Mgbaŋ ni nə, kəri mənɪ Epafroditə mbə ne nan kwane mi, na kə kwa daŋ' mənɪ na kə mē' rumu. Kwane mi kuni ce' ndə urdi mənɪ wə sî kədām, ko kwa po' fur mənɪ Ifray wə ve kə kədāma.

¹⁹Ifray man də mi ne kwa mənɪ hi kə mē' rum daŋ', kə vari ndak um mə mbri kə Zezu Kris.

²⁰Mbra' nə ke kə Ba mba Ifray də hā. Amen.

²¹I kaw jeɓ raw sôwâ Ifray daŋ' mənɪ wə ta zə Zezu Kris. Daw ba man mənɪ kə rin kaw jeɓ ri.

²²Raw sôwâ Ifray daŋ' mənɪ wə ti, pā daŋ' rum, sôwâ mənɪ gay' so jwə mə mbri mə nya Romə, kaw jeɓ ri.

²³Na wə wa' i ɓay Bârî mba Zezu Kris nə ke kə ri daŋ'ŋ.

Colosses

Colosses 1

- ¹Na Pol, kə bə Ifray, mum par nan kədan na ke bə sin Zezu Kris, na kə vay ba mba Timote,
- ²namba wây' dərwa mənɪ nə hay' raw sôwâ mə kələŋ mənɪ gay' wə so Kolosə, daw ba mba mənɪ njeŋ wə du ɓa nday kə Kris. Namba wə wa' i Ba mba Ifray nə ne ni ɓay kə heɓe.
- ³Namba wə gi soko ne kə Ifray Ba Bârî mba Zezu Kris kəri daŋ' mənɪ namba wə in dan kə Ifray zə ri.
- ⁴Zə namba mun njeŋ dan wa dan vari mənɪ hi ve Zezu Kris, kə bə mi mənɪ hi kə ndi wə zə raw sôwâ mə kələŋ daŋ'ŋ.
- ⁵Kəri mənɪ Dan mə Kəɗam mbə hay' ri vun kofo, hi mun dan wa kwa mənɪ hi gak njay vunduk ri wa rumu. Ndəna', dan mənɪ hi ve kə bə mənɪ hi kə ndi wə gay' wa kwa mənɪ hi njay vunduk ri wa rumu. Ifray wə ji kwa rum zə ri wafraya.
- ⁶Dan mə Kəɗam nə wə pla' wa nya daŋ', ɓay wə gi kwa mə ɓay hay' sôwâ nya daŋ', ce' ndə mənɪ dan rum gi wə du ri daka bəka mənɪ hi mun dan wa ɓay Ifray, ɓay hi we vari mənɪ Ifray wə gi kwa mə ɓay hay' ri nə si,
- ⁷Epafras, bây hoɓ sin mba, kə mənɪ ta' kwa rum ne ni. Mum bə sin mə njeŋ zə Kris mənɪ wə gi sin du ri tan mba.
- ⁸Mum in dan bə mənɪ Simbed' Ifray ne ni nə ne mba.
- ⁹Zə rum, daka bəka mənɪ namba mun dan wa ri, namba cu ar in dan kə Ifray zə ri mi. Namba wə o Ifray kədan nə nyen wa ri kə kwawe kədan hi we kwa mənɪ mum wə wa', ɓay kədan Simbed'um mi ne gwet kə kwawe mə du simbed' daŋ'ŋ.
- ¹⁰Ndəna', hi gak ta ce' ndə mənɪ Bârî wə wa', ɓay gi kwa mə kəɗam tu rum bəka daŋ'ŋ. Hi də gi sin mə ɓay cem cem daŋ', ɓay hi də də kofo kə we Ifraya.
- ¹¹Namba wə o Ifray kədan nə jeŋ ni kə gbəgbəŋ um mə kə mbra' kədan hi gak car ŋgəɗiŋ' wə du kwa daŋ' kə tuk kəɗama.
- ¹²I gi soko ne kə Ba mi kə kəɗam, mum kə mənɪ gi ni faŋ ɓay kədan hi gak fe kwa mə ɓay mənɪ mum njay zə sôwâ um wə ri mənɪ mum wə də suk jwə wa sôwâ um wə ri mə ɓu.
- ¹³Mum sid' mba mbə du gbəgbəŋ ri mə ura', ɓay mbə kə mba wə ri mənɪ Vay um mənɪ mum wə bə nə suk jwə wə hana.
- ¹⁴Mum kə mənɪ tumwa mba ɓay vrum kwa mə bro' mba.
- ¹⁵Kris wə mba ta' Ifray mənɪ swə cu gak we kə i mi. Mum nə Vay mə mbri mənɪ wa kwa daŋ' mənɪ Ifray gi,

¹⁶Zə Ifray gi kwa daŋ' mə wafray kə mə wa nya zə rumu. Mum gi kwa məni namba gak we kə i, kə kwa məni namba cu gak we kə i mi, bay usiya məni gay' jwə kə gbəgbon mbok fray kə nya. Ifray gi kwa daŋ' kə rum bay zə rumu.

¹⁷Mum kəta' cop kwa daŋ', bay wə du ba nday kə rum, kwa daŋ' məni Ifray gi, gay' wə ri ndaya.

¹⁸Mum wa, bay tu rum nə kul sôwâ Kris. Mum nə tən zu kwa. Mum nə Vay mə mbri məni Ifray par num mbə mar cop kədan mum ke cop kor kwa daŋ'.

¹⁹Zə Ifray wa' i kpak um ke kə Vay um cete.

²⁰Ndəna' ta', mum gila' kwa daŋ' zə tu rum kə Vay umu. Ifray gila' heḅ mbok rum kə sôwâ kə mar Vay um məni mar wa gu, kə rum, ko kwa məni wə wa nya, ko kwa məni wə wafraya.

²¹Hi ta', ba' si, hi ke seŋ kə Ifray, hi ke sum sî um zə dan mə bro' məni hi wə dīk, bay kwa mə bro' məni hi wə gi.

²²Ama mgbəŋ ni nə, zə mar məni Vay um tuk kə tu rum, Ifray gila' ri kə rum kədan mum mi gi bay kor rum, dan day ko dan dan mə bro'o.

²³Ama zə hi gay' wa tor zu rum, zə dan məni hi ve, say i gay' ŋgəḏiŋ' wə du dan rum dan fur vari, bay i ar njay vunduk ri wa kwa məni Ifray ta' ne ni daka kəri məni hi mun Dan mə Kəḏam rum nə mi. Dan rum nə kə məni sôwâ ka' ne kə sôwâ wa nya daŋ', bay na Pol, na faŋ bə sin Dan mə Kəḏam rumu.

²⁴Mgbəŋ ni nə, na wə tuk kəḏam kə boni məni na wə ce zə ri, zə kə boni məni na wə ce kə tu rin, na wə jin Kris kədan nyen kam boni məni mum ce zə kul sôwâ Kris məni tu rumu.

²⁵Na faŋ bə sin kul sôwâ Kris, ce' ndə sin məni Ifray ne nan kədan na gi zə ri. Mum ḏe nan kədan na ka' Dan um cete.

²⁶Wa' dan ini: Dan dīk Ifray məni ke pe' daka ba' si hay' sôwâ daŋ', ama mgbəŋ ni nə, mum ta' dan dīk rum ne kə sôwâ umu.

²⁷Zə Ifray wa' kədan mum ta' dan dīk um mə toŋ bay kə mbra' məni ke pe', məni wə zə sôwâ daŋ' nə, ne kə sôwâ umu. Dan dīk rum nə ni na: Kris wə du ri, bay ndə na', hi gak njay vunduk ri njeŋ i hi də gay' kə Ifray wə du mbra' umu.

²⁸Ndəna', namba wə ka' dan Kris ne kə sôwâ daŋ'.

Namba wə har bay wə ta' kwa ne kə swə ḏaw ḏaw daŋ' kə gwet daŋ' məni namba kə ndi, kədan swə ḏaw ḏaw daŋ' də car kor Ifray ce' ndə swə mə njeŋ wə du ba um kə Kris.

²⁹Kədan na ndo' sin rum, na wə gi sin bay zi kə gbəgbon mə mbri məni Kris wə man ne, gbəgbon rum wə gi kə rini.

Colosses 2

- ¹Na wə wa' i i we zi mə mbri mənɪ na wə zi zə ri, zə sôwâ mənɪ gay' wə so Lawdise, ɓay zə sôwâ daŋ' mənɪ cu we nan mi.
- ²Na zi ndəna' kədan na jeŋ vunduk nday, kədan handay ɓa ɗaw du bə, ɓay kədan Ifray nday ne kwawe mə kəzin' mənɪ gak jeŋ dan ɗik nday, ndəna', handay gak we dan ɗik Ifray mənɪ ke pe', wə ta'a: Kris.
- ³Gwet kə kwawe mənɪ car mbə hay' Ifray daŋ', pe' wə du Kris.
- ⁴Na wə in mi ne ndəna', kədan i ar swə ɗaw ɓu ni kə vun kəɗam mi.
- ⁵Ko na la' wə seŋ kə ri kə tu rin, na wə hərə' kə ri kə dan ɗik man, ɓay na wə tuk kəɗam zə hi gay' ŋgəɗiŋ' vun ŋji ɗaw wə du dan mənɪ hi ve wa Kris.
- ⁶Zə hi ve Zezu Kris ce' ndə Bârî mi, i ta də kofo wə du ɓa mi kə rumu.
- ⁷I pe tlor ri du rum, i jeŋ tu ri wa rum, i gay' ŋgəɗiŋ' wə du dan mənɪ hi ve bəka daŋ', ce' ndə mənɪ namba ta' ne ni, i gi soko ne kə Ifray bəka daŋ'ŋ.
- ⁸I kaw wa ri kədan swə ɗaw nə gi daŋgay' ri kə dan ɓu kwa mə uray mənɪ car mbə gwet sumra' nə mi, gwet rum car wa kwata' mənɪ sumra' wə ta', ɓay wa kwata' mənɪ car mbə hay' usiya mənɪ gay' jwə kə gbəgbəŋ mbok fray kə nya, gwet rum cu car mbə hay' Ifray mi.
- ⁹Zə kpak Ifray daŋ' kəta' wə tu Kris,
- ¹⁰ɓay wə du ɓa mi kə rum, hi fe kwa daŋ', mum suk gbəgbəŋ wa usiya mənɪ gay' jwə kə gbəgbəŋ mbok fray kə nya daŋ'ŋ.
- ¹¹Wə du ɓa mi kə rum, hi tagura si. Gura rum, gura mə gi kə ɓa sumra' cu mi, ama gura rum car mbə hay' Kris. Gura rum nə ni na: Kris siɗ' ni mbə du gbəgbəŋ kpak tu ri mə bro'o.
- ¹²Zə kəri mənɪ hi fe baptem, sôwâ mo' ni kə Kris, ɓay Ifray ra' ni mbə mar kə rum ta', zə hi ve gbəgbəŋ Ifray mənɪ par Zezu mbə mara.
- ¹³'Ba' si, hi ke mar zə kwa mə bro' mi ɓay dan tagura mə tu mi, ama mgbaŋ ni nə, Ifray car i ri kə Kris. Mum vrum kwa mə bro' mba daŋ'ŋ.
- ¹⁴Mum vrum dan bal mənɪ wə wa mba kə dan dlay daŋ' mənɪ wə mba gi kə dole kədan namba po' bal rum kuni ta rəka. Mum ndo' dan rum daŋ' kəri mənɪ sôwâ gay' num ta wa gu,
- ¹⁵zə mar Kris wa gu, Ifray ra' gbəgbəŋ wa usiya mənɪ gay' jwə kə gbəgbəŋ mbok fray kə nya, ɓay mum ta' zur nday kəri mənɪ mum ra' nday ce' ndə bek ɓay gaŋ kə nday, ce' ndə sôwâ mənɪ ta 'way zi wə ra' bek mənɪ handay kaw han ɓay gaŋ kə nday kor sôwâ daŋ'ŋ.
- ¹⁶Zə rum, i ar swə ɗaw ɓok dan wa ri zə kwa mənɪ hi wə ti, ko wa kwa mənɪ hi wə ce, ko bəka cer mə mbrew, ko wa fəta pemây mi.
- ¹⁷Kwa mənɪ kuni daŋ' ŋjəbo kwa mə ɓay mənɪ wə də mbə, ama tu kwa rum nə Kris.

¹⁸Sôwâ mäsın kəta' mənı wə hom tu nday kə vari vur vur, wə bur sum sin Ifray mə wafray, ɓay wə car wa dan kwa mənı handay wə we. I ar swə ɗaw du sôwâ mə ndani nə ra' bal cik mi kə vari vur vur nday mi, swə mə ndani nə wə mbra' tu rum juk kə vari dan ɗik um, ama kwa rum ɗaŋ' uraya.

¹⁹Mum ar ɓa um kə Kris mənı wa nə si, wə zə wa nə, tu ɗaŋ' wə fe ur kə tləɓa nji kə vun fur tu kə səje, ɓay tu rum wə jeŋ ce' ndə mənı Ifray wə wa'a.

²⁰Hi mar kə Kris, ɓay Ifray siɗ' ni mbə du gbəgbonɗ usiya mənı gay' jwə kə gbəgbonɗ mbok fray kə nya, la' ndəna' si, zə mi hi wə ta ce' ndə mənı hi sôwâ mə nya mənı nə su? Zə mi hi wə ta zə dan dlay mənı kuni:

²¹«A tle kwa mənı nə mi!» «A tuk kwa mə nay' nə mi!» «A ɗak kwa mäsın mi» su?

²²Dan dlay rum ɗaŋ' wə in dan wa kwa mənı wə də ndo' kəri mənı swə wə gi kwa rumu: Handay dan dlay kə kwata' sumra' tawa.

²³Kəzin', swə gak nday kar ce' ndə gwet, zə sôwâ mənı wə ta zə dan dlay rum wə gi tu nday kə gbəgbonɗ kədan handay bur sum sin Ifray mə wafray, kədan handay hom tu nday, ɓay kədan handay lim tu ndaya. Ama dan dlay rum cu kə gbəgbonɗ kədan tak kwa səna' kpak tu mi.

Colosses 3

¹Ifray ra' ni mbə mar kə Kris, zə rum i keɓ kwa mənı wə wafray, wə ri mənı Kris suk han wə ɓa fun Ifraya.

²I ɗik dan wa kwa mə wafray, i ɗik dan wa kwa mə nya mi.

³Zə hi mar si, ɓay nyî ri mə kəzin' pe' kə Kris wə du ɓa mi kə Ifraya.

⁴Nyî ri mə kəzin' nə Kris, ɓay kəri mənı mum wə də mbə, hi də mbə kə rum, ɓay hi də gay' kə rum wə du mbra' umu.

⁵Zə rum, i ci kwa səna' mənı tu ri wə wa' wa nya mənı na: Ghəghay, kwa mə kə day, ləlem, fəfô, ɓay səna' kwa mə bro' zə səna' kwa nə ta zə ifray mäsın cem cem na.

⁶Zə kwa mə ndani kuni, bak Ifray də ke wa sôwâ mənı cu mun vun rum mi,

⁷hi ke ta ndəna' ɓa' si, kəri mənı kwa mə bro' rum ke gay' wa ri.

⁸Ama mgbaŋ ni nə, i ar kwa mənı kuni si ɗaŋ'ŋ: Ra' vunduk, bak, kwa mə bro', ge dan mə bro', ɓay dan mə kə zur mənı wə pâ mbə vun ri.

⁹I hay dan kə nji mbok nji mi, zə hi ulay' kpak tu ri mə kəmbar kə sin gi um si,

¹⁰ɓay hi ge kpak tu mə mbrew wə tu ri, kpak rum nə swə mə mbrew mənı Ifray wə gila' rum bəka ɗaw ɗaw ɗaŋ' hâ mum faŋ ce' ndə bə ri rum, kədan bə rum gak we Ifray cete.

¹¹Ndona', sôwâ grek cu mi, sôwâ Zuwif cu mi, sum tagura cu mi, jeb cu mi, sôwâ mē dan we kwa cu mi, sôwâ mē dan ar i cu mi, bek cu mi, ko sôwâ mēni fe wa tu nday cu mi, ama Kris nē daŋ', bay mum du kwa daŋ'ŋ.

¹²Hi wē du raw sôwâ Ifray, Ifray bē ni, bay mum da' ni kēdan hi ke kē rum, zē rum say i ge kwa mēni kuni wē tu ri: Ci' ca, sin mē bay, hom tu, 'yeŋ, bay red'vunduku.

¹³I rom nji mbok nji, bay i vrum kwa mē bro' nji mbok nji kēri daŋ' mēni swē dāw du ri kē dan wa swē mēsin. I vrum kwa mē bro' sôwâ mēsin ce' ndē mēni Bârî wē vrum kwa mē bro' mi.

¹⁴Bay pâ daŋ' rum, i ke kē ba: Mum nē zew mēni wē mi jew dē tu nji kēdan hi ke dāwa.

¹⁵Na wē wa' i heb Kris nē suk wē vunduk ri, zē Ifray dē ni kēdan hi faŋ tu mē dāw kēdan hi fe heb rumu. I gi soko ne numu.

¹⁶Na wē wa' i dan Kris kē ndak um daŋ' nē suk wē vunduk ri: I ta' kwa ne kē nji mbok nji, bay i har nji mbok nji kē gwet, i bur Ifray kē kēdam wē vunduk ri kē nyem, kē nyem mē gi mbra', bay kē nyem mēni Simbed' Ifray wē mi ne.

¹⁷Wē du kwa daŋ' mēni hi wē gi, bay dan daŋ' mēni hi wē in, i gi kwa rum daŋ' kē semdē Bârî Zezu, kē gi soko ne kē Ba mi Ifray zē rumu.

¹⁸Rawkwa, i mun vun njiwkwa mi, zē hi gak gi ndona' wē du ba mi kē Bârî.

¹⁹Njiwkwa, i bē rawkwa mi, bay i ra' bak kē nday mi.

²⁰Dawre', sin mēni hi gak gi kor Bârî nē ni na: Say i mun vun sôwâ mi du kwa daŋ', zē dan rum wē kēdam tu Ifraya.

²¹Ba daw, i gi daw mi ra' vunduk kēdan handay dik dan mi.

²²Bek, i mun vun sum coḅ ri mē wa nya du kwa daŋ'ŋ. I gi ndona' kēdan hi kēdam tu nday kēri mēni handay wē mi kar taw mi, ama i mun vun nday kē vunduk mē dāw, zē hi wē ô Bârî mi.

²³Ko sin mēni hi wē gi, i gi sin rum kē vunduk ri daŋ', ce' ndē mēni hi wē gi zē Bârî, cu zē sumra' mi,

²⁴i dla' wa dan mē ni na: Bârî wē dē po' bal cik mi, hi dē fe bayda mēni mum njay zē sôwâ umu. Zē Bē coḅ ri mē kēzin' mēni hi wē gi zē rum nē Kris.

²⁵Ama swē mēni wē gi vur vur, bē rum dē fe bal cik rum ce' ndē vur vur mēni mum gi, zē Ifray cu gi sôwâ cem cem mi.

Colosses 4

¹Sum coḅ bek, i gi bek mi kē vari mē bay bay njeŋ, i dla' wa dan mēni na: Hi ta', hi kē Bē coḅ ri wafraya.

- ²I in dan kə Ifray bəka daŋ'ŋ. I in dan kə Ifray kə vunduk mə dāw, bay i gi soko ne numu.
- ³Kəri məni hi wə in dan kə Ifray, i o num zə mba ta' kədan nə ne vari ne mba kədan namba ka' dan um, bay ta' dan dīk Ifray məni ke pe' wa Kris nə ne kə sôwâ. Na wə so daŋgay' mgbəŋ ni nə zə dan rumu.
- ⁴Zə rum, i o Ifray kədan na pay zu dan rum njeŋ ne kə sôwâ ce' ndə məni na gaka.
- ⁵I ta kə gwet kor sôwâ məni cu sôwâ Kris mi, bay i gi kwa mə bay wə ri daŋ' məni wə mbə kor ri.
- ⁶Na wə wa' i dan mi ke kədam bay ke kə sin bəka daŋ', bay na wə wa' i i we dām dan vun swə dāw dāw daŋ' kə vari mə baya.
- ⁷Vay ba mba Tisikə, məni na bə də in dan daŋ' məni wə hay' rin mi ne, mum nə bāy hoḅ sin man mə njeŋ məni wə kawba rin wə du sin Bârî.
- ⁸Zə rum, na sin num hay' ri kədan mum in dan gay' mba mi ne, bay kədan mum faŋ jeŋ vunduk ri ndəna'a.
- ⁹Mum də hoḅ kə Onezim, məni car mbə du ri. Mum nə vay ba man mə njeŋ məni na bə, handay də mi in dan kwa daŋ' məni wə gi ti ra.
- ¹⁰Aristarkə, məni wə so daŋgay' kə rin, kaw jeḅ ri, bay Markə, vay ba hoḅ Barnabas, kaw jeḅ ri ta'a. Na in dan wa Markə ne ni ba' si, mum la' ta so mi si, i ve num baya.
- ¹¹Zezu mə dē kə Zustus kaw jeḅ ri ta'a. Wə du sôwâ Zuwif daŋ' məni faŋ vunduk nday, sôwâ mə hinji' məni kuni taw wə gi sin kə rin kədan namba gila' vari kədan Ifray suk jwə wə vunduk sôwâ umu. Handay sôwâ məni jin nan juku.
- ¹²Epafras, məni car mbə du ri, kaw jeḅ ri ta'a. Mum nə bə sin Zezu Kris məni wə in dan kə Ifray kə gbəgbəŋ zə ri bəka daŋ' kədan hi gay' ŋgədiŋ', kədan hi faŋ sôwâ rôwâ wə du ba mi kə Kris, bay kədan hi ke hərə' kədan hi gi sin daŋ' məni Ifray wə wa'a.
- ¹³Na gak in dan məni nə wa rumu: Mum wə gi sin kəcik juk zə ri, zə sôwâ mə so Lawdise, bay zə sôwâ mə so Iyerapolis.
- ¹⁴Bə waza mba Lukə, məni na bə, kə Demas kaw jeḅ ri ta'a.
- ¹⁵I kaw jeḅ daw ba mba məni gay' wə so Lawdise, bay Nimpa kə sôwâ Kris məni wə ba so sa.
- ¹⁶Kəri məni hi də ndo' in dərwa məni nə, i sin dərwa rum ne kə kul sôwâ Kris mə so Lawdise kədan handay in dərwa rum ta'a. Bay hi kə tu ri, i in dərwa məni daw ba mi wə də sin mi ne nə ta'a.
- ¹⁷I in ne kə Arsipe: «A ar sin Bârî məni ha fe nə dan gi ndo' mi.»
- ¹⁸Na Pol, na wāy' dan məni nə kə ba rini: Na kaw jeḅ ri, i dūmwa məni na cururu ma nə mi. Na wə wa' i bay Ifray nə ke kə ri!

1 Thessalonique

1 Thessalonique 1

¹Na Pol kə Silas ɓay Timote, namba wâŷ' dërwa mənɪ nə hay' kul sôwâ Kris mənɪ gay' wə so Tesalonikə ɓay handay sôwâ mə Ba mba Ifray kə Bârî mba Zezu Kris. Namba wə wa' i Ifray nə ne ni ɓay kə hebe.

²Bəka daŋ' namba gi soko ne kə Ifray zə ri daŋ', ɓay kəri daŋ' mənɪ namba wə in dan kə Ifray, namba wə dɪk dan wa ri,

³namba wə dɪk dan wa ri kor Ba mba Ifray wa kwa mənɪ hi wə gi zə ô mi mə kə gbəgbon, wa sin mənɪ hi wə gi zə hi bə Kris, ɓay kə vari mənɪ hi wə njay vunduk ri wa Bârî mba Zezu Kris njeŋe.

⁴Daw ba mba, namba we si, Ifray bə ni ɓay mum kə mə da' ni.

⁵Zə namba cu ka' Dan mə Kədam ne ni kə vun taw mi, ama Ifray ta' gbəgbon um du Dan rum, Simbed mə Kələŋ jin mba ɓay ta' ne mba i Dan mənɪ namba ka' nə njeŋe. Hi we vari mənɪ namba ta kəri mənɪ namba ke du ri nə si, namba ta ndəna' kədan namba kawba ri.

⁶Hi jənok zu mba ɓay jənok zu Bârî, ko kəri mənɪ hi ce boni juk, hi ve Dan Ifray kə kədam mənɪ Simbed mə Kələŋ wə ne:

⁷Ndəna', hi faŋ kwa mə ta' vari zə sôwâ mənɪ ve Kris wə nya Maseduwanə kə nya Akay.

⁸Kəzin', sôwâ nya Maseduwanə kə nya Akay cu mun Dan Bârî zə kwa mənɪ hi wə gi taw mi, ama sôwâ wa nya daŋ' mun dan sin mənɪ hi wə gi zə hi ve Ifray, zə rum namba cu gak ge dan məsin wa rum za' mi.

⁹Sôwâ daŋ' wə in dan wa dan ve mənɪ hi ve mba kəri mənɪ namba ke wə so mi, ɓay handay wə in dan wa dan vari mənɪ hi ar ta zə ifray mə vun fur cem cem kədan hi faŋ mbə hay' Ifray kədan hi gi sin kə Ifray mə kə i ɓay kəzin',

¹⁰ɓay kədan hi ji Vay um mənɪ wə də car mbə wafray, Vay um Zezu mənɪ mum par num mbə mar, mum kə mənɪ sid' mba du bak Ifray mənɪ wə də mba.

1 Thessalonique 2

¹Daw ba man, hi we kə tu ri si, namba cu ta so mi uray mi.

²Hi we vari mənɪ namba ce boni kəri mənɪ sôwâ so Filip rik mba cop kəri mənɪ namba cu day so Tesalonikə mətə'o. Ama ko kəri mənɪ sôwâ juk wə keɓ vari kədan handay mba tak, Ifray jeŋ vunduk ne mba kədan namba ka' Dan mə Kədam mənɪ car mbə hay' rum nə mi ne.

³Dan ka' mba cu car wa hay dan mi, ko wa dan dɪk mə bro' mi, ɓay namba cu keɓ gi vur vur kə swə daw mətə'a.

⁴Zawa, bəka daŋ', namba wə in dan ce' ndə mənɪ Ifray wə wa', zə mum kar mba njeŋ, ɓay mum ne Dan mə Kəɗam um ne mba, namba cu wə keɓ gi kwa mə kəɗam tu sumra' mi, ama namba wə keɓ gi kwa mə kəɗam tu Ifray mənɪ wə we dan dɪk vunduk mba.

⁵Hi we si njeŋe: Namba cu mbə hay' ri kə vun kəɗam mi, ɓay namba cu ka' Dan mə Kəɗam du ri kədan namba fe kwa kə ndi mi. Ifray we vunduk mba si,

⁶namba cu keɓ mbra' hay' swə ɗaw mi, ko hay' ri, ko hay' sôwâ məsin mi.

⁷Kəzin', zə namba sum ka' Dan Kris, namba kə vari kədan namba keɓ mbra' hay' ri. Ama kəri mənɪ namba ke so mi, namba gay' kə kəɗam du ri ce' ndə mənɪ ya daw suk kə kəɗam kə daw sa.

⁸Namba bə ni juk, zə rum namba cu ka' Dan mə Kəɗam Ifray ne ni taw mi, ama namba hère' kə ne nyî mba zə ri. Namba bə ni dle tu si.

⁹Kəzin', daw ba man, hi gak dla' wa dan sin mba kə cik mba mənɪ namba ke gi du ri: Kəri mənɪ namba ke du ri kə ka' Dan mə Kəɗam mənɪ car mbə hay' Ifray nə mi ne, namba wə gi sin fəta kə dukri daŋ', zə namba cu wa' cin kwazi' wa swə ɗaw du ri mi.

¹⁰Hi gak in njeŋ dan wa mba, ɓay Ifray gak in njeŋ dan wa mba ta'a: Ta mba mənɪ namba ta kəri mənɪ namba ke du ri, hi sôwâ mənɪ ve Kris, ta rum ɓay, njeŋ, ɓay dan dan mə bro'o.

¹¹Hi we si: Namba gi sin kə swə ɗaw ɗaw daŋ' du ri ce' ndə mənɪ ba daw wə gi sin kə daw um,

¹²namba ne gbəgbəŋ ne ni, namba jeŋ vunduk ne ni, ɓay namba dlay ni kədan hi ta ce' ndə mənɪ Ifray wə wa', mum kə mənɪ ɗe ni kədan hi də ke wə jwə um ɓay wə du mbra' umu.

¹³Namba wə gi soko ne kə Ifray kə ri daŋ' zə dan məsin kəreme: Kəri mənɪ namba ka' dan Ifray ne ni, hi mun dan rum, ɓay hi cu ve dan rum ce' ndə dan sumra' mi, ama hi ve dan rum ce' ndə dan Ifraya. Kəzin', dan rum nə dan Ifraya! Dan rum wə gi sin wə vunduk ri, hi sôwâ mənɪ ve dan rumu.

¹⁴Daw ba man, kwa mənɪ ke gi wa kul sôwâ Ifray mənɪ ve Zezu Kris wə nya Zude nə ni gi wa ri ta', hi ce boni wə ɓa sôwâ nya mi ce' ndə mənɪ sôwâ mənɪ ve Kris wə nya Zude ce boni wə ɓa sôwâ Zuwif.

¹⁵Handay sôwâ mənɪ ci Bârî mba Zezu kə sum ka' dan, ɓay handay gi boni ne mba ta', Ifray cu tuk kəɗam kə nday mi, ɓay handay wə sî sôwâ daŋ'ŋ.

¹⁶Handay wə keɓ kə gbəgbəŋ kədan handay mba tak dan ka' Dan mə Kəɗam mənɪ gak ne siɗ ne kə sôwâ nə ne kə sôwâ mənɪ cu zu saŋ sôwâ Zuwif mi, kə vari rum, handay nyen tasaw kənji' kwa kə kwa mə bro' mənɪ handay gi daka təŋ zu rumu. ʼBay mgbaŋ ni ne, bak Ifray kəta' wa ndaya.

¹⁷Daw ba man, mɛ namba, daka kɛri mɛni namba bul nji kɛ ri, kɛzin' dan dɛk mba cu bul nji kɛ ri mi, ama namba bul nji kɛ ri kɛ tu mba taw, zɛ mɛ' dɛ mi kar mba ti dle tu si, zɛ rum namba keɓ vari kɛ gbɛgboŋ kɛdan namba faŋ dɛ mi kara.

¹⁸Namba wɛ wa' kɛdan namba faŋ dɛ so mi, na Pol, na keɓ vari kɛdan na faŋ dɛ so mi sem raw, ama Satan tak mba si.

¹⁹Zɛ namba njay vunduk mba wa ri, hi kɛ mɛni wɛ mba ne kɛdam wɛ vunduk, ɓay hi kɛ mɛni faŋ kwa ta' kwa mɛni wɛ ta' i namba fe gaŋsem, zɛ rum namba gak dɛ mbra' tu mba kor Bârî mba Zezu kɛri mɛni mum dɛ faŋ mbɛ, sôwâ mɛsin cu pâ ni du kwa rum mi!

²⁰Kɛzin', hi kɛ mɛni mba ne mbra' ne ɓay mba ne tuk kɛdama.

1 Thessalonique 3

¹Ndo' vun rum, namba cu gak ji hâ za' mi. Zɛ rum, namba gila' dan kɛdan namba gay' daw mba wɛ so Atenɛ,

²ɓay namba sin vay ba mba Timote ne ni, mum nɛ wɛ gi sin Ifray kɛ mba kɛ ka' Dan mɛ Kɛdam mɛni wɛ in dan wa Kris, namba sin num ne ni kɛdan nɛ ne gbɛgboŋ ne ni, ɓay kɛdan nɛ jeŋ vunduk mi ne kɛdan hi gay' ŋgɛdɛŋ' wɛ du dan mɛni hi ve,

³kɛdan swɛ daw du ri nɛ faŋ kɛki zɛ boni mɛni namba wɛ ce nɛ mi, zɛ hi we kɛ tu ri, boni mɛni kuni mbɛ wa mba zɛ Ifray wa' ndɛna'a.

⁴Zɛ kɛri mɛni namba ke du ri, namba in ne ni cop i sôwâ mɛsin dɛ gi boni mba ne, ɓay hi we kɛ tu ri kwa rum ni gi na.

⁵Na cu gak ji hâ za' mi, zɛ rum, na sin Timote kɛdan nɛ mun dan wa dan mɛni hi ve nɛ, na wɛ dɛk dan juk ke mɛsin Satan bu ni, ɓay sin mba daŋ' dɛnok si su na.

⁶Ama mgbaŋ ni nɛ, Timote car wɛ hay' ri mbɛ hay' mba, ɓay mum in dan wa dan mɛni hi ve kɛ bɛ mɛni hi kɛ ndi kuni ne mba. Mum in ne mba i hi wɛ dɛk dan wa mba bɛka daŋ' kɛ bɛ, ɓay i mɛ' mbɛ mba kar wɛ mi ti juk ce' ndɛ mɛni mɛ' dɛ mi kar wɛ mba ti juk ta'a.

⁷Ndɛna', daw ba mba wɛ du dan dɛk mba kɛ boni mba daŋ', dan mɛni namba mun wa ri nɛ jeŋ vunduk ne mba, dan mɛni hi ve nɛ kɛ mɛni jeŋ vunduk ne mba,

⁸zɛ hi gay' ŋgɛdɛŋ' wɛ du ɓa mi kɛ Bârî, vunduk mba so' si.

⁹Namba gak gi soko ne kɛ Ifray wa dan mɛni namba mun wa ri ɓay kɛdam mɛni namba tuk wɛ vunduk mba zɛ dan mɛni nɛ su?

¹⁰Fɛta kɛ dukri daŋ', namba wɛ o Ifray kɛ vunduk mba daŋ' kɛdan nɛ ne vari ne mba kɛdan namba faŋ dɛ mi kar kɛ tu mba, ɓay kɛdan namba dɛ mi gi dɛ kofo wɛ du dan mɛni hi ve na.

¹¹Namba wɛ wa' i Ba mba Ifray kɛ tu rum kɛ Bârî mba Zezu kuni gila' vari zɛ mba kɛdan namba faŋ dɛ mi kara.

¹²Namba wə wa' i Bârî mba nə gi bə mi mənɪ hi kə ndi mbok nji ɓay hay' sôwâ daŋ' nə də kofo hâ bə rum nə faŋ ce' ndə bə mba zə ri.

¹³Ndəna', mum də jeŋ vunduk mi ne, ɓay hi də faŋ njeŋ ɓay dan dan mə bro' kor Ba mba Ifray kəri mənɪ Bârî mba Zezu wə də mbə kə sôwâ um mə kələŋ daŋ'ŋ.

1 Thessalonique 4

¹Daw ba mba, ndo' vun rum, namba ta' vari mənɪ hi gak ta kə ndi kədan hi kədam tu Ifray nə ne ni, kəzin', hi wə ta ndəna', ama mgbaŋ ni nə, namba wə mi o kə mi har kə semde Bârî mba Zezu: I gi də kofo pâ mə ni na.

²Zə hi we dan Bârî mba Zezu mənɪ namba ta' ne ni nə si.

³Kwa mənɪ Ifray wə wa' kuni ni na: Mum wə wa' i i ke dan dan mə bro', ɓay i ji tu ri wə du dan gi ghəghaya.

⁴Say swə daw daw daŋ' du ri nə we vari cin ma rum kə vari mə ɓay kə zur,

⁵ɓay nə gi fəfô ce' ndə sôwâ mənɪ cu we Ifray mi wə gi kuni mi.

⁶Wə du kwa rum, swə daw cu kə vari kədan mum gi kwa mə bro' wə hay' vay ba um, ko gi vur vur kə rum mi, zə namba in dan rum ɓa' si, ɓay namba har ni ɓayrum wa dan rum kərem i Bârî wə də gi boni ne kə sôwâ mənɪ wə gi kwa mə bro' mə ni kuna.

⁷Ifray cu de mba kədan namba gay' wə du ghəghay mi, ama kədan namba ke kələŋe.

⁸Zə rum, swə mənɪ wə vad' dan ta' rum, bə rum cu vad' sumra' mi, ama mum vad' Ifray mənɪ wə mi ne Simbed'umu.

⁹Cu kə sin kədan namba wây' derwa hay' ri wa dan bə daw ba mi mənɪ ve Kris za' mi, zə Ifray ta' vari mənɪ hi gak bə nji mbok nji nə ne ni si,

¹⁰kəzin', hi wə gi ndəna' wə hay' daw ba mba mənɪ wə Maseduwanə daŋ'ŋ. Ama daw ba mba, namba wə mi o, i gi də kofo pâ mə ni na:

¹¹I keɓ kə gbəgboŋ kədan i gay' heɓ, i dɪk dan wa sin mə kəca mi, ɓay i ur tu ri kə tu ri ce' ndə mənɪ namba ta' ne ni ɓa' si.

¹²Ndəna', hi də fe mbra' wə hay' sôwâ mənɪ cu ve Kris mi zə ta mi mə ɓay, ɓay hi cu də cik swə daw mi.

¹³Daw ba mba, namba wə wa' i i we dan mə kəzin' wa dan sôwâ mənɪ mar, kədan hi gay' kə dan dɪk ce' ndə sôwâ məsin mənɪ cu ve i Ifray wə də ra' sôwâ mbə mar mi nə mi.

¹⁴Namba ve i Zezu mar, ɓay mum car mbə mar si, ndəna', namba gak ve i sôwâ mənɪ ve Zezu ɓay mar kə rum, Ifray wə də nday ra' mbə mar kə rum ta'a.

¹⁵Dan mənɪ namba wə mi ta' ne, mənɪ car mbə hay' Bârî mba nə ni na: Kəri mənɪ Bârî mba wə də mbə, namba sôwâ mənɪ kə i ɓo, namba cu də fray cop kə sôwâ mənɪ mar si kuni mi.

¹⁶Kəri rum, Ifray də dlay dan, toŋ sum sin Ifray mə wafray də ka' dan, Ifray də pe duḅ, ḅay Bârî mba kə tu rum də mba: Ndəna' sôwâ mēni ve Kris ḅay mar kə rum, handay də nday car mbə mar copo.

¹⁷Kəki rum, namba sôwâ mēni kə i kəri rum, mum də mba ra' kə nday du dləmbur kədan namba də ndewa kə Bârî wafray, ndəna' namba də gay' kə Bârî hâ də hâ.

¹⁸Zə rum, i jeŋ vunduk ne kə nji mbok nji kə dan rumu.

1 Thessalonique 5

¹Daw ba mba, cu kə sin kədan namba wây' ḁerwa hay' ri wa dan bəka ko ri mēni kwa mēni kuni wə də gi nə mi.

²Zə hi we kə tu ri si njeŋe: Bəka mbə Bârî də mbə kəri mēni sôwâ cu ḁik dan wa rum mi, ce' ndə hura wə mbə kə dukri.

³Kəri mēni sôwâ də ini: «Kwa ḁaŋ' gay' heḅ ḅay cik cu mi», kəri rum boni də mbə wa nday, boni rum də mbə wa nday ga'ri ce' ndə boni wə mbə wa ma mēti wə vra' ḅay handay cu gak siḁ' du rum kpe mi.

⁴Ama mə hi, daw ba mba, hi cu gay' wə ri mə ura' mi, zə rum bəka rum cu gak mbə wa ri ḅok ce' ndə hura wə mbə ḅok wa sôwâ mi.

⁵Hi ḁaŋ', hi daw ri mə ḅu, ḅay hi mə fəta: Namba cu daw ri mə ura', ko mə dukri mēta'a.

⁶Zə rum, say mə nde sen ce' ndə sôwâ mēsin mi, zawa mə gay' kə i ḅay mə ji tu mba hay' gal kə sum mi.

⁷Sôwâ wə nde sen kə dukri, ḅay sôwâ wə gal kə sum kə dukri.

⁸Ama mə namba, namba mə fəta, ḅay say mə tak tu mba hay' gal kə sum mi, say mə ve Ifray ḅay bə num, ḅay mum mba rigin, ce' ndə mbraw vunduk wə rigin tu sum zi, ḅay mə njay vunduk mba wa Bə Siḁ' mba, ḅay mum mba rigin, ce' ndə njukwa njike wə rigin wa sum zi.

⁹Ifray cu da' mba kədan mum tle bak kə mba mi, ama kədan mum mba siḁ' kə Bârî mba Zezu Kris,

¹⁰mēni mar zə mba, kədan ko namba la' kə i, ko namba la' mar, namba də ke kə rum kəri mēni mum wə də mba.

¹¹Zə rum, i jeŋ vunduk ne kə nji mbok nji, ḅay i kawḅa nji mbok nji ce' ndə mēni hi wə gi mgbaŋ ni na.

¹²Daw ba mba, namba wə mi o, i mbâ sôwâ mēni wə gi sin du ri, Bârî da' nday kədan handay ta' vari kə mi hara.

¹³I mbâ nday kə nday bə ḅayrum zə sin mēni handay wə gi. I gay' heḅ mbok ri.

¹⁴Daw ba mba, namba wə mi o: I har sum ndal, i jeŋ vunduk ne kə sum wəlok, i kawba sum tətâ, bay i red vunduk ri wa sôwâ daŋ'ŋ.

¹⁵I kaw wa ri kədan swə dāw du ri nə po' kwa mə bro' kə kwa mə bro' mi, zawa, kəri daŋ' i keɓ kədan i gi sin mə bay du ri bay hay' sôwâ daŋ'ŋ.

¹⁶I tuk kədam bəka daŋ'ŋ.

¹⁷I in dan kə Ifray kə ri daŋ'ŋ.

¹⁸I gi soko ne kə Ifray kə ri daŋ', Ifray wə wa' i i gi ndəna' wə du ba mi kə Zezu Kris.

¹⁹I tak sin məni Simbed Ifray wə wa' kədan mum gi nə mi,

²⁰i jeɗ dan Ifray məni wə ka' nə mi.

²¹I kənji' kwa daŋ'ŋ: I ve kwa mə bay,

²²bay i ji tu ri hay' kwa mə bro' daŋ'ŋ.

²³Namba wə wa' i Ifray məni wə ne heɓ ne kə sôwâ nə gi ni faŋ mə mum cet, bay nə ji nyî ri, kə simbed ri, bay tu ri daŋ' dan dan mə bro' hâ day bəka məni Bârî mba Zezu Kris wə də mba.

²⁴Swə məni də ni, mum də gi kwa rum zə mum njeŋe.

²⁵Daw ba mba, i in dan kə Ifray zə mba ta'a.

²⁶I kaw jeɓ daw ba mba daŋ' kə ba.

²⁷Na wə mi o kə semde Bârî: I in dərwa məni nə kor daw ba mba daŋ'ŋ.

²⁸Na wə wa' i bay Bârî mba Zezu Kris nə ke kə ri.

2 Thessalonique

2 Thessalonique 1

¹Na Pol kə Silas bay Timote, namba wây' dërwa mənɪ nə hay' kul sôwâ Kris mənɪ gay' wə so Tesalonikə, handay nə sôwâ mə Ba mba Ifray kə Bârî mba Zezu Kris.

²Namba wə wa' i Ba mba Ifray kə Bârî mba Zezu Kris kuni ne ni bay kə hebe.

³Daw ba mba, dan dîk vunduk mba wə mba pla' kədan namba gi soko ne kə Ifray zə ri bəka daŋ', dan rum njeŋ kədan namba gi ndəna', zə hi wə dlər də kofo wə du dan mənɪ hi ve, bay hi wə bə nji mbok nji də kofo kofo.

⁴Zə rum, namba kə tu mba, namba wə mbra' tu mba zə ri wə du kul sôwâ Ifray cem cem, namba wə mbra' tu mba wa dan vari mənɪ hi car ŋgəɗiŋ' bay dlər də kofo wə du dan mənɪ hi ve nə du boni kə cik daŋ' mənɪ hi wə tuku.

⁵Kwa rum daŋ' wə ta' i dan bok Ifray nə njeŋ, bay ndo' vun rum hi də nde i gay' wə ri mənɪ mum wə də suk jwə wa sôwâ um, hi wə ce boni zə dan rumu.

⁶Zə Ifray wə də gi kwa mə njeŋ mə ni nə, mum wə də gi boni ne kə sôwâ mənɪ wə gi boni mi ne

⁷bay mum wə də ne ri pemây mi ne, hi sôwâ mənɪ wə ce boni, wa nji daw kə mba ta', mum wə də gi kwa rum kəri mənɪ Bârî mba Zezu wə də car wafray kə sum sin um mə wafray mə kə gbəgboŋ mbə,

⁸du ku mə bəliw bəliw, kədan handay gi boni ne kə sôwâ mənɪ cu we Ifray mi, bay kə sôwâ mənɪ cu ta zə Dan mə Kəɗam mənɪ in dan wa Bârî mba Zezu nə mi.

⁹Boni mənɪ handay wə də ce nə ni na: Handay də vi' seŋ kə Bârî də hâ, bay seŋ kə gbəgboŋ um mə kə mbra',

¹⁰kwa rum wə də gi kə bəka mbə Bârî, kə bəka rum, sôwâ mə kəleŋ daŋ' wə də um mbâ, bay sôwâ daŋ' mənɪ ve num wə də gi mbra' um ne: Hi ta', hi də ke du nday, zə hi ve dan mənɪ namba ka' ne ni nə si.

¹¹Zə rum, namba wə in dan kə Ifray zə ri bəka daŋ', namba wə o Ifray mba kədan nə ne gbəgboŋ ne ni kədan hi gak ta ce' ndə mənɪ mum dɛ ni kədan hi ta, bay nə ne vari ne ni kə gbəgboŋ um kədan hi gak gi kwa mə bay mənɪ hi wə wa' kədan hi gi, bay kədan hi gak ndo' sin mənɪ hi wə wa' kədan hi gi zə hi ve Kris.

¹²Ndəna', semdɛ Bârî mba Zezu də fe mbra' zə ri, bay hi də fe mbra' zə rum zə bay Ifray mba kə Bârî mba Zezu Kris.

2 Thessalonique 2

¹Daw ba mba, wa dan mbə Bârî mba Zezu Kris kə vari mənɪ mum wə də mba ra' də hay' rum, namba wə mi o:

- ²I ar sôwâ mäsın jin' wa ne ni, ko gi ni par vunduk kəri mənı handay wə in i bəka mbə Bârî nə mbə si ndə nə sar mi, ko swə mäsın la' ka' dan wa dan rum, ko swə mäsın la' pay zu dan rum, ko swə mäsın la' in i namba wây' dan wa dan mbə rum wə du dərwa,
- ³i ar swə dāw bu ni kə vari rum mi. Zə bəka rum cu də mbə cop kəri mənı sôwâ juk wə də car wa kə Ifray, bay Swə mə bro' wə də pâ nə mi, mum nə swə mənı Ifray par num kədan mum də dənok wə ri ku,
- ⁴mum də vad' gbəgbonj mə wafray kə kwa daŋ' mənı sôwâ wə bur ti wa nya, bay mum də cin tu rum kə mbra' wa nday daŋ', hâ mum də suk wa kwasuk wə rawti so Ifray, bay mum də gi tu rum ce' ndə Ifraya.
- ⁵Hi cu dla' wa dan mənı na in dan wa kwa rum ne ni kəri mənı na ke wə du ri nə mi su?
- ⁶Ama, kwa mäsın kəta' mənı wə tak kwa rum dan gi mgbaŋ ni nə, bay hi we kwa rum si, ndəna', swə mə bro' wə də pâ kə ri mənı Ifray para.
- ⁷Gbəgbonj sin mə bro' mənı ke pe' nə wə gi, ama kwa mənı wə də gi cu də gi mətə', say kə ri mənı Ifray wə də par swə mənı wə tak kwa rum nə də rəka.
- ⁸kəri rum, Swə mə bro' wə də pâ, bay Bârî mba Zezu wə də um ci kə simbed' vun rum, bay wə də um dənok kə mbra' um mənı mum wə də mbə kə ndi.
- ⁹Swə mə bro' wə də mbə kə gbəgbonj Satan, bay mum wə də gi yew mə hay dan cem cem, kə kwa mə hay dan mə ta' kwa cem cem, bay kwa mə hay dan mə jin' wa sôwâ cem cem daŋ'ŋ.
- ¹⁰Bay mum wə də bu sôwâ mənı wə də vi' kə vur vur cem cem daŋ' mənı mum wə də gi, handay wə də vi' zə handay cu ve dan mə kəzin' kə bə dan mənı wə gak nday sid' nə mi.
- ¹¹Zə rum, Ifray də sin gbəgbonj mə vi' vari wə vunduk nday kədan handay ve dan mə hay dana.
- ¹²Ndəna', sôwâ daŋ' mənı cu ve dan mə kəzin' mi, ama wə tuk kədam kə sin mə vur vur, Ifray wə də nday kaw kə dana.
- ¹³Daw ba mba, dan dık vunduk mba wə mba pla' kədan namba gi soko ne kə Ifray bəka daŋ' zə ri, hi sôwâ mənı Bârî wə mi ba, zə Ifray da' ni daka təŋ zu kwa kədan hi fe sid', hi faŋ sôwâ mə Ifray zə gbəgbonj Simbed' Ifray bay zə hi ve dan mə kəzini.
- ¹⁴Ifray dē ni kədan i faŋ sôwâ um kə Dan mə Kədam mənı namba ka' ne ni. Mum dē ni kədan i gay' du mbra' Bârî mba Zezu Kris.
- ¹⁵Ndəna', daw ba mba, i gay' ŋgədiŋ', bay i kaw kwata' mənı namba ta' ne ni kə vun mba ko kə dərwa mba.
- ¹⁶Namba wə wa' i Bârî mba Zezu Kris kə tu rum kə Ba mba Ifray mənı bə mba, bay wə du bay um mum jeŋ vunduk mba ne də hâ bay mba gi njay vunduk mba wa kwa mə bay,

¹⁷kuni jeŋ vunduk ne ni ɓay ne gbəgbon ne ni kədan hi gak gi kwa mə ɓay ɓay in dan mə ɓay daŋ'ŋ.

2 Thessalonique 3

¹Daw ba mba, ndo' vun rum, i in dan kə Ifray zə mba kədan dan Bârî nə pla' də kofo ga'ri ɓay ke kə mbra' ce' ndə mənɪ dan rum ke gi wə du ri,

²i o Ifray kədan nə sid' mba wə ɓa sôwâ mə bro', zə sôwâ daŋ' cu ve dan rum mi.

³Ama Bârî nə njeŋe: Mum də mi ne gbəgbon, ɓay mum də mi ji hay' Satan.

⁴Bay Bârî wə mba gi njay vunduk mba wa ri, zə rum, namba we si: Hi wə gi kwa mənɪ namba ta' ne ni, ɓay hi wə də kofo kə gi kwa rumu.

⁵Namba wə wa' i Bârî nə gi vunduk ri kədan hi we bə Ifray, ɓay kədan hi car ŋgədiŋ' ce' ndə mənɪ Kris car ŋgədiŋ'ŋ.

⁶Daw ba mba, namba wə mi dlay kə semde Bârî mba Zezu Kris, i tak tu ri hay' daw ba mə ndal mənɪ cu ta zə kwata' mənɪ namba ta' ne nday nə mi.

⁷Hi we vari mənɪ namba gay' wə du ri nə kə tu ri si njeŋe: Say i jənok zu mba zə namba cu ke sum ndal kəri mənɪ namba ke wə du ri mi.

⁸Namba cu ti kwati ɓa swə uray daw mi, zawa namba gi sin ɓay tuk cik ɓayrum, namba gi sin fəta kə dukri daŋ', zə namba cu wa' cin kwazi' wa swə daw du ri mi.

⁹Namba kə vari kədan namba o kwati kə so ɓa ri, ama namba cu gi ndəna' mi, zawa, namba gi sin kə ɓa mba kədan namba ta' vari mi ne, i jənok zu mba.

¹⁰Kəri mənɪ namba ke du ri, namba la' ne ni: Swə mənɪ cu bə sin mi, i ne kwati ne num mi ta'a!

¹¹Namba in ndəna', zə namba mun i sôwâ məsin du ri wə gaŋ kə ndala. Handay cu bə gi sin mə kəca nday mi, ama handay wə ze du dan mənɪ cu tap nday mi.

¹²Namba wə dlay sôwâ mə ndani kuni, ɓay wə nday har kə semde Bârî mba Zezu Kris: Say kuni gi sin bəka daŋ' kədan kuni ur tu ndaya.

¹³Daw ba mba, mə hi, i ar gi kwa mə ɓay mi.

¹⁴Swə la' cu ta zə kwata' mənɪ namba wə wây' wə du dərwa mənɪ nə mi si, i kar bə rum kə ɓayrum, ɓay i ɓa kə rum mi, kədan zur nə gi numu.

¹⁵Ama i sî num mi, zawa i har num ce' ndə mənɪ hi wə har vay ba mi.

¹⁶Namba wə wa' i Bârî mənɪ wə ne heɓ ne kə sôwâ nə ne ni heɓ kə tu rum kəri daŋ' ɓay kə vari cem cem daŋ'ŋ. Namba wə wa' i Bârî nə ke kəri daŋ'ŋ.

¹⁷Na Pol, na wây' dan kaw jeɓ mənɪ kuni kə ɓa rini. Na wây' semde rin wə ndo' vun dərwa daŋ' ndəna'a: Kwa wây' man ndə ni na'a.

¹⁸Namba wə wa' i ɓay Bârî mba Zezu Kris nə ke kə ri daŋ'ŋ.

1 Timothée

1 Timothée 1

¹Na Pol, bə sin Zezu Kris, ce' ndə vari mənɪ Ifray Bə Sɪd' mba ne, ɓay kə Zezu Kris mənɪ namba njay vunduk mba wa rum,

²na wây' ɗerwa mənɪ nə hay' Timote, vay man mə kəzin' wə du dan mənɪ mum ve na: Na wə wa' i Ba mba Ifray kə Bârî mba Zezu Kris kuni ne nu ɓay, we ca, ɓay hebe.

³A suk wə so Efezə, ce' ndə mənɪ na in ne nu kəri mənɪ na ar nu kədan na də nya Maseduwanə. Sôwâ məsin kəta' wə han mənɪ wə ta' kwata' mə hay dan, say a dlay nday kədan kuni ar si,

⁴a in ne nday kədan kuni ar ge njin mə uray kə in semɗe zu tlor ba mbri randay si, zə dan rum wə mbə kə way dan taw, cu mbə kə vari sɪd' mə Ifray mi. Sôwâ gak we vari sɪd' zə handay ve Kris tawa.

⁵Na dlay nu kə dan rum kədan car bə mənɪ wə car mbə vunduk mə fel, kədan car dan ɗik vunduk mə ɓay, ɓay kədan car dan mənɪ ha ve njeɲe.

⁶Sôwâ məsin ar vari ta rum, ɓay handay vi' wə du dle vun mə uraya.

⁷Handay wə wa' kədan handay ke sum pay zu dan dlay Ifray, ama handay cu mun zu dan mənɪ handay wə in ko dan mənɪ handay wə car wa rum kə gbəgboɲ nə mi.

⁸Namba we si, dan dlay nə ɓay, swə la' wə ta zə rum kə vari rum si na.

⁹Say swə nə dla' wa dan mənɪ na: Dan dlay cu cin wə zə sôwâ mənɪ wə gi sin mə njeɲ mi, ama wə zə sôwâ mənɪ cu ta zə dan dlay mi, zə sôwâ mənɪ wə ɓar nya, zə sôwâ mənɪ cu ne wəlok Ifray mi, zə sôwâ mənɪ wə gi kwa mə bro', zə sôwâ mənɪ cu mbâ Ifray, ko kwa mə Ifray mi, zə sôwâ mənɪ wə ci ba nday kə ya nday, zə sôwâ mənɪ wə ci mar,

¹⁰zə sôwâ mənɪ wə gi ghəghay, zə njiwkwa mənɪ wə ɓar kə mənəm nday njiwkwa, zə sôwâ mənɪ wə ra' sôwâ gi coɓ nday, zə sôwâ mənɪ wə hay dan, zə sôwâ mənɪ wə sur vun kə hay dan, ɓay zə sôwâ məsin mənɪ wə gi kwa mənɪ suk sây' kwata' mə kəzini.

¹¹Kwata' rum car mbə du Dan mə Kəɗam mə kə mbra', Dan mə Kəɗam rum car mbə hay' Ifray mənɪ kwa ɗaɲ' wə um bur, mum kə mənɪ ar Dan mə Kəɗam rum wə ɓa rini.

¹²Na wə gi soko ne kə Bârî mba Zezu Kris mənɪ ne gbəgboɲ ne nan kədan na gi sin man kə ndi: Na wə gi soko um ne zə mum kar nan ce' ndə swə mə njeɲ, ɓay mum par nan kədan na gi sin zə rum,

¹³ko kəri mənɪ na ge dan mə bro' wa rum ɓa' si, ko kəri mənɪ na gi boni ne num ɓay i numu. Ama kəri rum, Ifray we ca wa rin zə na cu ve num mi, ɓay na cu we kwa mənɪ na wə gi nə mi.

¹⁴Bârî mba ne bay um ne nan bayrum, bay mum ne dan mēni na gak ve, bay bə mēni namba kə ndi wə du ba mba kə Zezu Kris ne nana.

¹⁵Dan mē njeŋ mēni sôwâ daŋ' gak ve dan way nə ni na: Zezu Kris mbə wa nya kədan mum sid' sum gi kwa mē bro', na pâ nday daŋ'.

¹⁶Ama zə rum, Ifray we ca wa rin, mum wa' i Zezu Kris nə ta' red' vunduk rum ne nan, na swə mēni gi kwa mē bro' pâ sôwâ daŋ' mēni wə də um ve bay də fe nyî mē də hâ.

¹⁷Mbâ kə mbra' kuni ke kə ru də hâ, Jwə mē də hâ, mē dan mar, mē dan we kə i, Ifray mē dāwa! Amen.

¹⁸Vay man, Timote, na ar kwata' rum wə ba ru, ce' ndə dan mēni bə ka' dan ka' dan wa ru ba' si, a car wa dan rum kədan ha gak zi kə vari rum,

¹⁹a car ŋgəɖiŋ' wə du dan mēni ha ve nə, bay a ke kə dan dīk vunduk mē baya. Sôwâ mēsin cu bə ve dan mēni dan dīk vunduk nday wə nday in ne nə mi, zə rum, handay dənok dan mēni handay ve na.

²⁰Imene kə Alezaŋdrə wə du nday, bay na ar nday ta ba Satan kədan handay wum ar vari ge dan mē bro' wa Ifraya.

1 Timothée 2

¹Dan mēni na wə dlay sôwâ mēni ve Kris kə ndi daŋ' kuni ni na: Cop rum, i ci vun Ifray, i in dan kə Ifray, i ci' hay' Ifray, bay i gi soko ne kə Ifray zə sôwâ daŋ',

²i in dan kə Ifray zə sum jwə kə sôwâ daŋ' mēni gay' kə gbəgboŋ wa sôwâ kədan handay gak gay' 'yeŋ kə heɓ, bay ô Ifray kə ta mē baya.

³Kwa rum nə bay bay wə kədam tu Bə Sid' mba Ifray,

⁴mēni wə wa' i sôwâ daŋ' fe sid' bay we dan mē kəzini.

⁵Zə Ifray nə dāw, bay bə vari mē mbok Ifray kə sumra' nə dāw, mum nə swə mē dē kə Zezu Kris

⁶mēni ne tu rum kədan mum tumwa sôwâ daŋ'.

Ndəna', kəri mēni Ifray par nə mbə day si, mum ta' i Ifray wa' i sôwâ daŋ' fe sid',

⁷zə rum, Ifray par nan ce' ndə bə ka' dan kə vay sin kədan na ta' kwa wa dan mēni sôwâ gak ve, bay dan mē kəzin' nə ne kə sôwâ mēni cu zu saŋ sôwâ Zuwiŋ mi, na cu hay dan mi, na wə in tu dana.

⁸Na wə wa' i wə ri daŋ', ŋjiwkwa kuni in dan kə Ifray, kuni ra' ba nday də wafray kə vunduk mē bay dan bak ko dan way dana.

⁹Ndəna', rawkwa kuni ge mbraw mē kə vari rum, kə zur bay dan mbra'a: Kuni kan sâ wa nday kə vari mē kəcik mi, ko kuni no' tēga' mē gi kə ŋjike mē bondo wə ba nday mi, ko kuni ge ri mēni coɓ kəcik mē dē kə «perlə» wə jewre nday mi, ko kuni ge mbraw mēni coɓ kəcik wə tu nday mi,

- ¹⁰ama kuni gi sin mə bay ce' ndə rawkwa məni ô Ifray wə gi.
- ¹¹Na wə wa' i rawkwa wum kwa kə gay' 'yeŋ bay wə du hom tu.
- ¹²Na cu ne vari ne kə rawkwa kədan kuni ta' kwa ko gay' kə gbəgbəŋ wa njiwkwa mi. Say kuni gay' 'yeŋe.
- ¹³Zə Ifray ri Adam cop, bay kəki rum, mum ri Evə.
- ¹⁴Bay Satan cu bu Adam mi, ama mum bu ma, bay ta nde də du kwa mə bro'o.
- ¹⁵Ama rawkwa də sid' kə vra' daw, handay la' gay' ŋgəđiŋ' wə du dan məni handay ve, wə du bə, wə du bay, bay kə zur si na.

1 Timothée 3

- ¹Dan mə njeŋ nə ni na: Swə la' wə wa' kədan mum faŋ bə ji kul sôwâ Kris si, mum wə keɓ sin mə baya.
- ²Say swə məni wə ji kul sôwâ Kris nə ke swə məni cu kə dan mə bro' wa rum mi, say nə ke swə mə suk kə ma mə daw, nə gal kə sum mi, nə dīk dan njeŋ, bay nə ke kə zur, say nə ke swə məni wə ve sôwâ məni wə mbə so um, say nə ke swə məni wə we vari ta' kwa,
- ³say nə ke swə məni wə ar tu rum ge zə sum, ko tle bak ga'ri mi, ama nə ke swə mə kədam kə swə məni wə suk heɓ kə sôwâ məsini. Say nə ke swə məni wə cin vunduk rum wa doknay mi.
- ⁴Say nə we vari kaw cava um bay, bay nə we vari gi daw um mun vun rum kə um mbâ:
- ⁵Zə swə la' cu we vari kaw cava mə kəca um mi si, gi ma kədan mum tle fur kul sôwâ Ifray su?
- ⁶Say nə ke swə məni faŋ vunduk rum kə mbrew mi. La' cu ndəna' mi si, ke məsin mum də mbra' tu rum su na, bay Ifray də um kaw kə dan ce' ndə məni mum kaw Satan kə dana.
- ⁷Say nə ke swə məni sôwâ məni cu ve Kris mi wə um mbâ, kədan handay jed' num mi, bay kədan mum nde də du ruwa Satan mi.
- ⁸Ndəna' kə sum kawba kul sôwâ Kris ta', say kuni ke sôwâ məni wə dan kə vari rum bay kə njeŋ, say kuni ke sôwâ məni wə ce sum juk mi, ko sôwâ məni wə keɓ səlay kə vari vur vur mi.
- ⁹Say kuni ke sôwâ məni wə ji dan mə kəzin' məni Ifray ta' ne nday wa dan məni sôwâ gak ve nə kə bayrum kə dan dīk vunduk mə baya.
- ¹⁰Say kul sôwâ Kris kuni kəŋji' nday cop, bay handay la' cu kə dan mə bro' wa nday mi si, kəki rum handay gak gi sin wə du kul sôwâ Kris ce' ndə sum kawba.

¹¹Ndona' kə rawkwa nday ta', say kuni ke sôwâ mœni wə ta kə zur, bay kuni hay dan wa sôwâ mœsin mi, say kuni ke sôwâ mœni wə gal kə sum mi, ama kuni ke sôwâ mœ njeŋ wə du kwa daŋ'ŋ.

¹²Say sum kawba kul sôwâ Kris kuni ke sôwâ mœni wə suk kə ma mœ daw, bay kuni we vari kaw daw nday kə cava nday bay.

¹³Sum kawba kul sôwâ Kris mœni wə gi sin bay, wə za' ri mœ kə mbra', bay handay gak in dan wa dan mœ mbri mœni handay ve wə du ba nday kə Zezu Kris kə vunduk mœ dawa.

¹⁴Na wə wa' i a dœ hay' ru ga'ri, zœ rum na wə wâŋ' dœrwa mœni nœ hay' ru.

¹⁵Kœdan na la' cu day ga'ri mi si, ha gak we vari mœni swœ gak ta wə du kul sôwâ Ifray, wa' dan ini: Wœ du kul sôwâ mœni wə ta zœ Ifray mœ kœ i, mœni sem dap kœ kwa mœni wə kaw dan mœ kœzini.

¹⁶Kœzin', swœ daw cu gak way dan mœni nœ mi: Dan mœni in dan wa kwata' mba mœni ke pe' nœ toŋo! Mum pâ kœ tu sumra', Simbed' Ifray ta' num njeŋ, bay sum sin Ifray mœ wafray we numu. Sôwâ ka' dan wa rum ne kœ sôwâ mœni cu zu saŋ sôwâ Zuwif mi. Sôwâ nya ve num, bay Ifray tle num ta wafraya.

1 Timothée 4

¹Simbed' mœ Kœleŋ in dan mœni nœ tœlaka: Kœ bœka mœ kœki, sôwâ mœsin wœ dœ ar dan mœni handay ve nœ, handay wœ dœ ta zœ simbed' cem cem mœni wœ vi' sôwâ bay kœ kwata' gam,

²mœni car mbœ du vur vur sum hay dan mœni dan dœk vunduk nday mar si, ce' ndœ mœni swœ mœni tle njike mœni ti ku bay mgbâ' swœ kœ ndi.

³Sôwâ mœni kuni wœ ta' kwa mœni na: tak dan cin nœi ko ti kwati cem cem nœ bro', ama Ifray gi kwati rum kœdan sôwâ mœni ve Kris bay we dan mœ kœzin' kuni gak ti kœki mœni handay gi soko ne kœ Ifraya.

⁴Zœ kwa daŋ' mœni Ifray gi nœ bay, bay swœ cu gak vad' kwa daw du nday mi, ama say swœ ve kwa daŋ' kœ gi soko ne kœ Ifray wa rum.

⁵Zœ dan Ifray kœ soko mœni swœ nœ gi ne kœ Ifray nœ wœ gi kwa rum faŋ bay hay' Ifraya.

⁶Ha la' ta' kwa mœni kuni ne kœ daw ba mba si, ha dœ ke bœ sin Zezu Kris mœ bay, ha dœ ta' i ha wœ ur nyî ru kœ dan mœni ha ve, bay kœ kwata' mœ kœzin' mœni ha wœ ta zœ rumu.

⁷Ama a vad' njin mœ uray mœni wœ dœnok dan mœni ha ve nœ kœ dan mœ uray mœni kœtok kuni wœ in, a gi tu ru kœ gbœgboŋ kœdan a suk wœ du tlœba nœi kœ Ifraya.

⁸Sin mœ gi kœ tu nœ bay, ama bay rum kî to', zawa, suk wœ du tlœba nœi kœ Ifray nœ kœ sin wœ du ko mi su daŋ', zœ dan rum wœ mba ne nyî mœ tam kœ bœka mœni wœ dœ mba.

⁹Dan rum nə njeŋ, ɓay sôwâ daŋ' gak ve dan waya.

¹⁰Zə rum, namba wə gi sin ɓay zi wa dan rum, namba njay vunduk mba wa Ifray mə kə i məni Bə Sid' sôwâ daŋ', pā daŋ' rum, mum Bə Sid' sôwâ məni ve numu.

¹¹A dlay, ɓay a ta' kwa məni kuni daŋ'ŋ.

¹²A ar swə ɗaw jed' nu zə i ha vay jid' mi. Ama a ke bə ta' vari zə sôwâ məni ve Kris wə du dan ge wû, sem ta wû, bə wû, dan məni ha ve, ɓay kəleŋ wû.

¹³Kəri məni ha wə ji wa rin, a ke kə in 'Derwa Ifray kor sôwâ daŋ', kə ka' dan ɓay ta' kwa nday ne.

¹⁴A ar kwane Ifray məni Simbed' Ifray ne nu kəri məni sum ka' dan in dan wa rum, ɓay sum rôwâ mə du kul sôwâ Kris kuni njay ɓa nday wa ru nə mi.

¹⁵A gi sin rum kə ɓayrum, ɓay a ar tu ri daŋ' zə sin rum kədan sôwâ daŋ' gak we i sin wû də kofo.

¹⁶A ji tu ru kə kwata' wû. A də kofo kə gi kwa rumu. Ha la' gi ndəna' si, ha də sid' tu ru, ɓay ha də sid' sôwâ məni wə mun dan wû ta'a.

1 Timothée 5

¹A dlay swə məni jeŋ tu pā nu si kə bak mi, ama a har num ce' ndə məni mum ba wû. A gi daw barway ce' ndə məni handay njər ru.

²A gi rawkwa məni jeŋ tu pā nu si ce' ndə məni handay ya wû, ɓay a gi daw way ce' ndə məni handay njar ru, a gi kwa rum daŋ' kə ɓaya.

³A mbâ rənda məni handay rənda mə kəzini.

⁴Ama rənda la' kə daw ko kə daw kəlay si, say kuni wum vari məni wə ta' i handay wə ô Ifray wə cava nday cop, ndəna', handay gak kawɓa ba nday kə ya nday ɓay ba mbi nday kə ya mbi nday ce' ndə məni handay gi zə ndaya. Kwa rum wə kəɗam tu Ifraya.

⁵Ma məti ta rənda mə kəzin' rə, ta rənda məti cu kə swə ɗaw kədan tle fur sə mi, ta wə cin vunduk sə wa Ifray, ɓay ta wə o Ifray fəta kə dukri daŋ' kədan nə kawɓa sa.

⁶Ama rənda məti wə keɓ kədan ta suk wə du kəɗam, ta ce' ndə mar, ko ta la' kə i ɓo.

⁷A dlay nday kə dan rum kədan swə ɗaw nə za' dan mə bro' wa nday mi.

⁸Ama swə la' cu tle fur sôwâ um mi si, ɓay pā daŋ' rum, sôwâ cava mə kəca um, ka bə rum ar dan məni mum ve nə si, ɓay mum bro' pā swə məni cu ve Kris mi nə si.

⁹A wây' semɗe rənda də du ɗerwa məni ha wə wây' semɗe rənda wə han nə mi, say ka i rum gi kim gukanki' si, ɓay say tə ke ma məti ke cin nji mə ɗaw sara.

¹⁰Say tə ke ma məti sôwâ we sə kə sin mə ɓay sa: Ta ur daw sə kə ɓayrum, ta ve rəkway məni mbə so sə, ta kol sem ne kə raw sôwâ Ifray, ta kawɓa sôwâ məni ce boni, ɓay ta gi sin mə ɓay cem cem daŋ'ŋ.

- ¹¹Ama a ar dan wây' semde rënda më dëre' dë du dërwa rum si, zë kəri mənï më' njiwkwa la' ti nday bay nday pla' këdan handay fañ cin nji si, handay dë ar vari Kris,
- ¹²bay ndëna', handay dë ke kë dan wa nday zë handay bur dan më vun kofo mənï handay kaw kë rum në si.
- ¹³Bay handay wum vari vi' ri kë gañ so kë so, kwa mənï handay wë gi mənï bro' pâ kwa rum në ni na: Handay fañ sum rum tu kë sôwâ mənï wë ze du dan mənï cu tap nday mi.
- ¹⁴Zë rum, na wë wa' i rënda më dëre' kuni fañ cin nji, kuni vra' daw, bay kuni tle fur so nday këdan sum sî mba za' vari ge dan më bro' wa mba mi.
- ¹⁵Zë rënda mësin ar vari Ifray bay ta zë Satan.
- ¹⁶Ama ma mëti ve Kris la' kë rënda wë du sôwâ së si, say të kawba nday kë tu së, bay të ar cik rum wë du ba kul sôwâ Kris kuni mi, këdan kul sôwâ Kris gak kawba rënda më këzin' mənï cu kë swë daw këdan tle fur nday mi.
- ¹⁷Say kul sôwâ mənï ve Kris kuni kar sum ji kul sôwâ Kris mənï wë gi sin bay du nday nde i fe bal cik nday vun nyem hoë, pâ dañ' rum, sum rôwâ mənï wë ar tu nday kë ka' dan bay ta' kwa.
- ¹⁸Zë Dan rum wây' wë du dërwa: A no' cërak wë vun naw mənï wë pum u në mi, bay wë in ta'a: Bë sin kë vari këdan mum fe bal cik umu.
- ¹⁹A ve dan sôwâ mənï wë tum sem bârî mənï wë ji kul sôwâ Kris kë ndi në mi, say ka sôwâ hoë ko hinji' in njeñ dan wa rumu.
- ²⁰A dlay sôwâ mənï wë gi kwa më bro' wë kor sôwâ dañ' kë gbëgboñ, këdan handay ne wëloko.
- ²¹Na wë wû o kor Ifray kë Zezu Kris, bay sum sin Ifray më wafrañ, a ta zë dan dlay mənï kuni dan gi sôwâ cem cem ko sâ' swë daw pâ swë mësin wë du sin wû mi.
- ²²Kəri mənï ha wë ar sin dë ba swë këdan bë rum gi sin wë du kul sôwâ Kris, a ghar kë cin ba ru wa rum ga'ri mi, a ze wë du kwa më bro' mənï sôwâ mësin wë gi kuni mi. A ji tu ru baya.
- ²³A ce mbi më uray taw mi, ama a ce mbi vra' gu më dë kë «viñë» kî këdan kawba rawti ru, zë ha kë gaë rawti fëta mësin fëta mësin.
- ²⁴Swë gak we kwa më bro' mənï sôwâ mësin wë gi në tëlak, cop kəri mənï sôwâ cu bok dan wa nday mëto'o. Ama swë cu gak we kwa më bro' mənï sôwâ mësin wë gi në tëlak mi, say këki dan boko.
- ²⁵Ndëna' ta', swë gak we sin më bay mənï sôwâ wë gi në tëlak, bay ko swë la' cu gak we sin më bay rum tëlak kë ri rum mi si, sin më bay rum cu gak pe' mi.

1 Timothée 6

¹Say bek daŋ' mēni ve Kris kuni kar sum coḅ nday nde i fe mbâ kēdan swə ḏaw ge dan mē bro' wa semḏe Ifray ko wa kwata' mba mi.

²Say bek daŋ' mēni ve Kris kuni jed' sum coḅ nday mēni ve Kris, zə i handay daw ba mi mi. Zawa, kuni gi sin zə nday ḃayrum, zə sum coḅ nday mēni handay wə gi sin zə nday ḃay wə nday bə, handay sôwâ mēni ve Kris. Kwa mēni ha gak ta' ḃay ka' kuni ni na:

³Swə mēsin la' ta' kwata' mēsin cem, ḃay mum cu ve dan mē kēzin' mēni car mbə hay' Bârî mba Zezu Kris, ko ve kwata' mēni namba ta' mi si,

⁴ka bə rum wə mbra' tu rum, ḃay mum cu we kwa mēsin mi. Mum bə dan ci vun kə way dan wa dan cem cem dle tu si. Kwa rum wə mbə kə sây', dle vun, ge dan mē bro', ḏik dan mē bro' wa sôwâ,

⁵ḃay dle vun mē dan ndo' vun mbok sôwâ mēni dan ḏik nday ḏənok, ḃay handay cu we dan mē kēzin' za' mi, handay wə ḏik i kwata' nə vari za' ndaka.

⁶Kēzin', kwata' nə ndak mē mbri wə zə swə, mum la' wə tuk kēḏam kə kwa mēni wə ḃa rum si na.

⁷Zə namba cu mbə wa nya mēni nə kə kwa ḏaw mi, ḃay namba cu gak tle kwa ḏaw wə han 'ya kə ndi mēta'a.

⁸La' ndəna' si, namba la' kə kwati kə mbraw ge tu si, kwa rum nde mba si.

⁹Ama sôwâ mēni wə keḃ kēdan handay ndak, Satan wə nday ḃu njay də du kwa mē bro', ḃay handay njay də du kwa sēna' mē lay kə mē bro' ḃayrum mēni ce' ndə ruwa kor nday, kwa rum wə nday vi' ḃay nday ḏənok.

¹⁰Zə bə sēlay nə zə tlor kwa mē bro' cem cem daŋ'ŋ. Sôwâ mēsin wə sēna' kēdan handay ke kə ndi hâ handay vi' tu nday seŋ kə dan mēni handay ve nə, ḃay handay mbə kə boni juk wa tu ndaya.

¹¹Ama, mē ha, swə Ifray, a vad' kwa rum daŋ'ŋ. A keḃ njeŋ, tləḃa nji kə Ifray, dan mēni ha gak ve, bə, red' vunduk, ḃay kēḏama.

¹²A zi zi mē ḃay zə dan mēni ha ve nə, a ve dan nyî mē də hâ zə Ifray ḏe nu kēdan a we dan nyî rum kəri mēni ha in dan mē ḃay wa dan mēni ha ve nə kor sôwâ juk mēni gak in njeŋ dan wa rumu.

¹³Na dlay nu kor Ifray mēni wə ne nyî ne kə kwa daŋ' ḃay kor Zezu Kris mēni in njeŋ dan mē ḃay wa tu rum kor Poŋsə Pilatə kə dan mēni na:

¹⁴A ta zə dan dlay, ḃay a ji dan rum ḃay dan dan mē bro' hâ bəka mēni Bârî mba Zezu Kris wə də mbə,

¹⁵bəka mbə rum də ke kəri mēni Ifray par, mum nə Jwə mē ḏaw mēni sôwâ daŋ' wə um bur, mum nə Jwə wa sum jwə ḃay mum nə Bârî wa sum rôwâ,

¹⁶mum nə ḏaw mēni cu mar mi, mum suk wə ri mē ḃu mēni swə ḏaw cu gak də han mi. Mbâ kə gbəgboŋ mē də hâ kuni ke kə rumu. Amen.

¹⁷A dlay sôwâ mœni wə ndak kə kwa mə nya mœni nə kədan kuni mbra' tu nday mi, a la' ne nday kədan kuni njay vunduk nday wa ndak mœni gak vi' nə mi, ama kuni njay vunduk nday wa Ifray mœni wə mba ne kwa daŋ' bayrum kədan namba tuk kədam wə du kwa rumu.

¹⁸A dlay nday kədan kuni gi kwa mə bay, kuni ndak kə sin mə bay, kuni ne kwane kə sôwâ mœsin, bay kuni ke hœre' kədan kuni jin sôwâ mœsin kə ndak mœni wə ba ndaya.

¹⁹Kə gi ndœna', ka handay wə bawa ndak mə bay mœni cu gak vi' mi zə bœka mœni wə dœ mbœ, bay kə ri rum, handay dœ fe nyî mə kœzini.

²⁰Timote, a ji kwa mœni Ifray ar wə ba ru nə kə bayrum, a vad' dan mə uray mœni wə dœnok dan mœni ha ve nə, bay a vad' dan sôwâ mœni wə faŋwa dan Ifray kə kwa mœni sôwâ wə dœ kə «kwawe» ama kwawe mə kœzin' cu mi.

²¹Zə sôwâ mœsin wə in i handay kə kwawe rum, ama handay fur vari dan mœni handay ve na. Na wə wa' i bay Ifray nə ke kə ri!

2 Timothée

2 Timothée 1

¹Na Pol, Ifray kə mənɪ wa' kədan na ke bə sin Zezu Kris, ɓay mum sin nan kədan na ka' dan wa nyî mənɪ mum kawvun kə mba i namba də ke kə ndi wə du ɓa mba kə Zezu Kris,

²na wây' ɗerwa mənɪ nə hay' Timote, vay man mənɪ na ba: Na wə wa' i Ba mba Ifray kə Bârî mba Zezu Kris kuni ne nu ɓay, we ca, ɓay heɓe.

³Na wə gi soko ne kə Ifray mənɪ na wə gi sin zə rum kə dan ɗik vunduk mə ɓay ce' ndə mənɪ ba mbri man kuni gi, na wə gi soko mə dan ndo' um ne fəta kə dukri ɗaŋ', na wə ɗik dan wa ru kəri ɗaŋ' mənɪ na wə in dan kə Ifraya.

⁴Na wə dla' wa dan zim i ru, ɓay mē' də wû kar wə man ti juk kədan vunduk rin nə tuk kəɗama.

⁵Na wə dla' wa dan mənɪ ha ve mənɪ cu kə vur vur mi, ya mbi wû Loyis kə ya wû Enise, handay ve Kris cop kə ru, na we si njeŋ, ha ve Kris ta'a.

⁶Zə rum, na wə wû har, a ji kwane mənɪ Ifray ne nu kəri mənɪ na cin ɓa rin wa ru na.

⁷Zə Simbed' mənɪ Ifray ne mba nə cu mba gi ne wəlok mi, zawa Simbed' rum wə mba ne gbəgboŋ, kə bə, ɓay kwawe.

⁸Zə rum, a gi zur kə in njeŋ dan wa Bârî mba mi, a gi zur wa rin, ɗaŋgay' um mətə'a. Zawa, a ce boni zə Dan mə Kəɗam ce' ndə gbəgboŋ mənɪ Ifray wə wû ne.

⁹Mum kə mənɪ siɗ' mba ɓay ɗe mba kədan mə ke sôwâ umu. Mum cu gi ndəna' zə sin mənɪ namba gi nə mi, ama zə mum gila' dan rum kə tu rum ɓay ɓay um, mum ne ɓay rum ne mba kə Zezu Kris cop kəri mənɪ mum cu gi kwa ɗaw mətə',

¹⁰ama mgbaŋ ni nə, mum ta' ɓay rum ne mba kəri mənɪ mum sin Bə Siɗ' mba Zezu Kris mbə wa nya. Zə Zezu Kris ndo' gbəgboŋ mar si, ɓay mum ta' nyî mə də hâ kə vari Dan mə Kəɗam,

¹¹Ifray par nan kədan na ka' Dan mə Kəɗam ce' ndə vay sin kə bə ta' kwa.

¹²Zə rum, na wə ce boni mənɪ kuna. Ama zur cu man gi mi, zə na we swə mənɪ na cin vunduk rin wa rum nə si, ɓay na we si njeŋ, mum kə gbəgboŋ kədan mum ji sin mənɪ mum ne nan nə hâ day Bəka rumu.

¹³A kaw dan mə kəzin' mənɪ na ta' ne nu nə ce' ndə kwa mə ta' vari, ɓay a car ŋgəɗiŋ' wə du dan mənɪ ha ve, ɓay bə mənɪ namba kə ndi wə du ɓa mba kə Zezu Kris.

¹⁴A ji kwata' mə ɓay mənɪ sôwâ ta' ne nu kuni kə ɓayrum, zə handay ta' kwa rum ne nu kə gbəgboŋ Simbed' mə Kələŋ mənɪ suk wə vunduk mba.

¹⁵Ha we si, sôwâ mənɪ gay' wə nya Azi ɗaŋ' ar nan si: Figelos kə Ermogenes wə du nday ta'a.

¹⁶Na wə wa' i Bârî nə ta' we ca um ne kə sôwâ cava Onezifor, zə mum jeŋ vunduk ne nan sem raw, zur cu gi num kə də man kar wə so daŋgay' mi.

¹⁷Zawa, kə ri mənî mum mbə day so Romə, mum keḅ nan kə mē' rum hâ mum za' nana.

¹⁸Na wə wa' i Bârî we ca wa rum kə Bəka rumu. Ha we sin bay cem cem daŋ' mənî mum gi wə zə rin wə so Efezə kuni si ta'a.

2 Timothée 2

¹Ha, vay man, a gi tu ru kə gbəgboŋ wə du bay mənî car mbə du ɓa mba kə Zezu Kris.

²Dan mənî ha mun na ka' kor sum in njeŋ dan raw, a ar dan rum ɓa sôwâ mənî ha gak cin vunduk ru wa nday, sôwâ mənî gak də ta' kwa rum ne kə sôwâ məsin ta'a.

³A ce boni ce' ndə soje Zezu Kris mə njeŋe.

⁴Soje mənî wə gi sin um cu ze wə du sin mənî sôwâ mə mbok so wə gi nə mi, zə mum wə wa' gi kwa mə kədam tu toŋ umu.

⁵Bə kənji' ne cu gak fe bal cik um mi, say ka mum ne ce' ndə dan dlay rum ini.

⁶Bə kura mənî cik kə gi sin um gak fe vun kwa mə mum copo.

⁷A dīk dan wa dan mənî na in ne nu nə zə Bârî də wû gi kədan ha gak mun zu kwa daŋ'ŋ.

⁸A dla' wa dan Zezu Kris mənî car mbə mar, mum nə vay rawti David, ce' ndə Dan mə Kədam mənî na ka' nə wə in,

⁹na wə ce boni, bay sôwâ jew nan kə cururu ce' ndə mənî handay wə jew sum gi kwa mə bro' zə na wə ka' Dan mə Kədam rumu. Ama handay cu gak jew dan Ifray mi.

¹⁰Zə rum, na wə car ŋgədiŋ' wə du kwa daŋ' zə sôwâ mənî Ifray da' nday kədan handay fe sid' kə mbra' mə də hâ mənî car mbə hay' Zezu Kris.

¹¹Dan mənî nə njeŋe: Namba la' mar kə rum si, namba də ke kə i kə rum ta'a.

¹²Namba la' wə car ŋgədiŋ' wə du boni rum si, namba də ti jwə kə rum ta'a. Namba la' riway wa rum si, mum də riway wa mba ta'a.

¹³Namba la' cu njeŋ mi si, mum wə ke njeŋ, zə mum cu gak riway wa tu rum mi.

¹⁴A gi sôwâ mənî ve Kris dla' wa dan rum, bay a dlay nday kor Ifray kədan kuni dle vun wa dan cem cem mi: Dle vun rum cu kə sin mi, say wə dənok sôwâ mənî wə mun dan rumu.

¹⁵A gi tu ru kə gbəgboŋ kədan Ifray wû kar ce' ndə swə mənî mum kənji' num bay za' num bay, ko bə sin mənî cu gi zur wa sin um mi, bə sin mənî wə ka' dan mə kəzin' kə vari rumu.

¹⁶A vad' dan dle vun mə uray məni wə dənok dan məni ha ve nə, zə sôwâ məni wə gi kwa rum də bul nji kə Ifray də kofo də kofo.

¹⁷Kwa məni handay wə ta' də ke ce' ndə mbir mə mbri məni wə ti tlew tu. Imene kə Filetos wə du ndaya.

¹⁸Handay fur vari mə kəzin', bay handay gi sôwâ ar dan məni handay ve kə in i ri məni Ifray wə də ra' sôwâ mbə mar han nə pâ si.

¹⁹Ama tor zu məni Ifray tor nə suk ngəđiŋ'ŋ. Dan məni kuni wây' wə wa tor zu rumu: «Bârî we sôwâ um bay kəreme: Say sa su daŋ' məni in i mum mə Bârî, nə ar gi kwa mə bro'o.»

²⁰Wə rawti so mə toŋ, tasaw cem cem kəta' wə hana. Tasaw məsin ri kə njike mə tlew bay njike mə bondo, bay tasaw məsin gi kə gu bay rubu. Tasaw məsin njay cem zə gi cer, bay tasaw məsin zə gi sin bəka daŋ'ŋ.

²¹Swə la' ar kwa mə bro' daŋ' məni na in dan wa nday kuni si, Ifray də um ne sin mə kə mbra', zə bə rum ar tu rum ne kə Bârî um cete. Mum kə sin hay' Bârî um, bay mum həre' kədan mum gi sin mə bay cem cem daŋ'ŋ.

²²A vad' kwa səna' daw barway, a keḅ njeŋ, dan məni ha gak ve, bə, bay heḅ kə sôwâ məni wə də sem Bârî kə vunduk mə baya.

²³Ama a vad' way dan mə lay mə dan sin, ha we si. Way dan rum ndo' kə dle vun.

²⁴Bay bə sin Bârî cu kə vari dle vun mi, say nə ke swə məni wə suk kədam kə sôwâ daŋ', nə we vari ta' kwa, bay nə ke swə məni wə red' vunduk rumu.

²⁵Say nə ke swə məni wə dlay sum sî um kə kədam: Ke məsin Ifray də nday ne vari kədan handay faŋ vunduk nday bay mun dan mə kəzin' su na,

²⁶ndəna', handay də faŋ mbə vari mə bay, bay handay də wur mbə ruwa məni Satan kaw nday kə ndi bay nday gi gi sin məni mum wə wa'a.

2 Timothée 3

¹A dla' wa dan məni nə kə bayrumu: Ri mə kəcik wə də mbə kəri məni wə də mbə kə ndo' vun nya.

²Zə sôwâ wə də bə tu nday, bə səlay, ge dan wa tu nday kor sôwâ, bay mbra' tu nday, handay wə də ge dan mə bro' wa Ifray, bay handay cu də mun vun sôwâ nday mi, handay cu də gi soko ne kə swə daw, ko mbâ kwa mə Ifray mi.

³Handay cu də ke kə bə ko kə we ca mi, handay wə də ke sôwâ məni wə hay dan wa sôwâ məsin, sôwâ məni cu gak tak tu nday mi, sôwâ məni wə bəghaw, bay sôwâ məni wə sî kwa mə baya.

⁴Handay wə də ke sôwâ məni wə ar sôwâ nday də ba sum sî nday, sôwâ məni wə gi kwa dan dik dan, bay sôwâ məni wə mbra' tu nday, handay wə də ke sôwâ məni wə bə kwa mə kədam tu nday pâ məni handay wə bə Ifraya.

- ⁵Handay wə də ke sôwâ mənî wə gi tu nday ce' ndə sôwâ mənî ve Kris, ama handay wə vad' gbəgboŋ mə kəzini. A ji tu ru hay' sôwâ mənî kuna!
- ⁶Sôwâ məsin du nday wə də cok də rawti so cem cem bay bu rawkwa mə tətâ mənî wə cik kə kwa mə bro' bay səna' kwa nday wə nday bu.
- ⁷Handay wə keḅ kədan handay wum kwa bəka daŋ', ama handay cu gak we dan mə kəzin' kpe mi.
- ⁸Ce' ndə Janes kə Jambres vad' Moyizə, sôwâ mənî kuni wə vad' dan mə kəzin' ta', handay sôwâ mənî dan dīk nday cu kə sin mi, bay dan mənî handay ve nə uraya.
- ⁹Ama handay cu gak də kofo bayrum mi, zə sôwâ daŋ' də we lay nday ce' ndə mənî kwa rum gi kə Janes kə Jambres.
- ¹⁰Ama mə ha, ha ta zə kwata' man, sem ta man, dan dīk man, dan mənî na ve, red' vunduk rin, bə man, gbəgboŋ man,
- ¹¹boni man, bay cik man, ha we kwa daŋ' mənî mbə wa rin wə so Anṭiyosə, kə so Ikoniom, bay so Listrə kuni si. Bay ha we boni mə mbri mənî na ce! Ama Bârî sid' nan mbə du kwa rum daŋ'ŋ.
- ¹²Kəzin', sôwâ daŋ' mənî wə wa' kədan handay ke sôwâ mə njeŋ wə du ba nday kə Zezu Kris, handay də ce boni.
- ¹³Ama sôwâ mə bro' bay sôwâ mə vur vur wə də gi kwa mə bro' də kofo də kofo, handay də vi' sôwâ məsin, bay handay də vi' tu nday ta'a.
- ¹⁴Mə ha, a car ŋgəḍiŋ' wə du kwa mənî ha wum bay ha ve kə cin vunduk ru wa ndaya Ha we sôwâ mənî ta' kwa ne nu kuni si.
- ¹⁵Daka nyêw wû, ha we Derwa Ifray mənî gak wû ne kwawe mənî gak wû ta' sid' mənî sôwâ wə fe kəri mənî handay ve Zezu Kris.
- ¹⁶Dan daŋ' mənî wây' wə du Derwa Ifray car wə hay' Ifray mbə, Dan rum bay kədan ta' dan mə kəzin', kədan dlay sôwâ mənî gi kwa mə bro', kədan gila' dan mə bro', bay kədan ta' vari mə njeŋ ne kə sôwâ,
- ¹⁷kədan dan rum gila' swə mənî wə gi sin zə Ifray bay um ne kwa daŋ' mənî mum kə mē' rum kədan mum gi sin mə bay kə ndi daŋ'ŋ.

2 Timothée 4

- ¹Na wə wû o kor Ifray kə Zezu Kris mənî wə də bok dan wa sôwâ mənî kə i kə sôwâ mənî mar, mum kə mənî wə də mbə kədan mum suk jwə wa sôwâ um, zə rum na wə wû o:
- ²A ka' Dan Ifray ne kə sôwâ kə gbəgboŋ, ko kəri mə bay, ko kəri mə bro', a mgbor nday, a dlay nday, bay a jeŋ vunduk ne nday, a ta' kwa ne nday kə red' vunduk mə njeŋe.

³Zə ri wə də mbə, bay kəri rum, sôwâ cu də mun kwata' mə kəzin' mi, ama handay wə də ta zə kwa wa' nday, bay handay wə də keɓ raw sum ta' kwa mənɪ wə də ta' kwa mənɪ handay kə mē' mun rum kuni nday ne.

⁴Handay wə də ar dan mə kəzin', bay handay də faɲ ar dan dɪk nday daɲ' wa nɟin mə uraya.

⁵Ama mə ha, a tak tu ru du kwa daɲ', a reɗ vunduk ru du boni, a gi sin gi bə ka' Dan mə Kəɗam, bay a gi sin gi bə sin Ifray kə vari rumu.

⁶Mə na, vəswə rin həre' kə faɲ kwane mənɪ wə wu' ce' ndə mənɪ sôwâ wə wu' mur wa kwa po' fur, ri mar rin mbə si.

⁷Na zi zi mə bay, na ne hâ ta day vun ndo' ne, bay na kaw dan mənɪ na ve nə ɲgəɗɪɲ'ɲ.

⁸Bay mgbaɲ ni nə, bal cik gaɲsem wə man ji, kə bəka rum, Bârî, bə ɓok dan mə nɟeɲ wə də man ne nɟeɲ um ce' ndə mənɪ sôwâ wə no' njukwa wa swə mənɪ suk gaɲseme. Bay mum cu də ne nɟeɲ rum man ne taw mi, ama mum də ne kə sôwâ daɲ' mənɪ wə ji bəka mənɪ mum wə də mbə kə ndi nə kə ba.

⁹A keɓ vari mbə ndewa kə rin ga'ri.

¹⁰Demas ar nan zə mum bə kwa nya mə tama. Mum 'ya ta so Tesalonikə. Kresaɲsə 'ya ta nya Galasi, bay Titə 'ya ta Dalmasi.

¹¹Lukə gwa' hay' rin ɗaw sara. A tle Markə mbə kə rum, zə mum gak man jin du sin mana.

¹²Na sin Tisikə ta so Efezə.

¹³kəri mənɪ ha də mbə, a tle mbraw man mənɪ na ar wə so Trowas wə rawti so Karpus, a ra' ɗerwa man mbə kə ndi ta', pâ daɲ' rum ɗerwa mənɪ wây' wa dɪke.

¹⁴Bə kəda mə ɗe kə Alezaɲdrə gi nan bro' juku. Bârî wə də um po' ce' ndə sin mənɪ mum gi.

¹⁵Ha ta', a ji tu ru hay' rum, zə mum vad' dan daɲ' mənɪ namba wə in kuni kə gbəgbəɲo.

¹⁶Kəri mənɪ na car kor bə ɓok dan kədan na ge dan mə siɗ tu rin vun kofo, swə ɗaw cu jin nan han mi, sôwâ daɲ' ar nana. Na cu wə wa' i Ifray nə sa' bal rum wa nday mi.

¹⁷Ama Bârî car kə rin bay ne gbəgbəɲ ne nan kədan na gak ka' Dan mə Kəɗam ne kə sôwâ mənɪ cu zu saɲ sôwâ Zuwif mi daɲ'ɲ. Bay Ifray siɗ nan mbə vun lumu.

¹⁸Bârî də man siɗ mbə du kwa mə bro' daɲ', bay mum də man gi zə wə ri mənɪ mum wə də suk jwə wa sôwâ um nə dan dan mə bro'o. Mbra' nə ke kə rum də hâ! Amen.

¹⁹A kaw jeɓ Priskila kə Akilas, a kaw jeɓ sôwâ so Onezifor.

²⁰Erastə suk wə so Korɪntə, bay na ar Trofim wə so Mile zə mum kə gaba.

²¹A keḅ vari mbə hay' rin cop vun cer simbede. Eyubulus, Pudaṅsə, Linus, Klodiya, ḅay daw ba mba məsin kaw jeḅ ru.

²²Na wə wa' i Bârî nə ke kə ru. Na wə wa' i ḅay Ifray nə ke kə ri dan'ḡ.

Tite

Tite 1

¹Na Pol, bæ sin Ifray bay bæ sin Zezu Kris mæni Ifray par nan kədan na jeŋ sôwâ mæni Ifray da' nday, wə du dan mæni handay ve, bay ta' dan mə kəzin' mæni kwata' mba wə ta' nə nday ne,

²kədan handay njay vunduk nday wa dan nyî mə də hâ, cop kə ri mæni Ifray cu gi nya mətə', mum swə mæni cu hay dan mi, mum kawvun i mum də mba ne nyî rum,

³bay ri mæni mum par nə mbə day si, mum ta' dan nyî rum wə du dan um, mum ar dan rum wə ba rin, bay na ka' dan rum ce' ndə mæni Bə Sid' mba Ifray ne vari rum,

⁴Na wây' dərwa mæni nə hay' ru, Titə, vay man mə kəzin' wə du dan mæni namba ve nə, na wə wa' i Ba mba Ifray kə Bə Sid' mba Zezu Kris kuni ne nu bay kə hebe.

⁵Na ar nu wə nya Kretə mæni suk wə du mbi kədan a gila' kwa mæni gwa' i gi, bay kədan a da' sum rôwâ mæni wə gi sin du kul sôwâ Kris wə du so daŋ', a dla' wa dan mæni na ta' ne nu: Say bârî mæni wə gi sin du kul sôwâ Kris nə ke swə mæni cu kə dan mə bro' wa rum mi.

⁶Say nə ke swə mæni dan dan wa, nə ke swə mæni suk kə ma mə dāw, bay daw um kuni ke daw mæni ve Kris bay kuni ke daw mæni sôwâ məsin cu gak in i handay wə gi sin mə bro', ko cu mun vun sôwâ nday mi mi.

⁷Zə swə mæni wə ji kul sôwâ Kris nə swə mæni wə gi sin Ifraya: Zə rum, say nə ke swə mæni cu kə dan mə bro' wa rum mi, say nə ke swə mæni cu mbra' tu rum, ko tle bak ga'ri mi, say nə ke swə mæni cu ar tu rum ge zə sum, ko gi ghaw mi, bay say nə ke swə mæni cu keɓ səlay kə vari vur vur mi.

⁸Say nə ke swə mæni wə ve sôwâ mæni wə mbə so um, bay wə bæ kwa mə bay, say nə ke swə mæni wə dîk dan njeŋ, nə ke swə mə njeŋ, nə ke swə mə dan dan mə bro', bay nə ke swə mæni gak tak tu rum,

⁹say nə ke swə mæni wə car ŋgəɗiŋ' wa dan mæni mum cin vunduk rum wa rum, dan mæni car mbə du kwata'. Ndəna', mum də za' vari kədan mum jeŋ vunduk ne kə sôwâ məsin kə vari kwata' mə kəzin' bay kədan mum ta' dan wa dan dîk mə bro' nə kə sôwâ mæni wə vad' kwata' rumu.

¹⁰Zə sôwâ juk mæni wə vad' kwata' rum bay wə bu sôwâ məsin kə dan nday mə uray kəta', pâ daŋ' rum, handay wə du sôwâ Zuwif mæni ve Kris.

¹¹Say a tak ndaya. Zə handay wə dənok sôwâ daŋ' wə du cava cem cem bay wə ta' kwa mæni handay cu kə vari ta' rum mi, handay wə gi ndəna' kədan handay fe səlay kə vari vur vur ndaya.

¹²Swə nya Kretə məsin, mum nə bæ ka' dan mə du sum ka' dan nday, mum in kə tu rumu: «Bəka daŋ', sôwâ nya Kretə kə sum hay dan, sôwâ mə bro' ce' ndə tlew goɓ, bay sum ndal mæni wə dîk dan wa kwati tawa.»

¹³Bay dan mēni mum in nē kēzini. Zē rum, say a dlay nday kē gbəgbonj kēdan kuni gay' kē dan mēni handay ve nē njeje.

¹⁴Bay kēdan kuni ta zē njin sôwâ Zuwif mē uray ko dan dlay mēni car mbē du dan dīk sôwâ mēni ar dan mē kēzin' si kuni mi.

¹⁵Kwa daŋ' fel zē sôwâ mē kē vunduk fel, bay kwa daŋ' kē day zē sôwâ mēni wē gi kwa mē kē day bay cu ve Kris mi, zē kwawe nday kē dan dīk vunduk nday wē ta zē kwa mē kē daya.

¹⁶Handay wē in i handay we Ifray, ama sin nday wē ta' i handay cu we Ifray mi. Handay bro', handay cu mun vun mi, bay handay cu gak gi sin mē bay dāw mi.

Tite 2

¹Ama mē ha, a ta' kwa mēni car mbē du kwata' mē njeje.

²A in ne kē njiwkwa mē kēsa' kuni gal kē sum mi, kuni ke sôwâ mēni sôwâ mēsin gak nday mbâ, kuni ke sôwâ mēni wē dīk dan njeŋ, bay kuni ke sôwâ mēni wē car ŋgədiŋ' wē du dan mēni handay ve, du bē nday, bay du red' vunduk ndaya.

³Ndēna' ta', a in ne kē rawkwa mē kētok kuni ke sôwâ mēni wē ta ce' ndē sôwâ njeŋ wē ta. Say kuni ke rawkwa mēni cu hay dan, ko cu ar tu nday njay zē sum mi, say kuni ke rawkwa mēni wē ta' kwa mē bay,

⁴kēdan rawkwa mē dēre' gak wum vari bē njiwkwa nday kē daw nday,

⁵bay kuni ke rawkwa mēni wē dīk dan njeŋ bay ke rawkwa mē bay, say kuni ke rawkwa mēni wē gi sin mē bay wē rawti so nday, bay kuni ke rawkwa mēni wē mun vun njiwkwa nday kēdan swē dāw nē za' vari ge dan mē bro' wa dan Ifray mi.

⁶Ndēna' ta', a dlay daw barway kuni ke sôwâ mēni wē dīk dan njeŋ wē du kwa daŋ'ŋ.

⁷Ha kē tu ru, say a ke swē mēni wē gi sin mē bay mēni sôwâ mēsin gak jēnok, say a ke swē mēni sôwâ mēsin gak mbâ wē du kwata' wū mē kēzin',

⁸a ta' kwa kē dan mē njeŋ mēni sôwâ cu gak jed' mi, kēdan zur nē gi sum sî wū zē handay cu gak za' dan mē bro' wa mba mi.

⁹Say bek kuni mun vun sum coḅ nday, bay kuni gi kwa mē kēdam tu nday wē ri daŋ'ŋ. Say kuni ke sôwâ mēni cu vad' dan ge nday,

¹⁰ko kuni kēy hura kwa zē nday dāw mi. Zawa, say kuni ke sôwâ mē bay bay njeŋ bēka daŋ' kēdan kwata' mēni in dan wa Bē Sid' mba Ifray nē fe mbra' wē du sin daŋ' mēni handay wē gi.

¹¹Zē Ifray ta' bay um mēni wē ne sid' ne kē sôwâ daŋ' nē ne mba.

¹²Bay rum wē mba ta' i mē ar ta mē bro' kē kwa sēna' mē nya kēdan mē ta kē dan mē njeŋ, njeŋ, bay kē ô Ifray wa nya mēni nē,

¹³kəri mənɪ namba wə ʒi bəka mə kəɗam mənɪ namba njay vunduk mba wa rum, kə Bəka rum, mbra' Ifray mba mə toŋ kə Bə Sid' mba Zezu Kris wə də pā.

¹⁴Mum ne tu rum kə tu rum zə mba kədan mum tumwa mba wə du sin mə bro' ɗaŋ', kədan mum mba ɡi faŋ sôwâ mə ɓay, sôwâ mə kəca um, mənɪ wə ke kə sây' ɡi sin mə ɓaya.

¹⁵A ta' kwa mə ndani kuni, a ta' kwa rum kə gbəgbonɔ wû ɗaŋ' kədan a jɛŋ vunduk ne kə sôwâ mənɪ wə mun dan wû, ɓay a dlay ndaya. A ar swə ɗaw du nday jɛɗ nu mi.

Tite 3

¹A dla' wa dan mənɪ nə ne kə sôwâ ɗaŋ'ɲ: Say kuni ar tu nday zə sôwâ mənɪ wə ta' vari kə sôwâ mənɪ wə suk gbəgbonɔ wa nday, say kuni mun vun nday, ɓay kuni ke hərə' kə ɡi sin mə ɓay ɗaŋ',

²say kuni ge dan mə bro' wa swə ɗaw mi, say kuni gay' heɓ kə sôwâ, ɓay kuni ɡi kwa mə ɓay, say kuni ta' kəɗam nday ne kə sôwâ bəka ɗaŋ'ɲ.

³Zə ɓa' si, namba ke dan kwawe, dan mun vun, ɓay du dan mə bro' ta', kwa səna' kə kwa mə kəɗam tu cem cem ke kaw mba ce' ndə bek, namba ke ta du kwa mə bro' kə sây' mə bro', sôwâ məsin ke sî mba, ɓay namba ke sî nday ta'a.

⁴Ama kəri mənɪ Bə Sid' mba Ifray ta' ɓay um kə bə um mənɪ mum kə ndi zə sôwâ nə ne mba,

⁵mum sid' mba, mum cu ɡi ndəna' zə namba ɡi sin mə njeŋ mi, ama zə mum we ca wa mba, mum sid' mba kəri mənɪ Simbed' mə Kələŋ kol mba kədan mum mba vra' kə mbrew, ɓay mba ɡi faŋ sôwâ mə mbrew.

⁶Zə Ifray sin Simbed' rum ne mba ɓayrum kə Bə Sid' mba Zezu Kris

⁷kədan Ifray mba ɡi njeŋ kor rum zə ɓay um, ɓay kədan namba gak fe nyî mə də hâ mənɪ namba njay vunduk mba wa rum nə wə ɓa rumu.

⁸Dan rum kəzin', na wə wa' i a car wa dan rum kə gbəgbonɔ kədan sôwâ mənɪ ve Ifray kuni ar tu nday kədan kuni ɗik dan ɡi sin mə ɓaya. Kwa rum ɓay ɓay kə sin zə sôwâ.

⁹Ama a vad' way dan mə lay, in semɗe zu tlor ba mbri ramba, dle vun, kə ɡi ghaw wa dan dlaya: Dan rum uray dan sini.

¹⁰A dlay swə mənɪ wə mbə kə dan mə ɓul nji sem hoɓ, ɓay kəki rum a ar numu:

¹¹Ha we si, swə mənɪ wə ɡi kwa mə ndani nə, mum fur vari mə njeŋ, ɓay kwa mə bro' um wə ta' i mum vi' vari.

¹²Kəri mənɪ na wə də sin Artemas ko Tisikə hay' ru, a keɓ vari kədan a mbə ndewa kə rin wə so Nikopolis, zə na gila' dan kədan na suk cer simbed' wə hana.

¹³A keɓ vari kədan a kawɓa bə ɓok dan mə ɗe ke Zenas kə Apolos kədan kwa məsin nə kəɗa nday zə vari rəkway nday mi.

¹⁴Say sôwâ mba kuni wum vari gi sin mə ɓay ta', kədan kuni kawɓa sôwâ mənɪ kə mē' kawɓa. Handay la' cu gi ndəna' mi si, sin nday daŋ' də ke uraya.

¹⁵Sôwâ daŋ' mənɪ wə ti kə rin kaw jeɓ ru. A kaw jeɓ bāy mba mənɪ ve Kris. Na wə wa' i ɓay Ifray nə ke kə ri daŋ'ŋ.

Philémon

Philémon 1

- ¹Na Pol, daɲgay' zə Zezu Kris, na kə vay ba mba Timote, namba wây' dɛrwa mənɪ nə hay' ru, Filemonɔ, bây mba mənɪ wə gi sin dɛw kə mba,
- ²ɓay hay' kul sôwâ Kris mənɪ wə ɓa so wû, ɓay hay' vay ba mba mə dɛ kə Afiya, ɓay hay' Arsipe, swə mənɪ wə zi mə dɛw kə mba.
- ³Namba wə wa' i Ba mba Ifray kə Bârî mba Zezu Kris kuni ne ni ɓay kə heɓe.
- ⁴Kəri daɲ' mənɪ na wə in dan kə Ifray, na wə dɪk dan wa ru, Filemonɔ, ɓay na wə gi soko ne kə Ifray man,
- ⁵zə na mun dan wa dan bə wû mənɪ ha kə ndi zə raw sum ô, ɓay wa dan mənɪ ha ve Bârî mba Zezu kə ndi.
- ⁶Na wə o Ifray kədan a ta' dan mənɪ ha ve nə ne kə sôwâ məsin kəri daɲ'ɲ: A də kofo kə we kwa mə ɓay cem cem daɲ' mənɪ namba kə ndi wə du ɓa mba kə Kris.
- ⁷Vay ba man, bə wû ne nan kədam ɓay jɛɲ vunduk rin juk, zə ha jɛɲ vunduk ne kə raw sum ô.
- ⁸Zə rum, ko wə du ɓa man kə Kris, na kə vari kədan na wû dlay wa kwa mənɪ ha gak gi,
- ⁹bə mənɪ wə vunduk rin nə pla' nan kədan na wû o. Na Pol, swə mənɪ kəsa' si, ɓay mgbaɲ ni nə, na daɲgay' zə Zezu Kris,
- ¹⁰na wə wû o zə Onezim, zə na gi num faɲ vay man kəri mənɪ mum ve Kris ti wə so daɲgay'i.
- ¹¹Ba' si, mum cu ke kə sin hay' ru mi, ama mgbaɲ ni nə, mum kə sin hay' ru kə rin hoɓ jaka.
- ¹²Mgbaɲ ni nə, na faɲ um sin də hay' ru, mum nə vunduk rini.
- ¹³Na wə wa' kəzə i nə suk hay' rin kəri mənɪ na wə so daɲgay' zə Dan mə Kədam, kədan nə gi sin zə rin wə tan ru.
- ¹⁴Ama na cu wa' gi kwa rum dan ha ve dan rum mi, na cu wa' wû gi kə dole kədan a gi kwa mə ɓay hay' rin mi, ama na wə wa' i a gi kwa rum kə bə wû.
- ¹⁵Ke məsin Onezim bul nji kə ru zə ri kî, kədan mum faɲ də suk kə ru də hâ su na.
- ¹⁶Zə mgbaɲ ni nə, mum cu bek taw za' mi, ama mum pâ bek si, zə mum vay ba mba mənɪ na ba: Mə na, na bə num dle tu si, ama mə ha, na dɪk i ha də um bə man pâ si. Ha cu də um bə ce' ndə bek taw mi, ama ce' ndə vay ba mba wə du ɓa mba kə Bârî ta'a.
- ¹⁷Ha la' kar nan ce' ndə bây hoɓ sin wû si, a ve num ce' ndə mənɪ ha wə man ve.

- ¹⁸Mum la' gi dan mə bro' hay' ru, ko mum la' kə bal wû si, a ar dan rum wa rini.
- ¹⁹Na wây' dan məni nə kə ɓa rini: Na Pol, na də wû po' kwa rumu. Na cu wa' in i ha kə bal man wa ru zə na bə sɪd' wû mi!
- ²⁰Zə rum vay ba man, na wə wû o, a gi kwa məni na o nə kə bə mə Bârî. A gi vunduk rin tuk kədam wə du ɓa mba kə Kris.
- ²¹Na we si njeŋ, ha də gi kwa məni na wə wû o: Zə rum, na wây' dərwa məni nə hay' ru, ɓay ha wə də gi kwa məsin pā məni na o nu.
- ²²Na wə o kwa məsin kəreme: A gila' ri dam zə rin, zə na wə dîk i Ifray wə də ve dan o mi, ɓay də man ne vari kədan na də so mi.
- ²³Epafras məni wə so daŋgay' kə rin zə Zezu Kris kaw jeɓ ru,
- ²⁴ndəna' ta', Markə, Aristarkə, Demas, ɓay Lukə, sôwâ məni wə gi sin kə rin kuni kaw jeɓ ru.
- ²⁵Na wə wa' i ɓay Bârî mba Zezu Kris nə ke kə ri.

Hébreux

Hébreux 1

- ¹Ba' si, Ifray in dan ne kə ba mbri ramba kə vun sum ka' dan um sem raw kə vari cem cem,
- ²ama wə du bəka mə tam mənɪ kuni, mum in dan ne mba kə vun Vay um mənɪ mum gi kwa daŋ' kə rum, ɓay mum par num kədan mum ke bə za' kwa rum daŋ'ɲ.
- ³Mum wə ta' mbra' Ifray də rəka takram, mum nə foto Ifray rek rek, ɓay mum wə ji kwa daŋ' kə gbəgbəŋ dan vun rumu. Kəki mənɪ mum kol kwa mə bro' mənɪ wə vunduk sôwâ ta rəka, mum faŋ ta suk wafray ɓa fun Ifray mə kə gbəgbəŋ daŋ'ɲ.
- ⁴Vay nə faŋ swə mə kə mbra' pâ sum sin Ifray mə wafray, ɓay Ifray ne sem mə kə mbra' ne num pâ semdɛ mə handay si.
- ⁵Zə Ifray cu in ne kə vay sin mə wafray ko daw wə du sum sin um mə wafraya: «Ha nə Vay man, tam na faŋ Ba wû» si mi. Bay mum cu in dan wa vay sin mə wafray ko daw wə du sum sin um mə wafraya: «Na də faŋ Ba um, ɓay mum də faŋ Vay man» na mi.
- ⁶Ama kəri mənɪ Ifray wə də sin Vay mə mbri um mbə wa nya kərem, mum ini: «Daw sin Ifray mə wafray daŋ' də um mbra'a.»
- ⁷Dan mənɪ Ifray in wa sum sin um mə wafray nə ni na: «Ifray gi sum sin um mə wafray faŋ simbed, ɓay mum gi sum sin um faŋ se'le ku.»
- ⁸Ama dan mənɪ mum in wa vay nə ni na: Ri suk jwə wû, Ifray zə də hâ, dliw ti jwə wû nə dliw mə njeŋe: Ha wə suk jwə kə vari mə njeŋe.
- ⁹Ha wə wa' njeŋ, ama ha wə sî dan mə bro', zə rum, Ifray, Ifray wû, par nu, ɓay wu' mur ne nu wa, zə rum, ha wə tuk kədam zə mum ne ri mə kə mbra' ne nu pâ mənɪ mum ne kə sôwâ mə kə ru kuni si.
- ¹⁰Mum faŋ in kəreme: «Ha Bârî, ha kə mənɪ gi nya daka təŋ zu rum, ɓay ha kə mənɪ gi wafray kə ɓa ru.
- ¹¹Handay daŋ' də ndo' cet, ama mə ha, ha də ke də hâ. Handay daŋ' də kəmba ce' ndə mbrawa.
- ¹²ɓay ha də nday dɛlak ce' ndə mbraw mə mbri, ɓay handay də samwa ce' ndə sôwâ wə samwa mbrawa. Ama mə ha, ha cu samwa mi ɓay ha cu də kəsa' kpe mi.»
- ¹³Ifray cu in ne kə vay sin mə wafray ko daw wə du sum sin um mə wafraya: «A suk ti, ɓa fun rin, hâ na njay sum sî ru də nya zə sem ru ce' ndə kwa njay sem» mi.
- ¹⁴La' ndəna' si, sum sin Ifray mə wafray kuni sa su? Handay simbed mənɪ wə gi sin Ifray, ɓay Ifray sin nday kədan handay kawɓa sôwâ mənɪ wə də fe sidi ce' ndə bayda.

Hébreux 2

- ¹Zə rum, say mə kaw dan mə kəzin' mənɪ namba mun nə ɲgəɖɪŋ' kədan mə vi' vari mi.
- ²Dan mənɪ sum sin Ifray mə wafray ke in nə, dan rum njeŋ, ɓay swə ɗaw ɗaw ɗaŋ' mənɪ cu ta zə dan rum ko cu mun vun dan rum mi, bə rum də fe bak cik dan bro' umu.
- ³La' ndəna' si, namba la' jed' sɪd' mə mbri mənɪ nə si, namba gak də sɪd' mə ma su? Bârî kə tu rum ka' dan sɪd' rum cop, ɓay sôwâ mənɪ mun dan rum wə vun rum, handay in njeŋ dan rum ne mba,
- ⁴kəri rum, Ifray jeŋ dan nday kə kwa cem cem mə ta' kwa, kə kwa cem cem mə jin' wa sôwâ, ɓay yew cem cem, mum faŋ ɓul kwane Simbed' mə Kəleŋ ne nday ce' ndə mənɪ mum wə wa'a.
- ⁵Zə Ifray cu ar gbəgbəŋ nya mənɪ wə də mbə, nya mənɪ namba wə in dan wa rum nə wə ɓa sum sin Ifray mə wafray mi:
- ⁶Zawa, swə məsin in wə du 'Derwa Ifraya: «Ifray, sumra' nə mi, kədan ha ɗik dan wa rum su? Ko vay sumra' nə mi kədan ha tle fur rum su?
- ⁷Ha gi num faŋ swə mə kî kə ri kî wə kor sum sin Ifray mə wafray, ha faŋ ne mbra' kə mbâ ne num ce' ndə jwa.
- ⁸Ha wə um gi suk gbəgbəŋ wa kwa ɗaŋ'ɲ.» Kəri mənɪ dan rum in i Ifray ne gbəgbəŋ wa kwa ɗaŋ' ne kə sumra', dan rum wa' dan in i mum ar kwa ɗaŋ' wə ɓa rum, cu ar kwa məsin rəka mi. Ama namba cu we sumra' mə tam suk gbəgbəŋ wa kwa ɗaŋ' mətɔ',
- ⁹ama namba we Zezu: Mum kə mənɪ Ifray gi num faŋ swə mə kî kəri kî kor sum sin um mə wafray, ama mgbəŋ ni nə, namba we num kə njukwa jwə mənɪ wə ta' mbra' kə mbâ mənɪ Ifray ne num zə mar mənɪ mum mar zə mba, zə ɓay Ifray, mum fe mar zə sôwâ ɗaŋ'ɲ.
- ¹⁰Ifray kə mənɪ gi kwa ɗaŋ' ɓay wə ji kwa rum, ɓay mum kə mənɪ gi Zezu faŋ swə mə njeŋ zə boni mənɪ mum ce, kədan mum ra' sôwâ juk mbə gay' du mbra' um, zə Zezu nə swə mənɪ wə nday ra' də ri sɪd' kə ndaya.
- ¹¹Zə Zezu mənɪ gi sôwâ kəleŋ, ɓay sôwâ mənɪ mum gi nday kəleŋ, handay ɗaŋ' car zu mbə ri mə ɗawa. Zə rum, Zezu cu kə zur kədan mum nday ɗe kə daw ba um mi.
- ¹²Zə rum, mum ini: «Ifray, na də in dan wa semɗe ru ne kə daw ba man, ɓay na də wû bur kə nyem du raw sôwâ ɗaŋ'ɲ.”
- ¹³Mum in ta'a: «Na də cin vunduk rin wa Ifraya.» 'Bay mum in kəreme: «Na ni kə daw mənɪ Ifray ne nday ne nana.”
- ¹⁴Zə daw kuni kə tlew tu kə vəswə mə ɗaw, zə rum, Zezu kə tu rum faŋ ce' ndə handay, mum tle tu sumra' ce' ndə handay, ɓay mum mar kədan mar um nə ɗənok Satan mənɪ kə gbəgbəŋ mar wə ɓa rum,
- ¹⁵ɓay kədan ulay' sôwâ mənɪ ke ce' ndə bek du bəka nyî nday ɗaŋ' zə handay ne wəlok mara.

¹⁶Zə dan rum njeŋ, mum cu mbə kədan mum kawba sum sin Ifray mə wafray mi, ama ce' ndə Derwa Ifray in i mum mbə kədan mum kawba daw rawti Abraham.

¹⁷Kəki rum, mum faŋ ra' nji kə daw ba um kuni wə du kwa daŋ' kədan mum faŋ toŋ po' fur mənɪ nyen ped' kə we ca zə nday wə du sin um mə njeŋ kor Ifray, kədan vrum kwa mə bro' sôwâ.

¹⁸Bay mgbaŋ ni nə, mum gak kawba sôwâ mənɪ Satan wə nday bu, zə Satan bu num bay mum ce boni ta'a.

Hébreux 3

¹Zə rum, daw ba man mənɪ ve Kris, hi kə mənɪ Ifray dɛ ni, i ve Zezu mənɪ Ifray sin num kədan mum ke toŋ po' fur wa dan mənɪ namba ve bay wə ka'a.

²Mum njeŋ kor Ifray mənɪ par num zə sin um, ce' ndə Moyizə gi sin mə njeŋ wə rawti so Ifray daŋ'ŋ.

³Bə dām so kə mbra' pâ so rum si, ndəna' ta', Zezu kə mbra' pâ mə Moyizə.

⁴Zə so daŋ', sumra' wə dām rum, ama Ifray kə mənɪ gi kwa daŋ'ŋ.

⁵Moyizə gi sin mə njeŋ wə rawti so Ifray daŋ', Ifray cin num ce' ndə bə sin kədan mum in dan mənɪ Ifray wə dɛ in kofo 60,

⁶ama Kris nə Vay mə njeŋ mənɪ Ifray cin num bârî wa so umu. Namba nə so um, namba la' ar vunduk mba kə dan dɪk mba njay wa rum si, namba dɛ tuk kədama.

⁷Zə rum, ce' ndə Simbed' mə Kələŋ ini: Hi la' mun wor Ifray tam si,

⁸i ra' dan rum ce' ndə mənɪ hi gi kəri mənɪ hi ra' ur kə Ifray nə mi. Ce' ndə bəka mənɪ hi kənji' num wə du igopo.

⁹Ifray ini: Wə ri rum, ba mbri rami bu nan bay kənji' nan, ko kəri mənɪ handay we sin daŋ' mənɪ na gi zə nday,

¹⁰wə du kim gufədi'i. Zə rum, na tle bak kə nday, bay na ini: Sôwâ mənɪ kuni wə vi' vari du dan dɪk nday bəka daŋ'ŋ. Handay cu we vari man kpe mi.

¹¹«Na tle bak kə nday, bay na sur vun kə dan mənɪ na: Handay cu dɛ ze wə ri mənɪ sôwâ wə dɛ pemây kə rin han nə kpe mi!»

¹²Daw ba man, i kaw wa ri kədan swə dāw du ri nə ke kə vunduk mə bro', ko way dan mənɪ mum ve nə kədan nə ar Ifray mə kə i mi,

¹³zawa, i jeŋ vunduk nji mbok nji bəka dāw dāw daŋ' kəri mənɪ Derwa Ifray wə dɛ kə «tam», ri rum kəta' wə zə ri, kədan swə dāw du ri nə ar kwa mə bro' bu num bay nə ra' vunduk rum mi.

¹⁴Zə namba dāw kə Kris, namba la' car ŋgədiŋ' wa dan mənɪ namba njay vunduk mba wa rum daka təŋ zu rum hâ ndo' rum si na.

¹⁵Dan mēni 'Derwa Ifray wə in nə ni na: «Hi la' mun wor Ifray tam si, i ra' vunduk ri ce' ndə mēni hi gi kəri mēni hi ra' ur kə Ifray nə mi.»

¹⁶Sa kuni mun wor Ifray bay ra' ur kə rum su? Handay sôwâ daŋ' mēni Moyizə ra' nday wur mbə nya Egip kə ndaya.

¹⁷Ifray tle bak kə sa kuni wə du kim gufədi' su? Kə sôwâ mēni gi kwa mə bro' bay mar wə du igopo.

¹⁸kəri mēni Ifray sur vun kə dan mēni na: Handay cu də cok wə ri mēni sôwâ wə də pemây kə rin han nə kpe mi, mum in dan rum wa sa kuni su? Mum in dan rum wa sôwâ mēni cu mun vun rum mi kuna.

¹⁹Zə rum, namba we handay cu gak ze ta ri pemây rum mi, zə handay cu ve dan rum mi.

Hébreux 4

¹Ifray in i namba də ze wə ri mēni namba də pemây han kə rumu. La' ndəna' si, say mə kaw wa mba kə bayrum kədan swə dāw du ri nə gwa' dan ze wə ri pemây rum mi.

²Zə namba mun Dan mə Kədam ce' ndə sôwâ mēni ke wə du igop, handay mun dan rum, ama dan rum cu gi kwa məsin wə vunduk nday mi, zə kəri mēni handay mun dan rum, dan rum cu jin nday mi.

³Namba, sôwâ mēni ve dan rum, namba də cok wə ri pemây rum, ri pemây mēni Ifray in dan wa rumu: «Na tle bak kə nday, bay na sur vun kə dan mēni na: Handay cu də cok wə ri mēni sôwâ wə də pemây kə rin han nə kpe mi!» Mum in dan rum ndəna', ko kə ndi nə daŋ', sin um ndo' daka kəri mēni mum gi nya,

⁴zə wə ri məsin wə du 'Derwa Ifray, swə məsin wây' dan mēni nə wa fəta pemâya: «Ifray pemây sin um daŋ' kə bəka sedā'a.»

⁵Bay dan mə dāw nə ni faŋ wây' wə ri 'Derwa məsini. Wə ri rum, Ifray ini: «Handay cu də cok wə ri mēni sôwâ wə də pemây kə rin han nə kpe mi.»

⁶Sôwâ mēni mun Dan mə Kədam vun kofo, handay cu ze ta ri pemây rum mi, zə handay cu ve dan rum mi, zə rum, ri kəta' wə zə sôwâ məsin kədan handay cok də hana,

⁷zə rum, Ifray faŋ cin bəka mə mbrew dāw, də kə «tama». Ifray in dan wa bəka rum kəki kim raw kə vun bə vari um David, wə du 'Derwa mēni namba ke ini: «Hi la' mun wor Ifray tam si, i ra' vunduk ri mi.»

⁸Kəzə, Zozuwe la' ra' sôwâ ze ta ri pemây kə nday si, Ifray cu də in dan wa bəka məsin kəki za' mi.

⁹Ndəna', pemây mə ra' nji kə pemây mēni Ifray pemây kə ndi kə bəka sedā' nə, gwa' kəta' zə sôwâ Ifraya.

¹⁰Zə swə mənɪ ze wə ri mənɪ sôwâ wə də pemây han kə Ifray, bə rum də pemây sin um ce' ndə mənɪ Ifray pemây sin umu.

¹¹Zə rum, say mə gi tu mba kə gbəgbonj kədan mə cok də ri pemây rum, mə gi ndəna', kədan swə daw du ri nə gwa' dan ze də ri pemây rum kə dan mun vun ce' ndə sôwâ mənɪ ke wə du igop kuni mi.

¹²Zə dan Ifray nə kə i bay gbəgbonj, Dan rum wə tise' pâ masəlam mə kə se' hoɓ si. Dan rum wə ze hâ day wə ri mənɪ nyî kə simbed' wə ndewa, hâ day wə ri mənɪ vun fur tu kə mur du so wə ndap nji. Dan rum wə bok dan wa kwa mənɪ vunduk sumra' wə wa' kə dik rumu.

¹³Kwa mənɪ gak pe' i Ifray cu daw mi. Kwa danj' mənɪ gi, kwa rum kə tu uray bay takram wə i rum, bay namba danj', namba də in dan wa tu mba kor rumu.

¹⁴La' ndəna' si, say mə car ngəɗɗɪŋ' du dan mənɪ namba ve bay wə ka', zə namba kə tonj po' fur mə mbri mənɪ ze ta day kor Ifray wafray, mum nə Zezu, Vay Ifraya.

¹⁵Tonj po' fur mba nə gak we ca wa mba wə du tətâ mba, zə Satan bu num wə du kwa danj' ce' ndə namba, ama mum cu gi kwa mə bro' mi.

¹⁶Zə rum, mə jik də hay' kwasuk Ifray kə vunduk mə daw, zə wə ri rum, bay Ifray kəta' wə hana. Wə ri rum, namba də fe vrum kwa mə bro' mba, bay namba də za' bay um mənɪ gak kawɓa mba kəri mənɪ namba kə mē' rumu.

Hébreux 5

¹Tonj po' fur daw daw danj', sôwâ wə um par du sôwâ, bay um cin kədan mum gi sin kor Ifray zə ndaya. Mum wə ne kwane ne kə Ifray, bay mum wə fol kwa po' fur kor Ifray zə kwa mə bro' sôwâ.

²Zə mum kə tu rum, mum tətâ, mum gak we ca wa sôwâ mə dan we kwa kə sôwâ mənɪ vi' wə du kwa mə bro',

³zə mum kə tu rum, mum tətâ, mum cu po' fur zə kwa mə bro' sôwâ taw mi, ama mum po' fur zə kwa mə bro' tu rum ta'a.

⁴Swə daw cu gak tle mbra' mə faŋ tonj po' fur kə tu rum mi, swə gak faŋ tonj po' fur say kə də mə Ifray taw, ce' ndə mənɪ Ifray də Aron.

⁵Ndəna' ta', Kris cu tle mbra' mə faŋ tonj po' fur kə tu rum mi. Zawa, Ifray kə mənɪ in ne numu: «Ha nə Vay man, tam, na faŋ Ba wû.»

⁶Bay wə ri məsin, mum in ta'a: «Ha də ke bə po' fur mə də hâ, ce' ndə Melkisedek.»

⁷Kəri mənɪ Zezu kəta' wa nya, mum in dan kə Ifray bay ci vun rum kə ci' kə zim i kədan nə sid' num mbə vun mar, bay Ifray mun dan um, zə mum ar tu rum danj' ne numu.

⁸Ko kəri mənɪ mum Vay Ifray nə danj', mum wum vari mun vun kə boni danj' mənɪ mum ce,

⁹kəki mənɪ Ifray gi num faŋ swə mə njeŋ, mum faŋ bə sɪd' mə də hâ zə sôwâ daŋ' mənɪ wə mun vun rum,

¹⁰bay Ifray tle num cin toŋ po' fur ce' ndə Melkisedek.

¹¹Namba kə dan juk kədan namba in wa dan mənɪ nə, ama kəcik kədan namba pay zu rum mi ne, zə hi cu gak mun zu dan rum ga'ri mi.

¹²Ri nde si kədan hi gak faŋ sum ta' kwa, ama hi faŋ wa' i swə nə ta' təŋ zu dan Ifray ne ni kəreme. Kəzə, kəri hi gak ti kwati mə bokrok rum, hi faŋ wa' mbir kədan hi ce.

¹³Swə mənɪ wə ur tu rum kə pa', mum vay nyêw, mum cu gak mun zu dan mə njeŋ mənɪ Ifray wə wa' nə mi.

¹⁴Zawa, kwati mə bokrok nə wə zə sôwâ rôwâ mənɪ wa nday fɪ kə bul mbok dan mə bay kə dan mə bro'o.

Hébreux 6

¹Zə rum, say mə ar təŋ zu kwata' wa Kris də kəki, bay mə də kofo kə kwata' sôwâ rôwâ. Mə tor zu kwata' mba kərem za' mi, ce' ndə: Faŋ vunduk wa sin mə bro' kə ve Ifray,

²kwata' wa baptem cem cem kə cin ba wa sôwâ, bay ka' dan wa car mbə mar kə dan bok mə də hâ.

³Namba də gi ndəna', Ifray la' ne vari rum si na.

⁴Kəcik zə sôwâ mənɪ ke fe ri mə bu Ifray si, handay ke tuk kwane mənɪ car mbə wafray, bay handay fe Simbed' mə Kələŋ si,

⁵handay ke tuk i dan Ifray nə bay, bay handay ke tuk gbəgboŋ nya mənɪ wə də mbə,

⁶handay faŋ njay də du suk nday mə daya. Vari kədan handay faŋ vunduk nday kərem cu za' mi, zə handay wə gay' Vay Ifray də wa gu kə um i kor sôwâ daŋ' kəreme.

⁷Kəri mənɪ nya wə ce mbi buŋô mənɪ wə se mbə wa rum sem raw, bay wə gi kwa mə bay ne kə sum kura nya, Ifray wə kuswa' nya rumu.

⁸Ama nya rum la' ci ŋây' kə həred' si, nya rum cu ke kə sin za' mi, bay Ifray də ge nê' nya rum bay də ye' ku rumu.

⁹Bây man kwa, ko kəri mənɪ namba wə in dan ndəna', namba njay vunduk mba wa ri, namba we si, hi wə vari mə bay mənɪ wə də ri sidi.

¹⁰Ifray cu vur vur mi. Mum cu dūmwa sin mi mənɪ hi wə gi, ko bə mi mənɪ hi ta' ne num kə sin mənɪ hi gi pâ hay' daw ba mi mənɪ ve Kris, bay hi wə gi rum mgbaŋ ni nə mi.

¹¹Ama namba wə wa' i swə dāw dāw daŋ' du ri nə gi sin rum də kofo kə sây' hâ vun ndo' rum kədan hi də fe kwa mənɪ hi njay vunduk ri wa rumu.

¹²Namba cu wa' i hi faɲ sum ndal mi, ama namba wə wa' i hi ta ce' ndə sôwâ mənɪ ve dan Ifray bay redʼvunduk nday, ndəna' handay də fe kwa mənɪ Ifray in dan wa rumu.

¹³Kəri mənɪ Ifray in dan ne kə Abraham, mum jeɲ dan um kə sur vun, zə swə mənɪ toɲ pā num kədan sur vun kə sem rum cu mi, mum sur vun kə tu rumu.

¹⁴Mum ini: «Na in ne nu i na də wû kuswa', bay na də wû ne daw rawti rawa.»

¹⁵Abraham redʼvunduk ji dan rum, ndəna' mum fe kwa mənɪ Ifray in dan wa rumu.

¹⁶Kəri mənɪ sôwâ wə sur vun, handay wə sur vun kə semdɛ swə mənɪ toɲ pā nday, bay sur vun nə ke kwa jeksem mənɪ wə ndo' dan daɲ' wə mbok ndaya.

¹⁷Ama Ifray wa' kədan mum ta' ne kə sôwâ mənɪ wə də fe bayda mənɪ mum in dan wa rum nə tɛlak i mum cu də faɲwa dan um kpe mi, zə rum, mum faɲ sur vun wa dan mənɪ mum ini.

¹⁸La' ndəna' si, dan mə hoɓ mənɪ kuni cu gak faɲwa mi, bay Ifray cu gak hay dan wa nday mɛta', zə rum, namba sôwâ mənɪ za' ri pe' hay' rum, dan rum jeɲ vunduk mba wa kwa mənɪ mum in dan wa rum ne mba.

¹⁹Vunduk mənɪ namba njay wa rum nə ce' ndə njike mənɪ sôwâ wə jew da kə ndi, mum nə njeɲ bay gbəgboɲ, bay mum ze ta day wafray wə rawti tak i mənɪ hay kə zim,

²⁰Zezu ze ta ri rum zə mba cop kə mba, mum faɲ toɲ po' fur mə də hâ ce' ndə Melkisedek.

Hébreux 7

¹Melkisedek nə jwə so mə dɛ kə Salem, bay mum bə po' fur Ifray mə wafray ta', kəri mənɪ Abraham gewa mbə ri zi mənɪ mum 'way sum jwə cem cem, Melkisedek mbə ndewa kə rum bay kuswa' numu.

²Abraham ne guɓ kwa wə du kwa daɲ' mənɪ mum kə ndi wə ɓa rum ne numu. Semdɛ Melkisedek wa' dan ini: «Jwə mə njeɲ», bay kərem, mum jwə so mə dɛ kə Salem, mənɪ wa' dan ini: «Jwə mə hebe».

³Swə cu we dan wa ba Melkisedek, ko ya um, ko sôwâ um daw mi. Swə cu za' dan vra' um ko ndo' bəka nyî um kpe mi, mum ra' nji kə Vay Ifray, mum suk bə po' fur mə də hâ.

⁴I kar mbra' um ri, ba mbri ramba Abraham ne guɓ kwa wə du kwa mə bay daɲ' mənɪ mum ra' wə ri zi ne numu.

⁵Dan dlay ne vari ne kə daw rawti Levi mənɪ handay sum po' fur kədan kuni ci vun guɓ kwa wə du kwa daɲ' mənɪ wə ɓa sôwâ Israyel, wa' dan in i handay ci vun guɓ kwa rum wə ɓa bray nday, mənɪ handay ta', handay daw rawti Abraham.

⁶Melkisedek cu vay rawti Levi mi, ama mum ve guɓ kwa wə du kwa daɲ' mənɪ wə ɓa Abraham, bay kəki rum, mum kuswa' swə mənɪ Ifray in dan ne numu.

- ⁷Swə cu gak way dan wa dan mənɪ nə mi, swə mənɪ wə kuswa' swə məsin, bə rum kə mbra' pā swə mənɪ fe kuswa' nə si.
- ⁸Wə ti, sôwâ mənɪ wə ve guɓ kwa wə ɓa sôwâ, handay sôwâ mənɪ wə mara. Ama Melkisedek mənɪ ve guɓ kwa wə ɓa Abraham, Derwa Ifray wə in wa rum i mum ke kə i də hâ.
- ⁹Namba gak in, kəri mənɪ Abraham ne guɓ kwa wə du kwa mənɪ mum kə ndi wə ɓa rum, Levi daw rawti rum kə mənɪ wə ve guɓ kwa nə, ne guɓ kwa rum ta'a.
- ¹⁰Zə ko kəri rum, Levi cu vra' mətɔ', mum ke kəta' wə du vəswe tu ba mbri um Abraham kəri mənɪ Melkisedek mbə ndewa kə rumu.
- ¹¹Kəri mənɪ Ifray ne dan dlay ne kə sôwâ Israyel, mum car dan dlay rum wa sin po' fur daw Levi, kəzə daw Levi la' gi sin po' fur nday kə vari rum si, bə po' fur məsin cem ce' ndə Melkisedek, ama cu ce' ndə Aron mi, cu də mbə mi.
- ¹²Zə kəri mənɪ sin po' fur faŋwa, say dan dlay rum faŋwa ta'a.
- ¹³Bay Bârî mba, mənɪ dan rum wə in dan wa rum, mum car mbə zə saŋ sôwâ məsin mənɪ swə ɗaw du nday cu gi sin hay' kwa cu kwa po' fur kpe mi.
- ¹⁴Ce' ndə sôwâ ɗaŋ' we si, Bârî mba vra' wə zə saŋ Yuda, bay Moyizə cu in dan wa saŋ Yuda kəri mənɪ mum in dan wa sum po' fur mi.
- ¹⁵Dan mənɪ pay zu dan rum ɗaŋ' tɛlak nə ni na: Bə po' fur məsin pā si kərem, mum ra' nji kə Melkisedek.
- ¹⁶Mum cu fe sin po' fur kə vari dan dlay mə sumra' mi, ama mum fe sin rum kə gbəgbɔŋ nyî mənɪ cu də ndo' kpe mi.
- ¹⁷Zə Dan rum ini: «Ha də ke bə po' fur mə də hâ, ce' ndə Melkisedek.»
- ¹⁸Zə rum, dan dlay mə kəmba ndo' vun si, zə dan dlay rum cu kə gbəgbɔŋ ko kə sin za' mi,
- ¹⁹zə dan dlay Moyizə cu gak gi swə faŋ njeŋ kpe mi, ama kwa mənɪ namba gak njay vunduk mba wa rum nə pā si, kə vari kwa rum, namba gak jik də hay' Ifraya.
- ²⁰Ifray faŋ sur vun wa dan rum, sôwâ məsin faŋ sum po' fur dan sur vun Ifray,
- ²¹ama Ifray cin Zezu bə po' fur kə sur vun kəri mənɪ mum ini: «Bârî sur vun wa rum, bay mum cu də faŋwa dan ɗik um mi: Ha də ke bə po' fur mə də hâ.»
- ²²Zə rum, Zezu nə kə mənɪ kwa jeksem wa dan kawvun mənɪ bay pā mə kəmba.
- ²³Kwa məsin mənɪ ɓul mbok nday kəta', sum po' fur məsin kuni raw, zə handay wə mar, bay cu gak gi sin nday də hâ mi.
- ²⁴Ama Zezu ke kə i də hâ, bay swə məsin cu gak tle ri sin um mi.
- ²⁵Zə rum, mum gak sid' sôwâ mənɪ wə jik mbə hay' Ifray kə rum, tam bay də hâ, zə mum ke kə i də hâ kədan mum in dan kə Ifray zə ndaya.

²⁶La' ndəna' si, Zezu nə toŋ po' fur mənɪ gak ndo' vun kwa wa' mba, mum nə ɓay, dan mə bro' kə kwa mə bro' cu hay' rum daw mi. Mum ɓul nji kə sum gi kwa mə bro', mum ur ta wafraya.

²⁷Mum cu ce' ndə sum rōwâ po' fur məsin mi, mum cu po' fur bəka daw daw daŋ' zə kwa mə bro' kəca um, ɓay faŋ po' fur zə kwa mə bro' sōwâ ɓo mi. Kəri mənɪ mum po' fur kə tu rum, mum po' fur sem daw zə də hâ.

²⁸Dan dlay Moyizə wə njay sōwâ mənɪ cu njeŋ mi ce' ndə sum rōwâ po' fur, ama dan Ifray kə dan sur vun mənɪ mbə kəki dan dlay nə cin Vay mənɪ mum gi num swə mə njeŋ də hâ ce' ndə toŋ po' furu.

Hébreux 8

¹Dan mə mbri wə du dan mənɪ namba wə in nə ni na: Namba kə toŋ po' fur mə ndani nə, ɓay mum ta suk wafray ɓa fun kwasuk Ifray mə kə gbəgbəŋ daŋ',

²mum wə gi sin toŋ po' fur wə ri mə ɓay, wa' dan in, wə rawti jew mə kəzin' mənɪ Bârî kaw kə tu rum, sumra' cu kaw jew rum mi.

³Toŋ po' fur daŋ', sōwâ um cin kədan mum ne kwane ne kə Ifray, ɓay fol kwa po' fur kor rum zə ndaya. La' ndəna' si, say toŋ po' fur mba nə ke kə kwa kədan mum po' fur kə ndi ta'a.

⁴Kəzə mum la' kəta' wa nya si, mum cu ke bə po' fur mi, zə sum po' fur mənɪ wə ne kwane ne kə Ifray ce' ndə dan dlay sōwâ Zuwif ne vari ne nday kuni kəta'a.

⁵Sin mənɪ sum po' fur wə gi nə, sin rum ce' ndə foto ɓay njəɓo kwa mənɪ kəta' wə wafray, kwa rum ra' nji kə kwa mənɪ gi kəri Moyizə, kəri mənɪ mum wə də kaw jew, Ifray la' ne numu: A kar kə ɓayrum kədan a gi kwa daŋ' kə vari mənɪ na ta' ne nu wa igway'i.

⁶Ama mgbaŋ ni nə, Ifray ar sin mənɪ kə mbra' pâ mə handay wə ɓa Zezu, zə mum nə bə vari dan kawvun mənɪ ɓay pâ mə kəmba, mənɪ car wa dan mənɪ Ifray in wa dan mənɪ ɓay pâ mə kəmbara.

⁷Kəzə, dan kawvun mə vun kofo la' dan dan mə bro' si, cu kə sin kədan Ifray faŋ samwa rum kə bāy hoɓ rum mi.

⁸Ama Ifray za' dan mə bro' wə hay' sōwâ um, zə rum mum mgbor ndaya: Bârî ini: Bəka məsin wə də mbə, wə du bəka rum, na də gila' dan kawvun mə mbrew kə sōwâ Israyel ɓay kə zə saŋ Zuda.

⁹Dan kawvun rum cu də ke ce' ndə dan kawvun mənɪ na kawvun kə ba mbri randay kə bəka mənɪ na ra' nday kə ɓa rin kədan na pâ mbə nya Egip kə nday nə mi. Handay cu car wa dan kawvun mənɪ na kaw kə nday nə njeŋ mi. Zə rum, Bârî ini: Na cu tle fur nday za' mi.

¹⁰Dan kawvun mēni na wə də kaw kə sôwâ Israyel nə ni na: Bârî ini: Kəki bəka rum, na də no' dan dlay man də du kwawe wa nday, bay na də wây' dan dlay rum də wə vunduk ndaya. Na də ke Ifray nday, bay handay də faɲ sôwâ mana.

¹¹Swə dāw du nday cu də ta' kwa ne kə swə nya um, ko də cu də in ne kə bray umu: «A we Bârî» mi. Zə sôwâ daɲ' də man we, daka daw mə dāre' hâ sôwâ mə rôwâ du ndaya.

¹²Na də vrum sin mə bro' nday, bay na cu də dla' wa kwa mə bro' nday za' mi.

¹³Kəri mēni Ifray in dan wa dan kawvun mə mbrew, mum gi mə vun kofo faɲ mə kəmbara. Bay kwa mēni faɲ mə kəmbar bay kim si, kwa rum həre' kə dənoko.

Hébreux 9

¹Dan kawvun mə vun kofo ke kə dan dlay wa dan bur Ifray bay jew mēni sôwâ kaw kə ba nday wa nya.

²Handay kaw jew dāw, bay handay hay rawti rum hoɓ, tak i dāw rum də kə Ri mə Kələje. Sum po' fur njay baɲgay kə tablə mēni handay wə njay kwati mēni handay ne kə Ifray wa rum wə hana.

³Bây hoɓ tak i rum mēni kofo zim nə də kə Ri mə Kələj pâ Daɲ'ɲ.

⁴Sum po' fur njay kwa cu kwa po' fur mə gi kə njike mə bondo mēni handay wə ye' ku kwa mə sî ndə urdi wa rum, kə sunduku kawvun mēni gi kə njike mə bondo wə hana. Sum po' fur njay dənay mə ri kə njike mə bondo mēni handay njay kwati mə də kə «manə» wə rawti rum, kə dliw Aron mēni wə lo', bay gway' mə hoɓ mēni Ifray wây' dan kawvun wa nday wə rawti sunduku kawvun rumu.

⁵Sôwâ ri foto Kerubiɲ mə kə mbra' njay wa sunduku kawvun rumu. Nyî tu rum wə ta' i Ifray kəta' wə hana. Lam tlaw nday wə gun ta wa ri mēni toɲ po' fur wə po' fur han zə kwa mə bro' sôwâ. Ama ri cu kədan namba in dan wa kwa rum dāw dāw daɲ' mgbəɲ ni nə mi.

⁶kəri mēni kwa rum daɲ' gila' si, sum po' fur wə cok rawti tak i jew rum bəka dāw dāw daɲ' kədan handay gi sin ndaya.

⁷Ama toɲ po' fur dāw sar gak ze də rawti tak i mə hoɓ rum, bay mum wə ze də han sem dāw wə du kim, kəri rum mum wə kaw vəswə kwa po' fur mēni mum fol kor Ifray kədan mum po' zə kwa mə bro' tu rum kə zə kwa mə bro' mēni sôwâ wə gi dan we rumu.

⁸Ndəna', Simbed' mə Kələj wə ta' i vari mə də Ri mə Bay pâ Daɲ' cu ar mətə' kəri mēni jew mə vun kofo nə kəta' ɓo.

⁹Kwa rum nə foto mēni wə ta' ri mə tama: Kwa rum wə ta' i kwane kə kwa po' fur mēni swə wə ne kə Ifray kuni cu gak gi vunduk bə rum faɲ njeɲ mi.

¹⁰Kwane rum nə dan kwati kə kwace bay cer mə wok tu cem ceme. Kwa rum daɲ' zə tu sumra' taw, bay kə sin hâ day ri mēni Ifray wə də faɲ gila' kwa daɲ'ɲ.

¹¹Ama Kris mbə ce' ndə toŋ po' fur kwa mə ɓay cem cem məni kəta' tama. Jew məni mum wə gi sin wə rawti rum nə kə mbra' ɓay ɓay pā mə vun kofo si, sumra' cu kaw jew mi, wa' dan in i jew rum cu wa nya məni nə mi,

¹²kəri məni Kris ze ta wə ri mə kələŋ pā Daŋ' sem daw zə də hā, mum cu ze ta kə vəswə kəday ko kə vəswə vay naw han mi, ama mum tumwa mba kə vəswə tu rum zə də hā.

¹³Vəswə kəday kə vəswə ba naw, ɓay bur ku naw məni sum po' fur wə ye' ku rum, ɓay wə pik də wa sôwâ məni kə day ce' ndə məni dan dlay in dan wa rum, kwa rum gak nday kol ɓay gi tu nday faŋ kələŋ,

¹⁴la' ndəna' si, vəswə Kris nə nji pā kwa rum si, kə Simbed' mə də hā, mum ne tu rum ne kə Ifray ce' ndə kwa po' fur mə dan dan mə bro', vəswə rum gak kol dan mə bro' məni wə du dan dīk vunduk mba də rəka, kədan namba gak gi sin zə Ifray mə kə i.

¹⁵Zə rum, Kris nə bə vari dan kawvun mə mbrew, kədan sôwâ məni Ifray də nday, handay gak fe kwa mə ɓay mə də hā məni Ifray in dan wa rum i mum də nday ne ce' ndə baydā. Handay gak fe kwa rum zə swə daw mar zə nday, ɓay mar rum tumwa sôwâ məni gi kwa mə bro' kəri məni handay ke ta zə dan kawvun mə vun kofo ɓo.

¹⁶Kəri məni dan ɓe vun kəta', dan ɓe vun rum cu kə sin mi, say ka bə ɓe vun rum nə mar si.

¹⁷Zə dan ɓe vun cu kə sin kəri məni bə ɓe vun rum kə i ɓo mi. Dan ɓe vun rum də ke kə sin, say kəki məni bə ɓe vun rum nə mar si.

¹⁸Zə rum, dan kawvun mə vun kofo cu kə sin mi, say ka vəswə ne si copo.

¹⁹Cop rum, Moyizə ka' dan dlay daŋ' məni Ifray ne num wə du dərwa dan dlay ne kə raw sôwâ, kəki rum mum kaw vəswə daw naw ɓay kəday kə mbi, kə zim mə tlew mə ci kə sâ cime ɓay wanji kə tlap gu mə də kə izopə ɓay mum no' ta du rum ɓay mum faŋ pik vəswə rum ta wa dərwa dan dlay ɓay wa raw sôwâ daŋ',

²⁰mum ini: «Məni nə vəswə məni jeŋ dan kawvun məni Ifray wa' i i ta zə dan rumu.»

²¹Ndəna', Moyizə faŋ pik vəswə rum ta wa jew kə kwa daŋ' məni sum po' fur wə gi sin kə ndi wə han,

²²ce' ndə məni dan dlay ini: Kəli kwa daŋ' faŋ kələŋ kə vəswə, ɓay rom wə ke say ka vəswə ne si.

²³Kwa məni kuni daŋ', handay foto kwa mə kəzin' məni wə wafray, say sum po' fur gi kwa rum faŋ kələŋ ndəna', ama kwa mə kəzin' məni wə wafray cu gak wok ndəna' mi, say kə kwa po' fur mə ɓay pā məni kuna.

²⁴Zə Kris cu ze ta wə ri po' fur mə wə rawti jew məni sôwâ kaw kə ɓa nday məni foto ri po' fur mə kəzin' nə mi, mum ze ta wafray, ɓay mum ta car kor Ifray zə mba tama.

²⁵Toŋ po' fur sôwâ Zuwif wə ze də ri po' fur mə kələŋ pā daŋ' kə vəswə kwa po' fur kim daw daw daŋ', ama Kris cu ze ta ri rum kədan mum po' fur kə tu rum sem raw mi.

²⁶Mum la' gi ndəna' si, mum gak ce boni sem raw daka tən zə nya. Ama cu ndəna' mi, zawa, mgbaŋ ni nə, kəri mənɪ ndo' nya həre', mum mbə ne tu rum ce' ndə kwa po' fur sem daw zə də hā kədan mum vrum kwa mə bro' sôwâ də rəka.

²⁷Swə daw daw daŋ' wə də mar sem daw sar, bay kəki rum Ifray də bok dan wa rum,

²⁸ndəna' ta', Kris mbə ne tu rum ce' ndə kwa po' fur sem daw sar kədan mum vrum kwa mə bro' sôwâ də rəka, mum də faŋ mbə sem hoɓ rum, cu kədan mum vrum kwa mə bro' sôwâ də rəka mi, ama kədan mum siɗ sôwâ mənɪ wə ji gewa umu.

Hébreux 10

¹Dan dlay sôwâ Zuwif cu foto kwa mə kəzin' njeŋ mi, dan dlay rum nə njəbo kwa mə bay mənɪ wə də mbə, dan dlay rum cu gak gi sôwâ mənɪ wə mbə kor Ifray kə kwa po' fur mənɪ handay wə po' fur kə ndi kim kə kim daŋ' faŋ njeŋ kpe mi.

²Kəzə, sôwâ mənɪ wə mbə kor Ifray kə kwa po' fur mə ndani nə, bay Ifray la' wə kol kwa mə bro' nday də rəka si, handay cu də dik dan wa kwa mə bro' nday za' mi, bay handay də ar ne kwa po' fur si kə wa.

³Kəzin', kwa po' fur rum wə gi sôwâ dla' wa kwa mə bro' nday kim daŋ'ŋ.

⁴Zə vəswə ba naw kə vəswə kəday cu gak vrum kwa mə bro' sôwâ də rəka kpe mi.

⁵Zə rum, kəri mənɪ Kris wə də mbə wa nya, mum la' ne kə Ifraya: Ha cu bə kwa po' fur ko kwane mi, ama ha ri tu ne nana.

⁶Ha cu tuk kədam kə kwa po' fur mənɪ sôwâ wə fol bay wə ye' ku rum wa kwa cu kwa po' fur, ko kə kwa po' fur mənɪ sôwâ wə po' fur kə ndi kədan ha vrum kwa mə bro' nday də rəka nə mi.

⁷Zə rum, na ini: Ifray, na ni na, na mbə kədan na gi kwa mənɪ ha wə wa'a. Ce' ndə mənɪ sum ka' dan wāy' dan rum wa rin wə du ɗerwa dan dlaya.

⁸Cop rum, Kris ini: Ha cu bə kwa po' fur, ko kwane, ko kwa po' fur mənɪ sôwâ wə fol bay ye' ku rum wa kwa cu kwa po' fur, ko kwa po' fur mənɪ sôwâ wə po' fur kə ndi kədan ha vrum kwa mə bro' nday də rəka nə mi. Ha cu tuk kədam kə rum mi. Kə ndi nə daŋ', sôwâ wə po' fur kə ndi ce' ndə dan dlay ne vari rum ne ndaya.

⁹Mum faŋ in kəreme: Na ni na, na mbə kədan na gi kwa mənɪ ha wə wa'a. Ndəna', Ifray ar dan po' fur mə vun kofo daŋ' ta rəka, bay mum samwa rum kə tu Kris mənɪ mum ne ce' ndə kwa po' furu.

¹⁰Zə Zezu Kris gi sin mənɪ Ifray wə wa', mum kol mba faŋ kələŋ kə tu rum mənɪ mum ne ce' ndə kwane sem daw zə də hā.

¹¹Bə po' fur daŋ' wə car fray bəka daw daw daŋ' kədan mum gi sin um, mum wə ne kwa po' fur mə daw sem raw, ama kwa po' fur rum cu gak vrum kwa mə bro' sôwâ də rəka kpe mi,

- ¹²ama Kris nə po' fur zə kwa mə bro' sôwâ kə kwa po' fur dāw sar, kwa po' fur rum kə sin də hâ, kəki rum, mum ta suk ɓa fun Ifray,
- ¹³ɓay mgbaŋ ni nə, mum wə ji kədan Ifray nə njay sum sî um də nya zə sem rum ce' ndə kwa njay seme.
- ¹⁴Ndəna', kə kwane mə dāw, mum gi sôwâ məni Ifray kol kwa mə bro' məni wə vunduk nday ta rəka faŋ kələŋ zə də hâ.
- ¹⁵Simbed' mə Kələŋ wə in njeŋ dan wa rum mba ne ta'a. Cop rum, mum ini:
- ¹⁶«Dan kawvun məni na wə də kaw kə nday nə ni na: Bârî ini: Kəki bəka rum, na də no' dan dlay man də wə vunduk nday, ɓay na də wây' dan dlay rum də du kwawe wa ndaya.»
- ¹⁷Mum faŋ in kəreme: Na cu də dla' wa kwa mə bro' nday, ko sin mə bro' nday za' mi.
- ¹⁸Zə kəri məni Ifray vrum kwa mə bro' nday ta rəka, cu kə sin kədan handay ne kwane məsin kədan mum vrum kwa mə bro' nday də rəka kə ndi za' mi.
- ¹⁹Daw ba man, la' ndəna' si, kə vari mar Zezu, namba kə vari kədan namba cok də ri mə ɓay pâ daŋ' kə vəswə umu.
- ²⁰Mum gila' vari mə mbrew məni wə də ne nyî mə də hâ mba ne. Vari rum wə pâ du zim məni hay tak i jew, wa' dan ini: Wə pâ tu mə kəca umu.
- ²¹Namba kə toŋ po' fur məni Ifray cin num wa so umu.
- ²²La' ndəna' si, mə jik də hay' Ifray kə vunduk mə ɓay ɓay kə vunduk məni namba njay wa dan məni namba ve dan dîk dan məsin rumu. Ifray kol dan mə bro' məni wə cik dan dîk vunduk mba ta rəka, ɓay mum kol tu mba kə mbi mə kel kele.
- ²³Mə kaw dan məni namba njay vunduk mba wa rum məni namba wə ka' dan rum nə ŋgədiŋ', zə namba we si njeŋ, Ifray də gi dan məni mum ini.
- ²⁴Mə tle fur nji mbok nji ɓay mə jeŋ vunduk nji mbok nji kədan mə bə nji ɓay gi sin mə ɓaya.
- ²⁵Mə ar də ri ɓa mba ce' ndə sôwâ məsin məni wə fî tu nday kə ar də ri rum nə mi, zawa, mə jeŋ vunduk nji mbok nji, pâ daŋ' rum, mə gi ndəna' mgbaŋ ni nə zə namba we si, bəka Bârî nə mbə hərə' si.
- ²⁶Kəri məni namba we dan mə kəzin' si, ɓay kəki rum, namba la' faŋ wə gi kwa mə bro' də kofo kə bə vunduk mba si, kwa po' fur məni gak vrum kwa mə bro' mba də rəka cu za' mi,
- ²⁷kwa məni gwa' wə hay' mba, say mə ne wəlok kəri məni namba wə ji kwa məni wə də mbə, wa' dan ini: Dan ɓok Ifray kə ku mə bəliw bəliw məni wə də ye' sum sî Ifraya.
- ²⁸Sa su daŋ' məni cu ta zə dan dlay Moyizə mi, ɓay sôwâ hoɓ ko hinji' la' in njeŋ dan wa rum si, bə rum də fe mar dan ci' ca.

²⁹La' ndəna' si, də ke ma kə swə mənɪ wə jed Vay Ifray, ko kə swə mənɪ wə kar vəswe mə dan kawvun Ifray mənɪ mum kol kwa mə bro' bə rum ta rəka kə ndi ce' ndə kwa mə uray, ko kə swə mənɪ wə i Simbed mə Kələŋ mənɪ mbə kə bay Ifray nə su? Kəzin', bə rum nde i ce boni bayrum pā nay' na!

³⁰Zə namba we swə mənɪ ini: Na kə mənɪ wə də sa' bala: Na kə mənɪ wə də po' swə ce' ndə kwa mə bro' mənɪ mum gi. Bay mum faŋ in kəreme: Bârî wə də bok dan wa sôwâ umu.

³¹Kədan swə nde də ba Ifray mə kə i, kwa rum gi wəlok juku.

³²I dla' wa kwa mənɪ hi ke gi ba'a: Kəri rum, kəki mənɪ Ifray dəri mə bu wa ri, hi ce boni juk, bay hi car ŋgədiŋ' wə du zi rum,

³³fəta məsin, sôwâ məsin wə mi i bay wə mi rik kor sôwâ daŋ'ŋ. Fəta məsin, hi ke hərə' kədan hi kawba sôwâ mənɪ sôwâ məsin wə gi boni nday ne ndəna' ta'a.

³⁴Hi ce boni kə sôwâ mənɪ wə so daŋgay' ce' ndə mənɪ hi wə han kə nday ta', kəri mənɪ sôwâ məsin ra' kwa mə bay mi, hi tuk kədam kə kwa vi' rum, zə hi we si, hi kə doknay mə bay pā kwa rum mənɪ də ke də hâ.

³⁵Zə rum, i ar dan kwa mənɪ hi njay vunduk ri wa rum nə mi, zə Ifray cin bal cik mə toŋ zə sôwâ mənɪ wə gi ndəna'a.

³⁶Say i car ŋgədiŋ' kədan kəri mənɪ hi gak gi kwa mənɪ Ifray wə wa', hi gak fe kwa mənɪ mum in dan wa rumu.

³⁷Zə ce' ndə mənɪ Dan rum wây' wə du dərwa: Ri gwa' kî to', bay swə mənɪ wə də mbə, mum də mba. Mum cu də bar hâ mi.

³⁸Ama swə mənɪ na gi num njeŋ kor rin, zə mum ve dan man, bə rum də ke kə nyî mə də hâ. Ama, bə rum la' faŋ ta kəki si, na cu də tuk kədam kə rum mi.

³⁹Namba cu du sôwâ mənɪ wə faŋ kəki bay vi' kuni mi, ama, namba ve dan Ifray, bay namba wə vari sidî.

Hébreux 11

¹Swə mənɪ kə ô, mum nə swə mənɪ car wa dan mənɪ mum cin vunduk rum wa rumu. Mum nə swə mənɪ cin vunduk rum wa kwa mənɪ mum cu gak we kə i rum mi.

²Ifray sâ' sôwâ mə vun kofo zə handay ve dan umu.

³Zə ô mba, namba we i kwa daŋ' gi kə dan ge vun Ifraya. Ndəna', kwa mənɪ swə wə we kə i rum, kwa rum gi kə kwa mənɪ swə cu gak we kə i rum mi.

⁴Zə Abel ve dan Ifray, mum ne kwa po' fur mə bay pā mə Kayin ne kə Ifraya. Ifray dē num kə swə mə njeŋ zə mum ve dan um, bay zə Ifray kə tu rum ve kwa po' fur umu. Ko kəri mənɪ Abel mar si, zə mum ve dan Ifray, dan rum wə in dan mba ne tam bo.

⁵Zə Enok ve dan Ifray, mum cu mar mi, zawa, Ifray tle num ta hay' rum wafraya. Swə daw cu gak za' num mi, zə Ifray tle num ta hay' rum, 'Derwa Ifray in cop kəri məni Ifray cu tle Enok mətə', Enok gi kwa mə kədam tu Ifraya.

⁶Ama swə daw cu gak gi kwa mə kədam tu Ifray mi, say bə rum nə ve dan um, zə swə məni wə də hay' Ifray, say bə rum ve i Ifray kəta', bay mum wə də po' bal cik sôwâ məni wə um kebe.

⁷Zə Nowe ve dan Ifray, mum mun dan dlay məni Ifray dlay num kə ndi wa kwa məni wə də gi, kwa məni Nowe cu gak we mətə', mum mun vun Ifray bay mum gay' da məni mum kə sôwâ so um sid' kə ndi. Ndəna', mum kaw sôwâ wa nya kə dan, bay zə mum ve dan Ifray, Ifray kar num ce' ndə swə mə njeŋ kor rumu.

⁸Zə Abraham ve dan Ifray, mum mun vun rum kəri məni mum də num, mum 'ya dle ta nya məni Ifray wə də um ne ce' ndə bayda, mum 'ya ar nya um dan we ri məni mum wə də hana.

⁹Zə mum ve dan Ifray, mum ta suk nya məni Ifray in dan wa rum ne num ce' ndə rəkway, mum suk wə rawti jew kə Isak bay Yakub məni Ifray in dan ne nday ta'a.

¹⁰Zə Abraham wə ji so məni Ifray nə bə tor zu rum bay bə dam rum, so məni zu rum dam gbəgboŋo.

¹¹Zə Sara ve dan Ifray, ko kəri məni ta kətok bay ta mələr laŋ, Ifray gi kwa mə gəriŋ rum hay sə bay ta faŋ gak vra' vay, zə ta cin vunduk sə njeŋ wa dan məni mum ini.

¹²Ndəna', daka swə daw məni nə hərə' kə mar, daw rawti rum məni raw ce' ndə ciciw mə wafray bay raw ce' ndə nyetl mə vun ya mbi məni swə cu gak in mi, wur mbə hana.

¹³Sôwâ məni kuni daŋ' ve dan Ifray, bay handay mar kə ndi, handay cu fe kwa mə bay məni Ifray in dan wa rum ne nday nə mi, ama handay we kwa rum kə i nday ta rəka seŋ, bay handay tuk kədam kə ndi, handay in i handay ke rəkway bay məwor wa nya.

¹⁴Sôwâ məni in dan ndəna' wə ta' njeŋ i handay wə keɓ nya mə kəca ndaya.

¹⁵Kəzə, handay la' wə dik dan wa nya məni handay wur mbə han si, handay gak za' vari kədan handay faŋ də hana.

¹⁶Zawa, handay wə keɓ nya mə bay pâ nya məni handay ar, wa' dan in i nya mə wafraya. Zə rum, zur cu gi Ifray kəri məni handay wə um də kə Ifray nday mi, zə mum kə məni gila' so wə zə ndaya.

¹⁷Zə Abraham ve dan Ifray, mum po' fur kə vay um Isak kəri məni Ifray kəŋji' numu. Ifray in dan kə Abraham wa vay rum, ama kə ndi nə daŋ', mum ve kədan mum po' fur kə vay um mə daw ce' ndə kwa po' furu.

¹⁸Ifray in ne numu: Daw rawti wû də təŋ kə Isak.

¹⁹Abraham we si, Ifray kə gbəgboŋ kədan mum par Isak mbə mar, bay Abraham fe Isak kə mbrew ce' ndə məni mum car mbə mara.

- ²⁰Zə Isak ve dan Ifray, mum kuswa' Yakub kə Eso kə kuswa' məni in dan wa kwa məni wə də mbə wa ndaya.
- ²¹Zə Yakub ve dan Ifray, mum kuswa' daw Zozef dāw dāw daŋ' kəri məni mum həre' kə mar, mum pe dliw um gōb wa rum bay bur Ifraya.
- ²²Zə Zozef ve dan Ifray, kəri məni mum həre' kə mar, mum in dan wa ri məni sôwâ Israyel wə də wur ar nya Egip, bay mum ta' kwa məni mum wə wa' i handay gi kə so tu rum ne ndaya.
- ²³Zə ba Moyizə kə ya um ve dan Ifray, handay pe' num du cer hinji' kəki məni handay vra' num, zə handay we i vay nə bay juk, bay handay ar ta zə dan dlay jwə dan wəloko.
- ²⁴Zə Moyizə ve dan Ifray, kəri məni mum jeŋ si, mum vad' semde vay gonli Farawon.
- ²⁵Mum wə wa' kədan mum ce boni kə sôwâ Ifray pâ məni kədan mum tuk kədam wə du kwa mə bro' kəri kî.
- ²⁶Mum dik i kəri məni sôwâ wə um jed' ce' ndə Kris nə kə mbra' pâ ndak mə nya Egip daŋ', zə mum cin i rum wa kwafe məni wə kofo.
- ²⁷Zə Moyizə ve dan Ifray, mum 'ya ar nya Egip dan ne wəlok bak jwə, mum car ngədiŋ' ce' ndə məni mum wə we Ifray məni swə cu gak we kə i rum mi.
- ²⁸Zə mum ve dan Ifray, mum gi cer mə de kə Pakə, bay mum dlay sôwâ kədan kuni tor vəswə vun vari so kədan bə sin mə wafay məni wə ci mar nə za' dāk daw mə mbri sôwâ Israyel mi.
- ²⁹Zə sôwâ Israyel ve dan Ifray, handay pâ du ya mbi mə Tlew kə sem nday ce' ndə ri rum cuco', ama kəri məni sôwâ Egip keḅ kədan handay pâ ndəna' ta', mbi tuḅ ndaya.
- ³⁰Zə sôwâ Israyel ve dan Ifray, kəki məni handay gan wa so Jeriko bəka sedā', la' tu ruḅ so rum bru ta nya.
- ³¹Zə i ghəghay mə de kə Rahab ve dan Ifray, ta cu mar kə sôwâ məni cu mun vun Ifray mi mi, zə ta ve sum kar bəkay kwa kə vunduk mə baya.
- ³²Na də in dan mi də han kərem su? Na cu kə ri kədan na in dan wa Gedeyon, Barak, Samson, Jefte, David, Samiyel, ko wa sum ka' dan mi.
- ³³Zə handay ve dan Ifray, handay ti nya cem cem, handay gi kwa mə njeŋ, bay handay fe kwa məni Ifray in dan wa rum ne nday handay kawvun lum,
- ³⁴handay ci ku mə bəliw bəliw, handay sid' wə vun masəlama. Handay ke sum tətâ, ama handay faŋ sum gbəgboŋo. Handay gbəgboŋ wə vun zi, bay handay 'way sum zi mə nya rəkway ta rəka.
- ³⁵Zə rawkwa fe sôwâ nday məni ke mar kuni, məni car mbə mar bay ne ndaya. Ama sôwâ məsin rik sôwâ məsin wə du nday hâ handay mar, handay cu bə i sôwâ məsin ulay' nday mi, zə handay wə wa' i Ifray ra' nday mbə mar kədan handay də fe nyî mə bay pâ məni na.

³⁶Handay ru sôwâ mäsın wə du nday, bay pe nday kə ləva, bay wə du cik rum, handay baŋ sôwâ mäsın wə du nday kə cururu bay njay nday ta so daŋgay'i.

³⁷Handay ge sôwâ mäsın wə du nday kə gway' hâ handay mara. Handay jak sôwâ mäsın wə du nday kə kwa fol gu mə də kə "siyi" hoḅ hoḅ, bay handay ci sôwâ mäsın wə du nday kə masələma. Sôwâ mäsın wə du nday ge mbrew dıke cime ko hu bay gaŋ kə ndi ri daŋ', handay sum ca, bay sôwâ mäsın gi boni ne nday bay rik ndaya.

³⁸Sôwâ nya cu nde i kədan handay mbə du nday mi. Handay gaŋ wə du gop kə wa igway' bay handay bar wə nyir gway' kə rawti zra wa nya.

³⁹Ifray sâ' sôwâ məni kuni daŋ' zə handay ve dan um, kə ndi nə daŋ', handay cu fe kwa məni Ifray in dan wa rum ne nday nə mi.

⁴⁰Zə Ifray gila' kwa mə bay pâ daŋ' wə zə mba, mum cu wa' i handay də day ri mə kə mbra' cop mi, say kə mba.

Hébreux 12

¹Mə namba, namba kə sum in njeŋ dan məni kuni raw məni wə gan wa mba, zə rum mə ar kwa daŋ' məni wə tak ta mba kə kwa mə bro' məni wə mba rew, bay mə kəŋji' ne wə vari ne məni Ifray gila' rum wə kor mba,

²mə njay i mba wa Zezu məni namba njay vunduk mba wa rum daka təŋ zu rum hâ vun ndo' rum, mum red' vunduk um kəri məni sôwâ gay' num ta wa gu, mum cu dık dan wa dan zur məni mbə wa rum kə mar mə ndani nə mi, zə mum we kədam məni Ifray cin wə zə rum nə si, bay mgbaŋ ni nə, mum suk ba fun kwasuk Ifraya.

³I dık dan wa rum kə vari məni mum red' vunduk rum wə kor sum gi kwa mə bro' kəri məni handay vad' num, ndəna', i tuk cik ko ar vunduk ri par ni mi.

⁴Zə wə du zi məni hi wə zi kə kwa mə bro', hi cu zi hâ day mar mətə',

⁵hi dımwa dan məni Ifray wə jeŋ vunduk ri kə ndi ce' ndə məni mum wə jeŋ vunduk ne kə daw um nə si su? Vay man, a kar dan lim məni Bârî wə wû lim kə ndi, ce' ndə dan mə uray mi, bay a ar vunduk ru par nu kəri məni Bârî wə wû dlay mi.

⁶Zə Bârî wə lim swə məni mum bə num, bay mum wə pum swə daw daw daŋ' məni mum kar ce' ndə vay umu.

⁷I car ŋgədiŋ' wə du boni rum ce' ndə məni vay wə car ŋgədiŋ' kəri məni ba um wə um dlaya. Zə boni rum wə ta' i Ifray wə mi gi ce' ndə daw umu, vay məni ba um cu um dlay mi nə kəta' su?

⁸Hi la' cu fe boni ce' ndə daw um daŋ' mi si, ka hi cu daw um mə kəzin' mi, ama hi daw woŋo.

⁹Mə faŋ dık dan wa ba mba mə wa nya mə ni kuna. Handay wə mba dlay, bay namba wə nday mbâ. La' ndəna' si, say mə mun vun Ba mba mə wafray pâ məni nə, kədan namba də ke kə nyî mə də hâ.

¹⁰Ba mba mə wa nya mə ni kuni wə mba dlay kə ri kî ce' ndə vari məni handay kar njeŋe. Ama Ifray wə mba dlay kədan gi kwa mə ɓay zə mba kədan namba də ke du ɓay umu.

¹¹Kəri məni mum wə mba dlay, namba wə kar kwa rum ce' ndə kwa mə gi dan dɪk, cu ce' ndə kwa mə gak gi kədām mi. Ama kəki rum, sôwâ məni lim zə dan dlay rum, handay wə fe kwafe məni mbə kə dan dlay rum, heɓ məni wə mbə kə ta mə njeŋe.

¹²Zə rum, i ra' ɓa ri məni cu gbəgboŋ mi kuni də fray, ɓay i jeŋ vun cingit ri mə tətâ kuni,

¹³i ta də kofo wə vari mə sərəŋ kədan sem ri məni lem kuni faŋ lem kə wa za' mi, ama kuni cara.

¹⁴I gi tu ri kədan i gay' heɓ kə sôwâ daŋ', ɓay kədan i ta də kofo dan dan mə bro', zə swə la' cu gi ndəna' mi si, bə rum cu gak də we Bârî mi.

¹⁵I kaw wa ri kədan swə ɗaw nə ar ɓay Ifray mi. I kaw wa ri kədan swə ɗaw nə faŋ ke ce' ndə tlor kwa mə bak məni wə ci ɓay bak um wə gi bro' hay' sôwâ juk nə mi.

¹⁶I kaw wa ri kədan swə ɗaw nə ke bə ghəghay ko bə dan ô kwa Ifray ce' ndə Eso məni tle semɗe vay mə mbri um coɓ kwati mə tam ɗaw kə ndi nə mi.

¹⁷Hi we si kəki rum, mum wa' kədan ba um kuswa' num, ama ba um 'way num, zə Eso cu gak za' vari kədan mum faŋwa kwa məni mum gi nə mi, ko kəri məni mum wə keɓ vari rum kə ci'i.

¹⁸Hi cu jik ta hay' kwa məni hi gak ɗak kə ɓa ri ce' ndə məni sôwâ Israyel gi kəri məni handay jik ta hay' sem igway' mə ɗe kə «Sinay» nə mi. Kəri rum, igway' rum wə ye' ku bəliw bəliw, ɓay ri mə ura', dləmbur buŋô, kə simbed' buŋô kəmbo' ri rumu.

¹⁹Sôwâ məni wə ri rum, handay mun ci' duɓ kə woro. Kəri məni handay mun wor rum, handay o wor rum kədan nə in dan ne nday za' mi,

²⁰zə handay cu gak ta zə dan dlay məni ini: Kwa mə kə i daŋ' məni ɗak sem igway' məni nə, ko kwa rum la' kwa mə ta kə sem, say i ge kwa rum kə gway' hâ mara.

²¹Kwa məni gi wa igway' rum gi Moyizə ne wəlok hâ mum ini: Tu rin par nyen, ɓay na ne wəlok juku!

²²Ama hi jik ta hay' sem igway' Siyoŋ kə so Ifray mə kə i, wa' dan in i so Jeruzalem mə wafray məni sum sin Ifray mə wafray ɓa wə gi cer han,

²³hi jik ta wə ri ɓa məni sôwâ məni ve dan Ifray vun kofo wə tuk kədām han, semɗe nday wây' wə wafray, hi jik ta hay' Ifray, bə ɓok dan wa sôwâ daŋ', ɓay hay' sôwâ mə njeŋ məni Ifray ra' nday mbə mar,

²⁴hi jik ta hay' Zezu, bə vari dan kawvun mə mbrew, ɓay hay' vəswə rum məni wə in dan mə ɓay pâ mə Abel.

²⁵Zə rum, i kaw wa ri kədan i vad' dan swə mənɪ wə in dan rum mi ne nə mi! Zə sôwâ mənɪ vad' dan swə mənɪ dlay nday wa nya kə dan dlay Ifray, handay fe boni, la' ndəna' si, namba la' vad' dan mənɪ car mbə wafray si, namba cu gak sid' wə du boni rum mi.

²⁶Kəri rum, wor rum gi nya nyen, ama mgbaŋ ni nə, mum in dan mənɪ nə ne mba: «Na də gi nya nyen kərem», na cu də gi nya nyen taw mi, ama na də gi fray nyen ta'a.

²⁷Dan mənɪ ini: «Kərem» wə ta' i kwa mənɪ Ifray gi kuni, mum wə də nday gi nyen, ɓay handay wə də vi', kədan kwa mənɪ cu gi nyen mi, handay də ke də hâ.

²⁸Zə rum, mə gi soko ne kə Ifray, zə mum wə də mba ne ri suk mənɪ cu nyen mi. Mə ta' kədam tu mba kə gi zə Ifray kə vari mənɪ wə kədam tu rumu. Mə mbâ num kə ô numu.

²⁹Zə Ifray mba nə ku mənɪ gak ye' kwa.

Hébreux 13

¹I ke kə bə nji mbok nji ce' ndə daw ba.

²I dla' wa dan mənɪ na: I ve rəkway mənɪ wə mbə so mi kə kədam, zə kə gi ndəna', sôwâ məsin ve sum sin Ifray mə wafray wə so nday dan we rumu.

³I dɪk dan wa sôwâ mənɪ wə so daŋgay' ce' ndə mənɪ hi wə so daŋgay' kə nday, i dɪk dan wa sôwâ mənɪ wə fe boni wə ɓa sôwâ məsin ce' ndə mənɪ hi wə fe boni rum kə ndaya.

⁴Na wə wa' i sôwâ daŋ' mbra' dan cin nji nday, na wə wa' i səmanji kə ma rum ke njeŋ du nji mbok nji, zə Ifray wə də ɓok dan wa sum ghəghay kə sôwâ mənɪ wə gi nja.

⁵Wə du ta mi, i ar bə səlay suk gbəgboŋ wa ri mi. I tuk kədam kə kwa mənɪ hi kə ndi, zə Ifray ini: Na cu də wû ar kpe mi, na cu də wû ar ge kpe mi!

⁶Zə rum, namba gak in dan mənɪ nə kə vunduk mə ɗawa: Bârî nə swə mənɪ wə man jin, ndəna' na cu də ne wəlok mi. Swə gak man gi ma su?

⁷I dɪk dan wa sôwâ rôwâ mi mənɪ ke ka' dan Ifray ne ni vun kofo. I dɪk dan wa dan ta nday kə mar nday, ɓay i jənok nday kə vari mənɪ handay ve dan Ifraya.

⁸Zezu Kris nə kəta' kum, kəta' tam, ɓay kəta' də hâ.

⁹I ar sôwâ məsin vi' ni kə kwata' cem cem mənɪ car mbə rəka kuni mi. Zə ɓay kədan ɓay Ifray nə jeŋ vunduk mba, ama cu ɓay kədan dan dlay cem cem mə wa kwati nə jeŋ vunduk mba mi, sôwâ mənɪ wə ta zə dan dlay mənɪ kuni, handay za' i dan dlay rum cu gak kawɓa nday kpe mi.

¹⁰Sum po' fur mənɪ wə gi sin wə rawti jew sôwâ Zuwif, handay cu kə vari kədan handay ti kwa po' fur mənɪ handay wə po' fur kə ndi wa kwa cu kwa po' fur mba mi.

¹¹Toŋ po' fur sôwâ Zuwif wə kaw vəswə kwa po' fur wə ɓa rum ɓay ze də wə Ri mə kəleŋ pā Daŋ' kə ndi kədan mum ne vəswə rum ne kə Ifray ce' ndə kwa po' fur kədan

mum vrum kwa mə bro' sôwâ də rəka, ama handay wə ye' ku tlew kwa po' fur rum wə vun tlap rəka.

¹²Ndəna', Zezu mar wə vun tlap rəka so kədan mum kol kwa mə bro' sôwâ də rəka kə vəswe rumu.

¹³Zə rum, mə də hay' rum wə vun tlap rəka kə tle zur um wa mba.

¹⁴Zə namba cu kə so mənɪ wə kim də hâ ti wa nya mənɪ nə mi. Namba wə keɓ so mənɪ wə də mba.

¹⁵La' ndəna' si, mə bur Ifray bəka daw daw daŋ' ce' ndə kwa po' fur mba zə Zezu, wa' dan in i mə bur semde Ifray bəka daw daw daŋ' kə vun mba.

¹⁶I dɔmwa gi sin mə bay ko kawɓa nji mbok nji mi, zə kwa rum nə kwa po' fur mənɪ wə kədam tu Ifraya.

¹⁷I mun vun sôwâ rôwâ mənɪ wə ta' vari Ifray mi ne, bay i ta zə dan dlay ndaya. Zə handay wə ji nyî ri bəka daw daw daŋ' zə handay də in dan sin nday kor Ifraya. Hi la' wə mun vun nday si, handay də gi sin nday kə kədam, hi la' cu gi ndəna' mi si, handay wə gi sin nday kə dan dik, bay sin rum cu də kawɓa ri mi.

¹⁸I də kofo kə in dan kə Ifray zə mba, zə namba we si njeŋ dan dik vunduk mba bay, zə kəri daŋ', namba wə keɓ kədan namba gi kwa mə baya.

¹⁹Pâ daŋ' rum, na o ni kədan i o Ifray kədan nə ne vari ne nan kədan na faŋ də hay' ri ga'ri.

²⁰Ifray mənɪ wə ne heɓ, par Bârî mba Zezu mbə mar, mum nə bə ji cime mə mbri zə mar um mənɪ jeŋ dan kawvun mə də hâ,

²¹na wə wa' i Ifray mənɪ wə ne heɓ nə ne gbəgboŋ ne ni kədan hi gak gi kwa mə bay daŋ' kədan hi gi kwa mənɪ mum wə wa'a. Nə gi kwa mə kədam tu rum kə mba kə Zezu Kris, mbra' nə ke kə Zezu Kris hâ də hâ. Amen!

²²Daw ba man, na wə mi o kədan i red' vunduk ri bay i pe hum dan mənɪ na wây' ne ni kədan na jeŋ vunduk ri kə ndi, zə derwa mənɪ nə cu jərak mi.

²³Na wə wa' i i we, vay ba mba Timote pâ mbə so daŋgay' si, mum la' mbə hay' rin ga'ri si, na wə də um tle kə rin kəri mənɪ na də mi kara.

²⁴I kaw jeɓ sôwâ rôwâ mənɪ wə gi sin du ri daŋ' kə raw sôwâ Ifray daŋ'ŋ. Daw ba mba mə nya Itali kaw jeɓ ri.

²⁵Na wə wa' i bay Ifray nə ke kə ri daŋ'ŋ!

Jacques

Jacques 1

- ¹Na Zakə, bə sin Ifray kə Bârî mba Zezu Kris, na kaw jeḅ zə saŋ guḅ wa hoḅ mənɪ pla' wə wa nya daŋ'ŋ.
- ²Daw ba man, i tuk kəḁam juk kəri mənɪ kənji' cem cem mbə wa ri.
- ³Zə hi we si, ô mi la' car ŋgəḁiŋ' wə du kənji' rum si, ndo' vun kwa rum wə mi gi car ŋgəḁiŋ'i.
- ⁴Ama i kaw wa ri kədan i car ŋgəḁiŋ', kədan hi ke njeŋ hâ ndo' rum, sin mi daŋ' ke dan dan bro', ḁay kwa məsin kəḁa ni mi.
- ⁵Ama gwet la' kəḁa swə ḁaw du ri si, say nə o hay' Ifray mənɪ wə ḁə um ne. Zə Ifray wə ne kwa juk ne kə sôwâ daŋ' uray, dan nday mgboro.
- ⁶Ama say nə in dan kə Ifray, ḁay ve dan um dan way dana. Zə swə mənɪ wə way dan, mum ra' nji kə jo mbi mənɪ simbeḁ wə tle ḁə ga' ti ḁə ga' ti.
- ⁷Swə mə ndani, nə ḁik i Bârî ḁə ne kwa ne
- ⁸kə swə mənɪ vunduk rum ḁul hoḅ, ḁay mum cu we kwa mənɪ wə ḁə gi nə mi.
- ⁹Say vay ba mba mə kə ca nə tuk kəḁam kəri mənɪ Ifray wə um mbra',
- ¹⁰ḁay vay ba mba mə ndak nə tuk kəḁam kəri mənɪ Ifray wə um jar, zə bə ndak wə ḁə ndo' ce' ndə wəḁi kwa wə ndo'o.
- ¹¹Zə fəta wə dam zu ḁay təŋ kə ti, ḁay rawḁa kwa rum, wəḁi kwa rum nde ḁə nya, ḁay ḁay um ḁə vi'i. Ndəna' ta', bə ndak wə ḁə vi' wə du sin mənɪ mum wə gi.
- ¹²Kəḁam zə swə mənɪ wə car ŋgəḁiŋ' wə du kənji', zə kəki mənɪ mum pā mbə wə du kənji' rum si, mum ḁə fe nyî mə ḁə hâ mənɪ Ifray kawvun i mum wə ḁə ne kə sôwâ mənɪ wə um ba.
- ¹³Kəri mənɪ kwa la' bu swə si, say nə ini: «Ifray kə mənɪ bu nan mi.» Zə kwa mə bro' cu gak bu Ifray mi, ḁay Ifray kə tu rum cu bu swə ḁaw mi.
- ¹⁴Ama kwa bu swə kəri mənɪ səna' kwa mə bro' tu rum wə um pla' ḁay wə um kawa.
- ¹⁵Kəki rum, kwa səna' mə bro' rum ḁum ur ḁay vra' kwa mə bro', ḁay kəri mənɪ kwa mə bro' rum jeŋ si, mum vra' mara.
- ¹⁶Daw ba man mənɪ na bə, i vi' tu ri mi.
- ¹⁷Kwane mə ḁay kə kwafe mə ḁay daŋ' car mbə wafray, handay car hay' Ifray, bə gi ri mə bu cem cem mə wafray dam mba. Ifray cu faŋwa mi, ḁay mum cu kə njeḅo mi, zə mum cu faŋwa mi.
- ¹⁸Wə du dan ḁik um, mum ne mba nyî kə dan mə kəzin' kədan namba ke sôwâ mə vun kofo wə du kwa mənɪ mum gi daŋ'ŋ.

¹⁹Daw ba man mœni na bæ, i dla' wa dan mœni næ kæ bayrumu. Say sa su daŋ' næ mun dan ga'ri, ama næ ge dan ga'ri, ko næ tle bak ga'ri mi,

²⁰zœ swœ mœni wœ tle bak cu gak gi njeŋ Ifray mi.

²¹Zœ rum, i ar gi kwa mœ kæ day kæ dan dîk mœ bro' daŋ', pâ daŋ' rum, i ve dan mœni Ifray wœ mi ta' ne kæ kœdam, zœ dan rum gak mi sidi.

²²I vi' tu ri kæ mun dan Ifray kæ hum taw mi, zawa i gi kwa mœni dan rum wœ ini.

²³Zœ swœ mœni wœ mun dan Ifray dan gi kwa mœni dan rum wœ in, bæ rum ra' nji kæ swœ mœni wœ kar i rum wœ kwa kar nyî tu, bay we i mum ndœni na'a.

²⁴Kœki mœni mum kar i rum, mum faŋ 'ya, bay kœkor sar, mum dũmwa mœni mum ke ndœni na' næ si.

²⁵Ama swœ mœni wœ keŋ mun zu dan dlay mœ njeŋ mœni wœ mba ne fe wa tu, bay bæ rum wœ ta zœ dan dlay rum njeŋ, bay bæ rum cu tuk kœdam kœdan mum mun dan rum kæ hum bay faŋ dũmwa dan rum mi, ama mum wœ gi kwa mœni dan rum wœ in, Ifray wœ dœ kuswa' bæ rum wœ du sin umu.

²⁶Swœ la' dîk i mum wœ ne wœlok Ifray, ama bæ rum cu gak tak se'le rum mi si, ka bæ rum wœ bu tu rum bay vun fur um cu kæ sin mi.

²⁷Ta mœ bay mœni Ba mba Ifray wœ kar ce' ndœ ta mœ bay bay kœzin' næ ni na: Say swœ næ kar zu daw cakiya' kæ rœnda wœ du boni nday, bay næ ji tu rum wœ du kwa mœ bro' daŋ' mœni sœwâ wa nya wœ gi.

Jacques 2

¹Daw ba man, hi sœwâ mœni ve Bârî mba Zezu Kris, Bârî mœ kæ mbra', i gi sœwâ cem cem mi.

²I dîk dan wa dan mœni na: Bœ ndak mœni no' tœga' njike mœ bondo wœ ba, bay ge mbraw mœ bay wœ tu mbœ ze wœ ri ba mi, bay bæ ca mœni ge mbraw mœ njunjot mbœ ze du ri ta'a.

³Hi la' wœ kar swœ mœ ge mbraw mœ bay bay wœ um mbâ kæ la' um ne: «A mbœ suk wœ ti wa kwasuk mœ bay», ama hi in ne kæ bæ ca na: «A car kæ sem kœna, ko a suk wœ ti nya hay' sem rin» si,

⁴ka hi cu gi sœwâ cem cem du ri mi su? Dan bœk mi cu car wa dan dîk mœ bro' mi su?

⁵Daw ba man mœni na bæ, i munu! Ifray da' sum ca mœ wa nya mœni næ kœdan handay ke sum ndak wœ du dan mœni handay ve, bay kœdan handay dœ ze wœ ri mœni mum wœ dœ suk jwœ wa sœwâ mœni mum kawvun i mum wœ dœ ne kæ sœwâ mœni wœ um ba.

⁶Ama mœ hi, hi jed' bæ ca na. Sa kuni wœ mi rik bay wœ mi dlam dœ kor sum bœk dan su? Sum ndak, cu mi su?

⁷Handay kæ mœni ge dan mœ bro' wa semdœ mœ bay mœni Ifray ne ni.

⁸Kəzin', hi gi ɓay kəri mənɪ hi wə ta zə dan dlay mə ri mənɪ Ifray wə də suk jwə wa sôwâ um ce' ndə mənɪ Dan rum wây' wə du ɗerwa: «A bə jik wû ce' ndə mənɪ ha wə bə tu ru.»

⁹Ama hi la' wə gi sôwâ cem cem si, ka hi wə gi kwa mə bro', ɓay dan dlay wə də mi kaw, zə hi cu ta zə rum mi.

¹⁰Zə swə la' wə ta zə dan dlay ɗaŋ', ama bə rum ar ta zə dan dlay ɗaw wə du dan dlay mənɪ kuni si, dan ɓok də ke wa bə rum ce' ndə mənɪ mum ar ta zə dan dlay ɗaŋ'ŋ.

¹¹Zə swə mənɪ ini: A gi nja mi, mum kə mənɪ ini: A ci mar mi ta', la' ndəna' si, ha la' cu gi nja mi, ama ha la' ci mar si, ka ha ar ta zə dan dlaya.

¹²I ge dan ɓay i gi sin ce' ndə sôwâ mənɪ Ifray wə də ɓok dan wa nday ce' ndə dan dlay mənɪ wə mba ne fe wa tu.

¹³Kəri mənɪ Ifray wə də ɓok dan wa sôwâ mənɪ cu we ca wa sôwâ məsin mi, mum cu də we ca wa nday mətə', ama we ca wə də suk gbəgborɔŋ wa dan ɓoko.

¹⁴Daw ba man, swə la' in i mum kə ô, ama sin cem cem mənɪ mum wə gi kuni cu ta' i mum cu ve Kris mi si, dan um kə sin mi su? Dan mənɪ mum ve gak um sid'su?

¹⁵I ɗik dan wa dan mənɪ na: Vay ba wû mə nji ko mə ma la' cu kə mbraw ge tu ko kwati mi si,

¹⁶ɓay hi la' in ne ndaya: «I kaw ri heɓ, i də hay' ku kədan i ɗe ku, ɓay i də ti kwati ndak ni», ama hi la' cu ne nday kwa mənɪ handay kə mē' rum mi si, dan mi kə sin mi su?

¹⁷Ndəna' kə sôwâ mənɪ ve Kris ta', swə la' cu ta' i mum ve Kris kə gi sin mə ɓay mi si, ka dan mənɪ mum ve nə mara.

¹⁸Ama swə məsin la' ini: «Mə ha, ha ve Kris, ama mə na, na wə gi sin, kəri rum, na də ɗam vun rumu: A ta' i hi ve Kris mə dan gi sin ne nan, ɓay na, na də wû ta' i na ve Kris kə sin cem cem mənɪ na wə gi kuni wû ne.»

¹⁹Ha ve i Ifray nə ɗaw sar su? ʼBay dle tu si. Ko gam ve dan rum, ɓay tu nday nyənyen kə wəloko.

²⁰Ha swə mə lay, ha wə wa' i na ta' i swə mənɪ ve Kris dan gi sin cu kə sin mi wû ne su?

²¹Ifray kar Abraham, ba mbri ramba, njeŋ kor rum mə ma su? Mum kar num njeŋ kor rum zə sin mənɪ mum gi kəri mənɪ mum po' fur kə vay um Isak wa kwa cu kwa po' furu.

²²Ha we si, dan mənɪ mum ve nə gi sin du sin um, ɓay sin rum gi dan mənɪ mum ve nə faŋ njeŋ,

²³ndəna', dan mənɪ ʼDerwa Ifray in nə nyen si: «Abraham ve Ifray, ɓay Ifray kar num ce' ndə swə mə njeŋ kor rum zə mum ve dan rum», ɓay Ifray ɗe num kə bāy umu.

²⁴Zə rum, hi we si, Ifray wə gi swə njeŋ kor rum cu zə mum ve Kris taw mi, ama zə sin cem cem mənɪ mum wə gi kuni ta'a.

²⁵Kwa rum gi ndəna' kə i ghəghay mə dɛ kə Rahab ta'a: Ifray kar sə njeŋ kor rum zə sin mənɪ ta gi, ta kə mənɪ ve sum kar bəkay kwa wə so sə, ɓay ta' vari mə pā mbok so ga' məsɪn ne ndaya.

²⁶Ndəna', ce' ndə tu mə dan simbed' nə mar, ndəna' ta', swə mənɪ ve Kris dan gi sin, dan mənɪ mum ve nə mara.

Jacques 3

¹Daw ba man, i keɓ kədan faŋ sum ta' kwa raw du ri mi, zə hi we si: Namba sum ta' kwa, Ifray wə də ɓok dan wa mba ɓayrum pā sôwâ məsɪn,

²namba daŋ', namba wə vi' vari kə vari cem cem juku. Swə mənɪ la' cu vi' vari wə du dan ge um kpe mi si, ka bə rum swə mə njeŋ mənɪ gak tak tu rum daŋ' ta'a.

³Namba wə no' ret vun nda' kədan handay mun vun mba, ɓay ndəna', namba gak tle vun nday də ri mənɪ namba wə wa' daŋ'ŋ.

⁴Ko i dɪk dan wa da mə mbi: Ko handay la' rôwâ dle tu si daŋ', ɓay simbed' nday pla' kə gbəgboŋ, sum cinik da wə nday cinik kə ləfun da mə dɛrɛ' də ri daŋ' mənɪ handay wə wa'a.

⁵Ndəna' kə se'le ta', mum nə kwa mə kî wə du kwa tu, ama mum gak mbra' tu kə ge dan mə toŋo. I dɪk dan wa dan mənɪ na: Vay ku mə kî gak ye' za ji mə mbri.

⁶Se'le nə ce' ndə ku, kwa mə bro' mə wa nya. Wə du kwa tu mba, se'le mba wə ɓawa kwa mə bro', ɓay mum wə pla' kwa mə bro' rum wə tu daŋ'ŋ. Mum wə ye' ta mba daŋ' kə ku mənɪ car mbə ri ku mə də hâ.

⁷Swə gak lim cap tlew goɓ cem cem daŋ', rugwa, kwa mə dlam rawti nya, ɓay keve mənɪ mum gak nday limi.

⁸Ama swə cu gak lim se'le rum kpe mi: Mum wə bro', ɓay swə cu gak um tak mi, mum nyen ped' kə tlor mənɪ wə ci tu!

⁹Namba wə gi soko ne kə Ifray Bârî mba ɓay Ba mba kə se'le mba, ama namba wə ge nê' sôwâ mənɪ Ifray gi nday ra' nji kə rum kə ndi ta'a.

¹⁰Dan gi soko kə dan ge nê' kwa wə wur mbə vun mə dāwa. Daw ba man, say kwa rum nə ke ndəna' mi.

¹¹Mbi mə ɓay kə mbi mə bak cu gak wur mbə zra mbi mə dāw mi.

¹²Daw ba man, gu tərɪm cu gak vra' olivə mi, ɓay gu viŋə cu gak vra' tərɪm mi ta'a. Ndəna' ta', mbi mə walak cu gak ne i mbi mə kəɗam mi.

¹³Swə mənɪ kə gwet kə kwawe kəta' wə du ri su? Say nə ta' kwa rum kə sem ta um mə ɓay kə sin cem cem mənɪ mum wə gi kə kəɗam ɓay gwete.

¹⁴Ama hi la' kə sây' mə bro', ko dan dle vun wə vunduk ri si, i mbra' tu ri, ko hay dan kə dənok dan mə kəzin' kə ndi mi.

¹⁵Gwet mə ndani nə cu car mbə wafray mi, mum nə mə nya mənɪ nə ɓay mə kpak tu sumra', mum car mbə hay' Satan.

¹⁶Zə wə ri mənɪ sây' mə bro' kə dan dle vun kəta' wə han, dan mə ghəghay kə kwa mə bro' cem cem daŋ' wə ke han ta'a.

¹⁷Ama gwet mənɪ wə car mbə wafray nə kələŋ cop rum, ɓay mum ne heɓ, kə kəɗam, ɓay ɓay ta', mum nyen peɗ kə we ca kə sin mə ɓay, ɓay mum cu gi sôwâ cem cem ko kə vari vur vur mi.

¹⁸Sôwâ mə heɓ mənɪ wə jo' zep mə heɓ, zep rum wə də vra' ta mə njeŋ, ɓay handay də ɓawa ta mə njeŋ rum ce' ndə kwa wakaya ndaya.

Jacques 4

¹Ghaw kə dle vun mə wə du ri kuni car mbə ka su? Handay car mbə du kwa sənɪ mənɪ wə zi bəka daŋ' wə vunduk ri.

²Hi kə mē' kwa, ama hi cu gak fe kwa rum mi. Zə rum, hi wə suk sây' nji ɓay hi hərə' kə ci mara. Hi kə mē' kwa, ama hi cu gak za' kwa rum mi. Zə rum, hi wə dle vun kə gi ghawa. Hi cu kə kwa mənɪ hi wə wa' rum nə mi, zə hi cu wə o kwa rum hay' Ifray mi.

³Bay hi la' wə o Ifray si, hi cu fe mi, zə dan dɪk mi wə bro'o. Kwa mənɪ hi wə o nə, hi wə wa' kwa rum kədan hi gi kwa mə kəɗam tu ri kə ndi.

⁴Hi sum vur vuru! Hi cu we i sôwâ mənɪ wə gi bây kə kwa nya kuni wə faŋ sum sɪ Ifray mi su? Swə mənɪ wə keɓ gi bây kə kwa nya, bə rum wə faŋ bə sɪ Ifraya.

⁵Dan rum wây' wə du ɗerwa: «Simbeɗ mənɪ Ifray sin wə vunduk mba nə wə mba ji kə sây'i.» I dɪk i dan rum in uray mi.

⁶Ama ɓay Ifray mənɪ mum ne mba nə toŋ pâ kwa rum, zə Dan rum wây' wə du ɗerwa: «Ifray wə tak sôwâ mənɪ wə mbra' tu nday, ama mum wə ne ɓay um ne kə sôwâ mənɪ wə hom tu ndaya.»

⁷Zə rum, i ar tu ri ne kə Ifray, i tak Satan ɓay mum də ne seŋ kə ri.

⁸I jik də hay' Ifray, ɓay mum də jik mbə hay' ri. Sum gi kwa mə bro', i kol ɓa ri, ɓay sum vur vur, i kol vunduk ri!

⁹I ke wə du dan dɪk, i ci' ɓay i ge woro. I samwa mây mi kə ci', ɓay kəɗam mi kə dan diki.

¹⁰I hom tu ri kor Bârî, ɓay mum də mi mbra'a.

¹¹Daw ba man, i ge dan mə bro' wa nji mbok nji mi. Swə mənɪ wə ge dan mə bro' wa vay ba um, ko wə ɓok dan wa rum, bə rum wə ge dan mə bro' wa dan dlay ɓay wə ɓok dan wa rumu. Ha la' wə ɓok dan wa dan dlay si, ka ha cu swə mənɪ wə ta zə dan dlay nə za' mi, ama ha swə mənɪ wə ɓok dan wa rumu.

¹²Ifray daw sar kə mənɪ wə ne dan dlay bay wə bok dana: Mum daw sar kə mənɪ gak sɪd swə ko ci swa. Ha nə sa kədan ha bok dan wa swə məsin su?

¹³Mgbaŋ ni nə, i mun nan ri', hi sôwâ mənɪ wə ini: «Tam ko siw, namba də də so mə nay' na, namba də gay' wə han kim daw, bay namba də gi par kədan namba də fe sɛlaya»,

¹⁴hi cu we kwa mənɪ wə də gi wa ri siw nə mi, zə nyî ri ce' ndə dəwku mənɪ wə wur kî bay kəkor sar ndo'o!

¹⁵Dan mənɪ hi gak in nə ni na: «Bârî la' bə si, namba də ke, bay namba də gi kwa mənɪ nə, ko kwa mə nay' na»,

¹⁶ama mgbaŋ ni nə, hi wə mbra' tu ri, bay hi wə in dan wa tu ri kor sôwâ. Vari mbra' tu mə ndani nə wə bro'o.

¹⁷Zə rum, swə mənɪ we vari gi kwa mə bay, ama mum cu gi kwa rum mi, bə rum wə gi kwa mə bro'o.

Jacques 5

¹Bay mgbaŋ ni nə, i mun nan ri', hi sum ndak, i ci', bay i ge wor zə cik cem cem mənɪ wə də mbə wa ri!

²Ndak mi kuni cim si, bay cingura' tum mbraw ge tu mi kuni si.

³Njike mə bondo kə njike mə bu mi kuni mbal si, bay mbal rum wə də in njeŋ dan wa ri bay wə də ye' tu ri ce' ndə ku. Hi bəwa ndak wə du bəka vun ndo' nya mənɪ kuna!

⁴Hi cu po' bal cik sôwâ mənɪ wə gi sin sine mi mi: I mun ci' ndaya! Ci' sôwâ mənɪ wə bəwa kwa wakaya mi ta day hum Ifray, Bârî mba mə kə gbəgboŋ daŋ'ŋ.

⁵Hi gay' wa nya du kwa mə bay kə kwa mə kədama. Hi il juk zə bəka fol mənɪ wə də mba.

⁶Hi kaw swə mənɪ cu kə dan wa rum mi nə kə dan, bay hi ci num, ama mum cu bar tu rum ba ri mi.

⁷Zə rum daw ba man, i red' vunduk ri hâ day ri mbə Bârî. I kar vari mənɪ bə kura wə red' vunduk rum kə ji hâ kwa mənɪ mum jo' kuni ne i: Mum təŋ kə ji vun ndor hâ buŋô wakaya.

⁸Hi ta', i red' vunduk ri, i car ŋgəfiŋ' zə ri mbə Bârî nə hərə'e.

⁹Daw ba man, i ci' tu wa nji mbok nji mi kədan Ifray nə bok dan wa ri mi. Bə bok dan nə hərə', mum car wə vun vari!

¹⁰Daw ba man, i dla' wa sum ka' dan mənɪ in dan kə semde Bârî na, handay red' vunduk nday wə du boni, i gi ce' ndə handaya.

¹¹Namba wə də sôwâ mənî car ɲgəɖiŋ' kə sôwâ mə kəɖama. Hi mun dan wa dan vari mənî Job car ɲgəɖiŋ', ɓay hi we kwa mənî Bârî ne num kə vun ndo' rum nə si. Zə vunduk Bârî nyen ped' kə ci' ca ɓay ɓaya.

¹²Daw ba man, pâ ɗaŋ' rum, i sur vun mi, i sur vun kə wafray ko kə nya ko kə vari məsin ɗaw mi. I la' «awo» wə ri awo, ɓay i la' «â â» wə ri â â sar, kədan i njay də du dan ɓok Ifray mi.

¹³Swə məsin wə ce boni kəta' du ri su? Say nə in dan kə Ifraya. Swə məsin wə tuk kəɖam kəta' du ri su? Say nə ɗā nyem mə gi mbra'a.

¹⁴Swə məsin mənî kə gaɓ kəta' du ri su? Say nə də sum rôwâ mənî wə gi sin du kul sôwâ Kris, kədan handay də in dan kə Ifray zə rum, ɓay də wu' mur wa rum kə semɗe Bârî.

¹⁵Handay la' ve dan Ifray kəri mənî handay o kwa hay' rum, kwa o rum də car bə gaɓ rumu. Bârî də ne heɓ um ne, ɓay də vrum kwa mə bro' mənî mum gi na.

¹⁶Zə rum, i in dan kwa mə bro' mi kə ɲji mbok ɲji, ɓay i in dan kə Ifray zə ɲji mbok ɲji, kədan Ifray nə car gaɓ mi. Kwa o swə mə ɲjeŋ nə gi sin ɓayrumu.

¹⁷Eliya nə swə ce' ndə namba. Mum o Ifray kə gbəgbəŋ kədan buŋô nə se mi, ɓay buŋô cu se wa nya mi du kim hinji' kə cer kanki'i.

¹⁸Kəki rum, mum faŋ o Ifray kərem, ɓay buŋô car mbə wafray mbə nya, ɓay nya gi zepe.

¹⁹Daw ba man, swə ɗaw du ri la' ar vari mə kəzin' si, ɓay swə məsin nə faŋ kə rum mbə han,

²⁰i we, swə mənî wə keɓ swə mə gi kwa mə bro' mənî wə ta wə vari mə bro', ɓay faŋ mbə kə rum wə vari mə ɓay, bə rum də siɗ nyî swə mə gi kwa mə bro' nə mbə mar, ɓay kwa mənî mum gi nə ar vari kədan Ifray vrum kwa mə bro' cem cem juku.

1 Pierre

1 Pierre 1

- ¹Na Piyer, bæ sin Zezu Kris, na wây' dërwa mæni næ hay' sôwâ mæni Ifray da' nday, sôwâ mæni pla' wa gay' ce' ndæ mæwor wæ nya Pontes, nya Galasi, nya Kapados, nya Azi, kæ nya Bitini,
- ²Ba mba Ifray da' ni vun kofo ce' ndæ dan dîk um, bay Simbed' um gi ni fañ sôwâ um kædan hi ta zæ Zezu Kris, væswæ rum kæ mæni kol kwa mæ bro' mi ta ræka. Na wæ wa' i Ifray næ ne bay kæ heß um ne ni bayrumu!
- ³Mbra' hay' Ifray, Ba Bârî mba Zezu Kris: Zæ mum wæ we ca wa mba bayrum, mum vra' mba kæ mbrew kæri mæni mum par Zezu Kris mbæ mara. Ndæna', namba gak njay vunduk mba wa kwa mæ kæzin',
- ⁴bay namba gak tuk kædam kæ bayda mæni Ifray njay wæ zæ sôwâ um wafray zæ ri, wæ ri mæni bayda rum cu gak dænok, ko kup, ko vi' kpe mi.
- ⁵Zæ hi ve Kris, Ifray wæ mi ji kæ gbægboñ um hâ mum dæ mi sid' kæri mæni mum dæ ndo' sid' um hære' wæ du bæka vun ndo' nya.
- ⁶I tuk kædam du dan rum, ko mgbañ ni næ hi wæ dîk dan kæri kî zæ boni cem cem mæni hi wæ ce,
- ⁷zæ boni rum wæ ta' i hi ve Kris kæzini. Njike mæ bondo gak dænoko. Kæ ndi næ dañ', sôwâ wæ kænji' njike rum kæ ku kædan handay kar njike rumu. Kæri mæni hi ve Kris, dan rum kæ mbra' pâ njike mæ bondo, ama Ifray wæ kænji' dan rum kædan mum kar njeñ rumu. Ndæna', Ifray wæ dæ mi bur, gi mbra', bay mbâ kæri mæni Zezu Kris dæ ta' tu rum kor sôwâ dañ'ñ.
- ⁸Hi bæ num, ko kæri mæni hi cu we num kæ i mi, hi ve dan um, ko kæri mæni hi cu gak um we kæ i mgbañ ni næ mi, zæ rum, hi wæ tuk kædam kæ kædam mæ mbri mæni swæ cu gak in kæ vun rum mi,
- ⁹zæ Ifray wæ gi kwa mæni hi ve dan rum næ zæ ri, mum wæ sid' nyî ri.
- ¹⁰Sum ka' dan keß kædan handay mun zu dan sid' rum kæ bayrum, bay handay ka' i Ifray wæ dæ ne sid' rum mi ne ce' ndæ kwane:
- ¹¹Handay keß kædan handay we ri kwa rum kæ vari mæni kwa rum wæ dæ gi. Simbed' Kris mæni wæ vunduk nday ta' nday boni mæni Kris wæ dæ ce næ cop bay mbra' mæni mum wæ dæ fe kæki boni rumu.
- ¹²Ifray ta' ne kæ sum ka' dan i dan mæni handay wæ ka' næ cu wæ zæ tu nday mi, ama wæ zæ ri, hi fe dan rum mgbañ ni næ, zæ sum ka' dan ka' Dan mæ Kædam rum ne ni kæ gbægboñ Simbed' mæ Kæleñ mæni car mbæ wafray, ko sum sin Ifray mæ wafray kæ tu nday wæ wa' kædan handay mun zu dan rumu.
- ¹³Zæ rum, i gila' dan dîk mi zæ sini. I tak tu ri, bay i njay vunduk ri wa kwa mæni Ifray wæ dæ mi ne kæri mæni mum wæ dæ ta' Zezu Kris ne kæ sôwâ dañ'ñ.

¹⁴I mun vun Ifray ce' ndə daw mənɪ wə mun vun, ɓay i ar kwa sənə' mənɪ hi ke kə ndi ɓa' kəri mənɪ hi cu we dan Kris mətə' nə suk gbəgbon wa ri mi.

¹⁵Ama wə du ta mi, i ke kələŋ ce' ndə Ifray mənɪ dɛ ni nə kələŋe,

¹⁶Dan rum wây' wə du dɛrwa: «I ke kələŋ zə na kələŋe.»

¹⁷Kəri mənɪ hi wə in dan kə Ifray, hi wə um dɛ kə Bəba, kəri mənɪ mum wə ɓok dan wa sôwâ daŋ', mum wə ɓok dan kə vari mə dāw ce' ndə kwa mənɪ swə dāw dāw daŋ' du nday gi. Zə rum, wə du bəka mi mənɪ gwa' wa nya mənɪ nə, i ta' i hi ô num wə du ta mi,

¹⁸zə hi we vari mənɪ Ifray tumwa ri kədan mum mi ulay' mbə du ta mə bro' mənɪ ba mbri rami ta' ne ni. Mum cu tumwa ri kə kwa mənɪ wə də dənok ce' ndə njike mə ɓu ko njike mə bondo mi,

¹⁹ama mum tumwa ri kə wəswə Kris mə kə mbra' mənɪ mum ne ce' ndə kwa po' fur, mum ke ce' ndə vay cime mə dan rəbo ko dan tan wuru.

²⁰Cop, kəri mənɪ Ifray cu gi nya mətə', mum par Kris, ɓay wə du bəka mə tam mənɪ hərə' kə vun ndo' nya, mum ta' Kris ne ni.

²¹Zə Kris, hi ve dan Ifray mənɪ par num mbə mar ɓay ne mbra' ne num, ndəna', dan mənɪ hi ve kə kwa mənɪ hi njay vunduk ri wa rum kuni car wa Ifraya.

²²Zə hi ta zə dan mə kəzin', hi kol kwa mə bro' tu ri də rəka, ɓay hi wə bə daw ba mi. Zə rum, i bə nji mbok nji njeŋ kə vunduk mə dāw,

²³zə hi vra' kə mbrew, hi cu vra' kə ba mənɪ wə mar mi, ama hi vra' kə kwa mənɪ cu də mar kpe mi, dan Ifray mənɪ wə ne nyî ɓay wə ke də hâ.

²⁴Ce' ndə mənɪ Dan rum wây' wə du dɛrwa: «Sôwâ daŋ', handay ce' ndə za, ɓay mbra' nday daŋ' ce' ndə wədi za, za wə co', ɓay wədi rum wə njay,

²⁵Ama dan Bârî wə ke də hâ.» Dan rum nə dan mənɪ Dan mə Kədam mbə ne ni.

1 Pierre 2

¹La' ndəna' si, i ar kwa mə bro' daŋ', hay dan, vur vur, sây', kə dan mə bro' daŋ' də rəka.

²I ke kə mē' mbir mə ɓay mənɪ wə car mbə du dan Ifray ce' ndə daw gule wə ke kə mē' pa', kədan kə ce rum hi gak jeŋ wə du ɓa mi kə Ifray ɓay hi də sid,

³ce' ndə mənɪ Dan rum wây' wə du dɛrwa: «Hi tuk ɓay Bârî si.»

⁴I jik də hay' Bârî, mum nə gway' mə kə sin mənɪ sôwâ ge ta rəka, ama Ifray par num ɓay kar num ɓaya.

⁵I jik də hay' rum ce' ndə gway' mə kə sin ta', kədan Ifray dam so um kə ri. Wə so um, hi wə də gi sin ce' ndə sum po' fur Ifray mənɪ wə po' fur kor rum kə kwa po' fur mə kədam tu rum zə Zezu Kris.

⁶Zə Dan rum in wə du dərwa: «Na par gway' mə kə sin mənɪ na wə cin ce' ndə gway' mə kaw dleŋ so mə dɛ kə "Siyon" mgbəŋ ni na. Bay swə mənɪ ve num, zur cu gi bə rum kpe mi.»

⁷Gway' rum kə sin bayrum zə swə mənɪ ve num, ama zə sôwâ mənɪ cu ve num mi: «Gway' mənɪ sum dām so ar ge ta rəka, gway' rum faŋ gway' mə kə sin toŋo.»

⁸Bay dan rum wə in kəreme: Gway' mənɪ nə wə gi sôwâ dle wa sem, pra mənɪ wə gi sôwâ nde. Handay wə dle wa sem zə handay cu mun vun dan rum mi. Kwa rum gi ndəna', zə Ifray da' nday zə rumu.

⁹Ama mgbəŋ ni nə, hi zə saŋ mənɪ Ifray da', hi sum po' fur Jwə, hi sôwâ mənɪ bul nji kə kwa mə bro', bay hi sôwâ Ifray, kəri mənɪ Ifray dɛ ni kədan i wur mbə du ri mə ura' bay də gay' wə ri mə bu, mum da' ni kədan hi ka' dan wa sin mə mbri mənɪ mum wə gi.

¹⁰Ba' si, hi cu ke sôwâ Ifray mi, ama mgbəŋ ni nə, hi faŋ sôwâ umu. Ba' si, hi cu ke we i Ifray we ca wa ri mi, ama mgbəŋ ni nə, mum ta' we ca um ne ni.

¹¹Bây man kwa, hi kə mənɪ ce' ndə rəkway bay məwor wa nya mənɪ nə, na o ni kədan i ji tu ri hay' kwa səna' mənɪ wə zi kə nyî ri.

¹²I ta kə bayrum wə du sôwâ mənɪ cu we Kris mi, kədan kəri mənɪ handay la' wə tum sem ri kə dan mə bro' si, handay gak we sin mə bay cem cem mənɪ hi wə gi bay handay də gi mbra' ne kə Ifray kə bəka mənɪ mum wə də mba.

¹³Kədan Bârî fe mbra' si, i ke kə mun vun sôwâ rôwâ nya daŋ'ŋ: Jwə nya mənɪ kə gbəgboŋ wa nya daŋ',

¹⁴bay sum rôwâ mənɪ toŋ nya wə nday sin kədan handay bok dan wa sôwâ mənɪ wə gi kwa mə bro' bay sâ' sôwâ mənɪ wə gi kwa mə bay.

¹⁵Ifray wə wa' i i tak dan mə uray mənɪ sôwâ mə lay wə ge kə sin mə bay mənɪ hi wə gi.

¹⁶I ta ce' ndə sôwâ mənɪ fe wa tu ndaya. I ar wa tu mənɪ hi fe nə faŋ kwa kəmbo' wa kwa kədan kəmbo' kwa mə bro' mi mi, ama i ta ce' ndə sum sin Ifraya.

¹⁷I mbâ sôwâ daŋ', i bə daw ba mi mənɪ ve Kris, i ô Ifray, bay i mbâ jwə nya.

¹⁸Sum sin, i ke kə mun vun sum rôwâ mi kə ô nday bayrumu. I gi ndəna' hay' sôwâ rôwâ mə bay bay mə kədam taw mi, ama i gi ndəna' hay' sôwâ rôwâ mə bro' ta'a.

¹⁹Zə hi la' wə red'vunduk ri du boni mənɪ sôwâ wə gi tu ri dan zu zə dan Ifray si, Ifray wə də mi kuswa'a.

²⁰Hi də fe mbra' mi, hi la' wə car ŋgədīŋ' du boni mənɪ hi wə fe zə kwa mə bro' mənɪ hi gi nə si su? Ama ko kəri mənɪ hi wə gi kwa mə bay, sôwâ wə gi boni mi ne, hi la' wə red'vunduk ri du rum si, Ifray wə də mi kuswa'a.

²¹Ifray dɛ ni zə rumu. Zə Kris kə tu rum ce boni zə ri, bay mum ar dan rum ne ni kədan hi tle tan sem rumu:

²²Mum cu gi kwa mə bro' daw mi, bay swə cu mun dan mə hay dan pâ mbə vun rum daw mi.

²³Kəri məni sôwâ i num, mum cu dam vun nday kə i kwa mi. Kəri məni mum ce boni, mum cu dle vun kə nday mi, ama mum ar tu rum ne kə Ifray məni wə bok dan wa sôwâ njeŋe.

²⁴Kris kə tu rum kə məni ra' kwa mə bro' mba wa rum wa gu, kədan namba də ke ce' ndə mar hay' kwa mə bro', bay kədan namba də ta kə vari mə njeŋ, gaḅ mi car zə mbir umu.

²⁵Hi ke ce' ndə cime məni vi', ama mgbaŋ ni nə, hi faŋ mbə hay' vay ji cime kə bə ji nyî ri.

1 Pierre 3

¹Ndəna' ta', rawkwa, i ke kə mun vun njiwkwa mi kədan njiwkwa məsin du nday la' cu ve dan Ifray mi si, handay də um ve zə ta mi. Cu kə sin kədan hi ge dan ri' mi,

²zə handay də we ta mi mə bay, mə kə mbâ Ifraya.

³I keḅ kədan i gila' tu ri bay kə kwa məni sôwâ wə gi jid' tu nday kə ndi rəka mi: Na wə in dan wa kwa mə ce' ndə dan kan wa, təga' mə gi kə njike mə bondo, bay mbraw mə bay məni hi gak ge.

⁴Ama say bay mi nə ke kwa mə bay məni wə vunduk ri, kwa mə bay məni cu dənok kpe mi, məni wə car mbə kpak mə kədam bay 'yeŋ, kwa mə bay rum nə kə mbra' bayrum kor Ifraya.

⁵Rawkwa mə vun kofo məni bul nji kə kwa mə bro' bay njay vunduk nday wa dan Ifray gi tu nday faŋ bay kə vari rum, handay mun vun njiwkwa ndaya:

⁶Sara gi ndəna', ta mun vun Abraham, bay ta dē num kə bârî sa, mgbaŋ ni nə, hi la' wə gi kwa mə bay bay hi la' cu wə ne wəlok mi si, ka hi daw sa.

⁷Ndəna' ta' njiwkwa, i gay' kə rawkwa mi kə we i gbəgboŋ nday cu day mə hi mi, i mbâ nday zə handay wə də fe nyî mə də hâ məni Ifray ne ni ce' ndə kwane nə ta', i gi ndəna' kədan kwa məsin nə tak kwa o mi mi.

⁸Ndô' vun dan rum, say hi daŋ', i ke kə dan dik mə daw bay kə vunduk mə daw. I bə nji mbok nji ce' ndə daw ba, i ci' ca wa nji mbok nji, bay i hom tu ri du nji mbok nji.

⁹I po' kwa mə bro' kə kwa mə bro' mi, bay i po' i kwa kə i kwa mi. Zawa, i kuswa' sôwâ məni wə gi kwa mə bro' hay' ri, zə kəri məni Ifray dē ni, mum in i mum wə də mi kuswa'a.

¹⁰Ce' ndə məni Dan rum wây' wə du dərwa: «Swə məni wə wa' i mum tuk kədam bay fe bəka mə bay, say bə rum nə tak se'le um hay' dan mə bro' bay ar hay dana.

¹¹Say nə ar gi kwa mə bro' bay gi kwa mə bay, say nə keḅ heḅ bay ta zə rumu.

¹²Zə Bârî wə cin i rum wa sôwâ mə njeŋ, ɓay mum wə mun kwa o ndaya. Ama, mum wə faŋ ki ge kə sôwâ mənî wə gi kwa mə bro'o."

¹³Hi la' kə sây' gi kwa mə ɓay si, sa gak mi gi bro' su?

¹⁴Ko hi la' wə fe boni zə kwa mə njeŋ mənî hi wə gi kuni si, hi wə tuk kədama. I ne wəlok sôwâ mi, ɓay i ar vunduk ri par ni mi.

¹⁵Ama i mbâ Kris kə vunduk ri ce' ndə Bârî. Bəka daŋ', i ke həre' kədan hi pay zu dan kwa mənî hi njay vunduk ri wa rum nə ne kə sôwâ daŋ' mənî wə ci vun ri wa rumu.

¹⁶Ama i pay zu dan rum kə kədam kə nday mbâ, i ke kə dan dîk vunduk mə ɓay kədan kəri mənî sôwâ məsin wə tum sem ri, zur wə də nday gi wa dan mə bro' mənî handay wə ge wa ta mə ɓay mi mənî hi wə ta du ɓa mi kə Kris.

¹⁷Ifray la' wə wa' ndəna' si, pram zə swə kədan mum fe boni kə gi kwa mə ɓay pā mənî mum fe boni kə gi kwa mə bro'o.

¹⁸Zə Kris kə tu rum mar zə kwa mə bro' sôwâ sem daw zə də hâ, mum swə mə njeŋ, ɓay mum mar zə sôwâ mə vur vur kədan mum də hay' Ifray kə ri, mum mar wə tu mənî sumra' kə ndi, ama mum car mbə mar, Simbed' mə Kəleŋe.

¹⁹Kə tu mə simbed' rum, mum dam ta ri mənî nyî sum mar gay' wə han ce' ndə daŋgay', ɓay mum ka' dan ne nday,

²⁰wa' dan in i nyî sôwâ mə vun kofo mənî cu mun vun Ifray kəri mənî mum red' vunduk rum wa nday du bəka mənî Nowe gay' da ndi nə mi, kəri rum, sôwâ cep, daŋ' rum, handay coho', cok ta rawti da rum, ɓay mbi tle nday hâ handay sidi.

²¹Mbi rum nə foto baptem mənî wə mi sid' tama: Baptem rum cu kədan kol day tu də rəka mi, ama kədan o Ifray kədan nə gila' dan dîk vunduk ri faŋ ɓaya. Baptem rum wə mi sid' zə Ifray par Zezu Kris mbə mar,

²²mum 'ya ta wafray, ɓay mum ta suk ɓa fun Ifray, mum wə suk jwə wa sum sin Ifray mə wafray kə usiya mənî gay' jwə kə gbəgboŋ mbok fray kə nya.

1 Pierre 4

¹Zə Kris ce boni kə tu rum, i gila' tu ri kədan hi ke kə dan dîk ce' ndə mə mumu. Zə swə mənî wə ce boni, bə rum ɓul nji kə kwa mə bro',

²zə rum, daka mgbaŋ ni nə, wə du bəka mi mənî gwa' wa nya mənî nə, say i ta ce' ndə mənî Ifray wə wa', cu ce' ndə mənî tu ri wə wa' za' mi.

³Zə daka ɓa' si, hi ke gi ce' ndə mənî sôwâ mənî cu we Kris mi wə gi, hi ke gi kwa mə kə zur dan zur, ta zə kwa səna', ghəgahy, gal kə sum, ar tu zə kwati kə gbəgboŋ, ɓay ta kə bur ifray mə vun fur mənî Ifray mə kəzin' sî ndaya.

⁴Bay mgbaŋ ni nə, hi cu ɓa kə sôwâ mə dan we Kris wə du kwa mə bro' mənî handay wə gi kuni za' mi, dan rum jin' wa ne nday, ɓay handay wə mi i.

⁵Ama handay wə də in dan tu nday kor Ifray mənɪ hərə' kə ɓok dan wa sôwâ mə kə i kə sôwâ mə mara.

⁶Zə rum, Kris ta ka' Dan mə Kəɗam ne kə nyî sum mar, handay sôwâ mənɪ Ifray ɓok dan mar wa tu nday ce' ndə mənɪ mum ɓok dan mar wa sôwâ ɗaŋ', kəɗan handay ke kə nyî zə Ifray kə Simbeɗ mə Kəleŋe.

⁷Vun ndo' kwa ɗaŋ' nə hərə'e. Zə rum, say i ɗik dan njeŋ ɓay i tak tu ri du kwa ɗaŋ' kəɗan hi gak in dan kə Ifraya.

⁸Pâ ɗaŋ' rum, i bə nji mbok nji kə ɓayrum, zə hi la' wə bə nji mbok nji si, hi gak rom kwa mə bro' juk mənɪ sôwâ məsin wə gi hay' ri.

⁹I ve nji mbok nji wə so mi dan dan mə bro'o.

¹⁰Swə ɗaw ɗaw ɗaŋ' du ri fe kwane Ifray, say nə gi sin mə ɓay kə kwane cem cem mənɪ Ifray ne num nə wə hay' sôwâ məsini.

¹¹Swə mənɪ wə ka' dan, say nə ka' dan Ifraya. Swə mənɪ wə gi sin, say nə gi sin rum kə gbəgbonj mənɪ Ifray ne num, kəɗan wə du kwa rum ɗaŋ', sôwâ gi mbra' ne kə Ifray zə Zezu Kris mənɪ kə mbra' kə gbəgbonj hâ də hâ. Amen!

¹²Bây man kwa, i ar boni mənɪ hi wə ce juk nə jin' wa ne ni ce' ndə mənɪ boni rum mbə wa ri ce' ndə kwa mə mbrew mi.

¹³Zawa, i tuk kəɗam zə hi gak ɓa kə Kris wə du boni um kəɗan hi gak tuk kəɗam kəri mənɪ mum wə də mbə kə mbra' um ta'a.

¹⁴Sôwâ la' wə mi i zə hi wə ta zə Kris si, hi wə tuk kəɗam zə Simbeɗ Ifray mə kə mbra' wə suk vunduk ri.

¹⁵Na cu wə wa' i swə ɗaw du ri ce boni ce' ndə bə ci mar, ce' ndə bə kəy hura, ce' ndə bə gi kwa mə bro', ko ce' ndə swə mənɪ wə no' vun rum du dan sôwâ məsin mi.

¹⁶Ama swə ɗaw du ri la' ce boni zə mum wə ta zə Kris si, say nə ar zur gi num mi. Zawa, nə gi mbra' ne kə Ifray zə mum ne gbəgbonj ne num kəɗan mum ta zə semɗe Kris.

¹⁷Ri mənɪ Ifray wə də ɓok dan wa sôwâ nə mbə si, ɓay Ifray wə də ɓok dan wa sôwâ um copo. Dan ɓok rum la' wə də təŋ wa mba si, dan ɓok rum wə də ndo' vun mə ma wa sôwâ mənɪ cu mun ve Dan mə Kəɗam Ifray mi kuni su?

¹⁸Ce' ndə mənɪ Dan rum wây' wə du ɗerwa: «Sôwâ mə ɓay la' wə də siɗ kəcik si, sôwâ mənɪ cu ne wəlok Ifray kə sôwâ mənɪ wə gi kwa mə bro' wə də siɗ mə ma su?»

¹⁹La' ndəna' si, sôwâ mənɪ wə ce boni zə Ifray, say kuni ta də kofo kə gi kwa mə ɓay kə ar nyî nday də ɓa Bə gi Kwa mənɪ wə gi kwa ɗaŋ' ce' ndə mənɪ mum in dan rumu.

1 Pierre 5

¹Mgbaŋ ni nə, hi sum rôwâ mə du kul sôwâ Kris, na wə mi har, na kə tu rin, na bârî mə du kul sôwâ Kris ta', na bə we njeŋ dan wa boni cem cem mənɪ Kris ce, ɓay na wə

də fe mbra' kəri mənɪ mum wə də mbə kə mbra' umu. Dan mənɪ na wə mi har kə ndi kuni ni na:

²I ji kul sôwâ mənɪ Ifray ar wə ɓa ri ce' ndə bə ji cime, i kar zə nday kə vunduk mə ɓay ce' ndə mənɪ Ifray wə wa', cu kə dole mi. I gi sin mi zə hi wə wa' fe səlay kə ndi mi, ama zə hi kə mē' gi sin rumu.

³I keɓ kədan i suk gbəgbonj wa kul sôwâ mənɪ Ifray ar wə ɓa ri mi, ama i ke ce' ndə sum ta' vari zə ndaya.

⁴Bay kəri mənɪ toŋ ji cime wə də mbə, hi də fe njukwa mə kə mbra' mənɪ wədi rum cu də ndo' kpe mi.

⁵Ndəna' ta', daw barway, i ke kə mun vun sôwâ mənɪ jeŋ tu pâ ni si. Bay hi daŋ', i hom tu ri kədan i gi zə nji mbok nji, zə Dan rum wây' wə du ɗerwa: Ifray wə sî sôwâ mənɪ wə mbra' tu nday, ama mum wə kuswa' sôwâ mənɪ wə hom tu ndaya.

⁶Zə rum, i hom tu ri kor Ifray mənɪ kə gbəgbonj wa kwa daŋ', kədan mum də mi sâ' kəri mənɪ mum par cini.

⁷I njay dan ɗik mənɪ wə mi cik daŋ' də wa rum, zə mum wə kar zu ri.

⁸I tak tu ri du kwa daŋ', ɓay i ji kə ɓayrum, zə bə sî mi, Satan wə gan wa ri ce' ndə lum mənɪ wə dlay dan kə gaŋ keɓ swə kədan mum ti.

⁹Zə hi ve Kris, i car ŋgəɗiŋ' wə du dan rum, zə hi we si, daw ba mi mənɪ wə wa nya daŋ' wə ce boni ce' ndə mənɪ hi wə ce ta'a.

¹⁰Ama kəki mənɪ hi ce boni kə ri kî, Ifray mənɪ wə mba bə, mum ɗe ni kədan hi gay' wə ri mbra' wə du ɓa mi kə Zezu Kris də hâ. Mum kə tu rum, mum də gila' ri, mum də mi gi car ŋgəɗiŋ', mum də mi ne gbəgbonj, ɓay mum də mi njay wa zu so mənɪ mum tor mənɪ cu nyen kpe mi.

¹¹Gbəgbonj nə ke kə rum hâ də hâ! Amen.

¹²Silas, mənɪ na wə um kar ce' ndə vay ba man mə njeŋ, mum kawɓa rin kə wây' ɗerwa mə kî mənɪ nə wə hay' ri. Na wə wa' kədan na jeŋ vunduk mi ne, ɓay na wə wa' kədan na in njeŋ dan wa ɓay Ifray mənɪ hi car ŋgəɗiŋ' wə du ɓay rumu.

¹³Kul sôwâ Kris mənɪ wə so Babilonj, mənɪ Ifray da' nday ce' ndə mənɪ mum da' ni, handay kaw jeɓ ri. Vay man Markə kaw jeɓ ri ta'a.

¹⁴I kaw jeɓ nji mbok nji kə ba. Na wə wa' i heɓ nə ke kə ri, hi sôwâ Kris daŋ'ŋ.

2 Pierre

2 Pierre 1

¹Na Simonj Piyer, bə sin Zezu Kris. Na wây' dərwa mənî nə hay' sôwâ daŋ' mənî ve dan mə kə mbra' wa nji dāw kə dan mənî namba ve. Handay ve dan rum zə njeŋ Ifray mba kə Bə Sid' mba Zezu Kris.

²Na wə wa' i Ifray nə ne bay kə heḅ um ne ni bayrum, zə hi we Ifray kə Bârî mba Zezu.

³Wə du gbəgbonj Ifray, mum ne kwa daŋ' mənî namba kə mē' rum zə bəka nyî mba wa nya mənî nə, bay kədan namba ta wə vari Ifray kə ndi, bay mum ta' swə mənî dē mba kədan namba fe mbra' um kə bay um nə ne mba.

⁴Ndəna', Ifray in dan wa kwa mə bay bay toŋ ne mba, kədan kəri mənî hi də fe kwa rum, hi gak sid' mbə du kwa səna' mənî suk kə gbəgbonj wa nya bay wə dənok sôwâ, kədan hi faŋ ta kə kpak mə Ifraya.

⁵La' ndəna' si, zə hi ve Kris, i keḅ kədan i ta kə vari ta mə bay bayrum, wə du ta rum kərem, i keḅ kədan i we Ifray,

⁶wə du we rum, i keḅ kədan i tak tu ri, wə du tak tu rum, i keḅ kədan i car ŋgəḍiŋ', wə du car rum, i keḅ kədan i tləḅa kə Ifray,

⁷wə du tləḅa nji rum, i keḅ kədan i bə daw ba mi, bay wə du bə rum, i keḅ kədan i bə Ifray ta'a.

⁸Say i ke kə kwa mənî kuni, bay hi la' kə kwa rum bayrum si, kwa rum də mi gi faŋ sum sin mənî wə gi sin nday njeŋ kəri mənî hi wə də kofo kə we Bârî mba Zezu Kris.

⁹Ama swə mənî cu kə kwa rum mi, bə rum cu weri də seŋ mi, mum ce' ndə dəŋâr, bay mum wə dūmwa dan mənî Ifray vrum kwa mə bro' um mənî mum gi ba' ta rəka nə si.

¹⁰Zə rum, daw ba man, i keḅ kə gbəgbonj kədan i gay' ŋgəḍiŋ' wa dan mənî Ifray dē ni bay da' ni kə ndi, zə hi la' wə gi ndəna' si, hi cu də njay də du kwa mə bro' kpe mi.

¹¹Ndəna', hi də fe vari təlak kədan hi cok də ri Jwə Bârî mba kə Bə Sid' mba Zezu Kris mə də hâ.

¹²Zə rum, ko kəri mənî hi we kwa rum daŋ', bay hi gay' ŋgəḍiŋ' wə du dan mə kəzin' mənî hi fe nə, na də dla' wa kwa rum mi ne bəka daŋ'ŋ.

¹³Na dīk i bay kədan na dla' wa kwa rum mi ne kəri mənî na kə i ɓo, kədan i nde sen mi,

¹⁴zə ce' ndə mənî Bârî mba Zezu Kris ta' ne nan, na hərə' kə mara.

¹⁵Zə rum, na wə keḅ kə bayrum kədan na də mi ne vari kədan hi gak dla' wa kwa rum bəka daŋ' kəki mar rini.

¹⁶Kəri məni namba ta' dan gbəgboŋ Bârî mba Zezu Kris kə dan gewa um ne ni, namba cu car wa njin məni sôwâ wə ge nə mi: Zə namba we mbra' um kə i mba.

¹⁷Namba ke kə rum kəri məni Ba mba Ifray sâ' num bay ne mbra' ne numu. Kəri rum, wor Ifray mə kə mbra' car wafray mbə in dan məni nə wa rumu: «Məni nə Vay məni na wə ba. Na tuk kədam kə rum juku.»

¹⁸Namba kə tu mba, namba mun wor rum məni car mbə wafray kəri məni namba ke kə rum wa igway' mə Ifraya.

¹⁹Zə rum, mgbaŋ ni nə, namba we njeŋ dan məni sum ka' dan ka' nə si, bay zə ri kədan hi pe hum dan rum kə bayrum, zə dan rum ce' ndə baŋgay məni wə dəri wə ri mə ura' hâ Bəka rum wə də mbə, bay baŋgay vun bəka wə dəri wə vunduk ri.

²⁰Pâ daŋ' rum, i we dan məni nə: Swə daw cu gak pay zu dan məni bə ka' dan wây' wə du Derwa Ifray kə tu rum mi.

²¹Zə bə ka' dan cu ka' dan məni car mbə du dan dik sumra' kpe mi, ama Simbed' mə Kələŋ kə məni ne dan məni car mbə hay' Ifray nə ne kə sum ka' dana.

2 Pierre 2

¹Ba' si, sum ka' dan mə hay dan wur mbə du sôwâ. Ndəna' ta', sum ta' kwa mə hay dan də wur mbə du ri, handay də mbə du ri kə kwata' mə hay dan məni wə bul sôwâ, Handay də vad' Bârî məni sid' nday, bay ndəna', handay də dlam dənok mbə wa nday ga'ri.

²Sôwâ juk də jənok kwa mə kə zur məni handay wə gi dan zur, bay zə handay wə gi ndəna', sôwâ məsin wə ge dan mə bro' wa vari mə njeŋe.

³Zə sum ta' kwa mə hay dan wə səna' səlay, handay də mi ti kə mi ta' dan məni handay wə dik kə wa ndaya. Ama daka ba' si, bə bok dan nday həre' kədan mum bok dan wa nday, bay Bə dənok nday cu nde sen mi.

⁴Ifray cu ar bok dan wa sum sin um mə wafray məni wə gi kwa mə bro' mi, ama mum pik nday ta ri ku, Ifray gay' nday wə ri mə ura' kə cururu hâ bəka bok dan də mba.

⁵Ifray cu ar bok dan wa sôwâ mə vun kofo mi, ama mum ar mbi mə mbri mbə wa sôwâ bro' məni cu ne wəlok mi, Nowe, bāy coho' sôwâ mum sid' kə sôwâ mə sedā' məsin nə ka' dan mə njeŋe.

⁶Ifray bok dan wa so Sodomə kə so Gomorə mə, bay mum ye' nday kə ku, kə gi ndəna', mum ta' ne kə sôwâ mə bro' məni cu ne wəlok Ifray mi cik məni wə də mbə wa ndaya.

⁷Mum sid' Lot, swə mə njeŋ məni cik kə dik dan wa kwa mə kə zur məni sôwâ məni cu ta zə dan dlay mi wə gi dan zur,

⁸zə swə mə njeŋ rum məni suk du nday, dan dik vunduk rum cik num zə sin mə bro' məni mum we bay mun bəka daŋ'ŋ.

⁹Ndona', Bârî we vari mœni mum gak sid' sôwâ mœni wœ um ô kuni mbœ du kwa mœni wœ nday kœnji', bay ji sôwâ mœ vur vur hâ day bœka bœk dan kœdan mum bœk dan wa nday,

¹⁰pâ daŋ' rum, mum dœ bœk dan wa sôwâ mœni wœ ta zœ kwa sœna' tu nday mœ bro', bay wœ jed' gbœgboŋ Ifraya. Sum ta' kwa mœ hay dan cu ne wœlok kwa dœw mi, bay handay wœ mbra' tu nday, handay cu ne wœlok sôwâ mœ kœ mbra' mœ wafray mi, ama handay wœ nday i,

¹¹ko sum sin Ifray mœ wafray mœni kœ gbœgboŋ kœ mbra' pâ sum ta' kwa mœ hay dan kuni si, cu tum sem nday, ko nday i kor Bârî mi.

¹²Ama sôwâ mœni kuni wœ ta zœ kpak mœni handay vra' kœ ndi ce' ndœ kwa gop mœni wœ vra' kœdan sôwâ nday kaw bay ci. Handay wœ i kwa mœni handay cu mun zu rum mi. Ifray dœ nday ci ce' ndœ sôwâ wœ ci tlew gopo.

¹³Mum dœ gi boni nday ne ce' ndœ mœni handay gi boni ne kœ sôwâ mœsini. Handay wœ tuk kœdam kœ gi kwa sœna' tu nday mœ bro' kœ fœta. Kœri mœni handay wœ ba kœ ri wœ ri ti kwati, bay wœ tuk kœdam kœ ta wœ vari vur vur nday, kwa rum bro' bay kœ zuru.

¹⁴Handay wœ keb rawkwa kœdan handay gi nja kœ nday, handay cu tuk cik kœ gi kwa mœ bro' kpe mi, handay wœ bu sôwâ mœ tœtâ njay dœ du ruwa, vunduk nday fî kœ sœna' kwa, vun nœ' Ifray kœta' wœ wa ndaya.

¹⁵Handay ar vari mœ njeŋ, bay handay vi' si, handay tle vari mœni Balam, vay Bozor tle. Mum bœ sœlay mœni mum fe kœ vari vur vur,

¹⁶ama Ifray mgbor num zœ sin mœ bro' umu: Kor um mœni cu dan mi, in dan ne num kœ wor sumra', bay tak sin mœ lay mœni bœ ka' dan nœ wœ gi.

¹⁷Sôwâ mœni kuni ce' ndœ zra mbi mœ dan mbi, bay ce' ndœ dlœmbur mœni simbed' wœ sa' dle kœ ndi: Ifray gila' ri zœ nday wœ ri mœ ura' tindiŋndiŋi.

¹⁸Handay wœ ge dan mœ mbra' tu kœ dan mœ laya. Handay wœ ta zœ kwa sœna' tu nday mœ bro' kœdan handay bu sôwâ mœni wœ wur mbœ du sôwâ mœni wœ ta du kwa mœ bro' njay dœ du ruwa.

¹⁹Handay wœ in nday ne i handay dœ fe wa tu nday, ko handay kœ tu nday, handay bek kwa mœni wœ dœ nday dœnok, zœ swœ dœw dœw daŋ' bek kwa mœni suk gbœgboŋ wa rumu.

²⁰Zœ sôwâ la' wur mbœ du kwa mœ bro' mœni wœ dœnok sôwâ nya zœ handay we Bârî mba kœ Bœ Sid' mba Zezu Kris nœ si, bay handay la' faŋ ar kwa rum kaw nday bay suk gbœgboŋ wa nday kœrem si, ndœ' vun gay' nday dœ ke bro' pâ mœ vun kofo.

²¹Pram kœzœ zœ nday dan we vari mœ njeŋ pâ mœni handay we vari rum, bay faŋ ar dan dlay Ifray mœni sôwâ ta' ne ndaya.

²²Kwa mœni mbœ wa nday nœ wœ ta' njeŋ vun mœ mbri mœni na: «Dœ wœ faŋ ti kwa mœni mum faŋ ta rœka», bay: «Ziŋ mœni mbi tu, mum faŋ dœ ru tœkob kœreme.»

2 Pierre 3

¹Bây man kwa, hoɓ ɗerwa mæni na wây' hay' ri nɔ ni na. Wɔ du ɗerwa rum hoɓ jak, na wɔ keɓ kɔdan na dla' sen dan ɗik mɔ ɓay wɔ vunduk ri kɔ kwata' mæni na faɗ ta' ne ni nɔ kɔreme.

²Na wɔ wa' i i dla' wa dan mæni sum ka' Ifray ka' ne ni ɓa' si kɔ dan dlay Bârî kɔ Bɔ Sid' mæni sum sin ta' ne ni nɔ ta'a.

³Cop rum, i we: Wɔ du bɔka vun ndo' nya, sôwâ mæni wɔ ta zɔ kwa sɛna' tu nday dɔ wur, handay dɔ mi mây

⁴kɔ ini: «Mum in i mum dɔ mbɔ, cu ndɛna' mi su? Mum wɔ ka su? Ba ra mba mar si, ama kwa ɗaɗ' kɛta' ce' ndɔ mæni Ifray gi daka tɔɗ zu nya.»

⁵Handay ɗumwa dan mɔ ni nɔ kɔke'e: Daka ɓa' si, Ifray gi wafray kɔ nya kɔ dan in vun rum, mum gi nya kɔ mbi, ɓay mum par nya rum mbɔ du mbi rumu.

⁶Ndɛna' ta', mum ɗɛnok nya mɔ vun kofo kɔ mbi mɔ mbri.

⁷Ama mum wɔ ji wafray kɔ nya mæni kuni kɔ dan in vun rum kɔdan mum dɔ nday ye' kɔ ku, mum wɔ nday ji hâ day bɔka mæni mum dɔ ɓok dan wa sôwâ mɔ bro', ɓay mum dɔ nday ye' kɔ ku.

⁸Ama bây man kwa, i ɗumwa dan mæni nɔ mi: Zɔ Bârî, bɔka ɗaw ce' ndɔ kim mbu, ɓay kim mbu ce' ndɔ bɔka ɗawa.

⁹Bârî cu herere kɔdan mum gi kwa mæni mum in dan wa rum ce' ndɔ mæni sôwâ wɔ ɗik nɔ mi, ama mum wɔ red' vunduk rum wa ri, zɔ mum cu wa' i swɔ ɗaw vi' mi, zawa mum wɔ wa' i sôwâ ɗaɗ' faɗ vunduk ndaya.

¹⁰Kɔ ndi nɔ ɗaɗ', bɔka Bârî wɔ dɔ mbɔ ce' ndɔ hura. Wɔ du bɔka rum, Ifray dɔ ndo' wafray kɔ tlɔr ɓayrum, mum dɔ hâ kwa mɔ wafray kɔ ku, ɓay mum dɔ ye' nya kɔ kwa mæni wɔ han ɗaɗ' kɔ ku.

¹¹Zɔ Ifray wɔ dɔ ɗɛnok kwa ɗaɗ' kɔ vari mɔ ndani na', hi we vari mæni hi gak ta wɔ han nɔ si. Wɔ du ɓa mi kɔ Ifray, say i ta du kɔleɗe!

¹²Kɔ ji bɔka mæni Ifray dɔ ndo' wafray ɓay dɔ hâ kwa mɔ wafray kɔ ku, kɔ gi kwa ɗaɗ' kɔdan Bɔka rum mbɔ ga'ri!

¹³Ama Ifray in dan wafray mɔ mbrew kɔ nya mɔ mbrew mæni sôwâ mɔ nɗɛɗ wɔ dɔ gay' han nɔ ne mba ɓay namba wɔ ji kwa rumu.

¹⁴Zɔ rum, bây man kwa, kɔri mæni hi wɔ ji bɔka rum, i gi tu ri kɔ gbɛgbɔɗ kɔdan i ke nɗɛɗ dan dan mɔ bro' kor Ifray, ɓay kɔdan i gay' heɓ kɔ rumu.

¹⁵Bârî wɔ red' vunduk rum wa ri, i kar dan rum ce' ndɔ kwa mæni hi gak sid' kɔ ndi! Vay ba mba Pol wây' dan wa dan rum hay' ri kɔ gwet mæni Ifray ne num ndɛna' ta'a.

¹⁶Wɔ du ɗerwa ɗaɗ' mæni mum wây' dan wa dan rum, mum wây' ndɛna'a: Wɔ du ɗerwa um, ri mæsin kɛta' kɛcik kɔdan mun zu rum, ɓay sôwâ mɔ dan we kwa mæni cu

car ngəɗiŋ' wa dan mi, handay faŋwa zu dan rum ce' ndə mənɪ handay wə gi kəri məsin wə du 'Derwa Ifray ta', kə gi ndəna', handay də vi' tu ndaya.

¹⁷Ama bây man kwa, mə hi, hi we kwa rum si: Zə rum, i kaw wa ri kədan sôwâ mə bro' də ɓu ni kədan hi jik ar ri mənɪ hi car ngəɗiŋ' wə han nə mi.

¹⁸Ama i jeŋ də kofo wə du ɓay kə kwawe mə Bârî mba kə Bə Sid' mba Zezu Kris. Mbra' nə ke kə rum mgbəŋ ni nə hâ də hâ. Amen.

1 Jean

1 Jean 1

- ¹Dan rum kəta' daka tən̄ zu kwa dan̄'η. Namba mun dan um, namba we num kə i mba, namba kar num, bay namba dāk num kə ba mba.
- ²Nyî mə də hâ nə ke wə hay' Ba mba, bay mum sin num mbə hay' mba. Kəri mən̄i nyî nə mbə, namba we num, zə rum, namba wə in n̄en̄ dan wa rum bay wə ka' dan rum mi ne.
- ³Kwa mən̄i namba we bay mun, namba wə ka' dan rum mi ne ta', kədan hi ba kə mba wə du ba mba kə Ba Vay bay Vay um Zezu Kris.
- ⁴Namba wə wây' dan rum mi ne kədan nyen mbi kədam mən̄i wə vunduk mba.
- ⁵Dan mən̄i namba mun wə hay' Vay nə, bay wə ka' mi ne nə ni na: Ifray nə ri mə bu, bay ri mə ura' cu hay' rum ko kî mi.
- ⁶Namba la' wə in i namba gay' tləba n̄ji kə rum si, ama kəri rum, namba la' wə ta wə ri mə ura' si, ka namba wə hay dan bay namba cu ta zə dan mə kəzin' mi.
- ⁷Ama namba la' wə ta wə ri mə bu ce' ndə mən̄i Ifray kə tu rum kəta' wə ri mə bu si, namba wə ba n̄ji mbok n̄ji, bay vəswə Vay um Zezu kol kwa mə bro' mba də rəka.
- ⁸Namba la' wə in i namba cu kə kwa mə bro' mi si, ka namba wə vi' tu mba kə tu mba, bay dan mə kəzin' cu wə vunduk mba mi.
- ⁹Ama namba la' wə in dan mə bro' mba ne kə Ifray si, namba gak njay vunduk mba wa rum zə mum wə gi sin um n̄en̄, mum də vrum kwa mə bro' mba bay kol sin mə bro' mba dan̄' də rəka.
- ¹⁰Namba la' wə in i namba cu kə kwa mə bro' mi si, ka namba wə gi Ifray fan̄ bə hay dan bay dan um cu wə vunduk mba mi.

1 Jean 2

- ¹Daw man kwa, na wây' dan rum ne ni kədan hi gi kwa mə bro' mi, ama swə la' wə gi kwa mə bro' si, namba kəta' kə bə kawba mba wə hay' Ifray, mum nə Zezu Kris, swə mə n̄en̄e.
- ²Zə mum ne tu rum ce' ndə kwa po' kədan mum vrum kwa mə bro' mba, cu zə kwa mə bro' mba taw mi, ama zə kwa mə bro' sôwâ dan̄'η.
- ³Namba la' wə ta zə dan dlay Ifray si, namba we i namba we num si.
- ⁴Swə la' wə ini: «Na we num si», ama bə rum la' cu kaw dan dlay um mi si, ka mum bə hay dan, bay dan mə kəzin' cu wə vunduk rum mi.
- ⁵Ama swə mən̄i wə ta zə dan um, mum nə swə mən̄i wə bə Ifray n̄en̄e. Namba gak we i namba ba kə rum kə vari mən̄i na:

- ⁶Swə mənɪ wə in i mum suk tləba nji kə Ifray, say bə rum nə ta ce' ndə mənɪ Zezu ta.
- ⁷Bây man kwa, na cu wây' dan dlay mə mbrew ne ni mi, dan dlay rum dan dlay mə vun kofo mənɪ hi we daka tən̄ zu rumu. Dan dlay rum dan mənɪ hi mun si.
- ⁸Kə ndi nə daŋ', dan mənɪ na wây' nə dan dlay mə mbrew, ɓay njeŋ dan rum za' wə hay' Kris ɓay wə hay' ri ta', zə ri mə ura' wə ndo' ɓay ri mə bu ɗeri si.
- ⁹Swə mənɪ wə in i mum wə ta wə ri mə bu, ama bə rum wə sî vay ba um, ka mum suk wə ri mə ura' ɓo.
- ¹⁰Swə mənɪ wə bə vay ba um, bə rum suk wə ri mə bu, ɓay kwa mənɪ gak bu swə məsin kədan mum nde də du kwa mə bro' cu hay' rum mi.
- ¹¹Ama swə mənɪ wə sî vay ba um, bə rum suk wə ri mə ura', mum wə ta wə ri mə ura', ɓay mum cu we ri mənɪ mum wə də han nə mi, zə ri mə ura' dən̄jâr i rum si.
- ¹²Daw man kwa, na wây' dan rum ne ni zə Ifray vrum kwa mə bro' mi ta rəka zə semde Kris.
- ¹³Ba daw, na wây' dan rum ne ni zə hi we swə mənɪ kəta' daka tən̄ zu kwa nə si. Daw barway, na wây' dan rum ne ni zə hi ŋgô Satan si.
- ¹⁴Dawre', na wây' dan rum ne ni zə hi we Ba mba si. Bəba mba, na wây' dan rum ne ni zə hi we swə mənɪ kəta' daka tən̄ zu kwa nə si. Daw barway, na wây' dan rum ne ni zə hi gbəgbon̄ ɓay dan Ifray suk wə vunduk ri, ɓay hi ŋgô Satan si.
- ¹⁵I bə nya, ko kwa mənɪ wə han kuni mi. Swə la' wə bə nya si, ka bə rum cu kə bə Ba mba wə vunduk rum mi,
- ¹⁶zə kwa daŋ' mənɪ kəta' wa nya: Kwa səna' tu mə bro', kwa mənɪ sôwâ wə we kə i nday ɓay wə ke kə mē' kwa rum, ɓay kwa mə ɓay mənɪ sôwâ wə mbra' tu nday kə ndi, kwa rum daŋ' cu car mbə hay' Ba mba mi, ama car wə nya.
- ¹⁷Nya kə kwa daŋ' mənɪ sôwâ wə ke kə mē' rum wə han wə ndo', ama swə mənɪ wə gi kwa mənɪ Ifray wə wa', bə rum kə nyî mə də hâ.
- ¹⁸Daw man kwa, ndo' nya hère'e. Hi mun i bə cukur Kris wə də mba. ʼBay mgbaŋ ni nə, sum cukur Kris raw wur si, ɓay ndəna' namba we i ndo' nya hère'e.
- ¹⁹Sôwâ mənɪ kuni cu ke wə du kul mba kəzin' mi, zə rum, handay 'ya ar kul mba. Kəzə, handay la' ke wə du kul mba kəzin' si, handay wə gay' kə mba. Ama handay 'ya ar kul mba, kwa rum ta' ne kə sôwâ təl̄ak i handay cu ke wə du kul mba kəzin' mi.
- ²⁰Ama mə hi, hi fe Simbed' mə Kələŋ zə rum, hi daŋ' we dan mə kəzini.
- ²¹Na cu wây' dan rum ne ni zə hi cu we dan mə kəzin' mi mi, ama zə hi we dan rum si, ɓay hi we si, hay dan cu gak car mbə du dan mə kəzin' mi.
- ²²La' ndəna' si, sa nə bə hay dan su? Mum nə swə mənɪ wə in i Zezu nə cu Kris mi, mum nə bə cukur Kris, mum wə vad' Ba Vay kə Vay um hoɓ jaka.

²³Zə sa su daŋ' məni wə vad' Vay, bə rum wə vad' Ba Vay ta'a. Bay swə məni wə ve Vay, bə rum wə ve Ba Vay ta'a.

²⁴Zə rum, i kaw dan məni hi mun daka təŋ zu rum wə vunduk ri. Hi la' kaw dan rum wə vunduk ri si, hi də gay' tləba nji kə Vay bay kə Ba umu.

²⁵Bay Kris in i mum də mba ne kwa məni na: Nyî mə də hâ.

²⁶Na wây' dan wa sôwâ məni wə keɓ kədan handay mi bu kuni ne ni.

²⁷Ama mə hi, Kris sin Simbed' um wa ri, zə Simbed' um suk wə vunduk ri, hi cu kə mē' kədan swə məsin ta' kwa mi ne za' mi, zə Simbed' rum wə mi ta' kwa daŋ', bay kwa məni mum wə ta' nə kəzin', hay dan cu mi, zə rum, i gay' tləba nji kə Kris ce' ndə məni Simbed' um ta' ne ni.

²⁸Bay mgbaŋ ni nə, daw man kwa, i gay' tləba nji kə Kris kədan namba gak car ŋgədiŋ' kəri məni mum wə də mbə, bay kədan zur də mba gi kor rum kə bəka məni mum wə də mbə kə ndi nə mi.

²⁹Hi we si, Kris nə swə mə njeŋ, la' ndəna' si, say i we i sa su daŋ' məni wə gi kwa mə njeŋ, bə rum nə vay Ifraya.

1 Jean 3

¹I kar bə məni Ba mba bə mba nə ri', mum bə mba hâ mum də mba kə daw umu. Kəzin', namba daw um na! Sôwâ nya cu we mba mi zə dan məni na: Handay cu we Ifray mi.

²Bây man kwa, mgbaŋ ni nə, namba daw Ifray, ama tu mba də faŋwa mə ma su, namba cu we mətə', ama namba we dan məni na: Kəri məni Kris wə də mbə, namba də faŋ ra' nji kə rum, zə namba də um we ce' ndə məni mum kəta'a.

³Sa su daŋ' məni cin vunduk rum wa Kris, bə rum wə gi tu rum kəleŋ ce' ndə Kris nə kəleŋe.

⁴Sa su daŋ' məni wə gi kwa mə bro', bə rum cu ta zə dan dlay Ifray mi, zə kwa mə bro' nə dan ta zə dan dlaya.

⁵Hi we si, Kris mbə kədan mum ra' kwa mə bro' sôwâ də rəka, bay mum nə swə mə dan kwa mə bro'o.

⁶Ndəna', sa su daŋ' məni suk tləba nji kə rum, bə rum ar gi kwa mə bro', ama sa su daŋ' məni wə gi kwa mə bro' də kofo, bə rum cu kar num kə i, ko we num mi.

⁷Daw man kwa, i ar swə daw bu ni mi. Swə məni wə gi kwa mə njeŋ, bə rum njeŋ ce' ndə Kris nə njeŋe.

⁸Swə məni wə gi kwa mə bro' də kofo, bə rum mə Satan, zə Satan wə gi kwa mə bro' daka təŋ zə kwa. Vay Ifray mbə kədan mum dənok sin Satan.

⁹Sa su daŋ' məni faŋ vay Ifray, bə rum wə ar gi kwa mə bro', zə kpak Ifray wə vunduk rumu. Zə Ifray nə Ba um, mum cu gak gi kwa mə bro' də kofo za' mi.

¹⁰Kwa mēni wə ɓul mbok daw Ifray kə daw Satan njeŋ nə ni na: Sa su daŋ' mēni cu gi kwa mə njeŋ, ko cu bə vay ba um mi, bə rum cu vay Ifray mi.

¹¹Dan mēni hi mun daka təŋ zu kwa nə ni na: Mə bə nji mbok nji.

¹²Mə ke ce' ndə Kayin mi: Mum mə Satan, ɓay mum ci njeŋ umu. Zə mi mum ci num su? Zə sin cem cem mēni Kayin wə gi kuni bro', ama sin cem cem mēni njeŋ um wə gi kuni njeŋe.

¹³Daw man kwa, sôwâ nya la' sî ni si, i ar dan rum jin' wa ne ni mi.

¹⁴Namba we si, namba ke ce' ndə mar, ama mgbəŋ ni nə, namba kə nyî mə də hâ, namba we dan rum zə namba wə bə daw ba mba. Swə mēni cu kə bə mi, bə rum ce' ndə mar ɓo.

¹⁵Sa su daŋ' mēni wə sî vay ba um, bə rum bə ci mara. ɓay namba we si, bə ci mar cu kə nyî mə də hâ mi.

¹⁶Namba we bə kə vari mēni na: Kris ne nyî tu rum zə mba. La' ndəna' si, namba ta', say mə ne nyî tu mba zə daw ba mba.

¹⁷Swə la' kə kwa mə ɓay mə nya ni nə wə ɓa rum si, ɓay mum la' we vay ba um mēni cu kə kwa mēsin mi si, mum la' cu we ca rum mi si, gi ma kədan bə rum ta' i mum kə bə Ifray wə vunduk um su?

¹⁸Daw man kwa, mə bə nji kə dan ge vun, ko kə vun kədam taw mi, ama mə bə nji kə bə mə kəzin' mēni wə ta' də rəka kə gi sin mə ɓaya.

¹⁹Namba də we i namba mə dan mə kəzin' kə dan rum, ɓay dan rum kə mēni də jeŋ vunduk mba,

²⁰vunduk mba la' wə mba kaw kə dan si, namba we si Ifray kə gbəgbəŋ pâ vunduk mba si, ɓay mum we kwa daŋ'ŋ.

²¹La' ndəna' si, ɓây man kwa, vunduk mba la' cu mba kaw kə dan mi si, namba gak car ŋgədiŋ' kor Ifray,

²²zə namba wə ta zə dan dlay um, ɓay namba wə gi kwa mēni wə kədam tu rum, namba wə fe kwa daŋ' mēni namba wə o ɓa rumu.

²³Dan mēni mum wə mba dlay kə ndi nə ni na: Mə ve semde Vay um Zezu Kris, ɓay mə bə nji mbok nji ce' ndə mēni Kris dlay mba.

²⁴Swə mēni wə ta zə dan dlay Ifray, bə rum suk tləɓa nji kə Ifray, ɓay Ifray suk tləɓa nji kə rumu. Namba wə we i Ifray suk tləɓa nji kə mba kə vari mēni na: Mum sin Simbed'um ne mba.

1 Jean 4

¹ɓây man kwa, i ve sôwâ daŋ' mēni wə in i Simbed' Ifray suk wə vunduk nday kuni mi, ama i kəŋji' nday kədan i kar, Simbed'um car mbə hay' Ifray su? Zə sum ka' dan mə hay dan kəta' raw wə wa nya daŋ'ŋ.

- ²Hi gak we i Simbed' rum Simbed' Ifray kə vari mə ni na: Sa su daŋ' məni wə in i Zezu Kris nə faŋ sumra' kəzin', bə rum kə Simbed' Ifraya.
- ³Ama sa su daŋ' məni cu ve Zezu ndəna' mi, bə rum cu kə Simbed' Ifray mi. Simbed' məni mum kə ndi nə car mbə hay' bə cukur Kris. Hi mun i mum wə də mbə, bay mgbəŋ ni nə, mum kəta' wə wa nya.
- ⁴Ama mə hi, daw man kwa, hi mə Ifray, bay hi ngô sum ka' dan mə hay dan si, zə Simbed' məni wə vunduk ri nə kə gbəgbəŋ pā simbed' məni wə vunduk sôwâ mə nya si.
- ⁵Handay mə nya, zə rum, handay wə ge dan kə vari məni sôwâ nya wə ge, bay sôwâ nya wə mun dan ndaya.
- ⁶Ama mə namba, namba mə Ifraya. Swə məni we Ifray, bə rum wə mun dan mba, swə məni cu mə Ifray mi, bə rum cu mun dan mba mi, kə vari rum namba gak bul mbok Simbed' məni wə ta' dan mə kəzin' kə simbed' məni wə ta' dan mə hay dana.
- ⁷Bây man kwa, mə bə nji mbok nji, zə bə car mbə hay' Ifray, bay sa su daŋ' məni kə bə, bə rum vay Ifray bay mum we Ifray si.
- ⁸Swə məni cu kə bə mi, bə rum cu we Ifray mi, zə Ifray nə kə ba.
- ⁹Ifray ta' bə um ne mba kə vari mə ni na: Mum sin Vay um mə daw mbə nya kədan namba fe nyî mə də hâ kə rumu.
- ¹⁰Bə Ifray nə ni na: Namba cu kə məni bə Ifray cop mi, ama Ifray bə mba cop, bay mum sin Vay um kədan mum vrum kwa mə bro' mba də rəka kə rumu.
- ¹¹Bây man kwa, Ifray la' bə mba ndəna' si, namba ta', say mə bə nji mbok nji.
- ¹²Swə məni we Ifray kə i rum cu daw mi. Namba la' wə bə nji mbok nji si, Ifray suk wə vunduk mba, bay bə um wə gi sin mə njeŋ wə vunduk mba.
- ¹³Namba we i namba gay' tləba nji kə Ifray, bay mum suk wə vunduk mba kə vari məni na: Mum sin Simbed' um ne mba.
- ¹⁴Namba we Vay məni Ba mba sin kədan mum ke Bə Sid' sôwâ nya kə i mba, bay namba wə ka' dan wa rumu.
- ¹⁵Swə məsin la' wə in i Zezu nə Vay Ifray si, Ifray suk wə vunduk bə rum, bay mum suk tləba nji kə Ifraya.
- ¹⁶Bay mə namba, namba we si, Ifray wə mba bə, bay namba ve bə rumu. Ifray nə ba. Swə məni kə bə rum, bə rum suk tləba nji kə Ifray, bay Ifray suk wə vunduk bə rumu.
- ¹⁷Kwa məni wə ta' i bə rum wə gi sin mə njeŋ wə vunduk mba nə ni na: Kə Bəka bok dan, namba də car ngədiŋ' kor Ifray, zə ta mba wa nya məni nə ra' nji kə ta mə Zezu Kris.

¹⁸Bə la' kəta' si, wəlok cu ke mi, zə bə mə kəzin' wə 'way wəlok də rəka. La' ndəna' si, swə mənɪ wə ne wəlok, bə mə kəzin' cu wə vunduk bə rum mi, zə wəlok wə mbə zə dan boko.

¹⁹Mə namba, namba kə bə zə Ifray bə mba copo.

²⁰Swə la' wə ini: «Na wə bə Ifray», ama bə rum wə sî vay ba um si, ka bə rum bə hay dana. Zə mum la' cu bə vay ba um mənɪ mum wə we kə i rum mi si, mum cu gak bə Ifray mənɪ mum cu gak we kə i rum mi mətə'a.

²¹Zə rum, Kris ne dan dlay mənɪ nə ne mba: Swə mənɪ wə bə Ifray, say nə bə vay ba um ta'a.

1 Jean 5

¹Sa su daŋ' mənɪ ve i Zezu nə Kris, bə rum nə vay Ifraya. Bay swə mənɪ wə bə ba vay, bə rum wə bə daw um ta'a.

²Namba we i namba bə daw Ifray kə vari mənɪ na: Namba wə nday bə kəri mənɪ namba wə bə Ifray, bay wə ta zə dan dlay umu.

³Zə namba wə ta' i namba bə Ifray kəri mənɪ namba wə ta zə dan dlay umu. Bay dan dlay rum cu kəcik zə mba mi,

⁴zə daw Ifray daw daw daŋ' gak ŋgô sôwâ nya. Namba gak ŋgô sôwâ nya zə namba ve Kris.

⁵Sa gak ŋgô sôwâ nya su? Say swə mənɪ ve i Zezu nə Vay Ifraya.

⁶Zezu Kris nə swə mənɪ mbə kə mbi kə vəswə tu rumu. Mum cu mbə kə mbi taw mi, ama mum mbə kə mbi kə vəswə tu rumu. Bay Simbed' Ifray wə in i kwa rum nə kəzin', zə Simbed' mə Kələŋ nə kəzin' na.

⁷Kwa mənɪ wə in njeŋ dan wa rum kuni hinji'i:

⁸Simbed', mbi, kə vəswə, bay handay hinji' daŋ' kawvun dāwa.

⁹Namba wə ve njeŋ dan mənɪ sumra' wə ini. Njeŋ dan mənɪ Ifray wə in nə kə mbra' pā mə handay si, bay Ifray in njeŋ dan wa Vay um kə kwa rumu.

¹⁰Zə rum, swə mənɪ ve Vay Ifray, bə rum ke kə njeŋ dan rum wə vunduk um, ama swə mənɪ cu ve Ifray mi, bə rum gi Ifray faŋ bə hay dan, zə mum cu ve njeŋ dan mənɪ Ifray wə in wa Vay um nə mi.

¹¹Njeŋ dan rum nə ni na: Ifray ne nyî mə də hâ ne mba, bay mum ne nyî rum ne mba kə Vay umu.

¹²Swə mənɪ ve Vay, bə rum kə nyî rumu. Swə mənɪ cu ve Vay Ifray mi, bə rum cu kə nyî rum mi.

¹³Na wây' dan rum ne ni, hi sôwâ mənɪ ve semde Vay Ifray, kədan hi we i hi kə nyî mə də hâ.

¹⁴Namba gak car ṅgəḍiŋ' kor Ifray zə dan məni na: Namba we si, namba la' o kwa ɓa rum ce' ndə məni mum wə wa' si, mum də mun kwa o mba.

¹⁵Bay namba la' we i mum mun kwa o mba si, namba we i mum wə mba ne kwa məni namba wə o ɓa rum nə ta'a.

¹⁶Swə la' we vay ba um gi kwa mə bro' məni cu mbə kə mar mi si, say nə o Ifray, ɓay Ifray wə də ne nyî mə də hâ ne kə vay ba na. Dan rum kə sin zə sôwâ məni wə gi kwa mə bro' məni cu mbə kə mar mi. Ama kwa mə bro' məsin kəta' məni wə mbə kə mar, ɓay na cu in i i o Ifray wa kwa mə bro' rum nə mi.

¹⁷Sin mə bro' cem cem daŋ', handay kwa mə bro', ama kwa mə bro' məsin cu mbə kə mar mi.

¹⁸Namba we si, sa su daŋ' məni vay Ifray, cu gi kwa mə bro' də kofo za' mi, zə Vay Ifray wə um ji, ɓay Swə mə Bro' cu gak um ɗak mi.

¹⁹Namba we si, namba mə Ifray, ama Swə mə Bro' suk gbəgboŋ wa sôwâ nya daŋ'ŋ.

²⁰Namba we si, Vay Ifray mbə, ɓay mum ne kwawe ne mba kədan namba we Ifray mə Kəzini. Namba gay' tləɓa nji kə Ifray mə kəzin' zə Vay um Zezu Kris. Mum nə Ifray mə kəzin', ɓay mum nə nyî mə də hâ.

²¹Daw man kwa, i ji tu ri wə hay' ifray mə vun furu.

2 Jean

2 Jean 1

¹Na Bârî mē du kul sôwâ Kris, na wây' dērwa mēni nē hay' Ma mēti Ifray par kē daw sē mēni na wē nday bē juku. Na cu kē mēni wē nday bē taw mi, ama sôwâ dān' mēni wē we dan mē kēzin' wē mi bē ta',

²Zē dan mē kēzin' kēta' wē vunduk mba, bay dan rum dē ke kē mba dē hâ.

³Na wē wa' i Ba mba Ifray kē Vay um Zezu Kris kuni ne bay um, kē we ca um, bay hēb um ne mba kēdan namba ke kē ndi wē du dan mē kēzin', bay du ba.

⁴Na tuk kēdām juk kēri mēni na za' sôwâ mēsin wē du daw mān wē ta kē dan mē kēzin' ce' ndē mēni Ba mba ta' ne mba.

⁵Bay mgbañ ni nē, Mē jwē, na wē mān o: Mē bē nji mbok nji. Na cu wây' dan dlay mē mbrew ne mān mi, ama dan dlay rum dan mēni namba mun daka tēn zu rumu.

⁶Bē nē ni na: Say mē ta zē dan dlay Ifray, bay dan dlay rum mēni hi mun daka tēn zu rum nē ni na: I suk du ba.

⁷Sum hay dan wur raw juk wa nya, handay cu ve i Zezu Kris nē fañ sumra' kēzin' mi, swē mēni wē gi ndēna', bē rum bē hay dan bay Bē cukur Kris.

⁸Zē rum, i kaw wa ri kēdan hi dē vi' bal cik mi mi, ama kēdan hi dē fe bal cik rum cete.

⁹Sa su dān' mēni cu ta zē kwata' Kris mi, ama wē cuwol wa kwata' rum, bē rum cu kē Ifray mi. Swē mēni wē ta zē kwata' rum, bē rum kē Ba Vay kē Vay um hoḅ jaka.

¹⁰Swē la' mbē hay' ri, ama bē rum cu ta' kwata' rum ne ni mi, i ve num wē so mi mi, kō i kaw jēb rum mēta'a.

¹¹Zē swē mēni wē kaw jēb rum, bē rum wē ḁa kē rum wē du sin mē bro' mēni mum wē gi.

¹²Na kē dan juk kēdan na mi in ne, ama na cu bē kēdan na wây' dan rum wa dērwa kē mbi wây' kwa mi, zawa, na wē wa' kēdan na dē hay' ri kēdan na dē ge dan kē ri kē vun rin, kēdan namba dē tuk kēdām juku.

¹³Daw njar riñ mēti Ifray par, handay kaw jēb riñi.

3 Jean

3 Jean 1

- ¹Na Bə ji kul sôwâ Kris. Na wây' dərwa mə ni nə hay' Gayus məni na wə bə juku.
- ²Bây man, na wə wa' i kwa daŋ' ke bay zə ru, bay tu ru ke heḅ, ce' ndə suk wû kə Ifray wə heḅe.
- ³Na tuk kəḏam juk kəri məni sôwâ məsin wə du daw ba mba mbə day, bay in njeŋ dan wa dan mə kəzin' məni wə vunduk ru kə vari məni ha wə ta njeŋ du dan mə kəzin' ne nana.
- ⁴Dan mə kəḏam tu rin pā məni na mun i daw man wə ta du dan mə kəzin' nə cu mi.
- ⁵Bây man, wə du kwa daŋ' məni ha wə gi zə daw ba mba, ko zə sôwâ rəkway, ha wə gi kwa rum njeŋe.
- ⁶Handay in njeŋ dan wa dan bə wû kor kul sôwâ Kris məni gay' wə tira. Na o nu, a kawḅa nday kəḏan handay də kofo wə vari rəkway nday kə vari məni Ifray wə wa'a.
- ⁷Zə handay tle vari rəkway nday kə semḏe Kris dan sôwâ məni cu we Kris mi kawḅa ndaya.
- ⁸La' ndəna' si, namba sôwâ Kris, say mə kawḅa sôwâ mə ndani kuni kəḏan mə ḅa kə nday wə du sin məni handay wə gi zə dan mə kəzini.
- ⁹Na wây' dərwa kî hay' kul sôwâ Kris, ama Diyotref məni wə tuk kəḏam kəri məni mum suk gbəgboŋ wa nday, mum cu mun dan məni na wə in nə mi.
- ¹⁰Zə rum, kəri məni na də hay' ri, na də ta' kwa mə bro' daŋ' məni mum wə gi mi ne, kə dan mə bro' məni mum wə ge wa mba, bay hay dan məni mum wə hay wa mba. Ama dan rum cu nde num mi. Faŋ kərem, mum cu ve daw ba mba məni wə mbə hay' rum mi. Mum wə tak sôwâ məsin məni wə wa' kəḏan handay nday ve, bay mum wə keḅ kəḏan mum nday 'way mbə du kul sôwâ Kris də rəka.
- ¹¹Bây man, a jənok kwa mə bro' məni sôwâ wə gi nə mi, ama a jənok kwa mə bay məni sôwâ wə gi. Swə məni wə gi kwa mə bay, bə rum mə Ifraya. Swə məni wə gi kwa mə bro', bə rum cu we Ifray mi.
- ¹²Sôwâ daŋ' wə in dan mə bay wa Demetriyus, bay ta um mə njeŋ wə in njeŋ dan mə bay wa rum ta'a. Namba ta', namba wə in njeŋ dan mə bay wa rum, bay ha we si, dan məni namba wə in nə kəzini.
- ¹³Na kə dan juk kəḏan na wû in ne, ama na cu bə kəḏan na wây' dan rum wa dərwa kə mbi wây' kwa kə kwa wây' kwa mi.
- ¹⁴Na wə wa' kəḏan na də wû kar ga'ri, bay kəri rum, namba də ge dan mbok mba.
- ¹⁵Na wə wa' i heḅ nə ke kə ru! Bây wû kuni kaw jeḅ ru. A kaw jeḅ bây mba ḏaw ḏaw daŋ'ŋ.

Jude

Jude 1

¹Na Zudə, bə sin Zezu Kris, na njər Zakə, na wây' ɖerwa mənɪ nə hay' sôwâ mənɪ Ifray ɖe nday, sôwâ mənɪ Ifray Bəba bə nday, mənɪ Zezu Kris wə nday ji.

²Na wə wa' i Ifray nə ne we ca um, kə heɓ um, ɓay bə um ne ni ɓayrumu.

³Bây man kwa, na ke keɓ vari kə ɓayrum kədan na wây' ɖerwa wa dan siɖ mənɪ namba ɓa wə han nə hay' ri, ama kəri rum, dan məsin gi nan kədan na wây' ɖerwa mənɪ nə hay' ri kədan na jeŋ vunduk mi ne kədan hi zi zə kwa mənɪ Ifray ne kə sôwâ um ɖaŋ' sem ɖaw də hâ.

⁴Zə sôwâ mənɪ cu ne wəlok Ifray mi mənɪ, cok mbə du mba 'yeŋ, handay wə faŋwa dan mə ɓay Ifray mba kədan handay gi sin mə kə zur mənɪ handay wə gi dan zur nə faŋ ce' ndə sin mə njeŋ, ɓay handay wə vad Zezu Kris Jwə mba mə ɖaw kə Bârî mba. Daka ɓa' si, ɖerwa Ifray in dan wa dan mənɪ wə də nday kawa.

⁵Hi we dan mənɪ nə si ɖaŋ'ŋ. Ama kə ndi nə ɖaŋ', na wə wa' i i dla' wa dan vari mənɪ Bârî mba siɖ sôwâ Israyel mbə nya Egip, ama kəki rum, mum ci sôwâ mənɪ cu ve dan um mi.

⁶I dla' wa dan sum sin Ifray mə wafray mənɪ cu tuk kəɖam kə gbəgboŋ mənɪ Ifray ne nday nə mi, ama handay ar ri suk nday, Ifray gay' nday wə ri mə ura' zə nya kə cururu hâ Bəka mə mbri mənɪ mum wə də ɓok dan wa nday nə də mba.

⁷I dla' wa dan so Sodomə kə so Gomorə ɓay so mənɪ gay' gan wa ndaya. Sôwâ so rum gi ce' ndə sum sin Ifray mə wafray kuni, handay ar tu nday gi kwa mə ghəghay, ɓay handay cu bar kə nji kə vari mənɪ sôwâ wə bar kə nji mi, handay wə ce boni wə du ku mə də hâ, ɓay kwa mənɪ wə gi wa nday nə faŋ kwa mə har sôwâ ɖaŋ'ŋ.

⁸Sôwâ mənɪ kuni wə gi ndəna' ta', məsin nday wə nday ɓu gi kwa mə bro' wə tu ndaya. Handay wə jeɖ gbəgboŋ Ifray, ɓay handay wə i sôwâ mə kə mbra' mə wafraya.

⁹Ko toŋ sum sin Ifray mə wafray mə ɖe kə Misel cu gi ndəna' kəri mənɪ mum dle vun kə Satan wa mar Moyizə mi, mum cu tum sem Satan ko i num mi, ama mum la' ne numu: «Bârî nə gi boni ne nu sara!»

¹⁰Ama sôwâ mənɪ kuni wə i kwa mənɪ handay cu mun zu rum mi, ɓay kwa mənɪ handay wə we kə kpak mənɪ handay vra' kə ndi ce' ndə kwa gop, kwa rum wə nday gi vi'i.

¹¹Kəcik zə nday, handay tle vari mənɪ Kayin tle. Zə handay wə səna' səlay, handay ar tu nday wə du dan mə bro' ce' ndə Balam, handay vi' zə handay car wa kə Ifray ce' ndə Kore.

¹²Kəri mənɪ handay wə ɓa kə ri wə ri ti kwati, ɓay wə gi kwa mə kə zur dan zur, kwa rum wə gi zur mi ne. Handay ce' ndə dləmbur buŋô mənɪ simbeɖ wə sa' dle kə ndi dan

buŋô se. Handay ce' ndə gu mənɪ cu vra' mi, ko kəri mənɪ ri vra' rum kəta', handay ce' ndə gu mənɪ sôwâ par kə tlor rum, ɓay co' si.

¹³Kəri mənɪ handay wə gi sin mə kə zur dan zur, handay ce' ndə mbi mənɪ wə jo sɛta kə kukup dukduku. Handay ce' ndə ciciw mənɪ vi' vari, ɓay Ifray gila' ri zə nday wə ri mə ura' tindiŋndiŋi.

¹⁴Enok, buwa sedâ' daw rawti Adam, mum ka' dan wa nday kə dan mənɪ na: «I mun ri'i! Bârî wə də mbə kə sum sin um mə kələŋ raw dle tu si,

¹⁵kədan mum ɓok dan wa sôwâ daŋ' mənɪ handay gi kəri mənɪ handay car wa kə rum, ɓay kə ta' dan mə bro' daŋ' mənɪ handay ge wa rumu.”

¹⁶Sôwâ mənɪ kuni cu tuk kəɗam kpe mi, ɓay handay wə ci' tu bəka daŋ'ŋ. Handay wə ta zə kwa sɛna' tu nday mə bro', handay wə ge dan mə mbra' tu nday, ɓay handay wə ge dan mə kəɗam tu sôwâ məsin kədan handay fe kwa ɓa nday kə ndi.

¹⁷Ama mə hi, ɓây man kwa, i dla' wa dan mənɪ sum sin Bârî mba Zezu Kris ka' ne ni ɓa' si.

¹⁸Handay in dan mənɪ nə ne ni: «Wə du bəka ndo' nya, sôwâ mənɪ wə mi mây, ɓay wə ta zə kwa sɛna' tu nday mə bro' wə də mba.”

¹⁹Handay kə mənɪ wə mbə kə dan mənɪ wə gi sôwâ ɓul nji, handay wə ta zə kpak tu nday, handay cu kə Simbed mə Kələŋ vunduk nday mi.

²⁰Ama mə hi, ɓây man kwa, zə hi ve Kris, i də kofo wə du dan rumu. I in dan kə Ifray kə gbəgbəŋ mənɪ Simbed mə Kələŋ wə mi ne,

²¹ɓay i gay' ŋgəɗiŋ' wə du bə Ifray kəri mənɪ hi wə ji ri mənɪ Bârî mba Zezu Kris, wə du ɓay um, də mi ne nyî mə də hâ.

²²I we ca wa sôwâ mənɪ kə vunduk mə hoɓ hoɓo.

²³I siɗ nday kə ra' nday mbə du ku. Kə bə i we ca wa sôwâ mənɪ wə ta zə kwa sɛna' tu nday mə bro' ta', ama kəri rum, i sî kwa mə bro' mənɪ handay wə gi.

²⁴I gi mbra', semɗe, gbəgbəŋ, ɓay toŋ ne kə Bârî mba Ifray mənɪ gak mi ji kədan hi njay də du kwa mə bro' mi, ɓay də mi gi car kor rum dan dan mə bro',

²⁵ɓay namba gi mbra' ne kə Ifray mə kə gbəgbəŋ, kə vunduk mənɪ nyen peɗ kə kəɗam zə Bə Siɗ mba Zezu Kris, daka təŋ zu nya, mgbaŋ ni nə, ɓay hâ də hâ. Amen.

Kwawe

Kwawe 1

¹Kwata' Zezu Kris mæni mum ta' ne kə Zaŋ: Ifray ta' kwa mæni wə də mbə ne kə Kris kədan mum ta' ne kə sum sin umu. Kris sin bə sin um mə wafray mbə hay' bə sin um mə də kə Zaŋ kədan mum ta' kwa rum um ne.

²Zaŋ in dan wa kwa daŋ' mæni mum we. Mum wây' dan mæni car mbə hay' Ifray kə dan mə kəzin' mæni Zezu Kris ta' ne num wə du dərwa mæni na.

³Kədam zə swə mæni wə in dərwa mæni nə, zə sôwâ mæni wə mun dan ka' mæni nə, bay wə ta zə dan rum, zə ri mæni kwa rum daŋ' wə də gi nə hère'e.

⁴Na Zaŋ, na wây' dərwa mæni nə hay' kul sôwâ Kris sedâ' mə nya Azi: Na wə wa' i bay kə heɓ Ifray mæni kəta' tam, mæni kəta' ɓa', bay mæni wə də mbə, kə simbed' sedâ' mæni kəta' kor kwasuk jwə um,

⁵bay Zezu Kris, bə in njeŋ dan mə njeŋ, vay mə mbri mæni car mbə mar cop bay ar num suk toŋ wa sum jwə mə wa nya, kuni ne bay kə heɓ ne ni. Mum wə mba bə, bay mum ne vəswə tu rum kədan mum mba sid' mbə du kwa mə bro' mba,

⁶bay mum gi mba faŋ won um bay sum po' fur kədan namba gi sin zə Ba um Ifray, mbra' kə gbəgbəŋ kuni ke kə Zezu Kris hâ də hâ! Amen.

⁷I kar ri', mum wə mbə du dləmbur, sôwâ daŋ' də um we, ko sôwâ mæni kap num, sôwâ nya daŋ' də way' ɓa zə rum, awo, kwa rum də ke ndəna'a! Amen.

⁸Bârî mba Ifray mə kə gbəgbəŋ daŋ', mæni kəta' tam, mæni kəta' ɓa', bay mæni wə də mbə nə ini: Na nə Alfa bay Omega.

⁹Na Zaŋ, vay ba mi wə du ɓa mba kə Zezu, na wə ɓa kə ri wə du boni, wə Jwə Ifray, bay kə cin vunduk wa Zezu. Sôwâ kaw nan cin wə döl mə du mbi mə də kə Patmos, zə na ka' dan Ifray bay dan mə kəzin' mæni Zezu ta' ne nana.

¹⁰Kə Bəka Bârî, Simbed' mə Kəleŋ mbə wa rin, bay na mun wor kə gbəgbəŋ kəki rin mæni ci' ce' ndə duɓu.

¹¹Wor rum ini: A wây' kwa mæni ha we nə də du dərwa, bay a sin dərwa rum də hay' kul sôwâ Kris sedâ' mæni kuni: Efezə, Smirnə, Pergamə, Tiyatir, Sardes, Filadelfi, bay Lawdise.

¹²Na faŋ i kədan na kar swə mæni wə in dan man ne, kəri rum, na we baŋgay sedâ' mæni ri kə njike mə bondo.

¹³Bay kwa ra' nji kə sumra' car wə du ndaya. Mum ge mbraw mə mbri mæni jərak hâ njay ki sem, bay mum baŋ vunduk rum kə zew baŋ tu mæni gi kə njike mə bondo.

¹⁴Sâ wa rum mə ɓu ce' ndə sâ cime mə ɓu ko fut mbraw, bay i rum wə dərɪ ce' ndə ku.

¹⁵Sem rum wə wədi ce' ndə njike mə tlew mæni sôwâ hâ kə ku bay faŋ kolko', wor um wə ci' ce' ndə tlər mbi mə mbri mæni wə ne rawti ze.

¹⁶Mum kaw ciciw sedâ' wə ɓa fun um, ɓay masəlam mə kə se' hoɓ məni tise' juk pā mbə vun rum, vuk rum wə wədi ce' ndə fəta məni car du wa.

¹⁷Kəri məni na we num, na nde ta nya hay' sem rum ce' ndə mar, mum cin ɓa fun rum wa rin, ɓay ini: A ne wəlok mi, na swə mə vun kofo, ɓay na swə mə kəki,

¹⁸na swə məni kə i. Na ke mar, ama mgbaŋ ni nə, na kə i də hâ, na kə kwa ar vun vari so mar ɓay ri məni sôwâ məni mar gay' wə hana.

¹⁹Zə rum, a wây' kwa məni ha we, kə kwa məni wə gi mgbaŋ ni nə, ɓay kwa məni wə də mba.

²⁰Pay zu dan məni pe' wa ciciw sedâ' məni ha we wə ɓa fun rin kə ɓaŋgay sedâ' məni ri kə njike mə bondo nə ni na: Ciciw mə sedâ' wə ta' sum sin Ifray mə wafray məni wə ji kul sôwâ Kris mə sedâ', ɓay ɓaŋgay mə sedâ' wə ta' kul sôwâ Kris mə sedâ'a.

Kwawe 2

¹A wây' dan məni nə hay' bə sin Ifray məni wə du kul sôwâ Kris mə so Efezə: Dan məni swə məni kaw ciciw mə sedâ' wə ɓa fun rum, ɓay wə ta wə du ɓaŋgay sedâ' məni ri kə njike mə bondo wə in nə ni na:

²Na we kwa daŋ' məni ha gi nə si ɓay na we cik məni ha tuk wə du sin wû nə si, ɓay na we vari məni ha car ŋgədiŋ' wə du sin rum nə si. Na we i ha cu gak rom suk kə sum kwa mə bro' mi, ɓay na we i ha kənji' sôwâ məni wə in i handay sum sin, ama handay cu sum sin mi, ɓay ha za' i handay sum hay dana.

³Ha wə car ŋgədiŋ', ha ce boni zə semde rin ɓay ha cu par tətâ mi.

⁴Ama dan məni na kə ndi wa ru nə ni na: Ha cu wə man bə ce' ndə məni ha bə nan kə təŋ zu rum nə za' mi.

⁵Zə rum, a dlla' wa ri məni ha nde han, a ar kwa mə bro' wû, ɓay a gi ce' ndə məni ha ke gi kə təŋ zu rumu. Ha la' cu ar kwa mə bro' wû mi si, na də mbə wa ru, ɓay na də tle ɓaŋgay wû mbə ri rum də rəka.

⁶Ama, dan məni wə kədam tu rin hay' ru nə ni na: Ha wə sî sin məni kul sôwâ mə de kə Nikolayitə wə gi ce' ndə məni na wə nday sî.

⁷Swə məni kə hum, say bə rum nə mun dan məni Simbed' wə in ne kə kul sôwâ Kris! Na də ne vari ti vra' gu məni wə ne nyî mə də hâ məni kəta' wə du Paradis Ifray ne kə sôwâ məni fe gaŋseme.

⁸A wây' dan məni nə hay' bə sin Ifray məni wə du kul sôwâ Kris mə so Smirnə: Dan məni Alfa kə Omega ini: Swə məni ke mar, ɓay car mbə mar wə in nə ni na:

⁹Na we boni wû kə ca wû si, ama njeŋ rum si, ha bə ndak, na we dan mə bro' məni sôwâ məni wə gi tu nday ce' ndə sôwâ Zuwif, ama handay cu sôwâ Zuwif mi wə in wa ru nə si. Handay kul sôwâ Satan.

¹⁰A ne wəlok boni mənɪ ha wə də ce nə mi. A mun ri'i! Satan wə də mi kənji' kə njay sôwâ məsin du ri də so daŋgay', hi də ce boni du bəka guɓu. A ke njeŋ hâ mar ru, ɓay na də wû ne njukwa mənɪ wə ta' i ha kə nyî mə də hâ.

¹¹Swə mənɪ kə hum, say bə rum nə mun dan mənɪ Simbeɗ wə in ne kə kul sôwâ Kris. Bâɓ hoɓ mar cu də kaw sôwâ mənɪ fe gaŋsem si kuni mi.

¹²A wây' dan mənɪ nə hay' bə sin Ifray mə mənɪ wə du kul sôwâ Kris mə so Pergamə: Dan mənɪ swə mənɪ kə masəlam mə kə se' hoɓ mənɪ tise' juk wə in nə ni na:

¹³Na we ri suk wû si. Ha suk wə ri mənɪ Satan suk jwə wə hana. Ha suk tləɓa nji kə rin, ɓay ha cu ar dan mənɪ ha ve nə mi, kə kəri mənɪ sôwâ məsin ci bə in njeŋ dan man mə njeŋ mə ɗe kə Aŋtipas wə so mi, so mənɪ Satan suk jwə wə hana.

¹⁴Ama dan ɗere' cem cem mənɪ na kə ndi wa ru kuni ni na: Ha ar sôwâ mənɪ wə ta zə kwata' Balam gay' hay' ru. Mum kə mənɪ ta' vari ne kə Balak kədan nə ɓu sôwâ Israyel njay də du kwa mə bro' kə ti tlew mənɪ sôwâ po' fur kə ndi kor ifray mə vun fur nday, ɓay ar tu nday kə gi ghəghaya.

¹⁵Ndəna' ta', ha wə ar kul sôwâ mə ɗe kə Nikolayitə gay' hay' ru.

¹⁶Zə rum, a ar kwa mə bro' wû si. La' cu mi si, na wə də mbə hay' ru ga'ri, ɓay na də zi kə sôwâ kuni kə masəlam mənɪ wə pā mbə vun rini.

¹⁷Swə mənɪ kə hum, say bə rum nə mun dan mənɪ Simbeɗ wə in ne kə kul sôwâ Kris. Na də ne kwati mə ɗe kə manə mənɪ pe' ne kə sôwâ mənɪ fe gaŋseme. Na də ne gway' mə ɓu ne kə swə ɗaw ɗaw ɗaŋ' du nday, na də wây' semɗe mə mbrew wa gway' rum, ɓay swə ɗaw cu gak we semɗe rum mi, say swə mənɪ fe gway' rumu.

¹⁸A wây' dan mənɪ nə hay' bə sin Ifray mənɪ wə du kul sôwâ Kris mə so Tiyatir: Dan mənɪ Vay Ifray, swə mənɪ i rum wə ɗeri ce' ndə ku, ɓay sem rum wə wəɗi ce' ndə njike mə tlew mənɪ sôwâ kolko' wə in nə ni na:

¹⁹Na we kwa ɗaŋ' mənɪ ha gi nə si, na we bə wû, njeŋ wû, sin wû, kə vari mənɪ ha wə car ŋgəɗiŋ'ŋ. Na we si, sin mənɪ ha wə gi mgbəŋ ni nə toŋ pā mə təŋ zu rumu.

²⁰Ama, dan mənɪ na kə ndi wa ru nə ni na: Ha ar Zezabel, ma məti wə gi tu sə ce' ndə i ka' dan Ifray suk hay' ru. Ta wə vi' sum sin man kə nday ta' vari ar tu nday kə gi ghəghay, ɓay ti tlew mənɪ sôwâ po' fur kə ndi kor ifray mə vun fur ndaya.

²¹Na ar ri ne sə kədan tə ar kwa mə bro' sə, ama ta cu mun ar gi ghəghay sə mi.

²²Zə rum, na də sə kaw ge wa kwabar mənɪ ta də ce boni han, ndəna' ta', na də gi boni ne kə sôwâ juk mənɪ gi nja kə sə, handay la' cu ar sin mə bro' cem cem mənɪ handay wə gi kə sə kuni mi si.

²³Na də ci daw sə ta', ɓay ndəna', kul sôwâ Kris ɗaŋ' də we i na nə swə mənɪ wə we dan ɗik vunduk sôwâ kə kwa wa' nday, na wə də po' swə ɗaw ɗaw ɗaŋ' du ri ce' ndə sin gi umu.

²⁴Ama mə hi, sôwâ məsin mə du kul sôwâ Kris mə so Tiyatir, hi cu ta zə kwata' mə bro' rum mi. Hi cu mun dan məni sôwâ kuni wə də kə zu dan Satan mə pe' 'yeŋ nə mi. Na wə mi in ne: Na cu də cin kwazi' məsin də wa ri mi.

²⁵Ama i kaw kwa məni hi kə ndi nə ŋgədiŋ' hâ na də mba.

²⁶Na də ne gbəgbonj məni Ba man ne nan nə ne kə sôwâ məni fe gaŋsem bay wə ta də kofo kə gi kwa məni na wə wa' nə hâ ndo' rumu.

²⁷Na də nday ne gbəgbonj wa sôwâ nya, handay də nday ji kə dliw njike, bay handay də nday haɓ ce' ndə dənay ruɓ,

²⁸ce' ndə məni na fe gbəgbonj rum hay' Ba man, na də nday ne baŋgay vun bəka ta'a.

²⁹Swə məni kə hum, say bə rum nə mun dan məni Simbed' wə in ne kə kul sôwâ Kris.

Kwawe 3

¹A wây' dan məni nə hay' bə sin Ifray məni wə du kul sôwâ Kris mə so Sardes: Dan məni swə məni kə simbed' Ifray mə sedâ' kə ciciw mə sedâ' wə in nə ni na: Na we kwa daŋ' məni ha gi nə si, na we si, sôwâ məsin wə kar i ha swə mə kə i, ama njeŋ rum si, ha mara!

²A dla' sen ye, a jeŋ dan məni gwa' wə vunduk ru cop dan dan rum mar cete. Zə na we i sin wû cu njeŋ kor Ifray mi.

³Zə rum, a dla' wa kwata' məni sôwâ ta' ne nu, bay a dla' wa dan vari məni ha mun kwata' rumu. A ta zə kwata' rum, bay a ar kwa mə bro' wû si. Ha la' cu dla' sen mi si, na də mbə wa ru ɓok ce' ndə hura, dan ha we ri məni na wə də mbə kə ndi.

⁴Ama sôwâ məsin kəta' wə du kul sôwâ Kris mə so Sardes məni cu dli mbraw nday mi. Handay də ta kə rin kə mbraw mə ɓu wə tu nday, zə handay nde i rum si.

⁵Na də ne mbraw mə ɓu ne kə sôwâ məni fe gaŋsem ta'a. Na cu də vrum semde nday mbə du ɗerwa məni na wây' semde sôwâ məni kə nyî mə də hâ wə han də rəka mi. Na də in kor Ba man kə kor sum sin um mə wafray i handay mə nana.

⁶Swə məni kə hum, say bə rum nə mun dan məni Simbed' wə in ne kə kul sôwâ Kris.

⁷A wây' dan məni nə hay' bə sin Ifray məni wə du kul sôwâ Kris mə so Filadelfi: Dan məni Swə mə Kəleŋ bay Swə mə Njeŋ, swə məni kə kwa ar vun vari so məni David ke kə ndi, swə məni ar vun vari so, bay swə ɗaw cu gak ta' mi, swə məni ta' vun vari so, bay swə ɗaw cu gak ar mi wə in nə ni na:

⁸Na we kwa daŋ' məni ha gi nə si, na we si, ha cu kə gbəgbonj juk mi, ama kə ndi nə daŋ', ha ta zə dan man, bay ha gi sin njeŋ zə rini. Na ar vun vari so məni swə ɗaw cu gak ta' mi kor ru.

⁹A mun ri', kwa məni na wə də gi kə kul sôwâ mə Satan, sum hay dan məni wə gi tu nday ce' ndə sôwâ Zuwif, ama handay cu sôwâ Zuwif mi nə ni na: Na də nday kaw kə

gbəgbonj kədan handay də kuduk nya kor ru kədan handay də wû mbâ. Handay də we i na wə wû ba.

¹⁰Zə ha ta zə dan mənɪ na in ne nu kə gbəgbonj, na ta', na də wû ji du ri boni mənɪ wə də mbə wa sôwâ mənɪ gay' wə wa nya kədan nday kənji'i.

¹¹Na wə də mbə ga'ri. A kaw dan mənɪ ha kə ndi wə vunduk ru nə ɲgədɪŋ' kədan swə dāw nə tle njukwa mə ta' ɲaŋsem wû mi.

¹²Na də gi swə mənɪ fe ɲaŋsem faŋ sem dap mə so Ifray man, bay bə rum cu də pā rəka za' mi, na də wây' semdê Ifray man kə semdê so Ifray man, so Jeruzalem mə mbrew mənɪ wə də mbə wafray hay' Ifray man dam mbə wa nya də wa rumu. Na də wây' semdê rin mə mbrew də wa rum ta'a.

¹³Swə mənɪ kə hum, say bə rum nə mun dan mənɪ Simbed' wə in ne kə kul sôwâ Kris.

¹⁴A wây' dan mənɪ nə hay' bə sin Ifray mənɪ wə du kul sôwâ Kris mə so Lawdise: Dan mənɪ swə mə dē kə «Amen», Bə in njeŋ dan mə njeŋ bay kəzin', Swə mənɪ kwa daŋ' mənɪ Ifray gi kuni car mbə hay' rum wə in nə ni na:

¹⁵Na we kwa daŋ' mənɪ ha gi nə si: Na we si, ha cu səsə' ko kəku mi. Na wə wa' i a ke səsə' ko kəku!

¹⁶Ama zə ha kəku gbaŋ', cu kəku ko səsə' mi, na də wû wu' də rəka vun rini.

¹⁷Ha wə ini: Na bə ndak, na coḃ kwa mə bay daŋ' zə tu rin, bay kwa məsin cu gwa' nan dāw mi, ama ha cu we i ha wə du boni kə ca nə mi. Ha bə ca, ha kə tu uray, bay ha dəŋâra.

¹⁸Zə rum, na wə wû har kədan a coḃ njike mə bondo mənɪ sôwâ kənji' kə ku wə ḃa rin kədan ha faŋ bə ndaka. A coḃ mbraw mə ḃu ta', bay a ge wə tu ru kədan ha pē' zur tu ru kə ndi, bay a coḃ waza i ta', bay a ma' waza rum də i ru kədan ha gak weri.

¹⁹Na wə dlay sôwâ daŋ' mənɪ na wə nday bə, bay na wə gi boni nday ne ta'a. Zə rum, a gi sin wû kə sây', bay a ar kwa mə bro' wû si.

²⁰A mun ri', na car wə vun vari so bay na wə tu'u. Swə la' mun wor rin bay ar vun vari so rum si, na də ze də hay' bə rum, na də ti kwati kə rum, bay mum də ti kwati kə rini.

²¹Na də ne vari suk hay' rin wa kwasuk jwə man ne kə sôwâ mənɪ fe ɲaŋsem, ce' ndə mənɪ Ba man ne vari suk hay' rum wa kwasuk jwə um ne nan kəri mənɪ na fe ɲaŋseme.

²²Swə mənɪ kə hum, say bə rum nə mun dan mənɪ Simbed' wə in ne kə kul sôwâ Kris.

Kwawe 4

¹Kəki rum, na we kwa məsini: Na we vun vari so mənɪ ar ho wafray, wor mənɪ ci' ce' ndə duḃ mənɪ na mun vun kofo in ne nana: A ur mbə ti, bay na də ta' kwa mənɪ wə də mbə kəki kwa rum kuni wû ne.

²Kəkor sar, Simbed' mə Kələŋ mbə wa rini. Na we kwasuk jwə wafray, bay swə daw suk wa kwasuk rumu.

³Vuk swə mənɪ suk jwə nə wə wədi ce' ndə gway' hoɓ mənɪ coɓ nday kəcik mə də kə jaspə bay sarduwanə. Təcere mənɪ wə wədi ce' ndə gway' mə də kə emerodə tor gan wa kwasuk jwə rumu.

⁴Kwasuk jwə məsin guhoɓ wa fədi' kəta' nja' gan wa kwasuk jwə rumu. Kəsa' guhoɓ wa fədi' mənɪ ge mbraw mə bu tu nday, bay no' njukwa jwə mənɪ ri kə njike mə bondo wa nday gay' wa kwasuk kuna.

⁵Wədi buŋô, wor ŋgəlik ŋgəlik, bay dləmbur buŋô wə pā mbə du kwasuk jwə rumu. Baŋgay sedā' mənɪ sôwâ ge ku han wə dərɪ kor kwasuk rumu. Handay kuni simbed' Ifray mə sedā'a.

⁶Kwa ce' ndə ya mbi mə kel kel mənɪ sôwâ gak weri han njəram, kəta' kor kwasuk jwə rumu. Kwa fədi' mə kə i gay' hay' kwasuk jwə wə jijeŋ rum fədi' daŋ'ŋ. Tu nday nyen kə i kofo kə kəki daŋ'ŋ.

⁷Kwa mə kə i daw rum ra' nji kə lum, bāy hoɓ rum ra' nji kə vay naw, bāy hinji' rum, vuk rum ra' nji kə vuk sumra', bay bāy fədi' rum ra' nji kə njew mənɪ wə dla' wafraya.

⁸Kwa fədi' mə kə i kuni daŋ' kə lam tlaw kanki' kanki', bay tu nday nyen kə i wə du kə rəka daŋ'ŋ. Handay cu ar dan dā nyem mənɪ nə fəta kə dukri daŋ'ŋ mi: Bārî mba Ifray mə kə gbəgboŋ, mənɪ kəta' ɓa', mənɪ kəta' tam, bay mənɪ wə də mbə nə kələŋ, kələŋ, kələŋe.

⁹Kəri daŋ' mənɪ kwa fədi' mə kə i kuni wə dā nyem kədan handay gi mbra', kə mbâ bay soko ne kə swə mənɪ suk wa kwasuk jwə rum, swə mənɪ wə ke də hâ,

¹⁰Kəsa' mə guhoɓ wa fədi' kuni kuduk ta nya kor swə mənɪ suk wa kwasuk jwə rum, bay handay bur swə mənɪ wə ke də hâ. Handay ra' njukwa jwə mbə wa nday bay njay ta kor kwasuk jwə rum bay ini:

¹¹Bārî mba kə Ifray mba, ha nde i fe mbra', kə mbâ, bay gbəgboŋ si, zə ha kə mənɪ gi kwa daŋ', bay kwa daŋ' kəta' bay kə i ce' ndə mənɪ ha wə wa', bay handay ke.

Kwawe 5

¹Na we dərwa mə dəlak dəlak wə ɓa fun swə mənɪ suk wa kwasuk jwə rum, dərwa rum wāy' ga' du kə rəka daŋ', bay vun rum tləɓa kə lamba sedā'a.

²Bay na we bə sin Ifray mə wafray mə kə gbəgboŋ mənɪ wə ka' dan kə gbəgboŋo: Sa nə nde i gbol' lamba kuni kədan mum ar vun dərwa rum su?

³Ama swə mənɪ gak ar vun dərwa rum kədan mum kar rawti rum cu daw mi, ko wafray, ko wa nya, ko zə nya, bə rum cu mi.

⁴Na ci' juk, zə na cu za' swə daw mənɪ nde i ar vun dərwa rum kədan mum kar dan rawti rum mi.

⁵Ama swə dāw wə du kəsa' kuni la' ne nana: A ci' mi! A kar ri', lum mə zə saŋ Zuda, vay rawti jwə David: Mum fe gaŋsem, bay mum gak gbol' lamba sedā' kuni bay ar vun dərwa rumu.

⁶Kəri rum, na we vay cime car wa kwasuk jwə rum, kwa fədi' mə kə i kuni kə kəsa' mə guhoḅ wa fədi' kuni gay' gan wa rumu. Vay cime nə ce' ndə mənɪ sôwâ fol num si. Mum kə mek sedā' bay i sedā'a. Handay kuni simbed' Ifray mə sedā' mənɪ mum sin wa nya daŋ'ŋ.

⁷Vay Cime nə ta ta hay' swə mənɪ suk wa kwasuk jwə rum, bay mum tle dərwa mənɪ wə ɓa fun rumu.

⁸Kəri mənɪ mum tle dərwa rum, kwa fədi' mə kə i kuni kə kəsa' mə guhoḅ wa fədi' kuni kuduk ta nya kor vay cime na. Swə dāw dāw daŋ' du nday kə mbəliŋ wə ɓa rum kə kwa mə sî ndə urdi kə gula mənɪ ri kə njike mə bondo ped' pedē. Kwa rum wə ta' kwa o mənɪ raw sôwâ mə kəleŋ wə o.

⁹Handay wə dā nyem mə mbrew mənɪ na: Ha nde i tle dərwa rum, bay gbol' lamba rum si. Zə sôwâ ci nu, bay mar wû tumwa sôwâ wə du zə saŋ cem cem daŋ', wə du vun cem cem daŋ', wə du sôwâ cem cem daŋ', bay wə du sôwâ nya cem cem daŋ' ne kə Ifraya.

¹⁰Ha gi nday faŋ won um bay sum po' fur kədan handay gi sin zə Ifray mba, bay kədan handay də suk jwə wa nya.

¹¹Na we kwa kəreme: Bay na mun wor sum sin Ifray mə wafray raw nday ujinere vun nyem, handay gay' gan wa kwasuk jwə rum, kə kwa mə kə i kuni, bay kəsa' kuna.

¹²Bay handay wə dā nyem mənɪ nə kə tle wor də fray kə gbəgboŋo: Vay cime mənɪ sôwâ fol, mum nde i fe jwə, ndak, gwet, gbəgboŋ, mbâ, mbra', bay buru!

¹³Bay na mun wor kwa mənɪ Ifray gi wafray, wa nya, zə nya, bay du mbi daŋ' ta', handay wə dā nyem mənɪ na: Bur, mbâ, mbra', bay gbəgboŋ kuni ke kə swə mənɪ suk wa kwasuk jwə rum, bay kə vay cime də hâ!

¹⁴Kwa fədi' mə kə i dāma: Amen! Bay kəsa' kuni kuduk ta nya kor rum bay bur numu.

Kwawe 6

¹Kəki rum na we vay cime gbol' lamba dāw rum mə du lamba sedā' kuni, bay na mun wor kwa dāw mə du kwa fədi' mə kə i kuni mənɪ ka' dan kə gbəgboŋ ndə dləmbur bəŋô: A mbə ye!

²Na kar ri, bay na we nda' mə ɓu. Swə mənɪ suk wa rum kə doŋroŋ ɓa rumu. Bay Ifray ne njukwa ne num, ndəna', mum fe gaŋsem pâ kədan mum fe gaŋsem kəreme.

³Kəki rum, vay cime gbol' lamba hoḅ rum, bay na mun wor kwa hoḅ rum mə kə i nə ini: A mbə ye!

⁴Nda' mäsın pâ, nda' rum mə tlewe. Ifray ne gbəgboŋ ne kə swə məni suk wa rum kədan mum tak heḅ bay mum car zi wa nya kədan sôwâ ci nji mbok nji. Ifray ne masəlam mə toŋ ne numu.

⁵Kəki rum, vay cime gbol' lamba hinji' rum, bay na mun wor kwa hinji' rum mə kə i nə ini: A mbə ye! Na kar ri, bay na we nda' mə ura'a. Swə məni suk wa rum nə kə kwa kənji' kwa wə ḅa rumu.

⁶Na mun kwa ce' ndə wor car mbə du kwa fədi' mə kə i kuni ini: U tasaw ḁaw i po' bal sin swə bəka ḁawa. Geḁ tasaw hinji' po' bal sin swə bəka dawa. Ama a ḁənok mur ko mbi vra' gu mə ḁe kə viŋə kuni mi.

⁷Kəki rum, vay cime gbol' lamba fədi' rum, bay na mun wor kwa fədi' rum mə kə i nə ini: A mbə ye!

⁸Na kar ri, bay na we nda' mə budbudu. Swə məni suk wa rum ḁe kə «mar», bay swə mäsın məni car mbə ri məni sôwâ məni mar gay' wə han wə ji zu rumu. Ifray jak du nya cem cem fədi', bay mum ne gbəgboŋ ne nday wa ḁaw rum kədan handay ci sôwâ kə masəlam, kə mē', kə gaḅ, bay kə kwa gopo.

⁹Kəki rum, vay cime gbol' lamba vatl rum, kəri rum, na we nyî sôwâ məni sôwâ ci nday zə handay ka' dan Ifray, bay zə handay in njeŋ dan wa rum njeŋe.

¹⁰Handay wə do dan kə gbəgboŋo: Bârî mə dan dan mə bro' bay njeŋ, ha ḁə ji day ri mi kədan ha ḅok dan wa sôwâ məni gay' wə wa nya, bay gi boni nday ne zə handay ci mba kuni su?

¹¹Ifray ne mbraw mə ḅu ne nday ḁaw ḁaw ḁaŋ', bay mum la' ne nday i kuni gay' pemây kəri kî hâ raw daw ba nday bay sôwâ məni wə gi sin tan nday məni sôwâ wə ḁə nday ci ce' ndə handay ci nday wə ḁə nyen mbi.

¹²Kəki rum, vay cime gbol' lamba kanki' rum, kəri rum, nya par nyen kə gbəgboŋ, fəta faŋ ura' tiptip ce' ndə zim mə ura', cer faŋ mə tlew ce' ndə vəswə,

¹³ciciw car wafray njay ta nya ce' ndə təgoŋroŋ tərūm wə njay ḁə nya kəri məni simbeḁ wə sa' kə gbəgboŋo.

¹⁴Wafray ḁəlak ce' ndə swə wə ḁəlak ḁərwa, Ifray ra' igway' kə nya məni suk wə du mbi ḁaŋ' mbə ri gay' nday ta kə hay'i.

¹⁵Sum jwə nya, sum rôwâ, sum rôwâ soje, sum ndak, sôwâ mə kə mbra', bay sôwâ mäsın cem cem ḁaŋ', bek ko sôwâ məni kə wa tu nday ḁaŋ', wə pe' tu nday wə nyir gway' kə mbok gway' məni wa igway'i.

¹⁶Handay la' ne kə igway' bay gway'i: I njay mbə wa mba bay i pe' mba wə i swə məni suk wa kwasuk jwə rum, bay i pe' mba kor bak vay cime.

¹⁷Zə Bəka bak nday mə mbri mbə day si, sa gak car kor rum su?

Kwawe 7

¹Kəki rum, na we sum sin Ifray mə wafray fədi' car wə dleŋ nya fədi'i. Handay wə tak simbed' fədi' məni wə sa' wa nya dan sa' wa nya, ko wa ya mbi, ko wa gu daŋ'ŋ.

²Bay na we bə sin Ifray mə wafray məsin car mbə ga' fəta bəka kə lamba Ifray mə kə i ba rumu. Mum ka' dan ne kə sum sin Ifray mə wafray mə fədi' kuni məni Ifray ne gbəgboŋ ne nday kədan handay dənok nya kə ya mbi:

³I dənok nya, ko ya mbi, ko gu mi hā namba cin lamba Ifray də vuk sum sin Ifray mba si ri'i.

⁴Handay ta' raw sôwâ məni handay cin lamba Ifray ta vuk nday ne nana: Raw nday mbu kis kə gufədi' wa fədi'i. Sôwâ kuni car mbə du zə saŋ Israyel cem cem daŋ'ŋ.

⁵Handay cin lamba rum ta vuk raw sôwâ zə saŋ Zuda mbu guḅ wa hoḅ. Raw sôwâ zə saŋ Ruben mbu guḅ wa hoḅ, raw sôwâ zə saŋ Gad mbu guḅ wa hoḅ,

⁶raw sôwâ zə saŋ Aser mbu guḅ wa hoḅ, raw sôwâ zə saŋ Neftali mbu guḅ wa hoḅ, raw sôwâ zə saŋ Manase mbu guḅ wa hoḅ,

⁷raw sôwâ zə saŋ Simeyoŋ mbu guḅ wa hoḅ, raw sôwâ zə saŋ Levi mbu guḅ wa hoḅ, raw sôwâ zə saŋ Isakar mbu guḅ wa hoḅ,

⁸raw sôwâ zə saŋ Zabuloŋ mbu guḅ wa hoḅ, raw sôwâ zə saŋ Zozef mbu guḅ wa hoḅ, bay raw sôwâ zə saŋ Benyami mbu guḅ wa hoḅ.

⁹Kəki rum, na kar ri, bay na we raw sôwâ dle tu si. Swə cu gak in raw sôwâ məni wə han nə mi. Handay sôwâ məni car mbə du nya cem cem daŋ', du zə saŋ cem cem daŋ', du sôwâ cem cem daŋ', bay du vun cem cem daŋ'ŋ. Handay car wə kor kwasuk jwə rum bay wə kor vay cime. Handay ge mbraw mə bu tu nday, bay handay kə tlap məna' wə ba ndaya.

¹⁰Handay wə do dan kə gbəgboŋo: Sid' mba car mbə hay' Ifray mba məni suk wa kwasuk jwə rum, bay hay' vay cime ta'a.

¹¹Daw sin Ifray mə wafray daŋ' car gan wa kwasuk jwə rum, kə kəsa' kuni, bay kwa fədi' mə kə i kuni, kəri rum, handay bar ta nya kə vunduk kor kwasuk jwə rum, bay handay bur Ifray

¹²kə ini: Amen! Bur, mbra', gwet, soko, mbâ, toŋ, kə gbəgboŋ daŋ' kuni ke kə Ifray mba hā də hā. Amen!

¹³Swə daw mə du kəsa' kuni ci vun rini: Sa kuni sôwâ məni ge mbraw mə bu wə tu nday nə su? Handay car mbə ka su?

¹⁴Na dām vun rumu: Bârî man, ha kə məni we dan rumu! Mum faŋ in ne nana: Handay sôwâ məni pâ mbə du boni mə mbri bay handay kol mbraw nday bay gi faŋ mə bu kə vəswə vay cime.

¹⁵Zə rum, handay car kor kwasuk Ifray bay gi sin zə rum dukri kə fəta wə rawti so po' fur umu. Swə məni suk wa kwasuk jwə rum wə nday ji zə mum kəta' kə ndaya.

¹⁶Mê' kwati kə mê' mbi cu də nday ti kpe za' mi, fəta cu də nday law kpe za' mi.

¹⁷Zə vay cime mənɪ suk wa kwasuk jwə rum də ke vay ji nday, ɓay wə də nday ra' də vun mbi mənɪ wə ne nyî mə də hâ kə ndaya. 'Bay Ifray wə də ma' zim i nday cete.

Kwawe 8

¹Kəri mənɪ vay cime gbol' lamba sedâ' rum, kwa daŋ' mənɪ wə wafray gay' 'yeŋ 'yeŋ hâ gi reta ler dawa.

²Kəki rum, na we sum sin Ifray mə wafray sedâ' kuni mənɪ car kor Ifraya. Handay ne duɓ sedâ' ne ndaya.

³Vay sin Ifray mə wafray məsin mbə car hay' kwa cu kwa po' furu. Mum kə gula mənɪ ri kə njike mə bondo, ɓay Ifray ne urdi juk ne numu. Mum ɓa kwa rum kə kwa o raw sôwâ mə kələŋ daŋ', ɓay mum po' fur kə ndi wa kwa cu kwa po' fur mənɪ ri kə njike mə bondo mənɪ wə kor kwasuk jwə rumu.

⁴Dewku urdi kə kwa o raw sôwâ mə kələŋ wə pâ mbə ɓa bə sin Ifray mə wafray nə də kor Ifraya.

⁵Kəki rum, vay sin Ifray mə wafray nə tle gula rum, mum ra' ku mə kwa cu kwa po' fur njay ta gula rum, ɓay mum dâ gula rum ta nya: Kəri rum, buŋô dləmbur, wor do, buŋô wədi, ɓay nya par nyen kə gbəgboŋo.

⁶Daw sin Ifray mə wafray mə sedâ' mənɪ kə duɓ sedâ' wə ɓa nday kuni gila' tu nday kədan handay pe duɓ kuna.

⁷Vay sin Ifray mə wafray daw rum pe duɓu: Kakiyew kə ku mənɪ tɬum kə vəswə ta wa nya. Nya jak du cem cem hinji', daw rum ye' ku kə gu mənɪ wə han, ɓay za mbênê wa nya daŋ' ye' ku.

⁸Kəki rum, vay sin Ifray mə wafray hoɓ rum pe duɓ, Ifray dâ kwa ce' ndə igway' mə toŋ mənɪ wə ye' ku ta du ya mbi. Ya mbi jak du cem cem hinji'i. Daw rum faŋ vəswa.

⁹Kwa mə kə i hinji' rum daŋ' mənɪ wə han mar, ɓay da daŋ' mənɪ wə du mbi dənoko.

¹⁰Kəki rum, vay sin Ifray mə wafray hinji' rum pe duɓ, ɓay ciciw mə toŋ mənɪ wə ye' ku car wafray nde ta nya. Ze kə imbi jak du cem cem hinji'i.

¹¹Semɗe mbi rum nə «Baka». Mbi kuni ɓul du hinji'i: Daw rum faŋ bak, ɓay sôwâ juk mar kəri mənɪ handay ce mbi rum, zə mbi rum baka.

¹²Kəki rum, vay sin Ifray mə wafray fədi' rum pe duɓ, fəta, cer, kə ciciw jak du cem cem hinji'i. Daw rum faŋ ura', ɓay fəta kə dukri jak du cem cem hinji'i. Ndəna' daw rum cu kə ri mə ɓu mi.

¹³Na kar ri kəreme: Bay na we njew mənɪ wə dla' wafray seŋe. Njew rum ka' dan kə gbəgboŋo: Boni! Boni! Boni də ke ɓayrum wa sôwâ nya kəri mənɪ sum sin Ifray mə wafray mənɪ gwa' hinji' wə də pe duɓu!

Kwawe 9

- ¹Kəki rum, bə sin Ifray mə wafray vatl rum pe duḅu: Na we ciciw məsin məni car wafray nde ta nya. Handay ne kwa ar vun zra mə ciriṅriṅ ne kə ciciw rumu.
- ²Ciciw rum ar vun zra rum, ɓay dɛwku wur mbə zra rum ce' ndə dɛwku məni wə wur mbə so məni wə ye' ku. Dɛwku məni wur mbə zra rum wə dli fəta kə wafray daŋ'ŋ.
- ³Jer wur mbə du dɛwku rum, ɓay pla' ndap wa nya daŋ'ŋ. Ifray ne gbəgbəŋ ce' ndə jidwa ne ndaya.
- ⁴Ifray dlay nday kədan kuni dənok za ko gu, ko kwa məni wə ci wa nya mi. Ama mum ar vari ne nday kədan kuni gi boni ne kə sôwâ məni cu kə lamba Ifray wə vuk nday mi tawa.
- ⁵Ifray cu ne vari ne kə jer kuni kədan handay ci sôwâ mi, ama kədan handay gi boni nday ne du cer vatla. Boni məni handay wə gi ne kə sôwâ wə nday ti ce' ndə boni məni swə wə tuk kəri məni jidwa ɓe numu.
- ⁶Wə du cer vatl rum, sôwâ də səna' mar, ama mar cu də nday kaw mi. Handay də wa' mar, ama mar də ne seŋ kə ndaya.
- ⁷Jer kuni ra' nji kə nda' məni sôwâ gila' nday kədan də zi, handay kə kwa ce' ndə njukwa məni ri kə njike mə bondo wa nday, ɓay vuk nday ce' ndə vuk sumra'a.
- ⁸Sâ wa nday ce' ndə sâ wa rawkwa, ɓay se' nday ce' ndə se' lumu.
- ⁹Handay kə kwa ce' ndə mbraw njike wə vunduk nday, ɓay lam tlaw nday wə tlər ce' ndə saret raw məni nda' raw wə dlam dɛma də vun zi kə ndi.
- ¹⁰Handay kə cew kə ŋây' ce' ndə jidwa, ɓay cew rum kə gbəgbəŋ kədan handay gi boni ne kə sôwâ kə cew nday du cer vatla.
- ¹¹Handay kə jwə nday, mum nə vay sin Ifray mə wafray məni kə kwa ar vun zra mə ciriṅriṅ rumu. Semde rum kə vun Hebre: Abadoŋ, ɓay kə vun Grek: Apoliyoŋ, wa' ini: «Bə dənok kwa».
- ¹²Boni daw rum pâ si: Boni məsin hoḅ wə də mbə kəki rum kəreme.
- ¹³Kəki rum, bə sin Ifray mə wafray kanki' rum pe' duḅu: Na mun wor məni car mbə dleŋ kwa cu kwa po' fur mə fədi' məni ri kə njike mə bondo məni wə kor Ifraya.
- ¹⁴Wor rum la' ne kə bə sin Ifray mə wafray kanki' rum məni kə duḅ ɓa rum na: A ulay' sum sin Ifray mə wafray fədi' məni Ifray gay' nday kə cururu hərə' kə ze mə mbri mə dɛ kə Efratə kuna.
- ¹⁵Mum ulay' sum sin Ifray mə fədi' kuni, Ifray gila' nday zə ler rum, zə fəta rum, zə cer rum, ɓay zə kim rumu. Ifray ɓul du sôwâ daŋ' cem cem hinji', ɓay handay ci daw rumu.
- ¹⁶Handay ta' raw soje məni ur nda' ne nana: Raw nday zəvok kis hoḅo.
- ¹⁷Bay wə du kwawe man, na we nda' kə sôwâ məni ur wa ndaya: Handay kə mbraw njike mə tlew ce' ndə ku, mə ura' gbap gbap ce' ndə gway' mə dɛ kə safir, ɓay mə

bondo ce' ndə kwa mənɪ wə ye' ku ɓay sɪ bro' mə də kə sufrə. Wa nda' kuni ce' ndə wa lumu. Ku, kə dəwku, ɓay kwa mənɪ wə ye' ku ɓay sɪ bro' mə də kə sufrə wə wur mbə vun ndaya.

¹⁸Sôwâ mənɪ Ifray bul du nday cem cem hinji' kuni, daw rum fe mar kə boni mə hinji' mə ni kuna: Ku, kə dəwku, ɓay kwa mənɪ wə ye' ku ɓay sɪ bro' mə də kə sufrə mənɪ wə wur mbə vun nda' kuna.

¹⁹Zə gbəgbonɔ mənɪ nda' kuni kə ndi wə car mbə vun nday ɓay wə cew nday ta'a. Cew nday ra' nji kə wu', cew nday kə wa. Nda' kuni wə gi boni ne kə sôwâ kə cew ndaya.

²⁰Kam sôwâ mənɪ gwa', sôwâ daŋ' mənɪ cu fe mar kə boni mə hinji' kuni mi, handay cu ar kwa mənɪ handay gi kə tu nday mi. Handay cu ar bur gam ko ifray vun fur cem cem nday mənɪ handay ri kə njike mə bondo, njike mə ɗu, njike mə tlew, gway', ko gu mi. Kwa rum cu gak weri, ko mun hum, ko ta mi.

²¹Sôwâ kuni cu ar ci mar, ko kaw hwa', ko gi ghəghay, ko kəy hura mi ta'a.

Kwawe 10

¹Kəki rum, na we vay sin Ifray mə wafray məsin mə kə gbəgbonɔ car wafray dam mbə nya. Mum kəlew' dləmbur wə tu rum, ɓay təcere dəlak wa rum, vuk rum ce' ndə fəta, ɓay sem rum ce' ndə sem dap mənɪ wə ye' ku.

²Mum kaw vay dərwa mənɪ bur si wə ɓa rumu. Mum cin sem ɓa fun wa ya mbi, ɓay sem ɓa gur wa nya.

³Mum ka' dan kə gbəgbonɔ ce' ndə lum mənɪ wə dlay dana. Kəki mənɪ mum ka' dan, dləmbur buŋô sedâ' dām vun rum kə gil'li.

⁴Kəri mənɪ dləmbur buŋô mə sedâ' kuni gil', na wə də wây' kwa kəza. Ama na mun wor mənɪ car mbə wafray in ne nana: A kaw dan mənɪ dləmbur buŋô mə sedâ' kuni in nə wə vunduk ru 'yeŋ ɓay a wây' dan rum mi.

⁵Kəri rum, vay sin Ifray mə wafray mənɪ na we car wa ya mbi kə wa nya nə tle ɓa fun rum ta fray,

⁶ɓay sur vun kə semde Ifray mə kə i də hâ, mənɪ gi fray kə kwa daŋ' mənɪ wə han, gi nya kə kwa daŋ' mənɪ wə han, ɓay gi ya mbi kə kwa daŋ' mənɪ wə hana. Bə sin Ifray mə wafray nə ini: Kwa mənɪ wə tak kwa mənɪ wə də mbə cu za' mi.

⁷Ama kəri mənɪ bə sin Ifray mə wafray sedâ' rum də pe duɓ, Ifray wə də nyen mbi dan dɪk um mənɪ ke pe', ce' ndə mənɪ mum ta' ne kə sum sin um mənɪ sum ka' dana.

⁸Kəki rum, wor mənɪ na mun car mbə wafray la' ne nan kəreme: A də tle vay dərwa mənɪ bur si mənɪ wə ɓa vay sin Ifray mə wafray mənɪ car wa ya mbi kə wa nya na.

⁹Na ta ta hay' vay sin Ifray mə wafray nə, ɓay na o num kədan nə ne vay dərwa rum ne nana. Mum la' ne nana: A tle ɓay a ti ye. Dərwa rum də ke bak wə rawti ru, ama dərwa rum də ke jêtete ce' ndə mur dɪm wə vun ru.

¹⁰Na tle vay dërwa rum wə ɓa vay sin ɓay na ti. Na tuk dërwa rum jêtete ce' ndə mur dîm wə vun rin, ama kəri mənɪ na sa' dërwa rum, dërwa rum faŋ bak wə rawti rini.

¹¹Bay kəri rum, swə məsin la' ne nana: A də ka' dan Ifray mənɪ wə in dan wa sôwâ cem cem juk, sôwâ nya cem cem juk, vun cem cem juk, ɓay jwə cem cem juk ne kə sôwâ kəreme.

Kwawe 11

¹Kəki rum, handay ne kəya' mənɪ ra' nji kə kwa ra' nji kə dliw ne nan, ɓay mum la' ne nana: A car ye ɓay a də kənji' so po' fur Ifray kə kwa cu kwa po' fur, ɓay a in raw sôwâ mənɪ wə bur Ifray wə rawti so rumu.

²Ama a ar dan kənji' cava so rum si, a kənji' cava rum mi, zə cava rum wə zə sôwâ mənɪ cu zə saŋ sôwâ Zuwif mi mənɪ wə haɓ so Ifray kə sem wə du cer gufədi' wa hoɓo.

³Na də sin sum in njeŋ dan man hoɓ, handay ge mbraw kwa hel mə ci kə bor wə tu nday, ɓay handay də ka' dan Ifray wə du bəka mbu kə kis hoɓ kə gūkanki'i.

⁴Sum in njeŋ dan mə hoɓ kuni, handay gu olivə mə hoɓ kə ɓaŋgay mə hoɓ mənɪ car kor Bârî nya.

⁵Swə la' wə keɓ kədan mum gi bro' hay' nday si, ku wə wur mbə vun nday ɓay ci sum sî ndaya. Ndəna' swə mənɪ wə keɓ kədan mum gi bro' hay' nday, bə rum də fe mara.

⁶Handay kə gbəgbonj kədan handay tak buŋɔ dan se kəri mənɪ handay wə ka' dana. Dan mənɪ Ifray ne nday, ɓay handay kə gbəgbonj kədan handay gi mbi faŋ vəswə, ɓay handay kə gbəgbonj kədan handay ne gaɓ cem cem ne kə sôwâ nya kəri daŋ' mənɪ handay wə wa'a.

⁷Ama kəri mənɪ handay də ndo' dan ka' nday, kwa gop mənɪ pâ mbə zra mə cirinrin rum də mbə wa nday kədan zi kə ndaya. Mum də nday ŋgô ɓay də nday ci.

⁸Sôwâ də ar mar nday njay wə vari mbok so mənɪ sôwâ gay' Bârî nday ta wa gu hana. Sôwâ də so rum kə Sodomə ko Egip, semde mənɪ wə ta' kwa məsini.

⁹Sôwâ mənɪ wə car mbə du sôwâ cem cem daŋ', du zə saŋ cem cem daŋ', du vun cem cem daŋ', ɓay du sôwâ nya cem cem daŋ' də kar mar nday wə du bəka hinji' kə reta, ɓay handay də tak sôwâ məsin dan mo' mar ndaya.

¹⁰Sôwâ mənɪ gay' wə wa nya də tuk kədam kə mar sum in njeŋ dan mə hoɓ kuna. Handay də gi cer, ɓay handay də sin kwane ne kə nji mbok nji uray zə sum ka' dan mə hoɓ kuni gi boni juk ne ndaya.

¹¹Ama kəki bəka hinji' kə reta kuni, Ifray fo' simbed mə kə i də wa nday, ɓay handay car i. Wəlok gi sôwâ daŋ' mənɪ we nday juku.

¹²Kəri rum, sum ka' dan mə hoɓ kuni mun wor mənɪ car mbə wafray la' ne nday kə gbəgbonj: I ur mbə tira. Bay handay ur ta wafray wə du dləmbur kəri mənɪ sum sî nday wə nday kara.

¹³Kəri rum, nya par nyen kə gbəgbon, so rum jak du cem cem guḅ, ḅay ḁaw rum bru ta nya, kəri mənɪ nya par nyen, sôwâ mbu sedâ' fe mara. Kam sôwâ mənɪ gwa' ne wəlok juk, ḅay handay gi mbra' ne kə Ifray mə wafraya.

¹⁴Boni hoḅ rum pâ si, ama i kaw wa ri. Boni hinji' rum wə də mbə ga'ri.

¹⁵Kəki rum, bə sin Ifray mə wafray sedâ' rum pe duḅ, wor raw do dan wafray kə gbəgbon ini: Mgban ni nə, Bârî mba kə Kris, mum kə gbəgbon suk jwə wa nya, ḅay mum də suk jwə hâ də hâ.

¹⁶Kəsa' mə guhoḅ wa fədi' kuni mənɪ gay' wa kwasuk jwə nday wə kor Ifray, bar ta nya kə vunduk nday ḅay bur Ifray

¹⁷kə ini: Bârî Ifray mə kə gbəgbon, ha swə mənɪ kəta' tam ḅay kəta' ḁa', namba wə gi soko wû ne, zə ha gi sin kə gbəgbon wû mə mbri, ḅay zə ha tən kə suk jwə wa sôwâ.

¹⁸Sôwâ nya ra' bak juk, ama ri mənɪ ha wə də tle bak wa nday, ḅay ri mənɪ ha wə də ḁok dan wa sum mar mbə day si. Ri mənɪ ha wə də po' bal cik sum sin wû mənɪ sum ka' dana kə sôwâ mə kəleṅ ḁaṅ', mənɪ wə wû ô, ko sôwâ rôwâ, ko dawre' mbə day si. Ri mənɪ ha wə də ci sôwâ mənɪ wə ḁənok nya mbə day si.

¹⁹Kəri rum, Ifray ar vun vari so um mə wafray, ḅay na we sunduku mənɪ dan kawvun kəta' wə rawti rum cin wə rawti so rumu. Kəri rum, buṅô wədi, wor do, buṅô dləmbur, nya par nyen kə gbəgbon, ḅay kakiyew njay ta nya kə gbəgbonjo.

Kwawe 12

¹Kwa ta' kwa mə mbri pâ wə wafraya: Ma ḁaw kəlew' fəta wə tu sə ce' ndə mbraw pâ, ta kə cer wə zə sem sə, ḅay ta no' njukwa jwə mənɪ ciciw guḅ wa hoḅ wə han wa sa.

²Ta həre' kə vra', ḅay boni vra' kə ti vra' wə sə gi ci'i.

³Kwa ta' kwa məsin pâ wə wafraya: Ba kwa yew mə toṅ mə tlew mə ḁe kə dragon pâ. Mum kə wa sedâ' ḅay mek guḅu. 'Bay mum kə njukwa jwə wə wa kuni ḁaw ḁaw ḁaṅ'ṅ.

⁴Cew ba kwa yew nə rut ḁaw du kul ciciw mə ḁul hinji' nə kə cew um pik ta nya. Ba kwa yew faṅ car wə kor ma məti həre' kə vra' vay rə kədan mum ti vay kəri mənɪ mum də nde də nya.

⁵Ma rə vra' vay, vay mə nji mənɪ wə də suk jwə wa sôwâ ḁaṅ' kə dliw mə njike. Ama Ifray tle vay nə ta hay' rum kə kwasuk umu.

⁶Ma rə ne ta du igop wə ri mənɪ Ifray gila' rum zə sə, kədan mum sə ur han du bəka mbu kə kis hoḅ kə gukanki'i.

⁷Kəri rum, zi car wafraya: Misel kə sum sin um wə zi kuni kə ba kwa yew na. 'Bay mum kə sum sin um mə wafray wə zi kuni kə nday,

⁸ama handay ṅô ba kwa yew nə kə sum sin um, ḅay handay cu za' vari kədan handay gay' wə wafray za' mi.

⁹Handay 'way ba kwa yew mə toŋ nə wafray ge ta rəka. Mum nə wu' mə ɓa' mə ɗe kə bə cukur ɓay Satan məni wə ɓu sôwâ nya ɗaŋ'ŋ. Ifray 'way num ge ta nya kə sum sin um ɗaŋ'ŋ.

¹⁰Kəki rum, na mun wor car mbə wafray kə gbəgbonj ini: Mgbanj ni nə, siɗ Ifray mbə si, Ifray ta' gbəgbonj jwə um si, Swə məni mum wu' mur wa rum nə ta' mbra' um si. Zə bə tum sem daw ba mba məni wə car kor Ifray mba kədan mum tum sem nday fəta kə dukri ɗaŋ', Ifray 'way num wafray ge ta rəka.

¹¹Daw ba mba ŋgô num kə vəswə vay cime kə dan mə kəzin' məni handay ka'a. Handay cu bə nyî nday mi, hâ handay ve kədan handay mar zə rumu.

¹²Zə rum, wafray kə sôwâ ɗaŋ' məni gay' wə han, i tuk kəɗam, ama boni wə wa nya kə ya mbi, zə Satan dam mbə wa ri, ɓay mum tle bak ɓayrum zə mum we si, ri cu gwa' kofo rum ɓayrum za' mi.

¹³Kəri məni ba kwa yew nə we i Ifray 'way num ge mbə nya si, mum təŋ kə keɓ zu ma məti vra' vay mə nji ra.

¹⁴Ama Ifray ne lam tlaw njew mə toŋ hoɓ ne kə ma rə kədan ta gak dla' hâ ɗə ri sə wə du igop, ri məni Ifray wə ɗə sə ur han du kim hinji' kə reta. Wə ri rum, wu' nə cu ɗə sə cik za' mi.

¹⁵Zə rum, wu' nə ɗəba' mē' kədan faŋ ce' ndə mbi ze kəki ma rə kədan mbi rum sə tle 'ya kə ndi.

¹⁶Ama nya kawɓa ma rə, nya ar vun ɓay ce mē' məni ba kwa yew nə wə ɗəba' na.

¹⁷Ba kwa yew nə tle bak kə ma rə ɓayrum, ɓay mum 'ya ta təŋ zi kə kam daw rawti ma rə, sôwâ ɗaŋ' məni wə ta zə dan dlay Ifray kə məni wə ta njeŋ zə dan mə kəzin' məni Zezu ta'a.

¹⁸Bay ba kwa yew mə ɗe kə dragonj nə car wə vun ya mbi.

Kwawe 13

¹Kəki rum, na we tlew gop ɗaw pā mbə ya mbi, mum kə mek guɓ kə wa seɗa'a. Mum no' njukwa jwə wə wa mek kuni ɗaw ɗaw ɗaŋ', ɓay mum wāy' semɗe məni wə i Ifray wə wa kuni ɗaw ɗaw ɗaŋ'ŋ.

²Tlew gop məni na we nə ra' nji kə təndərə. Sem rum ra' nji kə sem ɗəghaw', ɓay vun rum ra' nji kə vun lumu. Ba kwa yew mə ɗe kə dragonj nə ne gbəgbonj um, kə kwasuk jwə um, ɓay mbra' um ne numu.

³Na kar wa ɗaw wə du wa tlew gop nə fe mbir ce' ndə mum ɗə mar kə ndi, ama mbir rum faŋ câ' si. Kwa rum jin' wa ne kə raw sôwâ nya ɗaŋ', ɓay handay ta zə tlew gop na.

⁴Sôwâ ɗaŋ' təŋ kə bur ba kwa yew nə zə mum ne mbra' um ne kə tlew gop nə, ɓay handay wə bur tlew gop nə ta' kə ini: Sa vun nji kə tlew gop nə su? Sa gak zi kə rum su?

⁵Tlew gop nə fe vari kədan mum in dan mə mbra' tu rum kə i Ifray, mum fe gbəgbon kədan mum gi kwa rum du cer gufədi' wa hobo.

⁶Mum təŋ kə in dan mə bro' wa Ifray, kə i semde rum kə ri mənɪ mum suk wə han, bay sôwâ daŋ' mənɪ gay' wə wafraya.

⁷Mum fe vari kədan mum zi kə raw sôwâ Ifray bay nday ŋô, bay mum fe gbəgbon wa zə saŋ cem cem daŋ', sôwâ cem cem daŋ', vun cem cem daŋ', bay sôwâ nya cem cem daŋ'ŋ.

⁸Sôwâ mənɪ gay' wə wa nya daŋ' də um bur, wa' dan in, sôwâ daŋ' mənɪ semde nday cu wây' wə du dərwa mənɪ Ifray wây' semde sôwâ mənɪ kə nyî mə də hâ wə han daka təŋ zu nya nə mi. Derwa rum mə vay cime mənɪ sôwâ ci numu.

⁹Swə la' kə hum si, say bə rum nə munu:

¹⁰Swə mənɪ Ifray par num kədan mum ke du bek, bə rum də ke bek mə kəzini. Swə mənɪ Ifray par num kədan sôwâ um ci kə masəlam, sôwâ də um ci kə masəlam kəzini. Zə rum, say raw sôwâ mə kələŋ kuni ta' i handay wə car ŋədiŋ' wə du dan Ifraya.

¹¹Na faŋ we tlew gop məsin pā mbə zə nya. Mum kə mek hoɓ ra' nji kə mek vay cime, ama mum wə in dan ce' ndə ba hurum na.

¹²Mum wə gi kwa daŋ' kor tlew gop mə vun kofo nə kə gbəgbon umu. Mum wə gi nya kə sôwâ mənɪ gay' wə han daŋ' kə dole kədan handay bur tlew gop mə vun kofo mənɪ fe mbir ce' ndə mum də mar kə ndi, ama faŋ câ' na.

¹³Bây hoɓ tlew gop nə wə gi yew mə rôwâ cem cem, mum wə gi ku car wafray mbə wa nya i sôwâ daŋ'ŋ.

¹⁴Mum wə vi' sôwâ mənɪ gay' wə wa nya kə yew cem cem mənɪ mum fe vari kədan mum gi wə kor tlew gop mə vun kofo na. Mum wə in ne kə sôwâ mənɪ gay' wə wa nya kədan kuni gi foto ra' nji kə tlew gop mənɪ sôwâ tum kə masəlam, ama mum cu mar kə ndi mi na.

¹⁵Bây hoɓ tlew gop nə fe vari kədan mum fo' simbed' mə kə nyî də wa foto nə kədan foto rum təŋ kə in dan bay ci sôwâ daŋ' mənɪ cu um bur mi.

¹⁶Tlew gop nə gi sôwâ daŋ' kə dole, dawre' kə sôwâ rôwâ, sum ndak kə sum ca, bek kə sôwâ mənɪ fe wa tu nday daŋ' kədan handay ve lamba wə ɓa fun nday bay wə vuk ndaya.

¹⁷Swə la' cu kə lamba rum mi, wa' dan in, semde tlew gop nə kə lamba mənɪ wə ta' semde rum mi si, bə rum cu gak coɓ kwa ko gi coɓ kwa mi.

¹⁸Say swə ke kə gwet kədan mum mun zu dan mənɪ nə, swə mənɪ kə kwawe, bə rum gak pay zu dan lamba tlew gop nə, zə lamba rum wə ta' semde swə, lamba rum kis kanki' kə gukanki' wa kanki'i.

Kwawe 14

¹Kəki rum, na kar ri, bay na we vay cime car wə wa igway' mə də kə Siyon, raw sôwâ mbu kis kə gufədi' wa fədi' mənɪ semdə um kə semdə Ba um wây' wə vuk nday gay' wə han kə rumu.

²Na mun wor car mbə wafray, tlər rum ce' ndə mbi mənɪ wə ne wa gway', bay ce' ndə buŋô mənɪ wə dləmbur kə gbəgboŋo. Wor mənɪ na mun nə ce' ndə ci' mbəliŋ mənɪ sôwâ wə pe.

³Raw sôwâ car wə kor kwasuk jwə, kə kor kwa fədi' mə kə i, bay kor kəsa' kuni, bay handay wə dā nyem mə mbrewē. Swə dāw cu gak we nyem rum mi, say raw sôwâ mə mbu kis kə gufədi' wa fədi' mənɪ Ifray tumwa nday wə wa nya kuni tawa.

⁴Handay sôwâ mənɪ cu dənok tu nday kə rawkwa mi, handay kaw tu nday baya. Handay ta zə vay cime wə ri daŋ' mənɪ mum wə də han, Ifray tumwa nday wə du sôwâ nya kədan handay ne tu nday ce' ndə kwa mənɪ ne i vun kofo ne kə Ifray kə vay cime,

⁵swə cu mun hay dan vun nday dāw mi, handay dan dan mə bro'o.

⁶Kəki rum, na we bə sin Ifray mə wafray wə dla' fray seŋe. Mum kə Dan mə Kədam mə də hā kədan mum ka' ne kə sôwâ mənɪ gay' wə wa nya: Sôwâ nya cem cem daŋ', zə saŋ cem cem daŋ', vun cem cem daŋ', bay sôwâ cem cem daŋ'ŋ.

⁷Mum ka' dan kə gbəgboŋo: I ô Ifray, bay i gi mbra' ne num, zə ri mənɪ mum wə də bok dan wa sôwâ nə mbə si. I bur swə mənɪ gi wafray kə nya bay ya mbi kə i mbi!

⁸Bây hoḃ bə sin Ifray mə wafray mbə kəki bə sin Ifray mə vun kofo nə kə ini: Ta nde si! So mə mbri mə də kə Babilon rə nde si! Ta ne sum mə bak sə mə də kə viŋə ne kə sôwâ nya daŋ' ce, wa' dan in, ghəghay mənɪ ta wə gi.

⁹Bây hinji' bə sin Ifray mə wafray mbə kəki sum sin Ifray mə vun kofo hoḃ kuni, mum ka' dan kə gbəgboŋo: Swə mənɪ wə bur tlew gop kə foto rum mənɪ ri kə ba bay wə ve lambda wə vuk rum ko wə ba rum nə,

¹⁰bə rum də ce sum viŋə bak Ifray kə tu rum, wa' dan in, bak Ifray mənɪ mum wu' ta timbi bak um dan tlum kə mbi, sôwâ daŋ' mənɪ wə gi ndəna', handay də ce boni wə du ku kə kwa mənɪ wə ye' ku bay sî bro' mə də kə «sufre» wə kor sum sin Ifray mə wafray bay kor vay cime.

¹¹Dewku mənɪ wə wur mbə ku mənɪ wə nday pur wə jo də fray də hā, bay sôwâ mənɪ wə bur tlew gop kə foto rum, bay sa su daŋ' mənɪ ve lambda semdə rum, ri pemây cu zə nday mi, ko fəta ko dukri.

¹²Zə rum, say raw sôwâ mə kələŋ, sôwâ mənɪ wə ta zə dan dlay um bay wə ta njeŋ kə Zezu kuni car ŋgədiŋ'ŋ.

¹³Na faŋ mun wor car mbə wafray ini: A wây' dan mənɪ na: Kədam zə mar mənɪ wə mar daka mgbaŋ ni nə kə gi sin Bârî! Simbed' ini: Awo, dan rum kəzin', handay gak də pemây sin nday mə kəcik zə sin mə bay mənɪ handay gi nə wə də kə ndaya.

¹⁴Na kar ri kərem, ɓay na we dləmbur mə ɓu, kwa ra' nji kə sumra' suk wə wa dləmbur rumu. Mum no' njukwa mə ri kə njike mə bondo wə wa rum, ɓay mum kə tləkway mə tise' wə ɓa rumu.

¹⁵Bə sin Ifray mə wafray məsin pā mbə rawti so po' fur mə wafray, mum ka' dan ne kə swə mənɪ suk wə wa dləmbur nə kə gbəgbonɔ: A tle tləkway wû, ɓay a tum kwa wakaya kə ndi, zə ri gi kwa wakaya nə mbə si. Kwa nya nde i tum si.

¹⁶Kəri rum, swə mənɪ suk wə wa dləmbur nə tle tləkway um, ɓay mum tum kwa nya njay kə ndi.

¹⁷Vay sin Ifray mə wafray məsin pā mbə rawti so po' fur wafraya. Mum kə tləkway mə tise' wə ɓa rum ta'a.

¹⁸Bə sin Ifray mə wafray məsin mənɪ kə gbəgbonɔ wa ku car mbə kwa cu kwa po' furu. Mum ka' dan ne kə swə mənɪ kə tləkway mə tise' wə ɓa rum kə gbəgbonɔ: A tle tləkway wû, ɓay a tum vra' gu viŋə mənɪ wa gu, zə vra' gu rum ne si.

¹⁹Kəri rum, bə sin Ifray mə wafray nə tle tləkway um, ɓay mum tum vra' gu viŋə mənɪ wa gu viŋə mə nya daŋ' njay ta rawti kwa 'yem mbi vra' gu bak Ifray mə mbri.

²⁰Sôwâ zu' vra' gu rum wə rawti kwa 'yem mbi vra' gu wə rəka so, vəswə wə pā mbə han ne də rəka hā day kilometrə kis hinji', ɓay ciriŋ rum nday ret vun nda'a.

Kwawe 15

¹Kəki rum, na we kwa ta' kwa məsin wə wafray, kwata' kwa rum toŋ ɓay jin' wa. Na we sum sin Ifray mə wafray sedā' mənɪ kə boni cem cem sedā' wə ɓa nday, boni mə sedā' kuni ndo' vun boni, zə Ifray wə ndo' vun bak um kə ndi.

²Na faŋ we kwa ce' ndə ya mbi mə kel kel mənɪ tɔm nji kə ku. Na we sôwâ mənɪ ŋgô tlew gop kə foto rum kə swə mənɪ lamba wə ta' semde rum ta', handay car hay' ya mbi mə kel kel rə hərə', ɓay handay kaw mbəliŋ mənɪ Ifray ne nday wə ɓa ndaya.

³Handay wə dā nyem bə sin Ifray mə de kə Moyizə ɓay nyem vay cime: Bârî Ifray mə kə gbəgbonɔ daŋ', sin wû toŋ ɓay jin' wa! Jwə sôwâ nya daŋ', vari wû njeŋ ɓay kəzini!

⁴Bârî, sa cu də ne wəlok ru mi su? Sa cu də gi mbra' hay' ru mi su? Zə ha daw sar dan dan mə bro'. Sôwâ nya daŋ' də mbə, ɓay də kuduk nya kor ru kədan handay wû buru. Zə sin wû mə njeŋ pā wə rəka takrama.

⁵Kəki rum, na we so po' fur mə wafray ar vun, ɓay na we jew mənɪ Ifray wə han wə rawti so po' fur rumu.

⁶Sum sin Ifray mə wafray mənɪ kə boni sedā' wə ɓa nday wur mbə rawti so po' fur rum, handay ge mbraw mə galbat mə ɓu mə wədi wədi wə tu nday, ɓay handay baŋ fir nday kə zew mənɪ gi kə njike mə bondo.

⁷Kwa daw wə du kwa fədi' mə kə i nə ne timbi mənɪ ri kə njike mə bondo sedā' ne kə sum sin Ifray mə wafray mə sedā' kuna. Bak Ifray mə də hā nyen wə rawti timbi kuni pefe.

⁸Dewku nduɓ rawti so po' fur mə wafray zə mbra' kə gbəgbonɔ Ifray bay swə daw cu gak ze də han mi hâ say boni mə sedâ' mənɪ sum sin Ifray mə wafray kuni kaw wə ɓa nday kuni ndo' sin ndaya.

Kwawe 16

¹Na faɲ mun wor car mbə rawti so po' fur mə wafraya ka' dan ne kə sum sin Ifray mə wafray mə sedâ' kuni kə gbəgbonɔ: I də wu' bak Ifray mənɪ wə rawti timbi mə sedâ' kuni wə wa nya.

²Bə sin Ifray mə wafray mə vun kofo 'ya bay ta wu' bak Ifray mənɪ wə rawti timbi um ta wa nya. Kəri rum, mbir mə bro' mənɪ wə ti juk mbə wa sôwâ mənɪ ve lamba tlew gop bay wə bur foto tlew gop na.

³Bây hoɓ vay sin Ifray mə wafray wu' bak Ifray mənɪ wə rawti timbi um ta wa ya mbi: Mbi faɲ ce' ndə vəswə mar, bay kwa mənɪ kə i mənɪ wə pemây daɲ' mənɪ wə rawti ya mbi rum mara.

⁴Bây hinji' vay sin Ifray mə wafray wu' bak Ifray mənɪ wə rawti timbi um ta wa ze kə i mbi, bay handay faɲ vəswa.

⁵Kəri rum, na mun wor bə sin Ifray mə wafray mənɪ kə gbəgbonɔ wa mbi ini: Ha Swə mə 'Bay mənɪ kəta' tam bay mənɪ kəta' ɓa', ha njeɲ kəri mənɪ ha ɓok dan ndəna'a.

⁶Zə handay gi vəswə raw sôwâ Ifray kə mə sum ka' dan kuni ne, bay mgbaɲ ni nə, ha ne vəswə ne nday ce. Handay fe kwa mənɪ handay nde i rum si!

⁷Na faɲ mun wor məsin car mbə kwa cu kwa po' fur ini: Awo, Bârî Ifray mə kə gbəgbonɔ daɲ', dan ɓok wû kuni kəzin' bay njeɲe.

⁸Bây fəɗi' bə sin Ifray mə wafray wu' bak Ifray mənɪ wə timbi um ta wa fəta, bay Ifray ne vari ne kə fəta kədan mum rop sôwâ kə ku rumu.

⁹Fəta rop sôwâ kə ku um bayrum hâ handay i semɗe Ifray mənɪ kə gbəgbonɔ wa boni mənɪ kuni, ama handay cu mun ar kwa mə bro' nday bay faɲ gi mbra' ne kə Ifray mi.

¹⁰Bây vatl bə sin Ifray mə wafray wu' bak Ifray mənɪ wə rawti timbi um ta wa kwasuk jwə tlew gop na: 'Bay ri mə ura' mbə kəmbo' ri suk jwə umu. Sôwâ wə ti se'le nday zə boni mənɪ handay wə ce.

¹¹Handay wə i Ifray mə wafray zə boni mənɪ handay wə ce kə mbir mənɪ wə nday ti, ama handay cu mun ar sin mə bro' mənɪ handay wə gi nə mi.

¹²Bây kanki' bə sin Ifray mə wafray wu' bak Ifray mənɪ wə rawti timbi um ta wa ze mə mbri mə ɗe kə Efratə, mbi ze rum câ' kədan ar vari ne kə jwə cem cem mənɪ car mbə ga' fəta bəka.

¹³Kəri rum, na we gam hinji' ra' nji kə gêw, handay wur mbə vun ba kwa yew mə ɗe kə dragon, kə vun tlew gop, bay vun bə ka' dan mə hay dana.

¹⁴Handay simbed' gam mēni wə gi yew cem ceme. Simbed' mē hinji' kuni wə də hay' sum jwə wa nya daŋ' kədan handay ɓawa nday zə zi mēni wə də gi kə ɓəka mē mbri mē Ifray mē kə gbəgboŋ daŋ'ŋ.

¹⁵A mun ri', na wə də mbə ce' ndə hura. Kədam zə swə mēni suk wə ji ɓay wə kar zu mbraw um kədan mum ta kə tu mē uray mi. Zə mum la' wə ta kə tu mē uray si, zur wə um gi kor sôwâ.

¹⁶Simbed' mē hinji' kuni wə ɓawa sum jwə cem cem wə ri mē de kə vun Hebre: Armagedoŋ.

¹⁷Bây sedâ' bə sin Ifray mē wafray wu' bak Ifray mēni wə rawti timbi um ta mbok fray kə nya, ɓay wor car mbə rawti so po' fur mē wafraya. Wor rum car mbə kwasuk jwə ɓay ka' dan kə gbəgboŋo: Kwa rum gi si!

¹⁸Buŋô wədi, kwa tlər, buŋô dləmbur, ɓay nya nyen kə gbəgboŋo. Daka kəri mēni Ifray gi sumra', nya cu nyen kə gbəgboŋ ndəna' daw mi, zə nya rum nyen kə gbəgboŋ dle tu si!

¹⁹So mē mbri rə ɓul du hinji', ɓay so cem cem wə nya daŋ' bru. Ifray dik dan wa so mē mbri mē de kə Babiloŋ, ɓay mum ne sum viŋə mēni wə timbi um ne sə ce, wa' dan in i bak um mē mbri.

²⁰Dol mēni wə du mbi daŋ' tuɓ du mbi, ɓay swə cu gak we igway' daw za' mi.

²¹Kakiyew mē rôwâ mēni mbra' ɓayrum car wafray njay mbə wa sôwâ nya, ɓay handay wə i Ifray zə boni mēni mbə wa nday kə kakiyew rum, zə boni rum kəcik dle tu si.

Kwawe 17

¹Kəri rum, bə sin daw wə du sum sin Ifray mē wafray mē sedâ' mēni kaw timbi mē sedâ' wə ɓa nday nə la' ne nana: A mbə, ɓay na də wû ta' vari mēni Ifray wə də gi boni ne kə i gi nja mē mbri, wa' dan ini: So mē mbri mēni dam wə ri mēni vun ya mbi cem ceme.

²Sum jwə nya ar tu nday kə gi ghəghay kə sə, ɓay sôwâ mēni gay' wə wa nya ar tu nday gal kə sum viŋə, wa' dan ini: Ghəghay mēni ta wə gi.

³Simbed' Ifray mbə wa rin, ɓay vay sin Ifray mē wafray tle nan ta du igop kə rini. Wə han, na we ma suk wa tlew gop mē tlew mēni semde mēni i Ifray wây' wə tu rum cete. Tlew gop nə kə wa sedâ' ɓay mek gubu.

⁴Ma rə ge mbraw mē tlew col col kə mē tlew gwel wə tu sa. Ta gila' tu sə kə kwa jid' mēni ri kə njike mē bondo, kə gway' cem cem mēni coɓ nday kəcik, ɓay ri mēni coɓ nday kəcik mē de kə perlə. Ta kaw timbi mēni ri kə njike mē bondo wə ɓa sə, kwa mē bro' kə tu day mēni car mbə du ghəghay sə nyen timbi rum pedé.

⁵Semde mēni zu dan rum pe' 'yeŋ wây' wə vuk sa: Babiloŋ mē mbri, ya vra' rawkwa mē gi nja kə sôwâ mē gi ghəghay wa nya.

⁶Na we ma rə gal kə vəswə sôwâ mə kələŋ kə vəswə sôwâ mənɪ məsin ci nday zə handay ta njeŋ zə Zezu. Kəri mənɪ na we sə, kwa rum jin' wa ne nan juku.

⁷Zə rum, bə sin Ifray nə ci vun rini: Zə mi kwa rum jin' wa ne nu su? Na də wû pay zu dan mənɪ pe' wa ma rə kə tlew gop mənɪ ta suk wa rum, tlew gop mənɪ kə wa sedâ' bay mek guɓ na.

⁸Tlew gop mənɪ ha we nə ke kə i ɓa' si, ama mgbaŋ ni nə, mum cu kə i za' mi. Mum də pâ mbə rawti zra mə ciriŋriŋ, ama mum pâ kədan mum də dənoko. Kəri mənɪ sôwâ mənɪ gay' wə wa nya, sôwâ mənɪ semde nday cu wây' wə du dərwa mənɪ Ifray wây' semde sôwâ mənɪ kə nyî mə də hâ wə han daka təŋ zə nya kuni mi, də we tlew gop nə, kwa rum də jin' wa nday ne, zə mum ke kə i ɓa' si, ama mgbaŋ ni nə, mum cu kə i za' mi, bay mum wə də pâ kəreme.

⁹Say swə ke kə kwawe kə gwet kədan mum mun zu dan mənɪ na. Wa mə sedâ' kuni wə ta' daw igway' mə sedâ' mənɪ ma rə suk wə hana. Daw igway' mə sedâ' kuni wə ta' sum jwə nya mə sedâ' ta'a.

¹⁰Jwə vatl wə du sum jwə mə sedâ' kuni par tətâ si. Daw du nday suk jwə tam, bay məsin du nday cu mbə mət'o. Kəri mənɪ mum də mbə, mum cu də suk jwə ri bayrum mi.

¹¹Tlew gop mənɪ ke kə i ɓa' si, ama mgbaŋ ni nə mum cu kə i za' mi, mum nə bāy coho' jwə mənɪ wə du sum jwə mə sedâ' mə vun kofo kuna. Bay mənɪ wə də pâ kədan mum də ri vi'i.

¹²Mek mə guɓ mənɪ ha we kuni wə ta' sum jwə guɓ mənɪ cu təŋ gay' jwə mət'o, ama handay də fe gbəgboŋ kədan handay gay' jwə du ler daw kə tlew gop na.

¹³Handay guɓ daŋ' kə dan dɪk mə daw, bay handay ar gbəgboŋ nday kə mbra' nday ne kə tlew gop na.

¹⁴Handay də zi kə vay cime, ama vay cime də nday ngô, zə mum nə Bârî wa sôwâ rôwâ bay mum nə Jwə wa sum jwa. Mum də nday ngô kə sôwâ mənɪ ta njeŋ zə um, sôwâ mənɪ Ifray de nday bay da' ndaya.

¹⁵Bə sin Ifray mə wafray nə la' ne nan kəreme: Mbi mənɪ ha we i gi nja rə suk han kuni wə ta' sôwâ cem cem, raw sôwâ cem cem, sôwâ nya cem cem, kə vun cem ceme.

¹⁶Mek mə guɓ mənɪ ha we kə tlew gop nə, handay də sî i gi nja rə, handay də ra' jid' tu sə daŋ' bay də sə ar kə tu uray, handay də ti tlew sə, bay handay də sə ye' kə ku.

¹⁷Zə Ifray no' mē' wə vunduk nday kədan handay gi dan dɪk um, handay kawvun daw kədan handay ar mbra' jwə nday ne ke tlew gop nə hâ say ka dan Ifray nyen mbi si.

¹⁸Ndo' vun rum, ma mətɪ ha we rə wə ta' so mə mbri mənɪ wə suk gbəgboŋ wa sum jwə nya.

Kwawe 18

- ¹Kəki rum, na we bə sin Ifray mə wafray məsin car wafray dam mbə wa nya. Mum kə gbəgbonɔ ɓayrum, ɓay mbra' um wə ɗəri wa nya cete.
- ²Mum ka' dan kə gbəgbonɔ: Ta nde si, so mə mbri mə ɗe kə Babilon rə nde si, mgban ni nə ta faɲ ri gay' sum sin Satan, ɓay ri pe' gama. Rugwa kə tlew gop mə bro' cem cem ɗaɲ' gay' wə hana.
- ³Zə ta ne sum viɲə bak ghəghay sə ne kə sôwâ nya ɗaɲ' ce. Sum jwə nya ar tu nday kə gi ghəghay kə sə, ɓay sum gi par wa nya ndak kə kwa mə ɓay sə mə dan ndo'o.
- ⁴Na faɲ mun wor məsin mənɪ car mbə wafray ini: Sôwâ man, i wur mbə hay' sə, kədan i ke du kwa mə bro' sə mi, ɓay kədan i ce boni cem cem mənɪ wə ɗə mbə wa sə kuni mi!
- ⁵Zə kwa mə bro' sə njəbo wa nji hâ ta day wafray, ɓay Ifray wə ɗik dan wa sin mə bro' cem cem mənɪ ta gi.
- ⁶I gi sə ce' ndə mənɪ ta gi ni, i po' bal kwa mənɪ ta gi hay' ri kuni vun nyem hoɓo. I wu' kwace mə bak mənɪ bak rum pâ kwace mənɪ ta gi ne ni nə vun nyem hoɓ ɗə wə timbi sa.
- ⁷I gi cik kə boni ne sə ce' ndə mənɪ ta fe mbra' kə kwa mə ɓay zə tu sa. Zə ta wə in kə tu sa: Na suk ti ce' ndə mə jwa. Na cu rənda mi, ɓay na cu ɗə ke kə dan ɗik kpe mi.
- ⁸Ze rum, boni cem cem mənɪ njay wə zə sə ɗaɲ' wə ɗə mbə wa sə du bəka ɗawa: mar, kə dan ɗik mar, mē', ndəna' ku ɗə sə ye', zə Bârî Ifray mənɪ wə ɓok dan wa sə nə kə gbəgbonɔ.
- ⁹Kəri mənɪ sum jwə nya mənɪ ar tu nday kə gi ghəghay kə sə ɓay tuk kədam kə kwa mə ɓay sə ɗə we ɗewku mənɪ car mbə ku mənɪ wə sə ye', handay ɗə ci' kə way' ɓa wa sa.
- ¹⁰Handay ɗə gay' rəka seɲ kə so rə, zə handay wə ne wəlok boni mənɪ ta wə ɗə ce, ɓay handay ɗə ini: Kaya! Kaya! Babilon, so mə mbri kə mbra', həɲ fe boni ndəna' du ler ɗaw sara!
- ¹¹Sum gi par wa nya wə ci' kə way' ɓa wa sə, zə swə ɗaw cu coɓ kwa coɓ nday za' mi.
- ¹²Kwa coɓ nday mənɪ wə ɓa nday mənɪ kuna: Njike mə bondo, njike mə ɓu, gway' cem cem mənɪ coɓ nday kəcik, ri mənɪ coɓ nday kəcik mə ɗe kə perlə, zim bor mə galbat mə tlew col col kə mə tlew gwel, siliki, cap gu cem cem mənɪ coɓ nday kəcik, cap kwa cem cem mə ri kə se' boknay, cap kwa mə ri kə gu cem cem mənɪ coɓ nday kəcik, cap kwa cem cem mə ri kə njike mə tlew, cap kwa cem cem mə ri kə njike mə ura', cap kwa cem cem mənɪ ri kə gway' mə ɗe kə marbrə,
- ¹³kwa mə far wa mbar mə ɗe kə kanel, kwa mə far wa mbar mə ɗe kə amom, urdi cem cem, mbir gu mə ɗe kə mirə, kwa mə sî ndə urdi mə ɗe kə aɲsaɲsə, sum viɲə, mur, fur, alkamari, naw, cime, nda', saret, bek, kə sumra'a.
- ¹⁴Sum gi par kuni wə in ne kə so ra: Kwa mə ɓay mənɪ həɲ kə mē' rum ɗaɲ' vi' si. Doknay maɲ kə kwa mə ɓay maɲ ɗaɲ' vi' si, ɓay həɲ cu ɗə nday za' kpe za' mi.

¹⁵Sum gi par mēni ndak kə gi par wə rawti so rə, handay də gay' rəka seŋ kə so rə zə handay wə ne wəlok boni mēni ta wə də ce. Handay də ci' kə way' ɓa wa sa.

¹⁶Handay də ini: Kaya! Kaya! Boni ɓayrum wa so mə mbri mēni ke ge mbraw zim bor mə tlew col col kə mə tlew gwel wə tu sa. Ta ke gila' tu sə kə kwa jid' mēni ri kə njike mə bondo, kə gway' cem cem mēni coɓ nday kəcik, ɓay kə ri mēni coɓ nday kəcik mə de kə perlə.

¹⁷Bay ta vi' doknay mēni kuni daŋ' du ler daw sara. Sum cinik da mə rōwā kə sōwā mēni wə ur da nday, kə sōwā mēni wə gi sin wə rawti da, ɓay sōwā mēsin daŋ' mēni wə ur tu nday du mbi, handay gay' rəka seŋ kə so rə,

¹⁸ɓay kəri mēni handay we dēwku mēni wə car mbə ku mēni wə sə ye', handay do dana: So mēsin mə ra' nji kə so mə mbri rə cu daw mi!

¹⁹Handay wə ra' nya far də wa nday, handay wə ci' kə way' ɓa, ɓay handay wə do dana: Kaya! Kaya! Boni ɓayrum wa so mə mbri ra! Sōwā daŋ' mēni kə da wa ya mbi wə ndak zə sə, ta vi' kwa daŋ' du ler daw sara!

²⁰Wafraɣ, a tuk kədam kə ndo' sa! Bay raw sōwā mə kələŋ, kə sum sin, ɓay sum ka' dan, i tuk kədam, zə Ifraɣ ɓok dan wa sə zə kwa mə bro' mēni ta gi wa ri!

²¹Kəri rum, bə sin Ifraɣ mə wafraɣ mə kə gbəgbonɣ tle gway' mēni toŋ rum ce' ndə gway' vəna ɓay dā ta du ya mbi kə ini: Ifraɣ də dā so mə mbri mə de kə Babilonɣ də rəka kə gbəgbonɣ ce' ndə mēni na dā gway' rə, ɓay swə cu də sə we kpe za' mi.

²²Swə cu də mun ci' mbəliŋ, duɓ kəya', kə duɓ, ko wor sum dā nyem wə rawti riŋ kpe za' mi. Swə cu də za' swə mēni gi sin wə han daw mi, swə cu də mun ci' gway' vəna mēni wə hutu u wə han za' mi.

²³Ri mə ɓu ɓaŋgay cu də dəri wə rawti riŋ kpe za' mi. Swə cu də mun wor bə cin ma kə wor i cin nji wə han za' mi, zə sum gi par maŋ ke sum gi par mə kə mbra' wa nya daŋ', ɓay kə vari hwa' mēni həŋ ke kaw, həŋ vi' sōwā daŋ' kə ndi.

²⁴Ifraɣ gi boni ne kə Babilonɣ zə mum za' vəswə sum ka' dan um kə vəswə raw sōwā um mə kələŋ wə han, vəswə sōwā daŋ' mēni sōwā ci nday wa nya.

Kwawe 19

¹Kəki rum, na mun wor raw sōwā juk car mbə wafraɣ do dan kə gbəgbonɣo: Aleluya! Sid', mbra', ɓay gbəgbonɣ kuni nə mə Ifraɣ mba.

²Dan ɓok um kuni kəzin' ɓay njeŋe. Zə mum kaw i gi nja mə mbri mēti wə dənok nya kə ghəghay sə, mum sa' bal wa sə, zə ta ci sum sin umu.

³Bay handay faŋ in kəreme: Aleluya! Dewku mēni car mbə ku rum, wə jo də fraɣ hā də hā.

⁴Kəsa' mə guhoɓ wa fədi' kə kwa fədi' mə kə i kuni kuduk ta nya ɓay bur Ifraɣ mēni suk wa kwasuk jwə kə ini: Amen. Aleluya!

- ⁵Wor car mbə wə kwasuk jwə kə ini: Hi sum sin Ifray, bay hi sôwâ mənî wə um ô, sôwâ rôwâ kə dawre' dan', i bur Ifray mba!
- ⁶Na faɲ mun wor ce' ndə wor sôwâ mə raw mənî wə ci' ce' ndə mbi mə mbri mənî wə ne wa gway', ce' ndə buɲô mənî wə dləmbur kə gbəgboɲo. Na mun handay wə ini: Aleluya! Ze Bârî, Ifray mba mə kə gbəgboɲ dan' suk Jwa!
- ⁷Mə tuk kədām, bay mə tuk kədām bayrum, mə gi mbra' ne num, zə ri gi cer dər vay cime nə mbə si. 'Bay ma rum gila' tu sə si,
- ⁸ta fe vari kədan ta ge mbraw zim bor mə galbat mənî wə wədi bay dan day wə tu sa. Zim bor mə galbat nə wə ta' sin mə njeɲ mənî raw sôwâ Ifray wə gi.
- ⁹Bə sin Ifray mə wafray nə la' ne nana: A wây' dan mənî na! Kədām zə sôwâ mənî Ifray də nday kədan gi cer dər vay cime! 'Bay mum faɲ in kəreme: Dan mənî kuni dan Ifray mə kəzin' na.
- ¹⁰Na nde ta nya kor rum kədan na um bur, ama mum la' ne nana: A kaw wa ru kədan a gi ndəna' mi! Na bə sin ce' ndə ha, bay ce' ndə daw ba wû mənî ve dan mə kəzin' mənî Zezu ta' ne ndaya. Say a bur Ifray, zə dan mə kəzin' mənî Zezu ta' ne kə sôwâ, mum nə dan dik, mənî sum ka' dan wə ka'a.
- ¹¹Kəki rum, na we wafray ar vun bay nda' mə bu pâ, swə mənî ur wa rum nə də kə Njeɲ bay Kəzini. Mum wə bok dan kə zi kə vari mə njeɲe.
- ¹²I rum wə wədi ce' ndə ku, bay mum kə njukwa raw we wa rum, mum kə semde wây' wə wa rumu. Swə dāw cu gak we zu rum mi, say mum taw sara.
- ¹³Mum ge mbraw mə mbri mənî mbal kə vəswə, semde rumu: Dan Ifraya.
- ¹⁴Sum zi mə wafray wə ji zu rumu. Handay ur wa nda' mə bu, bay handay ge mbraw zim bor mə galbat mə bu bay dan day wə tu ndaya.
- ¹⁵Masəlam mə tise' wə pâ mbə vun rum kədan mum də tum sôwâ nya kə ndi. Mum də suk jwə wa nday kə dliw njike, bay mum də zu' vra' gu wə rawti kwa 'yem sum bak Ifray mə kə gbəgboɲ dan'ɲ.
- ¹⁶Semde mənî wây' tu mbraw um bay wə sem rum nə ni na: Jwə mə wa sum jwə, bay Bârî mə wa sum rôwâ.
- ¹⁷Na faɲ we vay sin Ifray mə wafray car wə du fəta. Mum ka' dan ne kə rugwa dan' mənî wə dla' fray kə gbəgboɲo: I mbə, i bəwa kədan i ti kwati mə mbri mə Ifraya!
- ¹⁸I mbə ti tlew sum jwə, tlew sum rôwâ soje, tlew soje, tlew nda', tlew sum ur nda', kə tlew sôwâ dan', sôwâ mənî kə wa tu kə bek bay sôwâ rôwâ kə dawre'e.
- ¹⁹Na faɲ we tlew gop, kə sum jwə nya, bay sum zi nday bəwa kədan handay zi kə swə mənî ur wa nda' nə kə sum zi umu.
- ²⁰Handay kaw tlew gop nə kə bə ka' dan mə hay dan mənî wə gi yew cem cem wə kor tlew gop na. Kə yew cem cem mənî mum wə gi kuni, mum vi' sôwâ mənî ve lamba

tlew gop nə ɓay wə bur foto umu. Handay tle tlew gop nə kə bə ka' dan mə hay dan nə pik nday hoɓ jak kə i ta du ku ke kwa məni wə ye' ku ɓay sî bro' mə də kə sufrə.

²¹Swə məni ur wa nda' nə ci sôwâ məsin kə masəlam məni wə pâ mbə vun rum, ɓay rugwa daŋ' ti tlew nday hâ rawti nday sa'a.

Kwawe 20

¹Na faŋ we bə sin Ifray mə wafray car mbə wafraya. Mum kə kwa ar vun zra mə ciriŋriŋ kə cururu mə bil' wə ɓa rumu.

²Mum kaw ba kwa yew mə də dragon, mum nə wu' mə ɓa' mə də kə Satan ɓay mum jew num kə cururu zə kim mbu dāwa.

³Bə sin Ifray mə wafray nə ge num ta rawti zra mə ciriŋriŋ, ɓay mum gay' vun rum kə kwa ar vun zra na. Mum cin lamba wə vun zra nə kədan ba hurum nə gak vi' sôwâ nya za' mi hâ say ka kim mbu dāw nə pâ si. Kəki rum, vay sin Ifray mə wafray nə də um ulay' zə ri kî.

⁴Kəki rum, na we kwasuk jwə rawa. Ifray ne gbəgboŋ ne kə sôwâ məni gay' wə han kədan handay ɓok dana. Na faŋ we nyî sôwâ məni sôwâ məsin ci nday zə handay wə ka' dan mə kəzin' məni Zezu ta' ne nday ɓay dan Ifraya. Handay cu bur tlew gop nə ko foto um mi, ɓay handay cu ve lamba tlew gop nə wə vuk nday ko wə ɓa nday mi. Ifray ra' nday mbə mar, ɓay handay gay' jwə kə Kris wə du kim mbu dāwa.

⁵Sôwâ məni mar cu də car mbə mar mi, hâ ka kim mbu dāw nə pâ si. Mum nə pâ mbə mar mə vun kofo na.

⁶Sôwâ məni car mbə mar mə vun kofo kuni wə də tuk kədam ɓay də ke kəleŋe! Bây hoɓ mar cu kə gbəgboŋ wa nday mi. Handay də ke sum po' fur mə Ifray kə mə Kris, ɓay handay də gay' jwə kə rum du kim mbu dāwa.

⁷Kəri məni kim mbu dāw nə ndo' si, bə sin Ifray mə wafray nə də ulay' Satan mbə so daŋgay',

⁸ɓay mum wə də ɓu sôwâ məni pla' wə wa nya daŋ', wa' dan ini: Gog ɓay Magog. Mum də ɓawa nday kədan handay zi, ɓay handay də ke raw ce' ndə nyetl vun ya mbi.

⁹Handay də pla' wa nya daŋ', ɓay handay də reŋ wa ri məni sôwâ Ifray gay' wə han kə so məni Ifray ba. Ama ku car wafray mbə wa nday ɓay ye' ndaya.

¹⁰Kəri rum, Ifray kaw Satan məni wə nday ɓu nə ge num ta du ku kə kwa məni wə ye' ku ɓay sî bro' mə də kə sufrə, wə ri məni handay pik tlew gop kə bə ka' dan mə hay dan kuni ta wə hana. Handay də ce boni han fəta kə dukri daŋ' hâ də hâ.

¹¹Kəki rum, na we kwasuk jwə mə toŋ mə ɓu kə swə məni suk wa rumu: Nya kə wafray pik ne wə kor rum, ɓay sôwâ cu we nday za' mi.

¹²Na faŋ we sôwâ məni mar, sôwâ rôwâ kə dawre', gay' wə kwasuk jwə nə, Ifray ar vun dərwa cem cem, ɓay mum ar vun dərwa məsin kəreme: Dərwa rum nə dərwa

məni Ifray wây' semde sôwâ məni kə nyî mə də hâ wə han, Handay bok dan wa sôwâ məni mar ce' ndə sin məni handay gi ce' ndə dan məni mum wây' wə du derwa kuna.

¹³Ya mbi kə zra mar ar mar məni wə rawti nday wur ta rəka, mar daw daw daŋ' fe dan bok kəri rumu.

¹⁴Ifray ra' mar kəri məni sôwâ məni mar gay' wə han kuni pik nday ta du ku. Ku nə bây hoḅ mar na.

¹⁵Bay Ifray dâ sa su daŋ' məni semde um cu wây' wə du derwa məni mum wây' semde sôwâ məni kə nyî mə də hâ wə han nə mi ta du ku na.

Kwawe 21

¹Kəki rum, na we wafray mə mbrew kə nya mə mbrew. Wafray mə vun kofo kə nya mə vun kofo ndo' si, bay ya mbi cu za' mi.

²Bay na we so mə bay, so Jeruzalem mə mbrew car mbə wafray hay' Ifray, so rə gila' tu sə ce' ndə vay ma mēti gila' tu kədan ta də ndewa kə nja sa.

³Na mun wor car mbə kwasuk jwə in dan kə gbəgboŋo: Mgbanj ni nə, ri suk Ifray wə du sumra'a. Mum wə də suk kə ndaya. Bay handay də ke sôwâ um bay Ifray də ke Ifray məni kə ndaya.

⁴Mum də mâ' zim i nday daŋ', mar, ko dan dik, ko ci', ko boni cu də ke za' mi, zə kwa mə kəmar ndo' si.

⁵Kəri rum, swə məni suk wa kwasuk jwə nə ini: Mgbanj ni nə, na gi kwa daŋ' kə mbrew. Mum faŋ in ne nana: «A wây' dan məni nə, zə dan daŋ' məni na in kuni kəzin' bay nde i kədan sôwâ njay vunduk nday wa ndaya.»

⁶Bay mum faŋ in kəreme: Kwa daŋ' gi si. Na nə Alfa bay Omega, na bə təŋ zu kwa bay na bə ndo' vun kwa. Swə məni kə mē' mbi, na də ne mbi məni car mbə i mbi məni wə ne nyî mə də hâ um ne ce uraya.

⁷Na də ne kwane ne kə swə məni fe gaŋsem, bay na də ke Ifray um, bay na də ke vay mana.

⁸Ama na də pik sum wəlok, sum vur vur, sum gi kwa mə kə day, sum ci mar, sum gi ghəghay, sum kaw hwa', sôwâ məni wə ta zə ifray mə vun fur, kə sum hay dan daŋ' də du kə kwa məni wə ye' ku bay sî bro' mə də kə sufrə, wa' dan in, bây hoḅ mara.

⁹Vay sin daw wə du sum sin Ifray mə wafray mə sedā' məni kaw timbi sedā' məni ndo' vun boni ke nyen rawti nday ped' wə ba nday nə la' ne nana: A mbə, bay na də ta' vay ma mēti wə də cin vay cime wû ne.

¹⁰Simbed' mə Kələŋ mbə wa rin, bay bə sin Ifray mə wafray nə tle nan ta wa igway' fray seŋ bay mum ta' so mə bay ne nan, wa' dan in i so Jeruzalem mēti car mbə wafray hay' Ifraya.

¹¹So rə wə ta' mbra' Ifraya. Ta wə wədi ce' ndə gway' məni coḅ rum kəcik mə də kə jaspə məni swə gak weri han njəram ce' ndə gway' mə də kə kristal.

- ¹²La' tu ruɓ tonɗ bay mbud' bayrum gan wa so ra. La' tu ruɓ nə kə vun vari guɓ wa hoɓ, bay sum sin Ifray mə wafray guɓ wa hoɓ wə ji vun vari kuna: Semde zə saŋ sôwâ Israyel mə guɓ wa hoɓ wây' wə vun vari kuna.
- ¹³Ga' fəta bəka, hay' dleɗ la' tu ruɓ daw daw daŋ' kə vun vari hinji', ga' wa, vun vari hinji' bay ga' zu vun vari hinji', ga' fəta bəka hinji', bay ga' fəta riya hinji'.
- ¹⁴La' tu ruɓ so rə dam bay nja' kə gway' guɓ wa hoɓ, bay semde sum sin vay cime mə guɓ wa hoɓ wây' wa gway' kuna.
- ¹⁵Bə sin Ifray mə wafray mənɪ wə in dan man ne nə kaw dliw mə kənji' kwa mənɪ ri kə njike mə bondo wə ba rum kədan mum kənji' so rə, kə vun vari bay la' tu ruɓ sə kə ndi.
- ¹⁶So rə dam kə dleɗ fədi'i: Jarak sə kə bwi sə wə vun nji. Bə sin Ifray mə wafray nə kənji' so rə kə dliw umu. Jarak sə Kilometrə mbu hoɓ kə kis hoɓo. Bwi sə kə mbud sə vun nji kə jarak sa.
- ¹⁷Bə sin Ifray mə wafray nə kənji' la' tu ruɓ so rə, mbud' rum pum ba kis kə gufədi' wa fədi', ce' ndə dliw mə kənji' kwa mənɪ sôwâ daŋ' wə kənji' kwa kə ndi kəri rumu.
- ¹⁸La' tu ruɓ nə dam kə gway' mə de ke jaspe, bay tu so rə dam kə njike mə bondo mə bay mənɪ swə gak weri han njəram ce' ndə ver.
- ¹⁹Tor zu la' tu ruɓ so rə dam kə cap gway' cem cem mənɪ coɓ nday kə ciki: Daw gway' rum de kə jaspe, hoɓ rum de kə safir, hinji' rum de kə kalseduwanə, fədi' rum de kə emerodə,
- ²⁰vatl rum de kə sadoniksə, kanki' rum de kə sarduwanə, sedə' rum de kə krizolitə, coho' rum de kə beril, cefadew' rum de kə topazə, guɓ rum de kə krizopazə, guɓ wa daw rum de kə turkowazə, bay guɓ wa hoɓ rum de kə Ametistə.
- ²¹Vun vari mə guɓ wa hoɓ kuni gi kə ri mənɪ coɓ nday kəcik mə de kə perlə. Vun vari daw daw daŋ' gi kə ri mənɪ coɓ rum kəcik mə de kə perlə dawa. Vari so rə gi kə njike mə bondo mə bay mənɪ swə gak weri han njəram ce' nde ver.
- ²²Na cu we so po' fur Ifray wə so rə mi, zə Bârî Ifray mə kə gbəgboŋ daŋ' kə vay cime kəta' wə hana.
- ²³So rə cu kə mē' fəta ko cer kədan dəri wə han mi, zə mbra' Ifray wə dəri han, bay vay cime nə baŋgay sa.
- ²⁴Sôwâ nya də ta kə ri mə bu sə, bay sum jwə nya də mbə han kə mbra' ndaya.
- ²⁵Vun vari so rə də ar ho du bəka daŋ'η. Vun vari kuni cu də ta' kpe mi, zə dukri cu han mi.
- ²⁶Sôwâ də mbə han kə mbra' kə mbâ sôwâ nya.
- ²⁷Ama kwa mə kə day, ko swə mənɪ wə ar tu rum kə gi kwa mə kə day, ko swə mənɪ wə ar tu rum kə hay dan cu də ze də rawti so rə mi. Say sôwâ mənɪ semde nday wây'

wə du ɖɛrwa vay cime mənɪ Ifray wây' semɖe sôwâ mənɪ kə nyî mə də hâ wə han də cok də han tawa.

Kwawe 22

¹Bə sin Ifray mə wafray nə ta' ze mbi mənɪ wə ne nyî mə də hâ ne nan, mbi rum wə wəɖi ce' ndə gway' mə ɖe kə kristal, mbi rum wə pâ mbə kwasuk jwə Ifray kə mə vay cime

²ɓay wə ne wə vari mənɪ wə mbok so ra. Gu mənɪ wə ne nyî mə də hâ car wə vun ze ga' ti kə ga' ti hoɓ jak, gu kuni wə vra' sem guɓ wa hoɓ du kim ɖaw, wa' dan ini: Wə vra' kə cer ɖaw ɖaw ɖaŋ'ŋ. Tlap nday wə car gaɓ sôwâ nya.

³Kwa ɖaŋ' mənɪ Ifray ge nê' rum cu də ke han mi. Kwasuk jwə Ifray kə mə vay cime wə də ke wə rawti so rə, ɓay sum sin Ifray də um buru.

⁴Handay də we vuk um, ɓay semɖe um də wây' wə vuk ndaya.

⁵Dukri cu də ke han za' mi. Sôwâ cu də ke kə mē' ri mə ɓu ɓaŋgay ko mə fəta mi, zə Bârî Ifray də ɖeri mə ɓu um wa nday, ɓay handay də gay' jwə də hâ.

⁶Kəki rum, vay sin Ifray mə wafray nə la' ne nana: Dan mənɪ kuni kəzin' ɓay nde i kəɖan sôwâ njay vunduk nday wa ndaya. Bay Bârî Ifray mənɪ ne Simbed' um ne kə sum ka' dan, mum sin vay sin um mə wafray kəɖan mum ta' kwa mənɪ wə də mbə hərə' kuni ne kə sum sin umu.

⁷Zezu ini: A mun ri', na wə də mbə ga'ri! Kəɖam zə sôwâ mənɪ wə ta zə dan ka' mənɪ wây' wə du ɖɛrwa mənɪ na!

⁸Na Zaŋ, na mun dan ɓay na we kwa mənɪ kuna. Bay kəri mənɪ na ndo' vun mun dan kə we kwa mənɪ kuni, na nde ta nya kor vay sin Ifray mə wafray mənɪ ta' kwa kuni ne nan kəɖan na um buru.

⁹Ama mum la' ne nana: A kaw wa ru kəɖan a gi ndəna' mi! Na bə sin ce' ndə ha, ce' ndə daw ba wû sum ka' dan, ɓay ce' ndə sôwâ ɖaŋ' mənɪ wə ta zə dan mənɪ wây' wə du ɖɛrwa mənɪ na. A bur Ifray ɖaw sara.

¹⁰Mum faŋ in ne nana: A pe' dan ka' mənɪ wây' wə du ɖɛrwa mənɪ nə mi, zə ri mənɪ Ifray par cin kəɖan kwa mənɪ kuni ɖaŋ' də gi nə hərə'e.

¹¹Say swə mə bro' nə də kofo kə gi kwa mə bro', ɓay say swə mə kə day nə də kofo wə du day umu. Say swə mə kələŋ nə də kofo wə du kələŋ um, ɓay say swə mə dan dan mə bro' nə də kofo wə du dan dan mə bro' umu.

¹²Zezu ini: A mun ri', na wə də mbə ga'ri! Na də mbə kə kwa po' wə ɓa rin kəɖan na də ne kə swə ɖaw ɖaw ɖaŋ' ce' ndə sin mənɪ mum gi.

¹³Na nə Alfa ɓay Omega, na bə təŋ zu kwa, ɓay na bə ndo' vun kwa.

¹⁴Kəɖam zə sôwâ mənɪ kol mbraw nday, zə kə gi ndə na', handay fe vari kəɖan handay ti vra' gu mənɪ wə ne nyî mə də hâ, ɓay kəɖan handay cok də rawti so ra.

¹⁵Ama ada kuni, sum kaw hwa', sum gi ghəghay, sum ci mar, sôwâ mēni wə ta zə ifray vun fur, kə sôwâ daŋ' mēni wə hay dan, ko kə dan mēni handay wə in, ko kə sin mēni handay wə gi, handay daŋ' gay' wə rəka so ra!

¹⁶Na Zezu, na sin bə vay sin man mə wafray kədan mum ka' dan mēni kuni daŋ' ne kə kul sôwâ Kris cem cem daŋ'ŋ. Na vay rawti David, na baŋgay vun bəka mēni wə dəri.

¹⁷Simbed' kə Nja vay cime in kuna: A mba! Say swə mēni mun dan rum nə in ta'a: A mba! Say swə mēni kə mē' mbi nə mba. Say swə mēni wə wa' mbi mēni wə ne nyî mə də hâ nə mbə ve uraya.

¹⁸Na Zaŋ, na wə har sôwâ daŋ' mēni wə mun dan ka' mēni wây' wə du dərwa mēni na: Swə daw la' ge dan məsin ta han si, Ifray də ge boni mēni wây' wə du dərwa mēni nə də wa boni mēni bə rum wə də ce nə ta'a.

¹⁹Bay swə daw la' par dan məsin wə du dan ka' mēni wây' wə du dərwa mēni nə ta rəka si, Ifray də par vun vra' gu mēni wə ne nyî mə də hâ mēni mum wə də ne kə bə rum, bay də um tak dan ze də rawti so mə bay mēni dan rum wây' wə du dərwa mēni na.

²⁰Swə mēni wə jeŋ dan mēni kuni daŋ' ini: «Awo, na wə də mbə ga'ri! Awo! A mbə ye Bârî Zezu!»

²¹Na wə wa' i bay Bârî Zezu nə ke kə sôwâ daŋ'ŋ.

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2021, Vitória/ES - Brasil